

New Testament

Kurukh Language

Kurukh - Bible - New Testament

मत्तायोस (Mt)	3
मरकुस (Mc)	81
लूकस (Lc)	134
योहनस (Jo)	218
तइरकर (At)	282
रोमी (Ro)	361
1 कोरिन्थ (1 Co)	396
2 कोरिन्थ (2 Co)	430
गलातिया (Gl)	452
इफेसुस (Ef)	464
फिलिप्पी (Fl)	476
कोलोस्से (Cl)	485
1 थेस्सलोनिकेयर (1 Ts)	493
2 थेस्सलोनिकेयर (2 Ts)	500
1 तीमोथियुस (1 Tm)	504
2 तीमोथियुस (2 Tm)	513
तीतुस (Tt)	520
फिलेमोन (Fm)	524
इब्रानी (Hb)	526
याकोब (Tg)	552
1 पतरस (1 Pe)	561
2 पतरस (2 Pe)	571
1 योहन (1 Jo)	577
2 योहन (2 Jo)	586
3 योहन (3 Jo)	588
यहूदा (Jd)	590
दहदर मंजका कत्था (Ap)	593



Kurukh - Bible - New Testament

मत्तायोस

मत्तायोस 1

- 1 ईद अब्राहमसी खद्दस दाऊदसी खद्दस येसु मसीसी पूरखर ही नामे हवे।
- 2 अब्राहमस इसाकसी तम्बस। इसाकस याकोबसी तम्बस। याकोबस यहूदा अरा आसी भइय्योर ही तम्बस।
- 3 यहूदास फारेस अरा सारासी तम्बस अरा तंग्यो तामार रहचा। फारेस हेसरोमसी तम्बस। हेसरोमस आरामसी तम्बस।
- 4 आरामस अमिनदाबसी तम्बस। अमिनदाबस नास्सोनसी तम्बस। नास्सोनस सलमोनसी तम्बस।
- 5 सलमोनस बोआसी तम्बस अरा तंग्यो राखाब रहचा। बोआस योबेदसी तम्बस अरा तंग्यो रूत रहचा। योबेदस येसैसी तम्बस।
- 6 येसैस दाऊद बेलासी तम्बस। दाऊदस सालोमोनसी तम्बस। सालोमोनसी तंग्यो मुन्द उरियसी तंगआली रहचा।
- 7 सालोमोनस रहोबोअमसी तम्बस। रहोबोअमस अबियासी तम्बस। अबियास आसाफसी तम्बस।
- 8 आसाफस योसफटसी तम्बस। योसफटस योरामसी तम्बस। योरामस ओसियसी तम्बस।
- 9 ओसियस योतामसी तम्बस। योतामस आहाजसी तम्बस। आहाजस हेसेकियसी तम्बस।
- 10 हेसेकियस मनास्सेसी तम्बस। मनास्सेस आमोनसी तम्बस। आमोनस योहोसियसी तम्बस।
- 11 योहोसियस येहोनियास अरा आसी भइय्योर ही तम्बस। ई बेड़ा नू आलर गुडर अरकी बाबुलोन होचर केरर।
- 12 गुडर अरकी बाबुलोन होअना ही खोखा: येहोनियास सलातिऐलसी तम्बस रहचस। सलातिऐलस जोरोबाबेलसी तम्बस।



- 13 जोरोबाबेलस अबियूदसी तम्बस। अबियूदस एलियाकिमसी तम्बस। एलियाकिमस असोरसी तम्बस।
- 14 असोरस सदोकसी तम्बस। सदोकस अखीमसी तम्बस। अखीमस एलियूदसी तम्बस।
- 15 एलियूदस एलेयासरसी तम्बस। एलेयासरस मतानसी तम्बस। मतानस याकोबसी तम्बस।
- 16 याकोबस योसेफसी तम्बस। योसेफस मरियम ही तंगआलस। मरियम येसुसी तंगयो। येसुसिन मसी बअनर।
- 17 ई लेखा अब्राहमस ती दाऊदस गूटी चौदा पिड़ही, अरा दाऊदस ती आलर गुडरअरकी बाबुलोन होअना गूटी चौदा पिड़ही, अरा गुडरअरकी बाबुलोन होअना ती मसीस गूटी चौदा पिड़ही मनी।
- 18 येसु मसीसी कुन्द्रना एन्ने मंजा का आसी तंगयो मरियम अरा योसेफसी पाही मंजकी रहचा खने, आर ही ओन संगे मन्ना ती मुन्द नेम्हा बोलतस ती आद ओत्था ऐख रअना खक्खतारा।
- 19 अन्ति अदही आलस योसेफस उजगो रहचस अरा अदिन नठाबआ मल बेद्दालियस, औंगे आस अदिन कलेकसे अम्बा गे तिहा ननालियस।
- 20 आस इबड़ा कत्था ही सोचनुम रहचस खनेम, उर्बासी पैकस आस गे तुंगुल नू ऐथ्रस दरा आनियस, “योसेफ, दाऊदसी खद्दायो, नीन निंग्हे आली मरियम आबोन ओन्द्रआ गे अमा एल्चा, आद नेम्हा बोलतस ती ओत्था ऐख रई।
- 21 आद खद्द पाको अरा नीन आसी येसु नामे पिंजके, एन्देरगेका आस तंग्हे आलारिन तम्हे पाप गुट्ठी ती नाड़ोस।”
- 22 इबड़ा उर्मी एन्ने गे मंजा धर्मेसी कत्था तिंगुर ती उर्बासी आनका कत्था मनन नेकअन।
- 23 “ऐरा! डिंडा पेल्लो ओत्था ऐख मनो अरा ओन्टा खद्दासिन पाको अरा आसिन इम्मानुऐल बओर अदही माने ‘धर्मेस नम्हे गने रअदस’।”
- 24 योसेफस चोचस खने उर्बासी पैकस पेसका रहचस अन्नेम नंजस ती अदिन बैज्रस अरा तंग्हे आलिन तंग्हा गने ओन्द्रस।
- 25 लिकिन खद्दासी अरगी कुन्द्रना गूटी मरियम गुसन मल केरस अरा आसी नामे येसु पिंजयस।

मत्तायोस 2

1 हेरोदेस बेलासी उल्ला नू यूदेया जिला ता बेतलहेम पद्दा नू येसुस कुन्द्रस। अबड़ा उल्ला नू पुरुब राजी गुट्ठी तरती जोक्को लूरगर आलर येरुसलेम बरचर ती मेना हैलरर,



- 2“यहूदीर ही बेलस कुन्द्रकादस आस एक्सन र'अस? एन्देरगेका ऐम पुरुब तरा आसी बीनकोन ईरकम अरा आसिन ओड़ लग्गा गे बरचका र'अदम।”
- 3इदिन मेंजस ती हेरोदेस बेलस अरा गोट्टा येरुसलेम अनचकरा केरा।
- 4खने बेलस उर्मी यहूदी मुध नैगारिन अरा नेग सिखाब'उरिन खोंइचस ती आरिन मेंजस, “मसीस एक्सन कुन्द्रकादस नेख'ओन।”
- 5अबड़र तिंगियर, “यूदेया जिला ही बेतलहेम पद्दा नू, एन्देरगेका धर्मेसी कत्था तिंगुर इदही पत्त नू एन्ने लिखचका र'अनर।
- 6“अनय यूदेया जिला ता बेतलहेम! नीन एन्ने हूँ यूदेया ही कड़हाब'ऊ उर्मी नगरे गुट्ठी ती सन्नी मलकी, निंग्हे तिम ओर्त कड़हाब'उस बर'ओस, आसिम एम्हे आलर इस्राएल आलर ही महरस मनोस।”
- 7खने हेरोदेस अबड़ा लूरगर आलारिन कलेकसे मीखियस ती बीनको ऐथ्रका पत्त नू ठौका ठौका एका बेड़ा नू बीनको ईथ्रकी रहचा मेंजस।
- 8अरा आरिन बेतलहेम तइय्यरकी बाचस, “नीम कला ती खद्दासी पत्त नू ठौका ठौका मेना ती खद्दासिन खक्खोर होले एंगन हूँ तेंके, होले ऐन हूँ क'ओन ती आसिन ओड़ लग्गा ओंगोन।”
- 9अबड़ा लूरगर आलर बेलासी कत्थन मेंजर ती केरर। अरा ऐरा! एका बीनकोन आर पुरुब नू ईरकाचर, आद आर ही मुन्द मुन्द खद्दासी र'अना अइडा गूटी केरा अरा आद मइय्याँ इज्जा केरा।
- 10आर बीनकोन ईरयर ती नगदे रिझर।
- 11अरा आ एड़पा नू कोरचर ती खद्दासिन तंग्यो मरियम गने ईरयर अरा मुलखरर ती आसिन ओड़ लग्गियर अरा तम्है खुर्जी बकसन तिसगर ती सोना, लोबान अरा गन्धरस आस गे दान नंजर।
- 12अरा आर गे तुंगुल नू चेत खक्खरा का हेरोदेस गुसन अमके किर्रा। ओंगे आर नन्ना डहरे नू तम्है राजी किर्रिम बिच्चियर।
- 13अबड़ा लूरगर आलर ही केरका खोखा, उर्बासी ओन्टा पैकस योसेफस गे तुंगुल नू ऐथ्रस ती बाचस, “चो'आ, खद्दासिन दरा तंग्योन हो'आ ती मिसर राजी बोंगा कला अरा एका गूटी ऐन मल ब'ओन आ गूटी अइय्यम र'अके। इदगे का हेरोदेस खद्दासिन पिटा गे बेद्दोस।”
- 14खने योसेफस चोचस ती माखम खद्दासिन दरा तंग्योन होचस ती मिसर राजी केरस।
- 15आस हेरोदेसी अरगी खे'अना गूटी अइय्यम रहचस। ईद ती उर्बस धर्मेसी कत्था तिंगुर ती तिंका कत्था मंजा का “ऐन मिसर राजी ती एंगदासिन मीखकन।”



- 16 खने हेरोदेस बेलस अबड़ा लूरगर आलर एंगन ठकचकानर बाचस ती नगदे कैरारस। खने आस बेतलहेम अरा अदही उर्मी सिवान ता उर्मी खद्दारिन फउद तइय्यस ती पिटताचस, अन्नेम अबड़ा लूरगर आलर ती मेंजका उल्ला ही लेक्खा अबड़ा पिटतारका खद्दर ऐंड बछर खद्दर महले अदिन ती जुक्की ही रहचर।
- 17 हेरोदेसी ई नलख ती धर्मेसी कत्था तिगू येरेमियास ती तिंका कत्था मंजकी किरकी रहचा:
- 18 “ओन्टा चींखना अरा बग्गे खोबरारना रामा पद्दा नू मेन्द्रई। राखेल तंग्दाबगर गे चींखा लगी अरा ठकर'आ मल बेद्दा लगी, एन्देरगेका आर मलकर।”
- 19 हेरोदेस बेलासी केचका खोखा उर्बासी ओन्टा पैकस मिसर राजी नू योसेफस गे तुंगुल नू ऐथ्रस।
- 20 अरा बाचस, “चो'आ, खद्दासिन अरा तंग्योन हो'आ ती इस्राएल राजी किरिम बि'आ, एकार खद्दासिन पिटा गे बेद्दालियर आर गा केचर केरर।”
- 21 औंगे योसेफस चोचस ती खद्दासिन अरा तंग्योन होचस ती इस्राएल राजी किरियस।
- 22 लिकिन अरखेलोस तम्बा हेरोदेसी अड्डा नू यूदेया नू राजी ननालदस, इदिन मेंजस ती योसेफस असन काला गे इल्चियस। अन्ति तुंगुल नू चेत खक्खियस ती गलिलेया जिला केरस।
- 23 अरा नासरेत नामे पद्दा नू केरस ती ओक्रस। होले धर्मेसी कत्था तिगुर ती बारकी रहचा, “आस नासरेत ता आलस बार'ओस” आ कत्था मनन नेकअन।

मत्तायोस 3

- 1 अबड़ा उल्ला नू योहन नूइरत'उस यूदेया जिला ही टोइंग नू बरचस अरा असन एन्ने तेंगा कुद्दा हेलरस:
- 2 “जियन किर्त'आ एन्देरगेका धर्मेस आलर ही उज्जना नू राजी नन्ना ही बेड़ा हेद्दे अंडसकी रई।”
- 3 योहनस आसिम हिकदस नेख'आ पत नू धर्मेसी कत्था तिगू यसायास बाचका रहचस का, “ओर्तोस टोइंग नू चिच्चियारदस, ‘उर्बासी बरना गे निंगन सपड़'आ अरा आस गे इहरेन चत्र'आ।”
- 4 योहनस ऊंट ही चुट्टी ती कमचका ओन्टा कड़कड़हा किचरिन चो'आलियस। अरा तंग्हे कड़मा नू चपटा ही कमरपटी हें'आलियस। अरा आसी ओन्ना-मोखना बोक्खो गुट्ठी अरा टोइंग तीनी रहचा।
- 5 येरुसलेम नगरे ती अरा गोट्टा यूदेया जिला ही नन्ना नन्ना अड्डा ती अरा यरदन खाड़ ही अड्डे-बेड्डे ती बग्गे आलर आसी गुसन कालालियर।



- 6 असन आर आसी कत्थन मेनरकी तम्है पाप गुट्ठिन पत'आलियर। खने योहनस आरिन यरदन खाड़ नू नोड़रत'आलियस।
- 7 योहनस बग्गे फरिसीर अरा सदुकीरिन नोड़र'आ गे तंग्हा हेद्दे बरनन ईरीयस ती आरिन बाचस, “अना बिक्ख नेर्रे बेसे आलारो, पाप नन्नन बिगर अम्बका ती धर्मेसी बरना दंडे ती बोंगा गे निमन निकईम चेता बाचर का?”
- 8 जियन किर्त'अना ही जोगे नलख नना।
- 9 नीम तम्है तम्है जिया नू एन्ने अमा सोच'आ हेलरा का ऐम अब्राहमसी बनस ता हिकदम। ऐन निमन ब'अदन का धर्मेस इबड़ा पखना गुट्ठी ती अब्राहमस गे खद्द कम'आ ओंगदस।
- 10 अक्कु सुरता नना का धर्मेसी रायबड़ी लेक्खा टोंग'ए मन्न ही पादा नू अबइन खंडा गे उईर खच्चरकी रई। एका मन्न दौ खंजपा मल खंजई अबइन खंडरकी चिच्ची नू सजतार'ओ।
- 11 ऐन गा जियन किर्त'आ गे अम्म ती नोड़रत'अदन, लिकिन एकास एंग्हे खोखा बर'ऊ र'अदस, आस एंग्हे ती कोड़हे सवंगिय र'अदस। ऐन गा आसी खरपन चौदना जोगे मलकन का एकदन बिट्ठी ननू जौखस लेका नन्दस। आस निमन नेम्हा बोलतस अरा चिच्च ती नोड़त'ओस।
- 12 आस तंग्हे केतेर ती गहूँ अरा चींखन बेग'ओस, अरा आस तंग्हे खलिन बेस लगे एर्रोस। अरा आस गोट गहूँ कुट्ठी नू उइय्योस, अरा चींखन चिच्ची नू बस्सोस एकदा इकला हूँ मल तेभर'ओ।”
- 13 आ बारी नू येसुस गलिलेया जिला ती यरदन खाड़ पिंडी नू योहनस गुसन आस ती नोड़रत'आ गे बरचस।
- 14 लिकिन योहनस एन्ने बाचस ती छेकचस, “एंगा गा निंग्हे ती नोड़रना ही चाड़ रई अरा नीन एंग्हे गुसन बरचकादय।”
- 15 खने येसुस आसिन आनाकिर्ताचस, “अक्कु एन्नेम मना चि'आ, नमा गे एन्नेम धर्मेसी मने लेक्खा उर्मी नन्ना चाड़ रई।” खने योहनस येसुसिन नोड़रत'आ गे मने मंजस।
- 16 नोड़रस ती येसुस अम्मु ती उरखस खनेम, मेर्खा तिसग्रा अरा धर्मेसी बोलता पेरवाँ लेक्खा एतना दरा तंग्हे मइय्याँ बरना ईरयस।
- 17 अरा मेर्खा ती धर्मे बबस बाचस, “ईस एंग्हे चोन्हा खद्दस हिकदस, ऐन ईस ती बग्गे खुसमारदन।”

मत्तायोस 4

- 1 तहाँ धर्मेसी बोलतस येसुसिन नाद ती बिद्द'आ गे टोड़ंग तरा कइहाबाचस।



- 2अरा आस चालीस उल्ला अरा माखा उपास नंजस। इदही खोखा आस गे कीड़ा लग्गिया।
- 3आ बेड़ा नू नाद बिढ़आ गे येसुसी गुसन बरचा ती बाचा, “नीन धर्मसी खद्दय होले इबड़ा पखनन ब'आ का इबड़ा ओन्ना-मोखना मनो कओ।”
- 4लिकिन येसुस आनाकिर्ताचस, “मला, एन्देरगेका नेम्हा पुथी नू लिखकी रई, ‘आलस ओन्ना-मोखना ती लेका मल उज्जोस, लिकीन धर्मसी बई ती उरखका उर्मी कत्था ती उज्जदस।”
- 5तहाँ नाद आसिन नेम्हा नगरे येरुसलेम नू कइहाबाचा ती धर्मसी मन्दिर ही अग्गी नू इजताचा,
- 6अरा बाचा, “नीन धर्मसी खद्दय होले नीन डेग'आ चि'आ, नेम्हा पुथी नू गा लिखकी रई, ‘आस निंग्हे पत्त नू तंग्हे पैकारिन आनोस का आर निंगन खापोर अरा आर निंगन खेक्खच खेक्खा चोद'ओर हो'ओर, होले एन्ने अम्बो मना का निंग्हे खेइडेन पखना अम्बो लग्गा।”
- 7येसुस अदिन बाचस, “मला एन्देरगेका नेम्हा पुथी नू एन्ने हूँ लिखकी रई, ‘नीन निंग्हे धर्म उर्बासिन अमके बिढ़आ।”
- 8तहाँ नाद येसुसिन नगदे मेच्छा परता नू कइहाबाचा अरा खेखेल ता सौंसे राजी गुट्ठिन अरा अबड़ा ही महबन ऐदा,
- 9अरा आसिन बाचा, “नीन खेडमूली खत्र'ओय ती एंगन ओइ लग्गोय होले इबड़ा उर्मिन निंगा चि'ओन।”
- 10खने येसुस अदिन बाचस, “अनय सैतान कगरार'अय कलय! एन्देरगेका नेम्हा पुथी नू लिखकी रई, ‘नीन निंग्हे धर्म उर्बासिन ओइ लक्के अरा आसी लेका महबा ननके।”
- 11खने नाद आसिन अम्बिया ती केरा अरा मेर्खा पैकर बरचर ती आसिन तेतर-सुसर नंजर।
- 12येसुस योहनसी धरतारकन मेंजस खने आस गलिलेया जिला किरिम बिच्चियस।
- 13अरा आस नासरेत पद्दा आबोन अम्बियस ती कफरनहूम नगरे नू र'आ हेलरस, एकदा जबुलोन अरा नेफतलिम जिला ही समुदर ही पिंडी नू रई।
- 14होले धर्मसी कत्था तिंगू यसायास बाचकाचस आद अबड़ा मानिम मंजा।
- 15“जबुलोन अरा नेफतलिम देस नू, समुदर डहरे नू, यरदन खाइ ही पक्खे नू, गलिलेया नू बग्गे नन-यहूदीर,
- 16पाप ही ऊखा नू र'ऊ आलर नाइरना ही ओन्टा कोहाँ बिल्ली ऐरोर। अरा खे'अना ही एलचना नू अरा ऊखा राजी नू र'ऊ आलर मइय्याँ रिइरना ही बिल्ली बिल्चो।”



17 आ बेड़ा ती येसुस तेंगा कुद्दा हेल्स, “जियन किर्त आ एन्देरगेका धर्मस आलर ही उज्जना नू राजी नन्ना ही बेड़ा हेददे अंडसकी रई।”

18 येसुस गलिलेया समुदर ही पिंडी नू कुद्दा लगियस खने, आस सिमोन ने पतरस बारदस अरा आसी भइय्योस अन्द्रेयस ऐंड भईरिन समुदर नू जल्ली हेबड़ना ईरयस, आर गा केवँटर रहचर।

19 आस आरिन बाचस, “एंग्हे गने बरा, नीम एकासे इंजोन धर आ लगदर अन्नेम ऐन निमन सिखाब आन आलारिन एकासे एंग्हे चेला मना गे ओन्द्रना रई।”

20 लेम आर तम्है नलखन अम्बरकी आसी गने चौरर।

21 असले मुन्द केरस ती आस नन्ना ऐंड भईर जेबदयु तंगदस याकोब अरा आसी भइय्योस योहनसिन ईरियस। आर तम्बस जेबदयु गने डोंगा नू तम्है जल्लिन तुन आ लगियर। येसुस आरिन मीखियस।

22 खने आर लेम डोंगन अरा तम्बासिन अम्बरकी येसुस गने चौरर।

23 येसुस गोटा गलिलेया नू कुद्दा कुद्दा आर ही गोइहा एइपा गुट्ठी नू सिखाब आलियस अरा मेर्खा राजी ही पत ता दौ कत्था तेंगा कुद्दा लगियस, अरा उर्मी आलर ही रोगे अरा पयहा गुट्ठिन उजग आ लगियस।

24 येसुसी पत ता कत्था गोटा सीरिया राजी नू बीड़ा। आलर मिरगी, लकवा दरा कैनो मदहे बेमार ती लिंङ्का रोगियारिन अरा नाद धरचका आलारिन येसुस गुसन ओन्द्र आ लगियर। अरा आस आरिन उजग आ लगियस।

25 गलिलेया जिला, देकापोली, येरुसलेम, यूदेया जिला दरा यरदन खाइ ही आ पक्खे ती बरचका ओन्टा कोहाँ गोंहड़ा येसुसी खोखा गुड़ियारा।

मत्तायोस 5

1 येसुस कोहाँ आल गोंहड़न ईरयस खने परता मइय्याँ अरगियस ती उक्कियस केरस। अरा आसी चेलर आसी गुसन बरचर।

2 अरा एन्ने ब अनुम आरिन सिखाब आ हेल्स।

3 “ने तम्है बोलता ही चाइ गे धर्मस मइय्याँ असरा उइय्यरकी र अनर, आरिन धर्मस आसीस ननोस, आर मेर्खा राजी ता आलर हिकनर।

4 ने दुक्खे सारनर, आरिन धर्मस आसीस ननोस, आर सान्ति खक्खोर।

5 ने लुदऊ आलर र अनर, आरिन धर्मस आसीस ननोस, आर खेखेल ही उरुब मनोर।



- 6ने धर्मसिन पत'आ गे दिम बेददनर, आरिन धर्मस आसीस ननोस, आर ही मनेन धर्मस पूरा ननोस।
- 7ने सोग्गे ऐरनर, आरिन धर्मस आसीस ननोस, आर मइय्याँ हूँ सोग्गे ऐरतार'ओ।
- 8नेख'आ जिया सफा र'ई, आरिन धर्मस आसीस ननोस, आर धर्मसिन ऐरोर।
- 9ने मेसत'ऊ आलर र'अनर, आरिन धर्मस आसीस ननोस, आर धर्मसी खद'दर बार'ओर।
- 10ने दौ नन्ना चड्डे दुक्खे सह'ऊ र'अनर, आरिन धर्मस आसीस ननोस, आर मेर्खा राजी ता आलर हिकनर।
- 11एकाबारी आलर नीम एंग्हे गने चोंख'उर र'अना चड्डे निमन हींइनर अरा दुक्खे सारत'अनर अरा दोस ठेकाबाच बाच उर्मी रकम ही मल दौ कत्था कछनखनर खने, धर्मस निमन आसीस ननोस।
- 12औंगे नीम रिङ्गके, रिरयारके, एन्देरगेका निमा गे मेर्खा नू कोहाँ इनम र'ई। अरा सुरता नाना का चिरान ता धर्मसी कत्था तिङ्गुरिन हूँ आर एन्नेम खिलपत नंजका रहचर।
- 13नीम खेखेल नू बेक लेक्खा र'अदर। लिकिन बेक ही तीनना मेट'ओ कालो होले, आद अउरिम अदही तीनना मल कमर'ओ। आद इन्दिइम नलख गे मल र'ई, अदिन बहरी हेबइतार'ई अरा आलर ती तिर्ख'ई नाब्र'ई।
- 14नीम खेखेल नू आलर गे बिल्ली लेक्खा र'अदर। परता मइय्याँ नू ओक्रका नगरे नूर'आ पुल्ली।
- 15अन्नेम आलर बिल्लिन लघा ब'अनर ती ढक्की ती मल कुल्लनर महले ढक्की किइय्या मल उइय्नर। लिकिन बिल्लिन पक्खा नू उइय्नर। होले ओर्मर गे बिल्ली ईथ्र'ई।
- 16एन्नेम निम्हा बिल्ली आलर गुसन बिलचते र'अन नेकअन, का आर निम्है दौ नलखन ऐरोर ती निम्है मेर्खा ता बंगासी महबा ननोर।
- 17ऐन मूसासी नेग अरा धर्मसी कत्था तिङ्गुर ही कत्थन मेट'आ गे बरचकादन एन्ने अमके सोच'आ। अबइन मेट'आ गे मला लिकिन अबइन मन्ता'आ गे बरचकादन।
- 18ऐन निमन मानिमन ब'अदन, मेर्खा दरा खेखेल टाइर'ओ क'ओ, लिकिन धर्मसी नेग नू एन्देर लिखकी र'ई अदही बिगर मंजका ओन्टा अक्छर महले ओन कड़ी हूँ मल मुंज'ओ।
- 19औंगे ने अबड़ा सन्नी ती सन्नी पेसका ती ओन्टन हों टाँइदस अरा आलारिन हों एन्ने सिखाब'अदस होले, आस मेर्खा राजी नू उर्मी ती सन्नी मन्तार'ओस। लिकिन ने अबइन पीस'ई अरा अन्नेम सिखाब'ई आर मेर्खा राजी नू कोहाँ मन्तार'ओर।



- 20 ऐन निमन ब'अदन का निम्है नलख यहूदी नेग सिखाब'उर अरा फरिसीर ती दौ मल र'ओ होले नीम मेर्खा राजी नू इकला हूँ मल कोर'ओर।
- 21 नीम मेंजकादर का पुरखारिन आनका रहचा, 'आलारिन अमके पिटा। एकअम ओर्तस पिटोस आस दंडे खक्खोस।'
- 22 लिकिन ऐन निमन ब'अदन का, एका ओर्तस तंग्हे भईस मलता बहिन आबोन खींस मन्दस होले आस दंडे खक्खोस। अरा एका ओर्तस तंग्हे भईस मलता बहिन आबोन मलदौ ब'अदस होले आस महासभा नू दंडे जोगे मनोस। अरा एका ओर्तस एकअम ओर्तासिन 'अना बोया' ब'अदस होले आस नरक ही चिच्ची ही जोगे मनोस।
- 23 औंगे नीन धर्मस गे गोइहा नू दान चि'अदय होले, निंगा असन सुरता बर'ई का निंग्हे भईस गे निंग्हे मइय्याँ इन्द्रिइम बदी र'ई,
- 24 होले निंग्हे दानन असानिम गोइहा नू अम्बा ती मुन्द निंग्हे भईस गने मेसर नख्र'आ अरा बरा ती निंग्हे दानन अरग'आ।
- 25 निंग्हे बैरिस निंगन नैवई ननू अइडा होआलदस होले, कालो बारी इहरेनुम आस गने राजीरमा मना। एन्ने अम्बन मना का आस निंगन नैवई ननुस गे चि'ओस, अरा आस निंगन सैनस गे चि'ओस, अरा सैनस निंगन जेहेल एइपा नू सज'ओस चि'ओस।
- 26 ऐन निंगन मानिम ब'अदन का एका गूटी उर्मी ढिबा मल चिच्च खच्चोय आ गूटी नीन असले उरखा पोल्लोय।
- 27 नीम एन्ने नेगन मेंजकादर का, 'नन्ना आली गुसन अमके काला।'
- 28 लिकिन ऐन निमन ब'अदन का, एका ओर्तस मलदौ सोच ती एकअम आलिन ऐरदस होले, आस तंग्हे जिया नू अदही गने नन्ना आली गुसन काना ही पाप नंज खच्चियस।
- 29 निंग्हे तीना खन्न निंगन पाप नन्त'ई होले, अदिन सम्इह'आ। पाप नन्ना ती सम्इह'आ गे आ खन्नन टोटरना ओथ्रना मनो होले हूँ अदिन टोटर'आ ओथ्र'आ। पाप नन्ना चड्डे ऐंड खन्न र'अनुम नरक नू हेबइना ती बिगर पाप नंजका कना मनरकी धर्मस गने जनमजुग ही उज्जना नू कोरना निंगा दौ र'ई।
- 30 अरा निंग्हे तीना खक्खा निंगन पाप नन्त'ई होले, अदिन सम्इह'आ। पाप नन्ना ती सम्इह'आ गे आ खक्खन खंडना मनो होले हूँ अदिन खंडा चि'आ। पाप नन्ना चड्डे ऐंड खक्खा ही र'अनुम नरक नू हेबइना ती, बिगर पाप नंजका ठुठा मनरकी धर्मस गने जनमजुग ही उज्जना नू कोरना निंगा दौ र'ई।



- 31 नीम एन्ने नेगन हूँ मेंजकादर का, 'एका ओर्तस तंगआलिन अम्बदस होले, आस अदिन अम्बरनख्रना चिठी चि'अदस नेकअन।'
- 32 लिकिन ऐन निमन ब'अदन का 'नन्ना आलस गुसन काना पाप ती एकअम नन्ना पाप चड्डे एकास तंगआलिन अम्बरनख्रना नन्दस, आस अदिन नन्ना आलस गुसन काना ही पाप नन्त'आदस, अरा एकास आ अम्बका आलिन बैज्रदस आस हूँ नन्ना आली गुसन काना ही पाप नन्दस।' 33 अउर हूँ नीम पुरखारिन आनका रहचा अदिन मेंजकादर का 'ठक्वा किरया गुट्ठी अमके मोखा, लिकिन उर्बासी मुन्द किरया मोक्कादय अदिन ननके।'
- 34 लिकिन ऐन निमन ब'अदन, 'किरया इकला हूँ अमके मोखा। मेर्खा ही नामे ती किरया अमके मोखा, एन्देरगेका आद धर्मेसी बेल-गदिया हवे।
- 35 अरा खेखेल ही नामे ती हूँ किरया अमके मोखा, एन्देरगेका आद धर्मेसी खेड्डे उइय्ना ही कंडो हवे। अरा येरुसलेम नामे ती किरया अमके मोखा, एन्देरगेका आद कोहाँ बेलासी नगरे हवे।
- 36 अरा निम्है कुक्कु ही हूँ किरया अमके मोखा, एन्देरगेका नीम ओन्टा चुट्टिन हूँ पन्डरु मलता मोखारो नना पोलदर।
- 37 निम्है कत्था इवन्दम र'ओ, हाँ होले हाँ अरा मला होले मला। एकदा इदिन ती बग्गे मनी, आद मलदौ ती मंजकी र'ई।' 38 नीम एन्ने नेगन हूँ मेंजकादर का, 'निम्है नठाब'उर ती खन्न ही ऊजी खन्न, अरा पल्ल ही ऊजी पल्ल किर्त'आ बिड़द'आ।'
- 39 लिकिन ऐन निमन ब'अदन, 'मलदौ आलर ही बिड़दो नू अमके इज'आ। निकईम निंगन हींइ'आ गे निंग्हे ओन्टा गल्लेन थपड़दस होले, आस गे नन्ना गल्लेन हूँ ऐदके।
- 40 एकअम ओर्तस निंग्हे अंगन हो'आ गे नालिस नन्दस होले, निंग्हे बर्कन हूँ हो'आ चि'आ।
- 41 एकअम ओर्तस निंगन बिट्ठी नू ओन कोस हो'अदस होले, नीन आसी गने दुई कोस कला।
- 42 निंग्हे गुसन ने'उस गे चि'आ। अरा ने निंग्हे गुसले नहड़ा ने'आ बेद्ददस, आस गे बिड़दो मुही अमा नना।'
- 43 नीम एन्ने नेगन हूँ मेंजकादर का, 'निंग्हे अरबर-परबारिन चोन्हा नना अरा निंग्हे बैरीरिन खींस नना।'
- 44 लिकिन ऐन निमन ब'अदन, 'निम्है बैरीरिन चोन्हा नना, अरा निम्है भख'उर गे बिन्ती नना।
- 45 एन्ने नन्ना ती नीम निम्है मेर्खा बंगासी खद्दर मनोर। एन्देरगेका आस दौ अरा मलदौ इरबर मइय्याँ हूँ बीड़ी अरग'अदस अरा उजगो आलर अरा पपहर इरबर गे हूँ चेंप पुंइत'अदस।



46 नीम निम्है गने चोन्हा ननुर ती लेका नीम चोन्हा नन्दर होले धर्मस ती एन्देर इनाम खक्ख'ओर? मालगुजारी ऊज'उर हूँ एन्नेम अदिन नन्नर।

47 नीम निम्है भईरिन लेका मोंजरा नन्दर होले नीम नन्नर ती एन्देर कोहाँ नलख नन्दर? धर्मसिन बल्लुर हूँ एन्ने नन्नर।

48 ओँगेम नीम बड़ियर मना, एकासे निम्है मेर्खा ता बंगस उमी गुन्न नू बड़ियर र'अस।'

मत्तायोस 6

1 चिहूंक र'आ का आलर ही जियन निम्है तरा नतगा गे निम्है दौ नलखन अमा ऐद'आ। नीम अन्ने ननोर होले मेर्खा नू र'ऊ निम्है धर्म बंगस ती नीम इनाम मल खक्खोर।

2 ओँगे नीम कीड़र गे चि'ओर आ बारी इदही हाँक अमा चि'आ, एकासे उत्तुरमाड़र गोइहा एइपा अरा गली कुची गुट्ठी नू नन्नर, होले आलर आरिन सहारर'ओर। ऐन निमन मानिमन ब'अदन का आर तम्है इनाम खक्खा खच्चिका र'अनर।

3 ओँगे एकाबारी नीम कीड़ा आलर गे चि'अदर, अदिन नन्ना आलर अम्बोर अख'आ।

4 निम्है चि'अना अम्बो ऐथ्र'आ अरा निम्है बंगस मल ऐथ्रना नू हूँ निम्है नलखन ऐरदस, आस निमा बग्गे आसीस ननोस।

5 एकाबारी नीम गोहरारदर, उत्तुरमाड़र लेक्खा अमके गोहरार'आ। आर गा गोइहा एइपा नू अरा दोप्फा डहरे नू इजनर ती गोहरार'आ गे पतारनर, होले आलर आरिन ऐरोर। ऐन निमन मानिमन ब'अदन, आर गे तम्है इनाम खक्ख'आ खच्चिया।

6 नीम गा गोहरारना बारी, निम्है कुठली नू कला अरा बलिन मुच्चा ती मल ऐथ्रना नू निम्है बंगस ती गोहरार'आ। निम्है बंगस मल ऐथ्रना नू निम्है नलखन हूँ ऐरदस, आस निमन आसीस ननोस।

7 अरा नीम गोहरारना बारी, ने धर्मसिन बलनर आर ही लेक्खा अनभनियाँ कत्था गे धैना अमा नना। आर सोचनर का घइही गोहरारना ती एम्है गोहरारना मेन्तार'ओ।

8 आर ही लेक्खा अमा मना, एन्देरगेका निम्है ने'अना ती मुन्द तिम निम्है बंगस अखदस का निमा एन्देर एन्देर जिनिस ही चाइ र'ई।

9 ओँगे नीम एन्ने गोहरारके: 'अना एम्है मेर्खा नू र'ऊ बबा, निग्है नामे नेम्हा मनन नेकअन।

10 निग्है राजी बर'अन नेकअन। निग्है मने एकासे मेर्खा नू मनी अन्नेम खेखेल नू हूँ मनन नेकअन।

11 एम्है उल्ला उल्लन्ता ओन्ना-मोखनन इन्ना एमा गे चि'आ।



- 12 अरा एकासे ऐम एम्है उर्मी अक्का-बलकारिन अम्बदम चि'अदम अन्नेम एम्है अक्का-बलकन हूँ अम्बा चि'आ।
- 13 अरा एमन पाप नन्ना ही चिबाखारना नू खतर'आ अमा चि'आ, लिकिन मलदौ ती एमन नाड़ा। [एन्देरगेका राजी दरा सवंग दरा ओहमा हुल्लो गुटी निंगहै दिम रई। आमेन।]
- 14 नीम नन्नर ही अक्का-बलकन छमा ननोर होले मेर्खा ता बगंस हूँ निमन छमा ननोस।
- 15 लिकीन नीम नन्नारिन छमा मल ननोर होले निम्है बगंस हूँ निम्है अक्का-बलकन छमा मल ननोस।
- 16 नीम उपास ननो बारी उतुरमाड्र लेक्खा मुहिन हेन्दव'अके ती उपास अमके नना। आर तम्है मुहिन मडखनर चि'अनर, एकत्रु आलर अख'ओर का आर उपास र'अनर। ऐन निमन मानिमन ब'अदन का आर तम्है आसीस खक्खा खच्चियर।
- 17 नीन गा उपास ननो बारी निंगहै मुहिन मुझुरके अरा कुक्कु नू इसुंग नलभ्रके।
- 18 एकत्रु आलर गे मला निंगहै बंगस गे लेका एकास मल ऐथ्रना नू र'अदस ईद ऐथ्र'ओ का नीन उपास र'अदय। अरा निंगहै बंगस मल ऐथ्रना नू हूँ ऐरदस निंगा इनाम चि'ओस।
- 19 खेखेल नू निमा गे खुर्जी अमा बेंद'आ, एक्सन मुरछा मूखी पोचगो गुट्ठी मूखी अरा खलबर उम्पनर ती खड़नर हो'अनर।
- 20 लिकिन मेर्खा नू निमा गे खुर्जी बेंद'आ, एक्सन मुरछा मल मूखी अरा पोचगो गुट्ठी मल मूखी अरा खलबर उम्पनर ती मल खड़नर हो'अनर।
- 21 एन्देरगेका एक्सन निम्है खुर्जी रई असन निम्है जिया हूँ टंगकी र'ओ।
- 22 मेद ही बिल्ली खन्न। औंगे खन्न फरी रई होले निंगहै सौंसे मेद हूँ बिल्ली र'ओ।
- 23 लिकिन निंगहै खन्न बगडारकी रई होले निंगहै सौंसे मेद ऊखा र'ओ। अरा निंगहै भितरी ता बिल्ली दिम मल रफ'ओ होले नीन मानिम नू कोइहे ऊखा नू र'अदय।
- 24 ने हूँ ऐंड उर्बर ही सुसर नना पोलदस। आस गा ओर्तासिन हींइ'ओस अरा नन्नासिन चोन्हा ननोस, महले ओर्तस गने मेस्रका र'ओस अरा नन्नासिन खाँइ'ओस। ई लेक्खम नीम धर्मसी अरा खेखेल ता खुर्जी ही सुसर नना पोलदर।
- 25 इदगे ऐन निमन ब'अदन, निम्है उज्जा गे अरा निम्है मेद गे घोख अमा नना, एन्दरन ओनोम महले मोखोन अरा एन्दरन अतोम। एन्देरगेका उज्जना मंडी ती अरा मेद किचरी ती कोहाँ रई।



- 26ओड़ा गुट्ठिन ऐरा, अबडा चाँखई मला, खुई मला, अरा कुट्ठी नू बीन्दई मला, अन्नु हूँ निम्है मेर्खा बंगस अबड़न पोसदस। नीम गा अबड़ा ती कोड़हे मूल्ली ही र'अदर।
- 27नीम घोख नन्ना ती निम्है उज्जनन ओन घड़ी हूँ बग्गे नना पोल्लोर।
- 28अरा किचरी डोड़ो ही पत्त नू अमा घोख'आ। खल्ल ही पूंप गुट्ठी ही पत्त नू सोच'आ, अबड़ा एकासे परदी। अबड़ा नलख मल ननी अरा तमा गे किचरी मल कमई।
- 29अन्नु हूँ ऐन निमन ब'अदन, सालोमोन बेलस एका कोहाँ उरुब आलस रहचस, लिकिन आस इबड़ा पूंप ती ओन्टा बेसे हूँ फबना मल अतका रहचस।
- 30इन्ना टोंका नू र'ऊ अरा नेला चिच्ची नू च'ऊ लट्ठी गे धर्मस फबना ऐथ्रना चि'अदस होले, अना पत्त'अना नू पयहा आलारो, धर्मस निमन मानिम नू ऐरोस खोजोस दने।
- 31ओंगे नीम अमा घोख'आ का एन्द्रन मोखोम अरा एन्द्रन ओनोम अरा एन्द्रन कूरोम झप्र'ओम?
- 32धर्मसिन बल्लुर इबड़ा ओर्मा ही तिहा नू र'अनर, लिकिन निम्है मेर्खा बंगस अखदस का निमा गे इबड़ा उर्मी आलो ही चाड़ रई।
- 33लिकिन मुन्द धर्मस निम्है उज्जना नू राजी नन्ना ही पत्त सोच नू र'आ अरा आसी मने लेक्खा नना, होले इबड़ा उर्मी आलो निमा चितार'ओ।
- 34ओंगे नेला ही पत्त नू अमा घोख'आ, नेला गा नेला ही घोख आबोन घोख'ओ। इन्ना ता तिहा इन्ना गे मनो क'ओ।

मत्तायोस 7

- 1नीम नन्नारिन नैवई अमा नना, होले नीम हूँ धर्मस ती नैवई मल नन्तार'ओर।
- 2एकासे नीम नन्नारिन नैवई नन्दर अन्नेम नीम हूँ नैवई नन्तार'ओर, अरा नीम एका जोखना ती जोख'ओर आ जोखना तिम निमा गे हूँ धर्मस ती जोखतार'ओ।
- 3नीन निंगहै खन्न ता चइलन मल थिथाब'अदय, लिकिन निंगहै भईसी खन्न ता कंटेन एन्देरगे ऐरदय?
- 4नीन निंगहै खन्न ता चइलन मल थिथाब'अदय अरा निंगहै भईसिन ब'अदय, अना भई, ऐन निंगहै खन्न ता कंटेन ओथ्र'ओन चि'ओन, एन्ने एन्देरगे ब'अदय?
- 5अना उत्तुरमाडू, मुन्द निंगहै खन्न ता चइलन ओथ्र'आ, होले नीन निंगहै भईसी खन्न ता कंटेन ओथ्र'आ गे फरीफरी ऐरा ओंगोय।



- 6एन्द्रा नेम्हा रई अदिन नेम्हा मलकर गे अमके चि'आ, आर अदिन तिखोर नाबोर अरा आर निंग्हे गने लड़ाई ननोर।
- 7धर्मस ती ने'आ, होले निमा चीर'ओ, बेद्दा, होले निमा खक्खर'ओ, बलिन ठोकठोकमब'आ, होले धर्मस ती निमा तिसगर'ओ।
- 8ईगोका ने ने'अनर आर खक्खनर, अरा ने बेद्दनर आर गे खक्खर'ई, अरा ने ठोकठोकमब'अनर आर गे तिसगर'ई।
- 9निंग्हे नू एका ओर्तस एन्ने आल र'अदस का तंग्दस असमा ने'ओस होले आस गे पखनन चि'ओस?
- 10महले इंजो ने'ओस होले आस गे नेरेन चि'ओस का?
- 11अन्ने नीम मलदौ मनरकी निंग्हे खद्द-खरर गे दौ जिनिसन चि'आ अखदर होले, मेर्खा बंगस तंग्हे गुसते ने'उर गे बेस आलोन नेम्हा बोलतन चि'ओस दिम।
- 12आलर एन्दरन निमन नना नीम बेद्ददर, अबइन नीम आर गे नना। एन्देरगेका मूसासी पैसका अरा धर्मसी कत्था तिंगुर ही आनना ईदिम हवे।
- 13सक्कुड़ बली ती मेर्खा कोर'आ। चकड़ बली अरा चकड़ डहरे नरक गे कड़हाब'ई, अरा बग्गे आलर आ बली ती कोरनर।
- 14लिकिन उज्जना नू कोरना बली सक्कुड़ अरा डहरे कठिन रई, अरा जुक्किम आलर दिम अदिन खक्खनर।
- 15ठकवा धर्मसी कत्था तिंगुर ती चिहंक र'आ। आर ऐरना नू लुदऊ लेक्खा भेंडो ही बेसे निम्हे गुसन बरनर। लिकिन आर मानिम नू चरना मोखना हड़हा र'अनर।
- 16नीम आरिन आर ही खंजपा गुट्ठी ती लख'ओर। एकासे का आलर अच्च-खोप्पा गुट्ठी ती अंगुर महले नागफनी गुट्ठी ती डुम्बारी मल चोखनर।
- 17एन्ने बने मन्न ठोस खंजपा खंज'ई, अरा पयहा मन्न पयहा खंजपा खंज'ई।
- 18अरा बने मन्न पयहा खंजपा चि'आ पुल्ली, अरा पयहा मन्न ठोस खंजपा चि'आ पुल्ली।
- 19औंगे एका मन्न ठोस खंजपा मल खंज'ई आद तारर'ई ती चिच्च नू सज्ज'ई।
- 20एन्ने लेक्खा नीम ठकवा धर्मसी कत्था तिंगुरिन आर ही नलख गुट्ठी ती चिन्ह'ओर।



- 21ने एंगन अना उर्बायो! अना उर्बायो! ब'अनर लेका आर मेर्खा राजी नू मल कोर'ओर। ने एंग्हे मेर्खा बंगस ही मने लेक्खा नन्नर आरिम मेर्खा राजी नू कोर'ओर।
- 22अउला अजम बग्गे आलर एंगन ब'ओर, 'अना उर्बायो! अना उर्बायो! ऐम निंग्हे नामे ती धर्मेसी कत्था तिकम अरा निंग्हे नामे ती नाद गुट्ठिन ओथ्रकम अरा निंग्हे नामे ती बग्गे हैकट नलख नंजकम।'
- 23होले ऐन आरिन फरीफरी तेंगोन ती आनोन, 'ऐन निमन इकला हूँ बलकन, मलदौ ननू आलारो, एंग्हे गुस्ते गुच्छर'आ।' 24एका ओर्तर एंग्हे इबड़ा कत्था कुट्ठिन मेन्नर ती अबड़न अन्नेम नन्नर, आर तंग्हे एड़पन चचड़ी मइय्याँ कमचका लुरगर आलस लेक्खा र'अनर।
- 25अरा चेंप पोस्सा अरा बहड़ी गुट्ठी बरचा अरा घटा गुट्ठी बरचा अरा आ एड़पा नू लग्गिया, लिकिन आद मल खत्रा, एन्देरगेका आद चचड़ी नू नेव कमचका रहचा।
- 26एका ओर्तर एंग्हे इबड़ा कत्थन मेन्नर, लिकिन अबड़न अन्नेम मल नन्नर, आर तंग्हे एड़पन चलकुर मइय्याँ कमचका बोयस लेक्खा र'अनर।
- 27अरा चेंप पोस्सा अरा बहड़ी गुट्ठी बरचा अरा घटा गुट्ठी बरचा अरा आ एड़पा नू लग्गिया, खने आद बिड्रिया ती धंसा खच्चिया।”
- 28येसुस इबड़ा कत्था गुट्ठिन तेंगा मुंजा खच्चियस खने गोंहड़ा गुट्ठी आसी सिखाब'अनन मेंजा ती अनचकरा केरा।
- 29आस गा आर ही नेग सिखाब'उर लेक्खा मला, लिकिन ओन्टा अदिया उइय्युस लेक्खा सिखाब'आलियस।

मत्तायोस 8

- 1येसुस परता ती इतियस खने कोहाँ गोंहड़ा गुट्ठी आसी गने गुड़ियारा।
- 2आ बारी ओन्टा खसरा मंजका आलस आसी गुसन बरचस, अरा एन्ने बाचस ती ओड़ लग्गियस, “उर्बायो, निंग्हे मने र'ई होले नीन एंगन सफा नना ओंग्दय।”
- 3खने येसुस खेक्खा ती आसिन ऐंसइस ती बाचस, “एंग्हे मने र'ई का नीन सफा मना कला।” आ बारिम आसी खसरा सफा मंजा केरा।
- 4खने येसुस आसिन बाचस, “निंग्हे कोड़े मंजका ही पत नू नेखा गुसन हूँ एन्द्रा हूँ अमके तेंगा। लिकिन कालरकी निंगन नैगासिन ऐद'आ। होले आस अख'ओस का नीन सफा मंजकय। अरा खसरा रोगियर सफा मन्नर खने एन्देर दाँड़े अरगना मनी अदिन मूसस आनियस, अदिन नीन



सफा मना गे नैगस गुसन चिआ। होले आस अदिन धर्मस गे दाँडे अरगोस, फिन आलारिन तैगोस का नीन सफा मंजकय।”

5फिन येसुस कफरनहूम नगरे नू कोरचस खने, ओन्टा रोमी सौ सैनर ही मुद्धस आसी गुसन बरचस ती आसिन गोहरारस।

6“उर्बायो, एंग्हे जौखस एडपा नू बिड्का र'अस, आसिन लकवा लौचकी र'ई अरा आस नगदे केलोली नू लिन्ड्का र'अदस।”

7अरा येसुस आसिन बाचस, “ऐन बर'ओन ती आसिन कोडे ननोन।”

8लिकिन रोमी सौ सैनर ही मुद्धस आनाकिर्ताचस, “उर्बायो, ऐन गा ई जोगे मलकन का नीन एंग्हे एडपा भितरी बर'ओय। लिकिन ओन्टा कत्था लेका आना चिआ होले एंग्हे जौखस उजगार'ओस।

9ऐन हूँ गा आकुस ही किइय्या ता आलन हिकदन, अरा एंग्हे आकुस किइय्या सैनर र'अनर। ऐन ओर्तोसिन 'बरा' ब'अदन होले आस बरदस अरा अउर नन्नासिन 'कला' ब'अदन होले आस कादस अरा एंग्हे जौखासिन 'नना' ब'अदन होले आस नन्दस। ऐन पत्त'अदन का निंगा हूँ एन्ने आकुस र'ई।”

10येसुस इदिन मँजस ती आसी पत्त नू अकबकरस। अरा आस तंग्हे खोखा चोख'उरिन ऐर'अरकी बाचस, “मानिम नू ऐन निमन ब'अदन का इस्राएल नू हूँ ऐन एन्ने पत्ताचका आलासिन मल ईरकन।”

11अरा ऐन निमन ब'अदन, “बग्गे नन-यहूदी आलर पुरुब अरा पच्छिम तरती बर'ओर अरा मेर्खा राजी नू अब्राहम अरा इसाक अरा याकोबस गने मदी नू ओक्कोर।

12लिकिन बग्गे इस्राएल आलारिन नेखा गे मेर्खा राजिन धर्मस सपड़ाचस, आरिन धर्मस नरक नू हेबडोस चि'ओस। असन चींखना अरा पल्ल चबर्ना मनो।”

13तहाँ येसुस रोमी सौ सैनर ही मुद्धासिन बाचस, “कला, नीन एकासे पत्ताचकादय अन्नेम निंगहा जौखस गे मनो।” अरा आ बारिम आसी जौखस कोडे मंजस केरस।

14एकाबारी येसुस पतरसी एडपा बरचस, आ बारी पतरसी तंगसासन नाड़ी ती बिड्का ईरयस।

15लिकिन येसुस अदही खेक्खन ऐवंसरस खने अदही नाड़ी तम्मिया केरा। तहाँ आद चोचा ती आसी तेतर-सुसर नना हेलरा।

16बीड़ी पुत्तिया खने कोइहे आलर नाद लक्का आलारिन आसी गुसन ओन्द्रर ती बरचर। येसुस कत्था लेका तिम अबड़ा बोलता गुट्ठिन ओथ्रस अरा ओर्मा रोगियारिन कोडे नंजस।



- 17 येसुसी इबड़ा नलख ती धर्मसी कत्था तिगू यसायास ती बाचका कत्था पुरचा। एकासे का, “आस नम्है पयहा गुट्ठिन तान भोगचस अरा नम्है रोगे गुट्ठिन चोदस।”
- 18 येसुस उर्मी तरती तंगन गोंहड़ा बेंद्रका ईरियस खाने, आस तंगहै चेलारिन समुदर ही आ पक्खे कट्टा गे आनियस।
- 19 आ बारी ओन्टा यहूदी नेग सिखाब'उस बरचस ती येसुसिन बाचस, “गुरु, नीन एसन एसन क'ओय ऐन निंग्हे गने चौर'ओन।”
- 20 येसुस आसिन बाचस, “सिकटा गुट्ठी ही लाता रई, अरा ओड़ा गुट्ठी ही खोता रई, लिकिन मनवा खद्दन एंगा गे कुक्कन हूँ बेड़त'आ ती खन्न ऐखा गे अड्डा मलकी।”
- 21 ओर्तस चेला मधेर ती आसिन एन्ने बाचस, “उर्बायो! एंगन मुन्द एम्बासिन माड़ा गे काला चि'आ।”
- 22 लिकिन येसुस आसिन बाचस, “अक्कु एंग्हे गने चौर'आ, केचकारिन तम्है बोलता नू केचका आलर माइनर नेकअन।”
- 23 तहाँ येसुस डोंगा नू अरगियस, अरा आसी चेलर आसी गने केरर।
- 24 आचका समुदर नू एन्ने कोइहे घटा चोचा का बग्गे लहरा ती डोंगा मुलखा बेद्दा लगिया। लिकिन आ बारी येसुस खन्द्र'आलियस।
- 25 खने चेलर हेद्दे केरर ती येसुसिन एज्जर ती बाचर, “उर्बायो, एमन बछाब'आ, नाम मूलखालदत।”
- 26 येसुस आरिन बाचस, “अना पत'अना नू पयहा आलारो, एन्देरगे एल्चदर?” फिन येसुस चोचस ती घटन दरा समुदर आबोन केप्पस, खने ठकरा अरा छछिन्द मंजा केरा।
- 27 इदिन ईरियर ती चेलर अनचकरर केरर अरा बाचर, “ईस एकासे आलस ताका दरा समुदर हूँ ईसी पेसकन मिनी।”
- 28 इदही खोखा येसुस अरा आसी चेलर समुदर ही आ पक्खे गेरासेनोस चक नू अंइसियर खने, इरिब नाद रस्सका आलर मसड़ा गुट्ठी ती उरखर ती आसी गुसन बरचर। आर ही नगदे टिहकर चड्डे डहरे नू ने हूँ ऐका पोल्ला लगियर।
- 29 आर चिच्चियारर ती बाचर, “धर्मसी खद्दायो, एम्है गने निंग्हे एन्देर नलख? एन्देर नीन एमन बेड़ा ती मुन्द दुक्खे चि'आ बरचकादय।”
- 30 असन जोर गेच्छा नू किस्सी ही ओन्टा कोहाँ खरखा मेना लगिया।



- 31 अबड़ा नाद गुट्ठी येसुसिन गोहरार'आ “एमन ओथ्र'अम लगदय होले, एमन आ किस्सी खरखा नू तइय्या।”
- 32 येसुस अबड़न बाचस, “कला।” खने नाद अबड़ा आलर ती उरखा ती किस्सी गुट्ठी नू समसारा केरा। तहाँ गोट्टा खरखा दलखा ती अम्म नू बोंग डिघया अरा मुलखिया केच्चा।
- 33 खने किस्सी खापुर बोंगर ती नगरे नू केरर अरा उर्मी हलन तिंगियर। अबड़र ने नाद ती रस्सरका रहचर आ इरबर ही पत नू हूँ तिंगियर।
- 34 तहाँ गोट्टा पद्दा येसुसिन भेंटार'आ गे उरखा अरा आसिन ईरयर ती आर ही सिवान ती किर्मिबि'आ गे गोहरारर।

मत्तायोस 9

- 1 इदही खोखा येसुस डोंगा नू अर्गियस ती समुदर ही आ पक्खे तंग्हे नगरे केरस।
- 2 आ बेड़ा नू जोक्क आलर ओर्त लकवा बेमरहासिन खटी नू बिड्का रांगे येसुस गुसन ओन्द्रर। आर ही पत'अनन ईरयस ती येसुस लकवा बेमरहासिन बाचस, “अना खद्द, डिढ नना, निंग्हे पाप गुट्ठी छमा नन्तार'ई।”
- 3 लिकिन जोक्क यहूदी नेग सिखाब'उर ताम ताम नू कछनखर, “ई आलस गा धर्मसी निंदा नन्दस।”
- 4 आर ही ई सोचनन अक्खस ती येसुस आरिन बाचस, “नीम एन्देगे निम्है जिया नू मलदौ सुगुम सोचदर?”
- 5 “निंग्हे पाप गुट्ठी छमा नन्तार'ई” एन्ने ब'अना ‘चोआ अरा कुद्दा नुंगा’ एन्ने ब'अना ती सेब्बा हवे। एन्देगेका आलर कोड़े मन्नन ऐरा ओंग्गर, लिकिन पाप छमा मन्नन ऐरा पोलनर।
- 6 लिकिन ऐन ई आलासिन कोड़े नन्ना ती निमन ऐद'ओन का मनवा खद्दन एंगा गे आलर ही पाप गुट्ठिन छमा नना गे हूँ खेखेल नू आकुस रई।” खने आस लकवा बेमरहासिन आनियस, “ऐन निंगन ब'अदन, चोआ, निंग्हे खटिन चेड़'अरकी एड़पा कला।”
- 7 खने आस चोचस ती तंग्हे एड़पा केरस।
- 8 इदिन ईरयर ती आलर इल्चियर केरर अरा धर्मसी ओहमा नना हेलरर एकास आलर गे एन्ने आकुस चिच्कादस।
- 9 येसुस असले ती उरखस खने, मत्तायोस नामे ओर्त आलासिन मालगुजारी ऊज'ऊ एड़पा नू उक्का ईरियस ती आसिन बाचस, “एंग्हे गने गुचा।” खने आस चोचस ती आसी गने गुड़ियारस।



- 10 खोखा येसुस मतायोसी एइपा नू मंडी ओना गे उक्कियस। बग्गे मालगुजारी ऊज'उर अरा नन्ना पपहर बरचर अरा येसुस अरा आसी चेलर गने ओक्करकी ओना लगियर।
- 11 अरा फरिसीर इदिन ईरयर ती आसी चेलारिन मेंजर, “निम्है गुरुस मालगुजारी ऊज'उर अरा नन्ना पपहर गने एन्देरगे ओन्दस?”
- 12 लिकिन येसुस इदिन मेंजस ती आरिन बाचस, “कोड़े दौ आलर गे बैधासी चाइ मल्ला, लिकिन बेमरहर गे रई।
- 13 लिकिन कला ती सिख'आ का 'ऐन सोग्गेन बेद्ददन दाँडेन मल्ला' एन्ने ई ब'अना ही एन्देर माने मनी। ऐन ने तमन उजगो सोचनर आर गे मला ने तमन पपहा बुझुरनर आरिन एइ'आ बरचका र'अदन।”
- 14 उन्दुल योहनसी चेलर येसुस गुसन बरचर ती मेंजर, “ऐम अरा फरिसीर उपास नन्दम, लिकिन निम्है चेलर एन्देरगे उपास मल नन्नर?”
- 15 येसुस आरिन बाचस, “एका गूटी बेंजा जोंखस बरतियर गने र'अदस, आर एकासे खोबरार'ओर? लिकिन बेंजा जोंखस आर ती होतारना बेड़ा बर'ओ, आ उल्ला आर उपास ननोर।
- 16 अरा ने हूँ पुना किचरी ही खंडन एटेरका पच्चा किचरी नू मल सट'ई तुन'ई। अन्ने आस नन्दस होले, टस्का पच्चा किचरिन चर्रो चि'ओ, अरा एटेरकन कोहाँ ननो चि'ओ।
- 17 ने हूँ पुना अंगुर रासी आबोन चपटा ही पच्चा कुड़वा नू मल निन्ददस उइयदस। अन्ने नन्दस होले, बिचका अंगुर रासी चपटा ही कुड़वन पलको चि'ओ। अंगुर रासी अरा चपटा ही कुड़वा दुयो नठार'ओ कालो। औंगे पुना अंगुर रासी आबोन चपटा ही पुना कुड़वा नू निन्ददस उइयदस। एन्ने ननोस होले अंगुर रासी अरा चपटा ही कुड़वा दुयो मल नठार'ओ।”
- 18 येसुस आर गने इबड़ा कत्थन कच्छनखना बारिम रहचस खने ओर्त गोड़हा एइपा ही मुद्धस बरचस ती येसुसिन ओइ लगियस ती बाचस, “एंग्दा अक्कुनिम किच्चकी रई। नीन बरा ती अदही मइय्याँ खेक्खा उइय्या, होले आद उज्जो।”
- 19 तहाँ येसुस चोचस ती तंग्हे चेलर गने आसी गने केरस।
- 20 आ बारी बारा बछर ती खेंस काना रोगे ती लिंड़िरका ओन्टा आली येसुसी खोखा तरती बरचा ती आसी किचरी अंचरन ऐंवसड़ा।
- 21 एन्देरगेका आद तंग्हे जिया ती बाचकी रहचा, “ऐन आसी किचरी गंडन लेका ऐंवसड़'ओन, अन्नु हूँ कोड़े मनोन।”



- 22 येसुस खोखा तरा बिइद्रस ती अदिन ईरयस ती बाचस, “अनय खद्द जिया नू डिठ ननय, नीन एंगन पताचकी, औंगे नीन उजगारदी।” आ बारिम आद कोड़े मंज खच्चिया।
- 23 फिन येसुस आ मुद्धासी एइपा अंडसियस। आ बारी बंसरी ऊरऊ आलारिन अरा बग्गे आलर ही अउवारनन ईरयस
- 24 अरा आरिन बाचस, “गुच्छर'आ, कुकोय मल्ला केचका, खन्द्र'आली।” खने आर आसिन अलखा हेलरर।
- 25 आलारिन बहरी ओथ्रका खोखा येसुस भितरी कोरचस ती कुकोय ही खेखन धरचस ती चोदस, खने आद चोचा ती इज्जा।
- 26 ई कत्था ही हला आ हल्का ही कौंड़ा कौंड़ा बींइरा केरा।
- 27 येसुस असलेक ती केरस खने, ईरिब अन्धहा आलर एन्ने गोहरारनुम आसी खोखा बर'आलियर, “अना दाऊदसी खद्दायो! एमन सोग्गे ऐरा।”
- 28 आस एइपा अंडसियस खने, अबड़ा अन्धहा आलर आसी गुसन बरचर। खने येसुस आरिन मेंजस, “एन्दे? नीम पत'अदर का ऐन इदिन नना ओंगदन?” आर बाचर, “हाँ उर्बायो।”
- 29 खने येसुस आर ही खन्नन ऐंसइस ती बाचस, “निम्है पत'अना लेक्खा निमा गे मनन नेकअन।”
- 30 तहाँ आर ही खन्न चलखरा केरा अरा आर ऐरा उंगियर। अरा येसुस आरिन बर्जाचस ती बाचस, “चिहुंकर'अके, इदिन नेकन हूँ अमके तेंगा।”
- 31 लिकिन आर केरर ती आ गोट्टा चक नू येसुसी दौ नलखन तेंगा कुद्दियर।
- 32 आर बहरी उरखम लगियर खने, जोक्क आलर नाद रस्सका ओर्त कोन्दा आलासिन येसुसी गुसन ओन्द्रर।
- 33 औंगे येसुस नादन ओथ्रस। खने आ कोन्दस कच्छनख्र'आ हेलरस। खने गौंहड़ा अनचकरा केरा अरा बाचा, “इसाऐल नू इकला हूँ एन्ने अकबक नलख मल्ला मंजका।”
- 34 लिकिन फरिसीर बाचर “ईस गा नाद ही मुद्धासी सहाड़ा ती नाद गुट्ठिन ओथ्रदस।”
- 35 इदही खोखा येसुस आ चक ता उर्मी नगरे नगरे अरा पद्दा पद्दा कुद्दनुम आर ही गोइहा एइपा नू सिखाब'अनुम धर्मेसी राजी ही दौ कत्था मेन्त'आनुम कुद्दा लगियस। अरा जम्मा रकम ही पयहा अरा रोगेन कोड़े नंजस।



36 येसुस गोंहइन ईरयस खने आस गे आर ही मइय्याँ सोग्गे लग्गिया, एन्देरगेका आर खापुर मलका भेंडो लेक्खा भिड़कारका अरा बीड़का रहचर।

37 येसुस तंग्हे चेलारिन बाचस, “खोयना गा बग्गे रई, लिकिन बनीहार जुक्किम र'अनर,

38 इदगे तंग्हे खोयना गे बनीहार आलारिन तइय्या गे खोयत'ऊ उर्बासिन गोहरार'आ।”

मत्तायोस 10

1 तहाँ येसुस तंग्हे बारो चेलारिन मीखियस ती आर गे मलदौ बोलता गुट्ठिन ओथ्र'आ गे अरा उर्मी रकम ही रोगेन दरा पयहा गुट्ठिन कोड़े नन्ना ही आकुस चिच्चस।

2 बारो तइरकर ही नामे एन्ने रई: मुन्द ता सिमोन, ने पतरस बारदस अरा आसी भइय्योस अन्द्रेयस अरा जेबदयूसी तंग्दस याकोब अरा आसी भइय्योस योहन

3 अरा फिलिप्पोस अरा बरतोलोमैस अरा मालगुजारी ऊज'ऊ मत्तायोस अरा तोमस अरा हलफेसी तंग्दस याकोब अरा तद्दैस

4 अरा यहूदीर ही छछिन्द सैना ता सिमोन अरा यूदस इसकारियोत, एकास खोखा येसुसिन धरताचस।

5 येसुस इबड़ा बारो तइरकारिन पेसस ती तइय्यस, “नन-यहूदीर गुसन अमा कला अरा समारिया ता आलर ही नगरे नू अमके कोर'आ।

6 लिकिन इस्राएल आलर गुसन कालके एकार एबस्रका भेंडो लेक्खा र'अनर।

7 कानुम कानुम ‘धर्मस आलर ही उज्जना नू राजी नन्ना बेड़ा हेद्दे अइसा खच्चिकी र'ई’ एन्ने दौ कत्थन मेन्त'आ कुद्दा।

8 अरा रोगियारिन उजग'आ अरा केचकारिन उज्जत'आ अरा खसरा रोगियारिन कोड़े नना अरा आलर ती नाद गुट्ठिन ओथ्र'आ। नीम एंग्हे ती इबड़ा सवंगन सिथिया खक्खकादर, नीम हूँ आलारिन सिथियम ती संगरा नना।

9 नीम गोच्छा नू सोना महले चाँदी महले रुपा ही ढिबा अमके हो'आ।

10 अरा झोला महले ऐंड किचरी महले जुता गुट्ठी महले सोट्टा अमके हो'आ। इदगे का बनीहार गे तंग्हे ओन्ना-मोखना खक्खना र'ई।

11 एकअम नगरे महले पद्दा नू कोर'ओर, होले अइय्या जोगे आलासिन बेद्द ऐरा, अरा निम्है उरखना गूटी आसी एड़पानुम र'अके।



- 12 एड़पा कोर'ओ बारी आ एड़पा गे बरकत चि'अके।
- 13 अरा आ एड़पा जोगे र'ओ होले निम्है बरकत अदही मइय्याँ मनो। लिकिन आ एड़पा जोगे मल र'ओ होले निम्है बरकत निम्है गुसन किर्रो क'ओ।
- 14 अरा एकअम ओर्तर निमन मल परघ'ओर महले निम्है कथन मल मेनोर होले नीम आ एड़पा महले आ नगरे ती उरखो बारिम निम्है खेइडे ता रीडोन खेतके चि'अके।
- 15 ऐन निमन मानिमन ब'अदन, 'रायबड़ी उल्ला नू सोदोम अरा गोमोरा नगरे ता आलर खक्खना दंडे ती ई नगरे ता आलर ही खक्खना दंडे बग्गे मलदौ मनो।'
- 16 ऐरा! कला, ऐन निमन भैंडो लेक्खा भुसुइ गुट्ठी ही मड़ी नू तइयदन। ओँगे नेर्रे गुट्ठी लेक्खा लूरगर अरा पेरवाँ गुट्ठी लेक्खा लुदऊ मना।
- 17 लिकिन आलर ती चिहूंक र'अके। नीम एंग्हे गने चोखर'उर र'अना चइडे आर निमन कोहाँ सभा गुट्ठी नू चि'ओर अरा तम्है गोइहा एड़पा नू कोर्रा ती ल'ओर।
- 18 अरा नीम राजीखापुर अरा बेलर ही मुन्दहारे इजतार'ओर। लिकिन ईद आर गे अरा नन-यहूदीर गे एंग्हे पत्त नू तेंगा गे निमा मोका हवे।
- 19 इकला निमन हें'ओर नीम अमके घोख'आ का ऐम एकासे तेंगोम महले एन्देर ब'ओम। लिकिन निमन एन्देर ब'अना र'ई अदिन आ बारिम तेंगतार'ओ कालो।
- 20 एन्देरगेका ईद ब'ऊ नीम मलदर, निम्है बंगासी बोलतस निम्है ती ब'ओस।
- 21 आलर तम्है भइय्योर अरा बहिनोरिन नट'ओर अरा पिटर'ओर, अरा अयंग-बंग तम्है खद्द-खर्रारिन एन्नेम ननोर। अरा खद्द-खर्रर तम्है अयंग-बंगर ही बिइदो चो'अरकी पिटत'ओर।
- 22 नगदे आलर निमन बिइदो ननोर एन्देरगेका नीम एंग्हे गने चोखरकर। लिकिन ने तम्है उज्जना ही मुंज्रना गूटी सह'ओर, आरिम जनमजुग ही दंडे ती बछर'ओर।
- 23 निमन ओन्टा पद्दा नू खिलपत नन्नर होले नन्ना पद्दा बाँके कालके। ऐन निमन मानिमन ब'अदन, ऐन मनवा खद्दासी बरना गूटी इस्राएल राजी नू दौ कथा तेंगा कुद्दना मल मुंज्रकी र'ओ।
- 24 चेलस तंग्हे गुरुस ती कोहाँ मलदस अरा जौखस तंग्हे उर्बस ती कोहाँ मलदस।
- 25 चेलस गे तंग्हे गुरुस लेक्खा अरा जौखस तंग्हे उर्बस लेक्खा मन्ना दिम कोइहे र'ई। आर एड़पा उर्बस एंगन बेलजेबूल बाचकानर होले, आसी एड़पातारिन एन्देर मल ब'ओर।



- 26 औंगे नीम आर गे आमा एल्चा। एन्देरगेका एन्ने एन्द्रा हूँ मल्ला कुलुरका का मल चलखतार'ओ अरा एन्ने एन्द्रा हूँ मल्ला नूख्रका का मल ऐरतार'ओ।
- 27 ऐन अक्कुन ऊखा नू एकदन बाचका र'अदन अदन नीम बिल्ली नू तेंके, अरा नीम एकदन कुड़िया गुट्ठी ही भितरी कलेकसे मेंजकादर अदिन ओर्मर ही ऐरना नू चिच्चियारनुम मेन्ताके।
- 28 अरा कयन पिटनर अरा जियन गा पिटा पोल्नर आर ती अमा एल्चा, लिकिन एकास कयन दरा जियन नरक नू पिटा ऑग्दस आसिन एल्चा।
- 29 एन्देर ऐनोटा ढिबा ती ऐंड गोटंग चोरो मल बीसर'ई का? अन्नु हूँ निम्है बंगासी बिगर मने ही ओन्टा हूँ खेखेल नू मल खत्र'ई।
- 30 निम्है कुक्कुन ता चुट्टी हूँ उर्मी गनरकी र'ई।
- 31 औंगे अमा एल्चा, धर्मस निमन मल मोधर'ओस, नीम ढेर चोरो ती बग्गे मूल्ली ही र'अदर।
- 32 औंगे ने एंगन आलर ही मुन्दहारे अखदन ब'अदस, आसिन ऐन हूँ मेर्खा नू र'ऊ एंगहै बंगासी मुन्दहारे आस एंगहै आलस ब'ओन।
- 33 लिकिन ने एंगन आलर ही मुन्दहारे बलदन ब'अदस, आसिन ऐन हूँ मेर्खा नू र'ऊ एंगहै बंगासी मुन्दहारे आस एंगहै आलस मलदस ब'ओन।
- 34 नीम अमके सोच'आ का ऐन खेखेल नू कोड़े ओन्द्रकन ती बरचकादन। ऐन कोड़े मला लिकिन बगड़'आ गे बरचकादन।
- 35 ऐन आलासिन तम्बस ती अरा तंगदन तंगयो ती अरा सेड़ोन तंगसास ती हिगड़'आ गे बरचकन।
- 36 ओर्त आलासी बैरिर तंगहै कुटुमर दिम मनोर।
- 37 ने अयंग मलता बंगासिन एंगहै ती कोड़हे चोन्हा नन्दस आस एंगहै जोगे मल्दस। अरा एकास तंगदासिन मलता तंगदन एंगहै ती कोड़हे चोन्हा नन्दस आस एंगहै जोगे मल्दस।
- 38 अरा एकअम ओर्तस तंगहै क्रुसन चेड़'अरकी एंगहा चड्डे सस्ती सार'आ गे मने मल नन्दस आस एंगहै मना गे जोगे मल्दस।
- 39 एकास तंगहै उज्जनन तंगगा गे उज्जा बेद्ददस आस धर्मस गने जनमजुग ही उज्जनन एबस'ओस, लिकिन एकास एंगहै चड्डे तंगहै उज्जनन चि'अदस आस धर्मस गने जनमजुग ही उज्जनन खक्खोस।
- 40 एकास निमन इंझदस आस एंगन इंझदस अरा एंगन इंझ'उस एंगहै तइय्युस एंगहै बंगासिन इंझदस।



41 एकास धर्मसी कत्था तिङ्गुसिन धर्मसी कत्था तिङ्गुस ब'अरकी आसिन इङ्गदस, आस धर्मसी कत्था तिङ्गुर ही लेक्खा मूल्लीन खक्खोस। अरा एकास उजगो आलासिन उजगो आलस ब'अरकी आसिन इङ्गदस आस उजगो आलस लेक्खा मूल्लीन खक्खोस।

42 नीकईम इबड़ा सन्नी मधेर ती नेख'आनिम आस चेलस ब'अरकी ओन डुबहा कीरना अम्मू हूँ ओन्त'ओस होले, मानिम ऐन निमन ब'अदन आस एकन्ने नू हूँ तंग्हे मूल्लीन मल एबस'ओस।”

मत्तायोस 11

1 एकाबारी येसुस तंग्हे बारो चेलारिन इबड़ा कत्थन पेस'आ खच्चियस ती आस गलिलेया जिला ही नगरे गुट्ठी नू सिखाब'आ अरा तेंगा कुद्दा गे असले केरस।

2 योहन नूडरत'उस जेहेल नूरहचस। आस मसीसी नलख ही हलन खक्खियस, अरा तंग्हे चेलारिन येसुसिन इदन मेना तइय्यस।

3 “बर'ऊ 'मसी' नीनिम हिकदय का महले एकअम नन्नारिन ऐम पाब ऐरोम का?”

4 अरा येसुस आरिन किर्त'अर बाचस, “नीम एन्देर एन्देर मेन्दर अरा ऐरदर अदिन कला ती योहनसिन तेंगा चि'आ,

5 अन्धहर ऐरनर अरा लेंगडर ऐकनर अरा खसरा रोगियर सफा नन्तारनर अरा भडरा आलर मेनालनर अरा केचका आलर उज्जतारनर अरा कीडर गे दौ कत्था तेंगतार'आ लगी।

6 अरा योहनसिन तेंगा, ‘एंग्हे चड्डे एका ओर्तोस तंग्हे पत्त'अना नू मल मूडदस आस आसीस खक्खोस।”

7 योहनसी चेलर किर्रिम बिच्चियर अदही खोखा, येसुस योहनसी पत्त नू गोंहडन ब'आ हेलरस, “नीम टोडंग नू एन्देर ऐरा केरका रहचकर? नेखा सिखाब'अना ताका ती नुकुरना पोंड्रा बेसे रई आसिन का?

8 महले एन्देर ऐरा केरका रहचकर? लेपलेपे किचरी अतका आलासिन का? मला, ने लेपलेपे किचरी अतनर आर बेल एडपा नूर'अनर।

9 होले नीम एन्दरन ऐरा केरका रहचकर? ओन्टा धर्मसी कत्था तिङ्गुसिन का? हाँ, लिकिन ऐन निमन ब'अदन का योहन ओन्टा धर्मसी कत्था तिङ्गुस ती कोहँस।

10 ईसी पत्त नू नेम्हा पुथी नू एन्ने लिखकी रई, ‘ऐरा, ऐन एंग्हे पैकासिन निंग्हे ती मुन्द तइय्या लगदन, आस निंग्हे मुन्द निंगा गे डहरेन सपड'ओस।’



- 11 ऐन निमन मानिम ब'अदन का ने मुक्कर ती कुन्द्रका र'अनर, अबड़र नू योहन नूड़रत'उस ती कोहाँ ने हूँ कुन्द्रका मल र'अनर। अन्नु हूँ ने मेर्खा राजी नू सन्नी ती सन्नी र'अदस, आस आसी ती कोहाँ हिकदस।
- 12 योहन नूड़रत'उसी बेड़ा ती इन्ना गूटी, आलर बड़पेलहा मेर्खा राजी नू कोर'आ गे चिहुट नन्नर।
- 13 मूसासी नेग अरा धर्मसी कत्था तिंगुर ओर्मर योहन नूड़रत'उसी बरना बेड़ा गूटी एन्देर एन्देर मनो एन्ने मुन्द तिम बाचकानर।
- 14 अरा नीम इदन पत'आ मने रई होले, योहनस नूड़रत'उस दिम एलियस हवे ने धर्मसी कत्था तिंगुर बाचका लेक्खा बर'ऊ रहचस।
- 15 नेका मेना गे मने रई, आस मेन्दस ती बुझना रई।
- 16 ने योहनसी सिखाब'अना अरा एंग्हेन मेन्नर अबड़ा आलर ही पत नू तेंगदन, आर बजार नू बीचू खद्दर लेक्खा र'अनर। आर तम्है संगेरिन चिच्चियारनर ती ब'अनर का
- 17 'ऐम निमा गे बंसरी ऊरचकम, नीम मल नलकर। ऐम भोकरारकम नीम मल चींखकर।'
- 18 योहन नूड़रत'उस गा मल मोखनुम अरा अंगुर रासी मल उन्नुम बरचस, लिकिन आर ब'अनर का आसी मइय्याँ नाद लक्की रई।
- 19 लिकिन मनवा खद्दस बने उन्नुम मोखनुम बरचस। खने आर ब'अनर का ईस पेट पोसा अरा उंखुस अरा मलगुजारी ऊज'उर अरा नन्ना पपहर ही संगेस हवे। लिकिन धर्मसी लूर अदही लेक्खा ईकुर ही नलख ती आद मानिम एन्ने ईथर'ई।”
- 20 अन्ति येसुस आ नगरे गुट्ठिन केबा हेलरस, एकइय्या आस उर्मिन्ती कोड़हे सवंग ही नलख नंजका रहचस, अन्नु हूँ आर जियन मल किर्ताचका रहचर।
- 21 “ओहरे खोराजिन नगरे ता आलारो, ओहरे बेतसैदा नगरे ता आलारो! एका सवंग ही नलख निम्है नू मंजकी रई, अबड़ा तुरोस दरा सीदोन नगरे नू मंजकी रहचा होले, आ उल्लम अइय्या ता आलर तमन सन्नी ऐद'आ गे बोरन झपर'अरकी अरा चिन्द नू ओक्करकी जियन किर्ताचका र'ओर दने।
- 22 अन्नु हूँ ऐन निमन ब'अदन, रायबड़ी उल्ला नू तुरोस दरा सीदोन नगरे ही दंडे ती निम्है दंडे बग्गे मलदौ मनो।
- 23 अरा अना कफरनहूम नगरे ता आलारो, नीम मेर्खा मइय्याँ चोदतार'ओर कालोर का? मला, नीम गा खोड़खा चिच्ची गड्डी नू टिड़तार'ओर कालोर। एका सवंग ही नलख गुट्ठी निम्है नू



नंजका रई, ई नलख सोदोम नू मंजका होले आर तम्है पापन अम्बना ती धर्मस तरा किरना ती इन्ना गूटी आ नगरे इज्जकी रओ दने।

24अन्नु हूँ ऐन निमन ब'अदन, रायबड़ी उल्ला नू सोदोम नगरे ही दंडे ती निम्है दंडे बग्गे मलदौ मनो।”

25आ बारी येसुस बाचस, “अना बबा होय! मेर्खा दरा खेखेल ही उर्बायो! ऐन निंगन महबा नन्दन का नीन इबड़ा कत्था गुट्ठिन तमन अख'उर अरा लूरगर आलर लेक्खा सोचनर आर ती नुड्डकादय, अरा तमन लुदऊ लेक्खा सन्नी खद्दर गे ऐदकय।

26हाँ, अना बंग, निंगा ईदिम बेस लग्गिया।

27एम्बस एंगा गे उर्मी लूर अरा सवंगन सौपचकादस। अरा ने हूँ बलनर का ऐन ने हिकदन एम्बस लेका अखदस। अरा बंगस एकास अदिन ने हूँ बलनर ऐन लेका अखदन, अरा ऐन नेकन नेकन बंगासिन ऐद'आ बेद्ददन आर अख'ओर।

28अना उर्मी अर्जाऊ अरा ओत्था ती कज्रका आलारो! एंग्हे गुसन बरा, ऐन निमा खन्न ऐख्रत'ओन।

29एंग्हे पगसिन नीम चेड़'आ अरा एंग्हे ती सिख्र'आ, एन्देरगेका ऐन नर्मियाँ अरा जिया ती लुदऊ र'अदन, औंगे नीम निम्है जिया नू खन्न ऐख्र'ओर।

30एन्देरगेका एंग्हे पगसी सेब्बा अरा एंग्हे चिर्खी नेब्बा रई।”

मत्तायोस 12

1आ बेड़ा नू येसुस खन्न ऐखना उल्ला नू खल्ल गुट्ठी नू मन्नुम काला लगियस। अरा तंग्हे चेलर गे कीड़ा लग्गिया, खने आर बालन तौंखा तौंखा मोखा हेलरर।

2फरिसीर इदिन ईरियर ती ब'आ हेलरर, “ऐरा, निंग्हे चेलर एन्ने नलख ननालनर एकदा खन्न ऐखना उल्ला ही नेग ही बिड़दो रई।”

3येसुस आरिन बाचस, “नीम नेम्हा पुथी नू एन्देर पढचकर अदिन सुरता मल नन्दर का? इकला दाऊद बेलस अरा तंग्हे संगेर कीड़ा रहचर, खने आस एन्देर नंजस?

4आस धर्मसी एड़पा नू कालरकी नैगस धर्मस गे दाँडे नंजका असमन मोक्खस, अरा तंग्हे संगेर गे हूँ चिच्चस, एकदन मोखना मूसासी पेसका नू नैगारिन अम्बरकी नेका हूँ नेग मल्ला।

5अरा एन्देर नीम मूसासी नेग नू मल्ला पढचका का नैगर खन्न ऐखना उल्ला धर्मसी मन्दिर नू तंग्हे नलखन नन्ना ती खन्न ऐखना उल्ला ही नेगन चाड़ना ती हूँ आर गे बदी मल लग्गी?

6लिकिन ऐन निमन ब'अदन, एकास इसन र'अदस आस धर्मसी मन्दिर ती हूँ कोहाँ र'अदस।



- 7नेम्हा पुथी एन्ने बई, 'ऐन सोग्गे ऐरनन पत्तारदन दाँडे गुट्ठी अरगनन मला।' इदही मनेन नीम अक्का होले बदी मलका आलारिन बदी मल टिड़'ओर दने।
- 8मनवा खद्दन एंगा हूँ खन्न ऐखना उल्ला नू एन्देर एन्देर नन्ना रई, अदही फैसला नना गे अदिया रई।”
- 9फिन येसुस असलेक ती उरखस ती आर ही गोड़हा एड़पा नू कोरचस।
- 10अइय्या ओन्टा आलस रहचस, आसी खेक्खा खैकी रहचा। जोक्को फरिसीर येसुस मइय्याँ बदी टिड़'आ गे आसिन मैजर, “खन्न ऐखना उल्ला नू कोड़े नन्ना दौ रई का?”
- 11खने आस आरिन बाचस, “निम्हैन्ती ने एन्ने रई? नेखअय ओन्टे लेका भेंडो रई अरा आद खन्न ऐखना उल्ला गड्डी नू खत्र'ओ क'ओ होले, आस आदिन धर'ओस ती मल ओथ्र'ओस।
- 12लिकिन ओन्टा भेंडो ती आलासी मईन बग्गे रई। औंगे खन्न ऐखना उल्ला नू दौ नलख नना गे मूसासी नेग चिई।”
- 13खने आस आ आलस ती बाचस, “निंग्हे खेक्खन लमाब'आ।” आस लमाबाचस खने नन्ना खेक्खा लेक्खा कोड़े मंजा केरा।
- 14खने फरिसीर बहरी उरखर ती आसी बिड़दो नू चिताबुता नंजर येसुसिन एकासे पिटोत।
- 15इदिन अक्खस ती येसुस असले किरिम बिच्चियस, अरा कोड़हे आलर आसी खोखा गुड़ियारर अरा आस आर नू ती बेमरहा ओर्मारिन कोड़े नंजस।
- 16अरा आरिन चेताबाचस का तान ने हिकदस अदिन अम्बोर तेंगा।
- 17आस इबड़न इदगे नंजस का एका क्थन धर्मैसी क्था तिंगुस यसायास बाचकाचस आद मनो:
- 18“ऐरा, इसन एंग्हे जौखस, ईसिन ऐन चज्जिका र'अदन। ईस एंग्हे चोन्हास एकासी ती एंग्हे जिया रिड़'ई। एंग्हे बोलतन आसी नू सज'ओन, अरा आस उर्मी जातियर नू एंग्हे नैवई ही हला तेंगोस।
- 19आस नग्गा मल नख्र'ओस महले रिरयार'ओस मला महले बजार गुट्ठी नू ने हूँ आसी क्थन पोल्लोर मेना।
- 20आस लट'ई मंजका जिन्तो लट्टिन मल एस'ओस महले कुहड़ारना बिल्लिन मल तेभ'ओस। अरा आस नैवई आबोन जितना गूटी कड़हाब'ओस।
- 21अरा उर्मी जातियर आसी नामे नू असरा उइय्योर।”



- 22 तहाँ आलर ओन्टा अन्धहा अरा कौदासिन, ने नाद ती धरताचका रहचस, आसिन आसी हेद्दे ओन्द्रर, अरा येसुस आसिन कोड़े नंजस, अरा आस ऐरा आरा कछनख्रआ हेलरस।
- 23 इन्नु ओर्मर धन्धरर केरर ती ब'आ हेलरर, “एन्देर ईस दाऊदसी खद्दस मसीस मना ओंग्दस दने।”
- 24 लिकिन फरिसीर इदिन मेंजर ती बाचर, “ई आलस गा नाद गुट्ठी ही मुद्धस बेलजेबूल ती नाद गुट्ठिन ओथ्रदस।”
- 25 आस आर ही सोचनन अक्खस ती आरिन बाचस, “एकअम राजी तंग्हे नू लड़ाई ननी होले आ राजी नठार'ई कई। अरा एकअम नगरे महले एड़पा ता आलर तम्हे नू लड़ाई नन्नर होले आ नगरे महले एड़पा ता आलर खतरनर कानर।
- 26 अरा सैतान दिम सैतान आबोन ओथ्रओ होले आद तंग्हा दिम बिड़दो लड़ाई ननी, होले अदही राजी एकासे कम्की र'ओ?
- 27 अरा ऐन बेलजेबूल ही सवंग ती नाद गुट्ठिन ओथ्रदन होले, निम्हे आलर अबड़न नेखा सवंग ती ओथ्रनर? ओंगे आर निम्हे नैवई ननुर र'अनर।
- 28 लिकिन ऐन धर्मसी बोलता ती नाद गुट्ठिन ओथ्रदन होले ईद ईद'ई का धर्मस आलर ही जिया नू राजी नन्ना निम्हे मझी नू अंडस खच्चिया।
- 29 एकासे ओर्तस ओन्टा बहंगर आलासी एड़पा नू कोर'अरकी आसी जिनिसन बच्चा ओंग्दस? एका गूटी आस आ बहंगर आलासिन मल हें'ओस हो'ओस, होलेम आस आ बहंगरसी एड़पन बच्चा ओंगोस।
- 30 ने एंग्हे गने मलकी आर एंग्हे बिड़दो र'अनर अरा ने एंग्हे गने नलख मल नन्नर आर एंग्हे बिड़दो नू नलख नन्नर।
- 31 ओंगे ऐन निमन ब'अदन आलर ही उर्मी रकम ही पाप अरा हींइना आर गे अम्बतार'आ उंगी, लिकिन नेम्हा बोलतासी बिड़दो ही हींइना आर गे मल अम्बतार'ओ।
- 32 नीकईम मनवा खद्दन एंगा बिड़दो नू इन्द्रिइम कत्था ब'ओस, आद आस गे अम्बतार'आ उंगी, लिकिन नीकईम नेम्हा बोलतासी बिड़दो इन्द्रिइम ब'ओस, आद आस गे ई सौंसे नू महले बरना सौंसे नू कहियो मल अम्बतार'ओ।
- 33 मन्न अदही खंजपा तिम चिन्हर'ई। मन्न बेस र'ई होले अदही खंजपा हूँ बेस र'ओ। महले मन्न पयहा र'ई होले अदही खंजपा हूँ पयहा र'ओ।



- 34अना नेर लेक्खा बिक्ख उइय्यु आलारो! नीम मलदौ मनरकी एकासे दौ कत्था ब'आ ओंग्दर? एन्देरगेका एन्द्रा जिया नू निन्दकी रई आदिम बई ती उरखी।
- 35दौ आलस तंग्हे दौ जिया ही दौ कुट्ठी ती दौ नलखन नन्दस, अरा मलदौ आलस तंग्हे जिया ही मलदौ कुट्ठी ती मलदौ नलखन नन्दस।
- 36अरा ऐन निमन ब'अदन, एका एका अनभनियाँ कत्था आलर कछनख'ओर रायबड़ी उल्ला नू आर गे अबड़ा उर्मी कत्था ही लेखा चि'अना दिम मनी।
- 37एन्देरगेका नीम निम्है कत्था ही चड्डे बदी मल खत्र'ओर, अरा निम्है कत्था ही चड्डे बदी खत्र'ओर।”
- 38अक्कु जोक्को यहूदी नेग सिखाब'उर अरा फरिसीर येसुसिन बाचर, “अना गुरु, निंग्हे ती ओन्टा अकबक नलख ही चिन्हा ऐरा बेद्दम।”
- 39खने येसुस आरिन आनाकिर्ताचस, “मलदौ अरा नन्ना आली गुसन कालू आलर ही परिया ता आलर अकबक नलख ही चिन्हा बेद्दनर, लिकिन धर्मेसी कत्था तिगू योनासी उज्जना नू मंजका अकबक नलखन अम्बरकी आर गे नन्ना एन्देर चिन्हा हूँ मल चितार'ओ।
- 40योनास एकासे तीन उल्ला माखा कोहाँ इंजो ही कूल नू रहचस, अन्नेम मनवा खद्दन ऐन तीन उल्ला माखा खेखेल भितरी र'ओन।
- 41निनवे नगरे ता आलर योनासी कत्थन मेंजर ती जियन किर्ताचर। अरा ऐरा, इसन ओर्तस योनास ती हूँ कोहँस र'अदस। खने रायबड़ी उल्ला नू निनवे ता आलर ई बेड़ा ता आलर गने चो'ओर ती आरिन दोस'ओर।
- 42दखिन देस ता रानी खेखेल ही ओन्टा कोड़ा ती सालोमोनसी लूर ही कत्थन मेना गे बरचा। अरा ऐरा, इसन सालोमोनस ती हूँ कोहँस ओर्तस र'अदस। खने रायबड़ी उल्ला नू आद ई बेड़ा ता आलर गने चो'ओ ती ईरिन दुस'ओ।
- 43एकाबारी मलदौ बोलता आलस ती उरखी खने खैका अड्डा नू खन्न ऐखा गे अड्डा बेद्दा कुद्दी अरा मल खक्खी।
- 44खने बई, ‘ऐन एसले उरखकी रहच'अन आ आलस नुम किर्रोन।’ अरा बरई ती अदिन छछिन्द अरा ईगका ओथ्रका अरा चेमचेम नू खक्खी।
- 45खने आद कई तहाँ तंगन ती बग्गे मलदौ सात गोटंग नादन उन्दर'ई। अरा अबड़ा अइय्या रस'ई ती मइई, अरा आ आलासी दसा खोखा ता दसा ती बग्गे मलदौ मनी। ई परिया ता मलदौ आलर ही दसा हूँ एन्नेम मनो।”



- 46 एकाबारी आस गोंहड़ा गने कत्था कछनख्र'अम लगियस खने, येसुसी तंग्यो अरा भइय्योर बरचर ती बहरी इज्जर अरा आसी गने कछनख्र'आ बेद्दा लगियर।
- 47 एकअम ओतोस येसुसिन बाचस, “ऐरा, निंग्यो अरा निंगहै भइय्योर बहरी इज्जका र'अनर अरा निंगहै गने कछनख्र'आ बेद्दनर।”
- 48 लिकिन येसुस आ आलासिन बाचस, “ने एंगहै अयंग अरा ने एंगहै भइय्योर र'अनर?”
- 49 अरा तंगहै चेलर तरा खेक्खा टोंहा बाचस ती बाचस, “ऐरा, ईर एंगहै अयंग अरा भइय्योर हिकनर।
- 50 एन्देरगेका एका ओर्तर एंगहै मेर्खा बंगासी मने लेक्खा ऐकनर, आरिम एंगहै भई अरा एंगहै बहिन अरा एंगहै अयंग हिकनर।”

मत्तायोस 13

- 1 अउलम येसुस एइपा ती उरखस ती समुदर ही पिंडी नू केरस ती उक्कियस,
- 2 अरा आसी गुसन कोहाँ गोंहड़ा ई कोइहे खोपरा केरा का आस ओन्टा डोंगा नू अर्गियस ती उक्कियस केरस। अरा गोट्टा गोंहड़ा पिंडी नूरहचा।
- 3 अरा आस आरिन जोक्खा खीरी गुट्ठी ती कैनों गोट कत्थन तिगियस। अरा एन्ने बाचस, “ओन्टा बिहनी चाँख'उस चाँख'आ उरखस।
- 4 चाँख'ओ बारी, जोक्को बिहनी डहरे नू खत्रा, अबइन ओइा बरचा ती मोक्खा चिच्चा।
- 5 जोक्को बिहनी पखनोरी खेखेल नू खत्रा, असन बग्गे खज्जो मल रहचा, होले बिहनी लेम कुन्दिया।
- 6 लिकिन बीड़ी सेकचा, खने चइमियाँ केरा, अरा पादा मल धरना चइडे खइय्या केरा।
- 7 जोक्को बिहनी अच्च-खोप्पा मझी नू खत्रा, बिहनी परदिया अरा अच्च-खोप्पा हूँ परदिया, खने अदन अरबिया चिच्चा।
- 8 लिकिन जोक्को बिहनी उपजा खेखेल नू खत्रा, अरा आद कुन्दिया परदिया अरा जोक्को सौ गुना खंजा, जोक्को साट गुना खंजा, जोक्को तीस गुना खंजा।
- 9 नेख'आ मेना गे मने रई, आस मेन्दस ती बुझदस नेकअन।”
- 10 फेन आसी चेलर हेद्दे बरचर ती आसिन बाचर, “नीन आलारिन एन्देरगे जोक्खा खीरी गुट्ठी ती कछनख्रदय?”
- 11 आस आनाकिर्ताचस, “निमा मेर्खा राजी ही नूखका कत्था आबोन बुझ'आ गे चीरकी रई, लिकिन नन्नर गे ईद मल्ला चीरका।



- 12 एन्देरगेका ने एंगहै सिखाब'अना ही पत नू चिहंक लग्गे सोचनर आर गे बग्गे बुझुर'आ गे धर्मस संगरा ननोस, अरा आर बग्गे लूर खखोर, लिकिन ने एंगहै सिखाब'अना ही पत नू चिहंक लग्गे मल सोचनर, आर ही बुझुरका जोक्क कत्था गुट्ठिन हूँ धर्मस मोधरत'ओस चि'ओस।
- 13 ऐन आरिन जोक्खा खीरी ती इदगे कछनखदन का, नेम्हा पुथी नू एन्ने लिक्खरकी र'ई, 'ऐन नन्दन अदिन ऐरदर लिकिन अत्रु ती एन्द्रा हूँ मल सिख'ओर, ऐन ब'अदन अदिन मेन्दर लिकिन मानिम नू मल मेन्दर अरा अदही माने मल बुझुर'ओर।'
- 14 धर्मसी कत्था तिङ्गू यसायासी कत्था आर ही नू पूरा मनी, एकासे का, 'ऐन एन्दर ब'अदन अदिन नीम खेबदा ती गा मेनोर लिकिन मल बुझुर'ओर, अरा ऐन एन्दर नन्दन अदिन नीम खन्न ती गा ऐरोर लिकिन नीम मल अख'ओर।
- 15 एन्देरगेका ईर ही जिया दड़िया मंजकी र'ई, अरा आर खेबदा ती कोड़हे मल मेन्नर, अरा आर तम्है खन्नन मिक्खका चिचकानर। अन्ति कहियोँ एन्ने अम्बन मना का खन्न ती ऐरोर, अरा खेबदा ती मेनोर, अरा जिया ती बुझुर'ओर, अरा आर एंगहै गुसन किरोर, अरा ऐन आरिन कोड़े ननोन।'
- 16 लिकिन नीम आसीस खक्खू र'अदर, एन्देरगेका नीम एंगहै अकबक नलखन ऐरदर। अरा नीम आसीस खक्खू र'अदर, एन्देरगेका निमन अबड़ा ही मनेन बुझुर'आ गे धर्मस संगरा नन्दस।
- 17 मानिम नू ऐन निमन ब'अदन का नगदे धर्मसी कत्था तिङ्गुर अरा उजगो आलर हूँ एका कत्थन नीम ऐरदर अदिन ऐरा बिद्दियर लिकिन मल ईरियर, अरा एका कत्थन नीम मेन्दर अदिन मेना बिद्दियर लिकिन मल मेंजर।
- 18 अक्कु नीम बिहनी चाँख'ऊ आलासी जोक्खा खीरी ही माने मेना।
- 19 एका ओर्तस मेर्खा राजी ता कत्थन मेन्दस ती अदिन मल बुझुरदस, आसी जिया एन्द्रा चाँखकी रहचा अदिन नाद बर'ई ती बच्ची हुई क'ई, ईद आद दिम हवे एकदा इहरे पिंडी नू चाँखकी रहचा।
- 20 अरा एकदा पखनोरी खेखेल नू चाँखकी रहचा, आद ईद हवे, एकास कत्थन मेन्दस ती लेम रिङ्गनुम पत'अदस।
- 21 अन्नु हूँ तंगहै जिया नू गड्डी गूटी कत्था मल खुपना चड्डे आस जुक्किम उल्ला गे कत्थन पत'अदस। अरा सस्ती महले कत्थन पत'अना ही चड्डे आस मइय्याँ सतारना बरना बेड़ा आस कत्था ती पत'अनन लेम अम्बदस।
- 22 अरा एकदा अच्च-खोप्पा नू चाँखा, आद ईद हवे, एकासे कत्थन मेन्दस लिकिन खेखेल ता फिकर अरा खुर्जी अरा मया-मोह आसिन अरबिया खने आस खंज'आ पोलदस।



- 23 अरा एकदा उबजा खेखेल नू चाँख्रा, आद ईद हवे, एकास कत्थन मेन्दस ती बुझदस, अरा खंजपा ओन्द्रदस, ने सौ गुना महले साठ गुना महले तीस गुना खंजपा चि'अदस।”
- 24 येसुस आर गे अउर ओन्टा जोक्खा खीरी तिं गियस। “मेर्खा राजी आ आलस लेक्खा रई, एकासे तंगहै खल्ल नू बेस बिहनी चाँखस।
- 25 अन्ति एकाबारी आलर खन्द्र'आ लगियर खने आसी बैरी बरचस ती गहूँ ही मझी नू बनेला बिहनिन चाँखस ती किरिम बिच्चियस।
- 26 अक्कु गहूँ कुन्दि या अरा बाल धरचा खने, बनेला बिहनी ही खोप्पा हूँ ऐथा।
- 27 अक्कु एड़पा उर्बासी जोंखर बरचर ती आसिन बाचर, ‘अना उर्बायो, नीन खल्ल नू दौ बिहनिन मल चाँखका रहचकय का फिन बनेला बिहनी ही खोप्पा अइय्या एकस्ते बरचा केरा?’ 28 आस बाचस, ‘एकअम बैरीसी नलख हवे।’ जोंखर आसिन बाचर, ‘एन्देर निंगहै मने रई का ऐम अदिन कालरकी पेसक'ओन।’
- 29 लिकिन आस बाचस, ‘मला, एन्ने अम्बन मना का बनेला बिहनी ही खोप्पन पिसगनुम पिसगनुम नीम गहूँन हूँ चड़'आ ओंगदर।
- 30 खोयना गूटी ऐंड़ानिम संगेम परदा चि'आ, अरा खोयना बेड़ा नू ऐन खोयू आलारिन ब'ओन का मुन्द बनेला बिहनी ही खोप्पन लोड़'आ ती बस्सा गे अदही बिंड़ा हें'आ, अरा गहूँन एंगहै खली नू खोप्पा।”
- 31 फिन येसुस आर गे अउर ओन्टा जोक्खा खीरी तिं गियस। “मेर्खा राजी ओन्टा राई बिहनी लेक्खा रई। अदिन ओर्त आलस होच्चस ती तंगहै खल्ल नू चाँखस।
- 32 आद उर्मी बिहनी ती सन्नी रई। अन्ति इकला परदी खने उर्मी बटकी लट्टी गुट्ठी ती कोहाँ मनी अरा आद मन्न लेक्खा मनी, अरा मेर्खा ता ओड़ा गुट्ठी बर'ई ती अदही डाड़ा नू खोता गुट्ठी अट्टी।”
- 33 येसुस अउर ओन्टा जोक्खा खीरी तिं गियस। “मेर्खा राजी बिदगी लेक्खा रई। अदिन ओर्त आली कटी गुना होच्चा ती तीन तामी गुंडा नू लिंडया, ई लेक्खा आद उर्मी तिस्सा मंजा केरा।”
- 34 इबड़ा उर्मी कत्थन येसुस गोंहड़ा गे जोक्खा खीरी गुट्ठी ती तिं गियस अरा बिगर जोक्खा खीरी ही आस एन्देर हूँ मल ब'आ लगियस।
- 35 ओंगे ईद ती धर्मेसी कत्था तिं गुसी बाचका कत्था पूरा मंजा। एकासे का, “ऐन जोक्खा खीरी गुट्ठी ती आलारिन ब'ओन, अरा ऐन खेखेल ही गढ़ना ती नूस्रका कत्था गुट्ठिन दहदर ननोन।”



- 36 फिन येसुस गोंहड़न अम्बियस ती एड़पा बरचस। अरा आसी चेलर हेददे बरचर ती बाचर, “खल्ल ता लट्टी ही जोक्खा खीरी ही मनेन एमन तेंगा।”
- 37 येसुस आरिन आनाकिर्ताचस, “एका ओर्तस खल्ल नू दौ बिहनिन चाँखस आस मनवा खद्दन ऐन हिकदन।
- 38 खल्ल खेखेल हवे, दौ बिहनी धर्मसी राजी ही आलर हिकनर, अरा लट्टी सैतान ही आलर हिकनर।
- 39 अरा बैरी ने लट्टी बिहनिन चाँखस आस सैतान हवे, अरा खोयना खेखेल ही मुंजना हवे, अरा खूयुर मेर्खा पैकर हिकनर।
- 40 अरा एकासे लट्टी आबोन खोजनर ती बस्सनर अन्नेम खेखेल ही मुंजना नू मनो।
- 41 अरा मनवा खद्दन ऐन एंग्हे पैकारिन खेखेल नू तइय्योन, अरा आर एंग्हे राजी ती उर्मी पाप नन्त'उरिन अरा उर्मी मलदौ ननुरिन खोजोर,
- 42 अरा आरिन चिच्ची गड्डी नू झपाब'ओर, असन आर गे चीँखना अरा ओलखना अरा पल्ल चब्रना मनो।
- 43 आ बारी उजगो आलर तम्हें बबासी राजी नू बीड़ी लेक्खा बिल्चोर। नेख'आ खेबदा रई आस मेन्दस ती बुझदस नेकअन।”
- 44 अउरिम येसुस बाचस, “मेर्खा राजी खल्ल नू मंड्रका खुर्जी लेक्खा रई, अदिन एकअम आलस बिददियस ती आ खल्ल नुम मंडियस चिच्चस, अरा रिझ ती केरस ती तंग्हे उर्मिन बीसियस ती आ खल्लन खिन्दियस।
- 45 अउर हूँ, मेर्खा राजी बेस मोहोर गुट्ठिन बिददू ओन्टा खीन्दू-बीसू आलस लेक्खा रई।
- 46 आस नगदे दामे ही ओन्टा मोहोर आबोन खक्खियस खने, आस केरस ती तंग्हे उर्मिन बीसियस ती अदिन खिन्दियस।
- 47 अउर हूँ, मेर्खा राजी ओन्टा जल्ली लेक्खा रई, आद समुदर नू हिबिडका ती उर्मी रकम ही इंजोन बारिया ती ओथ्रा।
- 48 अरा जल्ली निंदिया केरा खने, केंवटर पिंडी नू नतगियर ओथ्रर, अरा उक्कियर ती बेस बेसन गा संजगी नू सज्जर, अन्ति मलदौ आबोन हिबिडियर चिच्चर।
- 49 खेखेल मुंजना नू एन्नेम मनो। मेर्खा पैकर बर'ओर ती उजगो आलर ती मलदौ आलारिन छिंडोर,



- 50 अरा आरिन चिच्ची गड्डी नू च'ओर, असन आर गे चींखना ओलखना अरा पल्ल चब्रना मनो।”
- 51 येसुस तंग्हे चेलारिन बाचस, “एन्देर नीम इबड़ा उर्मी कत्थन बुझकर का?” आर आनाकिर्ताचर, “हाँ, ऐम बुझकम।”
- 52 तहाँ येसुस आरिन बाचस, “औंगे अबड़ा उर्मी नेग सिखाब'उर ने मेर्खा राजी ही पत नू सिखका र'अनर आर आ एड़पा आबस बेसे र'अनर, ने तंग्हे भंडार ती पच्चा अरा पुना जिनिस गुट्ठिन ओथ्रदस।”
- 53 येसुस इबड़ा जोक्खा खीरी गुट्ठिन बाचस मुंजियस खने, असले किर्रिम बिच्चियस।
- 54 अरा तंग्हे परदका नगरे नू बरचस ती आर ही गोड़हा एड़पा नू एन्ने सिखाब'आ हेल्स का आर अनचकर ती ब'आ हेल्सर, “ईस गे इबड़ा लूर अरा अकबक नलख नना गे सवंग एसलेक खक्खरा?”
- 55 ईस गा बढ़ाईसी खद्दस मलदस का? अरा ईसी तंगियो मरियम अरा ईसी भईर याकोब, योसेफ, सिमोन अरा यूदस मलनर का?
- 56 अरा एन्देर ईसी उर्मी बहिनर इसन नम्हे गने मल र'अनर? होले ईस गे इबड़ा उर्मी एसलेक खक्खरा?”
- 57 एन्ने बाचर ती आर आसिन एन्ने मईन मल नंजर। लिकिन येसुस आरिन बाचस, “धर्मसी कत्था तिगुस गे तंग्हे नगरे नू अरा तंग्हे एड़पा नू लेका मईन माल मनी।”
- 58 अरा आस असन आर ही मल पत'अना चड्डे बग्गे अकबक नलख मल नंजस।

मत्तायोस 14

- 1 आ बारी गलिलेया जिला ही राजी खापुस हेरोदेस अंतिपस येसुसी पत नू हलन मेंजस।
- 2 अरा तंग्हे जोखारिन बाचस, “आस योहन नूडरत'उस, आस केचका ती उज्जा चोचका र'अस, अदगे आस ती एन्ने सवंग ही नलख मनी।”
- 3-4 एन्देरगेका जोक्क उल्ला ही मुन्द हेरोदेस अंतिपस बेलस हेरोदिया आबोन उइयकाचस, एकाद हेरोदेसी भइय्योस फिलिप्पोसी मुक्का रहचा। हेरोदेस फिलिप्पोसी उज्जनुम अदिन उइय्यस। योहनस हेरोदेसिन घड़ी घड़ी ब'आलियस, “निंगा निंग्डीसी मुक्कन उइय्ना धर्मसी नेग ती बिड़दो र'ई।” खने हेरोदिया ही चड्डे हेरोदेस योहनसिन गुड़'आ गे सैनारिन तइय्का रहचस, अरा आसिन धर'अरकी जेहेल नू सजताचकाचस।



- 5 अरा आस आसिन पिटा बेद्दा लगियस, लिकिन आस आलर ती एल्चा लगियस, एन्देरगेका आर आसिन धर्मेसी कत्था तिङ्गुस सोच'आ लगियर।
- 6 हेरोदेसी कुन्दुर उल्ला अङ्गसिया खने, हेरोदिया ही तंग्दा हेरोदेस अरा आसी पाहियर ही मुन्दहारे नलिया ती हेरोदेसिन रिङ्गताचा।
- 7 खने आस किरया मोक्खस ती गच्छरस, “नीन इन्द्रिइम हूँ ने'ओय निंगा चि'ओन।”
- 8 आद तंग्यो ही कनिक'अना ती बाचा, “एंगा गे योहन नूडरत'उसी कुक्कन इसन ओन्टा थरिया नू चि'आ।”
- 9 इदन मेंजस ती बेलस अजम हेन्दो मंजस। लिकिन आस तंग्हे मोक्का किरया, अरा आसी पाहियर चड्डे आस पेसस का चितार'अन कालन।
- 10 अरा जेहेल नू आलारिन तड्य्यस ती योहनसी कुक्कन खंडताचस चिच्यस।
- 11 अरा आसी कुक्कन थरिया नू ओन्द्र'अरकी कुक्के गे चितारा, अरा अदिन आद तंग्यो गुसन होच्चा।
- 12 तहाँ योहनसी चेलर बरचर ती आसी मेदन चेड्डर होच्चर ती मंडियर अरा येसुस गे हला चिच्यर।
- 13 येसुस इदन मेंजस ती आ अड्डन अम्बियस ती ओन्टा डोंगा नू अरगियस ती उछिन्द अड्डा नू किरिम बिच्यस। लिकिन आलर इदन मेंजर ती नगरे नगरे ती ईकनुम आसी खोखा काला हेलरर।
- 14 आस अङ्गसियस ती डोंगा ती इतियस ती कोहँम गोंहडन ईरियस अरा आरिन सोग्गे ईरियस अरा आर ही रोगेन कोडे नंजस।
- 15 बीडी पुत्तिया खने चेलर आस गुसन बरचर ती बाचर, “ईद उछिन्द अड्डा हवे, अरा घड्ही मना लगी, आलारिन उड्र'ओत चि'ओत का पद्दा गुट्ठी तरा क'ओर ती तमा गे ओन्ना-मोखना खेन्दा ओंगोर।”
- 16 लिकिन येसुस किर्त'अर बाचस, “आर गे काना ही चाड मल्ला, नीम आर गे ओना गे इन्द्रिइम चि'आ।”
- 17 आर आसिन बाचर, “इसन एम्है हेद्दे पाँच गोटंग असमा अरा ऐनोटा इंजो लेका र'ई।”
- 18 येसुस बाचस, “अदिन एंग्हे गुसन ओन्द्र'आ।”



- 19 होले आस आलारिन लट्टी नू ओक्का आनियस, अरा आ पाँच गोटंग असमा अरा ऐनोटा इंजोन होच्चस ती मेर्खा तरा ईरियस ती आ ओन्ना-मोखना गे धर्मसिन धन्यवाद नंजस अरा असमन किच्चा किच्चा चेलर गे चिच्चस अरा चेलर आलर गे चिच्चर।
- 20 ओर्मर ओंडर ती उइचर। अरा चेलर बारा गोटंग डउड़ा एंगरका कुटका असमन निंदर।
- 21 ओंडका आलर मुक्कर अरा खद्दारिन अम्बरकी मलागूटी पाँच हजार मेतर रहचर।
- 22 तहाँ येसुस चेलारिन डोंगा नू अरग'अरकी तंगहै ती मुन्द समुदर ही आ पक्के काला गे आनियस। येसुस गोंहइन उइअना गूटी असन रहचस।
- 23 आलारिन उइराचका खोखा भिन्गे परता नू बिन्ती नना गे केरस, अरा पुतबारी असन ओर्त गुना रहचस।
- 24 आ बेड़ा नू डोंगा समुदर ही मझी नू रहचा। ताका मुन्द तरती तागर'आ लगिया खने लहरा नुकुर'आ लगिया।
- 25 येसुस खेर चींखका बेड़ा नू समुदर नू ईकनुम आर ही गुसन बरचस।
- 26 चेलर आसिन समुदर नू ईकनुम बरनन ईरियर ती अकबकरर केरर, अरा बाचर, “हूद नाद हवे!” अरा इल्चका ती चिच्चियार'आ हेलरर।
- 27 लिकिन येसुस लेम आर ही गने कछनखरस ती बाचस, “डिठ नना! ऐन हिकदन, अमा एल्चा।”
- 28 अरा पतरस आसिन आनाकिर्ताचस, “अना उर्बायो, नीन होले, एंगन अम्मु नू ईकनुम निंगहै गुसन बर'आ गे आना।”
- 29 खने आस बाचस, “बरा।” खने पतरस डोंगा ती इतियस ती येसुस तरा अम्मु नू ऐका हेलरस।
- 30 लिकिन तागरनन ईरियस ती इल्चियस अरा मूलखा हेलरस खने, चिच्चियारस ती बाचस, “अना उर्बायो, एंगन बछाब'आ!”
- 31 येसुस लेम तंगहै खेक्खन मुन्द नंजस ती आसिन चोदस ती आसिन बाचस, “अना पत्त'अना नू पयहा आलायो, एन्देरगे धुकपुकुरकय?”
- 32 अरा डोंगा नू अरगियर खने, ताका मइचा केरा।
- 33 अदही खोखा डोंगा नू रहचर आर आसिन ओलगर बाचर, “मानिम नीन धर्मसी खद्दय हिकदय।”
- 34 आर अउर हूँ गलिलेया समुदर नू कालरकी गेन्नेसरेत नगरे अंडसियर।



35 अरा असन आलर येसुसिन चिन्हचर, अरा गेच्छा हेददे ती उर्मी अड्डा नू हला तइय्यर, अरा उर्मी रोगियारिन आसी गुसन ओन्द्रर।

36 अरा आर आस गुसन तंगन महले तंगहै किचरी ही अंचरन हूँ रोगियारिन ऐसइआ चिआ गे गोहरारर। अरा ऐ बग्गे आलर आसिन ऐसइर आर ओर्मर कोड़े मंजर केरर।

मत्तायोस 15

1 तहाँ येरुसलेम नगरे ती जोक्क फरिसीर अरा नेग सिखाब'उर बरचर ती येसुसिन ब'आ हेलरर,

2 “एन्देरगे निंगहै चेलर पूरखर ही मनता गुट्ठिन चाइनर का बिगर खेक्खा नोंदरका असमा मोखनर?”

3 येसुस आरिन आनाकिर्ताचस, “नीम हूँ निम्है मनता ही चइडे एन्देरगे धर्मसी पेसकन चाइदर?”

4 एन्देरगेका धर्मस बाचकादस, ‘निंगहै अयंग अरा बंगासी मईन ननके’ अरा ‘नीकइम बंगस मलता अयंगन मलदौ ब'अदस, आस पिटतार'ओस।’

5 लिकिन नीम निम्है अयंग मलता बंगन ब'अदर का ऐन निमन सहाड़ा नना पोल्लोन, एन्देरगेका ऐन निमा एन्देर चि'अना रहचा अदन धर्मस गे दान लेक्खा चि'आ गे किरया मोक्कन।

6 होले नीम सिखाब'अदर का आलर अयंग मलता बंगासी मईन अम्बोर नना। एन्ने नीम निम्है मनता चइडे धर्मसी कत्थन ताँइचकर चिचचर।

7 अना उतुरमाडू आलारो, निम्है पत नू धर्मसी कत्था तिगू यसायास ठौकम तिंकादस, एकासे का,

8 ‘इबड़ा आलर तम्है कत्था ती गा एंगहै मईन नन्नर, लिकिन ईर मानिम नू एंगन मल पेसनर।

9 ईर अनभनियाँ नू एंगहै महबा नन्नर, ईर गा आलर ही कमचका पेसकन धर्मसी पेसका ब'अरकी सिखाब'अनर।”

10 तहाँ येसुस गोहड़ा आबोन तंगहै गुसन मीखियस ती बाचस, “एंगहै कत्थन मेना ती बुझ'आ

11 एकाद आलासी बई नू कुर'ई आद आसिन सोतबोड़'आ मल ननी, लिकिन एकाद आलासी बई ती उरखी आदिम आसिन सोतबोड़'आ ननी।”

12 तहाँ आसी चेलर बरचर ती आसिन बाचर, “एन्देर नीन अखदय का फरिसीर ई कत्था चइडे मुड्डियर?”

13 येसुस किर्त'अर बाचस, “एकाद एंगहै मेर्खा बंगस मल्ला इदका उर्मी खोप्पा चइतार'ओ।



- 14 फरिसीर ती तरकूटी र'आ, आर अन्धहा डहरे ईद'उर। अन्धहर अन्धहर गे डहरे ऐद'ओर होले, इरबर दिम गड्डी नू खत्र'ओर।”
- 15 इदिन मेंजस ती पतरस आसिन बाचस, “ई जोक्खा खीरिन एमन बुझाब'आ।”
- 16 येसुस बाचस, “एन्देर नीम हूँ अक्कुन गूटी मल बुझ'उर हिकदर?”
- 17 एन्देर नीम बलदर का इन्द्रिइम लो बई नू कुर'ई आद कूल नू क'ई अरा तंग्हे डहरे नू उरखी क'ई।
- 18 लिकिन एकदा बई ती उरखी आद जिया ती उरखी अरा आदिम आलारिन सोतबोड़'आ ननी।
- 19 एन्देरगेका मलदौ सोच, आल पिटना, नन्ना आली गुसन काना, पेहरन ही सोतरा नलख, खड़ना, ठकवा गोवाह चि'अना अरा निंदा नन्ना जिया तिम उरखी।
- 20 इबड़ा दिम एकाद आलारिन सोतबोड़'आ ननी, अन्ति खेक्खा बिगर नोंढरका ओन्ना-मोखना आलारिन सोतबोड़'आ मल ननी।”
- 21 फेन येसुस गलिलेया जिला ती उरखस ती तुरोस अरा सीदोन जिला नू किरिम बिच्चियस।
- 22 अय्या ता ओन्टा नन-यहूदी आली आस गुसन बरचा अरा चिच्चियारा ती ब'आ हेलरा, “अना उर्बायो, दाऊदसी खद्दायो, एंगन सोग्गे ऐरा, एंगदन नाद धरचकी र'ई, आद एंगदन नगदे खिलपत नना लगी।”
- 23 लिकिन आस इन्द्रिइम हूँ उतारा मल चिच्चस। खने तंग्हे चेलर आसी गुसन बरचर ती गोहरारर, “इदिन उड़'आ, एन्देरगेका ईद नम्है खोखा चिच्चियारनुम बर'आ लगी।”
- 24 येसुस आनाकिर्ताचस, “धर्मस एंगन इस्राऐलर ता एबस्रका भेंडो गुसन लेका तइय्कादस।”
- 25 लिकिन आद अउरिम बरचा ती येसुसिन मोंजरा नंजा ती ब'आ हेलरा, “अना उर्बायो, एंगहा सहाड़ा नना।”
- 26 आस आनाकिर्ताचस, “खद्दर ही असमन अल्ला गे चि'अना दौ मलकी।”
- 27 आद बाचा, “मानिम उर्बायो, लिकिन अल्ला हूँ उर्बासी टीबुल ता खत्रका जुट्टा अट्टन मूखी।”
- 28 तहाँ येसुस आनाकिर्ताचस, “अनय खद्दो, निंग्हे पत'अना कोहाँ र'ई, एकन्ने नीन बिद्दिन अन्नेम निंगा मनन।” अरा तंग्दा आ बारिम कोड़े मंजा केरा।
- 29 येसुस असलेक गलिलेया समुदर हेद्दे बरचस ती परता मइय्याँ अर्गियस ती उक्कियस केरस।



- 30 खने कोहाँ गौहड़ा आसी गुसन खोपरा केरा। आर तम्है गने लेंगड़ा, अन्धहा, कौंदा, ठुठा अरा नन्ना नगदे बग्गेरिन आसी हेददे ओन्दर, अरा आसी हेददे उइय्यर चिच्चर। आस अबड़ा आलारिन कोड़े नंजस।
- 31 औंगे अक्कु आलर ईरियर का कौंदर कछनखनर अरा ठुठर कोड़े मन्नर अरा लेंगड़र ऐकनर अरा अन्धहर ऐरनर, खने अकबक मंजर ती इस्राएल ता धर्मसी ओहमा नंजर।
- 32 येसुस तंग्हे चेलारिन तंग्हे गुसन मोखरकी बाचस, “एंगा ई गौहड़न सोग्गे लग्गी, एन्देरगेका ईर तीन उल्ला ती एंग्हे गने र'अनर। अक्कुन गा आर ही गुसन ओन्ना-मोखना मुंज्रा। ऐन आरिन कूल कीड़ा ती तइय्या गे मल बेदददन का आर डहरे नू पयहा मनोर क'ओर।”
- 33 चेलर आसिन बाचर, “एमा गे ई टोड़ंग नू ई बग्गे असमा एसले खक्ख'ओ का ई कोहाँ गौहड़न उइत'आ औंगोम।”
- 34 खने येसुस आरिन मेंजस, “निम्है गुसन ऐ बग्गे असमा र'ई?” आर बाचर, “सात गोटंगा अरा कटी गुना सन्नी इंजो।”
- 35 खने आस गौहड़ा आबोन खेखेल नू ओक्का गे आनियस।
- 36 अरा आस सात असमन अरा अबड़ा इंजोन होच्चस, अरा धर्मसिन धन्यवाद ननरकी अदन किच्चियस। अरा अबड़न तंग्हे चेलर गुसन चिच्चस। अरा चेलर अदन गौहड़ा गे खट्टियर।
- 37 ई लेक्खा ओर्मर मोखरकी उइचर केरर। अरा चेलर एंगरका कुटका असमन पेत्र ती सात डउड़ा निन्दर।
- 38 मुक्कारिन अरा खददारिन अम्बरकी मूखू आलर मेत्र लेका मलागूटी चार हजार रहचर।
- 39 तहाँ आस गौहड़न उइचस ती डौंगा नू अर्गियस केरस अरा मगदन चकभार नू बरचस।

मत्तायोस 16

- 1 उन्दुल फरिसीर अरा सदुकीर येसुस गुसन बरचर ती आसिन बिद'आ गे आसिन बाचर, “एमन मेर्खा ता इन्द्रिम अकबक ही चिन्हा ऐद'आ।”
- 2 येसुस आरिन आनाकिर्ताचस, “पुतबारी मेर्खा खेंसो र'ई होले, नीम ब'अदर, इन्ना रगी ननो।
- 3 अरा पैरी बारी मेर्खा खेंसो अरा धुंधरहा र'ई होले नीम ब'अदर, इन्ना धूका मनो। नीम मेर्खा ता ऐथ्रनन ऐरदर ती लख'आ औंगदर, लिकिन अक्कु एन्देर मना लगी अदिन नीम बुझ'आ पोलदर।



- 4 मलदौ अरा नन्ना आली गुसन कालू आलर ही परिया ता आलर अकबक नलख ही चिन्हा बेद्दनर, लिकिन धर्मसी कत्था तिंगू योनासी उज्जना नू मंजका अकबक नलखन अम्बरकी आर गे नन्ना एन्देर चिन्हा हूँ मल चितार'ओ।" अरा आस आरिन आम्बियस ती किर्रिम बिच्चियस।
- 5 खोखा चेलर समुदर ही आ पक्खा अंइसियर, अन्ति आर असमा हो'आ मोधरर केरर।
- 6 येसुस आरिन चेताबाचस, "ऐरा, नीम फरिसीर अरा सदुकीर ही बिदगी ही पत्त नू बड़ियर र'अके।"
- 7 आर तम्है नू आनानखर'आ हेलरर, "आस इदन ब'अदस एन्देरगेका नाम असमा मल्ला ओन्द्रका।"
- 8 लिकिन इदिन अक्खस ती येसुस आरिन बाचस, "अना पत्त'अना नू पयहा आलारो, निम्है गुसन असमा मल्ला अदही पत्त नू नीम एन्देरगे बाचनखर'आ लगदर?"
- 9 नीम अक्कुन गूटी बलदर अरा मल बुझुरदर का? एंग्हे नंजका अकबक नलख निमा गे सुरता मल रई का? ऐन पांच हजार आलर गे पांच गोटंग असमा ती ओन्ताचका बेड़ा नीम असमा ही एंगरका टुटकन पेतकर ती एवन्दा डउड़ा निन्दकर?
- 10 महले ऐन चार हजार आलर गे सात गोटंग असमा ती ओन्ताचका बेड़ा नीम असमा ही एंगरका टुटकन पेतकर ती एवन्दा डउड़ा नू निन्दकर?
- 11 ऐन निमन असमा ही पत्त नू मल्ला बाचका। नीम एन्देरगे इदन मल बुझुरदर? ऐन गा फरिसीर अरा सदुकीर ही बिदगी ती चिहुंक र'आ गे ब'आलदन।"
- 12 खने चेलर बुझुर का येसुस असमा ता बिदगी ही नू मला लिकिन फरिसीर अरा सदुकीर ही सिखाब'आना ती चिहुंक र'आ गे आनका रहचस।
- 13 येसुस कैसरेया फिलिप्पी चक नू बरचस खने, तंग्हे चेलारिन मँजस, "मनवा खद्दन एंगन आलर एन्देर ब'अनर?"
- 14 आर बाचर, "जोक्क आलर ब'अनर योहन नूडरत'उस, अरा जोक्क आलर ब'अनर धर्मसी कत्था तिंगू एलियस, अरा नन्नर ब'अनर येरेमियास महले चिरान ता धर्मसी कत्था तिंगुर ती नन्ना ओर्तोस"
- 15 तहाँ आस आरिन मँजस, "लिकिन नीम एंगन ने ब'अदर?"
- 16 खने सिमोन पतरस आनाकिर्ताचस, "नीन मसी, उज्जना धर्मसी खद्दय हिकदय।"
- 17 येसुस आसिन आनाकिर्ताचस, "अना सिमोन योनासी खद्दय नीन आसीस खक्खका आलय, एन्देरगेका एकअम आलस मला लिकिन एकास मेर्खा नू र'ऊ एंग्हे बंगस ई कत्थन निंगा गे दहदर नंजकादस।



- 18अउर हूँ ऐन निंगन ब'अदन का नीन पतरस हिकदय, ऐन ई चचड़ी मइय्याँ एंग्हे कलीसिया आबोन कम'ओन, अरा खे'अना ही सवंग अदन जित'आ पोल्लो।
- 19ऐन निंगा मेर्खा राजी ही कुँची गुट्ठिन चि'ओन, अउर नीन इन्द्रिइम खेखेल नू नना मल चि'अदय अदन धर्मस हूँ नना मल चि'अदस, अरा नीन इन्द्रिइम खेखेल नू नना चि'अदय अदन धर्मस हूँ नना चि'अदस।”
- 20खने येसुस चेलारिन चेताबाचस, नीम नेकन हूँ अमके तेंगा का ऐन मसी हिकदन।
- 21आ बेडा ती येसुस तंग्हे चेलारिन तेंगा हेल्सरस का “एंगा गे येरुसलेम काना दिम मनो, अइय्या यहूदी सेयान आलर अरा मुध नैगर अरा नेग सिखाब'उर ती अजम खिलपत मन्ना मनो अरा पिटतार'ओन, लिकिन ऐन तीन उल्ला खोखा उज्जा चोर'ओन।”
- 22खने पतरस आसिन तरकूटी हो'अरकी कड़का हेल्सरस अरा बाचस, “उर्बायो, अम्बो मना का इकल'अम निंग्हा गने एन्ने मनो।”
- 23तहाँ आस किर ईरियस ती पतरसिन बाचस, “अना सैतान, एंग्हे मुन्दहारे ती तरकूटी मना। नीन मूडना ही अड्डा हिकदय, नीन धर्मसी सोचना लेक्खा मल सोचदय, आलर ही सोचना लेक्खा सोचदय।”
- 24फिन येसुस तंग्हे चेलारिन बाचस, “नीकईम एंग्हे चेला मना बेद्ददर होले, आर गे ताम तम्है नना बेद्दना लेका अम्बोर नना, ऊजी नू तम्है क्रुस आबोन चेड़'अरकी एंग्हे गने चोख्रना र'ई।
- 25एन्देरगेका नीकईम तंग्हे उज्जनन तंग्गा गे उज्जा बेद्ददस होले, आस धर्मस गने जनमजुग ही उज्जनन एबस'ओस, लिकिन आस एंग्हे चड्डे तंग्हे उज्जनन चि'अदस होले, आस धर्मस गने जनमजुग ही उज्जनन खक्खोस।
- 26ओन्टा आलस ई खेखेल ता उर्मी जिनिसन अर्ज'ओस, अरा धर्मस गने जनमजुग ही उज्जनन एबस'ओस होले, आस गे एन्देर नाफा मनो? आलस एबसका उज्जनन फेन खक्खा गे ऊजी नू एन्दरन हूँ चि'आ पोल्दस।
- 27मनवा खद्दन ऐन एम्बासी महबा अरा आसी पैकर गने किर्रोन। अरा आ उल्ला ऐन ओर्मर गे तम्है तम्है नलख लेक्खा खंजपा चि'ओन।
- 28ऐन निमन मानिम ब'अदन, अक्कुन इसन इज्जका आलर ती जोक्कोर मनवा खद्दन ऐन बेल लेक्खा किर्रनन बिगर ईरका मल खे'ओर।”

मत्तायोस 17



- 1छे उल्ला ही खोखा येसुस पतरस अरा याकोब अरा आसी भइय्योस योहनसिन तंग्हे गने ओन्टा मेच्छा परता मइय्याँ होचस।
- 2आ बारी आर ही मुन्दहारे आसी ऐथ्रना बदलारा केरा। आसी मुंही बीड़ी लेक्खा बिल्चिया अरा आसी किचरी नगदे कोइहे पंडरु बिल्ली लेक्खा मंजा केरा।
- 3अरा ऐरा, लेम धर्मेसी कत्था तिगुर मूसस अरा एलियस येसुस गने कछनखनुम ऐथ्रर।
- 4पतरस येसुसिन बाचस, “अना उर्बायो, नाम इसन र'अदत आद दौ हवे। निंग्हा मने र'ई होले ऐन इसन तीन गोटंग कुम्बा कम'ओन, ओन्टा निंगा, ओन्टा मूसस गे, ओन्टा एलियस गे।”
- 5अरा एन्ने ब'अम लगियस का ओन्टा बिल्चना बदाली आरिन कुल्लिया चिच्चा। अरा बदाली ती धर्मे बबस अबड़ा चेलारिन बाचस, “ईस एंग्हे चोन्हा खद्दस, ईस ती ऐन नगदे रिङ्गदन, ईसहीन मेना।”
- 6चेलर मेंजर ती मुंही पाब खत्तरर अरा नगदे कोइहे इल्चियर केरर।
- 7लिकिन येसुस हेद्दे केरस ती आरिन ऐसइस ती बाचस, “चो'आ, अमा एल्चा।”
- 8खने आर मेन ईरयर अरा येसुसिन अम्बरकी नेकन हूँ मल ईरयर।
- 9फेन आर परता ती एत्तलियर, आ बारी येसुस आरिन आनियस का, “मनवा खद्दन ऐन केचका ती उज्जा चो'अना गूटी, नीम एन्द्रा ईरकर अदिन नेकन हूँ अमके तेंगा।”
- 10अरा चेलर आसिन मेंजर, “खने एन्देगे नेग सिखाब'उर ब'अनर का, मसीसी खे'खेल नू बरना ती मुन्द एलियस गे अउरिम बरना र'ई?”
- 11येसुस आनाकिर्ताचस, “एलियस बर'ओस दिम अरा उर्मिन सपड़'ओस।
- 12लिकीन ऐन निमन ब'अदन, एलियस बरच खच्चिका र'अदस, अरा आसिन मल चिन्हचर। लिकिन एकासे आसिन नना बिद्दयर अन्नेम आसी गने नंजर। ई लेक्खम मनवा खद्दन ऐन हूँ आर ही खेक्खा ती दुक्खे चोद'ओन।”
- 13खने चेलर ओर्खाचर का आस नमन योहन नूडरत'उसी पत नू बाचकादस।
- 14एकाबारी येसुस अरा आसी चेलर गोंहड़ा गुसन अंइसियर खने, ओर्त आलस आसी गुसन बरचस ती मूकलिदरस,
- 15अरा ब'आ हेलरस, “अना उर्बायो, एंग्दस मइय्याँ सोग्गे ऐरा। एन्देगेका आस गे मिर्गी बर'ई अरा आस नगदे दुक्खे चोद्दस, अरा घड़ी घड़ी चिच्ची नू अरा घड़ी घड़ी अम्मु नू खत्तरदस कादस



- 16 ऐन आसिन निम्है चेलर गुसन ओन्द्रका रहचकन, लिकिन आर आसिन उजग'आ पोल्लर।”
- 17 येसुस आरिन आनाकिर्ताचस, “अना मल पत'ऊ अरा जिधा आलरो, ऐन एका गूटी निम्है गने र'ओन, एका गूटी निम्हैन सह'ओन, आसिन एंग्हे गुसन ओन्द्र'आ”
- 18 खने येसुस नादन केप्पस अरा आद आसी मइय्याँ ती उरखा केरा। अरा आ कुक्कोस आ बारिम कोड़े मंजस केरस।
- 19 तहाँ चेलर उछिन्द बेड़ा नू येसुस गुसन बरचर ती बाचर, “ऐम अदिन एन्देरगे ओथ्र'आ पोलकम।”
- 20 आस आरिन बाचस, “निम्है पत'अना ही खंग्रना चड्डे, ऐन निमन मानिम ब'अदन का निम्है पत'अना मनी बिहनी लेक्खा हूँ र'ओ होले, ई परतन ब'आ ओंगोर का इसलेक कगरार'अय ती असन किरिमबि'अय, होले आद किरिमबि'ओ। अरा इन्द्रिइम कत्था निमा गे नना पोलना मल र'ओ।
- [21 लिकिन ई जाती बिगर गोहरारना अरा बिगर उपास ही मल उरखी।”]
- 22 इकला येसुसी चेलर गलिलेया नू रहचर खने येसुस आरिन बाचस, “मनवा खददन ऐन आलर ही खेक्खा नू धरतार'ओन कालोन।
- 23 अरा आर एंगन पिटा खच्चोर, लिकिन तीसर उल्ला उज्जा चो'ओन।” इदिन मैंजर ती आर नगदे हेन्दो मंजर।
- 24 इकला येसुस अरा आसी चेलर कफरनहूम अंइसियर खने धर्मेसी मन्दिर ता ऊज'उर पतरस गुसन बरचर ती मैंजर, “एन्देर निम्है गुरुस धर्मेसी मन्दिर ही मालगुजारी चि'अदस का मला?”
- 25 आस बाचस, “हाँ, चि'अदस।” आस एइपा बरचस, खने येसुस आसी मेन्ना ती मुन्देम आसिन बाचस, “अना सिमोन, नीन एन्देर सोचदय? खेखेल ता बेलर मालगुजारी नेखअय ती हो'अनर? तम्है खददर ती का नन्नर ती?”
- 26 पतरस बाचस, “नन्नर ती।” येसुस आरिन बाचस, “होले खददर अम्बरर केरर।
- 27 अन्नु हूँ इदगेका नाम आरिन अम्बोत मूइत'आ। ओंगे नीन समुदर नू कला ती गरी बेचा। अरा एका इंजो मुन्द बइर'ओ अदिन हो'आ। अदही बइय्यन चलख'आ, निंगा ओन्टा ढिबा खक्ख'ओ। अदिनिम हो'आ ती एंगहा अरा निंगा गे चि'अके उइय्के।”

मत्तायोस 18

- 1 आ बारी चेलर येसुस गुसन बरचर ती मेना हेलरर, “मेर्खा राजी नू ने कोहाँ र'ई?”



- 2 खने येसुस ओन्टा सन्नी खद्दासिन हेददे मीखियस ती आर ही मझी नू इजताचस,
- 3 अरा बाचस, “ऐन निमन मानिम ब'अदन, एका गूटी नीम निम्है पाप ती किर'ओर ती सन्नी खद्दर बेसे मल मनोर, नीम मेर्खा राजी नू कोर'आ पोल्लोर।
- 4 एका ओर्तोस तंगन ई खद्दस लेक्खा लुदऊ सोच'ओस, आस मेर्खा राजी नू कोहाँ मनोस।
- 5 एका ओर्तोस ई बेसे ओन्टा सन्नी खद्दासिन एंग्हे बदली नू इंझदस आस एंगन इंझदस।
- 6 अरा इबड़ा सन्नीर एका ओर्तोस एंगन पत'अदस, आसिन नीन पाप नना गे नन्दय होले, निंग्हे खेसेर नू ओन्टा कोहाँ पखनन है'अरकी निंगन समुदर नू मुल'खत'अना चि'अना निंगा गे दौ रई।
- 7 मूडना चडडे खेखेल गे ओहरे, एन्देरगेका अदही आलो आलारिन पाप नना गे मूडत'ई। एन्ने मूडना ही गा बरना चाड़ रई, लिकिन नेखअय ती मूडना मनी आस गे ओहरे।
- 8 औंगे निंग्हे ओन्टा खेक्खा महले खेड्डे निंगन पाप नन्त'ई होले, अदिन सम्झ'आ। पाप नन्ना ती सम्झ'आ गे आ खेक्खन महले खेड्डेन खंडना मनो होले हूँ अदिन खंडा चि'आ। पाप नन्ना चड्डे ऐंड खेक्खा महले ऐंड खेड्डे ही र'अनुम नरक नू हेबडूना ती, बिगर पाप नंजका ठुठा महले लेंगड़ा मनरकी धर्मस गने जनमजुग ही उज्जना नू कोरना निंगा दौ रई।
- 9 अरा निंग्हे ओन्टा खन्न निंगन पपा नन्त'ई होले, अदिन सम्झ'आ। पाप नन्ना ती सम्झ'आ गे आ खन्नन टोटरना ओथ्रना मनो होले हूँ अदिन टोटर'आ ओथ्र'आ अरा हेबड़ा। पाप नन्ना चड्डे ऐंड खन्न र'अनुम नरक नू हेबडूना ती, बिगर पाप नंजका कना मनरकी धर्मस गने जनमजुग ही उज्जना नू कोरना निंगा दौ रई।
- 10 चिहूंक र'आ का नीम इबड़ा सन्नी मधेर ती नेकन हूँ अमके खाँड़'आ। एन्देरगेका ऐन निमन मानिम ब'अदन का मेर्खा नू आर ही पैकर एंग्हे मेर्खा ता बंगस गने सगरो र'अनर। [11 एन्देरगेका मनवा खद्दन ऐन एबसका आलारिन नाड़ा बरचकादन।]
- 12 एकअम आलासी सौ गोटंग भेंडो रई, अरा अबड़ा ती ओन्टा इबस'ई क'ई होले, आस एन्देर ननोस? आस निनान्बे गोटन परता नू अम्बोस ती क'ओस अरा आ एबसकन मानिम नू बेद्दोस।
- 13 ऐन निमन मानिम ब'अदन का आस अदिन खक्खोस होले, आस अबड़ा मल इबसका निनान्बे भेंडो ती ई भेंडो गे बग्गे खुसमार'ओस।
- 14 एन्नेम दिम निम्है बबस एकास मेर्खा नू र'अदस आसी मने एन्ने मलकी का इबड़ा सन्नी मधे ती ओन्टा हूँ नठार'ओ।



- 15निंग्हे भइय्योस निंग्हे बिड़दो गुन्हा ननोस होले, कला ती ओर्तलेका र'अना बेड़ा आसी गुन्हन आसिन तेंगा। आस निंग्हेन मेनोस होले नीन निंग्हे भइय्योसिन अउरिम खक्खकय।
- 16लिकिन आस निंग्हेन मल मेन्दस होले ओरोत महले दुई इन निंग्हे गने हो'आ ती आस गुसन कला, होले उर्मी कत्था दुई महले तीन गोवाह ती ओट्टा ओक्कन नेकअन।
- 17आस आरहिन मल मेन्दस होले कलीसिया नू तेंगा चि'आ। अरा आस कलीसियन हूँ मल मेन्दस होले, नीन आसिन मल पत'ऊ महले ऊज'ऊ लेक्खा अखके।
- 18ऐन निमन मानिम ब'अदन, नीम खेखेल नू एन्द्रन नना माल चि'ओर अदिन धर्मस हूँ नना माल चि'ओस, अरा नीम एन्द्रन खेखेल नू नना चि'ओर अदिन धर्मस हूँ नना चि'ओस।
- 19ऐन इदन हूँ निम्है ती ब'अदन, निम्है मधे ती इरिब आलर खेखेल नू एकअम कत्था गे ओन जिया मनोर ती ने'ओर होले, आद एंग्हे मेर्खा बंगस तरती आर गे मनो क'ओ।
- 20एन्देरगेका एक्सन ऐनोटा महले मूनोटा आलर एंग्हे नामे ती खोडूनर असन ऐन आर ही मझी नू र'अदन।”
- 21खने पतरस येसुसी हेद्दे बरचस ती मेंजस, “अना उर्बायो, एंग्हे भइय्योस एंग्हे बिड़दो नू गुन्हा नन्तेम र'ओस होले, ऐन एवन्दा खेप आसिन छमा ननोन? सात खेप गूटी का?”
- 22येसुस आसिन बाचस, “ऐन निंगन ब'अदन, सात खेप मला, लिकिन सात ही सतर खेप गूटी।
- 23मेर्खा राजी ओन्टा बेलस लेक्खा र'ई, एकास तंग्हे जोंखर ती लेखा हो'आ बिद्दियस।
- 24एकाबारी आस लेखा हो'आ हेलरस खने, ओर्त आलस आसी गुसन ओन्द्रतारस, आस दस हजार ढिबा नहड़ा मोक्का रहचस।
- 25लिकिन आसी गुसन तंग्हे उर्बस बेलस गे किर्त'आ गे एन्देर हूँ मल रहचा। औंगे आसी उर्बस, ईसिन अरा ईसी मुक्कन अरा खद्द-खरन अरा इन्द्रिइम ईसी र'ई उर्मिन बीसा ती नहड़न चुकता नना आनियस।
- 26खने आस खेडमूली खत्रस ती नेचस, ‘अना उर्बायो, खतीर नना, ऐन उर्मिन किर्त'ओन चि'ओन।’
- 27खने आ उर्बस सोग्गे ईरियस ती अम्बियस चिच्चस अरा आसी नहड़न छमा नंजस चिच्चस।
- 28लिकिन आ जोंखस उरखस खने, तंग्हे ओर्तो संगे जोंखासिन खक्खियस, एकास आसी सौ देनारी नहड़ा मोक्का रहचस। आस आसिन धरचस ती आसी खेसन पेदखस, ऐ बग्गे एंग्हे नहड़ा मोक्कादय अदिन किर्त'आ चि'आ बाचस।



- 29अन्ति आसी संगे जोंखस आसी खेडमूली खत्रस ती गोहर'आ हेलरस, 'खतीर नना, ऐन उर्मिन किर्त'ओन चि'ओन।'
- 30लिकिन आस आसिन मेना गे मने मल नंजस, लिकिन होचस ती जेहेल नू गूडचस चिचस का एका गूटी नहइन मल किर्त'ओस आ गूटी अइय्यम र'ओस।
- 31आसी नन्ना संगे जोंखर इबड़ा मंजकी रहचा अदिन ईरयर खने, नगदे हेन्दवारर अरा केरर ती उर्मी कत्थन तम्है उर्बासिन तिंगियर।
- 32खने आसी उर्बस आसिन मेखताचस ती बाचस, 'अना मलदौ जोंखायो, नीन गा एंगन गोहरारकय, खने ऐन निंगहै नहइन उर्मिन अम्बकन चिचकन।
- 33औंगे ऐन एकासे निंगन सोग्गे ईरकन अन्नेम निंगा हूँ निंगहै संगे जोंखस मइय्याँ सोग्गे ऐरना रहचा।'
- 34अरा आसी उर्बस गोसा मंजस ती तंगहै उर्मी नहइन चि'अना गूटी आसिन दंडे चि'उर ही खेक्खा नू चिचस उइय्यस।
- 35नीम निम्है भइय्योसिन जिया ती छमा मल ननोर होले, अन्नेम निम्है मेर्खा ता बबस हूँ निमन छमा मल ननोस।”

मत्तायोस 19

- 1येसुस इबड़ा कत्थन आना खच्चियस खने आस गलिलेया जिला ती उरखस ती यरदन खाइ ही आ पक्खे यूदेया जिला नू बरचस।
- 2अरा कोहाँ गोंहड़ा आसी खोखा गुड़ीयारा, अरा असन आस आर ही रोगेन कोड़े नंजस।
- 3जोक्क फरिसीर आसिन बिद'आ गे आसी हेददे बरचर ती ब'आ हेलरर, “ओन्टा आलस गे तंगहै आलिन इन्द्रिइम चड्डे अम्बरनख्रना यहूदी धरम ही नेग लेक्खा मानिम र'ई का?”
- 4आस आनाकिर्ताचस “एन्देर नीम नेम्हा पुथी नू मल्ला पढ़चका का? इकला धर्मस खेखलन गढ़चस, आस आरिन मेत मुक्का गढ़चस।”
- 5अरा बाचस, “ ई चड्डे आलस तंगयो तम्बन अम्बरकी तंगहै आली गने र'ओस। आर इरबरदिम ओन्टा आल लेक्खा मनोर।
- 6औंगे अक्कु आर धर्मसी ऐरना नू ऐंड मला ओन्टा आल हिकनर। औंगे नेकन धर्मस जोडचस आरिन ने हूँ अम्बोर छिंडा।”



- 7 अबड़र आसिन बाचर, “होले एन्देरगे ओन्टा आलस अम्बरनखरना ही पत नू लिखचका चिठी चि'अरकी तंग्हे आलिन अम्बा गे मूसस आनियस?”
- 8 येसुस आरिन आनाकिर्ताचस, “मूसस गा निम्है बेड़हा जिया चड्डेम मुक्कन अम्बरनखरना चिठी चि'आ ती अम्बा गे चिच्चस। लिकिन हुल्लो नू अन्ने मल रहचा।
- 9 अरा ऐन निमन ब'अदन का एकअम ओर्तस नन्ना आलस गुसन काना पाप ती नन्ना चड्डे तंग्हे आलिन अम्दस ती नन्ना आलिन बैज्रदस होले, आस नन्ना आली गुसन काना ही पाप नन्दस।”
- 10 खने चेलर आसिन बाचर, “मैतासी अरा मुक्का गने एन्ने दसा रई होले, मल बैज्रना दौ हिके।”
- 11 येसुस आरिन बाचस, “ओर्मर ई कत्थन इंझ'आ पोल्लोर, लिकिन अबड़र लेका इंझ'आ ओंगोर नेका ई दान चीतारकी रई।
- 12 एन्देरगेका जोक्क करबेलवर एन्ने र'अनर ने अयंग ही ओदर तिम एन्ने कुन्द्रकानर। अरा जोक्क करबेलवर एन्ने र'अनर, नेकन आलर कमचर। अरा जोक्क करबेलवर एन्ने र'अनर एकाबड़र मेर्खा राजी गे तमन करबेलवा कमचकानर। ने इदन इंझ'आ ओंगो आर इंझ'ओर।”
- 13 खने आलर तंग्हे सन्नी खद्दारिन येसुस गुसन ओन्द्रर का आस खद्दर ही मइय्याँ तंग्हे खेक्खा उइय्योस ती बिन्ती ननोस। लिकिन चेलर आरिन केप्पर।
- 14 लिकिन येसुस आरिन बाचस, “खद्दारिन एंग्हे गुसन बर'आ चि'आ, आरिन अमा छेक'आ, एन्देरगेका ने इबड़ा खद्दर लेक्खा र'अनर, आरिनिम धर्मस राजी ननोस।”
- 15 फिन येसुस आर ही मइय्याँ खेक्खा उइय्यस ती असलेक किरिम बिच्चियस।
- 16 ओंग्होल ओर्त आलस येसुसी गुसन बरचस ती बाचस, “अना गुरु, मुंजामलका उज्जना खेक्खा गे ऐन एन्देर दौ नलख नन्ना रई?”
- 17 येसुस आसिन बाचस, “नीन एंग्हे ती दौ ही पत नू एन्देरगे मेन्दय? धर्मस लेका दौ र'अदस, अन्ति नीन जनमजुग उज्जना नू कोर'आ बेद्ददय होले, पेसकन पेस'आ।”
- 18 आ आलस मेंजस, “एका पेसका?” येसुस बाचस, “ईद का, अमके पिटा, नन्ना आली गुसन अमके काला, अमके खड़'आ, बेगर नू अमके ब'आ,
- 19 तंग्हे अयंग बंगन मईन नना, अरा तंग्हे अरबर-परबर गने तंग्हे लेक्खा चोन्हा नना।”
- 20 आ जौखस बाचस, “इबड़ा उर्मिन गा ऐन पेसकन, अक्कु एंग्हे नू एन्द्रा खंग्की रई?”
- 21 येसुस आसिन बाचस, “नीन बड़ीयर मना बेद्ददय होले, कला, निंग्हे खुर्जिन बीसा ती मलकर गे चि'आ, फिन निंगा मेर्खा नू खुर्जी खक्ख'ओ। फिन बरा ती एंग्हे गने चौर'आ।”



- 22 लिकिन आ जॉखस हेन्दवारस ती किरिम बिच्चियस, एन्देरगेका आस नगदे उरुब रहचस।
- 23 खने येसुस तंग्हे चेलर ती बाचस, “ऐन निमन मानिम ब'अदन का उरुब आलर मेर्खा राजी नू कोरना कोइहे सस्ती रई।
- 24 निम्है ती अउरिम ब'अदन का उरुब आलस धर्मेसी राजी नू कोरना ती ओन्टा ऊंट सुजी ही भोंका नू तुरदना सेब्बा रई।”
- 25 इदिन मेंजर ती चेलर नगदे अनचकरर ती बाचर, “खने ने नाइर'आ ओंगोर?”
- 26 येसुस आर ही तरा इरियस ती बाचस, “आलर ती गा ईद मना पुल्ली, लिकिन धर्मेस ती उर्मी दिम मना उंगी।”
- 27 तहाँ पतरस आसिन बाचस, “ऐरा, ऐम गा उर्मिन दिम अम्बकम ती निंग्हे खोखा चोंखकादम, होले एमा गे एन्द्रा खक्ख'ओ?”
- 28 येसुस आरिन बाचस, “ऐन निमन मानिम ब'अदन का इकला पुना सौंसे मनो अरा मनवा खद्दन ऐन एंग्हे ओहमा ही बेल-गदिया नू ओक्कोन, आ बारी एंग्हे गने चोंखका नीम हूँ बारा गोटा बेल-गदिया नू ओक्कोर ती इस्राएल ही बारा गोतरन नैवई ननोर।
- 29 अरा एका ओर्तस तंग्हे एइपा पली महले भईर महले बहिनर महले अयंग महले बंग महले खद्द-खर्खा महले खल्लन एंग्हे चइडे अम्बका र'अदस, आस गे सौ गुना खक्ख'ओ अरा मुंजामलका उज्जना खक्ख'ओ।
- 30 लिकिन अजम आलर ने अक्कु कोहाँ पद नू र'अनर, आर बरना उल्ला नू उर्मी ती किइय्या पद मनोर क'ओर। अरा अजम आलर ने अक्कु उर्मी ती किइय्या पद नू र'अनर, आर बरना उल्ला नू कोहाँ पद मनोर क'ओर।

मत्तायोस 20

- 1 मेर्खा राजी गा ओर्त खल्ल उर्बस लेक्खा रई। आस पैरिम अंगुर बटकी नू बनिहार हेलाब'आ उरखस।
- 2 अरा आस बनिहार आलारिन बीड़ी पुता गूटी ही बनी नन्ना ही ओन देनारी चि'ओन बाचास ती आरिन तंग्हे अंगुर बटकी नू तइय्यस।
- 3 अरा पैरी नौ बजे मंजा खने आस उरखस ती नन्ना आलारिन बजार नू बेगर नलख इज्जका ईरयस।



- 4 अरा आरिन बाचस, 'नीम हूँ अंगुर बटकी नू कला, अरा ऐ बग्गे चि'अना रई अदिन ऐन निमा चि'ओन।'
- 5 होले आर हूँ केरर। अउर ओंहोन आस लोहाड़ी बारा बजे अरा ओनबीड़ी तीन बजे उरखस ती अन्नेम नंजस।
- 6 अरा पुतबारी पांच बजे उरखस ती आस नन्नारिन बेगर नलख इज्जका ईरयस ती बाचस, 'नीम इसन एन्देर नना बेगर नू इज्जकादर?' अबड़र बाचर,
- 7 'एमन ने हूँ बनी मल हेलाबाचर।' आस आरिन बाचस, 'नीम हूँ अंगुर बटकी नू कला।'
- 8 बीड़ी पुतिया खने, उर्बस तंग्हे भंडारीसिन बाचस 'बनीहारिन मेखा ती खोखा हेलरकर ती मुन्द हेलरका गूटी ओर्मर गे बनी चि'आ उइय्या।'
- 9 एका ओर्तर पुतबारी पांच बजे हेलरका रहचर आर बरचर, आर ओर्त ओर्त ओन ओन देनारी खक्खियर।
- 10 ने मुन्द बरचर आर सोच'आ लगियर का नमा गे बग्गे खक्ख'ओ, लिकिन आर हूँ उनिम उनिम देनारी खक्खियर।
- 11 अदिन इंझर ती आर खल्ल उर्बस मइय्याँ कुनमुनर'आ ती ब'आ हेलरर,
- 12 'इबड़ा खोखातर एगघड़ी नलख नंजर, अरा आरिन नीन एम्है लेक्खा कमचकय, लिकिन ऐम बीड़ी पुता चिर्खी चेड्डकम अरा बिड़ना मोक्कम।'
- 13 लिकिन आस आर ती ओर्तोसिन आनाकिर्ताचस, 'अना संगी ऐन निंगन मल डाहदन। एन्देर नीन एंग्हे ती ओन देनारी हो'आ गे मल गच्छरकाचकय?
- 14 एवन्दा निंग्हे रई अदिन हो'आ ती कला। एंग्हे मने रई का ऐन ऐ बग्गे निंगा चि'ओन आ बग्गे पिसतस गे हूँ चि'ओन।
- 15 एन्देर ईद जोगे मल्ला का ऐन एंग्हे जिनिस ती एन्देर नना बेद्दोन अदिन ननोन? नीन एंग्हे दौ र'अना चड्डे एंगन अड्डे ऐरदय का?'
- 16 एन्नेम खोखान्तर, मुन्द मनोर, अरा ने मुन्द र'अनर, आर खोखा मनोर।''
- 17 येरुसलेम कालो बारी येसुस तंग्हे बारो चेलारिन भिन्गे मीखियस अरा डहरे नू बाचस।
- 18 'ऐरा, नाम येरुसलेम काला लगदत। मनवा खद्दन ऐन असन मुध नैगर अरा नैग सिखाब'उर ती हेंर'ओन। अरा आर एंगन पिटा गे बदी ननोर।



- 19 अरा ने यहूदी मलनर आर ही खेक्खा नू एंगन हींइ'आ गे तुप्प'आ गे अरा कोर्रा ती लौ'आ गे क्रुस नू अरग'आ ती पिटा गे चि'ओर। लिकिन ऐन उल मुन्द नू केचका ती उज्जा चो'ओन।”
- 20 तहाँ जेबदयुसी तंग'आली तंगदाबगर गने येसुस गुसन बरचा ती ओइ लग्गिया ती आस ती इन्द्रिइम नेचा।
- 21 आस अदिन बाचस, “नीन एन्देर बिददी?” आद आसिन बाचा, “नीन एंगहै ती गच्छर'आ का नीन राजी ननो बारी एंगहै इबड़ा इरिब खददर ओर्तोस निंगहै तीना ओर्तोस निंगहै डेब्बा ओक्कोर।”
- 22 येसुस आनाकिर्ताचस, “नीम एन्दरन ने'अदर अदही माने बलदर। ऐन एका रकम सस्ती सह'ऊ र'अदन अन्ने सस्ती नीम सह'आ ओंगदर?” अबडर बाचर, “ऐम ओंगोम।”
- 23 येसुस आरिन बाचस, “ ऐन एका रकम सस्ती सह'ऊ र'अदन अन्ने सस्ती नीम सह'ओर। लिकिन ने एंगहै तीना अरा डेब्बा ओक्कोर ती एंगहै गने राजी ननोर, अदही फैसला धर्मस नन्दस। आस अदन फैसला नंज खच्चिकादस।”
- 24 दसों चेलर इदिन मँजर खने अबड़ा इरिब भइय्योर मइय्याँ गोसा मंजर।
- 25 लिकिन येसुस आरिन तंगहै गुसन मीखियस ती बाचस, “नीम अखदर का ई खेखेल नू बेलर अरा राजीखापुर तम्है आलर मइय्याँ आकुस ऐदनर ती आरिन राजी नन्नर।
- 26 लिकिन निम्है नू एन्ने मल मनो, नीकईम निम्है नू कोहाँ मना बेददस होले, आस नन्नर गे तेतर-सुसर ननुस मन्दस नेकअन।
- 27 अरा नीकईम निम्है मझी नू पहिल अड्डा मना बेददस, आस निम्है बिट्ठी ननू जौखस लेक्खा तेतर-सुसर नन्ना रई।
- 28 एन्देरगेका मनवा खददन ऐन आलारिन तेतर-सुसर नन्त'आ गे मला आलर गे तेतर-सुसर नना गे, अरा आलारिन तम्है पाप ही दंडे ती नाड़ा गे दाँडे लेक्खा एंगहै मने ती खे'आ गे खेखेल नू बरचकन।”
- 29 अरा येसुस अरा आसी चेलर येरिहो नगरे ती उरखा लगियर खने, ओन्टा कोहाँ गौहड़ा आर ही खोखा बर'आ लगिया।
- 30 अरा दुई इन अन्धहा आलर डहरे ही कूटी नू उक्का रहचर। इकला आर मँजर का येसुस आ डहरे ती कट्टालदस, खने आर चिच्चियारनुम ब'आ हेलरर, “अना येसु! दाऊदसी खददायो! एम्है मइय्याँ सोग्गे ऐरा।”



31 लिकिन आलर आरिन केप्पर, “कलेकसे र'आ।” लिकिन आर अउरिम चिच्चियार'आ हेलरर, “अना दाऊदसी खद्दायो! एम्है मइय्याँ सोग्गे ऐरा।”

32 येसुस इदिन मँजस ती इज्जस अरा आरिन मीखियस ती बाचस, “नीम एन्देर बेद्ददर का ऐन निमा गे ननोन?”

33 अन्धहर आसिन बाचर, “अना उर्बायो! ऐम ऐरा बेद्ददम।”

34 येसुस सोग्गे ईरियस ती आर ही खन्नन एंसइस। खने आर आ बारिम ऐरा हेलरर, अरा आसी खोखा गुड़ियारर।

मत्तायोस 21

1 फेन येसुस अरा आसी चेलर येरुसलेम गुसन अंइसियर, अरा जैतून मन्न परता नू बेतफगे नू बरचर। खने ऐंइ चेलारिन एन्ने बाचस ती तइय्यस,

2 “मुन्दहारे ता पद्दा नू कला, अइय्या कोरना गनेम लेम ओन्टा गदही खुटुरका अरा अदही गने खद्दो निमा खक्ख'ओ। अबइन बिछ'आ ती एंग्हे गुसन ओन्द्र'आ।

3 अरा नीकईम निमन एन्देर ननालदर ब'अरकी मेनोर होले, नीम ब'अके एम्है उर्बस गे इदही चाइ रई, अरा आस अबइन लेम तइय्योस चि'ओस।”

4 ईद इदगे मंजा का धर्मेसी कत्था तिंगुर ती बातारकी रहचा आद मनो, एकासे का,

5 “येरुसलेम ता आलारिन ब'आ, ‘ऐरा, निंग्हे बेलस निंग्हे गुसन बर'आलदस। आस लुदऊ र'अस, अरा गदहा नू ओक्कदस ती, गदही खद्द नू ओक्कदस ती बरदस’।”

6 अबइ ऐंइ चेलर केरर ती एकासे येसुस बाचकाचस अन्नेम नंजर।

7 गदही अरा खद्दोन येसुस गुसन ओन्द्रर, अरा अदही मइय्याँ तम्है किचरी गुट्ठिन नंजर, अरा येसुस अइय्या उक्कियस।

8 खने कोइहे आलर तम्है किचरी गुट्ठिन इहरे नू अट्टियर, अरा नन्नर मन्न ता इहुइन खंडियर ती इहरे नू अट्टियर।

9 आसी मुन्द ईकुर अरा खोखा ईकुर चिच्चियारनुम ब'आलियर, “दाऊदसी खद्दस गे महबा मनन! धर्मेस ईसिन बरकत नन्दस ने उर्बासी आकुस गने बरदस। उर्मी ती मइय्याँ मेर्खा नू र'ऊ धर्मेसी महबा मनन!”

10 आस येरुसलेम नगरे नू कोर्चस खने, सौंसे नगरे ता आलर अकबकरर केरर, अरा मँजर, “ईस एका ओर्तस?”



- 11 अरा आलर बाचर, “गलिलेया जिला ही नासरेत पद्दा ता धर्मेसी कत्था तिंगू येसुस।”
- 12 येसुस धर्मेसी मन्दिर चाली नू कोर्चस। असन आलर दाँडे नन्ना ही मेक्खोन खेंदा पिटालियर। खने येसुस आरिन अइय्या ती बहरी ओथ्रस अरा रोम राजी ता ढिबन धर्मेसी मन्दिर ही ढिबा नू बदलुर ही कंडोन, अरा पेरवाँ बीसुर ही मचियन हूँ बिइदाचस चिच्चस।
- 13 अरा आस बाचस, “नेम्हा पुथी नू ईद एन्ने लिखकी रई का, ‘एंग्हे मने रई का एंग्हे एइपन एंगन ओहमा नन्ना अरा बिन्ती नन्ना ही एइपा ब'ओर।’ लिकिन नीम इदिन डाकुर ही अइडा कमचका चिच्कादर।”
- 14 अन्धहा अरा लेंगडर धर्मेसी मन्दिर नू आसी गुसन बरचर, अरा आरिन आस कोड़े नंजस।
- 15 लिकिन मुध नैगर अरा नेग सिखाब'उर इबड़ा अकबक नलख गुट्ठिन ईरयर एकदन येसुस नंजस। अरा खद्दर धर्मेसी मन्दिर नू “दाऊदसी खद्दस गे धर्मेसी महबा मनन” एन्ने चिच्चियारनन मंजर। खने आर कैर मंजर,
- 16 अरा येसुसिन बाचर, “नीन मेन्दय का ई खद्दर एन्देर ब'आलनर?” येसुस बाचस, “हाँ, एन्देर नीन नेम्हा पुथी नू इकलअम मल्ला पढचका का: ‘खद्दर अरा बोलो खद्दर ही बई ती नीन ओहमा खक्खकय?’”
- 17 अरा आस आरिन अम्बियस ती बेतानिया पद्दा केरस अरा माखा असन रहचस।
- 18 पहपहरना बेड़ा येसुस एकाबारी येरुसलेम नगरे गे किर्रालियस खने, आस गे कीड़ा लग्गिया।
- 19 इहरे नू ओन्टा अंजीर मन्नन ईरयस ती आस अदही गुसन केरस। लिकिन अइय्या अतखन अम्बर एन्दरन हूँ मल खक्खियस ती अदिन आनियस, “अक्कु ती इकला हूँ मल खंजओय!” अरा अंजीर मन्न लेम खइय्या केरा।
- 20 अरा इदिन ईरियर ती चेलर अकबक मंजर अरा अबडर बाचर, “ई अंजीर मन्न लेम एकासे खइय्या केरा?”
- 21 खने येसुस आरिन आनाकिर्ताचस, “मानिम ऐन निमन ब'अदन, नीम पत्त'ओर अरा मल धुकचुक्र'ओर होले, ई अंजीर मन्न गे मंजकी रई अदिन लेका मला, लिकिन ई परतन हूँ ब'आ ओंग्दर, ‘चइअय ती कलय समुदर नू खत्र'अय’, अरा अन्नेम मनो।
- 22 अरा उर्मिन नीम पत्त'आनुम निम्है गोहरारना नू नेओर, अबड़ा उर्मी निमा खक्ख'ओ।”



- 23 तहाँ आस धर्मसी मन्दिर नू केरस ती सिखाब'आ लगियस खने, मुध नैगर अरा सेयान आलर आसी गुसन बरचर ती आसिन मेंजर, “नीन इबड़ा नलखन नेखा आकुस ती ननालदय? अरा निंगा इबड़न नन्ना ही आकुस ने चिच्चा?”
- 24 येसुस किर्त'अर बाचस, “ऐन हूँ निमन ओन्टा कत्था मेन्दन। अदिन किर्त'अर तेंगोर होले, ऐन हूँ निमन तेंगोन का ऐन इबड़ा नलखन नेखा आकुस ती नन्दन।
- 25 योहनस गे नोड़रत'अना ही आकुस धर्मस चिच्चस का आलर चिच्चर? अदिन एंगन तेंगा।” खने आर ताम तामिम कछनखर ती बाचर, “नाम धर्मस आकुस चिच्चस ब'ओत होले, आस नमन ब'ओस, ‘अन्नु हूँ नीम एन्देगे योहनसिन मल पत्ताचकर?’
- 26 लिकिन आलर आकुस चिच्चर ब'ओत होले, आलर ती इल्चका रई। एन्देगेका ओर्मर योहनसिन धर्मसी कत्था तिगू मननर।”
- 27 औंगे आर येसुसिन किर्त'अर बाचर, “ऐम बलदम।” खने येसुस आरिन बाचस, “नीम एंगन मल तिंकर औंगे ऐन हूँ निमन मल तेंगोन इबड़ा नलखन नेखा आकुस ती नन्दन।
- 28 नीम एन्दे इदही पत नू सोचदर? एकअम आलासी ऐनोटा खदर रहचर। आस कोहँस गुसन केरस ती बाचस, ‘बेटा, इन्ना अंगुर बटकी नू नलख नना कला।’²⁹ आस आनाकिर्ताचस, ‘ऐन मल क'ओन।’ लिकिन खोखा पस्तारस ती केरस।
- 30 फेन तम्बस सन्निस गुसन केरस ती अन्नेम बाचस। आस आनाकिर्ताचस, ‘कालदन।’ लिकिन मल केरस।
- 31 इबड़र ती एका ओर्तर तम्बासी मने लेक्खा नंजर?” अबड़र बाचर, “कोहँस।” येसुस आरिन बाचस, “ऐन निमन मानिम ब'अदन का ऊज'उर अरा खिल्डिर् निमन ती मुन्द धर्मसी राजी नू कोरनर।
- 32 एन्देगेका योहनस गा उज्जा गे उजगो डहरेन ऐद'आ गे निम्है गुसन बरचस। आसिन नीम मल पत्ताचकर, लिकिन ऊज'उर अरा खिल्डिर् आसिन पत्ताचर। अन्ति नीम इदिन ईरकर ती खोखा हूँ आसिन पत'आ गे मल पस्तारकर।
- 33 अउर ओन्टा जोक्खा खीरिन मेना, ओन्टा खल्ल उर्बस रहचस। आस ओन्टा अंगुर ही बटकी हंडचस, अरा ओनबेड़र'आ कुर्गस, अरा अइय्या अंगुर ती रासी ओथ्र'आ गे चचड़ी नू कुंडा कमचस, अरा खापा गे मचा कमचस, अरा अदिन उर्बर गे ठिका चिच्चस ती नन्ना राजी किर्मिबिच्चियस।
- 34 फिन खंजना ही बेड़ा अंडसिया खने आस जौखारिन ठिका होच्चका उर्बर गुसन हिसा ओन्द्र'आ गे तइय्यस।



- 35 लिकिन आर आसी जौखारिन धरचर अरा ओर्तोसिन लौचर, अरा नन्नासिन पिटियर अरा अउर ओर्तोसिन पखना ती लोडगर।
- 36 फिन आस मुन्द ता जौखर ती बग्गे नन्ना जौखारिन तइय्यस। अरा आर आरिन हूँ अन्नेम नंजर।
- 37 छेद्दे नू आ उर्बस एन्ने सोच'अरकी तंग्दासिन आर ही गुसन तइय्यस का आर एंग्दासिन मईन ननोर।
- 38 लिकिन ठिका होच्चका उर्बर तंग्दासिन ईरियर ती ताम ताम बाचनखरर, ईसिम गा पुंजी हिकदस, बरा नाम ईसिन पिटोत ती ईसी बटकी आबोन होओत।
- 39 अन्नेम आर आसिन धरचर अरा अंगुर बटकी ती बहरी ओथ्र ती पिटियर।
- 40 ओँगे अंगुर बटकी उर्बस बरदस खने, अबड़ा ठिका होच्चका उर्बर गने एन्देर ननोस?"
- 41 अबड़र आसिन बाचर, "आस अबड़ा मलदौ आलारिन पिटा खच्चोस, अरा अंगुर बटकी ही ठिका नन्ना उर्बर गे चि'ओस ने आस गे खंजपा आबोन खंजना बेड़ा नू अंडसत'ओर।"
- 42 येसुस आरिन बाचस, "नीम नेम्हा पुथी नू इदन मल्ला पढचका का? 'एका पखना आबोन राजमिस्त्रीर तरकूटी ताइचका रहचर, आ पखना दिम गोट्टा एइपन बड़ियर ननू पखना मंजा केरा। उर्बस इदन नंजस, अरा नम्है ऐरना नू ईद अकबक रई।'
- 43 ओँगे ऐन निमन ब'अदन का धर्मैसी राजी निम्है ती होतार'ओ अरा अदही खंजपा चि'अना आलर गे चीर'ओ।
- 44 अरा ई पखना नू खतर'ओर अबड़ा ओर्मर कुटकूटा मनोर क'ओर, अरा नेखा मइय्याँ आद खतर'ओ आरिन खोसो चि'ओ।"
- 45 मुध नैगर अरा फरिसीर येसुसी जोक्खा खीरिन मँजर खने, आर अगमाचर का आस तम्है पत नू कछनखरदस।
- 46 अरा आर आसिन धर'आ बिद्दियर, लिकिन आलर ती इल्चियर का आर आसिन धर्मैसी कत्था तिगुस मन'आलियर।

मत्तायोस 22

- 1 अउरिम येसुस जोक्खा खीरी गुट्ठी ती तैगा हेलरस। आस बाचस,
- 2 "मेर्खा राजी ओर्त बेलस लेक्खा रई। आस तंग्दासी बैजा गे कोहाँ बैजा मंडी सराजमा नंजस।



- 3 अरा इकला बेंजा मंडी सराजमा मंजका खने, आस तंगहै जौंखारिन एड्डका आलारिन बेंजा नू मेख'आ गे तइय्यस। आर बर'आ मल बिद्दियर।
- 4 औंगे आस अउरिम तंगहै नन्ना जौंखारिन एड्डका आलारिन तेंगा गे तइय्यस। 'ऐरा, ऐन मंडी खटच खच्चिकादन, मेक्खो अरा डढरका अड्डो गुट्ठी पिट्टकी रई, अरा उर्मी सर्चकी रई। बेंजा मंडी ओना गे बरा।'
- 5 लिकिन आर तुस्सियर अरा तम्है तम्है नलख गे केरर। ओर्तोस खल्ल गे अरा नन्नस खेंदा पिटा गे किर्रिम बिच्चियर।
- 6 लिकिन नन्नर एंगरका रहचर आर आसी जौंखारिन धरचर ती कांडचर अरा पिटियर।
- 7 औंगे बेलस कैरारस ती तंगहै फउदन तइय्यस ती अबड़ा पिट्टुरिन पिट्टियस अरा आर ही पद्दन बस्सियस चिच्चस।
- 8 खने आस तंगहै जौंखारिन बाचस, 'बेंजा मंडी गा सर्चकी रई, लिकिन एड्डका आलर जोगे मल मंजर।
- 9 औंगे दोप्फा डहरे तरा कला ऐ बग्गे आलर खक्ख'ओर ओर्मारिन बेंजा एडपा नू एड'आ ओन्द्र'आ।'
- 10 औंगे अबड़ा जौंखर डहरे तरा केरर ती कोड़े मल कोड़े एवंदा आलारिन खक्खियर ओर्मारिन खोंडचर, बेंजा एडपा पाहियर ती निंदिया केरा।
- 11 लिकिन एकाबारी बेलस मदी अड्डा नू ऐरा गे कोर्चस खने, असन आस ओर्त बेंजा किचरी बिगर अतका आलासिन ईरयस।
- 12 अरा आस आसिन मेंजस, 'अना संगी, नीन इसन बिगर बेंजा किचरी अतका एकासे भितरी बरचकय?' लिकिन आसी बई मल चलर्रा।
- 13 खने बेलस तंगहै जौंखारिन बाचस, 'ईसी खेक्खा खेड्डेन हें'आ ती बहरी ता ऊखा नू हेबड़ा चि'आ, अइय्या चींखना दरा पल्ल चब्रना मनो।'
- 14 एन्देरगेका एड्डका बग्गे र'अनर, लिकिन चज्जरका जुक्की र'अनर।''
- 15 फेन फरिसीर केरर ती भेंट मंजर ती कछनखर का येसुसिन आसी कत्था ती एकासे बझाब'ओत।
- 16 आर जोक्को तम्है चेलारिन अरा हेरोदेरिन येसुस गुसन ब'आ गे तइय्यर, "अना गुरु! ऐम अखदम का नीन उजगो आलय अरा नीन धर्मसी डहरेन मानी गने तेंगदय, नीन आलर एन्देर सोच'ओर अदही पत्त नू गुनन मल नन्दय, अरा नीन तीना मल खौँडदय।



- 17 औंगे एमन तेंगा नीन इदही पत नू एन्देर सोचदय, यहूदी नेग नमन कैसरस गे मालगुजारी चि'आ गे पेसई का मला?"
- 18 लिकिन येसुस आर ही चतरा आबोन अक्खस ती बाचस, "नीम उतुरमाडू आलारो, एंगन एन्देरगे बिद्धर?"
- 19 मालगुजारी चि'अना ही ओन्टा ढिबन ऐद'आ" खने आर ओन रोमी ढिबन आस गुसन ओन्द्रर।
- 20 अरा आस आरिन मँजस, "ई छपा अरा नामे नेखअय?"
- 21 आर आसिन बाचर, "कैसरसी।" खने आस आरिन बाचस, "औंगे कैसरस गे एन्देर चि'अना रई अदिन कैसरस गे चि'आ, अरा धर्मस गे एन्देर चि'अना रई, अदिन धर्मस गे चि'आ।"
- 22 खने आर येसुसी ई कथन मँजर ती अनचकरर केरर अरा अम्बियर ती किरिम बिच्चियर।
- 23 अउलम, केचका खोखा उज्जा चो'अना र'अम मलकी बाऊ सदुकीर येसुस गुसन बर'अरकी मँजर,
- 24 "अना गुरु! मूसस एमा गे एन्ने पेसका चिच्चस का, एकअम ओर्तस बिगर खद्द-खर्रा ही खे'अदस कादस, अरा आसी तंग'आली उज्जाली होले, आसी भइय्योस गे अदिन बँजना ती केचका तंगहे भइय्योस गे खद्द कुन्द्रत'अना रई।
- 25 ओंग्होन एम्है नू सात भइय्योर रहचर। कोहँस बँजस ती बिगर खद्द-खर्रा केच्चस केरस चड्डे तंगहे आलिन भइय्योस गे अम्बियस केरस।
- 26 मझलस अरा सझलस हूँ एन्नेम नंजर, अरा सातियो भइय्योर गुट्ठी इन्नेम बँजर।
- 27 ओर्मर ती खोखा आ मुक्का हूँ केच्चा केरा।
- 28 अक्कुन एमन तेंगा, उज्जा चो'अना नू आद सतियो भइय्योर ती नेखअय मनो, एन्देरगेका आद ओर्मर ही मुक्का मंजकीचा।"
- 29 येसुस आरिन आनाकिर्ताचस, "नीम नेम्हा पुथी नू उज्जा चो'अना ही पत नू एन्देर लिख्रकी रई अदिन बलदर अरा धर्मस एन्देर नना ओंग्दस अदन हूँ बलदर, ई चड्डे नीम अन्नेम मलदौ सोचदर।
- 30 एन्देरगेका केचका ती उज्जा चो'अना नू आलर अरा आलीर मल बँजनर महले मल बँजनर। लिकिन आर मेर्खा नू मेर्खा पैकर लेक्खा मनोर।
- 31 लिकिन केचका ती उज्जा चो'अना ही पत नू एन्देर नीम धर्मसी कथन मला पढ़चका का धर्मस मूसस ती एन्देर बाचस?



32. 'ऐन अब्राहम अरा इसाक अरा याकोबसी धर्म हिकदस।' आस केचका आलर ही धर्म मलदस, लिकिन आस उज्जना आलर ही धर्मस हिकदस।"
33. इदन मेंजर ती आलर आसी तेंगना ती अकबक मंजर केरर।
34. येसुस सदुकीर ही बईन उट्टस ब'अरकी फरिसीर मेंजर खने, आर खोंडरर ती भेंट मंजर।
35. अबडर ती ओर्तोस ने यहूदी नेग गुट्ठिन दौले अक्खस, आस आसिन बिद'आ गे मेंजस,
36. "अना गुरु! मूसासी नेग नू उर्मी ती कोहाँ पेसका एकदा हवे?"
37. अरा येसुस आसिन बाचस, "नीन निंग्हे धर्म उर्बासिन निंग्हे उर्मी जिया अरा निंग्हे उर्मी बोलता अरा निंग्हे उर्मी लूर गने चोन्हा नना।
38. कोहाँ अरा मुद्ध पेसका गा ईदिम हवे।
39. अरा ईद लेक्खा दोसरा पेसका ईद हवे, 'नीन निंगन एकासे चोन्हा नन्दय अन्ने निंग्हे अर्बा-पर्बारिन चोन्हा नना।'
40. इबड़ा ऐंड पेसका दिम सौंसे नेग अरा धर्मसी कत्था तिंगुर ही मूली हवे।"
41. फरिसीर खोड्रका रहचर खने, येसुस आरिन मेंजस,
42. "मसीसी पत्त नू नीम एन्देर सोचदर? आस नेखअय बनस ता हिकदस?" अबडर आसिन बाचर, "मसीस दाऊदसी खद्दस हिकदस।"
43. आस आरिन मेंजस, "होले दाऊदस नेम्हा बोलतस नू मन्दस ती आसिन एन्देरगे उर्बस ब'अदस। एकासे का,
44. 'धर्म उर्बस एंग्हे उर्बासिन बाचस का, नीन एंग्हे तीना पक्खे ओक्करकी एंग्हे गने राजी नना, ऐन निंग्हे बैरीरिन नास नंज खच्चोन।'
45. दाऊदस आसिन 'उर्ब' मेखदस होले आस आसी बनस ता आलस एकासे मना आंग्दस?"
46. अरा ने हूँ इदही पत्त नू ओन कत्था हूँ आनाकिर्ता'आ पोल्लर। अउला ती नेका हूँ फिन आसिन मेना गे डिढ मल मंजा।

मत्तायोस 23

1. खने येसुस गोंहड़ा ती अरा तंग्हे चेलर ती बाचस,
2. "नेग सिखाब'उर अरा फरिसीर मूसासी गदिया नू उक्का र'अनर।



- 3 औंगे उर्मिन आर निमन नना गे आनोर अदिन नना अरा मन'आ, लिकिन आर ही लेक्खा नलख अमके नना, एन्देरगेका आर ब'अनर लिकिन मल नन्नर।
- 4 आर गा ओत्था चिखिन चोद'आ गे जोगइनर अरा अबइन आलर ही खेसेर नू लदनर, लिकिन ताम तम्है अंगली ती हूँ चोद'आ मल बेददनर।
- 5 आर आलारिन ऐद'आ गे तम्है उर्मी नलखन नन्नर, आर तम्है ताबीजन चकड़ नन्नर अरा तम्है फुदनन जुर्त'अनर।
- 6 अरा मदी गुट्ठी नू मईन अड्डा अरा गोइहा एइपा गुट्ठी नू मुध मचिया गुट्ठी नू ओक्कना,
- 7 बजार गुट्ठी नू मौंजरा अरा आलर नू 'गुरु' बारना आर गे दौ लग्गी।
- 8 लिकिन नीम 'गुरु' अमके बार'आ, एन्देरगेका निम्है गा ओर्तलेका गुरु र'अस अरा नीम ओर्मर भइय्योर हिकदर।
- 9 अरा खेखेल नू नेकन हूँ बबा अमके ब'आ, एन्देरगेका निम्है ओर्तलेका बंगस र'अस, आस मेर्खा नू र'अस।
- 10 अरा नीम 'मुद्धस' हूँ अमके बार'आ, निम्है गा ओर्तलेका मुद्धस र'अस, आस मसीस।
- 11 ने निम्है ती कोहाँ मना बेददोर आस निम्है जौंख मन्दस नेकअन।
- 12 एन्देरगेका ने तमन कोहाँ ननो आर सन्नी नन्तार'ओर अरा ने तमन सन्नी ननो आर कोहाँ नन्तार'ओर।
- 13 अना उत्तुरमाडू नेग सिखाब'ऊ अरा फरिसीरो, ओहरे निमा। नीम आलर ही मुन्दहारे मेर्खा बलिन मुच्चदर। नीमिम हूँ कोरदर मला अरा कुर'उरिन हूँ कोर'आ मल चिअदर।
- [14 अना उत्तुरमाडू नेग सिखाब'ऊ अरा फरिसीरो, ओहरे निमा। नीम रड़ियाहिरिन ठकदर ती आरिन अमल'अदर। अरा नीम धरम नू निमन कोहाँ ऐद'आ गे दिगहा दिगहा बिन्ती नन्दर। औंगे धर्मस निमा गे कोइहे दंडे चि'ओस दिम।]
- 15 अना उत्तुरमाडू नेग सिखाब'ऊ अरा फरिसीरो, ओहरे निमा। नीम ओर्त आलासिन निम्है खौंइहा नू ओन्द्र'आ गे समुदर अरा खेखेल नू कुद्दका कुद्ददर। लिकिन आस खौंइहा नू बरदस होले निमन ती कोइहे नरक ही खद्द कमदर चिअदर।
- 16 निमा ओहरे, कना कइहाब'उरो, नीम ब'अदर का 'नीकईम धर्मसी मन्दिर ही किरया मोखोर होले आद एन्द्रा हूँ मल्ली, लिकिन नीकईम धर्मसी मन्दिर ता सोना ही किरया मोखोर होले, अदन पूरा नन्ना दिम रई।'



- 17अना बोक्को अरा कना आलरो, एन्द्रा कोहाँ रई सोना का सोना आबोन नेम्हा ननू धर्मसी मन्दिर?
- 18नीम अउरिम एन्ने ब'अदर, 'नीकइम गोइहा ही किरया मोखोर होले आद एन्द्रा हूँ मल्ला, लिकिन अइय्या ता दाँडे ही किरया मोखोर होले, अदन पूरा नन्ना दिम रई।'
- 19अना कना आलारो, एन्द्रा कोहाँ रई अरगका दाँडे का दाँडेन नेम्हा ननू गोइहा?
- 20औंगे ने गोइहा ही किरया मोखदस आस अदही अरा ऐ बग्गे अइय्या रई अदही हूँ किरया मोखदस।
- 21अरा ने धर्मसी मन्दिर ही किरया मोखदस आस मन्दिर ही अरा मन्दिर नू र'अदस आसी हूँ किरया मोखदस।
- 22अरा ने मेर्खा ही किरया मोखदस आस धर्मसी बेल-गदिया ही अरा अइय्या उक्कुसी हूँ किरया मोखदस।
- 23अना उत्तुरमाडू नेग सिखाब'ऊ अरा फरिसीरो, ओहरे निमा। नीम फुदेना, सौंप अरा जीरा ही गा दसवान्स चि'अदर। लिकिन नीम नेग ही मुद्ध कत्था नैवई, सोग्गे, पत'अना गुट्ठिन अम्बका चिच्कादर। इबइन गा नन्ना रई अरा अबइन अम्बना मल रहचा।
- 24अना कना कइहाब'उरो, नीम सन्नी कत्थन गा कोइहे चिहुंक नन्दर, लिकिन कोहाँ कत्थन चिहुंक मल नन्दर।
- 25अना उत्तुरमाडू नेग सिखाब'ऊ अरा फरिसीरो, ओहरे निमा। नीम मौनी दरा छिपन बहरी बहरी मंजदर, लिकिन निम्है भितरी चिबाखारना अरा लोभ निंदकी रई।
- 26अना कना फरिसीरो, मुन्द मौनी अरा छिपन भितरी मंज'आ का आद बहरी हूँ सफा मनो।
- 27अना उत्तुरमाडू नेग सिखाब'ऊ अरा फरिसीरो, ओहरे निमा। नीम चुन्ना ईगका मसड़ा लेक्खा र'अदर, आद बहरी ती गा फबई, लिकिन भितरी केच्चकर ही खोचोल अरा उर्मी बेसे कित्तका चंअना ती निन्दकी रई।
- 28एन्नेम नीम आलर गे उजगो ऐथ्रदर, लिकिन जिया भितरी उत्तुरमाइना अरा नेग टांइना निंदकी रई।
- 29अना उत्तुरमाडू नेग सिखाब'ऊ अरा फरिसीरो, ओहरे निमा। नीम धर्मसी कत्था तिगुर अरा नन्ना उजगो आलर ही मसड़ा गुट्ठिन कमदर अरा अबइन सिंगर'अदर।
- 30अरा नीम ब'अदर, 'ऐम एम्है पूरखर ही परिया नू रहचकम होले धर्मसी कत्था तिगुर ही पिटना नू आर ही गने मल मेस'ओम दने।'



- 31 एन्ने ती गा नीम नीमिम तेंग्रदर का नीम धर्मसी कत्था तिंगुरिन पिटुर ही खदर हिकदर।
- 32 अरा नीम निम्है पूरखर ही खोखा ऐकदर अरा आर ही लेक्खा नलख नन्दर।
- 33 अना नेरें अरा करैत गुट्ठी लेक्खा बिक्ख ती निन्दका आलारो, नीम नरक ही मुंजा मलका दंडे ती एकासे बछुओर?
- 34 औंगे मेना! ऐन निम्है गुसन धर्मसी कत्था तिंगुरिन अरा लुरगर आलारिन अरा नेग सिखाब'उरिन तइय्यालदन। आर ती जोक्कोरिन नीम पिटोर अरा क्रुस नू ठोकओर, अरा जोक्कोरिन गोइहा एइपा नू कोर्ला ल'ओर अरा ओन्टा नगरे ती नन्ना नगरे खेच्का कुद्दोर।
- 35 औंगे उजगो आलस हाबेलसी पिट्रना ती धर्मसी मन्दिर नू नेम्हा अइडा अरा गोइहा ही मझी नू नीम पिटका बराखियसी तंगदस जकरियासी पिट्रना गूटी, नीम खेखेल नू पिटका उर्मी उजगो आलर ही बदी निम्है कुक्कु नू मनो।
- 36 ऐन निमन मानिम ब'अदन, 'नीम अरा निम्है पूरखर नंजका उर्मी मलदौ गे धर्मस निमा गे दंडे चिओस।'
- 37 अना येरुसलेम ता आलारो, नीम धर्मसी कत्था तिंगुरिन पिटकर अरा नेकन निम्है गुसन ऐन तइरकन आरिन पखना ल'अदर ती पिटदर। ढेर हेल धर्मस बिददयस का खेर तंगहै खददन डेना किइय्या खिवइई, अन्नेम धर्मस हूँ निम्है खददारिन खेवइओस, लिकिन नीम एन्ने नना मल चिच्चकर।
- 38 ऐरा, निम्है एइपा निमा उझडारका अम्बतार'ई।
- 39 ऐन गा निमन ब'अदन, 'ने उर्बासी नामे ती बरदस आस आसीस खक्खू र'अदस' एन्ने नीम अरगी ब'अना बेडा गूटी नीम एंगन अउरिम मल ऐरोर।'

मत्तायोस 24

- 1 एकाबारी येसुस धर्मसी मन्दिर ती उरखस ती कालियस खने, आसी चेलर मन्दिर ही कम्मकन ऐद'आ गे आस गुसन बरचर।
- 2 येसुस आरिन बाचस, "एन्देर नीम इबडा उर्मिन ऐरदर का? ऐन निमन मानिम ब'अदन, उन्दुल ई धर्मसी मन्दिर उर्मी दिम धसतार'ओ कालो अरा उर्मी पखना अक्कुन र'ई आ अइडा नू मल र'ओ।"
- 3 एन्ने बाचका खोखा येसुस चेलर गने जैतून परता केरस। खने आसी चेलर भिनेम आसी हेददे बरचर ती बाचर, "एमन तेंगा, इबडा कत्था इकला मनो? निंगहै बरना ही अरा खेखेल मुंजना ही एन्देर चिन्हा मनो?"



- 4अरा येसुस आनाकिर्ताचस, “चिहुंक र'आ, निमन नीकईम अम्बोर ठक'आ।
- 5एन्देरगेका नगदे आलर एंग्हे नामे ती बर'अरकी 'ऐन मसीस हिकदन' ब'ओर ती कोइहे आलारिन ठक'ओर।
- 6अरा नीम लड़ाई अरा लड़ाई ही हलन मेनोर, लिकिन अमके बयार'आ। एन्देरगेका इदही मन्ना चाइ र'ई, लिकिन ईद मुंजना बेड़ा मल्ली।
- 7ओन्टा जातियर नन्ना जातियर ही बिड़दो नू, अरा ओन्टा राजी नन्ना राजी ही बिड़दो नू लड़ाई गे चो'ओ। कैनो अड्डा खेखेल नुक्रना मनो, अरा खेखेल नू अड्डा अड्डा अकाल मनो।
- 8लिकिन ईद ओर्मा गा खिलपत ही ओरे मन्ना लेका हवे अरा अउरिम कोइहे सस्ती बरना र'ई।
- 9आर निमन सस्ती नना गे धर'ओर, अरा निमन पिटोर, अरा उर्मी राजी ता आलर नीम एंग्हे गने चो'खर'उर र'अना चइडे निमन बिड़दो ननोर।
- 10आ बारी कोइहे आलर एंग्हे ती किरोर अरा ताम ताम धरतार नख'ओर अरा ओर्त ईरिब ही बैरी मनोर।
- 11अरा कोइहे ठकवा धर्मेसी कत्था तिंगुर बोंग चो'ओर अरा बग्गेरिन भोड़ाब'ओर।
- 12मलदौ ही नीन्दना चइडे बग्गे आलर ही चोन्हा ऐखो क'ओ।
- 13लिकिन ने तम्है उज्जना ही मुंजना गूटी सह'ओर आरिम जनमजुग ही दंडे ती बछर'ओर।
- 14अरा धर्मेसी राजी ही ई दौ कत्था सौंसे खेखेल नू मेन्द्र'ओ का उर्मी राजी ता आलर इदन मेनोर, फिन मुंजना अंडसा खचो।
- 15धर्मेसी कत्था तिंगुस दानियेलसी बाचका लेक्खा, 'नीम इकला आ उझड़'अना भंगड़भट्ठ खॉइना आलोन धर्मेसी मन्दिर ही नेम्हा अड्डा नू इज्जका ऐरोर' (पढ़'उर बुझुर'आ हो'आ),
- 16अउला यूदेया जिला नूर'ऊ आलर परता मइय्याँ बोंके कालके।
- 17अरा एड़पा ही बहरी नूर'ऊ आलस तंग्हे एड़पा नू एन्द्रा र'ई अदिन ओन्द्र'आ गे अम्बोर काला।
- 18अरा खल्ल नू नलख ननू आलस तंग्हे किचरिन हो'आ गे खोखा अम्बोस किरा।
- 19अबड़ा उल्ला नू ओत्था ऐख अरा खदमाखो मुक्कर गे कल्पारना मनो।
- 20गोहरार'आ का पइय्याँ उल्ला मलता खन्न ऐखना उल्ला निमा बोंगना अम्बो मना।
- 21एन्देरगेका फेन नगदे सस्ती मनो का धर्मेस खेखेलन गढ़चका उल्ला ती इन्ना गूटी अन्ने मल्ला मंजका, अरा खोखा हूँ अन्ने सस्ती मल मनो।



- 22 उबस अबड़ा उल्लन मल घटा ब'अना होले, ने हूँ मल बछर'ओर दने। लिकिन तंगहै चज्जिका आलर चड्डे आस अबड़ा उल्लन घटा बाचकादस।
- 23 फिन नीकईम निमन, 'ऐरा, मसीस इसन र'अदस' महले 'असन र'अदस' एन्ने ब'अदस होले, आसी कत्थन अमके पत'आ।
- 24 एन्देरगेका जोक्कोर फसकट'ओर ती 'ऐन मसी हिकदन' ब'ओर अरा जोक्कोर फसकट'ओर ती 'ऐन धर्मसी कत्था तिंगुस' ब'ओर। अरा बेड़ाब'आ गे आर कोड़हे चिन्हा अरा अजगुत नलख गुट्ठिन ऐद'ओर, मना आँगो होले धर्मसी चज्जरका आलारिन हूँ बेड़ाब'ओर चि'ओर।
- 25 ऐरा, ऐन मन्ना उर्मी कत्थन निमन मुन्द तिम तेंगालदन।
- 26 आँगो निकईम निमन ब'ओर, 'ऐरा, आस टुंगरी नू र'अस' होले, बहरी अमके उरखा, अरा 'आस एड़पा भितरि कुठली नू र'अस' ब'ओर होले अमके पत'आ।
- 27 एकन्ने का बिजली लौकारना पुरुब तरती उरखी ती पच्छिम तरा हूँ लौकर'ई, अन्नेम ऐन मनवा खद्दासी बरना हूँ मनो।
- 28 एसन एसन मरी र'ई, असन गिद्हा गुट्ठी खूँडर'ई।
- 29 अबड़ा उल्ला सस्ती ही खोखा लेम, 'बीड़ी अरा चन्दो मल रफ'ओ, अरा मेर्खा ती बीनको खत्र'आ हेलर'ओ। धर्मस मेर्खा नू र'ऊ उर्मी आलोन नुक'ओस।'
- 30 अरा आ बारी एंगा मनवा खद्दासी चिन्हा मेर्खा नू ऐथ'ओ। तहाँ खेखेल ता उर्मी खुटी ता आलर चींख'ओर ओलखोर। उर्मी आलर मनवा खद्दन एंगन मेर्खा नू बदाली नू ती सवंग अरा कोड़हे महबा गने बरनन ऐरोर।
- 31 अरा ऐन एंगहै पैकारिन पेंडहे ही कोड़हे सड़ा गने तइय्योन, अरा आर मेर्खा ही ई गंडा ती आ गंडा गूटी, चरियो खूँट ती एंगहै चज्जिका आलारिन खोंड'ओर।
- 32 अंजीर मन्न ती ई कत्थन सिख'आ। अदही गुफरी उरखी अरा अतखा खोरा हिलर'ई होले, नीम अखदर का बिड़ना उल्ला हेददे र'ई।
- 33 इकला नीम इबड़ा उर्मी कत्थन एन्ने मन्नुम ऐरोर, निमा अखना र'ई का एंगहै बरना हेददे र'ई।
- 34 ऐन निमन मानिम ब'अदन, एका गूटी इबड़ा उर्मी कत्था मनो आ गूटी ई परिया ता जोक्को आलर उज्जोर।
- 35 मेर्खा अरा खेखेल छपर'ओ कालो, लिकिन एंगहै कत्था इकला हूँ मल बदलार'ओ।



- 36 एंगहै बरना उल्ला ही पत्त नू धर्मे बंगासिन अम्बरकी ने हूँ बलनर। ऐन खद्दन अरा मेर्खा ता पैकर हूँ आ बेड़न बलदम।
- 37 अरा एकन्ने नूहसी बेड़ा नू मंजा अन्नेम मनवा खद्दन एंगा बरना बेड़ा नू हूँ मनो।
- 38 एन्देरगेका एकासे बया बड़ही ही बरना उल्ला ही मुन्द ती नूहसी कोहाँ डोंगा नू अरगी अरगना गूटी आलर ओना मोखा लगियर, बेंज्र आ लगियर, बेंजा लगियर।
- 39 अरा बया बड़ही बरचा ती आर ओर्मरिन होच्चा आ गूटी आलर गे एन्द्रा हूँ अरो मल लगिया। अन्नेम ऐन मनवा खद्दासी बरना मनो।
- 40 आ बारी ऐंड आलर खल्ल नू र'ओर, ओर्तोस होर'ओस अरा ओर्तोस अम्ब'ओस।
- 41 ऐंड मुक्कर जता ती कस'अत र'ओर, ओर्तो होर'ओ अरा ओर्तो अम्ब'ओ।
- 42 औंगे एज्रका र'आ, एन्देरगेका नीम बलदर का निम्है उर्बस एका उल्ला बर'ओस।
- 43 लिकिन इदन अख'आ का एड़पा उर्बस खलबर माखा एकाबारी बर'ओर अदिन अख'ओस होले एजरका र'ओस दने, अरा तंगहै एड़पन उम्पा मल चि'ओस दने।
- 44 औंगे नीम हूँ सपड़ारका र'आ, एन्देरगेका एकाबारी नीम सोच'आ हूँ मल सोचदर आ बेड़ा नू मनवा खद्दन ऐन बर'ओन।
- 45 ने लूरगर अरा असरा जोगे जोंखस र'अदस। उर्बस आसिन नन्ना जोंखर गे ठौका बेड़ा नू तम्है ओन्ना-मोखनन चि'आ गे असरा नन्दस, फिन आस इहरे ऐका गे कालदस।
- 46 उर्बस बरदस ती आ जोंखासिन एन्ने नन्ते खक्खदस होले उर्बस आस नू रिझ'ओस।
- 47 ऐन निमन मानिम ब'अदन का उर्बस आसिन तंगहै उर्मी आलो मइय्याँ जिमा चि'ओस।
- 48 लिकिन आ मलदौ जोंखस तंगहै उर्बस दीरी ती बर'ओस ब'अरकी तंगहै जिया नू ब'ओस
- 49 ती तंगहै संगे जोंखारिन लौ'आ हेलरस ती उंखुर गने उन्नुम मोखनुन र'अदस होले,
- 50 आ जोंखस इकला पाब मल ऐरालदस अरा एका बेड़न बलदस आ बारिम आसी उर्बस बर'ओस
- 51 ती आस गे कोइहे दंडे चि'ओस। आस आस गे उतुरमाड्र गने हिसा चि'ओस। असन आलर गे चींखना ओलखना अरा पल्ल चब्रना मनो।

मत्तायोस 25

- 1 आ बारी नू मेर्खा राजी दस गोटंग डिंडा पेल्लर लेक्खा र'ओ, ने तम्है होरन धरचर ती बेंजा जोंखासिन भेंटार'आ गे उरखर।



- 2अबड़र ती पाँच गोटंग पेल्लर बोया रहचर, अरा पाँच गोटंग पेल्लर लुरगर रहचर।
- 3बोया पेल्लर तम्है होरा गा होच्चर लिकिन तम्है संगे इसुंग मल होच्चर।
- 4लिकिन लुरगर पेल्लर गा तम्है होरा गने कुडुवा नू इसुंग हूँ निंदर ती होच्चर।
- 5बेंजा जोंखस चाँइहे मल बरचस खने, अबड़र कूगा हेलरर अरा खन्द्रर केरर।
- 6अधरात माखा नू अंदोड़ मंजा, 'ऐरा, बेंजा जोंखस बर'आ लगदस, गुचा, आसी गने भेंट मना गे।'
- 7खने उर्मी पेल्लर चोचर ती होरा गुट्ठिन लघाब'आ हेलरर।
- 8अरा बोया पेल्लर लुरगर पेल्लर ती बाचर, 'निम्है इसुंग ती जोक्क एमा हूँ चि'आ, एन्देरगेका एम्है होरा गुट्ठी तेभ्र'आ लगी।'
- 9लिकिन लुरगर पेल्लर आनाकिर्ताचर, 'रई आद एमा अरा निमा गे मल मनो, औंगे बीसू आलर गुसन कला अरा निमा गे खेन्दा।'
- 10आ बारी अबड़र इसुंग खेन्दा काला लगियर खने, बेंजा जोंखस अंडसियस। अरा ने ने सपड़ारका रहचर आर आसी गने बेंजा एड़पा भितरी किर्रिम बिच्चियर। अरा बली मुच्चतारा केरा।
- 11खोखा नेखा गुसन इसुंग मल रहचा, आर इसुंग खिन्दियर ती बरचर ती ब'आ हेलरर, 'अना उर्बायो, अना उर्बायो, एमा गे बलिन तिसग'आ चि'आ।'
- 12लिकिन आस आनाकिर्ताचस, 'ऐन निमन मानिम ब'अदन, ऐन निमन बलदन।'
- 13औंगे नीम एज्रका र'आ, एन्देरगेका नीम आ उल्लन महले आ बेड़न बलदर।
- 14अउर हूँ मेर्खा राजी ओर्त आलस लेक्खा रई, एकास नन्ना राजी कालो बारी तंग्हे जोंखारिन मीखियस ती तंग्हे खुर्जिन सोंपचस चिच्चस।
- 15आस ओर्मर गे तम्है सवंग ही लेक्खा चिच्चस, ओर्तोस गे पाँच थइला सोना ढिबा चिच्चस, नन्नस गे ऐंड थइला सोना ढिबा, अरा तिसरस गे ओन थइला सोना ढिबा चिच्चस ती आस नन्ना राजी किर्रिम बिच्चियस।
- 16तहाँ नेका पाँच थइला सोना ढिबा खक्खकी रहचा आस लेम केरस ती खिन्दियस पिटियस ती पाँच थइला सोना ढिबा अउरिम अर्जाचस।
- 17एन्नेम ऐंड थइला सोना ढिबा खक्खकाचस, आस हूँ ऐंड थइला सोना ढिबा अउरिम अर्जाचस।
- 18लिकिन नेका ओन थइला सोना ढिबा खक्खकीचा, आस केरस ती अरखियस ती तंग्हे उर्बासी सोना ढिबन मंडियस चिच्चस।



- 19 नगदे उल्ला खोखा अबड़ा जोंखर ही उर्बस बरचस ती आर ती लेखा होआ हेरस।
- 20 नेका पाँच थइला सोना ढिबा खक्खकीचा, आस बरचस ती पाँच थइला सोना ढिबा अउरिम ओन्द्रस ती बाचस, 'अना उर्बायो, नीन एंगा पाँच थइला सोना ढिबा सोंपचका रहचकय, ऐरा, ऐन पाँच थइला सोना ढिबा अउरिम अर्जाचकादन।'
- 21 उर्बस बाचस, 'नीन दौ नंजकय, बेस अरा पत'अना जोगे जोंखय, नीन जुक्की नू पत'अना जोगे रहचकय, निंगन बग्गे जिनिस मइय्याँ अदिया कम'ओन। बरा, निंगहै उर्बासी रिझ नू मेस'आ।'
- 22 तहाँ नेका ऐंड थइला सोना ढिबा खक्खकीचा, आस हूँ बरचस ती बाचस, 'अना उर्बायो, नीन एंगा ऐंड थइला सोना ढिबा सोंपचकाचकय, ऐरा, ऐंड थइला सोना ढिबा अउरिम अर्जाचकादन।'
- 23 आसी उर्बस आसिन बाचस, 'नीन दौ नंजकय, बेस अरा पत'अना जोगे जोंख, नीन जुक्की नू पत'अना जोगे रहचकय, निंगन बग्गे जिनिस मइय्याँ अदिया कम'ओन। बरा, निंगहै उर्बासी रिझ नू मेस'आ।'
- 24 तहाँ नेका ओन थइला सोना ढिबा खक्खकीचा, आस बरचस ती बाचस, 'अना उर्बायो, ऐन अख'आ लिक्कन का नीन नगदे बेइहा आलय, नीन एसन मल चाँखदय असन नीन खोयदय, अरा एसन मल बीजदय असन नीन खोंडदय।
- 25 औंगे इल्लिकन केरकन अरा केरकन ती निंगहै सोना ढिबन खज्जो नू नुड्डकन चिक्कन। ऐरा, निंगहै रई आद ईदिम।'
- 26 आसी उर्बस आसिन किर्त'अर बाचस, 'अना मलदौ अरा लंडी जोंख, नीन अख'आ लिक्कय का ऐन एसन मल चाँखदन, असन खोयदन अरा मल बीजदन असन खोंडदन।
- 27 होले निंगा एंगहै सोना ढिबन कंतर हूँ उर गे चि'अना रहचा, औंगे ऐन आर ती खद्दो आबोन ऊज'ओन हो'ओन दने।'
- 28 औंगे उर्बस आनियस, 'आसी गुसले आ थइला सोना ढिबन हो'आ ती नेख'आ गुसन दस थइला सोना ढिबा रई आस गे चि'आ।
- 29 एन्देरगेका नेखअय गुसन रई आस गे अउरिम चीतार'ओ अरा आसी गुसन बग्गे मनो कालो। लिकिन नेखअय गुसन मल्ला आसी गुसले एकदा रई आद हूँ होतार'ओ कालो।
- 30 अरा ई जोगे मलका जोंखासिन बहरी ऊखा नू सज'आ चि'आ, असन ची'खना ओल'खना अरा पल्ल चब्रना मनो।'



- 31 इकला मनवा खददन ऐन एंग्हे महबा नू उर्मी मेर्खा पैकर गने बर'ओन, अरा ऐन एंग्हे महबा ही बेल-गदिया नू ओक्कोन।
- 32 अरा उर्मी राजी ता आलारिन एंग्हे मुन्दहारे खोंडत'ओन। अरा महरस एकासे भेंडोन दरा ऐडन हिगड़'अदस चि'अदस, अन्नेम ऐन अबड़ारिन हिगड़'ओन।
- 33 भेंडोन ऐन एंग्हे तीना पक्खे, अरा ऐडन एंग्हे डेब्बा पक्खे इजत'ओन।
- 34 तहाँ ऐन बेलन एंग्हे तीना पक्खे ता आलारिन ब'ओन, 'अना एंग्हे बंगासी आसीस खक्खका आलारो, बरा, आ राजी ही अदिया ननू मना कला, एकदा हुल्लो ती निमा सपड़ाचका रई।
- 35 एन्देरगेका ऐन कीड़ा रहचकन नीम एंगन मंडी ओन्ताचकर, ऐन ओन्क'आ रहचकन नीम अम्मु ओन्ताचकर, ऐन नन-राजियन रहचकन नीम एंगन निम्है एडपा नू ओकोरताचकर,
- 36 ऐन लंगड़ा रहचकन नीम एंगन किचरी अताचकर, ऐन बेमरहा रहचकन नीम एंगन ईरकर खूजकर, ऐन जेहेल नू रहचकन नीम एंगन भेंटार'आ बरचर।'
- 37 आ बारी उजगो आलर आनाकिर्त'ओर, 'अना उर्बायो, इकला ऐम निंगन कीड़ा ईरकम ती ओन्ताचकम, मलता ओन्क'आ ईरकम ती निंगन अम्मु ओन्ताचकम?
- 38 ऐम इकला नन-राजियन ईरकम ती एम्है एडपा नू ओकोरताचकम? मलता लंगड़ा ईरकम अरा किचरी अताचकम?
- 39 ऐम इकला निंगन बेमरहा ईरकम मलता जेहेल नू ईरकम ती निंगन भेंटार'आ बरचकम?'
- 40 होले ऐन बेलन आरिन किर्त'अर ब'ओन, 'ऐन निमन मानिम ब'अदन, नीम इबड़ा एंग्हे सन्नी ती सन्नी भइय्योर नेखअम गने नंजकर अदिन एंग्हे गनेम नंजकर।'
- 41 आ बारी ऐन बेलन डेब्बा पक्खे ता आलारिन ब'ओन, 'अना सरपारका आलारो, एंग्हे मुन्द ती आ मल तेभ्रना चिच्ची नू किर्रिम बि'आ, एकदा नाद अरा अदही पैकर गे सपड़ाचका रई।
- 42 एन्देरगेका ऐन कीड़ा रहचकन नीम एंगन मंडी मल ओन्ताचकर, ऐन ओन्क'आ रहचकन नीम एंगन अम्मु मल ओन्ताचकर।
- 43 ऐन नन-राजियन रहचकन नीम एंगन निम्है एडपा नू मल ओकोरताचकर, ऐन लंगड़ा रहचकन नीम एंगन किचरी मल अताचकर, अरा ऐन बेमरहा अरा जेहेल नू रहचकन नीम एंगन मल ईरकर खूजकर।'



44आ बारी आर किर्त'अर ब'ओर, 'अना उर्बायो, ऐम निंगन इकला कीड़ा मलता ओन्क'आ मलता नन-राजियय मलता लंगड़ा मलता बेमरहा मलता जेहेल नू ईरकम, अरा निंगहै तेतर-सुसर मल नंजकम?'

45आ बारी ऐन बेलन किर्त'अर ब'ओन, 'ऐन निमन मानिम ब'अदन का नीम इबड़ा सन्नी ती सन्नीर गने नेखअम संगे मल नंजकर, अदिन एंगहै गने हूँ मल नंजकर।'

46अरा ईर मुंजामलका गूटी दंडे भोग'आ गे क'ओर, लिकिन उजगो आलर मुंजामलका उज्जना नू कोर'ओर।”

मत्तायोस 26

1येसुस इबड़ा उर्मी कत्थन बाच खच्चियस ती तंगहै चेलारिन ब'आ हेलरस,

2“नीम अखदर ऐंड उल्ला खोखा कट्टना ही परब रई। आ उल्ला नू मनवा खददन ऐन क्रुस नू अरग'आ गे धरतार'ओन।”

3तहाँ मुध नैगर अरा यहूदी सेयान आलर कैफस नामे कोहाँ नैगासी एड़पा नू खोंडरर।

4अरा ताम ताम कछनख'आ हेलरर का नाम येसुसिन एकासे ठक'ओत धर'ओत ती पिटोत।

5लिकिन आर ब'आलियर, “परब ही उल्ला नू मला, एन्ने अम्बन मना का आलर नू हलहली चोओ।”

6एकाबारी येसुस बेतानिया पद्दा नू सिमोन नामे आलासी एड़पा नू रहचस, एकास मुन्द खसरा रोगियस रहचस,

7ओन्टा आली पंडरू पखना ही संजगी नू नगदे दाम ही जटामासी ही अरंगा गमगमरना इसुंग ओन्द्रा बरचा। अरा आस मंडी ओना गे उक्काचस खने, आद येसुसी कुक्कु नू इसुंगन तुन्दिया।

8इदन ईरयर ती चेलर खीसारर ती ब'आ हेलरर, “ई गमगमरना इसुंगन एन्देरगे एन्ने नठाबातारा?

9ई इसुंग गा बग्गे दाम ती बीसरकी र'ओ दने, अरा इदन कीडर गे चितार'आ ओंगालिया।”

10इदिन अक्खस ती येसुस आरिन बाचस, “इदिन एन्देरगे दिकदिकाब'अदर? ईद गा एंगा गे दौ नंजकी रई।

11कीडर गा निम्है गने सगरघड़ी र'अनर, लिकिन ऐन निम्है गने सगरो मल र'ओन।

12ईद एंगहै माड़ना ही सपड़'अना नू एंगहै मेद नू मुन्द तिम इसुंगन तुन्दकी रई।



- 13 ऐन निमन मानिम ब'अदन का सौंसे खेखेल नू एसन एसन दौ कत्था तेंग'ओ असन असन ईद ही नलख ईद ही सुरता गे तेंगतार'ओ।”
- 14 खने यूदस इसकारियोत ने बारा चेलर ती ओर्तोस रहचस, आस मुध नैगर गुसन केरस ती बाचस,
- 15 “ऐन येसुसिन निमा गे धरत'आ गे सहाड़ा ननोन होले, एंगा एन्द्रा चि'ओर?” अबड़र आस गे तीस गोटंग चाँदी ही ढिबा जोखचर ती चिच्चर।
- 16 खने आस आ बारी ती आर गे येसुसिन धरत'अना नू संगे चि'आ गे मोका बेद्दा हेलरस।
- 17 बिगर बिदगी असमा ही परब ही मुन्द उल्ला येसुसी चेलर बरचर ती आसिन मेंजर, “नीन एन्देर बेद्ददय ऐम एसन कट्टना ही ओन्ना-मोखनन निंगा सराजमा ननोम?”
- 18 खने आस आरिन बाचस, “नगरे नू ओन्टा आलासी गुसन कला अरा ब'अके, 'गुरुस ब'अदस का एंगहै ओक्ताचका बेड़ा हेद्दे अंडसिया, ऐन एंगहै चेलर गने निंगहै एड़पा नू कट्टना ही ओन्ना-मोखनन मोखोन?”
- 19 औंगे चेलर येसुसी बाचका लेक्खा नंजर अरा कट्टना ही ओन्ना-मोखना ही सराजमा नंजर।
- 20 बीड़ी पुत्तिया खने येसुस बारा चेलर गने आ एड़पा नू बरचस। अरा कट्टना ही ओन्ना-मोखना ओना गे उक्कियस।
- 21 अरा आर ओनालियर खने येसुस आरिन बाचस, “ऐन निमन मानिम ब'अदन, निम्है ती ओर्तोस एंगन धरत'आ गे संगे चि'ओस।”
- 22 इदन मेंजर ती आर हेन्दवारर केरर। अरा आर ओर्त ओर्त आसिन ब'आ हेलरर, “अना गुरु आस ऐन हिकदन का?”
- 23 आस किर्त'अर बाचस, “एकास एंगहै गने तंगहै खेक्खन डुभा नू नूतकादस, आस एंगन धरत'आ गे संगे चि'ओस।
- 24 धर्मेसी कत्था तिंगुर नेम्हा पुथी नू एंगहै पत नू एन्देर लिखचकानर अन्नेम मनवा खद्दन ऐन खे'ओन दने। लिकिन ने एंगन धरत'आ गे संगे चि'अदस आसी मुंजना नगदे भयभयान मनो। आस मल कुन्द्रका होले, आस गे दौ रहचा।”
- 25 खने आसिन धरत'ऊ यूदस बाचस, “अना गुरु, ऐन हिकदन का?” येसुस आसिन बाचस, “हाँ, नीन बाच खच्चिकय अन्ने दिम हवे।”



- 26 आर मोखालियर खने, येसुस असमन होचस ती धर्मस गे धन्यवाद नंजस। फिन अदिन किच्चियस, अरा चेलर गे चिचस अरा बाचस, “ओंदा, मोखा, ई असमा एंग्हे मेद हवे।”
- 27 फिन आस ओन्टा डुभा नू अंगुर रासिन होचस, अरा धर्मस गे धन्यवाद नंजस। अरा आस अदिन आर गे चिचस ती बाचस, “नीम ओर्मर इय्या ती ओना।
- 28 एन्देरगेका ई अंगुर रासी एंग्हे खेंस हवे, एकदा ऐन बाहत'आ गे कालालदन, ई खेंस ती ऐन बग्गे आलारिन पाप ती अम्बा गे धर्मस नंजका गच्छरकन बड़ियर ननोन।
- 29 ऐन निमन ब'अदन का ऐन एम्बासी राजी नू निम्है गने पुना अंगुर रासी ओन्ना गूटी इदन ई तरिका ती मुन्द इकला हूँ मल ओनोन।”
- 30 फिन आर ओन्टा ओहमा डंडी पाड़ियर अरा उरखर ती जैतून परता तरा केरर।
- 31 खने येसुस आरिन बाचस, “नेम्हा पुथी नू लिखकी र'ई, 'ऐन महारासिन पिटोन, अरा आसी भेंडो ही गोंहड़ा भिड़कार'ओ कालो' एन्ने नीम ओर्मर एंगन अम्बोर ती इन्ना माखम बोंगोर क'ओर।
- 32 लिकिन ऐन केचका ती उज्जा चौचका खोखा निमन ती मुन्द गलिलेया कालोन, अरा असन निमन भेंटार'ओन।”
- 33 लिकिन पतरस आसिन बाचस, “ओर्मर निंगन अम्बोर होले अम्बोर नेकअन, ऐन मल अम्बोन।”
- 34 खने येसुस आसिन बाचस, “ऐन निंगन ओन्टा मुदे कत्था ब'अदन, इन्नम ई माखम खेर चींखना ही मुन्द नीन तीन हेल एंगन बलदन ब'ओय।”
- 35 पतरस आसिन बाचस, “एंगा निंग्हे गने खे'अना मनो दिम होले हूँ, ऐन इकला हूँ निंगन बलदन मल ब'ओन।” एन्नेम नन्ना ओर्मा चेलर हूँ बाचर।
- 36 फिन येसुस आसी चेलर गने गेतसेमनी नामे ओन्टा अड्डा नू बरचर। येसुस तंग्हे चेलारिन बाचस, “ऐन बिन्ती नना कालालदन, एंग्हे किरना गूटी इसन उक्का र'आ।”
- 37 तहाँ आस पतरस अरा जेबदयुसी ऐंड़ खद्दारिन तंग्हे गने होचस केरस। आस दुक्खे अरा खिलपत मना हेलरस।
- 38 अरा आस आरिन बाचस, “ऐन नगदे हेन्दवारदन, अरा ईद एन्ने हवे ऐन खे'अना ही बेड़ा नू र'अदन। नीम इसन र'आ अरा एंग्हे गने एज्रका र'आ।”
- 39 अरा आस कटी गुना मुन्द केरस। अरा आस खेखेल नू मुही पाब खत्रस ती बिन्ती नंजस, “एंग्हे बंगायो, मना ओंगो होले, ई खिलपत एंगा अम्बो मना। लिकिन एंग्हे मने लेक्खा मला, निंग्हे मने लेक्खा मनन।”



- 40 फिन आस बरचस अरा चेलारिन खन्द्रना खक्खियस ती आस आरिन एज्जस अरा पतरसिन बाचस, “औंगे नीम ओन घड़ी हूँ एंग्हे गने एज्जका र'आ पोलकर का?”
- 41 ऐन एन्देर बाचकन अदिन नीम नना गे गा बेद्ददर, लिकिन अदिन नन्ना बेसे निमा सवंग मलकी। औंगे एज्जका र'आ अरा बिन्ती नना का निम्है बिड़दो नू इन्द्रिइम बर'ओ होले नीम छेक'आ औंगोर।”
- 42 आस फिन दुसर खेप किरिम बिच्चियस अरा बिन्ती नंजस, “अना एग्है बंगायो, ई खिलपत एंग्है बिगर ओंडका मल टाड़र'ओ होले, निंग्है मने दिम मना नेकअन।”
- 43 आस फिन बर'अरकी आरिन खन्द्रना खक्खियस, एन्देरगेका आर मथलारका केरकाचर।
- 44 औंगे आरिन अम्बियस ती आस अउरिम केरस ती आस मुन्द ता लेक्खम तिसर खेप गोहरारस।
- 45 खने आस बरचस ती चेलारिन बाचस। “अक्कु खन्द्रते र'अरकी खन्न ऐखोय का? ऐरा, एंग्है दुक्खे सारना ही बेड़ा अंडसिया केरा। मनवा खद्दन एंगन धर'आ गे ओर्तोस पपहा आलारिन संगे चि'आ कालदस।
- 46 चो'आ, क'ओत, ऐरा, एका ओर्तोस एंगन धर'आ गे संगे चि'अदस आस हेद्दे बर'आलदस।”
- 47 येसुसी एन्ने ब'अना गनेम बारो चेलर ती ओर्तोस यूदस बरचस। आसी गने तलवार अरा सोट्टा धरचका ओन्टा कोहाँ गौंहड़ा बरचा। आरिन मुध नैगर अरा सेयान आलर तइय्का रहचर।
- 48 यूदस एन्ने चिन्हा चिच्का रहचस का “ऐन नेकन चोखोन आसिम येसुस हिकदस। आसिन धरके हो'अके।”
- 49 यूदस लेम बरचस ती येसुस गुसन केरस, “अना गुरु! जौंहार!” बाचस ती येसुसिन चुंखियस।
- 50 येसुस आसिन बाचस, “अना संगी, एका नलख गे नीन बरचकादय, अदिन नना।” खने आर येसुसिन धरचर अरा गुड़चर।
- 51 आ बारी येसुसी संगेर ती ओर्तोस तंग्है तलवारन ओथ्रस ती कोहाँ नैगासी जौंखासिन खोत्तस। लिकिन आसी खेबदा लेका खंडरा।
- 52 येसुस आस ती बाचस, “निंग्है तलवारन खाप नू उइय्या, एन्देरगेका ने तलवार ती ल'अनर आर तलवार ती पिटतार'ओर।
- 53 नीन एन्देर बलदय का ऐन एंग्है बंगासिन गोहरार'आ ओंग्दन, अरा आस मेर्खा पैकर ही बारा फउदन ती बग्गे तइय्योस चि'ओस दने?”
- 54 लिकिन नेम्हा पुथी ता लिखका आद पुरा मना गे एन्ने दिम मन्ना र'ई।”



- 55 तहाँ येसुस गोंहड़ा आबोन बाचस, “ऐन गा उर्मी उल्ला धर्मसी मन्दिर नू निम्है गने सिखाब'आ लिक्कन। खने नीम एंगन मल धरचकर। नीम डाकू आलारिन धरना लेक्खा एंगन धर'आ गे तलवार अरा सोट्टा धर'अरकी बरचकादर।
- 56 लिकिन इबड़ा उर्मी इदगे मंजा का धर्मसी कत्था तिगुर नेम्हा पुथी नू एंग्हे पत्त नू लिखचका कत्था पूरा मनो।” खने उर्मी चेलर अम्बियर ती बोंगर केरर।
- 57 फिन अबड़र येसुसिन कोहाँ नैगस कैफस गुसन होच्चर। असन नेग सिखाब'उर अरा सेयान आलर खोंड़रका रहचर।
- 58 लिकिन पतरस गेच्छा ती येसुसी खोखा खोखा कोहाँ नैगासी चाली गूटी केरस। अरा भितरी केरस ती एन्देर मनो अदिन ऐरा गे धर्मसी मन्दिर खापुर गने उक्कियस।
- 59 अक्कुन मुध नैगर अरा गोट्टा यहूदी कोहाँ सभा येसुसिन पिटत'आ गे आसी बिड़दो नू गोवाह बेद्दना नू लक्की रहचा।
- 60 नगदे आलर आसी बिड़दो नू ठकना गोवाह चि'आलियर, लिकिन आर ही गोवाह ओन्टम मल रहचा। छेद्दे नू ऐंड़ आलर बरचर,
- 61 आर बाचर, “ऐम ईसिन एन्ने ब'अना मेंजका र'अदम, ‘ऐन धर्मसी ई मन्दिर आबोन धंस'आ ओंग्दन, अरा तीन उल्ला नू ऐन कम'आ ओंग्दन।”
- 62 खने कोहाँ नैगस इज्जस ती बाचस, “नीन इन्द्रिइम किर्त'अर मल चि'अदय का? इबड़ा आलर निंग्हे बिड़दो नू एन्देर गोवाह चि'अनर?”
- 63 लिकिन येसुस कलेकले रहचस। खने कोहाँ नैगस आसिन बाचस, “ऐन निंगन उज्जना धर्मस ती किरिया मोखदन का नीन धर्मसी खद्दय मसी हिकदय होले नीन उज्जना धर्मस ती किरिया मोखा।”
- 64 खने येसुस बाचस, “नीनिम बाचकय चिचकय अन्ने दिम हवे। लिकिन ऐन निंगन इदिन हूँ ब'अदन का, अक्कु ती नीम मनवा खद्दन एंगन उर्मी नू सवंग उइय्यू धर्मसी तीना चोक्ख उक्का ती राजी नन्नन ऐरोर। अरा नीम एंगन मेर्खा नू चरियो तरा बदाली ती एत्तनन ऐरोर।”
- 65 येसुसी ई ब'अनन मेंजस ती कोहाँ नैगस तंग्हे बरमारनन ऐद'आ गे तंग्हे किचरिन चरियस, तहाँ बाचस, “ईस धर्मसी निंदा नंजकादस, अक्कु नमा गे ईसी बिड़दो नू गोवाह ही एन्देर चाड़ र'ई! ईस धर्मसी बिड़दो नू तंगन धर्मसी लेक्खा जोक्खचस, ई ब'अनन नीम मेंजकर,



- 66ईसी पत नू नीम एन्देर सोचदर?" आर ओर्मर बाचर, "ईस गुन्हस हिकदस, ईसिन पिटना दिम मनो।"
- 67खने आर आसी मुंही नू तुप्पियर ती आसिन घुसियाचर, अरा नन्नर थपड़ाचर ती बाचर,
- 68"अना मसी, एमन मुन्द तेंगना ती ब'आ का निंगन ने लौचा?"
- 69आ बारी पतरस बहरी चाली नू ओक्कालियस। अरा ओन्टा जोंख पेल्लो आसी गुसन बरचा ती बाचा, "नीन हूँ गलिलेया जिला ता येसुस गने रहचकय।"
- 70आस ओर्मर ही मुन्दहारे "ऐन बलदन नीन एन्देर ब'अलदी" बाचस ती जिधचस।
- 71फिन आस बहरी बखड़े नू केरस। खने नन्ना जोंख पेल्लो आसिन असन एररकी हेद्दे इज्जका आलारिन बाचा, "ईस हूँ गा नासरेत पद्दा ता येसुस गने रहचस"
- 72आस किरिया मोक्खस ती अउरिम जिधचस, "ऐन आ आलासिन बलदन।"
- 73अरा जोक्को बेड़ा खोखा असन इज्जका आलर पतरसिन अउरिम बाचर, "नीन मानिम अबड़ा आलर ती ओर्त हिकदय, एन्देरगेका निंगहै कत्था ती लग्गी का नीन गलिलेया जिला ता हिकदय।"
- 74खने पतरस तंगन सर्प'आ अरा किरिया मोखा हेलरस, "ऐन आ आलासिन बलदन।" अरा लेम खेर चींखिया।
- 75खने पतरस गे येसुसी आ बाचका कत्था सुरता बरचा, "खेर चींखना ही मुन्द नीन तीन हेल ऐन निंगन बलदन ब'ओय।" अरा आस बहरी केरस ती चींखियस।

मत्तायोस 27

- 1बिज्जा गनेम लेम ओर्मा मुध नैगर अरा सेयान आलर भेंट मंजर ती येसुसिन पिटत'आ गे सलहा नंजर।
- 2फिन आर येसुसिन हेंचर अरा आसिन होच्चर ती यूदेया ही रोमी राजीखापुस पिलातुसी खेक्खा नू चिच्चर।
- 3येसुसिन धरत'आ गे संगे नंजका यूदस अक्खस का येसुस पिटा गे गुन्हा ठेकाबातारस खने, आस पस्तारस ती अबड़ा तीस गोटंग चाँदी ढिबन मुध नैगर अरा सेयान आलर गुसन किर्ताचस ओन्द्रस।
- 4अरा बाचस, "आ बिगर गुन्हा नेम्हा उजगो आलासिन पिटा गे धरताचकन ती पाप नंजकादन।" अबड़र बाचर, "अदगे एमा एन्देर? नीनिम अदही हदा र'अदय।"



- 5 औंगे आस अबड़ा ढिबन धर्मेसी मन्दिर नू हिबिडयस ती किरिम बिच्चियस, अरा केरस ती टंगरस केचस।
- 6 मुध नैगर अबड़ा ढिबन होचर ती बाचर, “इबड़न भंडार नू सजना नेग ही बिडदो रई, एन्देका ईद खेंस ही दाम हवे।”
- 7 औंगे आर सलहा मंजर ती नन-राजियारिन माड़ा गे अबड़ा ढिबा ती कुम्हरासी खल्लन खिन्दियर।
- 8 ई चड्डे आद इन्ना गूटी खेंस ही खल्ल बारई।
- 9 खने एका कत्था धर्मेसी कत्था तिंगू येरेमियास ती बारकी रहचा आद मंजा, “इसाऐल आलर आसी मइय्याँ ई दामन ओकताचकाचर आर आ तीस चाँदी ढिबन होचर,
- 10 अरा उर्बस एकासे एंगन पेसकाचस अन्नेम आर अबड़ा तीस गोटंग ढिबा ती कुम्हरासी खल्लन खिन्दियर।”
- 11 अक्कु येसुस राजीखापू पिलातुसी मुन्दहारे इज्जकाचस, अरा पिलातुस आसिन मेंजस, “नीन यहूदीर ही बेलय का?” येसुस किर्त'अर बाचस, “नीन ब'अदय अन्ने दिम हवे।”
- 12 लिकिन मुध नैगर अरा सेयान आलर आसी मइय्याँ दोस ठेका ब'आलियर खने, आस एन्दे हूँ किर्त'अर मल बाचस।
- 13 खने पिलातुस आसिन बाचस, “एन्दे नीन मल मेन्दय, ईर निंगहै बिडदो नू ऐ बग्गे गोवाह चि'आलनर?”
- 14 लिकिन आस आसिन ओन्टा कत्थन हूँ किर्त'अर मल बाचस, ईद ती पिलातुस गे कोड़हे अकबक मंजा।
- 15 राजीखापुस चाँनुम कट्टना परब ही उल्ला नू ओन्टा गुड्रकासिन नेकन आलर अम्बत'आ बेददर आसिन अम्बा चि'आलियस।
- 16 अबड़ा उल्ला नू बरब्बस नामे ही ओन्टा गुड्रकस रहचस। आस हलहली नू आलारिन लौचका पिटका रहचस।
- 17 आलर पिलातुसी एडपा नू खोंडरर खने, पिलातुस आरिन बाचस, “नीम एन्दे बेददर, ऐन निमा गे नेकन अम्बोन चि'ओन? बरब्बसिन का मलता येसुसिन एकास मसी बातारदस?”
- 18 एन्देगेका आस अक्खस का आर येसुसिन इस्गहा ती आस गे सोंपचका रहचर।



- 19पिलातुस नैवई नन्ना गदिया नू उक्काचस खने, तंगआली आसिन बाचा तइय्या, “नीन आ उजगो आलासी पत नू खेक्खा अमके नना, एन्देरगेका ऐन चैरो माखा तुंगुल नू आसी चड्डे नगदे दुक्खे सारचकन।”
- 20लिकिन मुध नैगर अरा सेयान आलर आलारिन मेना गे तुतकाचर का आस बरब्बसिन अम्बत'ओस, अरा येसुसिन पिटतोस।
- 21राजीखापुस आरिन मँजस, “इबड़ा इरबर ती नीम नेकन बेददर का ऐन निमा गे अम्बोन चि'ओन?” आर बाचर, “बरब्बसिन।”
- 22पिलातुस आरिन अउरिम मँजस, “होले येसुसिन, ने मसी बारदस, एन्देर ननोन?” ओर्मर बाचर, “ईसिन क्रुस नू ठोक'आ।”
- 23पिलातुस आरिन मँजस, “एन्देरगे, ईस एन्देर दोस नंजकादस?” लिकिन आर अउरिम जोर ती चिच्चियारते र'आलियर, “ईसिन क्रुस नू ठोक'आ।”
- 24पिलातुस ईरियस का गोंहड़ा ही चिच्चियारना मल मड़'आ लगी, अरा आस एन्द्रा हूँ इदही पत नू नना पुल्लियस। अरा आस अम्मु नेचस ती गोंहड़ा ही मुन्दहारे खेक्खा नोंढरस ती बाचस, “ऐन ई उजगो आलासी खे'अन ही बदी ती बछ्छदन, निम्है मइय्याँ दिम ईद मनो।”
- 25ओर्मर आनाकिर्ताचर, “ईसी बदी एम्है मइय्याँ अरा एम्है खददर मइय्याँ मनन।”
- 26खने पिलातुस बरब्बसिन आर गे अम्बियस। अरा येसुसिन कोर्ता ती लौ'अरकी क्रुस नू ठोक'आ गे रोमी सैनर गे सोंपचस।
- 27खने राजीखापुसी सैनर येसुसिन प्रिटोरिओन बारना गदिया ही भितरी चाली नू होच्चर केरर। अरा आर असन आसी मुन्दहारे उर्मी फउदन खोंड़चर।
- 28अरा आर आसी किचरिन चड्डर ती आसिन खेंसो किचरी अत्ताचर।
- 29अरा आर अचचोन बिन्डो लेक्खा मोड़चर ती आसी कुक्कु नू अत्ताचर। अरा आसी तीना खेक्खा नू बेत डंडा धरताचर ती आसी मुन्दहारे मूकलिदरर ती भेंसड़'आ हेलरर, “अना यहूदीर ही बेलायो” बाचर।
- 30अरा आर आसी मइय्याँ तुप्पियर अरा आ बेत डंडन होच्चर ती येसुसी कुक्कु नू लौ'आ हेलरर।
- 31आसिन भेंसड़ाचर अदही खोखा खेंसो किचरिन इच्चियर ती आसी किचरिन अत्ताचर। अदही खोखा आर येसुसिन क्रुस नू ठोक'आ गे प्रिटोरिओन ती बहरी होच्चर।



- 32 फिन सैनर येसुस गने नगरे ती बहरी काला लगियर खने, आर सिमोन नामे ओन्टा कुरेने नगरे ता आलासिन येसुसी क्रुस आबोन चेड़'आ गे बिट्ठी नू धरचर।
- 33 आर ओर्मर गोलगोता नामे अड्डा नू बरचर। गोलगोता ही माने “खपरोही ही अड्डा” हवे।
- 34 अरा आर येसुस गे गन्धरस भिड़ाबाचका अंगुर रासी अबोन ओना गे चिच्चर। लिकिन आस टट्टी ईरियस ती अदिन मल ओंडस।
- 35 फिन आर आसिन क्रुस नू ठोकचकाचर खने, आसी किचरिन चिठी टिड्डर ती तम्है नू खट्टरर।
- 36 अरा असन उक्कियर ती आसिन खापा लगियर।
- 37 अरा आसी दोस चिठी लिख'अरकी आसी कुक्कु मइय्याँ क्रुस नू लगाबाचर का “ईस यहूदीर ही बेलस येसुस हवे”।
- 38 तहाँ आर आस गने ऐंड डाकू आलारिन, ओर्तोसिन आसी तीना अरा ओर्तोसिन डेब्बा चोक्ख क्रुस नू ठोकचर।
- 39 डहरे नू कालू बरऊ आलर कुक्कुन नुक'अरकी भैसड़'आ लगियर।
- 40 आर एन्ने ब'आलियर, “नीन, धर्मसी मन्दिर आबोन धस'ऊ अरा तीन उल्ला नू कम'ऊ। नीन धर्मसी खद्दय होले क्रुस मइय्याँ ती एता अरा निंगन बछाब'आ।”
- 41 एन्नेम मुध नैगर अरा सेयान आलर अरा नेग सिखाब'उर आसिन भैसड़ाचर ती ब'आ लगियर,
- 42 “ईस नन्नारिन बछाबाचस अन्ति तंगन बछाब'आ पोलदस। ईस तंगन इस्राएल ही बेलस बाचस, अक्कु क्रुस मइय्याँ ती एतोस बर'ओस होले, ऐम आसिन पत्त'ओम।
- 43 ईस तान धर्मसी खद्दन बाचस ती धर्मस मइय्याँ असरा नंजकादस। धर्मस ईसिन पत्तारदस होले अक्कु आस ईसिन नाइदस नेकअन।”
- 44 अरा डाकू आलर ने आस गने क्रुस नू ठोक्राचर आर हूँ येसुसिन एन्नेम भैसड़'आ लगियर।
- 45 अक्कु लोहाड़ी बारा बजे गोट्टा चक ऊखा मंजा केरा, अरा आद तीन बजे गूटी रहचा।
- 46 ओनबीड़ी तीन बजे येसुस जोरसरिया चिच्चियारनुम बाचस, “ऐलोइ, ऐलोइ लेमा सबखतानी।” इदही माने, “एंगहै धर्म, एंगहै धर्म नीन एंगन एन्देरगे अम्बकय?”
- 47 असन हेद्दे र'ऊ जोक्को आलर इदन बुझुर'आ पोल्लर ती बाचर, “ई आलस एलियसिन मैखदस।”



- 48अबड़र ती ओतोस लेम बोंगस ती तूलिन तिस्सा अंगुर रासी नू चेदस ती डंडा नू पुज्जयस ती येसुस गे चीपा गे चिच्चस।
- 49लिकिन नन्नस बाचस, “रहा, ऐरोत एलियस ईसिन नाड़ा गे बरओस का मला!”
- 50खने येसुस अउर हूँ जोरसरिया चिच्चियारस ती तंगहै जियन बिच्छरस।
- 51आ बारिम धर्मेसी मन्दिर ही परदा मइय्याँ ती किइय्या गूटी चर्चा ती ऐंड फड़ा मंजा केरा। अरा खेखेल नुकुर खच्चिया, अरा चचड़ी पलकरा केरा।
- 52अरा मसड़ा गुट्ठी तिसग्रा केरा, अरा नगदे केचका नेम्हा आलर ही मैद उज्जा चोचा।
- 53अरा आर मसड़ा गुट्ठी ती उरखर, अरा येसुसी उज्जा चोचका खोखा आर नेम्हा नगरे येरुसलेम नू कालरकी नगदे आलर गे ऐथ्रर।
- 54रोमी सैनर ही मुद्धस अरा आसी गने रअरकी येसुसिन खापा लगियर आर खेखेल नुक्रनन अरा अबड़ा मंजकन ईरियर खने, आर नगदे इलियर अरा अनचकरर, अरा बाचर, “ईस मानिम नू धर्मेसी खद्दस रहचस।”
- 55असन नगदे बग्गे मुक्कर गलिलेया ती येसुसी सुसर नना गे आसी गने चोंखका रहचर, आर गेच्छा ती इबड़न ऐरा लगियर।
- 56आर नू मगदला पद्दा ता मरियम अरा याकोब अरा योसेसी तंगियो मरियम अरा जेबदयुसी खद्दर ही तंगियो रहचर।
- 57बीड़ी पुत लेक्खा बारी, अरिमतिया पद्दा ता योसेफस नामे ओन्टा उरुब आलस असन बरचस, आस तानिम येसुसी चेला मंजका रहचस।
- 58आस पिलातुस गुसन केरस अरा येसुसी मैदन नेचस। खने आस येसुसी मैदन योसेफस गे चिताचस।
- 59खने योसेफस येसुसी मैदन एत्ताचस ती सफा कफन किचरी ती मुसगियस,
- 60अरा तंगहै पुना मसड़ा नू कीदस, एकदा चचड़ी नू पतरकी कम्क्रीचा। अरा मसड़ा ही बली नू ओन्टा कोहाँ पखनन उर्दियस ती किरिम बिच्चियस।
- 61अरा असन मरियम मगदलेनी अरा नन्ना मरियम मसड़ा ही मुन्दहारे उक्काचर।
- 62नन्ना उल्ला खन्न ऐर्रना उल्ला रहचा, आँगे मुध नैगर अरा फरिसीर पिलातुस गुसन केरर ती बाचर,



63“अना बेलायो, एमा सुरता रई का आ भुरइउस उज्जालियस खने, बाचकाचस, ‘ऐन तीन उल्ला खोखा उज्जा चोओन।’

64औंगे मसइन खापा गे पेसआ का तिसर उल्ला गूटी मसड़ा खापतारओ। मलता एन्ने अम्बो मना आसी चेलर बरओर ती आसी मेदन खड़ओर होओर, अरा आलारिन बओर का, ‘आस केचका ती उज्जा चोचकादस।’ एन्ने मनो होले ई खोखा ता भोड़ मुन्द ता ती कोड़हे मलदौ मनो।”

65पिलातुस आरिन बाचस, “निम्है गुसन खापू आलर गा रअनर। कला, निम्है मने लेक्खा खापतआ।”

66औंगे आर खापू आलारिन संगे होचर ती केरर, अरा पखना नू छपा नंजर ती मसइन खापियर।

मत्तायोस 28

1खन्न ऐखना उल्ला मुंजियस ती हप्ता ही मुन्द उल्ला बिज्जा गनेम मरियम मगदलेनी अरा नन्ना मरियम मसइन ऐरा बरचर।

2आ बारी कोड़हे खेखेल नुक्रना मंजा, एन्दरगेका उर्बासी ओन्टा पैकस मेर्खा ती इतियस अरा मसड़ा हेद्दे बरचस ती पखनन ताड़चस अरा अइय्या उक्कियस।

3आसी रूप बिजली लेक्खा अरा आसी किचरी कीबा लेक्खा पंडरू रहचा।

4आसी इल्चका ती खापुर असरा खच्चियर, अरा केचका लेक्खा मंजर केरर।

5आ पैकस मुक्कारिन बाचस, “अमा एल्चा, ऐन अखदन का नीम क्रुस नू ठोकचका नासरेत ता येसुसिन बेद्दालदर।

6आस इसन मलकस, तंगहै बाचका लेक्खम आस केचका ती उज्जा चोचकादस, बरा, आसी कीदका अइडन ऐरा।

7अक्कुन नीम लेम कला ती आसी चेलारिन तेंगा का आस केचका ती उज्जा चोचकादस। आस निमन ती मुन्द गलिलेया कालदस, असन नीम आसिन ऐरोर। ऐरा, ऐन निमन तिका चिच्चकादन।”

8अबड़ा मुक्कर इल्चका अरा रिझ गने मसड़ा ती लेम किरियर ती येसुसी चेलारिन इदन तेंगा गे बुंगनुम केरर।

9आचका येसुस आरिन भेंट मंजस अरा बाचस, “जोहार,” अबड़र हेद्दे बरचर ती आसी खेड्डेन धरचर ती ओड़ लगियर।



- 10 खने येसुस आरिन बाचस, “अमा एल्चा, एंग्हे भईरिन कला ती तेंगा का गलिलेया किरिमबिओर, असन एंगन ऐरोर।”
- 11 अबड़ा मुक्कर काला लगियर खने, खापुर ती जोक्कोर नगरे नू बरचर ती मुध नैगारिन उर्मी हलन तिगियर।
- 12 खने मुध नैगर सेयान आलर गने भेंट मंजर ती सलहा नंजर। अरा आर अबड़ा सैनर गे बग्गे ढिबा चिच्चर ती बाचर,
- 13 “एन्ने बअके का, ‘माखा बारी खन्द्रआ लिक्कम खने, आसी चेलर बरचर ती आसिन खड्डर होच्चर।’
- 14 ई कत्था राजीखापुस गूटी अंडसो होले, ऐम आसिन बुझाबओम अरा निमन सस्ती ती बछाबओम।”
- 15 औंगे आर ढिबा होच्चर ती एकासे बाचका रहचर अन्नेम नंजर। ई कत्था इन्ना गूटी यहूदी आलर नू बीडरकी रई।
- 16 तहाँ ग्यारा चेलर गलिलेया नू येसुस आरिन तिंकाचस आ परता नू केरर।
- 17 आर येसुसिन इरियर खने, आर आसिन ओइ नंजर, लिकिन नेका नेका धुक-पुक मंजा।
- 18 तहाँ येसुस आर ही हेद्दे बरचस ती बाचस, “मेर्खा अरा खेखेल नू उर्मी अदिया एंगा चीरकी रई।
- 19 औंगे नीम कला अरा उर्मी राजी ता आलारिन चेला कमआ अरा आर गे धर्मे बबस अरा खद्दस अरा नेम्हा बोलतासी नामे ती नोडरतआ,
- 20 अरा आरिन उर्मी कत्था एकदन ऐन निमा पेसकादन, मनआ गे सिखाबआ। अरा ऐरा, ऐन उर्मी उल्ला खेखेल ही मुंजना गूटी निम्है गने रअदन।”



मरकुस

मरकुस 1

- 1 ईद धर्मेसी खद्दस येसु मसीसी दौ कत्था।
- 2 ईद एन्ने ओड़ मनी, धर्मेसी कत्था तिंगू यसायास तंग्हे पुथी नू धर्मेस मसीसिन एन्देर बाचस अदिन लिखचकादस। धर्मेस आसिन एन्ने बाचस, “ऐरा! ऐन एंग्हे पैकासिन निंग्हे मुन्द तइय्या लगदन, आस निंगन परिघ'आ गे आलारिन सपड़'ओस।
- 3 आस टोड़ंग नू चिच्चियारनुम आलारिन ब'ओस ‘उर्बस गे डहरेन चत्र'आ, का आसिन परिघ'आ गे निमन सपड़'आ।”
- 4 आ पैकस योहन हवे। आलर आसिन नूड़रत'उस ब'अनर। योहनस आलारिन टोड़ंग नू ब'अतेम र'आलियस, “जियन किर्त'आ, अदही चिन्हा गे ऐन निमन अम्मु ती नोड़रत'अदन। होले धर्मेस निमन छमा ननोस।”
- 5 येरुसलेम नगरे अरा यूदेया जिला ही नन्ना नन्ना अड्डा ती नगदे आलर आसी गुसन कालालियर। असन आर आसी कत्थन मेनरकी तम्है पाप गुट्ठिन पत'आलियर। खने योहनस आरिन यरदन खाड़ नू नोड़रत'आलियस।
- 6 योहनस ऊंट ही चुट्टी ती कमचका ओन्टा कड़कड़हा किचरिन चो'आलियस। अरा तंग्हे कड़मा नू चपटा ही कमरपटी है'आलियस। आस बोक्खो गुट्ठी अरा पतड़ा तीनिन लेका मो'खालियस।
- 7 आस एन्ने मेन्त'आलियस, “ओर्तोस लेम बर'ऊ र'अदस आस एंग्हे ती कोड़हे सवंगिय र'अदस। ऐन खोलखर'अरकी आसी खरपन इँचना ही हूँ जोगे मलकन।
- 8 ऐन गा निमन अम्मु ती लेका नोड़रत'अदन, लिकिन आस निमन नेम्हा बोलतस ती नन्ना घत नू नोड़त'ओस।”
- 9 अबड़ा उल्ला नू उन्दुल येसुस गलिलेया जिला ही नासरेत पद्दा ती बर'अरकी योहनस हेद्दे केरस। योहनस आसिन यरदन खाड़ नू नोड़रताचस।
- 10 आस अम्मु ती बहरी उरखस ती लेथेम मेर्खा तिसग्रनन अरा नेम्हा बोलतन पेरवाँ लेक्खा तंग्हे मइय्याँ एतनन ईरियस।
- 11 अरा मेर्खा ती धर्मे बबस बाचस, “नीन एंग्हे ओन्टे लेका चोन्हा खद्दय हिकदय, ऐन निंग्हे ती बग्गे खुसमारदन।”
- 12 तहाँ धर्मेसी बोलतस लेम येसुसिन टोड़ंग तरा तइय्यस।



- 13 आस टोडंग नू चालीस उल्ला रहचस। खने आस सैतान ती बिद्रूस। येसुस पतड़ा मेक्खो गने रहचस, अरा मेर्खा पैकर आसी तेतर-सुसर नंजर।
- 14 हेरोदेस बेलस योहनसिन जेहेल नू सजताचस। अदही खोखा येसुस गलिलेया जिला नू केरस अरा धर्मसी पत्त नू दौ कत्थन मेन्त'अना बारी रहचस।
- 15 अरा आलारिन ब'अना बारी रहचस, “धर्मस आलर ही उज्जना नू राजी नन्ना ही बेड़ा हेददे अंडसकी रई। औंगे जियन किर्त'आ अरा ई दौ कत्थन इंझ'आ।”
- 16 उन्दुल येसुस गलिलेया समुदर ही पिंडी नू ईकनुम कालियस खने, सिमोन अरा आसी भइय्योस अन्द्रेयसिन ईरियस। आर केवँटर रहचर औंगे आर समुदर नू जल्ली ईच'आलियर।
- 17 येसुस आरिन बाचस, “एंग्हे गने बरा, नीम एकासे इंजोन धर'आ लगदर अन्नेम ऐन निमन सिखाब'ओन आलारिन एकासे एंग्हे चेला मना गे ओन्द्रना रई।”
- 18 खने लेम आर तम्है नलखन अम्बरकी आसी गने चौर्रर।
- 19 आर जोर गेच्छा केरका खोखा आस जेबदयु तंगदस याकोब अरा आसी भइय्योस योहनसिन ईरियस। आर डोंगा नू तम्है जल्लिन तुन'आ लगियर।
- 20 आस आरिन ईरियस ती आरिन हूँ लेम तंग्हे चेला मना गे मीखियस। खने आर तम्बा जेबदयुसिन भुथियार गने डोंगा नू अम्बरकी येसुस गने चौर्रर।
- 21 जोक्को उल्ला खोखा येसुस अरा अबड़ा चेलर कफरनहूम नगरे केरर। अरा आस खोखा ता यहूदी खन्न ऐखना उल्ला नू यहूदी गोइहा एइपा कालरकी असला जुमुरका आलारिन सिखाब'आ हेलरस।
- 22 खने आसी सिखाब'अना ही तरिका ती आलर अनचकरर केरर। एन्देरगेका आस यहूदी नेग सिखाब'उर लेक्खा मला, लिकिन आकुस उइय्युस लेक्खा आरिन सिखाबाचस।
- 23 आ बेड़ा नू आ यहूदी गोइहा एइपा नू लेथेम ओन्टा मलदौ बोलता रस्सका आलस चिच्चियारस अरा बाचस,
- 24 “हे नासरेत पद्दा ता येसु! एम्है गने निंगा गे एन्देर नलख रई? नीन एमन नास नना गे बरचका र'अदय का? ऐन अखदन नीन एका ओर्तय, नीन गा धर्मस ती बरचका नेम्हा आलय।”
- 25 येसुस मलदौ बोलतन चेताब'अरकी आनियस, “कलेकले र'अय, ई आलस ती उरखय कलय।”
- 26 खने मलदौ बोलता आसिन नगदे दरकाचा अरा जोरसरिया चिच्चियारनुम आसिन अम्बिया चिच्चा।



- 27 असन रहचर ओर्मर अनचकरर केरर, अरा ताम ताम कछनरब्रआ हेलरर, “बब्बारे! ई सिखाबअना एकासे? ईद गा आकुस गने पुना सिखाबअना। आस मलदौ बोलतन हूँ आनदस, अबड़ा हूँ आसी कत्थन मिनी।”
- 28 येसुसी पत ता ई कत्थन लेम अबड़ा आलर गलिलेया जिला ही बग्गे अड्डा नू तिगियर।
- 29 येसुस सिमोन अरा अन्द्रेयस, याकोब अरा योहनस यहूदी गोड़हा एड़पा ती उरखर। अदही खोखा आर लेम सिमोन अरा अन्द्रेयसी एड़पा केरर।
- 30 असन सिमोनसी तंगसास नगदे कोड़हे नाड़ी ती बिड़रकी रहचा। एड़पा नू रहचर आर लेम अदही पत नू येसुसिन तिगियर।
- 31 खने आस अदही गुसन कालरकी अदिन खेक्खन धरअरकी चोदस। लेम अदही नाड़ी तम्मिया केरा। तहाँ आद चोचा ती आर गे ओन्ना-मोखना चिच्चा।
- 32 अउला पुतबारी बीड़ी पुतका खोखा जोक्को आलर रोगियर अरा नेखा मइय्याँ नाद रस्सकी रहचा अबड़ा ओर्मरिन येसुस गुसन ओन्द्रर बरचर।
- 33 अरा कफरनहूम नगरे ता बग्गे आलर सिमोनसी एड़पा गुसन खोंडरर।
- 34 येसुस कैनो मदहे रोगे ती लिंङरका नगदे बग्गे आलारिन कोड़े नंजस। अरा कैनो नाद आबोन हूँ आलर ती बोंगताचस। अरा अबड़ा नादन आसी पत नू बआ मल चिच्चस, एन्देरगेका अबड़ा आसिन अक्खा का आस नै तंगहै।
- 35 दोसर उल्ला पैरी, बीड़ी अरगना ती मुन्द ऊखुर ऊखुर नू येसुस चोचस। अरा एड़पा ती उरखरकी उछिन्द अड्डा नू केरस, अरा असन बिन्ती नना लगियस।
- 36 आ बारी सिमोनस अरा आसी संगेर येसुसिन बेद्दा केरर।
- 37 एकाबारी आर आसिन खक्खियर खने आसिन बाचर, “एम्है गने नगरे नू बरा, एन्देरगेका असन नगदे आलर निंगन बेद्दा लगनर।”
- 38 खने येसुस आरिन बाचस, “मला, बरा नाम अड्डे-बेड्डे पद्दा नू कओत नेकअन। होले ऐन असन हूँ दौ कत्थन मेन्तओन, एन्देरगेका ऐन इदगेम खेखेल नू बरचका रअदन।”
- 39 खने आस अरा आसी चेलर गोट्टा गलिलेया जिला नू केरर। असन आस यहूदी गोड़हा एड़पा नू दौ कत्थन मेन्तआलियस। अरा आस आलर मइतले नादन हूँ ओथ्रआलियस।



40 उन्दुल ओन्टा खसरा रोगियस येसुस गुसन बरचस, अरा आसी मुन्दहारे मूकलिदरस ती गोहरारस, “एंगन कोड़े ननम चि'आ एन्देरगेका ऐन अखदन, निंग्हे मने रई होले नीन एंगन कोड़े नना ओंग्दय।”

41 इदन मेनरकी येसुस गे आसिन नगदे सोग्गे लग्गिया। खने आस तंग्हे खेक्खन बड़हाबाचस ती आ आलासिन ऐवंढरस अरा बाचस, “एंग्हे मने रई, ओंगे ऐन निंगन कोड़े नन्दन।”

42 लेम आस कोड़े मंजस केरस। फिन आस खसरा रोगी मल रहचस।

43 येसुस आसिन कोड़े चेता ब'अरकी लेम तइय्यस।

44 आस एन्ने चेता बाचस, “निंग्हे कोड़े मंजका ही पत्त नू नेखा गुसन हूँ एन्द्रा हूँ अमके तेंगा। लिकिन कालरकी निंगन नैगासिन ऐद'आ। होले आस अख'ओस का नीन कोड़े मंजकय। अरा खसरा रोगियर कोड़े मन्नर खने एन्देर दाँड़े अरगना मनी अदिन मूसस आनियस, अदिन नीन सफा मना गे नैगस गुसन चि'आ। होले आस अदिन धर्मस गे दाँड़े अरगोस, फिन आलारिन तेंगोस का नीन कोड़े मंजकय।”

45 लिकिन आस तंगन येसुस एकासे कोड़े नंजस अदन नगदे आलारिन तेंगा हेलरस। ई चड्डे येसुस आलर ही ऐथ्रना नू एकअम नगरे नू काला पोल्लस, एन्देरगेका कोहाँ गोंहड़ा खोंडरा। ओंगे आस नगरे ही बहरी उछिन्द अड्डा नू रहचस। अन्नु हूँ ओनबेंडर'आ ती आलर आसी गुसन बर'आलियर।

मरकुस 2

1 जोक्क उल्ला खोखा येसुस अरा आसी चेलर कफरनहूम नगरे फिन केरर। आलर मेंजर का आस एड़पा नू र'अदस।

2 ओंगे नगदे बग्गे आलर असन खोंडरर का एड़पा नू अरा एड़पा ता बली ही बहरी हूँ अड्डा मल रहचा। अरा आस आरिन धर्मसी कत्थन तेंगा लगियस।

3 अरा जोक्को आलर तम्है ती चार झन आलर ती ओन्टा लकवा बेमरहासिन खटी नू चेड्डर ती येसुस गुसन ओन्द्रर बरचर।

4 लिकिन आलर ही खोपरका चड्डे आर आसिन येसुस गुसन अंडसत'आ पोल्लर, खने आर येसुसी कुक्कु मइय्याँ मेसगन खटी समना कोहाँ अड्डन उम्पियर, अरा खटी नू ऐप हें'अरकी लकवा बेमरहासिन बिडरका रांगे किइय्या एत्ताचर।



- 5 येसुस अक्खस का ऐन ई लकवा बेमरहासिन कोड़े नना आँगदन एन्ने आर पत्त'अनर, अरा आर ही नलखन ईरियस ती लकवा बेमरहासिन बाचस, “अना खद्द! ऐन निंग्हे पाप गुट्ठिन छमा नन्दन।”
- 6 खने जोक्को यहूदी नेग सिखाब'उर असन उक्का रहचर, अरा आर सोच'आलियर,
- 7 “ई आलस एन्देगे एन्ने ब'अदस? ईस तंगन धर्मेसी लेक्खा सोचदस। धर्मेसिन अम्बरकी ने हूँ पाप छमा नना पोलनर।”
- 8 येसुस लेम तंग्हे ती अक्खस का ईर तम्है नू एन्ने सोच'आलनर, अरा आस आरिन बाचस, “नीम एन्देगे एन्ने सोचदर?”
- 9 सेब्बा एन्द्रा, लकवा बेमरहासिन ‘निंग्हे पाप गुट्ठी छमा नन्तार'ई’, महले ‘चो'आ, निंग्हे खटिन चोद'आ ती कुद्दा नुंगा’ एन्ने ब'अना?
- 10 लिकिन ऐन निमन ऐद'ओन, का मनवा खद्दन एंगा गे आलर ही पाप छमा नना गे खेखेल नू आकुस र'ई।” खने आस लकवा बेमरहासिन आनियस,
- 11 “ऐन निंगन ब'अदन, चो'आ, निंग्हे खटिन चेड़'अरकी एड़पा कला।”
- 12 आ आलस लेम चोचस अरा खटिन चेड़स अरा ओर्मर ही ऐथ्रना नू बहरी ईकनुम केरस। ओर्मर अनचकरर केरर, अरा धर्मेसी ओहमा नंजर अरा बाचर, “नाम एन्ने एन्द्रा हूँ मल ईरका रहचकत।”
- 13 येसुस फिन कफरनहूम नगरे ती उरखरकी गलिलेया समुदर ही पिंडी नू केरस। अरा कोहाँ गोंहड़ा आसी हेद्दे बरचा, अरा आस आरिन सिखाबाचस।
- 14 आस कानुम कानुम हलफेसी खद्दस लेवीसिन मालगुजारी ऊज'ऊ एड़पा नू उक्का ईरियस। येसुस आसिन बाचस, “एंग्हे गने चोंख्र'आ।” होले आस चोचस ती आसी गने चोंख्रस।
- 15 खोखा येसुस लेवीसी एड़पा नू मंडी ओना गे उक्कियस। येसुस अरा आसी चेलर गने बग्गे मालगुजारी ऊज'उर अरा नन्ना पपहर ओक्करकी ओना लगियर, एन्देगेका आसी खोखा बर'ऊ अन्ने आलर बग्गे रहचर।
- 16 फरिसीर ती यहूदी नेग सिखाब'उर येसुसिन मालगुजारी ऊज'उर अरा नन्ना पपहर गने ओन्नन ऐररकी, आर आसी चेलारिन मँजर, “आस एन्देगे मालगुजारी ऊज'उर अरा नन्ना पपहर गने ओन्दस?”



- 17इदन मेनरकी येसुस आरिन बाचस, “कोड़े दौ आलर गे बैधासी चाइ मल्ला, लिकिन बेमरहर गे रई, ऐन ने तमन उजगो सोचनर आर गे मला ने तमन पपहा बुझुरनर आरिन एइआ बरचका रअदन।”
- 18अबड़ा उल्ला नू योहनसी चेलर अरा फरिसीर उपास नना लगियर। उन्दुल जोक्को आलर येसुस गुसन बरचर ती आसिन मेंजर, “योहनसी चेलर अरा फरिसीर ही चेलर उपास नन्नर, लिकिन निंगहै चेलर एन्देरगे उपास मल नन्नर?”
- 19येसुस आरिन बाचस, “एका गूटी बैजा जौखस बरतियर गने रअदस, आर एकासे उपास ननोर? बैजा जौखस आर ही गने रअना गूटी आर मल उपास ननोर।
- 20लिकिन बैजा जौखस आर ती होतारना बेड़ा बरओ, आ उल्ला आर उपास ननोर।
- 21ने हूँ पुना किचरी ही खंडन एटेरका पच्चा किचरी नू मल सटई तुनई, अन्ने आस नन्दस होले, टस्का पच्चा किचरिन चरौ चिओ, अरा एटेरकन कोहाँ ननो चिओ।
- 22ने हूँ पुना अंगुर रासी आबोन चपटा ही पच्चा कुड़वा नू मल निन्ददस उइय्दस, अन्ने नन्दस होले, बिचका अंगुर रासी चपटा ही कुड़वन पलको चिओ, अंगुर रासी अरा चपटा ही कुड़वा दुयो नठारओ कालो। औंगे अन्ने मल नन्दस। पुना अंगुर रासी आबोन चपटा ही पुना कुड़वा नू निन्ददस उइय्दस।”
- 23येसुस ओन यहूदी खन्न ऐखना उल्ला नू तंगहै चेलर गने खल्ल गुट्ठी नू मन्नुम कालियस, अरा तंगहै चेलर ईकनुम ईकनुम बालन तौखा हेलरर अरा मोक्खर।
- 24इदन ऐररकी जोक्को फरिसीर येसुसिन बाचर, “ऐरा, ईर एन्देरगे खन्न ऐखना उल्ला ही नेग ही बिड़दो नलख नन्नर?”
- 25येसुस आरिन बाचस, “नीम मल्ला पढचका का? इकला दाऊद बैलस अरा तंगहै संगेर कीड़ा रहचर, अरा मंडी ही चाइ मंजा, खने आस एन्देर नंजस?
- 26अबियातर कोहाँ नैगासी बेड़ा नू दाऊद बैलस धर्मसी एइपा नू कालरकी नैगस धर्मस गे दाँडे नंजका असमन मोक्खस, एकदन मोखना मूसासी पेसका नू नैगारिन अम्बरकी नेका हूँ नेग मल्ला। लिकिन दाऊदस मोक्खस, अरा तंगहै संगेर गे हूँ चिच्चस।”
- 27खने येसुस अबड़ा फरिसीरिन बाचस, “खन्न ऐखना उल्ला आलर ही चाइन पुराबआ गे धर्मस कमचकाचस, आस आलारिन खन्न ऐखना उल्ला ही चाइन पुराबआ गे मल्ला कमचका।



28 औंगे मनवा खद्दन एंगा हूँ एंग्हे चोख्र'उर गे खन्न ऐखना उल्ला नू एन्देर एन्देर नन्ना रई अदही फैसला नना गे अदिया रई।”

मरकुस 3

1 अउर ओन खन्न ऐखना उल्ला नू येसुस गोइहा एइपा नू केरस। असन ओन्टा खैका खेक्खा आलस रहचस।

2 अरा जोक्को फरिसीर येसुसिन बदी ठेकाब'आ गे जोह'आलियर, औंगे आर आसिन चिहंक ती ऐरालियर, का ईस खैका खेक्खा आलासिन खन्न ऐखना उल्ला नू कोड़े नन्दस का मला।

3 येसुस खैका खेक्खा आलासिन बाचस, “बरा, अरा ओर्मर ही मुन्दहारे इज'आ।”

4 तहाँ येसुस अबड़ा फरिसीरिन बाचस, “खन्न ऐखना उल्ला नू मूसासी पेसका लेक्खा एन्देर नन्ना बेस रई, दौ नन्ना का मलदौ नन्ना, आलर ही उज्जनन बछाब'अना का मदइत मल नन्ना ती आलारिन खे'आ चि'अना?” लिकिन आर एन्देर हूँ मल बाचर।

5 आस आरिन कैर ती ईरियस। आर ही जिया ही बेइहा चड्डे आसी जिया उल्लिया। खने आस आ आलासिन बाचस, “निंग्हे खेक्खन लमाब'आ।” आस तंग्हे खेक्खन लमाबाचस, अरा आसी खेक्खा कोड़े मंज खच्चिया।

6 खने फरिसीर बहरी कालरकी लेम हेरोदेर गने येसुसिन पिटा गे चिता बूता नना हेलरर।

7 येसुस गोइहा एइपा ती उरखरकी तंग्हे चेलर गने गलिलेया समुदर तरा केरस। ओन्टा कोहाँ गौहड़ा आसी खोखा केरा। ई गौहड़ा नू गलिलेया जिला ता,

8 अरा येरुसलेम नगरे ता, अरा यूदेया जिला ही नन्ना नगरे ता, अरा इदुमिया जिला ता, अरा यरदन खाइ ही पुरुब चक ता, अरा तुरोस अरा सीदोन नगरे ही चरियो चक ता आलर रहचर। आर आसी नंजका नलखन मेनरकी आस गुसन बरचर।

9 येसुस तंग्हे चेलारिन बाचस, “एंगा गे ओन्टा डोंगन सपड़'आ, एन्देरगेका बग्गे गौहड़ा खोपरका ही चड्डे आलर एंगन चिप'आ पोल्लोर, होले ऐन डोंगा नू ओक्का औंगोन, अरा ने पिंडी नू र'अनर अबड़ा आलारिन सिखाब'आ औंगोन।”

10 बग्गेरिन आस कोड़े नंजका रहचस, खने उर्मी रोगियर आसिन ऐसड़'आ गे चिपर'अरकी मुन्द बरचर, एन्देरगेका आर कोड़े मना औंगोर।

11 एकाबारी मलदौ बोलता गुट्ठी ईरिया खने धरचका आलारिन आसी मुन्दहारे टिड्डा ती चिच्चियारनुम बाचा, “नीन धर्मसी खद्दय हिकदय।”



- 12 लिकिन आस अबड़न चेताब'अरकी आनियस, का तान ने हिकदस अदिन अम्बो तेंगा।
- 13 फिन आस ओन्टा परता मइय्याँ अरगियस, अरा आस नेकन तंग्हे गने चोँख'आ गे मने नंजस, आरिन तंग्हे गुसन मीखियस, आर हूँ आस गुसन बरचर।
- 14 खने आस आर ती बारा गोटंग आलारिन चज्जियस, अरा आर गे तइरकर नामे चिच्यस। आरिन तंग्हे गने र'आ गे, अरा धर्मैसी कत्था मेन्त'आ गे आरिन तइय्या गे,
- 15 अरा आर गे नादन आलर ती ओथ्र'आ गे आकुस चि'आ गे चज्जियस।
- 16 आसी चज्जिका बारा गोटंग आलर ईर हिकनर, सिमोन नेखय आस पतरस नामे पिंजियस,
- 17 अरा जेबदयुसी तंग्दस याकोब अरा याकोबसी भइय्योस योहन, ईर इरबर गे आस बोअनेरगेस नामे उइय्यस, इदही माने “मुरुसी खददर” हवे।
- 18 अरा अन्द्रेयस अरा फिलिप्पोस अरा बरतोलोमैस अरा मत्तायोस अरा तोमस अरा हलफैसी तंग्दस याकोब अरा तद्दैस अरा यहूदीर ही छछिन्द सैना ता सिमोन
- 19 अरा यूदस इसकारियोत एकास खोखा येसुसिन धरताचस।
- 20 खोखा येसुस ओन्टा एइपा नू कोरचस, खने गौहड़ा अउरिम खोंडर'आ हेलरा। औंगेम आस अरा आसी चेलर गे मंडी ओना गे हूँ बेड़ा मल खक्खरा।
- 21 आसी एइपान्तर इदन मैजर, खने आर आसिन तम्है आकुस नू उइय्या गे उरखर, एन्देरगेका आलर ब'आ लगियर, का आसी बुधि बेड़ारकी र'ई।
- 22 येरुसलेम नगरे ती बरचका जोक्को नेग सिखाब'उर आलारिन बाचर, “ईस मलदौ बोलता गुट्ठी ही मुद्धस बेलजेबूल ती धरकादस। ईस अत्रु ती खक्खका सवंग ती नाद गुट्ठिन ओथ्रदस।”
- 23 खने आस अबड़ारिन मीखियस ती जोक्खा खीरी नू आर ती बाचस, “सैतान सैतानन मलम बोंगत'ओ,
- 24 ओन्टा राजी तंग्हे नू लड़ाई ननी होले, आ राजी बड़ियर र'आ पुल्ली।
- 25 ओन्टा एइपा ता आलर तम्है नू लड़ाई नन्नर होले, आ एइपा ता आलर बड़ियर र'आ पोलनर।
- 26 अन्नेम सैतान ही राजी तम्है नू खाइर'अरकी तम्है बिड़दो नू लड़ाई ननी होले, अदही राजी बड़ियर र'आ पुल्ली, अरा अदही मुंजना बेड़ा बर'ओ।



27 लिकिन एकअम आलस सैतान लेक्खा ओन्टा बहंगर आलासिन मुन्द मल हें'ओस ती आसी एडपा नू कोर'अरकी आसी जिनिसन बच्चा पोलदस। आस आसिन हें'ओस होलेम आसी एडपन बच्चा ओंगोस।

28 ऐन निमन मानिम ब'अदन, 'धर्मसी बिड़दो नू आलर ही उर्मी पाप, अरा आर ही उर्मी हींइना कछनखना गुट्ठिन धर्मस छमा ननोस।

29 लिकिन नेम्हा बोलतासी बिड़दो नू नीकईम ब'ओस होले, धर्मस आसिन इकला हूँ छमा मल ननोस, आस मुंजामलका पापन कुम्मदस।” आर नेम्हा बोलतासी बिड़दो नू हींइनर, अदिन ऐद'आ गे आस इदन बाचस।

30 आस आरिन एन्ने बाचस, एन्देरगेका आर बाचकाचर, “ईस मलदौ बोलता ती धरकस।”

31 खने येसुसी तंग्यो अरा भइय्योर आसिन ऐरा गे बरचर। आर बहरी इज्जर ती आसिन बहरी मेखा गे ओर्तोसिन तइय्यर।

32 गोंहड़ा येसुसी चरियो तरा उक्की रहचा। गोंहड़ा ती ओर्तोस आसिन बाचस, “निंग्यो अरा निंग्हे भइय्योर बहरी इज्जका र'अनर, अरा निंगन बेददालनर।”

33 खने आस किर्त'अर बाचस, “ने एंग्हे अयंग अरा एंग्हे भइय्योर हिकनर?”

34 अरा असन उक्का आलारिन ऐररकी बाचस, “ईर एंग्हे अयंग अरा एंग्हे भइय्योर हिकनर।

35 एका ओर्तर धर्मसी मने लेक्खा ऐकनर, आरिम एंग्हे भई अरा एंग्हे बहिन अरा एंग्हे अयंग हिकनर।”

मरकुस 4

1 येसुस फिन गलिलेया समुदर ही पिंडी नू सिखाब'आ हेलरस। आसी चरियो तरा कोहाँ गोंहड़ा खोंइरा केरा। खने आस समुदर नू इज्जका ओन्टा डोंगा नू अरगियस ती उक्कियस, इदगे का गोंहड़ा आसिन अम्बो थोकबोकामब'आ, अरा आस आरिन ब'आ ओंगोस। उर्मी गोंहड़ा समुदर ही पिंडी नू रहचा।

2 अरा आस आरिन जोक्खा खीरी ती कैनो गोट कत्थन सिखाबाचस। अरा तंग्हे सिखाब'अना नू एन्ने बाचस,

3 “मेना! ओन्टा चाँख'उस खल्ल नू बिहनी चाँख'आ गे उरखस।

4 आस तंग्हे खल्ल नू बिहनी चाँख'ओ बारी, जोक्को बिहनी डहरे नू खतरा, अदन ओड़ा बरचा ती मोक्खा चिच्चा।



- 5 जोक्को बिहनी पखनोरी खेखेल नू खतरा, असन खज्जो बग्गे मल रहचा, होले बिहनी लेम कुन्दिया।
- 6 अरा बीड़ी सेकचा, खने आद चड़मिया ती खइय्या केरा, एन्देरगेका अदही पादा गड्डी मल इतकी रहचा।
- 7 जोक्को बिहनी अच्च-खोप्पा मझी नू खतरा, बिहनी परदिया अरा अच्च-खोप्पा हूँ परदिया, खने अदन अरबिया चिच्चा, अरा आद खंजा आ पोल्ला।
- 8 लिकिन जोक्को बिहनी उपजा खेखेल नू खतरा, अरा आद कुन्दिया परदिया अरा खंजा अरा जोक्को तीस गुना खंजा अरा जोक्को साट गुना खंजा अरा जोक्को सौ गुना खंजा।”
- 9 खनेम येसुस गोंहड़न बाचस, “नेका मेना गे मने रई, आस मेन्दस ती बुझुरदस नेकअन।”
- 10 गोंहड़ा ही असते किरिम बिच्चका खोखा येसुस ओर्ते लेका रहचस खने, आसी बारो चेलर अरा आसी गने र'उर हूँ आस ती ई जोक्खा खीरी ही पत नू मेंजर।
- 11 आस आरिन बाचस, “धर्मस आलर ही उज्जना नू राजी नन्ना ही पत नू आलर मुन्द मल बुझुर। ऐन निमा गे अदन अख'आ गे अरा बुझुर'आ गे नन्दन। लिकिन ने तम्है उज्जनन धर्मसिन राजी नना मल चि'अनर आर गे ऐन उर्मी कथन जोक्खा खीरी रूपे लेका ब'अदन।
- 12 औंगे नेम्हा पुथी ता कथा आलर ही उज्जना नू पूरा मनी का, ‘ऐन नन्दन अदिन ऐरदर, लिकिन अत्रु ती एन्द्रा हूँ मल सिख'ओर, ऐन ब'अदन अदिन मेन्दर, लिकिन अदही माने मल बुझुर'ओर, मला होले आर पाप नन्नन अम्बोर ती धर्मस गुसन किरोर अरा धर्मस हूँ आरिन छमा ननोस।”
- 13 फिन आस आरिन बाचस, “नीम ई जोक्खा खीरिन मल बुझुरदर का? होले नीम नन्ना उर्मी जोक्खा खीरी गुट्ठिन एकासे बुझुर'ओर?
- 14 चाँख'उस एन्ने लेक्खा आलस र'अदस एका ओर्तस धर्मसी कथन मेन्त'अदस।
- 15 बिहनी खत्रका डहरे लेक्खा जोक्क आलर हिकनर। आर कथन मेन्नर, लिकिन लेम सैतान बर'अरकी आर ही मेंजका कथन मोधर'आ गे ननी।
- 16 बिहनी खत्रका पखनोरी खेखेल लेक्खा जोक्क आलर हिकनर। आर कथन मेन्नर ती अदिन लेम खुसमारनुम इंझनर,
- 17 लिकिन तम्है जिया नू गड्डी गूटी कथा मल खुपना चड्डे आर जुक्किम उल्ला गे कथन पत'अनर। अरा सस्ती महले कथन पत'अना ही चड्डे आर मइय्याँ सतारना बरना बेड़ा आर कथा ती पत'अनन लेम अम्बनर।



- 18 जोक्क आलर अच्च-खोप्पा नू बिहनी खत्रका खेखेल लेक्खा हिकनर। अन्नु हूँ आर धर्मसी कत्थन मेन्नर,
- 19 लिकिन आर उरुब मना गे अरा बग्गे खुर्जी खक्खा बेद्दनर अरा आर खेखेल ता जिनिस ही लेका फिकिर नन्नर। औंगे इबड़ा जम्मा धर्मसी कत्थन मोधर'आ गे ननी। औंगे धर्मस आरिन एन्देर नन्ना र'ई एन्ने बेद्ददस अदिन आर मल नन्नर।
- 20 लिकिन जोक्क आलर उपजा खेखेल लेक्खा हिकनर। आर धर्मसी कत्थन मेन्नर अरा इङ्गनर ती आर एन्देर नना गे धर्मस बेद्ददस अदिन नन्नर। आर बेस खोप्पा लेक्खा तीस गुना अरा साट गुना अरा सौ गुना खंजपा चि'अनर।”
- 21 येसुस आरिन अउर ओन्टा जोक्खा खीरी तिंगियस, “आलर बिल्लिन लघा ब'अनर ओन्द्रनर ती ढक्की ती मल कुल्लनर महले खटी किइय्या मल उइय्णर, लिकिन बिल्लिन पक्खा नू उइय्णर।
- 22 एन्नेम धर्मसी कत्था ती जोक्क कत्था गुट्ठिन आलर बलनर। लिकिन अक्कुन ई नूरप्रका लेक्खा ई कत्थन आलर अख'आ गे धर्मस बेद्ददस।
- 23 नीम इदन बुझुर'आ बेद्ददर होले एन्देर मेंजकर अदिन चिहूंक लगाय सोच'आ।”
- 24 फिन आस आरिन बाचस, “नीम एंग्हे ती एन्देर मेन्दर अदही पत नू चिहूंक लगय सोच'आ। एन्देरगेका नीम एका बग्गे चिहूंक लगय सोचदर, आ बग्गे बुझुर'आ गे धर्मस निमन संगरा ननोस, अरा इदिन ती बग्गे हूँ बुझुर'आ गे आस निमा गे संगरा ननोस।
- 25 ने एंग्हे सिखाब'अना ही पत नू चिहूंक लगे सोचनर आर गे बग्गे बुझुर'आ गे धर्मस संगरा ननोस, लिकिन ने एंग्हे सिखाब'अना ही पत नू चिहूंक लगे मल सोचनर, आर ही बुझुरका जोक्क कत्था गुट्ठिन हूँ धर्मस मोधरत'ओस चि'ओस।”
- 26 फिन येसुस बाचस, “धर्मसी राजी एन्ने र'ई, ओन्टा आलस तंग्हे टोंका नू बिहनी चाँखस।
- 27 आस उल्ला माखा खन्द्रस, अरा जगचस। आ बारिम बिहनी कुन्दिया ती परदिया, लिकिन आस बुझुर'आ पोल्लस ईद एकासे मंजा।
- 28 खेखेल तान तानिम गछिन परदा अरा दना चि'आ गे नंजा। मुन्द गछी, फिन बईल, अरा फिन बईल नू पंजका दनन चिच्चा।
- 29 दना पंजा खने आस अदन खोस्सस, एन्देरगेका ईद खोयना बेड़ा रहचा।”
- 30 फिन येसुस बाचस, “ऐन निमन तेंगोन नाम धर्मसी राजिन एन्देर गने जोक्ख'ओत। ऐन निमन ई जोक्खा खीरिन तेंगोन।



- 31 आद मनी बिहनी लेक्खा र'ई। आद खेखेल नू चाँख'ऊ उर्मी बिहनी ती सन्नी मनी।
- 32 लिकिन चाँखतार'ई खने, आद उर्मी बटकी खोप्पा गुट्ठी ती कोहाँ परदी, अरा अदही एन्ने कोहाँ डाड़ा मनी, का ओड़ा गुट्ठी अदही ऐख नू बसा अरा खोता गुट्ठी नना उंगी।”
- 33 आस आरिन ई मदहे ही कैनो जोक्खा खीरी तेंगरकी आर ही बुझुर'आ ओंगना लेक्खा सिखाबाचस।
- 34 अरा बिगर जोक्खा खीरी बाचका आस आरिन एन्द्रा हूँ मल तिंगियस। लिकिन आस तंग्हे चेलर गने तामलेका र'ओ बारी आरिन उर्मी जोक्खा खीरिन बुझाबाचस।
- 35 अउलम बीड़ी पुत बारी येसुस तंग्हे चेलारिन बाचस, “बरा, नाम समुदर ही आ पक्खे कट्टोत।”
- 36 ओंगे गोंहड़न अम्बियर ती आर एका डोंगा नू येसुस रहचस अइय्या अरगियर। अरा नन्ना आलर हूँ आर ही गने नन्ना डोंगा गुट्ठी नू केरर।
- 37 खने कोहाँ घटा बरचा, अरा लहरा डोंगा नू बर'आ हेलरा, अरा डोंगा अम्मु ती नीदा हेलरा।
- 38 येसुस डोंगा नू खोखा तरा तक्किया नू कुक्कु नंजस ती खन्द्र'आ लगियस। खने चेलर आसिन एज्जर ती बाचर, “हे गुरु! निंगा इदही फिकिर मल्ला का, नाम मुल्खा खे'आ बेददालगदत?”
- 39 खने येसुस चो'अरकी ताकन केप्पस अरा लहरन बाचस, “मड़'अय कलय! अमय गरजार'अय।” खने ताका मड़चा अरा समुदर छछिन्द मंजा।
- 40 आस तंग्हे चेलारिन बाचस, “नीम एन्देगे एन्ने एलचदर? नीम अक्कुन गूटी हूँ मल पत्त'अदर का ऐन निमन सम्ह'आ ओंगदन?”
- 41 खने आर अउरिम नगदे इलियर ती ताम ताम नू बाचर, “ईस एकासे आलस हिकदस? नाद लेका मला लिकिन ताका अरा लहरा हूँ ईसहीन पेस'ई।”

मरकुस 5

- 1 येसुस अरा आसी चेलर समुदर ही आ पक्खे गेरासेनोस राजी नू अंडसियर।
- 2 तहाँ आर डोंगा ती इत्तियर, खने ओन्टा मलदौ बोलता धरतारका आलस मरघटी ती उरखरकी येसुसिन भेंटार'आ गे बरचस।
- 3 ई आलस सगरघड़ी मसड़ा नूर'आलियस, आसिन एका ओर्तर हूँ सिकड़ी ती हूँ खुट'आ पोल्लर।



- 4एन्देरगेका आस घड़ी घड़ी बिड़ी अरा सिकड़ी ती हेंतारका रहचस। लिकिन आस सिकड़िन खच्चियस, अरा बिड़िन टुटका टुटका नंजका रहचस। नेका हूँ आसिन तम्है आकुस नू नना गे सवंग मल रहचा।
- 5आस उल्ला अरा माखा बारी हूँ आस मसड़ा गुट्ठी अरा परता ही मझी नू र'अरकी चिच्चियार'आलियस, अरा तान तानिम धारे पखना ती मोचर'आलियस।
- 6आस येसुसिन गेच्छा तिम ऐररकी भेंटार'आ गे बोंगस ती आसी मुन्दहारे खेडमूली खतर'अरकी मोंजरा नंजस।
- 7-8खने येसुस आसिन बाचस, “हे मलदौ बोलता, ई आलस ती उरखय बरय।” खने आस चिच्चियारनुम बाचस, “हे येसु! उमीं ती कोहाँ धर्मसी खद्दायो, एंग्हे गने निंगा एन्देर नलख? ऐन धर्मसी नामे ती किरया मोखदन का एंगन दुक्खे अमा चि'आ।”
- 9येसुस आसिन मँजस, “निंग्हे एन्देर नामे?” आस येसुसिन बाचस, “एंग्हे नामे लेगिओन, एन्देरगेका ऐम बग्गे र'अदम।”
- 10अउरिम मलदौ बोलता येसुसिन घड़ी घड़ी गोहरार'आ, का एमन ई सिवान ती गेच्छा अमा तइय्या।
- 11असन हेद्दे परता नू किस्सी ही ओन्टा कोहाँ खरखा मेनालिया।
- 12अबड़ा मलदौ बोलता आसिन गोहरार'आ, “एमन अबड़ा किस्सी नू तइय्या, होले ऐम अबड़ा नू कोर'आ ओंगोम।”
- 13खने येसुस अबड़न काला गे बाचस, अबड़ा मलदौ बोलता बहरी उरखरकी अबड़ा किस्सी नू समसारा। आ किस्सी खरखा नू मलागूटी ऐंड़ हजार किस्सी रहचा। अरा अबड़ा किस्सी दलखा ती किइय्या बोंगा, अरा समुदर नू मुलखिया केच्चा।
- 14किस्सी खापुर बोंगरकी हेद्दे ता पद्दा अरा अइडे-बेडे टोंका ता आलारिन तिंगियर। खने आलर एन्देर मंजकी रहचा अदिन ऐरा गे केरर।
- 15अरा आलर येसुस गुसन बर'अरकी खोंडरर, अरा आ आलासिन ईरियर, ने नाद ती धरतारका रहचस। आस असन किचरी अतरकी तंग्हे सुरता नू उक्का रहचस। खने आर इल्लियर केरर।
- 16नाद धरतारका आलस अरा किस्सी गे एन्देर मंजा, अदन ने ईरका रहचर, आर असन बरचका आलारिन तिंगियर।
- 17खने आर येसुसिन गोहरार'आ हेलरर, “नीन ई सिवान ती किरिमबि'आ।”



- 18 येसुस डोंगा नू अरगियस, खने नाद ती धरतारका रहचस आस येसुसिन गोहरारते र'आलियस, “ऐन हूँ निंगहै गने बर'ओन।”
- 19 लिकिन येसुस आसिन बर'आ गे मल चिच्चस, अरा आसिन बाचस, “नीन निंगहै एड़पा कालरकी निंगहै एड़पातारिन तेंगा, उर्बस निंगहै मड़्य्याँ एका कोहाँ नलख नंजकादस, अरा आस निंगहै मड़्य्याँ ऐ बग्गे सोग्गे ईरकादस।”
- 20 खने आस केरस अरा देकापोली चकभार नू तेंगा हेलेरस, का येसुस तंग्गा गे एका कोहाँ नलख नंजकाचस। अदिन मेनरकी ओर्मर अकबकरर।
- 21 फिन येसुस डोंगा नू अरगियस, अरा समुदर ही आ पक्खे केरस। खने आस गुसन पिंडी नू ओन्टा नगदे कोहाँ गोंहड़ा खोंडरा।
- 22 खनेम याईर नामे ओन्टा गोड़हा एड़पा ता ओन्टा मुद्धस असन बरचस। अरा आस येसुसिन ऐररकी आसी खेडमूली खतरस,
- 23 अरा गोहर'अरकी आसिन बाचस, “सन्नी एंग्दा खे'आ बेद्दाली, नीन बर'अरकी अदही मड़्य्याँ खेक्खा उड़्य्या अरा कोड़े नना, होले आद मल खे'ओ।”
- 24 खने येसुस आसी गने केरस। अरा ओन्टा कोहाँ गोंहड़ा खतरना काना बेसे आसी खोखा केरा।
- 25 असन ओन्टा आली रहचा। आद बारा बछर ती खेंस काना रोगे ती लिंड़िरकीचा।
- 26 आद बग्गे बैधर गुसन कमत'अना ती दुक्खे चोद'अरकी उर्मी खुर्जिन मुंजिया चिच्चा। अन्नु हूँ कोड़े मल मंजा। लिकिन रोगे बग्गे जितरा केरा।
- 27_28 आद येसुसी हलन मंजा ती एन्ने सोच'आलिया, “ऐन आसी किचरिन ऐंवसड़'ओन होले हूँ ऐन कोड़े मनोन।” ओंगे आद गोंहड़ा नू आसी खोखा तरती बर'अरकी आसी किचरिन ऐंवसड़ा।
- 29 खने लेथेम आद ही खेंस काना ठकरा केरा। अरा आद तंगहै मैद नू अक्खा, का आद तंगहै रोगे ती उजगारा।
- 30 येसुस लेम अक्खस का तंगहै सवंग नेकअनिम उजगाचा। खने आस खोखा किररकी गोंहड़न थिथवाँ ईरियस ती मंजस, “एंगहै किचरिन ने ऐंवसड़ा?”
- 31 खने आसी चेलर आसिन बाचर, “ऐरा, गोंहड़ा निंगहै चरियो तरा खतरना बेसे र'ई, अन्नु हूँ नीन ब'अदय, 'एंगन ने ऐंवसड़ा?” “
- 32 लिकिन येसुस ने तंगहै किचरिन ऐंवसड़ा, अदन अख'आ गे चरियो तरा ऐरालियस।



- 33 खने तंगहै नू कोड़े मंजकन अक्खा आ आली इल्चिनुम अरा असरनुम आस गुसन बरचा। अरा आद आसिन तंगहै नंजका उर्मी कत्थन फरीफरी तिंगिया।
- 34 खने आस अदिन बाचस, “खद्दे, नीन एंगन पत्ताचकी का ऐन निंगन उजगा आ ओंगदन, आदिम निंगन उजगाचा, दौ गने किर्रिमबिअय, अरा नीन ई रोगे ती उजगारअय।”
- 35 येसुस इदन कछनख्रआलियस, खनेम गोइहा एइपा ता मुद्धस याईरसी एइपा ती जोक्को आलर बरचर। अरा आर याईरसिन बाचर, “निंगहै खद्द गा केच्चा केरा। अक्कुन गुरुसिन अकबकामबअना ही चाइ मल्ला।”
- 36 आर तिंगियर अदिन येसुस मल मेना भेंसरस, अरा गोइहा एइपा ता मुद्धासिन बाचस, “अमा एल्चा! एंगहै मइय्याँ पतअनन लेका उइय्या।”
- 37 अरा आस पतरस अरा याकोब अरा याकोबसी भइय्योस योहनसिन अम्बर नेकन हूँ तंगहै गने बरआ मल चिच्चस।
- 38 तहाँ आर गोइहा एइपा ता मुद्धासी एइपा नू अंइसियर। खने आस नगदे आलर ही कांवकांव अरा चींखना ओलखनन अरा अउवारनन ईरियस।
- 39 अरा आस उला कालरकी बाचस, “नीम एन्देरगे कांवकांव मन्दर अरा चींखदर?, खद्द मल्ला केचका, आद गा खन्द्रआली।”
- 40 इदन मेनरकी आर आसिन खिल्ली नना हेलरर। लिकिन आस आरिन बहरी ओथ्रस। फिन आस कुक्के ही तंगयो तम्बन अरा तंगहै तिंनियों चेलर गने कुठली नू कुक्के चूतालिया असन केरस।
- 41 तहाँ आस कुक्के ही खेक्खन धरअरकी अदिन अरामी भखा नू बाचस, “ तलिता कूम ” एकदा ही माने “सन्नी कुक्के ऐन निंगन बअदन, चोअय”।
- 42 लेम आ कुक्के चोअरकी कुद्दा नुंगा हेलरा। (आद बारा बछर ही रहचा।) असन रहचर आर ओर्मर नगदे अकबकरर।
- 43 फिन आस आरिन चेताबाचस, का ई कत्था इसन मंजा इदन नेकन हूँ अमके तेंगा, अरा बाचस इदगे मोखा गे एन्दिइम लो चिआ।

मरकुस 6

- 1 येसुस कफरनहूम नगरेन अम्बरकी तंगहै परदका अइडा नू बरचस। अरा आसी चेलर हूँ आसी गने केरर।



- 2 खन्न ऐखना उल्ला नू आस गोइहा एइपा नू सिखाब'आ हेलरस। बग्गे आलर अदन मेंजर ती अनचकरर केरर अरा जोक्को आलर ब'आलियर, “ईस गे एन्ने लूर ही कत्था, अरा एन्ने अकबक नलख नना गे सवंग एसलेक खक्खरा?”
- 3 ईस बढ़ाईस मलदस का?, नाम अखदत का ईस गा मरियम ही तंगदस, अरा ईसी तंगिडबगर याकोब अरा योसेस अरा यूदस अरा सिमोन हिकनर। अरा ईसी बहिनोर हूँ नम्है पद्दा नूर'अनर।” एन्ने बाचर ती आर आसिन एन्ने मईन मल नंजर।
- 4 येसुस आरिन बाचस, “धर्मसी कत्था तिंगुस गे तंगहै नगरे नू अरा तंगहै पाहियर नू अरा तंगहै एइपा नू लेका मईन माल मनी।”
- 5 आस असन बग्गे अकबक नलख मल नंजस। एन्देरगेका नासरेत पद्दा ता आलर मल पत्ताचर का आस मसीस हिकदस। खने आस जोक्को रोगियर मइय्याँ लेका तंगहै खेक्खा उइय्यरकी आरिन कोड़े नंजस।
- 6 आर आसिन मल पत्ताचर इदन आस ऐरकी अकबकरस केरस। अरा येसुस तंगहै चेलर गने पद्दा पद्दा नू कालरकी आलारिन सिखाब'आलियस।
- 7 उन्दुल आस बारो चेलारिन तंगहै गुसन मीखियस, अरा आरिन ऐंड ऐंड ननरकी नन्ना नन्ना पद्दा नू आलारिन सिखाब'आ गे तइय्या हेलरस। अरा आरिन तइय्या ही मुन्द आस आर गे मलदौ बोलतन आलर ती ओथ्र'आ गे आकुस चिच्चस।
- 8-9 आस आरिन पेसस, “नीम डहरे ऐको बारी खरपा गुट्ठी अत्ता अरा सोट्टा लेका हो'आ, अरा एन्द्रा हूँ अमा हो'आ, मंडी हूँ मला, झोला हूँ मला, थइला नू रुपया हूँ मला, अगरहा किचरी हूँ अमा धर'आ। एन्देरगेका निम्है चाइ गे धर्मस मइय्याँ भरसा उइय्या।”
- 10 अरा आस अउरिम आरिन बाचस, “नीम पद्दा नू कालो बारी एका एइपा नू कोर'ओर आ एइपा नू आ पद्दा ती उरखना गूटी ओकोरके।
- 11 नीम एकअम अइडा नू कादर, असला आलर निमन मल परघ'अनर अरा निम्हैन मल मेन्नर होले, नीम असलेक उरखो बारिम निम्है खेइडे ता रीडोन खेतके चि'अके। निम्है कत्थन माल इंझना चइडे धर्मस तरती आर गे खक्खना दंडे ही ईद आर गे निम्है चेताब'अना मनो।”
- 12 खने चेलर नन्ना नन्ना पद्दा कालरकी आलारिन धर्मसी कत्थन मेन्त'आलियर का आर गे जियन किर्त'अना दिम मनो।
- 13 अरा आर बग्गे नादन ओथ्र'आलियर, अरा बग्गे रोगियर गे जैतून इसुंग टूइरकी आरिन कोड़े ननालियर।



- 14 हेरोदेस अंटिपस बेलस येसुसी हलन मेंजस, एन्देरगेका अजम आलर आसी पत नू कछनरब्र'आलियर। जोक्कोर ब'आलियर, “योहन नूडरत'उस केचका ती उज्जा चोदतारकादस, आस इसन किरकादस, आँगेम ईस गे इबड़ा अकबक नलख नना गे धर्मसी सवंग रई।”
- 15 अरा जोक्कोर ब'आलियर, “ईस चिरान ता धर्मसी कत्था तिगू एलियस हवे।” अरा नन्नर ब'आलियर, “ईस पच्चा परिया नू रहचका धर्मसी कत्था तिगुर लेक्खा ओन्टा धर्मसी कत्था तिगुस हिकदस।”
- 16 हेरोदेस अंटिपस बेलस येसुसी पत नू आलर ही ब'अनन मेंजस ती ब'आलियस, “अबड़ा अकबक ही नलख गुट्ठी ननुस योहनस हवे, ऐन योहनसी कुक्कन खंडताचकन, लिकिन आस उज्जा चोचस।”
- 17-18 एन्देरगेका जोक्क उल्ला ही मुन्द हेरोदेस बेलस हेरोदिया आबोन उइयकाचस, एकाद हेरोदेसी भइय्योस फिलिप्पोसी मुक्का रहचा। हेरोदेस फिलिप्पोसी उज्जनुम अदिन उइयस। योहनस हेरोदेसिन घड़ी घड़ी ब'आलियस, “निंगा निंगिइसी मुक्कन उइय्ना धर्मसी नेग ती बिइदो रई।” खने हेरोदिया हेरोदेस ती बिदुदिया का योहनसिन जेहेल नू सजताना रई। ई चड्डे हेरोदेस योहनसिन गुड़'आ गे सैनारिन तइय्का रहचस, अरा आसिन धर'अरकी जेहेल नू सजताचकाचस।
- 19 लिकिन हेरोदिया योहनसिन अउरिम बदला हो'आ गे पिटत'आ बिदुदिया, लिकिन अदही ती एन्ने मना पोल्ला। एन्देरगेका हेरोदेस आसिन जेहेल नू बछाब'अरकी उइयस।
- 20 हेरोदेस इदिन नंजस एन्देरगेका आस योहनसिन इलियस अरा आस अक्खस का योहनस ओन्टा उजगो अरा नेम्हा आलस रहचस। बेलस बल्लालियस का ऐन एन्देर ननोन, लिकिन आसी कत्थन मेना बिदुदियस।
- 21 मुन्दा हेरोदिया गे हेरोदेसी कुन्दुर उल्ला नू योहनसिन पिटा गे ठौका बेड़ा खक्खरा। हेरोदेस तंग्हे कुन्दुर उल्ला मन्ना नू तंग्हे गदिया ता मुध आलर अरा फउद ही मुद्धर अरा गलिलेया जिला ता मुध आलर गे कोहाँ मंडी चिच्चस।
- 22 एकाबारी आर जम्मेर ओनालियर हेरोदिया ही तंग्दा आ कुठली ही उला बरचा ती नलिया। ईद हेरोदेस अरा आसी उर्मी पाहियारिन रिझाबाचा। खने बेलस आ कुकेन बाचस, “नीन एन्द्रिइम नेअय, ऐन निंगा गे अदिन चि'ओन।”
- 23 अरा आस अदही गने किरिया हूँ मोक्खस, “एन्द्रा नेओय अदिनिम चि'ओन, एंग्हे अधा राजिन नेओय होले हूँ अदन ऐन चि'ओन।”



- 24 खने लेम आद आ कुठली ती बहरी कालरकी तंग्योन मेंजा, “ऐन एन्द्रा नेओन?” तंग्यो अदिन बाचा, “योहन नूडरत'उसी कुक्कन ने'अय।”
- 25 लेम आ कुकोय किरिया ती बेलस गुसते एन्ने नेचा, “एंगा गे अक्कुन योहन नूडरत'उसी कुक्कन ओन्टा थरिया नू चि'आ।”
- 26 इदन मेंजस ती बेलस अजम हेन्दो मंजस। लिकिन आस तंग्हे मोक्का किरिया, अरा आसी पाहियर चड्डे आस अदही ने'अनन टाँड'आ पोल्लस।
- 27 खने बेलस लेम ओन्टा जल्लादसिन योहनसी कुक्कन खंडा ओन्द्र'आ गे आनियस ती जेहेल नू तइय्यस। आस जेहेल नू कालरकी योहनसी कुक्कन इडबियस।
- 28 तहाँ आसी कुक्कन ओन्टा थरिया नू ओन्द्रस, अरा अदन आ कुकोय गे चिच्चस, अरा आद तंग्यो गे चिच्चा।
- 29 एन्देर मंजा अदिन योहन नूडरत'उसी चेलर मेंजर ती बरचर, अरा आसी मेंदन हो'अरकी ओन्टा माड़ा नू मंडियर।
- 30 बारा तइरकर येसुस आरिन तइय्काचस असलेक ती आस गुसन किरियर। अरा आर एन्देर एन्देर नलख नंजकाचर अरा सिखाबाचर अबड़ा उर्मिन आसिन तिंगियर।
- 31 असन येसुस गुसन बग्गे आलर काला बर'आलियर। ई चड्डे आर गे मंडी ओना गे हूँ बेड़ा मल खक्खरा। औंगेम आस आरिन आनियस, “एंग्हे गने बरा, नाम एकअम उछिन्द अड्डा नू कालरकी कटिक खन्न ऐर्र'ओत।”
- 32 खने आर ओन्टा डोंगा नू अरगरकी ओन्टा उछिन्द अड्डा केरर।
- 33 लिकिन बग्गे आलर आर ही कानन ईरियर ती आरिन चिन्हचर अरा अक्खर का येसुस अरा आसी चेलर एक्सन कालनर। अरा आर हेद्दे हेद्दे ता उर्मी पद्दा ती खोंडरकी आर ती मुन्द असन बाँग अंडसियर।
- 34 येसुस डोंगा ती इतियस खने पिंडी नू कोहाँ गोंहइन ईरियस। आस गे आर ही मइय्याँ सोग्गे लगिया, एन्देरगेका आर खापुर मलका भेंडो लेक्खा रहचर। खने आस आरिन कैनो गोटंग कत्था ही पत नू सिखाब'आ हेलरस।
- 35 बीड़ीपुत बारी चेलर बरचर ती येसुसिन बाचर, “ईद उछिन्द अड्डा हवे, अरा ईद बीड़ीपुतना बेड़ा हवे।



- 36 औंगे ईरिन तइय्या चि'आ। होले ईर ओनबेइर'आ खूरी अरा पद्दा नू कालरकी तमा ओना मोखा गे इन्द्रिइम खेन्दा औंगोर।”
- 37 लिकिन आस आरिन किर्त'अर बाचस, “मला! नीमिम ईर गे ओना मोखा गे इन्द्रिइम चि'आ।” आर आसिन किर्त'अर बाचर, “इबड़ा ओर्मर गे ओना मोखा गे खेन्दोम होले, ओतोसी ऐंड सौ उल्ला ता भुती ही रुपया ती हूँ माल मनी।”
- 38 लिकिन आस आरिन किर्त'अर बाचस, “कला, निम्है गुसन ऐ बग्गे असमा रई? अदन बेददे ऐरा” आर कालरकी बिददियर खने आसिन बाचर, “एम्है गुसन पांच असमा अरा ऐंड इंजो लेका रई”
- 39 खने येसुस चेलारिन गोंहड़न हरियर लट्टी नू खोंड़हा खोंड़हा ओक्त'आ गे आनियस।
- 40 अन्नेम आर सौ सौ अरा पचास पचास खोंड़हा नू उक्कियर।
- 41 येसुस अबड़ा पांच असमन अरा ऐंड इंजोन होच्चस, अरा मेर्खा तरा ऐररकी आद गे धर्मसिन धन्यवाद नंजस, अरा असमन अरा इंजोन किच्चियस ती अदिन खट्टा गे चेलर गे चिच्चस। चेलर ओर्मर गे अबड़न खट्टियर।
- 42 आर ओर्मर मोखरकी उड़चर केरर।
- 43 अरा चेलर बारा डउड़ा एंगरका टुटका असमन अरा इंजोन खोंड़चर।
- 44 असमा अरा इंजोन मोक्कर ही गन्ती मलागूटी पांच हजार मेत्र अरा आर ही एड़पातर हूँ रहचर।
- 45 लेम येसुस चेलारिन डोंगा नू अरग'अरकी तंगहै ती मुन्द बेतसैदा नगरे काला गे आनियस। येसुस गोंहड़न उडर'अना गूटी असन रहचस।
- 46 आरिन उडराचका खोखा आस परता नू बिन्ती नना गे केरस।
- 47 इकला बीड़ी पुत्तिया खने चेलर ही काना डोंगा समुदर ही मझी नू रहचा अरा येसुस पिंडी नू ओर्ते लेका रहचस।
- 48 आस ईरियस का चेलर गे डोंगन हंकनुम हंकनुम नगदे बैसन मंजा केरा, एन्देगेका ताका आर ही मुन्द तरती धुक'आलिया। खेर चींखना माखा येसुस समुदर नू ऐकरकी आर गुसन केरस। आस आरिन कट्टा बेददालियस खने,
- 49 आर आसिन समुदर नू ऐकनन ऐररकी, आसिन ओन्टा नाद ब'अरकी चिच्चियारर।
- 50 एन्देगेका आर आसिन ऐररकी इल्चियर केरर। लिकिन आस लेम आर ही गने कछनखस, “डिठ नना! ऐन हिकदन, अमा एल्चा।”



- 51 फिन आस डोंगा नू अरगियस ती आर गने उक्कियस। खने ताका मड़चा केरा। अरा आर अजम अकबकरर केरर।
- 52 एन्देरगेका आस असमन किच्चरकी बग्गे आलारिन मोखताचस, अदिन आर ईरियर, अन्नु हूँ आस एवन्दा सवंगिय र'अदस अदिन आर मल बुझर। आर इदिन चिहुंक लगे मल सोच्चर।
- 53 आर अउर हूँ गलिलेया समुदर नू कालरकी गेन्नेसरेत नगरे अंडिसियर, अरा डोंगन घाट नू इजताचर।
- 54 आर डोंगा ती इत्तियर खने, असला आलर लेम येसुसिन चिन्हचर।
- 55 अरा येसुस इसन र'अदस अदिन तेंगा गे आर आ चक ही उर्मी अड्डा नू बोंगर। येसुस एसन एसन रहचस एन्ने आर मेंजर असन असन आर रोगियारिन खटी नू चेड़'अरकी ओन्द्र बरचर।
- 56 आस पद्दा महले नगरे महले खूरी नू एक्सअनिम केरस, आलर रोगियारिन बजार टोंका नू ओन्द्र बरचर। अरा आर आसिन तंगन महले तंगहै किचरी ही अंचरन रोगियारिन ऐसड़'आ चि'आ गे गोहरारर। अरा ऐ बग्गे आलर आसिन महले आसी किचरिन ऐसड़र आर ओर्मर कोड़े मंजर केरर।

मरकुस 7

- 1 उन्दुल येरुसलेम नगरे ती बरचका जोक्को फरिसीर अरा नेग सिखाब'उर येसुस गुसन खोंडरर।
- 2 तहाँ आर येसुसी जोक्को चेलारिन आर ही बिगर नोंदरका खेक्खा ती मंडी ओन्नन ईरियर। एकदा यहूदीर ही चाल मंडी ओन्ना ही मुन्द खेक्खन नोंदरना रहचा।
- 3 (एन्देरगेका फरिसीर अरा उर्मी यहूदीर पूरखर ही तिका नेग लेक्खा, एका गूटी खेक्खन मल नोंदरनर आ गूटी मंडी मल ओन्नर।
- 4 अन्नेम आर बजार ती किर्नर खने हूँ आर तमन बिगर नोडरका मल ओन्नर। लोटा अरा मौनी अरा तांमा ही संजगिन नोडना मंजना, एन्ने कैनो गोटंग चाल र'ई, अबड़ा नू हूँ आर ऐकनर।)
- 5 आ फरिसीर अरा नेग सिखाब'उर येसुसिन मेंजर, “निंगहै चेलर एन्देरगे पूरखर ही चाल नू मल ऐकनर?, अरा खेक्खा बिगर नोंदरका मंडी ओन्नर।”
- 6 येसुस किर्त'अर बाचस, “धर्मस नीम उत्तुरमाडूर ही पत नू धर्मसी कत्था तिगू यसायास ती चिरान नू तिगियस। 'इबड़ा आलर तम्है कत्था ती गा एंगहै मईन नन्नर, लिकिन ईर मानिम नू एंगन मल पेसनर।



- 7 ईर अनभनियाँ नू एंग्हे महबा नन्नर, ईर गा आलर ही कमचका पेसकन धर्मेसी पेसका ब'अरकी सिखाब'अनर'।
- 8 निमन धर्मेस एन्देर पेसस अदन तरकूटी नन्दर, लिकिन आलर ही चालन चिहुंक लगे नन्दर।”
- 9 येसुस आरिन फिन बाचस, “नीम निम्है चालन मन'आ गे एकासे बेस बने धर्मेसी पेसकन तरकूटी नन्दर!
- 10 उदाहरन गे नम्है पूरखस मूसस बाचस, ‘निंग्हे अयो बबन मईन नना, अरा एकअम ओर्तर तम्है अयो बबन मलदौ आनोर होले, आर पिटर'ओर दिम।’
- 11 लिकिन नीम निम्है अयंग बंगन ब'अदर का ऐन निमन सहाड़ा नना पोल्लोन, एन्देरगेका ऐन निमा एन्देर चि'अना रहचा अदन धर्मेस गे दान लेक्खा चि'आ गे किरया मोक्कन।
- 12 एन्ने नीम आसी तंग्यो अरा तम्बासी एन्देर हूँ सहाड़ा नना गे मल चि'अदर।
- 13 ई बेसे नीम निम्है चाल ती धर्मेसी कत्थन तरकूटी नन्दर, एकदन नीम कमचका र'अदर। ईद ओन्टा उदाहरन हवे, एन्ने एन्ने नीम कैनो बग्गे नन्दर।”
- 14 खने येसुस गोंहड़ा आबोन तंग्हे गुसन मीखियस अरा बाचस, “नीम ओर्मर एंग्हे कत्थन मेना ती बुझुर'आ। ऐन ओन्टा जोक्खा खीरी तेंगोन।
- 15 आलारिन बहरी ता एन्द्रिइम लो आसी उला कुर'ई आद आसिन धर्मेसी ऐरना नू मलदौ मल कम'ई, लिकिन आलर ही जिया ती उरखी आदिम आसिन धर्मेसी ऐरना नू मलदौ कम'ई।
- 16 ऐन एन्देर ही पत नू ब'आलदन अदिन नेका बुझुरना र'ई होले आस एंगन चिहुंक लगे मेनके।”
- 17 येसुस गोंहड़ा आबोन अम्बरकी तंग्हे डेरा एड़पा केरस, खने आसी चेलर आस ती ई जोक्खा खीरी ही पत नू मेंजर।
- 18 खने आस आरिन बाचस, “नीम हूँ मल बुझुर'उर हिकदर का? नीम मल ईरकर का?, एन्द्रिइम ओन्ना-मोखना आलासी बई ती कुर'ई आद आसिन धर्मेसी ऐरना नू मलदौ पुल्ली कम'आ।
- 19 एन्देरगेका आद जिया नू मल कुर'ई, लिकिन आद कूल नू कुर'ई अरा पच'अरकी बहरी उरखी काली।” (एन्ने ब'अरकी उर्मी ओन्ना-मोखना आलोन सफा बाचस।)
- 20 अरा आस बाचस, “एकदा आलासी बई महले जिया ती उरखी आद आलासिन धर्मेसी ऐरना नू मलदौ कम'ई।
- 21 एन्देरगेका आलर जिया नू मलदौ सोचनर। ई चड्डे आर पेहरन ही सोतरा नलख नन्नर अरा आर खड़नर, आल पिटनर, नन्ना आली गुसन कानर,



- 22 चिबाखारनर, मलदौ नलख नन्नर, ठगनर, पेहरन ही मलदौ खन्न ऐरनर, पड़गनर, हींङनर, तरगरनर, अरा बैतल नलख नन्नर।
- 23 आलर मलदौ सोच सोचनर ती इबड़ा उर्मी मलदौ नलखन नन्नर, ईद आलारिन धर्मसी ऐरना नू मलदौ कमई।”
- 24 फिन येसुस असलेक ती उरखरकी तुरोस अरा सीदोन जिला नू बरचस। आस ओन्टा एड़पा नू केरस। आसी मने रहचा का ने हूँ आसिन अम्बोर अख'आ, लिकिन आस आलर ती नूखुर'आ पोल्लस।
- 25 ओन्टा आली येसुसी हलन मेनरकी आसी गुसन बरचा, अरा लेम आसी खेडमूली खतरा। अदही सन्नी तंगदन ओन्टा मलदौ बोलता धरचकीचा।
- 26 आद सीरिया जिला ही फिनिकिया नगरे ता युनानी आली रहचा। आद येसुस गुसन तंगदा ती नाद आबोन ओथ्र'आ गे गोहरार'आ।
- 27 यहूदीरिन खद्दर अरा ने यहूदी मलनर आरिन अल्ला बेसे जोक्खरकी येसुस अदिन बाचस, “खद्दर ही ओन्ना-मोखनन अल्ला गे चि'अना दौ मल्ली, मुन्द खद्दारिन ओन्त'अना रई।”
- 28 लिकिन आद आसिन किर्त'अर बाचा, “मानिम दिम उर्बायो, लिकिन अल्ला हूँ गा खद्दर ही ओन्ना-मोखना ही जुट्ठा-अट्ठा खतरकन पिसी मूखी।”
- 29 खने आस अदिन बाचस, “नीन दौ उतारा चिक्की, ओँगे निंगदा ती नाद उरखकी रई, नीन निंग्हे एड़पा कलय।”
- 30 आद तंग्हे एड़पा केरा अरा तंगदन खटी नू बिड़रका ईरिया। अरा आद ती नाद उरखतारा केरा।
- 31 तहाँ येसुस तुरोस चक आबोन अम्बरकी सीदोन केरस। तहाँ आस देकापोली जिला मन्नुम गलिलेया समुदर तरा कालालियस।
- 32 आ बारी जोक्को आलर असन ओन्टा भईरा अरा कोन्दा आलासिन आसी गुसन ओन्द्रर। अरा आर आसिन कोड़े नना गे आसी मइय्याँ तंग्हे खेक्खा उइय्या गे येसुसिन गोहरारर।
- 33 खने आस आसिन गौहड़ा ती भिनगे होच्यस ती तंग्हे अंगलिन आसी खेबदा नू सज्जस, अरा आस तंग्हे अंगली नू लालेन ननरकी आसी ततखन ऐसइस।
- 34 अरा आस मेर्खा तरा ऐररकी नींखचारचस, अरा अरामी भखा नू बाचस, “एप्फता” इदही माने “कोलर'अय कलय”।



35 लेम आसी खेबदा कोल्लरा केरा, अरा आसी ततखा ही हेंरका कोल्लरा, अरा आस फरीफरी ब'आ हेलरस।

36 खने येसुस आरिन आनियस का इदन नेकन हूँ अमके तेंगा। लिकिन आर आस अमके तेंगा ब'अरकी ऐ बग्गे बाचस, आ बग्गेम आर ई कथन मेन्त'आ हेलरर।

37 ने ई कथन मेंजर आर नगदे अकबकरर, अरा ब'आ हेलरर, “आस एन्देर एन्देर नलख नंजस अबड़ा उर्मिन दौ दिम नंजका र'अदस। आस भईरा आलासिन मेना गे हूँ नन्दस, अरा कोन्दा आलासिन कछनर'आ गे हूँ सवंग चि'अदस।”

मरकुस 8

1 अबड़ा उल्ला नू फिन ओन्टा कोहाँ गोंहड़ा येसुसी ओनबेंडर'आ खूँडरकी रहचा। अरा आर ही ओन्द्रका ओन्ना-मोखना मुंज्रा केरा। खने येसुस तंग्हे चेलारिन मेखरकी बाचस,

2 “एंगा ई गोंहड़न सोग्गे लग्गी, एन्देरगेका ईर तीन उल्ला ती एंग्हे गने र'अनर। अक्कुन गा आर ही गुसन ओन्ना-मोखना मुंज्रा।

3 ऐन आरिन कूल कीड़ा ती एड़पा तइय्योन होले, आर डहरे नू पयहा मनोर क'ओर, एन्देरगेका जोक्को आलर गेच्छा ती बरचकानर।”

4 खने आसी चेलर आसिन बाचर, “इबड़ा आलर गे चाड़ पूरती ओन्त'आ गे ओन्ना-मोखनन इसन ई उछिन्द अड्डा नू एकासे बेद्दोम?”

5 खने येसुस आरिन मेंजस, “निम्है गुसन ऐ बग्गे असमा र'ई?” आर बाचर, “सात गोटंग र'ई।”

6 खने आस गोंहड़ा आबोन खेखेल नू ओक्का गे आनियस। अरा आस सात असमन होचस, अरा धर्मसिन धन्यवाद ननरकी अदन किच्चियस। फिन आस गोंहड़ा गे चि'आ गे अबड़न तंग्हे चेलर गुसन चिच्चस। अरा चेलर अदन गोंहड़ा गे खट्टियर।

7 आर गुसन जुक्किम सन्नी इंजो हूँ रहचा। आस धर्मसिन बिन्ती ननरकी अदन गोंहड़ा नू खट्टा गे चेलर गे चिच्चस।

8 आलर मोखरकी उड़चर केरर। अरा चेलर एंगरका कुटका असमन पेत्र ती सात डउड़ा निन्दर।

9 आ गोंहड़ा नू मलागूटी चार हजार आलर रहचर।

10 तहाँ येसुस गोंहड़ा आबोन तइय्यस। फिन आस लेम चेलर गने डोंगा नू अरगियस अरा डलमनूता जिला तरा केरस।



- 11 असन जोक्क फरिसीर येसुस गुसन बर'अरकी कत्था बरता नना हेलरर। अरा आसिन बझाब'आ गे मेर्खा ती इन्द्रिइम अकबक नलख ही चिन्हा नेचर।
- 12 इदन मेनरकी आस तंग्हे बोलता नू नगदे खोदखरनुम बाचस, “एन्देगे ई परिया ता आलर अकबक नलख ही चिन्हा बेद्दनर?, ऐन निमन मानिम ब'अदन, ऐन ई परिया ता आलर गे एन्दे चिन्हा हूँ मल चि'ओन।”
- 13 एन्ने बाचका खोखा येसुस आरिन अम्बरकी डोंगा नू अरगियस ती आ पक्खे काला हेलरस।
- 14 काना नू चेलर ओन्ना-मोखनन हो'आ गे मोधरका रहचर, अरा डोंगा नू आर गुसन ओन्टा लेका असमा रहचा।
- 15 येसुस आरिन चेताबाचस, “ऐरा, नीम फरिसीर अरा हेरोदेर ही बिदगी ही पत्त नू बड़ियर र'अके।”
- 16 आर ताम ताम नू बाचनखर'आ हेलरर, “आस इदन ब'अदस एन्देगेका नम्हे गुसन असमा मल्ला।”
- 17 आर एन्दे ब'आ लगियर अदिन येसुस अक्खस, खने आस बाचस, “निम्हे गुसन असमा मल्ला अदही पत्त नू नीम एन्देगे बाचनखर'आ लगदर? नीम अक्कुन गूटी बलदर अरा मल बुझुरदर का? निमा सिख'आ मल तुक्की का?
- 18 निमा ऐरा गे खन्न र'ई लिकिन मल बुझुरदर। निमा मेना गे खेबदा र'ई लिकिन मल बुझुरदर। एंग्हे नंजका अकबक नलख निमा गे सुरता मल र'ई का?
- 19 एकाबारी ऐन पांच हजार आलर गे पांच गोटंग असमा ती मोखताचकन, खने नीम असमा ही एंगरका टुटकन पेतकर ती एवन्दा डउड़ा निन्दकर?” आर आसिन बाचर, “बारा डउड़ा”
- 20 “अरा एकाबारी चार हजार आलर गे सात गोटंग असमा ती ओन्ताचकन, खने नीम असमा ही एंगरका टुटकन पेतकर ती एवन्दा डउड़ा नू निन्दकर?” आर आसिन बाचर, “सात डउड़ा”
- 21 फिन आस आरिन बाचस, “नीम अक्कुन ऐन एन्दे ब'अदन अदिन बलदर का?”
- 22 तहाँ येसुस अरा आसी चेलर बेतसैदा पद्दा नू बरचर, खने जोक्क आलर ओन्टा अन्धासिन येसुस गुसन ओन्द्रर। अरा आर येसुसिन आ आलासिन कोड़े नना गे ऐसड़'आ गे गोहरारर।
- 23 आस अन्धासी खेक्खन धर'अरकी पद्दा ती बहरी होच्चस। अरा येसुस आसी खन्न नू लालेन नंजस ती आसी मइय्याँ तंग्हे खेक्खन उइय्यस ती मँजस, “नीन अक्कुन इन्द्रिइम ऐरा ओँगदय का?”
- 24 आस मेन ऐररकी आसिन बाचस, “हाँ, ऐन आलारिन ऐरदन, लिकिन फरीफरी मल ईथर'ई, एन्देगेका आलर एंगा गे ऐकना मन्न बेसे ऐथ्रनर।”



- 25 खने येसुस अउरिम आंगहोन आसी खन्न नू खेक्खा उइय्यस, खने आस कोड़े मंज खच्चियस, अरा आस जम्मानिम फरीफरी ऐरा उंगियस।
- 26 “नीन पद्दा नू अमके कोर'आ मुन्द निंग्हे एइपा कला,” अन्ने बाचस ती येसुस आसिन एइपा तइय्यस।
- 27 येसुस अरा आसी चेलर कैसरेया फिलिप्पी नगरे ही ओनबेइर'आ पद्दा नू केरर। कालो बारी डहरे नू आस तंग्हे चेलारिन मेंजस, “आलर एंगन ने ब'अनर?”
- 28 खने आर किर्त'अर बाचर, “जोक्क आलर ब'अनर योहन नूइरत'उस फिन उज्जनुम किरियस, अरा जोक्क आलर ब'अनर धर्मेसी कत्था तिंगुस एलियस, अरा नन्नर ब'अनर चिरान ता धर्मेसी कत्था तिंगुर ती ओर्तोस”
- 29 खने येसुस आरिन मेंजस, “लिकिन नीम एंगन ने ब'अदर?” खने पतरस आसिन किर्त'अर बाचस, “नीन मसी हिकदय।”
- 30 खने आस आरिन चेताबाचस का एंग्हे पत नू इदन नेकन हूँ अमके तेंगा।
- 31 खने येसुस चेलारिन तेंगा हेल्सरस का “चाइ र'ई मनवा खद्दन एंगा गे अजम खिलपत मन्ना मनो, अरा यहूदी सेयान आलर अरा मुध नैगर अरा नेग सिखाब'उर एंगन दुस'ओर अरा पिटोर। लिकिन ऐन तीन उल्ला खोखा उज्जा चोर'ओन।”
- 32 आस चेलारिन ई कत्थन डिठ लगे तिंगियस। खने पतरस आसिन तरकूटी हो'अरकी कइका हेल्सरस।
- 33 लिकिन येसुस तंग्हे चेलर तरा किर्रे ऐरकी पतरसिन हबड़ाचस अरा बाचस, “नीन सैतान लेक्खा ब'आलदय, एंग्हे मुन्दहारे ती गेच्छा मना! नीन धर्मेसी सोचना लेक्खा मल सोचदय, लिकिन आलर ही सोचना लेक्खा सोचदय।”
- 34 फिन आस गोंहड़ा गने चेलारिन हेद्दे मीखियस अरा बाचस, “नीकईम एंग्हे चेला मना बेद्दोस होले, आस गे तान तंग्हे नना बेद्दना लेका अम्बोर नना अरा तंग्हे क्रुस आबोन चेइ'अरकी एंग्हे गने चोंख्रना र'ई।
- 35 नीकईम तंग्हे उज्जनन तंग्गा गे उज्जा बेद्ददस होले आस धर्मेस गने जनमजुग ही उज्जनन एबस'ओस, लिकिन आस एंग्हे चइडे अरा एंग्हे दौ कत्था ही चइडे तंग्हे उज्जनन चि'ओस होले आस धर्मेस गने जनमजुग ही उज्जनन खक्खोस।



36ओन्टा आलस ई खेखेल ता उमी जिनिसन अर्ज'अदस, अरा धर्मस गने जनमजुग ही उज्जनन एबसदस होले, आस गे एन्देर नाफा मनो?

37आलर धर्मस गने जनमजुग ही उज्जनन खक्खा गे ऊजी नू एन्द्रन हूँ चि'आ पोल्लोर।

38पपहर ही ई परिया नू नीकईम एंग्हे क्थन इङ्ग'आ गे अरा 'ऐन येसुसी चेला हिकदन' एन्ने आलर मुन्दहारे तेंगा गे लजर'ओस होले, आसिन ऐन हूँ नेम्हा मेर्खा पैकर गने एम्बासी महबा नू किर्रना बारी 'ईस एंग्हे चेलस हिकदस' एन्ने ब'आ गे लजर'ओन।”

मरकुस 9

1फिन आस चेलारिन इदन हूँ बाचस, “ऐन ओन्टा मुदे क्थन निमन ब'अदन, अक्कुन इसन इज्जका आलर ती जोक्क आलर, धर्मस सवंग ती राजी नन्नन बिगर ईरका मल खे'ओर।”

2छे उल्ला ही खोखा येसुस पतरस अरा याकोब अरा योहनसिन तंग्हे गने ओन्टा मेच्छा परता मइय्याँ होच्चस। असन आर तामलेका रहचर, आ बारी आर ही मुन्दहारे आसी ऐथ्रना बदलारा केरा।

3आसी किचरी नगदे पंडरु बिल्चा हेलरा, अरा एन्ने कोइहे पंडरु मंजा का खेखेल नू एकअम धोबियस हूँ एन्ने कोइहे पंडरु नोड़ा पोल्लोस।

4आर गे चिरान ता ऐंड धर्मसी क्था तिंगुर मूसस अरा एलियस ऐथ्रर। आर दुयो झन येसुस गने कछनख'आ हेलरर।

5एगघड़ी खोखा पतरस येसुसिन बाचस, “अना गुरु! नमा इसन र'अना नगदे बेस रई। खने एमा तीन गोटंग कुम्बा कम'आ गे चि'आ, ओन्टा निंगा, ओन्टा मूसस गे, ओन्टा एलियस गे।”

6एन्देरगेका आर नगदे इल्चियर केरर, पतरस एन्देर ब'अना रई अदिन बल्लालियस।

7खने ओन्टा बदाली आरिन कुल्लिया चिच्चा, अरा बदाली ती धर्म बबस अबड़ा चेलारिन बाचस, “ईस एंग्हे चोन्हा खद्दस, खने ईसहीन मेना।”

8तहाँ अबड़ा चेलर ओनबेंडर'आ ईरियर, आ बारी आचका ईरियर खने असन येसुस लेका रहचस, मूसस अरा एलियस मल रहचर।

9आर परता ती एत्तालियर, आ बारी येसुस आरिन आनियस का, “मनवा खद्दन ऐन केचका ती उज्जा चो'अना गूटी, नीम इसन एन्द्रा ईरकर अदिन नेकन हूँ अमके तेंगा।”

10खने आर ई क्थन सुरता उइय्यर, लिकिन आर ताम घड़ी घड़ी मेंजनखरर, केचका ती उज्जा चो'अना ही माने एन्देर मनी?



- 11 खने आर आसिन मेंजर, “एन्देरेगे नेग सिखाब'उर ब'अनर का मसीसी खेखेल नू बरना ती मुन्द एलियस गे अउरिम बरना रई?”
- 12_13 येसुस आरिन बाचस, “ईद मानिम का एलियस मुन्द बर'ओस ती एंगन परिघ'आ गे आलारिन सपड़'ओस। एलियस बरचकादस, धर्मेसी क्त्था तिंगुर आसी पत नू तिका लेक्खा नम्है मुद्ध आलर आसिन एकासे नना बिद्दियर अन्ने आसिन सताबाचर। लिकिन सोच'आ का मनवा खद्दन एंगा पत नू धर्मेसी क्त्था तिंगुर एन्देरे लिखचर। ऐन नगदे दुक्खे चोद'ओन अरा आलर एंगन दुस'ओर।”
- 14 इकला येसुस अरा आसी तिनियों चेलर आसी नन्ना चेलर गुसन किरिम बिच्चियर, खने आर ईरियर का आर ही ओनबेंडर'आ कोहाँ गोंहड़ा खूँडरकी रई, अरा जोक्को नेग सिखाब'उर आर ही गने आनानखर'आ लगियर।
- 15 येसुसिन उर्मी गोंहड़ा ईरिया खने, अबड़ा आलर नगदे अकबकरर, ओँगे आसी गुसन बोंगर ती मौंजरा नंजर।
- 16 आस अबड़ा चेलारिन मेंजस, “नीम ईर गने एन्देरे आनानखर'आ लगदर?”
- 17 गोंहड़ा ती ओर्तोस बाचस, “अना गुरु! ऐन एंगदासिन निंगहै गुसन ओन्द्रकन का आसिन नीन कोड़े नना ओँगोय। आस मइय्याँ ओन्टा मलदौ बोलता समसार'ई। आद आसिन कछनखर'आ मल चिई।
- 18 आद आसिन इकलअम धर'ई, होले आद असानिम खेखेल नू पखिड़'ई, अरा आस बई ती बोट्टो ओथ्रदस, अरा पल्लन चब्र'अरकी टनटनरदस। ऐन निंगहै चेलारिन ई मलदौ बोलतन ओथ्र'आ गे बाचकन, लिकिन आर ओथ्र'आ गे पोल्लर।”
- 19 खने येसुस अबड़ा आलारिन आनाकिर्त'अर आनियस, “अना मल पत'ऊ आलारो, ऐन इकला गूटी निम्है गने र'ओन?, ऐन ऐ उल्ला गूटी निम्है गने सह'ओन? आ कुक्कोसिन एंगहै गुसन ओन्द्र'आ।”
- 20 खने आर कुक्कोसिन आसी गुसन ओन्द्रर। आ बोलता येसुसिन ईरिया खने, खद्दासिन दरका नंजा अरा आस खेखेल नू खतरस। आस लोट्टरस अरा आसी बई ती बोट्टो उरखा।
- 21 येसुस खद्दासी तम्बासिन मेंजस, “ईस एवन्दा उल्ला ती एन्ने मन्दस?” आस किर्त'अर बाचस, “ओन सन्नी ती एन्ने मन्दस।
- 22 तहाँ आद आसिन पिटा गे घड़ी घड़ी चिच्ची नू महले अम्मु नू हूँ टिड्डा, लिकिन नीन एमा गे इन्द्रिइम नना ओंगदय होले, एम्है मइय्याँ सोग्गे ऐरा अरा सहाड़ा नना।”



- 23 खने येसुस आसिन बाचस, “नीन नना ओंगदय होले’ एन्ने अमा ब’आ, एन्देरगेका एंगन पत’ऊ आलर गे ऐन इन्द्रिइम नना ओंगदन।”
- 24 लेम आ कुक्कोसी तम्बस चिच्चियारनुम बाचस, “ऐन पत’अदन का नीन एंगन सहाड़ा नना ओंगदय, एंगहे पत’अनन अउरिम बड़ियर मना गे सहाड़ा नना।”
- 25 गोंहड़ा ही असन बांग खोंडरनन येसुस ईरियस। खने आस एन्ने बाचस ती मलदौ बोलतन खखवाचस, “अनय कुन्दी अरा बैरी ननू बोलता ऐन निंगन पेसदन, ईसी मइय्याँ ती उरखय बरय, अरा इकला हूँ ईसी मइय्याँ अमके कोर’आ।”
- 26 खने आ बोलता चिच्चियारा अरा कुक्कोसिन नगदे मुरकुटचा अरा आसिन ती उरखा बरचा। अरा आस केचका लेक्खा मंजस केरस। खने असला बग्गे आलर एन्ने बाचर का ईस गा केचस केरस।
- 27 लिकिन येसुस आसिन खेक्खन धर’अरकी चोदस। खने आ कुक्कोस इज्जस केरस।
- 28 फिन येसुस अरा आसी चेलर ताम लेका एड़पा नू रहचर, खने चेलर आसिन मेंजर, “ऐम आ मलदौ बोलतन एन्देरगे ओथ्र’आ पोलकम?”
- 29 येसुस आरिन बाचस, “नीम ई मदहे मलदौ बोलतन बिन्ती [अरा उपास] ती लेका ओथ्र’आ ओंगोर।”
- 30 फिन येसुस अरा आसी चेलर असलेक ती केरर, ती गलिलेया जिला मन्नुम कालियर। आसी मने मल रहचा का आसी ई चक नू र’अनन नेकईम अख’ओर।
- 31 एन्देरगेका ई बेड़ा नू आस तंगहे चेलारिन ओन्टा मुदे कत्थन सिखाब’आलियस। आस आरिन ब’आलियस, “उन्दुल जोक्क आलर मनवा खद्दन एंगन नन्ना आलर ही आकुस नू चि’ओर, अरा आर एंगन पिटोर। लिकिन उल मुन्द नू ऐन केचका ती उज्जा चो’ओन।”
- 32 लिकिन चेलर इबड़ा कत्थन मल बुझर, ती आर ई पत नू आसिन मेना गे हूँ इल्चियर।
- 33 फिन येसुस अरा आसी चेलर कफरनहूम केरर। एकाबारी आर एड़पा नू रहचर, आ बारी आस तंगहे चेलारिन मेंजस, “नीम डहरे नू एका पत नू कछनख्र’आ लिक्कर?”
- 34 लिकिन आर एन्देर हूँ मल बाचर, एन्देरगेका आर डहरे नू ताम ताम कछनख्र’आलियर, “नम्है नू ने उर्मी ती कोहाँ हवे।”



- 35 खने आस ओक्करकी बारा चेलारिन तंगहै गुसन मीखियस अरा आरिन बाचस, “नीकईम धर्मसी ऐरना नू ओर्मर ती कोहाँ मना गे बेददोस होले, आस तंगन ओर्मर ती सन्नी सोचना रई, अरा ओर्मर गे तेतर-सुसर नन्ना रई।”
- 36 फिन आस ओन्टा सन्नी खद्दासिन होअरकी आर ही मझी नू ओक्ताचस। खद्दासिन आस पक्कियस अरा आरिन बाचस,
- 37 “एका ओर्तोस ई बेसे ओन्टा खद्दासिन एंगहै बदली नू इंझदस आस एंगन इंझदस। इदही माने एन्ने हवे, आस एंगन लेका मल इंझदस लिकिन एंगन तइय्का एंगहै बबासिन हूँ इंझदस।”
- 38 खने योहनस येसुसिन बाचस, “अना गुरु! ऐम ओन्टा आलासिन नीन आस गे आकुस चिचकय ब'अरकी नाद ओथ्रनन ईरकम, अरा ऐम आसिन छेकचकम, एन्देरगेका आस चेलर एमा नू ती मल रहचस।”
- 39 येसुस आरिन बाचस, “नीम आसिन अमा छेक'आ, एन्देरगेका एका ओर्तोस ऐन आस गे आकुस चिचकन ब'अरकी अकबक नलख नन्दस, आस एंगन लेम मलदौ मल ब'ओस।
- 40 एका ओर्तोस नम्है बिड़दो मलकस आस नम्है सहाड़ा ननुस हिकदस।
- 41 इदिन हूँ मेना का नेकईम निमा गे ओन मौनी अम्मु लेका ओन्त'अदस, एन्देरगेका नीम ऐन मसीसी आलर हिकदर, होले आस मानिम धर्मस ती इनाम खखोस।”
- 42 लिकिन येसुस आरिन एन्ने हूँ बाचस “एका ओर्तोस एंगन पत'अदस, आस ई सन्नी खद्दस लेक्खा मान मलका आलस होले हूँ, आसिन एंगहै ती नीन कगर'अदय होले, निंगहै खेसेर नू ओन्टा कोहाँ पखनन हें'अरकी निंगन समुदर नू हेबड़ना, धर्मसी चि'अना दंडे ती जुक्की रई।
- 43 औंगे निंगहै ओन्टा खेक्खा निंगन एंगहै ती कगरारना ही चड्डे मनी होले, अदिन सम्ड़ह'आ। एंगहै ती कगरारना ती सम्ड़ह'आ गे आ खेक्खन खंडना मनो होले हूँ अदिन खंडा चि'आ। एंगहै ती कगरारना चड्डे ऐंड़ खेक्खा ही र'अनुम नरक नू मल तेभरना चिच्ची नू हेबड़ना ती, एंगहै ती बिगर कगरारका ठुठा मनरकी धर्मस गने जनमजुग ही उज्जना नू कोरना निंगा दौ रई।
- 44 [नरक नू आर जनमजुग गूटी दुक्खे सारनर, अरा असन चिच्ची हूँ जनमजुग गूटी लघर'आली।]
- 45 अरा निंगहै ओन्टा खेड्डे निंगन एंगहै ती कगरारना ही चड्डे मनी होले, अदिन सम्ड़ह'आ। एंगहै ती कगरारना ती सम्ड़ह'आ गे आ खेड्डेन खंडना मनो होले हूँ अदिन खंडा चि'आ। एंगहै ती कगरारना चड्डे ऐंड़ खेड्डे ही र'अनुम नरक नू हेबड़ना ती, एंगहै ती बिगर कगरारका ती लेंगड़ा मनरकी धर्मस गने जनमजुग ही उज्जना नू कोरना निंगा दौ रई।



- 46[नरक नू आर जनमजुग गूटी दुक्खे सारनर, अरा असन चिच्ची हूँ जनमजुग गूटी लघर'आली।]
- 47अरा निंग्हे ओन्टा खन्न निंगन एंग्हे ती कगरारना ही चड्डे मनी होले, अदिन सम्झह'आ। एंग्हे ती कगरारना ती सम्झह'आ गे आ खन्नन टोटरना ओथ्रना मनो होले हूँ अदिन टोटर'आ ओथ्र'आ। एंग्हे ती कगरारना चड्डे ऐंङ्ग खन्न र'अनुम नरक नू हेबड्ना ती, एंग्हे ती बिगर कगरारका ती कना मनरकी धर्मस गने जनमजुग ही उज्जना नू कोरना निंगा दौ र'ई।
- 48नरक नू आर जनमजुग गूटी दुक्खे सारनर, अरा असन चिच्ची हूँ जनमजुग गूटी लघर'आली।
- 49ने एंगन पत'ओर अबड़ा ओर्मर गे दुक्खे सारना मनो। अरा चिच्ची आलो गुट्ठिन सुध ननी, अन्नेम निम्है दुक्खे हूँ र'ई। आलर तम्है दाँडेन सुध नना गे बेकन सजनर, अन्नेम ईद हूँ र'ई।
- 50बेक डउल हिके। लिकिन बेक ही तीनना मेटर'ओ कालो होले, अदही तीनना एकासे कमर'ओ? निम्है पत'अना आ बेक लेक्खा र'ई, आँगो निम्है पत'अना नू जिटजिट ने र'आ। अरा नीम ओरोत इरिब नू मेसेर'अरकी उज्जा।”

मरकुस 10

- 1फिन येसुस कफरनहूम नगरे आबोन अम्बरकी यूदेया जिला अरा यरदन खाड़ ही आ पक्खे केरस। गौहड़ा आस गुसन फिन खोंडरा। अरा आस तंग्हे रोज ता लेक्खा आरिन सिखाब'आ हेलरस।
- 2तहाँ जोक्को फरिसीर आस गुसन आसिन बड़ाब'अना चिहूट ती बरचर ती मेंजर, “ओन्टा आलस गे तंग्हे आलिन अम्बरनखरना यहूदी धरम ही नेग लेक्खा मानिम र'ई का?”
- 3खने येसुस आरिन किर्त'अर बाचस, “मूसस निमा गे अम्बरनखरना ही पत नू एन्देर पैसका चिच्चस?”
- 4आर बाचर, “ओन्टा आलस अम्बरनखरना ही पत नू लिखचका चिठी चि'अरकी तंग्हे आलिन अम्बा गे मूसस पैसका चिच्चकादस।”
- 5लिकिन येसुस आरिन बाचस, “निम्है बेड़हा जिया चड्डे मूसस निमा गे ई नेग आबोन लिख'अरकी चिच्चस।
- 6लिकिन इकला धर्मस उर्मी जिनिसन खेखेल नू गढ़चस, अउला धर्मस आरिन आलस अरा आली ननरकी कमचस।
- 7ई चड्डे आलस तंग्यो तम्बन अम्बरकी तंग्हे आली गने र'ओस।



- 8 आर इरबरदिम ओन्टा आल लेक्खा मनोर। ओँगे अक्कु आर धर्मसी ऐरना नू ऐंड मला ओन्टा आल हिकनर।
- 9 ओँगे नेकन धर्मस जोड़चस आरिन ने हूँ अम्बोर छिंडा।”
- 10 खोखा आर एड़पा नू र'अना बेड़ा नू चेलर येसुसिन ई पत नू मेंजर।
- 11 खने आस बाचस, “एका ओर्तस तंग्हे आलिन अम्बरनखरना ननरकी नन्ना आलिन सगई मनोस होले, आस अदही बिड़दो नू नन्ना आली गुसन काना ही पाप नन्दस।
- 12 अरा ओन्टा आली तंग्हे आलासिन अम्बरनखरना ननरकी नन्ना आलासिन सगई मनी होले, आद नन्ना आलस गुसन काना ही पाप ननी।”
- 13 उन्दुल जोक्क आलर खद्दारिन येसुस गुसन ओन्द्रर का आस खद्दर ही मइय्याँ तंग्हे खेक्खा उइय्यरकी आसीस ननोस। लिकिन चेलर येसुसिन अम्बोर थोकबोकामब'आ ब'अरकी आरिन केप्पर।
- 14 लिकिन येसुस इदन ऐरकी चेलर मइय्याँ गोसा मंजस। अरा आरिन बाचस, “खद्दारिन एंग्हे गुसन बर'आ चि'आ, आरिन अमा छेक'आ, एन्देरगेका ने इबड़ा खद्दर लेक्खा तमन किइय्या ननोर आरिन धर्मस राजी ननोस।
- 15 ऐन निमन ओन्टा मानिम कत्था ब'अदन, एकासे खद्दर अयंग बंगर गे सोंपरनर अन्नेम एका ओर्तर धर्मस गे सोंपरनर आरिन दिम धर्मस राजी ननोस।”
- 16 फिन आस आरिन खिवचियस, अरा आर ही मइय्याँ खेक्खा उइय्यरकी आरिन आसीस नंजस।
- 17 एकाबारी येसुस अरा आसी चेलर इहरे ऐका गे सपड़ार'आलियर, खने ओन्टा आलस बुंगनुम आसी गुसन बरचस, अरा आसी मुन्दहारे खेडमूली खतर'अरकी मेंजस, “अना गुरु, नीन दौ आलय हिकदय, एंगा धर्मस गने जनमजुग ही उज्जना खक्खा गे एन्देर नन्ना मनो?”
- 18 खने येसुस आसिन बाचस, “नीन एंगन बेस एन्देरगे ब'अदय?, धर्मसिन अम्बरकी ने हूँ बेस मलकर।
- 19 आलारिन अमके पिटा, नन्ना आली गुसन अमके काला, अमके खड़'आ, बेगर नू अमके ब'आ, अमके ठक'आ, निंग्हे अयंग बंगन मईन नना, धर्मसी इबड़ा पेसकन नीन अखदय।”
- 20 खने आ आलस आसिन बाचस, “अना गुरु, इबड़ा उर्मी पेसकन गा ऐन खद्द परिया ती मन'आ लगदन।”



- 21 येसुस आसिन नगदे चोन्हा नंजस अरा आसिन ऐररकी बाचस, “नीन अक्कुन गूटी ओन्टा कत्थन मल नंजकादय, कला, नीन निंग्हे उर्मी खुर्जिन बीसरकी कीडर गे खट्टा चिआ। फिन बरा अरा एंग्हे गने चोऱ्खआ। होले निंगा मेर्खा नू इनाम खक्खओ।”
- 22 इदन मेनरकी आस दुक्खे मंजस, अरा आस हेन्दवारस ती किरिम बिच्चियस, एन्देरगेका आस नगदे उरुब रहचस।
- 23 येसुस चरियो तरा आलारिन ऐररकी तंग्हे चेलारिन बाचस, “ने नगदे खुर्जी उइय्दस, आसिन धर्मेस गे राजी नना अजम ससइत मनो।”
- 24 आसी ई कत्था ती चेलर कौवारर केरर। लिकिन येसुस फिन आरिन बाचस, “अना खद्दारो, ने तंग्हे खुर्जी मइय्याँ भरसा उइय्दस आसिन धर्मेस गे राजी नना अजम ससइत मनो।
- 25 एका ओर्तस तंग्हे खुर्जी मइय्याँ भरसा उइय्दस आसिन धर्मेस राजी नन्ना ती ओन्टा ऊंट सुजी ही भोंका नू तुरदना सेब्बा रई।”
- 26 इदन मेनरकी चेलर नगदे कौवारर अरा ताम तमानिम बाचर, “होले ने बछर'आ ओंगोर।”
- 27 येसुस आरिन ऐररकी बाचस, “आलर ती गा ईद मना पुल्ली, लिकिन धर्मेस ती ईद मनो दिम। एन्देरगेका धर्मेस उर्मिन दिम नना ओंग्दस। ओंगे जोक्को आलर बछर'ओर।”
- 28 खने पतरस आसिन ब'आ हेलरस, “ऐरा, ऐम निंग्हे चेला मन्ना चड्डे उर्मिन दिम अम्बकम। ओंगे एमा एन्द्रा खक्खओ।”
- 29 तहाँ येसुस आरिन बाचस, “ऐन निमन मानिम ब'अदन, ने हूँ एंग्हे चेला मन्ना चड्डे अरा दौ कत्था मेन्त'अना चड्डे तंग्हे एडपा पली महले भइय्योर महले बहिनोर महले अयंग महले बंग महले खद्द-खर्रा महले खल्लन अम्बका र'अदस होले,
- 30 आस अक्कु ई खेखेल नू कैयो गुना बग्गे एडपा पली अरा भइय्योर अरा बहिनोर अरा अयंग अरा बंग अरा खद्द-खर्रा अरा खल्लन खक्खोस। इबड़ा गने गने नन्नर सतारना हूँ ननोर। अरा आस बरना खेखेल नू धर्मेस गने जनमजुग ही उज्जनन खक्खोस।
- 31 अजम आलर ने अक्कु कोहाँ पद नू र'अनर, आर बरना उल्ला नू उर्मी ती किइय्या पद मनोर कालोर। अरा अजम आलर ने अक्कु उर्मी ती किइय्या पद नू र'अनर, आर बरना उल्ला नू कोहाँ पद मनोर कालोर।”



- 32 येसुस अरा चेलर अक्कु येरुसलेम काला लगियर। खने येसुस आरिन कइहाब'आ लगियस। अबड़ा बारोर बयारर केरर, अरा आसी खोखा ईकुर इल्चियर केरर। आस बारोरिन खाँडियस होचस ती ब'आ हेलरस, एका कत्था आस मइय्याँ मन्ना रहचा।
- 33 “ऐरा, नाम येरुसलेम कालालदत। मनवा खद्दन ऐन असन मुध नैगर अरा नेग सिखाब'उर ती हेंर'ओन। अरा आर एंगन बदी ननोर अरा एंगन पिटा बेद्दोर अरा ने यहूदी मलनर आर ही खेक्खा नू चि'ओर।
- 34 अबड़ा आलर एंगन भेसड़'ओर अरा एंगहै मइय्याँ तुप्पोर। एंगन कोर्ला ल'ओर अरा एंगन पिटोर। लिकिन ऐन उल मुन्द नू केचका ती उज्जा चो'ओन।”
- 35 खोखा नू जेबदयुसी तंग्दाबगर याकोब अरा योहनस आसी गुसन बर'अरकी बाचर, “अना गुरु! एम्है मने रई का ऐम निंगहै गुसते ने'अदम, अदिन नीन एमा गे नना।”
- 36 आस आरिन मैजस, “ऐन निमा गे एन्देर नना गे निम्है मने रई?”
- 37 खने आर आसिन बाचर, “इकला नीन बेलय मनोय ती नन्नारिन राजी नन्ना बेड़ा नू ऐम हूँ निंगहै तीना अरा डेब्बा ओक्करकी निंगहै गने राजी नना गे बेद्ददम।”
- 38 खने येसुस आरिन बाचस, “नीम एन्दन ने'अदर अदही माने बलदर। ऐन एका रकम सस्ती सह'ऊ र'अदन, अन्ने सस्ती नीम सह'आ ओंगोर का? अरा एका रकम ऐन खि'ऊ र'अदन, अन्ने खे'आ नीम ओंगोर का?”
- 39 आर आसिन बाचर, “ऐम ओंगोम।” खने येसुस आरिन बाचस, “हाँ ऐन अखदन का ऐन एका रकम सस्ती सह'ऊ र'अदन अन्ने सस्ती नीम सह'आ ओंगदर, अरा एका रकम ऐन खिऊ र'अदन अन्ने खे'आ नीम ओंगदर।
- 40 लिकिन ने एंगहै तीना अरा डेब्बा ओक्करकी एंगहै गने राजी ननोर, अदही फैसला धर्मस गे नन्ना रई। आस अदन फैसला नंज खच्चिकादस।”
- 41 याकोब अरा योहनसी ई ने'अनन दसों चेलर मेनरकी आर मइय्याँ गोसा मना हेलरर।
- 42 खने येसुस उर्मी चेलारिन हेद्दे मीखियस अरा बाचस, “नीम अखदर का ई खेखेल नू राजीखापुर आलर मइय्याँ आकुस ऐदनर ती आरिन राजी नन्नर, अरा आर ही मुद्धर आरिन चीपनर।
- 43 लिकिन निमा अन्ने मल नन्ना रई, नीकईम निम्है मझी नू कोहाँ मना बेद्ददस होले, आस नन्नर गे तेतर-सुसर ननुस मन्ना रई।



- 44 अरा नीकईम निम्है मझी नू मुद्धस मना बेद्दस, आस नन्नर गे बिट्ठी ननू जोंखस लेक्खा तेतर-सुसर नन्ना रई।
- 45 एन्देरगेका मनवा खद्दन ऐन हूँ आलारिन तेतर-सुसर नन्त'आ गे मला आलर गे तेतर-सुसर नना गे, अरा आलारिन तम्है पाप ही दंडे ती नाड़ा गे दाँड़े लेक्खा एंग्हे मने ती खे'आ गे खेखेल नू बरचकन।”
- 46 एक घड़ी खोखा येसुस अरा आसी चेलर येरिहो नगरे नू बरचर। अरा आर येरिहो नगरे ती उरखो बारी ओन्टा कोहाँ गोंहड़ा आर ही खोखा बर'आलिया। आ बारी बरतिमयोस नामे ओन्टा अन्धहा तिम्बुस डहरे ही कूटी नू उक्काचस। आस तिमयोसी खद्दस रहचस।
- 47 इकला आस मेंजस का नासरेत ता येसुस कट्टदस, खने आस चिच्चियारनुम ब'आ हेलरस, “अना येसु! दाऊदसी खद्दायो! एंगन सोग्गे ऐरा।”
- 48 नगदे आलर आसिन केप्पर, “कलेकसे र'आ।” लिकिन आस अउरिम चिच्चियार'आ हेलरस, “अना दाऊदसी खद्दायो! एंगन सोग्गे ऐरा।”
- 49 येसुस इदिन मेंजस, खने आस असन इज'अरकी बाचस, “आसिन मेखा।” आलर आ अन्धहासिन मेखरकी बाचर, “डिढ नना! चो'आ! आस निंगन मेखदस।”
- 50 खने आस मइय्याँ अतका किचरिन हेबड्की उदकारस अरा येसुस गुसन बरचस।
- 51 खने येसुस आसिन बाचस, “नीन एन्देर बेद्ददय का निंगा गे ऐन ननोन?” अन्धहास आसिन बाचस, “अना गुरु! ऐन ऐरा बेद्ददन।”
- 52 तहाँ येसुस बाचस, “कला, नीन एंगन पत्ताचकय खने ऐन निंगन कोड़े नन्दन।” आ आलस लेम ऐरा उंगियस, अरा डहरे नू आसी गने केरस।

मरकुस 11

- 1 येसुस अरा आसी चेलर येरुसलेम हेद्दे बर'आलियर। खने आर बेतफगे अरा बेतानिया पद्दा नू बरचर। इबड़ा पद्दा जैतून मन्न परता ही ढेंरंगा नू रई। येसुस तंग्हे चेलर ती ऐनोटा चेलारिन तइय्यस
- 2 अरा आरिन बाचस, “मुन्दहारे ता पद्दा नू कला, अइय्या कोरना गनेम ओन्टा गदही ही खद्दो खुटुरका खक्ख'ओ, अइय्या ने हूँ मल्ला अरगका, अदिन बिछर'आ ती एंग्हे गुसन ओन्द्र'आ।
- 3 नीम एन्देर ननालदर? एन्ने नीकईम निमन मेनोर होले, नीम ब'अके, एम्है उर्बस गे इदही चाड़ रई, अरा आस इदिन लेथेम किर्त'ओस चि'ओस।”



- 4 खने अबड़ा दुयो चेलर केरर, अरा गदही खद्दोन बहरी बली गुसन बखड़े नू खुटुरका खक्खियर, अरा अदिन बिछरर।
- 5 असन ने ने इज्जका रहचर आर आरिन मेंजर, “नीम एन्देरगे गदही खद्दोन बिछर आलदर?”
- 6 अबड़ा चेलर आरिन येसुस एन्देर बाआ गे आनकाचस अन्नेम बाचर। खने अबड़ा आलर आरिन गदही खद्दोन होआ गे चिच्चर।
- 7 अबड़ा चेलर गदही खद्दोन येसुस गुसन ओन्दर, अरा अदही मइय्याँ तंगहै मइय्याँ अतना ही किचरिन नंजर, अरा येसुस अइय्या उक्कियस।
- 8 खने नगदे आलर तम्है किचरिन इहरे नू अट्टियर, अरा नन्नर खल्ल गोड्डा ता इहुइन खंडरकी इहरे नू बीडचर। एन्ने आसिन मईन नंजर।
- 9 आसी मुन्द ईकुर अरा खोखा ईकुर चिच्चियारनुम बाचर, “धर्मसी महबा मनन! धर्मस ईसिन बरकत नन्दस ने उर्बासी आकुस गने बरदस।
- 10 धर्मस निंगन बरकत नन्दस नेकअन, ने पूरखा दाऊद बेलस बेसे राजी ननोस। उर्मी ती मइय्याँ मेर्खा नू रऊ धर्मसी महबा मनन।”
- 11 एन्नेम येसुस येरुसलेम नगरे अंडसियस अरा धर्मसी मन्दिर चाली नू कोरचस, अरा चरियो तरा उर्मी आलोन ईरियस। बीड़ी पुतालिया खने आस तंगहै बारा चेलर गने बेतानिया किरिम बिचियस।
- 12 दोसर उल्ला येसुस अरा आसी चेलर बेतानिया ती उरखर। आ बारी आस गे कीड़ा लग्गिया।
- 13 आस गेच्छा ती ओन्टा झपूरा अंजीर मन्नन ऐरकी हेददे केरस का अइय्या ती खंजपा इन्द्रिम खक्खोस। लिकिन आस अतखन अम्बरकी एन्दन हूँ मल खक्खियस, एन्देरगेका ईद अंजीर ही खंजना ही बेड़ा मल रहचा।
- 14 खने आस आ मन्नन बाचस, “नीन इकला हूँ मल खंजओय। खने अक्कु ती निंगहै खंजपन ने हूँ मल मोखोर।” आसी ई बाअनन चेलर हूँ मेंजर।
- 15 येसुस अरा आसी चेलर येरुसलेम किरियर ती आस धर्मसी मन्दिर चाली नू कोरचस। असन आलर दाँडे नन्ना ही मेक्खोन खेंदा पिटालियर। खने येसुस आरिन अइय्या ती बहरी ओथ्रआ हेलरस। अरा रोम राजी ता ढिबन धर्मसी मन्दिर ही ढिबा नू बदलुर ही कंडोन, अरा पेरवाँ बीसुर ही मचियन हूँ बिइदाचस चिच्चस।



- 16 अरा इन्द्रिइम जिनिसन बीसा गे हो अरकी धर्मसी मन्दिर चाली नू काला बर आ गे नेकन हूँ मल चिच्चस।
- 17 तहाँ आस अबड़ा आलारिन सिखाबाचस, अरा बाचस, “नेम्हा पुथी नू ईद एन्ने लिखकी रई का, ‘एंग्हे मने रई का एंग्हे एड़पन उर्मी जातियर एंगन ओहमा नन्ना अरा बिन्ती नन्ना ही एड़पा बओर।’ लिकिन नीम इदिन डाकुर ही अड़डा कमचका चिच्कादर।”
- 18 येसुस एन्देर नंजस अदिन मुध नैगर अरा नेग सिखाब उर मँजर। खने आर आसिन पिटा गे बेड़ा बेद्दते रआलियर। आर गा आसिन एल्चालियर, इदगेका गोंहड़ा आसी सिखाब अना ती अकबकरा केरा।
- 19 बीड़ी पुतना गनेम येसुस अरा आसी चेलर नगरे ती बहरी किरिम बिच्चियर।
- 20 दोसर उल्ला पैरी बारी आर किरालियर, खने आर आ अंजीर मन्नन पादा गूटी खैका ईरियर एकदन येसुस सर्पाचका रहचस।
- 21 पतरस सुरताचस का येसुस मुन्द उल्ला ई मन्नन एन्देर बाचका रहचस। अरा आस येसुसिन बाचस, “अना गुरु! ऐरा, ई अंजीर मन्नन, एकदन नीन सर्पाचकय, आद खैकी किरकी रई।”
- 22 खने येसुस चेलारिन आनाकिर्त अर बाचस, “धर्मस मइय्याँ पत्त आ का आस एन्देर नना गे नीम ने अदर अदिन निमा ननोस।
- 23 ऐन निमन ओन्टा मुदे कत्था बअदन, एकअम ओतोस ई परतन ‘नीन चडर अय कलय अरा समुदर नू खतर अय कलय’ बअरकी तंग्हे जिया नू धुकुर पुकुर मल ननरकी ऐन एन्देर बअदन आद मनो अन्ने पत्त ओस होले, धर्मस आस गे अदन ननोस।
- 24 ओंगेम ऐन निमन बअदन का नीम निम्है बिन्ती नू इन्द्रिइम ने ओर होले, अदिन पत्त आ का ऐम खक्खोम। होले धर्मस अदन निमा गे ननोस।
- 25 इकलअम नीम बिन्ती नन्दर होले, निम्है जिया नू नेखअम बिड़दो नू आर ही इन्द्रिइम अक्का-बलका रई होले आसिन छमा नना, होले निम्है मेर्खा ता बंगस हूँ अन्नेम निम्है अक्का-बलकन छमा ननोस।
- 26 [लिकिन नीम नन्नारिन छमा मल ननोर होले निम्है मेर्खा ता बंगस हूँ निम्है अक्का-बलकन छमा मल ननोस।”]
- 27 फिन येसुस अरा आसी चेलर येरुसलेम मन्दिर नू बरचर। येसुस धर्मसी मन्दिर ही चाली नू कुद्दा नुंगालियस, खने मुध नैगर अरा नेग सिखाब उर अरा सेयान आलर आसी गुसन बरचर।



- 28 आर आसिन मेंजर, “नीन इबड़ा नलखन नेखा आकुस ती ननालदय?, अरा निंगा इबड़न नना ही आकुस ने चिच्चा?”
- 29 येसुस आरिन बाचस, “ऐन हूँ निमन ओन्टा कत्था मेन्दन। अदिन किर्त'अर तेंगोर होले, ऐन हूँ निमन तेंगोन का ऐन इबड़ा नलखन नेखा आकुस ती ननालदन।
- 30 योहनस गे नोडरत'अना ही आकुस धर्मस चिच्चस का आलर चिच्चर? अदिन एंगन तेंगा।”
- 31 आर ई पत नू ताम तामिम कछनखर। आर बाचर, “नाम धर्मस आकुस चिच्चस अन्नेम ब'ओत होले, आस ब'ओस अन्नु हूँ नीम एन्देगे योहनसिन मल पताचकर।
- 32 अरा आलर आकुस चिच्चर अन्नेम ब'ओत होले, आलर ती इलचका रई। एन्देगेका ओर्मर पताचर का मानिम योहनस धर्मस ती बरचका ओन्टा धर्मसी कत्था तिगुस रहचस।”
- 33 खने आर येसुसिन किर्त'अर बाचर, “ऐम बलदम।” खने येसुस आरिन बाचस, “नीम एंगन मल तिकर औंगे ऐन हूँ निमन मल तेंगोन इबड़ा नलखन नेखा आकुस ती नन्दन।”

मरकुस 12

- 1 येसुस एन्ने यहूदी मुद्धर गने कछनखरस ती आस ई जोक्खा खीरिन तिगियस। “ओन्टा आलस रहचस। आस ओन्टा अंगुर ही बटकी कमचस, अरा चरियो तरा पगड़ हड़चस, अरा अंगुर ती रासी ओथ्र'आ गे चचड़ी नू कुंडा कमचस, अरा खापा गे मचा कमचस, अरा अदिन उर्बर गे ठिका चिच्चस, फिन तान ओन्टा नन्ना राजी केरस।
- 2 फिन आस पानना ही बेड़ा नू ठिका होच्चका उर्बर गुसन हिसा ओन्द्र'आ गे ओन्टा जोंखासिन तइय्यस।
- 3 लिकिन आर आसिन धर'अरकी लौचर, अरा आसिन नीदी खेक्खा तइय्यर।
- 4 फिन आस अउरिम ओन्टा जोंखासिन आर ही गुसन तइय्यस। खने आर आसी कुक्कु नू लौचर, अरा आसिन लज्जे मौखताचर।
- 5 फिन आस अउरिम ओन्टा जोंखासिन तइय्यस, खने आर आसिन पिटियर। आस अउरिम बग्गेरिन तइय्यस। अइय्या ती आर जोक्कोरिन लौचर अरा जोक्कोरिन पिटियर।
- 6 अक्कु तइय्या गे आस गुसन आसी चोन्हा खद्दस लेका रहचस। ‘एंगहै खद्दासिन आर मईन ननोर’ सोच्चस ती छेद्दे नू तंगहै खद्दासिन तइय्यस।
- 7 आसी खद्दस बरचस खने, अबड़ा ठिका होच्चका उर्बर ताम ताम नू बाचनखरर, ‘ईसिम गा पुंजी हिकदस, बरा नाम ईसिन पिटोत होले ईसी ई बटकी नम्है मनो कालो।’



- 8अन्नेम आर आसिन धरचर अरा पिटियर ती आसी केचका मेदन बटकी ती बहरी हिबड़ियर चिच्चर।”
- 9फिन येसुस बाचस, “ऐन निमन तेंगोन, बटकी उर्बस एन्देर ननोस? आस अबड़ा ठिका होच्चका उर्बारिन पिटोस अरा बटकी ही ठिका नन्ना उर्बर गे चि'ओस।
- 10नीम नेम्हा पुथी नू मल्ला पढ़चका का? ‘एका पखनन राजमिस्त्रीर तरकूटी ताड़चका रहचर, आ पखना दिम गोटा एड़पन बड़ियर ननू पखना मंजा केरा।
- 11उर्बस इदन नंजस, अरा नम्है ऐरना नू ईद अकबक र'ई।”
- 12येसुसी एन्ने ब'अनन यहूदी मुद्धर मेंजर ती येसुसिन धर'आ बिद्धियर, एन्देरगेका आर बुझुर खच्चिका रहचर का येसुस आर ही बिड़दो नू ई जोक्खा खीरिन बाचकाचस। लिकिन आर आलारिन इलियर ती येसुसिन अम्बरकी किरिम बिच्चियर।
- 13फिन यहूदी मुद्धर येसुसिन कत्था नू बझाब'आ गे जोक्को फरिसीर अरा हेरोदेरिन आसी गुसन तइय्यर।
- 14आर येसुस गुसन बरचर ती बाचर, “अना गुरु! ऐम अखदम का नीन उजगो आलय, नीन आलर एन्देर सोच'ओर अदही पत नू गुनन मल नन्दय, अरा नीन तीना मल खाँइदय। नीन धर्मसी डहरेन मानी गने तेंगदय। यहूदी नेग नमन कैसरस गे मालगुजारी चि'आ गे पेंस'ई का मला?
- 15ऐम मालगुजारी चि'ओम का मला?” लिकिन येसुस आर ही चतरा आबोन अख'अरकी बाचस, “नीम एंगन एन्देरगे बिद्धर? ओन्टा रोमी ढिबन एंगहै गुसन ओन्द्र'आ का ऐन अदिन ऐरोन।”
- 16आर ढिबन ओन्द्रर अरा आस गे चिच्चर। आस मेंजस, “ई नामे अरा छपा नेखा हवे?” आर बाचर, “कैसरसी।”
- 17खने येसुस आरिन बाचस, “कैसरस गे एन्देर चि'अना र'ई अदिन कैसरस गे चि'आ, अरा धर्मस गे एन्देर चि'अना र'ई, अदिन धर्मस गे चि'आ।” खने आर येसुसी ई कत्थन मेनरकी अनचकरर केरर।
- 18जोक्क उल्ला खोखा, केचका खोखा उज्जा चो'अना र'अम मलकी ब'ऊ सदुकीर येसुस गुसन बर'अरकी मेंजर,
- 19“अना गुरु! मूसस एमा गे एन्ने पेंसका चिच्चस, का एकअम ओर्तस बिगर खद्द-खर्रा ही खे'अदस कादस, अरा आसी तंग'आली बछरकी र'ई, होले आसी भइय्योस अदिन बैजना ती केचका तंगहै भइय्योस गे खद्द कुन्द्रत'अना र'ई।”



- 20 सदुकीर अउरिम एन्ने ब'आलियर, “ओँगहोन सात भइय्योर रहचर, कोहँस बेंज्र'अरकी बिगर खद्द-खर्रा ही केच्चस केरस।
- 21 खने मझलस आ रड़ियाही आबोन बेंज्रस, अरा बिगर खद्द-खर्रा ही केच्चस केरस। खने सझलस अदिन बेंज्रस।
- 22 अन्नेम सतियो भइय्योर अदिन ओरोत ही खोखा ओरोत बेंज्र ती जम्मर बिगर खद्द-खर्रा ही केच्चर। छेद्दे नू आ आली हूँ केच्चा केरा।
- 23 अक्कुन एमन तेंगा, केचका आलर ही उज्जा चो'अना नू आद नेखा आली मनो, एन्देरगेका अदिन सतियो भइय्योर बेंज्रकाचर।”
- 24 इदन मेनरकी येसुस आरिन बाचस, “नीम नेम्हा पुथी नू उज्जा चो'अना ही पत्त नू एन्देर लिखकी रई अदिन बलदर अरा धर्मस एन्देर नना ओँग्दस अदन हूँ बलदर, ई चड्डे नीम अन्नेम मलदौ सोचदर।
- 25 इकला आलर केचका ती उज्जा चो'अनर, आलर अरा आलीर मल बेंज्रनर। आर मेर्खा नू मेर्खा पैकर लेक्खा मनोर, एन्देरगेका पैकर हूँ मल बेंज्रोर।
- 26 नेम्हा पुथी नू एन्ने लिखकी रई का इकला धर्मस मूसस गे लघरना खोप्पा नू ऐथ्रस खने आस बाचस, ‘ऐन अब्राहम अरा इसाक अरा याकोबसी धर्म हिकदन।’
- 27 आस केचका आलर ही धर्मस मलदस, लिकिन आस उज्जना आलर ही धर्मस हिकदस। अब्राहमस अरा इसाकस अरा याकोबस केच्चर अन्नु हूँ आर उज्जालनर। ओँगे नाम अखदत का नम्है मेद ही केचका खोखा हूँ नम्है बोलता उज्जो। नीम गा मलदौ पत्त'अदर का केच्चकर उज्जा मल चो'ओर।”
- 28 ओन्टा नेग सिखाब'उस असन रहचस ती आर ही कत्था बरतन मेना लगियस। येसुस सदुकीर गे लूरगर ती किर्त'अर ब'अनन आस ईरियस ती येसुसिन मँजस, “धर्मस नमा गे बग्गे पेसका चिच्कादस अबड़ा ती कोहाँ पेसका एकदा हवे?”
- 29 येसुस आसिन किर्त'अर बाचस, “उर्मी पेसका ती ईद कोहाँ हवे। ‘इस्राएल आलारो एंगहेन मेना, नम्है उर्बस धर्मस ओन्टे लेका उर्बस हिकदस।
- 30 नीन निंगहै धर्म उर्बासिन निंगहै उर्मी जिया गने अरा निंगहै उर्मी बोलता गने अरा निंगहै उर्मी लूर गने अरा निंगहै उर्मी सवंग गने चोन्हा नना।’



- 31 अरा दोसरा पेसका ईद हवे, 'नीन निंगन एकासे चोन्हा नन्दय अन्ने नन्नारिन हूँ चोन्हा नना।' धर्मस इबड़ा ऐंड पेसका ती कोहाँ एका पेसकन हूँ मल्ला चिच्का।”
- 32 आ नेग सिखाब'उस बाचस, “अना गुरु! नीन नगदे बने मानिम बाचकय, धर्मस ओन्टा दिम र'अदस, आसिन अम्बरकी नन्ना धर्मस मलकस।
- 33 आसिन उर्मी जिया गने अरा उर्मी बुझुरना गने अरा उर्मी सवंग गने चोन्हा नना अरा नन्नारिन तंगहै लेक्खा चोन्हा नना। एका दान बस्सरनर ती अरगनर अरा नन्ना मदहे दान अरगना ती ईद कोहाँ हवे।”
- 34 येसुस ईरियस का आस लूरगर ती किर्त'अर बाचस, खने आस आसिन बाचस, “धर्मस निंगन सेब्बा ती राजी नना ओंगदस।” फिन नेका हूँ येसुसिन इन्द्रिइम मेना गे डिढ मल मंजा।
- 35 फिन येसुस धर्मसी मन्दिर नू सिखाब'आ लगियस खने आस मंजस, “नेग सिखाब'उर एन्देरगे ब'अनर का मसीस दाऊदसी खद्दस हिकदस?
- 36 दाऊद नेम्हा बोलतस नू मनरकी बाचस, ‘धर्म उर्बस एंगहै उर्बासिन बाचस का, नीन एंगहै तीना पक्खे ओक्करकी एंगहै गने राजी नना, ऐन निंगहै बैरीरिन नास नंज खच्चोन।’
- 37 दाऊदस गा तानिम आसिन उर्बस अन्ने ब'अदस, होले आस दाऊदसी पिड़ही ता लेका मला आसी उर्बस हूँ हिकदस।” गोंहड़ा येसुसी कत्थन मंजा ती नगदे रिङ्गा।
- 38 येसुस तंगहै सिखाब'अना नू अउरिम बाचस, “नेग सिखाब'उर ती चिहूंक र'आ। आर दिगहा किचरी अत्तरकी कुद्दनर, अरा बजार टोंका गुट्ठी नू मौंजरा खक्खा गे बेद्दनर।
- 39 आर गोड़हा एड़पा गुट्ठी नू मुध मचिया गुट्ठिन अरा मदी गुट्ठी नू मईन अड़डा गुट्ठिन खक्खा गे बेद्दनर।
- 40 लिकिन आर रड़ियाहिरिन ठकनर ती आरिन अमल'अनर। अरा आर धरम नू तमन कोहाँ ऐद'आ गे दिगहा दिगहा बिन्ती नन्नर। धर्मस आर गे दंडे चि'ओस दिम।”
- 41 तहाँ येसुस धर्मसी मन्दिर नू दान बकसा ही मुन्दहारे ओक्करकी बकसा नू गोंहड़ा ही दान सजनन ऐरालियस। बग्गे उरुब आलर नगदे पैसा कौड़ी सज्जर।
- 42 फिन ओन्टा कीड़ा रड़ियाही बरचा। आद ऐंड सन्नी सिक्कन सज्जा।
- 43 येसुस तंगहै चेलारिन हेद्दे मेखरकी बाचस, “ऐन निमन मानिम ब'अदन, धर्मसी मन्दिर ही दान बकसा नू सजका आलर ती ई कीड़ा रड़ियाही उर्मी ती बग्गे सजकी रई।



44एन्देरगेका ओर्मर तम्है खुर्जी ही बढ़ती ती सज्जर। लिकिन ईद नगदे कीड़ा आली हवे। इदही गुसन ऐ बग्गे रहचा उर्मिन सज्जा। ईद तंगहै उज्जा गे रहचा जम्मन धर्मस गे चिच्चा।”

मरकुस 13

1येसुस अरा आसी चेलर धर्मसी मन्दिर ती उरखालियर, खने आसी चेलर ती ओर्तोस बाचस, “अना गुरु! ऐरा, एका कोहाँ पखना! अरा एका नापे मन्दिर!”

2येसुस आसिन बाचस, “नीम एन्ने ब'अदर का ई धर्मसी मन्दिर एका नापे र'ई, लिकिन उन्दुल ई मन्दिर उर्मी दिम धसतार'ओ कालो अरा उर्मी पखना अक्कुन र'ई आ अड्डा नू मल र'ओ।”

3एन्ने बाचका खोखा येसुस चेलर गने जैतून परता केरस अरा असन धर्मसी मन्दिर ही मुन्दहारे उक्कियस। खने पतरस अरा याकोब अरा योहन अरा अन्द्रेयस भिनेम कालरकी येसुसिन मेंजर,

4“एमन तेंगा, इबड़ा कत्था इकला मनो?, इबड़ा कत्था जम्मा मन्ना र'ई, इदन अख'आ गे एन्देर चिन्हा मनो?”

5येसुस आरिन तेंगा हेलरस, “चिहूंक र'आ, निमन नीकईम अम्बोर ठक'आ।

6नगदे आलर एंगहै नामे ती ब'अरकी ब'ओर, ‘ऐन मसी हिकदन’ एन्ने ब'अरकी आर नगदे आलारिन ठक'ओर।

7इकला नीम लड़ाई अरा लड़ाई ही हलन मेनोर होले अमके बयार'आ। एन्देरगेका इबड़ा कत्था मन्ना चाड़ र'ई, लिकिन मुंजना बेड़ा लेम मल बर'ओ।

8ओन्टा जातियर नन्ना जातियर ही बिड़दो नू, अरा ओन्टा राजी नन्ना राजी ही बिड़दो नू लड़ाई गे चो'ओ। खेखेल नू कैनो अड्डा नू खेखेल नुकुरना मनो, अरा एन्ने खेखेल नू अड्डा अड्डा अकाल मनो। लिकिन ईद गा खिलपत ही ओरे मन्ना लेका हवे अरा अउरिम कोड़हे सस्ती बरना र'ई।

9लिकिन इकला इबड़ा मनो नीम चिहूंक ती र'अके। आलर निमन हें'ओर हो'ओर, अरा पंचायत नू चि'ओर, अरा नीम गोड़हा एड़पा नू लौर'ओर। नीम एंगहै चड्डे राजीखापुर अरा बैलर ही मुन्द इजतार'ओर। एन्देरगेका नीम एंगहै गने चोख'उर हिकदर। लिकिन ईद निमा गे एंगहै पत नू आरिन तेंगना ही मोका मनो।

10लिकिन खेखेल ही मुंजना ती मुन्द दौ कत्था उर्मी जातियर गे मेन्त'अना र'ई।

11इकला निमन हें'अरकी पंचायत नू सोंप'ओर, होले नीम मुन्द ती अमके सोच'आ का ऐम एन्देर ब'ओम। लिकिन निमन एन्देर ब'अना र'ई अदिन आ बारिम तेंगतार'ओ, अदिन नीम ब'अके। एन्देरगेका ब'ऊ नीम मला नेम्हा बोलतस हवे।



- 12 आलर तम्है भइय्योर अरा बहिनोरिन नट'ओर अरा पिटर'ओर, एन्देरगेका आर एंग्हे गने चो'खर। अरा अयंग-बंग तम्है खद्द-खरारिन एन्नेम ननोर। अरा खद्द-खरर तम्है अयंग-बंगर ही बिड़दो चो'अरकी पिटत'ओर चि'ओर।
- 13 नगदे आलर निमन बिड़दो ननोर एन्देरगेका नीम एंग्हे गने चो'खरकर। लिकिन ने तम्है उज्जना ही मुंजना गूटी सह'ओर आरिम जनमजुग ही दंडे ती बछर'ओर।
- 14 (पढ़'उर बुझुर'आ हो'आ ऐन एन्देर लिख'आलदन) नीम इकला आ उझड़'अना भंगड़'भट्ठ खँड़ना आलोन धर्मसी मन्दिर ही नेम्हा अड़्डा नू इज्जका ऐरोर एसन अदगे मल इजना रहचा। ई चड़्डे आलर धर्मसी मन्दिरन अम्बोर चि'ओर। अउलम यूदेया जिला नू र'उर परता मइय्याँ बोंके कालके।
- 15 अरा एड़पा मेसगा नू र'उर इन्द्रिइम ओन्द्र'आ गे एड़पा भितरी अम्बोर काला।
- 16 खल्ल नू नलख ननुर तम्है किचरिन हो'आ गे एड़पा अम्बोर किरा।
- 17 अबड़ा उल्ला नू ओत्था ऐख अरा खदमाखो मुक्कर गे नगदे सस्ती मनो।
- 18 बिन्ती नना का ईद पइय्याँ उल्ला नू अम्बन मना।
- 19 एन्देरगेका अबड़ा उल्ला नू नगदे सस्ती मनो का धर्मस खेखेलन गढ़चका उल्ला ती इन्ना गूटी अन्ने मल्ला मंजका, अरा खोखा हूँ अन्ने सस्ती मल मनो।
- 20 उर्बस अबड़ा उल्लन मल घटा ब'अना होले, ने हूँ मल बछर'ओर दने। लिकिन तंग्हे चज्जिका आलर ही चड़्डे आस अबड़ा उल्लन घटा बाचकादस।
- 21 फिन नीकईम निमन, 'ऐरा, मसीस इसन र'अदस महले असन र'अदस' एन्ने ब'अदस होले, आसी कत्थन अमके पत'आ।
- 22 एन्देरगेका जोक्कोर फसकट'ओर ती ऐन मसी हिकदन ब'ओर अरा जोक्कोर फसकट'ओर ती ऐन धर्मसी कत्था तिंगुर ब'ओर। अरा बेड़ाब'आ गे आर चिन्हा अरा अजगुत नलख गुट्ठिन ऐद'ओर, मना ओंगो होले धर्मसी चज्जरका आलारिन हूँ बेड़ाब'ओर चि'ओर।
- 23 ओंगे नीम चिहुंक र'आ। ऐन मन्ना उर्मी कत्थन निमन मुन्द तिम तैंगालदन।
- 24 अबड़ा उल्ला नू आ सस्ती ही खोखा, 'बीड़ी अरा चन्दो मल रफ'ओ,
- 25 अरा मेर्खा ती बीनको खतर'आ हेलर'ओ, अरा धर्मस मेर्खा नू र'ऊ उर्मी आलोन नुक'ओस।'
- 26 फिन उर्मी आलर मनवा खद्दन एंगन बदाली नू ती बरनन ऐरोर। अरा आ बारी ऐन खेखेल ता आलारिन बैलस लेक्खा आकुस गने राजी ननोन।



- 27 फिन ऐन एंग्हे पैकारिन तइय्योन ती सौंसे खेखेल ती एंग्हे चज्जिका आलारिन खोंड'ओन।
- 28 अंजीर मन्न ती ई क्थन सिख्र'आ। अदही गुफरी मनी अरा अतखा खोरा हिलर'ई होले, नीम अखदर का बिड़ना उल्ला हेददे र'ई।
- 29 इकला नीम इबड़ा क्थन एन्ने मन्नुम ऐरोर, निमा अखना र'ई का एंग्हे बरना हेददे र'ई।
- 30 ऐन निमन मानिम ब'अदन, एका गूटी इबड़ा उर्मी क्था मनो आ गूटी ई परिया ता जोक्को आलर उज्जोर।
- 31 मेर्खा अरा खेखेल छपर'ओ कालो, लिकिन एंग्हे क्था इकला हूँ मल बदलार'ओ।
- 32 एंग्हे बरना उल्ला ही पत्त नू धर्मे बंगासिन अम्बरकी ने हूँ बलनर। ऐन खददन अरा मेर्खा ता पैकर हूँ आ बेड़न बलदम।
- 33 नीम एंग्हे बरना बेड़न बलदर, औंगे नीम एंग्हे बरना ही पाब ऐरना नू सपड़ारका र'आ।
- 34 ई उदाहरन आबोन मेना। ओन्टा आलस रहचस। आस उन्दुल डहरे ईक्कियस। आस एड़पा ती काना ती मुन्द तंग्हे जौखर सिरे एड़पा ही उर्मी नलख अम्बियस चिचस। तहाँ आस बली खापुसिन जोहचका र'आ गे आनियस।
- 35 अन्नेम नीम एंग्हे बरनन जोहचका र'आ। नेखओन ऐन पुतबारी महले अधरात माखा नू महले खेर चींखो बारी महले बिजबेड़ा नू बर'ओन।
- 36 उर्मी बारी सपड़ारका र'आ, मला होले ऐन आचका बर'अरकी निंगन बिगर सपड़ारका खक्खोन।
- 37 ऐन एकदन निमन ब'अदन, अदिन ओर्मरिन ब'अदन, 'एंग्हे बरना ही पाब ऐरना नू सपड़ारका र'आ।'”

मरकुस 14

- 1 ऐंड़ उल्ला खोखा कट्टना अरा बिगर बिदगी असमा ही परब मन्ना रहचा। मुध नैगर अरा नेग सिखाब'उर एकासे येसुसिन ठग'अरकी धर'ओत ती पिटत'ओत एन्ने मोका बेददते र'आलियर।
- 2 लिकिन आर ताम ताम ती ब'आलियर, “परब ही उल्ला नू अम्बोत नना। एन्देरगेका आ उल्ला नू ननोत होले, आलर थोकबो काम्ब'ओर अरा हुलहुली ननोर।”
- 3 येसुस बेतानिया पददा नू सिमोन नामे आलासी एड़पा नू रहचस। एकास मुन्द खसरा रोगी रहचस। येसुस सिमोनसी एड़पा नू मंडी ओनालियस। खने ओन्टा आली पंडरू पखना ही संजगी नू नगदे दाम ही जटामासी ही अर्गा गमगमरना इसुंग ओन्द्रा बरचा। आद संजगिन चलखा ती इसुंगन येसुसी कुक्कु नू तुन्दिया।



- 4 खने असता जोक्को आलर उकुलबुकुल ती ओर्त इरिब नू ब'आलियर, "ई गमगमरना इसुंगन एन्देरगे एन्ने नठाबातारा?"
- 5 ई इसुंग ही दाम ओर्तोसी ओन बछर ही कमाब'अना ही भुती मनी, इदन कीइर गे चितारकी र'ओ दने।" एन्ने आर अदिन नगदे केप्पर।
- 6 येसुस आरिन बाचस, "इदिन अमा केबा, इदिन अमा दिकदिकाब'आ। एन्देरगेका ईद गा एंगा गे दौ नंजकी र'ई।
- 7 कीइर निम्है गने सगरघड़ी र'ओर, होले नीम इकला ओंगोर आ उल्ला आर गे दौ नना ओंगदर। लिकिन ऐन निम्है गने बग्गे उल्ला मल र'ओन।
- 8 आद एन्देर नना उंगी अदिन नंजकी र'ई। ईद एंग्हे माइना ही सपड़'अना नू एंग्हे मैद नू मुन्द तिम इसुंगन तुन्दकी र'ई।
- 9 ऐन निमन ओन्टा मुदे कत्था तेंगदन, सौंसे खेखेल नू एक्सअनिम दौ कत्था तेंगर'ओ असन ईद ही नलख ईद ही सुरता गे तेंगतार'ओ।"
- 10 खने यूस इसकारियोत ने बारा चेलर ती ओर्तोस रहचस, आस मुध नैगर गुसन केरस। एन्देरगेका आस येसुसिन धरत'आ गे आर गे संगे चि'आ बिददियस।
- 11 आर इदिन मेंजर खने खुसमारर, अरा आर आस गे ढिबा चि'आ गे गच्छरर। खने आस आर गे संगे चि'आ गे येसुसिन धरत'आ गे मोका बेद्दा हेलरस।
- 12 कट्टना परब ही मुन्द उल्ला इकला यहूदीर भेंडो खद्दन दाँडे अरगर अरा आर बिगर बिदगी ही असमा मोक्खर। खने येसुसी चेलर आसिन मेंजर, "नीन एन्देर बेद्ददय ऐम एसन कालरकी कट्टना ही ओन्ना-मोखनन निंगा सराजमा ननोम?"
- 13 खने आस तंग्हे चेलर ती इरबरिन तइय्यस अरा आरिन बाचस, "नगरे नू कला, ओन्टा आलस संजगी नू अम्मु चेड्डका निमा गे खक्ख'ओस। आसी खोखा खोखा कालके।
- 14 आस एका एइपा नू क'ओस, आ एइपा उर्बासिन ब'अके, 'गुरुस ब'अदस का एंग्हे पाही कुठली एसन र'ई, एसन एंग्हे चेलर गने कट्टना ही ओन्ना-मोखनन मोखोन?"
- 15 आस निमन ओन्टा सिंगराचका सपड़ाचका मइय्याँ ता कोहाँ कुठलिन ऐद'ओस। नीम असन नमा गे कट्टना ही ओन्ना-मोखनन सपड़'आ।"
- 16 अबड़ा दुयो चेलर उरखर अरा नगरे नू केरर, अरा येसुस एकासे बाचकाचस अन्नेम खक्खियर। अरा कट्टना परब ही ओन्ना-मोखनन सपड़ाचर।



- 17 बीड़ी पुत्तिया खने येसुस बारा चेलर गने आ एड़पा नू बरचस।
- 18 आर ओना मोखालियर, खने येसुस आरिन बाचस, “ऐन निमन मानिम ब'अदन, निम्है ती ओर्तोस एंग्हे गने ओना मोखालदस, आस एंगन धरत'आ गे संगे चि'ओस।”
- 19 इदन मेनरकी आर हेन्दवारर केरर। अरा आर ओरोत ओरोत आसिन ब'आ हेलरर, “आस ऐन हिकदन का?”
- 20 आस आरिन बाचस, “आस नीम बारो ती ओर्तोस हिकदस, आस एंग्हे गने डुभा नू असमन ओतदस मोखदस।
- 21 धर्मेसी कत्था तिगुर नेम्हा पुथी नू एंग्हे पत नू एन्देर लिखचकानर अन्नेम मनवा खददन ऐन खे'ओन दने। लिकिन ने एंगन धरत'आ गे संगे चि'अदस आसी मुंजना नगदे भयभयान मनो। आस मल कुन्द्रका होले, आस गे दौ रहचा।”
- 22 आर मोखालियर, खने येसुस असमन होचस ती धर्मेस गे धन्यवाद नंजस। फिन अदिन किच्चयस, अरा चेलर गे चिच्चस अरा बाचस, “ओन्दा, मोखा, ई असमा एंग्हे मेद हवे।”
- 23 फिन आस ओन्टा डुभा नू अंगुर रासिन होचस, अरा धर्मेस गे धन्यवाद नंजस। अरा आस अदिन आर गे चिच्चस। अरा आर आ डुभा ती ओँडर।
- 24 खने आस आरिन बाचस, “ई अंगुर रासी एंग्हे खेंस हवे एकदा ऐन बाहत'आ गे कालालदन, ई खेंस ती ऐन बग्गे आलारिन पाप ती अम्बा गे धर्मेस नंजका गच्छरकन बड़ियर ननोन।
- 25 ऐन निमन ओन्टा मानिम कत्था ब'आलदन, ऐन धर्मेसी राजी ननो बारी पुना अंगुर रासी ओन्ना गूटी इदन ई तरिका ती मुन्द इकला हूँ मल ओनोन।”
- 26 फिन आर ओन्टा डंडी पाड़ियर अरा उरखरकी जैतून परता तरा केरर।
- 27 खने येसुस आरिन बाचस, “नेम्हा पुथी नू एंग्हे पत नू लिखकी र'ई, ऐन महरासिन पिटोन, अरा आसी भेंडो भिड़कार'ओ कालो' एन्ने नीम ओर्मर एंगन अम्बोर ती बोंगोर क'ओर।
- 28 लिकिन ऐन केचका ती उज्जा चोचका खोखा निमन ती मुन्द गलिलेया क'ओन, अरा असन निमन भेंटार'ओन।”
- 29 लिकिन पतरस आसिन बाचस, “ओर्मर निंगन अम्बोर होले अम्बोर नेखओन, ऐन मल अम्बोन।”
- 30 खने येसुस आसिन बाचस, “ऐन निंगन ओन्टा मुदे कत्था ब'अदन, इन्नम ई माखम दुई हेल खेर चींखना ही मुन्द नीन तीन हेल एंगन बलदन ब'ओय।”



- 31 लिकिन पतरस अउरिम हूँ कोइहे बाचस, “एंगा निंगहै गने खेअना मनो दिम होले हूँ, ऐन इकला हूँ निंगन बलदन मल ब'ओन।” एन्नेम नन्ना ओर्मा चेलर हूँ बाचर।
- 32 फिन येसुस अरा आसी चेलर गेतसेमनी नामे ओन्टा अड्डा नू बरचर। खने येसुस तंगहै चेलारिन बाचस, “ऐन बिन्ती नना कालालदन, एंगहै किरिना गूटी इसन उक्का र'आ।”
- 33 तहाँ आस पतरस, याकोब अरा योहनसिन तंगहै गने होच्चस केरस। आस नगदे कलपार'आ अरा खिलपत मना हेलरस।
- 34 अरा आस आरिन बाचस, “ऐन नगदे हेन्दवारदन, अरा ईद एन्ने हवे ऐन खेअना ही बेड़ा नू र'अदन। नीम इसन र'आ अरा जोहचका र'आ।”
- 35 अरा आस कटी गुना मुन्द केरस। अरा आस खेखेल नू खतरस ती बिन्ती नंजस का मना ओंगो होले, ई खिलपत एंगा अम्बो मना।
- 36 अरा आस बाचस, “अना एंगहै बंगायो, निंगहै ती उर्मी दिम मना उंगी। ओंगे एंगहै ई दसा ती बछाब'आ, होले ऐन अक्कुन खिलपत अम्बोन मना। लिकिन एंगहै मने लेक्खा मला, निंगहै मने लेक्खा नना।”
- 37 फिन आस बरचस अरा चेलारिन खन्द्रना खक्खियस ती आस आरिन एज्जस अरा पतरसिन बाचस, “अना सिमोन, नीन खन्द्र'आलदय, नीन ओन घड़ी हूँ जोहचका र'आ पोलकय का?
- 38 ऐन एन्देर बाचकन अदिन नीम नना गे गा बेद्ददर, लिकिन अदिन नना गे निमा पूरेम सवंग मलकी। ओंगे जोहचका र'आ अरा बिन्ती नना का निम्है बिड़दो नू इन्द्रिइम बर'ओ होले नीम छेक'आ ओंगोर।”
- 39 आस फिन किरिम बिच्चियस, अरा मुन्द ता लेक्खम बिन्ती नंजस।
- 40 आस फिन बर'अरकी आरिन खन्द्रना खक्खियस। एन्देरगेका आर मथलारका केरकाचर। आस आरिन एज्जस खने आर बल्लालियर का आसिन एन्देर उतारा चिओत।
- 41 तहाँ आस अउरिम केरस ती बिन्ती नंजस। फिन तिसर बारी आस बरचस अरा आरिन अउरिम खन्द्रना खक्खियस ती आरिन बाचस, “अक्कु खन्द्रते र'अरकी खन्न ऐखोय का? हूरु! एंगहै दुक्खे सारना ही बेड़ा अंडसिया केरा। ऐरा, मनवा खद्दन एंगन धर'आ गे ओर्तोस, पपहा आलारिन संगे चि'आ कालदस।
- 42 चो'आ, आसी तरा क'ओत! ऐरा! एका ओर्तोस एंगन धर'आ गे संगे चि'अदस आस हेद्दे बर'आलदस।”



- 43 येसुसी एन्ने ब'अना गनेम आचका बारो चेलर ती ओर्तोस यूदस बरचस। आसी गने तलवार अरा सोट्टा धरचका ओन्टा गोंहड़ा बरचा। आरिन मुध नैगर अरा नेग सिखाब'उर अरा सेयान आलर तड़्य्का रहचर।
- 44 यूदस एन्ने चिन्हा चिच्का रहचस का ऐन नेकन चोंखोन आसिम येसुस हिकदस, एकाबारी ऐन चोंखोन आसिन धर'अरकी कोडेम हो'अके।
- 45 यूदस बरचस ती लेम येसुस गुसन केरस, “अना गुरु!” बाचस ती येसुसिन चुंखियस।
- 46 खने गोंहड़ा येसुसिन धरचा अरा गुड़चा।
- 47 आ बारी येसुसी ओर्तो चेलस तंग्हे तलवारन नतगियस ती कोहाँ नैगासी जोंखासिन खोतस। लिकिन आसी खेबदा लेका खंडरा।
- 48-49 येसुस आरिन बाचस, “ऐन गा उर्मी उल्ला धर्मसी मन्दिर नू निम्है गने सिखाब'आ लिक्कन। खने नीम एंगन मल धरचकर। नीम डाकू आलारिन धरना लेक्खा एंगन धर'आ गे तलवार अरा सोट्टा धर'अरकी बरचकादर। लिकिन ईद इदगे मंजा का धर्मसी कत्था तिंगुर नेम्हा पुथी नू एंग्हे पत नू लिखचका कत्था पूरा मनो।”
- 50 खने आसी उर्मी चेलर आसिन अम्बरकी बोंगर केरर।
- 51 आ बारी आसी गने चोंख्र'ऊ ओन्टा जोंखस तंग्हे निठंग मेद नू चदरन झपर'अरकी आसी गने चोंख्रस। आर आ आलासिन हूँ धरचर।
- 52 खने आस चदरन अम्बरकी लंगड़ा बोंगस केरस।
- 53 फिन अबड़ा आलर येसुसिन कोहाँ नैगस गुसन होचचर। असन उर्मी मुध नैगर अरा सेयान आलर अरा नेग सिखाब'उर खोंडरर।
- 54 पतरस गेच्छा ती येसुसी खोखा खोखा कोहाँ नैगासी चाली गूटी केरस। अरा असन धर्मसी मन्दिर खापुर गने ओक्करकी आस चिच्ची अखर'आ हेलरस।
- 55 मुध नैगर अरा गोट्टा यहूदी कोहाँ सभा येसुसिन पिटत'आ गे आसी बिड़दो नू गोवाह बेद्दना नू लक्की रहचा, लिकिन ओन्टा हूँ मल खक्खरा।
- 56 नगदे आलर आसी बिड़दो नू ठकना गोवाह चि'आलियर, लिकिन आर ही गोवाह ओन बेसे मल रहचा।
- 57 छेद्दे नू जोक्को आलर आसी बिड़दो नू चोचर ती ठकना बदी नंजर अरा एन्ने ब'आलियर।



- 58“ऐम ईसिन एन्ने ब'अना मेंजका र'अदम, 'ऐन आलर ती कमचका ई धर्मसी मन्दिर आबोन धस'ओन चि'ओन, अरा तीन उल्ला नू ऐन नन्ना कम'ओन, आद आलर ही खेक्खा ती कमरका मल र'ओ'।”
- 59अन्नु हूँ आर ही गोवाह ओन्टम मल उक्किया।
- 60खने कोहाँ नैगस मझी नू इज्जस ती येसुसिन मेंजस, “नीन इन्द्रिइम किर्त'अर मल चि'अदय का? इबड़ा आलर निंगहै बिड़दो नू एन्देर गोवाह चि'अनर अदही पत्त नू नीन एन्देर ब'अदय?”
- 61लिकिन येसुस कलेकसे अकलगुम रहचस अरा एन्देर हूँ किर्त'अर मल चिच्यस। खने कोहाँ नैगस फिन आसिन मेंजस, “नीन महबा ही जोगे धर्मसी खद्दय मसी हिकदय का?”
- 62खने येसुस बाचस, “ऐन हिकदन, 'अरा नीम मनवा खद्दन एंगन उर्मी नू सवंग उइयू धर्मसी तीना चोक्ख उक्का ती राजी नन्नन ऐरोर। अरा नीम एंगन मेर्खा नू चरियो तरा बदाली ती एतनन ऐरोर।”
- 63येसुसिन ई ब'अनन मेंजस ती कोहाँ नैगस तंगहै बरमारनन ऐद'आ गे तंगहै किचरिन चरियस, तहाँ बाचस, “अक्कु नमा गे ईसी बिड़दो नू गोवाह ही एन्देर चाड़ रई?”
- 64ईस धर्मसी बिड़दो नू तंगन धर्मसी लेक्खा जोक्खचस, ई ब'अनन नीम मेंजकर, ईसी पत्त नू नीम एन्देर सोचदर?” आर ओर्मर बाचर, “ईस गुन्हस हिकदस, ईसिन पिटना दिम मनो।”
- 65खने जोक्कोर येसुसी मइय्याँ तुप्पा हेलरर, अरा आसी मुहिन डब'अरकी घुसियालियर, अरा ब'आलियर, “नीन धर्मसी कत्था तिगुस होले एमा गे तेंगा का निंगन ने लौच्चा?” अरा खापुर आसिन होचर ती थपड़ाचर।
- 66पतरस बहरी चाली नू रहचस खने कोहाँ नैगासी ओन्टा जौख पेल्लो असन बरचा।
- 67आद पतरसी चिच्ची अखरनन ईरिया, अरा आसिन थिथवाँ ईरिया ती बाचा, “नीन हूँ गा नासरेत पद्दा ता आ येसुस गने रहचकय।”
- 68लिकिन आस नटचस ती बाचस, “ऐन बलदन, अरा ऐन मल बुझुरदन का नीन एन्देर ब'आलदी?” फिन आस बहरी बखड़े नू केरस। [खने खेर चींखिया।]
- 69आ जौख पेल्लो आसिन असन ऐररकी हेद्दे इज्जका आलारिन बाचा, “ईस हूँ आर ही ती ओर्तोस हिकदस।”



70 लिकिन पतरस अउरिम बाचस, “ऐन आसिन बलदन।” अरा जोक्को बेड़ा खोखा असन इज्जका आलर अउरिम पतरसिन बाचर, “नीन मानिम अबड़ा आलर ती ओर्त हिकदय, एन्देरगेका निंग्हे कत्था ती लग्गी का नीन गलिलेया जिला ता हिकदय।”

71 खने पतरस तंगन सरप'आ अरा किरिया मोखा हेलरस, “ऐन आ आलासिन बलदन, नीम नेखा पत नू ब'आलदर।”

72 खने लेम दुई हेल खेर चींखिया। खने पतरस गे येसुसी आ बाचका कत्था सुरता बरचा, “पारेंड मून्द खेर चींखना ही मुन्द नीन तीन हेल एंगन बलदन ब'ओय।” खने आस इदन सोच'अरकी चींखा हेलरस।

मरकुस 15

1 बिज्जा गनेम लेम मुध नैगर अरा सेयान आलर अरा नेग सिखाब'उर अरा कोहाँ सभा ता उर्मी आलर सलहा मंजर। फिन येसुसिन खुटताचर अरा आसिन हो'अरकी यहूदिया ही रोमी राजीखापुस पिलातुसी खेक्खा नू सोंपचर।

2 खने पिलातुस येसुसिन मंजस, “नीन यहूदीर ही बेलय का?” येसुस किर्त'अर बाचस, “नीन ब'अदय अन्ने दिम हवे।”

3 मुध नैगर आसी मइय्याँ नगदे दोस ठेका ब'आलियर।

4 पिलातुस अउरिम आसिन मंजस, “नीन किर्त'अर मल ब'अदय का?, ऐरा, ईर निंग्हे मइय्याँ ई बग्गे दोस ठेका ब'अनर।”

5 लिकिन येसुस किर्त'अर मल बाचस, खने पिलातुस अकबक मंजस।

6 राजीखापुस चानुम कट्टना परब ही उल्ला नू ओन्टा गुडुरकासिन नेकन आलर अम्बत'आ बेद्दनर आसिन अम्बा चि'आलियस।

7 अबड़ा उल्ला नू बरब्बस नामे ही ओन्टा गुडुरकस रहचस। आस रोमीर ही बिड़दो नू हुलहुली नंजका ओन्टा खोंड़हा ता ओर्त रहचस। आर हुलहुली नू आलारिन लौचका पिटका रहचर।

8 गौहड़ा पिलातुस गुसन कालरकी मुन्द ता लेक्खा ओन्टा गुडुरकासिन अम्बा गे बाचा।

9 पिलातुस आरिन किर्त'अर बाचस, “नीम एन्देर बेद्ददर, ऐन निमा गे यहूदीर ही बेलासिन अम्बोन चि'ओन का?”

10 आस अक्खस का मुध नैगर येसुसिन इस्गहा ती आस गे सोंपचका रहचर।



- 11 लिकिन मुध नैगर आलारिन आसिन मेना गे तुतकाचर का आस बरब्बसिन दिम आर गे अम्बोस।
- 12 पिलातुस आरिन फिन मँजस, “होले नीम ईसिन यहूदीर ही बेलस ब'अदर, ईसिन ऐन एन्देर ननोन?”
- 13 आर चिच्चियार'आ हेलरर, “ईसिन क्रुस नू ठोक'आ।”
- 14 पिलातुस आरिन मँजस, “एन्देरगे, ईस एन्देर दोस नंजकादस?” लिकिन आर अउरिम जोर ती चिच्चियारते र'आलियर, “ईसिन क्रुस नू ठोक'आ।”
- 15 खने पिलातुस गोंहड़ा आबोन खुसमारत'अना ही मने ती बरब्बसिन आर गे अम्बियस। अरा येसुसिन कोर्ता ती ल'अरकी क्रुस नू ठोक'आ गे रोमी सैना गे सोंपचस।
- 16 सैनर येसुसिन गढ़िया ही भितरी चाली नू होच्चर केरर (अदन प्रिटोरिओन ब'अनर)। अरा असन उर्मी फउदन मीखियर।
- 17 असन आर आसिन भेटांगो ऐखर'आ किचरी अताचर। अरा आर अच्चोन बिन्डो लेक्खा मोड़चर ती आसी कुक्कु नू अताचर।
- 18_19 फिन आर आसिन “अना यहूदीर ही बेलायो!” ब'अरकी मूकलिदरर ती मोंजरा ननरकी भेंसड़'आ हेलरर। आर येसुसी कुक्कु नू डंडा ती लौचर। अरा आसी मइय्याँ तुप्पियर।
- 20 आसिन भेंसड़ाचर अदही खोखा भेटांगो ऐखर'आ किचरिन इच्चियर ती आसी किचरिन अताचर। अदही खोखा आर येसुसिन क्रुस नू ठोक'आ गे प्रिटोरिओन ती बहरी होच्चर।
- 21 सिमोन नामे ओन्टा कुरेने नगरे ता आलस पद्दा तरती बर'अरकी आ डहरे नू कालालियस। आस अलेक्सन्द्रस अरा रूफोसी तम्बस रहचस। सैनर आसिन येसुसी क्रुस आबोन चेड़'आ गे बिट्ठी नू धरचर।
- 22 आर येसुसिन गोलगोता नामे अड्डा नू होच्चर। गोलगोता ही माने “खपरोही ही अड्डा”।
- 23 अरा येसुस गे अंगुर रासी नू गन्धरस भिड़ाब'अरकी चिच्चर। लिकिन येसुस अदिन मल ओंडस।
- 24 फिन आर आसिन क्रुस नू ठोकचर। अरा आसी किचरिन नेका एन्देर खक्ख'ओ अदिन अख'आ गे चिठी टिड्डर ती खट्टरर।
- 25 आर येसुसिन क्रुस नू ठोकचर खने पैरी नौ बज्जकी रहचा।
- 26 अरा आसी दोस चिठी लिख'अरकी आसी मइय्याँ क्रुस नू लगाबाचर का “यहूदीर ही बेलस”।



- 27 आर आस गने ऐंङ डाकू आलारिन, ओर्तोसिन आसी तीना अरा ओर्तोसिन डेब्बा चोक्ख क्रुस नू ठोकचर। [28 नेम्हा पुथी नू लिखका पूरा मंजा, ईद एन्ने बई का, “आस दोसी बेसे बातार'ओस।”] 29 डहरे नू कालू बर'ऊ आलर भेंसइ'आ लगियर। अरा तम्है कुक्कन नुक'अरकी एन्ने ब'आलियर, “नीन, धर्मैसी मन्दिर आबोन धस'ऊ अरा तीन उल्ला नू कम'ऊ।”
- 30 नीन क्रुस मइय्याँ ती एत्ता अरा निंगन बछाब'आ।”
- 31 एन्ने मुध नैगर अरा नेग सिखाब'उर ताम ताम आसिन भेंसइ'अर ती बाचर, “ईस नन्नारिन बछाबाचस लिकिन तंगन बछाब'आ पोलदस।
- 32 इस्राएल ही बेलस ई मसीस अक्कु क्रुस मइय्याँ ती एत्तोस बर'ओस होले, ऐम अदन ऐरकी पत'ओम।” अरा डाकू आलर ने आस गने क्रुस नू ठोकरकाचर आर हूँ येसुसिन भेंसइ'अर।
- 33 लोहाड़ी बारा बजे गोट्टा चक ऊखा मंजा केरा, अरा आद तीन बजे गूटी रहचा।
- 34 ओनबीड़ी तीन बजे येसुस जोरसरिया चिच्चियारनुम बाचस, “ऐलोइ, ऐलोइ लेमा सबखतानी।” इदही माने, “एंग्हे धर्मै, एंग्हे धर्मै नीन एंगन एन्देरेगे अम्बकय?”
- 35 असन हेददे र'ऊ जोक्को आलर इदन बुझुर'आ पोल्लर ती बाचर, “ऐरा, ईस एलियसिन मेखदस।”
- 36 आर ती ओर्तोस बुंगनुम बरचस, अरा तूलिन डंडा नू पुज्जयस अरा तिस्सा अंगुर रासी नू चेंदस ती येसुस गे चीपा गे चिच्चस। अरा बाचस, “रहा, ऐरोत, एलियस ईसिन क्रुस ती एत्त'आ गे बर'ओस का मला!”
- 37 खने येसुस जोरसरिया चिच्चियारस ती तंग्हे जियन बिच्छरस।
- 38 धर्मैसी मन्दिर ही परदा मइय्याँ ती किइय्या गूटी चर्रा ती दुई फड़ा मंजा केरा।
- 39 ओन्टा रोमी सैनर ही मुद्धस आसी हेददे इज्जका रहचस। आस येसुसिन [चिच्चियारनन] अरा जिया बिच्छरनन ईरियस। खने आस बाचस, “ईस मानिम नू धर्मैसी खददस रहचस।”
- 40 जोक्को मुक्कर गेच्छा नू इज्जर ती इदन ऐरा लगियर। अइय्या मगदला पददा ता मरियम अरा सन्नी याकोब अरा योसेसी तंग्यो मरियम अरा सलोमी रहचर।
- 41 आस गलिलेया नूर'ओ बारी ईर आसी खोखा केरर अरा आसी तेतर-सुसर नंजर। अरा अउरिम बग्गे मुक्कर रहचर, ईर आसी गने येरुसलेम बरचका रहचर।
- 42 आ उल्ला खन्न ऐखना उल्ला ही मुन्द उल्ला सपड़'अना ही उल्ला रहचा। बीड़ीपुत बारी,



43 अरिमतिया पददा ता योसेफस डिठ नंजस ती पिलातुस गुसन केरस अरा येसुसी मेदन नेचस। योसेफस गा यहूदीर ही सभा ता ओन्टा मुध आलस रहचस अरा धर्मेस इकला तंग्हे आलारिन राजी ननोस अदिन आस पाब ऐरालियस।

44 पिलातुस अकबक मंजस, का आस एन्ने चाँइहे केचस केरस। अरा आस ने येसुसिन ठोकनन ऐरा खोजालिया आ सैनर ही मुद्धासिन मीखियस ती मेंजस, “आस केचस का?”

45 सैनर ही मुद्धस ती हलन खक्खियस, खने आस येसुसी मेदन योसेफस गे चिताचस।

46 खने योसेफस ओन्टा दिगहा कफन किचरिन खीन्दियस अरा येसुसी मेदन एत अरकी अइय्या मुसगियस अरा ओन्टा मसड़ा नू कीदस, एकदा चचड़ी नू पतरकी कम्मकीचा। अरा मसड़ा ही बली नू ओन्टा पखनन उर्दियस चिचस।

47 अरा मरियम मगदलेनी अरा योसेसी तंग्यो मरियम येसुसी मेदन एसन कीदर अदिन ऐरालियर।

मरकुस 16

1 खन्न ऐखना उल्ला मुंजरा, खने मरियम मगदलेनी अरा याकोबसी तंग्यो मरियम अरा सलोमी गमगमरना इसुंग अरा गमगमरना जिनिस खीन्दियर। इदगे का आर कालरकी येसुसी मेद नू नलभा आँगोर।

2 आर हप्ता ही पहिल उल्ला एतवार पैरी, बीड़ी अरगो बारी मसड़ा तरा केरर।

3-4 अरा इहरे नू ताम तामिम कछनख आलियर, “नमा गे मसड़ा ही बली ता पखनन ने ताड़'ओ?” आ पखना नगदे कोहाँ रहचा। लिकिन आर अंइसियर ती उर्दका पखनन ताड़का ईरियर।

5 आर मसड़ा ही भितरी केरर, खने ओन्टा जौंखासिन पंडरू किचरी अतका तीना चोक्ख उक्का ईरियर ती इल्चियर।

6 आ पैकस आरिन बाचस, “अमा एल्चा, नीम क्रुस नू ठोकचका नासरेत ता येसुसिन बेद्दर। आस इसन मलकस। आस केचका ती उज्जा चोचस। आसी कीदका अइडन ऐरा।

7 अक्कुन नीम कला, चेलारिन अरा पतरसिन तेंगा का आस निमन ती मुन्द गलिलेया कालालदस, असन नीम आसिन ऐरोर, एकासे आस केचका मुन्द निमन बाचकाचस।”

8 आर मसड़ा ती उरखर ती बोंगर केरर, एन्देगेका आर अकबकरर अरा इलचका ती बुदिरियर केरर। आँगे आर इलचका ती नेकन हूँ एन्दे हूँ मल बाचर।



[⁹हप्ता ही पहिल उल्ला एतवार खेर चीखना बेड़ा येसुस केचका ती उज्जा चोचस, अरा आस मुन्द मरियम मगदलेनी गे ऐथ्रस, अदही मइय्याँ ती सात गोटंग नादन आस ओथ्रकाचस।

10 आद कालरकी आसी चेलारिन इदन तिगिया, ने चीखा ओलखालियर।

11 एकाबारी आर मेंजर का येसुस उज्जा चोचस अरा आसिन आद ईरिया, लिकिन आर इदन मल पताचर।

12 अदही खोखा येसुस तंगहै दुई इन संगेर पद्दा तरा कालालियर खने, आर गे ऐथ्रस, लिकिन आर आसिन चिन्हा पोल्लर।

13 आर किररकी बछरकर गे इदन तिगियर। लिकिन आर आरिन मल पताचर।

14 खोखा अबड़ा ग्यारा चेलर मंडी ओना गे उक्कियर, खने येसुस आर गे ऐथ्रस। अरा आर ही जिया मल भेदना अरा मल पत'अना ही चड्डे आस आरिन केप्पस। एन्देरगेका आर आसी उज्जा चोचका ही खोखा आसिन ईरकारिन मल पताचर।

15 अरा आस आरिन आनियस, “सौंसे खेखेल नू कला अरा उर्मी आलर गे दौ कत्थन मेन्ताआ।

16 ने पत'अरकी एंगहै नामे नू नोडर'ओस आसिन धर्मस बछाब'ओस। अरा ने मल पत'ओस आसिन धर्मस दंडे चि'ओस।

17 अरा पत'उर गे इबड़ा चिन्हा मनो: आर एंगहै आकुस ती नादन ओथ्र'ओर, पुना पुना भखा कछनख'ओर।

18 आर नेर्रेन धर'ओर अरा महरन खप्पोर होले हूँ आर एन्देर हूँ मल मनोर। अरा आर बिमरहर मइय्याँ खेक्खा उइय्योर होले आर कोडे मनोर कालोर।”

19 खने उर्बा येसुस आर ही गने कत्था कछनखका ही खोखा धर्मस येसुसिन मेर्खा होचचस, अरा आस धर्मसी तीना चोक्ख उक्कियस।

20 अरा चेलर उरखरकी उर्मी अड्डा नू दौ कत्थन मेन्ताचर। अरा उर्बस आरिन अकबक नलख नन्त'अना नू आर ही गने नलख ननालियस। इबड़ा नलख गुट्ठी ई कत्थन मानिम साबित नंजा।] आमेन।



लूकस

लूकस 1

- 1 ऐम पत'ऊ आलर ही मझी नू येसुसी नंजका नलखन लिख'आ गे बग्गे आलर मुन्द बरचर।
- 2 एकदन ओरे तिम इबड़ा कथन मेंजका आलर अरा धर्मसी कथन तिंगू आलर एकासे ऐम पत'ऊ आलर गे तेंगरा अन्नेम आर लिखचर।
- 3 अना महोदय थेओफिलुस, ऐन हूँ अदन निंगा गे तरकूटी ती लिख'आ गे अंगेर नंजकन। ओड़ तिम मंजका उर्मिन चिहुंक ती मेंजकन खूजकन ती लिख'आलदन।
- 4 इत्रु ती नीन अख'ओय का निंगा गे सिखाबाचका कथा गुट्ठी मानिम दिम हवे।
- 5 यूदेया राजी ता बेलस हेरोदेसी परिया नू जकरियास नामे ओरोत नैगस रहचस। आस अबियास नैगासी गोंहड़ा ता रहचस, अरा आसी आली एलिसबेत हूँ आरोन नैगासी बनस ता रहचा।
- 6 आर इरबर धर्मसी ऐरना नू उजगो रहचर, अरा उर्बासी उर्मी पेसका अरा नेग गुट्ठी नू बने ईकुर रहचर।
- 7 लिकिन आर ही खद्द-खर्रा मल रहचर, एन्देरगेका एलिसबेत बंझली रहचा, अरा आर इरबर हूँ पच्चिका केरका रहचर।
- 8 उन्दुल जकरियासी गोंहड़ा येरुसलेम मन्दिर नू नलख ननू ऊसरी नू जकरियास हूँ धर्मसी मुन्दहारे नैग नलख ननालियस।
- 9 खने नैगर ही चाल लेक्खा चिठी टिड्डर। खने धर्मसी मन्दिर नू उर्बासी नेम्हा अड्डा नू कालरकी धूप कुहड़'अना दाँडेन अरग'आ गे जकरियासी नामे नू चिठी उरखा।
- 10 दाँडे अरग'अना बेड़ा नू आस नेम्हा अड्डा नू कोरचस, अरा ओड़ लग्गा गे खोंडरका बग्गे आलर बहरी बिन्ती ननालियर।
- 11 तहाँ आस गे ओन्टा उर्बासी पैकस गोड़हा ही तीना पक्खे इज्जका ऐथ्रस।
- 12 जकरियास आसिन ऐर'अरकी अकबकरस अरा आस गे इल्चिक'आ कोरचा केरा।
- 13 पैकस गा आसिन बाचस, “अना जकरियास अमा एल्चा, धर्मस निंग्हे गोहरारनन मेंजकादस। ओँगे निंग्हे आली एलिसबेत निंगा गे ओन्टा खद्दासिन नेब्बो, अरा नीन आसी नामे योहन पिंजके।
- 14 निंगा खुसमारना अरा रिङ्गना मनो, अरा आसी कुन्द्रका ती बग्गेम आलर नगदे खुसमार'ओर।



- 15 आस उर्बासी ऐरना नू कोहाँ आल मनोस। आस अंगुर रासी महले अउर नन्ना निसा मलम ओनोस। आस तंगहै अयंग ही ओदर तिम नेम्हा बोलतस ती निन्द्रका र'ओस।
- 16 आस नगदे इस्राएल आलारिन आर ही धर्मस उर्बस तरा किर्त'ओस।
- 17 आस धर्मसी कत्था तिगू एलियसी बोलता अरा सवंग गने उर्बासी मुन्द ऐकोस, का अयंग बंगगर ही जियन आर ही खददर तरा किर्त'ओस अरा पेसका मल मिनू आलारिन उजगो ईकुर ही बुझुरना नू किर्त'ओस। एन्ने उर्बासी बरना गे जोगे आलारिन सपड़'ओस।”
- 18 तहाँ जकरियास पैकासिन मँजस, “ऐन पच्चिका र'अदन अरा एंगहै आली हूँ पच्चकी किरकी र'ई। होले ऐन इदन एकासे पत'ओन का ईद मनो?”
- 19 खने पैकस बाचस, “ऐन धर्मसी छमहे नू इज्जका र'ऊ गबरिएल हिकदन। ऐन निंगहै गने कछनख'आ गे अरा निंगन ई दौ कत्थन तेंगा गे तड़रका र'अदन।
- 20 अक्कुन नीन गा एंगहै कत्था गुट्ठिन मल पत्ताचकय, औंगे इदही मन्ना उल्ला गूटी नीन कोन्दा र'ओय, अरा कछनख'आ पोल्लोय। लिकिन एंगहै बाचका कत्था तंगहै बेड़ा नू मनो।”
- 21 बहरी नू आलर जकरियासी पाब ऐरालियर, अरा आर हैकटरर का आस धर्मसी मन्दिर नू एन्ने घड़ही एन्देरगे ननालदस।
- 22 आस बहरी उरखस खने आर गने कछनख'आ पोल्लस। आस आरिन टेवाँ बा'आ हेलरस, खने आर अक्खर का ईस धर्मसी मन्दिर नू देखार ईरकादस। अरा आस कोन्दा मंजस केरस।
- 23 इकला धर्मसी मन्दिर नू आसी नैग नलख नन्ना ही हप्ता पूरचा, खने आस तंगहै एड़पा किरिम बिच्चियस।
- 24 इबड़ा उल्ला गुट्ठी ही खोखा आसी तंग'आली एलिसबेत ओत्थाऐख मंजा। आद पांच महिना गूटी तमहै एड़पा ती बहरी मल उरखा। एन्देरगेका आद इदन ब'ओ होले आलर अदही ब'अनन मल पत'ओर।
- 25 आद तंगहै ती बाचा, “उर्बस दिम एंगा गे इदन नंजस। आलर नू एंगहै लज्जेन मेट'अरकी आस ई बेड़ा नू एंगहै मइय्याँ सोगगे ईरियस।”
- 26 एलिसबेत ही ओत्थाऐख मंजका ही छे महिना नू गलिलेया जिला ही नासरेत पद्दा नू धर्मस गबरिएल पैकासिन ओन्टा डिंडा पेल्लो हेद्दे तइय्यस।
- 27 अदही योसेफ नामे दाऊद बेलासी बनस ता ओन्टा आलस गने पाही मंजकीचा। आ डिंडा पेल्लो ही नामे मरियम रहचा।



- 28 मेर्खा पैकस अदही हेददे केरस ती बाचस, “कोइहे आसीस खक्खू निंगन ऐन मौंजरा नन्दन। उर्बस निंग्हे गने र'अदस।”
- 29 मरियम गा पैकासी ई कत्थन मेंजा ती नगदे अकबकरा अरा आद सोच'आ हेलरा का, “ईद एका लेक्खा परिछ'अना हवे?”
- 30 खने पैकस अदिन बाचस, “अनय मरियम अमय एल्चय, धर्मस निंग्हे ती रिझदस।
- 31 ऐरय! नीन ओत्थाऐख मनोय अरा नीन ओन्टा कुक्को खद्दासिन नेब्बोय। आसी नामे येसु पिंजके।
- 32 आस उर्मी ती कोहाँ मनोस, अरा उर्मी ती कोहाँ धर्मसी तंगदस बातार'ओस। धर्म उर्बस आसी पूरखा दाऊद बेलासी लेक्खा आसिन राजी ननू कम'ओस।
- 33 आस याकोबसी बनस ता आलारिन मुंजामलका गूटी राजी ननोस, अरा आसी राजी कहियों माल मुंज'ओ।”
- 34 खने मरियम पैकासिन बाचा, “एन्ने एकासे मनो, ऐन गा डिंडा र'अदन?”
- 35 पैकस बाचस, “नेम्हा बोलतस निंग्हे मइय्याँ बर'ओस, अरा उर्मी ती कोहाँ धर्मसी सवंग निंग्हे मइय्याँ ऐख ननो। ओंगे एका बोलो खद्दस कुन्द्र'ओस आस नेम्हा मनोस, अरा आस धर्मसी तंगदस बातार'ओस।
- 36 ऐरय, निंग्हे पाहिनी एलिसबेत, एकाद बंझली बातारकीचा, आद हूँ पच्यना बेड़ा नू ओन्टा खद्दासिन नेब्बो, आद अक्कु ओत्थाऐख मनरकी छे महिना मंजकी र'ई।
- 37 धर्मस गा इन्द्रिइम हूँ नना ओंगदस।”
- 38 खने मरियम बाचा, “ऐन गा उर्बासी जौख पेल्लो हिकदन, एंगा गे निंग्हे बाचका कत्था लेक्खा मनन नेकअन।” खने पैकस असलेक किरिम बिच्चियस।
- 39 अबड़ा उल्ला नू मरियम सपड़ारा अरा लेम यूदेया ही परता राजी ता ओन्टा नगरे नू केरा।
- 40 असन आद जकरियासी एड़पा नू केरा अरा एलिसबेत आबोन परिछाचा।
- 41 एकाबारी एलिसबेत मरियम ही परिछ'अनन मेंजा, खनेम खद्द अदही ओदर नू उदकारा, अरा एलिसबेत नेम्हा बोलतस ती निन्दिया केरा।
- 42 अरा आद अकबकरनुम जोरसरिया चिच्चियारनुम बाचा, “नीन मुक्कय नू तकदीर आली हवे, अरा नीन नेब्बोय आ खद्द हूँ तकदीर हवे।



- 43 एंग्हे उर्बासी तंगियो नीन एंग्हे गुसन बर'आ गे ऐन ई बग्गे सोग्गे खक्खिय अन।
- 44 निंग्हे परिछ'अना कत्था एंग्हे खेबदा नू मेन्द्रा खने एंग्हे ओदर नू र'ऊ खद्द रिझ ती उदकारा।
- 45 नीन तकदीर आली हवे, एन्देरगेका नीन पताचकी का उर्बस निंग्हे गुसन बाचका कत्था अन्नेम मनो।”
- 46 खने मरियम बाचा, “एंग्हे जिया उर्बासी ओहमा ननी।
- 47 एंग्हे बोलता एंग्हे बछाब'ऊ धर्मेस नू रिरयार'ई।
- 48 एन्देरगेका आस तंग्हे जौख पेल्लो एंग्हे किइय्या ता दसन सोग्गे ती ईरियस। औंगे अक्कु ती उर्मी जुग ता आलर एंगन तकदीर आली ब'ओर।
- 49 एन्देरगेका सवंग उय्युस धर्मेस एंगा गे कोहाँ कोहाँ नलख नंजकादस। आसी नामे नेम्हा र'ई।
- 50 अरा ने आसिन एल्चनर, आर ही मइय्याँ आस जुग जुग गूटी सोग्गे ऐरदस।
- 51 आस तंग्हे सवंगिय खेक्खा ती कोहाँ नलख नंजकादस। आस तम्है जिया नू मोठाई सोच नू र'उरिन छितिर बितिर नंजस।
- 52 राजी ननू आलारिन तम्है गद्दी ती टिड्डस चिच्चस, अरा लुदऊ जिया आलारिन कोहाँ नंजस।
- 53 आस कीड़ारिन दौ जिनिस ती उइताचस, अरा उरुब आलारिन नीदी खेक्खा ओथ्रस चिच्चस।
- 54-55 आस नम्है पूरखर गे नंजकादस, अन्नेम अब्राहमस अरा आसी बनसर गे हुल्लो गूटी सोग्गे ऐरा गे सोच्चस।”
- 56 मरियम एलिसबेत गने मलागूटी तीन महिना रहचा, अरा खोखा नू तंग्हे एइपा किरिया।
- 57 एलिसबेत ही उल्ला अंडिसिया खने आद ओन्टा कुक्को खद्दासिन निब्बिया।
- 58 उर्बस आद मइय्याँ बग्गे सोग्गे ईरकादस, इदन अदही अरबर-परबर अरा पाहियर मेंजर अरा अदही गने खुसमारर।
- 59 आर ही अरबर-परबर अरा पाहियर खद्दासी आठ उल्ला नू खतना नेत गे बरचर। आर खद्दस गे तम्बासी नामे ती जकरिया पिंजा गे सोच्चर।
- 60 लिकिन खद्दासी तंगियो बाचा, “मला, ईसी नामे योहन पिंजना मनो।”
- 61 खने आर अदिन बाचर, “निंग्हे पाहियर नू गा नेखय हूँ एन्ने नामे मलकी।”
- 62 खने आर खद्दासी तम्बासिन चिन्हा ऐद'अरकी मेंजर का, “आसी नामे एन्देर पिंजा बेद्ददय?”



- 63 आस लिखना ही पट्टियन ने'अरकी लिखचस चिचचस, "आसी नामे योहन" अरा ओर्मर अकबकरर।
- 64 लेथेम आस कछनख'आ हेलरस, अरा आस धर्मसी ओहमा नना हेलरस।
- 65 आर ही उर्मी अड्डे-बेड्डे ता आलर नू इल्चका कोरचा केरा। अरा यूदेया ही परता राजी उर्मी नू इबड़ा उर्मी कत्थन आलर कछनख'आ हेलरर।
- 66 अरा इदन मिनू आलर अकबकरर ती बाचर, "ईस परदोस होले ई खद्दस एकासे मनोस?" एन्देरगेका आर अक्खर का उर्बासी सवंग आसी गने रहचा।
- 67 आ खद्दासी तम्बस जकरियास नेम्हा बोलतस ती निन्दियस ती धर्मसी कत्थन मुन्द तेंगा हेलरस।
- 68 "इसाएल ही धर्म उर्बस गे ओहमा मनन नेकअन, एन्देरगेका आस तंग्हे आलारिन नाड़ा गे बरचकादस।
- 69 आस तंग्हे जोंखस दाऊद बेलासी बनस ती ओन्टा सवंगिय नाडुसिन तइय्कादस।
- 70 आस तंग्हे नेम्हा धर्मसी कत्था तिं'गुर ती हुल्लो नू बाचकाचस का
- 71 नम्है बैरिर अरा नम्है धोकहर जम्मेर ही खेक्खा ती नमन नाडोस,
- 72 अरा तंग्हे नेम्हा गच्छरकन सोच'अरकी नम्है पूरखर मइय्याँ सोग्गे ईरकादस।
- 73 आस नम्है पूरखा अब्राहमस गे किरया मोखरकी,
- 74 नम्है बैरिर ही खेक्खा ती नाडोस,
- 75 अरा नम्है उज्जना उल्ला गूटी आसी मुन्दहारे नेम्हा अरा उजगो नू बिगर इल्चका ती सुसर'आ गे सवंग चि'ओस।
- 76 अना एंग्हे खद्दायो, नीन उर्मी ती कोहाँ धर्मसी कत्था तिं'गू आल बार'ओय, एन्देरगेका नीन उर्बासी डहरेन सपड़'आ गे आसी मुन्द ऐकोय।
- 77 नीन आसी आलर गे तम्है पाप छमा मन्ना ती नाडरना ही लूर चि'ओय।
- 78 नम्है धर्मसी कोहाँ चोन्हा ती नमा गे मेर्खा ती नाडुस बर'ओस।
- 79 ऊखा नू उज्जुरिन अरा खे'अना ही एलचना नूर'उरिन बिल्ली ऐद'आ गे अरा नम्है कोड़े ही डहरे नू ऐकत'आ गे आस बर'ओस।"



80 आ खद्दस परदनुम अरा बोलता नू बड़ियर मन्नुम केरस। अरा आस इस्राएलर नू अरगी ऐथ्रना गूटी टोडंग नू रहचस।

लूकस 2

1 अबड़ा उल्ला नू कैसर अगुस्तुस तरती पेसका उरखा का रोमी आकुस ही किय्या अबड़ा उर्मी राजी ता आलर तम्है नामे लिखर'ओर। औंगे सरकार आर ही ती टेकस ऊज'आ औंगो।

2 कुरेनियुस सीरिया चक ही राजी'खापुस र'ओ बारी मंजका पहिल नामेन लिखरना ईद रहचा।

3 खने ओर्मा आलर तम्है नामे लिखर'आ गे तम्है तम्है पूरखर ही नगरे केरर।

4 योसेफस हों गलिलेया जिला ता नासरेत नगरे ती यूदेया जिला ता दाऊद बेलासी ओक्करका नगरे बेतलहेम केरस, एन्देरगेका आस दाऊदसी बनस ता रहचस।

5 आस तंगा सौदाचका मरियम गने नामे लिखर'आ गे केरस एकदा ओत्थाऐख रहचा।

6-7 आर बेतलहेम केरर खने आर गे धरमसाला नू कुठली मल खक्खरा। औंगे आर गोयसाली नू रहचर। आर ही असन र'अनुम मरियम ही उल्ला अंडसिया। आद तंगहै जेट्ठा खद्दासिन निब्विया। आर खद्दासिन किचरी नू पुज्जियर ती चरनी नू कीदर।

8 आ माखा आ चक नू महरर टोंका नू तम्है भेंडो गोंहड़ा गुट्ठिन खापालियर।

9 आचका उर्बस ती ओन्टा पैकस आर गे ऐथ्रस, अरा उर्बासी महबा ही बिलचना महरर ही ओनबेंडर'आ बिल्चिया। अरा आर नगदे इल्चियर।

10 खने मेर्खा पैकस आरिन बाचस, “अमा एल्चा, ऐरा, ऐन निमा गे दौ कत्थन मेन्त'आलदन का आद ओर्मा आलर गे कोहाँ खुसमारना र'ओ।

11 इन्ना दाऊद बेलासी नगरे नू निमन बछाब'उस कुन्द्रकादस, आसिम मसी उर्बस।

12 निमा गे इदही एन्ने चिन्हा मनो। नीम खद्दासिन किचरी नू पोजोरका अरा चरनी नू कीदरका खक्खोर।”

13 खनेम आचका ही आ पैकस गने मेर्खा पैकर ही ओन्टा खोंडहा ऐथ्र ती धर्मसी ओहमा नंजर ती बाचर,

14 “मेर्खा नू धर्मसी महबा मनन, अरा खेखेल नू ने धर्मसिन खुसमारत'अनर अबड़ा ओर्मर गे सान्ति मनन।”

15 मेर्खा पैकर आर ही गुसते मेर्खा किर्रिम बिच्चियर खने महरर ताम ताम बाचर, “गुचा, नाम बेतलहेम क'ओत ती ई मंजका कत्थन ऐरोत एका पत नू उर्बस नमन तिंकादस।”



- 16 आर लेम नगरे नू केरर अरा मरियम अरा योसेफसिन अरा चरनी नू कीदरका आ बोलो खद्दासिन ईरयर।
- 17 महरर आसिन ईरका खोखा असन एन्देर एन्देर मंजा अरा खद्दासी पत्त नू मेर्खा पैकस आरिन एन्देर एन्देर तिगियस अदिन ओर्मरिन तिगियर।
- 18 महरर ही इबड़ा कत्था गुट्ठिन मेंजर आर ओर्मर अकबकरर।
- 19 लिकिन मरियम इबड़ा जम्मा कत्था गुट्ठिन तंग्हे जिया नू अरबिया उइय्या ती सोच आलिया।
- 20 एकासे आर ही ती बातारकी रहचा, अन्नेम महरर जम्मन ईरयर अरा मेंजर ती धर्मसी महबा अरा ओहमा नन्नुम किरियर केरर।
- 21 खद्दासी आठ उल्ला पूरचा खने नैगर ती आसी खतना नन्ताचर अरा आसी नामे येसु पिंजियर। ई नामे दिम आस मरियम ही ओदर नू मन्ना ही मुन्द मेर्खा पैकस तिकाचस।
- 22 मूसासी नेग ही लेक्खा इकला मरियम ही सुध मन्ना ही बेड़ा अंइसिया, खने आर खद्दासिन येरुसलेम मन्दिर होचर का उर्बस गे आसिन सोंप ओर।
- 23 (एकासे का उर्बासी नेग नू लिखचका रई, “उमी जेट्ठा खद्दस उर्बस गे नेम्हा मनोस।”)
- 24 अउर हूँ आर उर्बासी नेग लेक्खा “पंइकी ही ओन जोड़ा महले पेरवाँ ही दुई गोट खद्द” ओन्द्र ती दाँडे नंजर।
- 25 आ बेड़ा येरुसलेम नू सुमेयोन नामे ओन्टा पचगी रहचस। आस उजगो अरा भगती आलस रहचस। आस इस्राएल ही नाइरनन ओन्द्र उसी पाब ऐरालियस। अरा नेम्हा बोलतस आसी मइय्याँ रहचस।
- 26 नेम्हा बोलतस आसिन एन्ने बाचकाचस का एका गूटी आस उर्बासी मसीसिन माल ऐरोस आ गूटी आस मल खेओस।
- 27 आस बोलतासी कइहाब अना ती आउलम धर्मसी मन्दिर नू बरचस। एकाबारी तंग्यो तम्बा खद्द येसुसिन नेग ही चाल लेक्खा उर्बस गे सोंप आ गे धर्मसी मन्दिर भितरी ओन्द्र।
- 28 सुमेयोनस खद्दासिन पक्कियस ती धर्मसी ओहमा नंजस ती बाचस,
- 29 “अना उर्बायो, नीन एंगन निंग्हे जोंखासिन निंग्हे आनका कत्था लेक्खा अक्कु ऐन सान्ति ती खेओन।
- 30 एन्देरगेका एंग्हे खन्न निंग्हे नाडुसिन ईरकी रई,



- 31 नीन आसिन ओर्मा आलर गे सपड़ाचकय।
- 32 ईस नन-यहूदीर गे धर्मसिन दहदर नन्ना ही बिल्ली अरा निंग्हे निज आलर इस्राएल गे महबा आबोन ओन्द्र'ओस।”
- 33 आसी तंगियो तम्बा आसी पत्त नू बाचका कत्थन मेनरकी अकबक मंजर।
- 34 फिन सुमेयोनस आर गे आसीस चिच्चस, अरा तंगियो मरियम आबोन बाचस, “ऐरय, धर्मस ई खद्दासिन इस्राएल नू बग्गे आलारिन धर्मस ती खतरत'आ गे अरा बग्गे आलारिन खुसमारत'आ गे चज्जियस। ईस धर्मस ती ओन्टा चेताब'अना ही चिन्हा र'ओस, लिकिन बग्गे आलर ईसिन हींङ'ओर।
- 35 औंगे बग्गे आलर ही जिया ही मलदौ सोच गुट्ठी दहदर मनो। अरा आलर आसिन भयभयान सस्ती ननोर, आद ओन्टा तलवार निंग्हे जियन आरपार उम्पना बेसे र'ओ।”
- 36 हन्ना नामे ओन्टा धर्मसी कत्था तिङ्गू आली हूँ धर्मसी मन्दिर नू रहचा। आद आसेरसी गोतोर नू फनुऐलसी तंग्दा रहचा। आद नगदे पच्चकी किरकी रहचा। आद बैजका खोखा तंग'आलस गने सात बछर लेका र'आ उंकी रहचा। फिन आस केच्चस केरस।
- 37 तहाँ आद चौरासी बछर ती रड़ियाही रहचा। आद धर्मसी मन्दिरन कहियोँ मल अम्बालिया। आद उल्ला माखा उपास अरा बिन्ती नन्नरकी धर्मसी महबा ननालिया।
- 38 आद हूँ आ बेड़ा नू असन बरचा ती धर्मसी ओहमा नना हेलरा। अरा आद ने येरुसलेम ही बछरना ही पाव ऐरालियर अबड़र ती खद्दस येसुसी पत्त नू कछनस्र'आ हेलरा।
- 39 खने योसेफ अरा मरियम उर्बासी नेग लेक्खा जम्मन मुंजा खच्चियर ती गलिलेया जिला ही तम्है पद्दा नासरेत किरियर।
- 40 खद्द येसुस परदनुम अरा सवंगिय मन्नुम केरस। अरा आस लूर ती बड़ियर मन्नुम केरस। अरा धर्मसी मया हूँ आसी गने रहचा।
- 41 येसुसी तंगियो तम्बा चानुम कट्टना परब नू येरुसलेम कालालियर।
- 42 इकला येसुस बारा बछर ही रहचस खने, आर तम्है चाल लेक्खा परब गे येरुसलेम केरर।
- 43 परब गुदरारका ती आर एड़पा किरा हेलरर। येसुस गा येरुसलेम नू रही केरस। इदन तंगियो तम्बा बल्ला लगियर।
- 44 आर सोच'आ लगियर का आस तम्है संगेर गने र'अस। आर उन्दुल ही डहरे ईक्काचर। अदही खोखा आर आसिन तम्है पाहियर नू अरा तम्है संगेर नू बेद्दा हेलरर।



- 45 लिकिन आस मल खक्खरस, खने आर बिद्दनुम बिद्दनुम येरुसलेम किरियर।
- 46 तिसर उल्ला नू आर आसिन धर्मेसी मन्दिर नू यहूदी सिखाब'उर गने ओक्करकी आर ती कत्था मेन्ना अरा आरिन प्रसन मेन्ना खक्खर।
- 47 ऐ बग्गे आलर येसुसी कत्थन मेनालियर आर आसी बुझुरना ती अरा आसी उत्तर चि'अना ती अकबकरर केरर।
- 48 येसुसी तंगियो तम्बा आसिन ईरियर ती अकबकरर। अरा आसी तंग्यो आसिन बाचा, “अना खद्दायो, नीन एम्है गने एन्देगे एन्ने नंजकय? ऐरा, निम्बस अरा ऐन हेन्दो मंजकम ती निंगन बेद्दा लिक्कम।”
- 49 येसुस आरिन बाचस, “नीम एंगन एन्देगे बेद्दालिक्कर? नीम बल्दर का एंगा एम्बासी एडपा नू र'अना दिम र'ई?”
- 50 लिकिन एका कत्थन येसुस आरिन बाचस अदिन आर मल बुझुर।
- 51 तहाँ आस आर ही गने नासरेत किरियस, अरा आर ही आकुस नू रहचस। लिकिन तंगियो इबड़ा जम्मा कत्थन तंगहै जिया नू उड्य्या।
- 52 येसुस लूर अरा परदनुम उसुगनुम केरस। अरा आलर आसिन पतारर अरा धर्मेस आस ती खुसमरस।

लूकस 3

- 1 कैसर तिबेरयुस रोम राजिन राजी नन्ना ही पन्द्रा बछर नू पोन्तियुस पिलातुस यूदेया जिला ही राजीखापू रहचस। आ बेड़ा हेरोदेस अंतिपस गलिलेया जिला ही बेलस रहचस। अरा आसी तंगिडिस फिलिप्पोस इतुरैया अरा त्राखोनितिस जिला ही बेलस रहचस। अरा लुसानियास अबिलेने जिला ही बेलस रहचस।
- 2 हन्नास अरा कैफस कोहाँ नैग रहचर। आ बेड़ा नू धर्मेसी कत्था टोडंग नू र'ऊ जकरियासी तंगदस योहनस गे बरचा।
- 3 खने योहनस यरदन खाड़ ही आ फड़ा ई फड़ा चक नू बरचस ती आलारिन तेंगा हेल्स, “जियन किर्त'आ अरा नोडर'आ होले धर्मेस निमन छमा ननोस।”
- 4 धर्मेसी कत्था तिंगू यसायास योहनसी पत नू लिखकाचस, एकासे का, “ओर्तोस टोडंग नू चिच्चियारदस, उर्बासी बरना गे निंगन सपड़'आ अरा आस गे डहरेन चत्र'आ।



- 5निम्है जिया नू उर्मी ढोइहा नीन्दतार'ओ कालो अरा उर्मी परता अरा टुंगरी किइय्या नन्तार'ओ, अरा टेइहो डहरे उजगतार'ओ, अरा गइडी डिप्पा डहरे सम नन्तार'ओ।
- 6अरा उर्मी आलर धर्मसी नाइना ही पत नू अख'ओर।”
- 7आलर गौहड़ा गौहड़ा योहनस गुसन नोइर'आ गे बर'आलियर। खने आस आरिन ब'आलियस, “अना बिक्ख नेरें बेसे आलारो, पाप नन्नन बिगर अम्बका ती धर्मसी बरना दंडे ती बांगा गे निमन निकईम चेता बाचर का?
- 8जियन किर्त'अना ही जोगे नलख नना। नीम तम्है तम्है जिया नू एन्ने अमा सोच'आ हेलरा का ऐम अब्राहमसी बनस ता हिकदम। ऐन निमन ब'अदन का धर्मस इबड़ा पखना गुट्ठी ती अब्राहमस गे खद्द कम'आ ओगदस!
- 9अक्कु धर्मसी रायबड़ी लेक्खा टोंग'ए मन्न ही पादा नू अबइन खंडरकी हेबड़ा गे खुतारकी रई। एका मन्न दौ खंजपा मल खंजई अबड़ा खंडरकी चिच्ची नू सजतार'ओ।”
- 10खने आलर योहनसिन मेंजर, “होले दंडे ती बछर'आ गे एमा एन्देर नन्ना रई?”
- 11योहनस आनाकिर्ताचस, “निंग्हे गुसन दुई गोटंग अत्तना रई होले, ओन्टा अत्तनन नेखा गुसन मल्ला आस गे चि'आ। अरा निंग्हे गुसन मंडी रई होले, अदन कीइर गे चि'आ।”
- 12ऊज'उर हूँ आस गुसन नोइर'आ गे बरचर अरा मेंजर, “अना गुरु, एमा एन्देर नन्ना रई?”
- 13योहनस बाचस, “एका बग्गे निमा गे ऊज'आ गे आनरकी रई अदिन ती बग्गे अमके ऊज'आ।”
- 14जोक्क सैनर हूँ आसिन मेंजर, “एमा एन्देर नन्ना रई?” योहनस आरिन बाचस, “नेखन हूँ देवाँ देवाँ नू ढिबा अमके हो'आ महले आलारिन अमके बझाब'आ। अरा नीम निम्है तनखानुम खतिर ननके।”
- 15ओर्मा आलर मसीसी बरना ही पाब ऐरालियर। अरा योहनसी पत नू ईर तम्है तम्है जिया नू सोच'आलियर का ईसिम गा मसीस मलदस।
- 16योहनस ओर्मरिन बाचस, “ऐन गा निमन अम्मु ती नोइरत'अदन, लिकिन एकास बर'ऊ र'अदस आस एंग्हे ती कोइहे सवंगिय र'अदस। ऐन ई जोगे हूँ मलकन का आसी जूता गुट्ठी ही ऐपन हूँ कोल्ला ओंगोन का एकदन बिट्ठी ननू जौखस लेका नन्दस। आस निमन नेम्हा बोलतस अरा चिच्ची ती नोइ'ओस।



- 17 आस तंग्हे केतेर ती गहूँन अरा चीखन बेगओस। अरा आस तंग्हे खलिन बेस लगे एर्रोस। अरा आस गोट गहूँन तंग्हे कुट्ठी नू उइय्योस, अरा चीखन चिच्ची नू बस्सोस एकदा इकला हूँ मल तेभरओ।”
- 18 ई लेक्खा योहनस सिखाबअरकी आलारिन धर्मस हेद्दे किरा गे चेताबअते रआलियस। आस आरिन दौ कत्था हूँ मेन्ताचस।
- 19 योहनस सन्नी बेल हेरोदेस अंटिपसिन हूँ केप्पस। एन्देरगेका आस तंग्गिस फि लिप्पोस उज्जनुम उज्जनुम आसी मुक्का हेरोदिया आबोन उइय्यस, अरा आस बग्गे मलदौ नलख हूँ नंजकाचस।
- 20 होले हेरोदेस इबड़ा जम्मा ती कोइहे ओन्टा मलदौ नलख नंजस का योहनसिन गुइताचस।
- 21 एकाबारी बग्गे आलर नोइरर मुंजर, अदही खोखा येसुस हूँ नोइरस। अरा आस बिन्ती ननालियस खने मेर्खा तिसग्रा केरा,
- 22 अरा नेम्हा बोलतस मेद ही रूपे नू पेरवाँ लेक्खा येसुस मइय्याँ इतियस। अरा मेर्खा ती एन्ने बअना मेन्द्रा, “नीन एंग्हे चोन्हा खद्दय हिकदय, ऐन निंग्हे ती बग्गे खुसमारदन।”
- 23 येसुस तान दौ कत्था मेन्तआ हेलरस खने, आस तीस बछर ही केम रहचस। येसुस बुझ्ग आलियस का आस योसेफसी तंग्दस। योसेफस ऐलीसी तंग्दस।
- 24 ऐलीस मत्तातसी तंग्दस, मत्तातस लेवीसी तंग्दस, लेवीस मेलखीसी तंग्दस, मेलखीस यन्नासी तंग्दस, यन्नास योसेफसी तंग्दस।
- 25 योसेफस मत्तातियासी तंग्दस, मत्तातियास आमोसी तंग्दस, आमोस नाहूमसी तंग्दस, नाहूमस हेसलीसी तंग्दस, हेसलीस नंगैसी तंग्दस।
- 26 नंगैस मातसी तंग्दस, मातस मत्तातियासी तंग्दस, मत्तातियास सेमेयिनसी तंग्दस, सेमेयिनस योसेखसिन तंग्दस, योसेखस योदासी तंग्दस।
- 27 योदास योअननसी तंग्दस, योअननस रेसासी तंग्दस, रेसास जोरोबाबेलसी तंग्दस, जोरोबाबेलस सलातिऐलसी तंग्दस, सलातिऐलस नेरीसी तंग्दस।
- 28 नेरीस मेलखीसी तंग्दस, मेलखीस अद्दीसी तंग्दस, अद्दीस कोसामसी तंग्दस, कोसामस एलमदामसी तंग्दस, एलमदामस ऐरसी तंग्दस।
- 29 ऐरस येसूसी तंग्दस, येसूस एलियेसेरसी तंग्दस, एलियेसेरस योरीमसी तंग्दस, योरीमस मत्तातसी तंग्दस, मत्तातस लेवीसी तंग्दस।



- 30 लेवीस सुमेयोनसी तंगदस, सुमेयोनस यूदासी तंगदस, यूदास योसेफसी तंगदस, योसेफस योनामसी तंगदस, योनामस एलियाकीमसी तंगदस।
- 31 एलियाकीमस मेलेयासी तंगदस, मेलेयास मेन्नासी तंगदस, मेन्नास मत्तातासी तंगदस, मत्तातास नातामसी तंगदस, नातामस दाऊदसी तंगदस।
- 32 दाऊदस येसैसी तंगदस, येसैस योबेदसी तंगदस, योबेदस बोआसी तंगदस, बोआस सलासी तंगदस, सलास नास्सोनसी तंगदस।
- 33 नास्सोनस अमिनदाबसी तंगदस, अमिनदाबस अदमीनसी तंगदस, अदमीनस अरनीसी तंगदस, अरनीस हेसरोमसी तंगदस, हेसरोमस फारेसी तंगदस, फारेस यहूदासी तंगदस।
- 34 यहूदा याकोबसी तंगदस, याकोबस इसाकसी तंगदस, इसाकस अब्राहमसी तंगदस, अब्राहमस तेरासी तंगदस, तेरास नाखोरसी तंगदस।
- 35 नाखोरस सेरूखसी तंगदस, सेरूखस रेगूसी तंगदस, रेगूस फेलेकसी तंगदस, फेलेकस एबेरसी तंगदस, एबेरस सलासी तंगदस।
- 36 सलास कायनामसी तंगदस, कायनामस अर्फकसादसी तंगदस, अर्फकसादस सेमसी तंगदस, सेमस नूहसी तंगदस, नूहस लामेखसी तंगदस।
- 37 लामेखस मतूसलासी तंगदस, मतूसलास हेनोखसी तंगदस, हेनोखस यारेदसी तंगदस, यारेदस मलेलेयेलसी तंगदस, मलेलेयेलस कायनामसी तंगदस।
- 38 कायनामस एनोसी तंगदस, एनोस सेतसी तंगदस, सेतस आदमसी तंगदस, आदमस धर्मेस ती गदूका रहचस।

लूकस 4

- 1 फिन येसुस नेम्हा बोलतासी सवंग नू मनरकी यरदन खाड़ ती किरियस। बोलता आसिन टोडंग नू काला गे कड़हाबाचा।
- 2 अइय्या चालीस उल्ला गूटी नाद आसिन बिदआलिया। अबड़ा उल्ला नू आस नीदी कूल रहचस। अरा अबड़ा उल्ला पूरचा खने आस गे कीड़ा लग्गिया।
- 3 खने नाद येसुसिन बाचा, “नीन धर्मेसी खददय होले, ई पखनन ब'आ का ईद ओन्ना-मोखना मनो कओ।”
- 4 येसुस आनाकिर्ताचस, “मला, एन्देरगेका नेम्हा पुथी नू लिखकी रई, ‘आलस ओन्ना-मोखना ती लेका मल उज्जोस।”



- 5 तहाँ नाद आसिन मेच्छा अड्डा नू कइहाबाचा अरा आसिन इकिम घड़ी नू खेखेल ता सौंसे राजी गुट्ठिन ऐदा,
- 6 अरा आसिन बाचा, “ऐन इबड़ा ही उर्मी आकुस अरा इबड़ा ही ओहमा निंगा गे चि'ओन। इबड़ा गा एंगा गे सौंपरकी किरकी रई, अरा ऐन इदन नेका चि'आ तुक्की आस गे चि'आ ओंगदन।
- 7 ओंगे नीन एंगन ओड़ लग्गोय होले, इबड़ा जम्मा निंगा चि'ओन।”
- 8 येसुस किर्त'अर बाचस, “मला, एन्देरगेका नेम्हा पुथी नू लिखकी रई ‘नीन निंग्हे धर्मे उर्बासिन ओड़ लग्गा, अरा आसी लेका महबा नना।”
- 9 तहाँ नाद आसिन येरुसलेम नगरे कइहाबाचा ती धर्मेसी मन्दिर ही अग्गी नू इजताचा, अरा बाचा, “नीन धर्मेसी खद्दय होले, नीन डेग'आ चि'आ।
- 10 नेम्हा पुथी नू गा लिखकी रई, ‘आस निंग्हे पत्त नू तंग्हे पैकारिन आनोस का आर निंगन खापोर अरा बछाब'ओर।
- 11 अरा आर निंगन खेक्खच खेक्खा हथल'ओर हो'ओर, होले एन्ने अम्बो मना का निंग्हे खेड्डेन पखना लग्गो।”
- 12 येसुस अदिन किर्त'अर बाचस, “मला, एन्देरगेका नेम्हा पुथी नू एन्ने हूँ लिखकी रई, ‘नीन निंग्हे धर्मे उर्बासिन अमा बिढ़'आ।”
- 13 एकाबारी नाद तंग्हे उर्मी बिढ़नन मुंजिया ती नन्ना मोका खक्खना गूटी आसी गुसते किर्मि बिच्चिया।
- 14 फिन येसुस नेम्हा बोलतासी सवंग खक्खकी गलिलेया जिला नू किर्यस। आसी पत्त ता कत्था अड्डे-बेड्डे ता उर्मी चकभार नू बीड़रा केरा।
- 15 आस यहूदीर ही गोइहा एइपा गुट्ठी नू सिखाब'आ हेलरस, अरा ओर्मर आसी ओहमा ननालियर।
- 16 फिन आस नासरेत नू बरचस, एसन आस पोसरका परदका रहचस। अरा तंग्हे चाल ही लेक्खा यहूदी खन्न ऐखना उल्ला नू यहूदीर ही गोइहा एइपा केरस। असन आस धर्मेसी पुथिन पढ़'आ गे इज्जस।
- 17 आस गे धर्मेसी कत्था तिंगुस यसायासी पुथी चितारा, अरा आस पुथिन चलख'अरकी आ अड्डन खक्खियस ती पढ़चस एसन एन्ने लिखकी रहचा:



- 18“उर्बासी बोलता एंगहे मइय्याँ रई, इदगे का आस एंगन कीडर गे दौ कत्था मेन्त'आ गे चज्जिकादस। अरा आस एंगन हेंरकारिन बछरनन तेंगा गे, अरा अन्धारिन ऐरत'आ गे, अरा ओर्मा तिरखरकारिन छोड़ाब'आ गे,
- 19अरा उर्बासी मया आर ही मइय्याँ र'ऊ चान ही पत्त नू तेंगा गे तइय्का र'अदस।”
- 20तहाँ आस पुथिन डबचस ती जोंखासी खेक्खा नू चिचचस अरा आलारिन सिखाब'आ गे उक्कियस। अरा गोइहा एइपा ता ओर्मा आलर आसिन ऐरते रहिकेरर।
- 21तहाँ आस आरिन ब'आ हेलरस, “नीम अक्कु एंगहे ती पढचकन मेंजकर, आद एंगहे ती इन्नम पुरचकी रई।”
- 22ओर्मर आसिन सहारर, अरा एका मया ही कत्था गुट्ठी आसी बई ती उरखालिया, अत्रु ती अकबक मंजर। लिकिन फिन ब'आ हेलरर, “ईस योसेफसी तंगदस मलदस का?”
- 23तहाँ आस आरिन बाचस, “नीम एंगहे मइय्याँ ई हना ब'ओर दिम का 'बैधायो, नीन निंगन कोडे नना,' ई कत्था ही मने नीम एन्ने मन'ओर का, 'एन्देर एन्देर ऐम मेंजकादम का हैकट नलख कफरनहूम नू नीन नंजकय, अदिन इसन हूँ नना।”
- 24अउरिम आस बाचस, “ऐन निमन ओन्टा मानिम कत्थन ब'अदन का 'एकअम धर्मेसी कत्था तिगुस तंगहे पोसरका परदका अड्डा नू मान मरजात मल खक्खदस।’
- 25लिकिन ऐन अउरिम ओन्टा मानिम कत्था ब'अदन का धर्मेसी कत्था तिगू एलियसी बेड़ा नू इस्राएल नू बग्गे रड़ियाहीर रहचर, इकला साढ़े तीन बछर गूटी चेष मल पुंईयाँ, खने गोट्टा राजी नू कोहाँ अकाल मंजा।
- 26लिकिन एलियस संगरा खक्खा गे अबडर ती नेखा गुसन हूँ मल तइय्यरस। सीदोन राजी नू सारेपत नगरे ता ओन्टा नन-यहूदी रड़ियाही गुसन लेका तइय्यरस।
- 27अरा धर्मेसी कत्था तिगू एलिसासी बेड़ा नू इस्राएल नू नगदे खसरा रोगियर रहचर, लिकिन सीरिया राजी ता ओन्टा नन-यहूदी नामानसिन अम्बर ने हूँ कोड़े मल मन्तारर।”
- 28गोइहा एइपा नू रहचर अबड़ा ओर्मर येसुसी ई कत्थन मेंजर खने, आर खींस मंजर केरर।
- 29अरा आर चोच उक्कियर ती आसिन नगरे ती बहरी ओथ्रर। अरा आसिन तम्है ओक्करका नगरे ता परता ही टुंगरी मइय्याँ अरगाचर। एन्देरगेका आसिन आर मइतले किइय्या तुक्का गे सोचचर।
- 30लिकिन आस आर ही मझी ती बुचडारस ती किरिम बिच्चियस।



- 31 तहाँ येसुस गलिलेया जिला ही कफरनहूम नगरे नू केरस। अरा खन्न ऐखना उल्ला नू आलारिन सिखाब'आलियस।
- 32 अरा आसी सिखाब'अना ती आर अनचकरर केरर। एन्देगेका आस आकुस गने ब'आ लगियस।
- 33 अरा असन गोइहा एइपा नू मलदौ बोलता ती धरचका ओन्टा आलस रहचस। अरा आस जोरसरिया चिच्चियारस।
- 34 “अना नासरेत ता येसु, निंगा एम्है गने एन्दे नलख रई, अमा थोकबोकामब'आ, नीन एमन नास नना गे बरचकादय का? ऐन निंगन अखदन नीन ने तंग्हे, नीन धर्मसी नेम्हा आलय।”
- 35 येसुस अदिन केप्पस ती आनियस, “कलेकले र'अय, अरा ई आलस ती उरखय कलय।” खने मलदौ बोलता आसिन आर ही मड़ी नू कचड़'अरकी आसिन बिगर बगड़'अर आसी मइतले उरखा केरा।
- 36 खने इबड़ा जम्मर गे अकबक मंजा, अरा आर ताम ताम कछनर'आ लगियर, “ईद कोइहे बेस कत्था हिके! तंग्हे आकुस अरा सवंग ती ईस मलदौ बोलता गुट्ठिन पेसदस, अरा अबड़ा हूँ उरखी कई।”
- 37 अरा येसुसी पत ता कत्था आ चकभार नू ओनबेंडर'आ उर्मी अइडा नू मना हेलरा।
- 38 येसुस गोइहा एइपा ती चोचस ती सिमोनसी एइपा कोरचस। असन सिमोनसी तंग्सास गे नगदे नाड़ी रहचा। अरा अबड़र अदिन कोड़े नना गे आस ती गोहरारर।
- 39 आस अदही हेद्दे इज्जस ती नाड़िन केप्पस अरा नाड़ी तम्मिया केरा। अरा आद लेम चोचा ती आर ही तेतर-सुसर नना हेलरा।
- 40 बीड़ी पुतबारी अबड़ा आलर ने ने कैनो मदहे बेमार ती लिंडरका रहचर आर जम्मरिन आसी गुसन ओन्द्रर। अरा आस ओरोत ओरोत मइय्याँ खेक्खा उइय्यस ती कोड़े नंजस।
- 41 अरा नाद गुट्ठी हूँ चिच्चियारनुम नगदे आलर ती उरखा केरा अरा ब'आलिया का “नीन धर्मसी खद्दय हिकदय”। लिकिन आस अबड़न केबालियस अरा तंग्हे पत नू ब'आ मल चिच्चस। एन्देगेका अबड़ा आसिन अख'आलिया का आस मसी हिकदस।
- 42 बिज्जया खने आस उरखस ती ओन्टा उछिन्द अइडा नू बिन्ती नना गे केरस। अरा गोंहड़ा आसिन बिद्दनुम बरचा। अरा आसिन खक्खिया खने अबड़र आसिन छेंकेच ईरियर का आस आर ही गुसते अम्बोस काला।



43 लिकिन आस आरिन बाचस, “एंगा नन्ना नगरे नू हूँ धर्मसी राजी ही दौ कत्था मेन्त'अना रई। एन्देरगेका ऐन इदगेम तइरकादन।”

44 अरा आस यूदेया ही गोइहा एइपा गुट्ठी नू दौ कत्था मेन्त'आ लगियस।

लूकस 5

1 उन्दुल येसुस गेन्नेसरेत समुदर ही पिंडी नू इज्जकाचस। आ बारी ओन्टा गोंहड़ा धर्मसी कत्था मेना गे खतरना चो'अना बेसे आसी हेददे बर'आलिया।

2 खने आस समुदर ही पिंडी नू ऐंड़ गोट डोंगा इज्जका ईरयस। केंवटर अइय्या ती इतियर ती जल्ली गुट्ठिन नोइलियर।

3 येसुस अबड़ा डोंगा गुट्ठी ती ओन्टा नू अरगियस एकदा सिमोनसी रहचा। अरा आसिन बाचस का पिंडी ती कटिक गुछा ब'आ। तहाँ येसुस डोंगा नू उक्कियस ती आलारिन सिखाब'आ हेलरस।

4 एकाबारी आस तेंगा मुंजियस तहाँ सिमोनसिन बाचस, “डोंगन खोइखा नू हो'आ, अरा इंजो ल'आ गे जल्ली हेबड़ा।”

5 सिमोनस आसिन किर्ता'अर बाचस, “अना उर्बायो, ऐम गोट्टा माखा लौच ईरकम, लिकिन एन्द्रा हूँ मल खक्खकम, अन्नु हूँ निंगहै ब'अना लेक्खा जल्ली हेबड़दन।”

6 एकाबारी आर एन्ने नंजर खने नगदे इंजो खोंइचर ओन्द्रर का आर ही जल्ली चर'आ हेलरा।

7 खने आर तंगहै संगेरिन ने नन्ना डोंगा नू रहचर आरिन खेक्खा ती मी'खियर का बर'अरकी एमन सहाड़ा नना। अरा आर बरचर ती दुयो डोंगा नू निन्दर का डोंगा मुलखा बेद'दालिया।

8 सिमोन पतरस इदिन ईरयस ती येसुसी खेडमूली खतरस ती बाचस, “अना उर्बायो, एंगहै गुसले कला, एन्देरगेका ऐन पपहा आलन हिकदन, अरा निंगहै जोगे मलकन।”

9 एन्देरगेका एन्ने बग्गे इंजो बज्झारा, खने आस गे अरा आसी गने ने ने रहचर आर गे नगदे अकबक मंजा।

10 सिमोनसी संगे नलख ननू जेबदयुसी तंगदस याकोब अरा योहनस हूँ अकबक मंजर। खने येसुस सिमोनसिन बाचस, “अमा एल्चा, नीन अक्कु ती एंगहै तरा आलारिन ओन्द्रना ही नलख ननोय।”

11 अरा आर डोंगन पिंडी नू ओन्द्रर बरचर, अरा जम्मा जातन अम्बियर ती येसुस गने चोंखर।



- 12 येसुस ओन्टा पद्दा नू बरचस, असन ओन्टा कुड़गा खादी ती लिन्डरका आलस रहचस। एकाबारी आ आलस येसुसिन ईरयस खने आस खोलखरस ती खतरस ती गोहरारस, “अना उर्बायो, एंगन कोड़े ननम चिआ, ऐन गा अखदन का निंगहै मने रई होले, नीन एंगन कोड़े नना ओंगदय।”
- 13 येसुस खेक्खा ती आसिन ऐंसइस ती बाचस, “एंगहै मने रई का नीन कोड़े मना कला।” आ बारिम आसी खसरा रोगे कोड़े मंजा केरा।
- 14 खने येसुस आसिन बाचस, “नेखा ती हूँ ई पत नू अक्कुन अमके तेंगा, लिकिन कला अरा निंगन नैगासिन ऐदआ, ओंगे आस निंगन जांचओस का खसरा रोगे निंगहै ती बोंगा केरा, अरा निंगहै सफा मन्ना ही पत नू मूसस एन्देर दाँड़े अरगाआ गे आनकादस, अदिन दाँड़े चिआ। ईद आलर गे गोवाह मनो का नीन सफा मन्तारकादय।”
- 15 लिकिन येसुसी पत ता कत्था अउर हूँ बीइरा केरा। अरा गोंहड़ा गोंहड़ा येसुस ती मेना गे अरा तम्है बेमार ती उजगारआ गे खोइरा।
- 16 लिकिन येसुस उछिन्द अइडा नू कालरकी बिन्ती नना लगियस।
- 17 उन्दुल येसुसी सिखाबअना बेड़ा फरिसीर अरा नेग सिखाबउर असन उक्का रहचर। एकाबइर गलिलेया जिला ही बग्गे पद्दा गुट्ठी ती अरा येरुसलेम ती अरा यूदेया जिला ही नन्ना पद्दा ती बरचका रहचर। अरा कोड़े नना गे धर्मसी सवंग येसुस गने रहचा।
- 18 आ बारी जोक्क आलर ओन्टा लकवा बेमरहासिन खटी नू ओन्द्रर, अरा आर आसिन भितरी होअना ही अरा येसुसी मुन्दहारे उइय्ना ही चिताबुता नंजी ईरियर।
- 19 लिकिन बग्गे गोंहड़ा ही चइडे भितरी होआ पोल्लर, खने आर मेसगा नू अरगियर ती जोक्क खपरन ताइचर ती आसिन खटी रांगे येसुसी मुन्दहारे एताचर चिचचर।
- 20 येसुस आर ही पतअनन ईरयस ती बाचस, “अना आलायो, ऐन निंगहै पाप गुट्ठिन छमा नन्दन।”
- 21 खने नेग सिखाबउर अरा फरिसीर ताम ताम नू कछनखआ हेलरर, “ईस ने तंगहै? ई आलस धर्मसिन निंदा नन्दस। धर्मसिन अम्बर ने पाप गुट्ठिन छमा नना ओंगोर?”
- 22 लिकिन येसुस आर ही जिया ता कत्थन अक्खस ती आरिन बाचस, “नीम निम्है जिया नू एन्देरगे सोचआलदर?”
- 23 ‘निंगहै पाप छमा नन्तारई’ एन्ने बअना ‘चोआ अरा कुद्दा नुंगा’ एन्ने बअना ती सेब्बा हवे। एन्देरगेका आलर कोड़े मन्नन ऐरा ओंगर, लिकिन पाप छमा मन्नन ऐरा पोलनर।



- 24 लिकिन ऐन ई आलासिन कोड़े नन्ना ती निमन ऐद'ओन का एंगा, मनवा खद्दन गे आलर ही पाप गुट्ठिन छमा नना गे हूँ खेखेल नू आकुस र'ई।" खने आस लकवा बेमरहासिन आनियस, "ऐन निंगन ब'अदन, 'चो'आ, निंगहै खटिन चेड़'अरकी एड़पा कला।"
- 25 आ आलस ओर्मर ही ऐथ्रना नू लेम चोचस, अरा एका खटी नू चूतकाचस अदिन चेड़स ती धर्मस गे ओहमा नन्नुम ईकनुम एड़पा केरस।
- 26 ओर्मर अनचकरर केरर, अरा आर धर्मसिन ओहमा नंजर अरा बग्गे इल्चनुम बाचर, "नाम इन्ना अकबक नलख गुट्ठिन ईरका र'अदत।"
- 27 इदही खोखा येसुस बहरी उरखस अरा लेवी नामे ओन्टा मालगुजारी ऊज'उसिन मालगुजारी ऊज'ऊ एड़पा नू उक्का ईरियस। अरा येसुस आसिन बाचस, "एंगहै गने चोख्र'आ।"
- 28 होले आस जम्मा जातन अम्बियस ती चोचस अरा आसी गने चोख्रस।
- 29 तहाँ लेवीस तंगहै एड़पा नू येसुस गे ओन्टा कोहाँ मदी चिचस। अरा असन बग्गे मालगुजारी ऊज'उर अरा नन्ना आलर हूँ आर गने मंडी ओना उक्का रहचर।
- 30 खने फरिसीर अरा नेग सिखाब'उर आसी चेलारिन कुटमुटर'आ हेलरर ती बाचर, "नीम मालगुजारी ऊज'उर अरा नन्ना पपहर गने एन्देर गे ओन्दर मोखदर?"
- 31 येसुस आरिन किर्त'अर बाचस, "कोड़े दौ आलर गे बैधसी चाड़ मल्ला, लिकिन बेमरहर गे र'ई।
- 32 अन्नेम ऐन ने तमन उजगो सोचनर आर गे मला ने तमन पपहा बुझुरनर आरिन जियन किर्त'आ गे एड़'आ बरचका र'अदन।"
- 33 फिन आर येसुसिन मँजर, "योहनसी चेलर गा खनिम खनिम उपास नन्नर अरा गोहरारनर, अरा अन्नेम फरिसीर ही चेलर हूँ नन्नर। लिकिन निंगहै चेलर गा ओन्नर मोखनर।"
- 34 येसुस आरिन बाचस, "नीम एका गूटी बैजा जौखस बरतियर गने र'अदस आरिन उपास नन्त'आ ओगदर का?"
- 35 लिकिन बैजा जौखस आर ती होत'अरना बेड़ा बर'ओ, अबड़ा उल्ला गुट्ठी नू आर उपास ननोर।"
- 36 आस ऐनोटा जोक्खा खीरी हूँ आरिन तिगियस, "ने हूँ पुना किचरी ती ओन्टा कुटका चरनर ती पच्चा किचरी नू मल सटई तुनई, अन्ने आस नन्दस होले पुना एटर'ओ कालो अरा आद पच्चा गने मेल मल मोखो।



37 अरा ने हूँ पुना अंगुर रासी आबोन चपटा ही पच्चा कुड़वा नू मल निन्ददस उइय्दस, अन्ने नन्दस होले, पुना अंगुर रासी अमचूर मनो ती चपटा ही कुड़वन पलको चि'ओ, अरा अंगुर रासी बाह'ओ क'ओ अरा चपटा ही कुड़वा नठार'ओ क'ओ।

38 औंगे पुना अंगुर रासी आबोन चपटा ही पुना कुड़वा नू निन्दना उइय्ना मनो।

39 अरा ने हूँ पच्चा अंगुर रासिन ओन्दस ती पुना मल बेद्ददस, एन्देरगेका आस ब'अदस का पच्चा दिम बेस र'ई।”

लूकस 6

1 ओन खन्न ऐखना उल्ला नू येसुस खल्ल गुट्ठी नू मन्नुम कालियस, अरा तंग्हे चेलर बालन तोंखा तोंखा खेक्खा ती रमद'आ रमद'आ मोक्खर।

2 खने जोक्को फरिसीर बाचर, “नीम एन्ने नलख एन्देरगे नन्दर एकदा खन्न ऐखना उल्ला ही नेग ही बिड़दो र'ई?”

3 अरा येसुस आरिन किर्त'अर बाचस, “नीम नेम्हा पुथी नू एन्देर पढ़चकर सुरता मल नन्दर का? इकला दाऊद बेलस अरा तंग्हे संगेर कीड़ा रहचर, खने आस एन्देर नंजस?

4 आस धर्मसी एड़पा नू कालरकी नैगस धर्मस गे दाँडे नंजका असमन होचस ती मोक्खस, अरा तंग्हे संगेर गे हूँ चिच्यस, एकदन मोखना मूसासी पेसका नू नैगारिन अम्बरकी नेका हूँ नेग मल्ला।”

5 अरा येसुस आरिन बाचस, “मनवा खद्दन एंगा हूँ एंग्हे गने चो'अर'उर गे खन्न ऐखना उल्ला नू एन्देर एन्देर नन्ना र'ई, अदही फैसला नना गे अदिया र'ई।”

6 अउर ओन्टा खन्न ऐखना उल्ला नू येसुस गोड़हा एड़पा नू केरस ती सिखाब'आ हेलरस, अरा असन ओन्टा आलस रहचस आसी तीना खेक्खा खैकी रहचा।

7 जोक्को फरिसीर अरा नेग सिखाब'उर आसिन बदी ठेकाब'अना ही ताक नू मोका बेद्दना नू रहचर, का आस खन्न ऐखना उल्ला नू कोड़े नन्दस का मला।

8 लिकिन आस आर ही जिया ता कत्थन अख'आ लगियस। औंगे आस आ खैका खेक्खा आलासिन बाचस, “चो'आ ओर्मर ही मुन्दहारे इज'आ।” अरा आस इज्जस केरस।

9 तहाँ येसुस आरिन बाचस, “ऐन निमन मेन्दन, खन्न ऐखना उल्ला नू मूसासी पेसका लेक्खा एन्देर नन्ना बेस हिके, दौ नन्ना का मलदौ नन्ना, नेकअनिम कोड़े नन्ना ती आसिन बछाब'अना का कोड़े मल नन्ना ती आसिन खे'आ चि'अना?”



- 10 खने आस चरियो तरा आर ओर्मरिन ईरीयस ती आ आलासिन बाचस, “निंगहै खेक्खन लमाब'आ।” आस अन्नेम नंजस अरा आसी खेक्खा कोड़े मंज खच्चिया।
- 11 खने आर नगदे जंगारर ती तम्है मझी नू सलहा मना हेलरर का नाम येसुसी बिड़दो नू एन्देर ननोत।
- 12 अबड़ा उल्ला नू आस ओन्टा टुंगरी मइय्याँ गोहरार'आ केरस, अरा धर्मस ती गोहरारना नू गोट्टा माखा पहा बाचस।
- 13 अरा बिज्जिया खने आस तंगहै चेलारिन मीखियस अरा आर ही ती बारा गोटंग आलारिन चज्जियस अरा आर गे तइरकर नामे चिच्चस।
- 14 आर ईर हिकनर, सिमोन आसी नामे येसुस पतरस पिंजियस अरा आसी भइय्योस अन्द्रेयस अरा याकोब अरा आसी भइय्योस योहन अरा फिलिप्पोस अरा बरतोलोमैस
- 15 अरा मत्तायोस अरा तोमस अरा हलफैसी तंगदस याकोब अरा यहूदीर ही छछिन्द सैना ता सिमोन
- 16 अरा याकोबसी तंगदस यूदस अरा यूदस इसकारियोत एकास खोखा येसुसिन धरताचस।
- 17 तहाँ येसुस तंगहै बारा चेलर गने टुंगरी ती इतियस ती टोंका अइडा नू इज्जस। आसी चेलर ही ओन्टा कोहाँ गोंहड़ा असन रहचा। अरा येरुसलेम नगरे अरा यूदेया जिला ही नन्ना अइडा अरा समुदर पिंडी ता नगरे तुरोस अरा सीदोन ती बरचका ओन्टा कोहाँ गोंहड़ा हूँ असन रहचा।
- 18 ईर आस ती मेना गे अरा तम्है रोगे ती उजगार'आ गे आसी गुसन बरचका रहचर। अरा ने मलदौ बोलता गुट्ठी ती सतारका रहचर आरिन आस कोड़े नंजस।
- 19 ओर्मर आसिन एंसड़'आ बेद्दा लगियर, एन्देरगेका आसी ती सवंग उरखरकी ओर्मरिन कोड़े ननालिया।
- 20 खने येसुस तंगहा चेलर तरा किर्रे ईरीयस ती बाचस, “अना मलकारो धर्मस निम्हा ती खुसमारदस, एन्देरगेका धर्मसी राजी निम्है दिम हवे।
- 21 अक्कुन कीड़ा सार'उरो निम्हा ती धर्मस खुसमारदस नीम गा उड़तार'ओर। अक्कुन चींखू आलारो नीम गा अलखोर।
- 22 मनवा खद्दस चइडे आलर निमन छिंडोर अरा निमन अम्बोर चि'ओर अरा निमन हींड़'ओर अरा निम्है नामेन मलदौ ब'ओर ती खंडोर चि'ओर होले धर्मस निम्हा ती खुसमार'ओस।



- 23 आर इबड़न नन्नर खने नीम खुसमार'अरकी रिझ'आ, एन्देरगेका मेर्खा नू निमा खक्ख'ऊ इनाम कोहाँ रई। सुरता नना का आर ही पूरखर हूँ धर्मसी कत्था तिंगुर गने एन्नेम ननालियर।
- 24 लिकिन ओहरे नीम उरुब आलारो, नीम गा निम्है उर्मी सुक्खे अरा रिझ खक्खा खचकर।
- 25 ओहरे नीम अक्कु उड़तारका र'ऊ आलारो, नीम गा कीड़ा सार'ओर। ओहरे नीम अक्कु अलखू आलारो, नीम गा दुक्खे सार'ओर अरा चींखोर।
- 26 ओहरे निमन इकला ओर्मा आलर सहाररनर, एन्देरगेका आर ही पूरखर हूँ ठक'ऊ धर्मसी कत्था तिंगुर गने एन्नेम नना लगियर।
- 27 लिकिन एंग्हे मिन्ू आलर निमन ऐन ब'अदन का तम्है बैरीरिन चोन्हा नना। निमन छिंडुर गे दौ नना।
- 28 निमन सर्प'उर गे आसीस चि'अके। निमन हींडुर गे बिन्ती ननके।
- 29 निंगन हींड'आ गे निंग्हे ओन्टा गल्लेन थपड़'उस गे नन्ना गल्लेन हूँ ऐदके। निंग्हे बर्कन बच्चुस गे निंग्हे अंगन हूँ हो'आ गे अमके छेक'आ।
- 30 निंग्हे गुसन ने'ऊ ओर्मर गे चि'आ। अरा निंग्हे जिनिसन हो'उस ती अदिन खक्खा गे आसिन देवा अमके नना।
- 31 आलर एकासे निमन नना नीम बेद्ददर, अन्नेम नीम आर गे नना।
- 32 नीम तम्है चोन्हा ननुर ती लेका चोन्हा नन्दर होले धर्मस ती एन्देर इनाम खक्ख'ओर? पपहर हूँ गा तम्है चोन्हा ननुरिन चोन्हा नन्नर।
- 33 नीम तम्है दौ ननुर गने लेका दौ नन्दर होले एन्देर नफा मनो? पपहर हूँ गा अन्नेम नन्नर।
- 34 नीम नहड़ा कित्त'अर चि'ओर ब'अरकी असरा ती नहड़ा चि'अदर होले नीम एन्देर इनाम धर्मस ती खक्खोर? पपहर हूँ गा पपहर गे नहड़ा चि'अनर का फिन अउन्दम खक्खोम।
- 35 औंगे अपन बैरीरिन चोन्हा नना अरा आर गे दौ नना। अरा खक्खना ही असरा मल ननरकी नहड़ा चि'आ। होले निमा गे बग्गे इनाम खक्ख'ओ, अरा नीम उर्मी ती मेच्छा नू र'ऊ धर्मसी खददर लेक्खा मनोर। सुरता ननके का धर्मस गा धन्यबाद मल नन्नुर अरा मलदौ आलर मइय्याँ हूँ सोग्गे ऐरदस।
- 36 एकासे निम्है मेर्खा ता बंगस निमन सोग्गे ईरू र'अदस अन्नेम नीम हूँ सोग्गे ईरू मना।



- 37 नीम नन्नारिन नेंवई अमा नना, होले नीम हूँ धर्मस ती नेंवई मल नन्तार'ओर। नीम नन्नारिन बदी अमा टिड़'आ, होले नीम हूँ धर्मस ती बदी मल टिड़तार'ओर। नीन नन्नर ही गुन्हन अम्बदय होले निम्है गुन्हा हूँ धर्मस ती अम्बतार'ओ।
- 38 चि'आ, होले निमा हूँ धर्मस ती चीतार'ओ। धर्मस निमा गे अरबा अरबा अरा नुकुच नुकच अरा बीजरना बेसे दौ जोखना ती निम्है कोरा नू चि'ओस। नीम एका जोखना ती जोख'ओर आ जोखना तिम निमा गे हूँ धर्मस ती जोखतार'ओ।”
- 39 येसुस ओन्टा जोक्खा खीरी तिगियस: “अन्धहस अन्धहासिन डहरे ऐद'आ ओंगोस का? मला। एन्ने ननोस होले इरबारिम गड्डी नू खत्र'ओर।
- 40 चेलस तंग्हे गुरुस ती कोहाँ मलदस। लिकिन एकास पखड़ मनोस आस गुरुस लेक्खा मनोस।
- 41 नीन निंग्हे खन्न ता चइलन मल थिथाब'अदय, लिकिन निंग्हे भईसी खन्न ता कंटेन एन्देगे ऐरदय?
- 42 नीन निंग्हे खन्न ता चइलन मल थिथाब'अदय ती निंग्हे भईसिन ब'अदय, अना भई, ऐन निंग्हे खन्न ता कंटेन ओथ्र'ओन चि'ओन, एन्ने एन्देगे ब'अदय? अना उत्तुरमाडू, मुन्द निंग्हे खन्न ता चइलन ओथ्र'आ, होले नीन निंग्हे भईसी खन्न ता कंटेन ओथ्र'आ गे फरीफरी ऐरा ओंगोय।
- 43 बने मन्न चिम्मो मल खंजई, अरा पयहा मन्न ठोस खंजपा मल खंजई।
- 44 उर्मी मन्न तंग्हे तंग्हे खंजपा ती चिन्हर'ई, एन्देगेका खोप्पा ती अंजीर मल चोखनर, अरा अच्च-खोप्पा ती अंगुर मल चोखनर।
- 45 अन्नेम दौ आलस तंग्हे दौ जिया ही दौ कुट्ठी ती दौ नलखन नन्दस, अरा मलदौ आलस तंग्हे जिया ही मलदौ कुट्ठी ती मलदौ नलखन नन्दस। एन्देगेका जिया नू एन्द्रा निन्दकी र'ई आदिम बई ती उरखी।
- 46 नीम एंग्हे ब'अनन मल पेस्रदर, होले हूँ एंगन अना उर्बायो, अना उर्बायो, एन्देगे ब'अदर?
- 47 एका ओर्तर एंग्हे गुसन बरनर अरा एंग्हे कत्थन मेन्नर ती अदिन अन्नेम नन्नर। ऐन निमन तेंगोन का आर नेख'आ बेसे र'अनर।
- 48 आर आसी बेसे र'अनर का एकास गड्डी अरखियस ती चचड़ी नू नेव नंजस ती एडपा कमदस। बहड़ी बरचा खने आ एडपा नू लग्गिया लिकिन आद अदिन नुक'आ पोल्ला। एन्देगेका आद चचड़ी नू नेव कमचका रहचा।



49 लिकिन एका ओर्तर एंग्हे कथन मेन्नर ती अदिन अन्नेम मल नन्नर। आर आसी बेसे र'अनर का एकास धूली नू बिगर नेव ही एडपा कमचस। बहड़ी आ एडपा नू लग्गिया खने लेम आद खतरा ती छिती छान मंजा केरा।”

लूकस 7

1 येसुस इबड़ा कथन आलर गे तेंगा मुंजियस ती कफरनहूम नगरे केरस।

2 असन रोमी सौ सैनर ही मुद्धासी ओन्टा बेस बने जोंखस रहचस। आस बेमार ती खेआ बेद्दा लगियस।

3 आ सौ सैनर ही मुद्धस येसुसी हलन मेंजस ती यहूदी सेयान आलारिन आसी गुसन एन्ने नेआ गे तइय्यस का आस बरओस ती एंग्हे जोंखासिन उजगओस।

4 आर येसुस गुसन बरचर ती आसिन नगदे गोहरारर ती ब'आलियर, “नीन आस गे संगरा नना गे आस जोगे र'अदस।

5 एन्देरगेका आस नमन यहूदीरिन चोन्हा नन्दस, अरा एमा गे ओन्टा गोड़हा एडपन कमचका र'अदस।”

6 खने येसुस आर ही गने केरस, लिकिन एडपा अंडसकम रहचस खने, सौ सैनर ही मुद्धस तंग्हे जोक्को संगेरिन आसी गुसन तेंगा गे तइय्यस, “अना उर्बायो, नीन दुक्खे अमा चोद'आ, ऐन गा यहूदी मलना चड्डे ई जोगे मलकन का नीन एंग्हे एडपा भितरी बर'ओय।

7 अरा ऐन निंग्हे हेद्दे बर'आ गे हूँ जोगे मलकन, लिकिन ओन्टा कत्था लेका आना चि'आ होले एंग्हे जोंखस उजगार'ओस।

8 ऐन हूँ गा आकुस ही किइय्या ता आलन हिकदन अरा एंग्हे आकुस किइय्या सैनर र'अनर। ऐन ओर्तोसिन 'बरा' ब'अदन होले आस बरदस अरा अउर नन्नासिन 'कला' ब'अदन होले आस कादस अरा एंग्हे जोंखासिन 'नना' ब'अदन होले आस नन्दस। ऐन पत्त'अदन का निंगा हूँ एन्ने आकुस र'ई।”

9 येसुस इदिन मेंजस ती आसी पत्त नू अकबकरस। अरा आस तंग्हे खोखा चोंख'ऊ गोंहड़ा आबोन ऐर'अरकी बाचस, “ऐन निमन ब'अदन का इस्राएल नू हूँ एन्ने नन-यहूदीर ती एंग्हे मइय्याँ पत्ताचका आलासिन ऐन मल ईरकन।”

10 अरा तइय्का आलर एडपा किरियर ती आ जोंखासिन कोड़े मंजका ईरियर।



- 11 अदही खोखा आस नाईन नामे ओन्टा नगरे नू केरस, आसी चेलर अरा कोहाँ गोंहड़ा आसी खोखा काला लगिया।
- 12 आस नगरे ही फाटक गुसन अंडसियस खने, आलर ओन्टा केचका आलासिन चेड़'अरकी बहरी हो'आ लगियर। आस तंगियो ही ओन्टे लेका खद्दस रहचस। अरा आद रड़ीयाही रहचा। अरा आ नगरे ता ढेर आलर अदही गने रहचर।
- 13 उर्बस अदिन ईरयस खने आस गे अदही मइय्याँ सोग्गे लगिया, अरा अदिन बाचस, “अमय चीखय।”,
- 14 आस हेद्दे केरस ती सार आबोन एवंढरस, खने चिड़'ऊ आलर इज्जर केरर। अरा आस बाचस, “अना जोंखायो, ऐन निंगन ब'अदन चो'आ।”
- 15 खने केचका आलस चोचस, अरा ब'आ हेलरस। अरा येसुस आसिन तंगियो गे चिच्चस।
- 16 ओर्मर गे इल्चका कोरचा केरा, अरा धर्मेसी ओहमा नंजर ती ब'आ लगियर, “नम्है मड़ी नू ओन्टा कोहाँ धर्मेसी कत्था तिं'गुस बरचकादस, अरा धर्मेस तंग्हे आलर मइय्याँ सोग्गे ईरकादस।”
- 17 अरा येसुसी पत्त ता इबड़ा कत्था गोट्टा यूदेया जिला अरा अड्डे-बेड्डे ता उर्मी चक नू बींइरा केरा।
- 18 योहन नूडरत'उस गे तंग्हे चेलर येसुसी नंजका इबड़ा उर्मी कत्था ही हाल चिच्चर। खने योहनस तंग्हे ऐंइ चेलारिन मीखियस,
- 19 अरा येसुसिन इदिन मेना गे तइय्यस, “बर'ऊ मसीस नीनिम हिकदय का महले एकअम नन्नारिन ऐम पाब ऐरोम का?”
- 20 अबडर येसुस गुसन बरचर ती आसिन बाचर, “योहन नूडरत'उस एमन निंग्हे गुसन इदिन मेना गे तइय्यस का, ‘बर'उस नीनिम हिकदय का, महले ऐम नन्नारिन पाब ऐरोम का?’”
- 21 आ बेड़ा नुम येसुस कुदहा आलारिन बेमार अरा नुंजना गुट्ठी अरा मलदौ बोलता गुट्ठी ती कोड़े ननालियस। अरा बग्गे अन्धहा आलारिन कोड़े नंजस।
- 22 अरा येसुस आरिन बाचस, “नीम एन्देर एन्देर ईरकर अरा मेंजकर अदिन कला ती योहनसिन तेंगा चि'आ, अन्धहर ऐरनर अरा लेंगडर ऐकनर अरा खसरा रोगियर सफा नन्तारनर अरा भइरा आलर मेनालनर अरा केचका आलर उज्जतारनर अरा कीइर गे दौ कत्था तेंगतार'आ लगी।
- 23 अरा योहनसिन तेंगा, ‘एंग्हे चड्डे एका ओर्तोस तंग्हे पत्त'अना नू मल मूडदस आस आसीस खक्खोस।”



- 24 योहनसी चेलर किरिम बिच्चयर अदही खोखा, येसुस योहनसी पत नू गोंहइन ब'आ हेलरस, “नीम टोडंग नू एका बेसे आलासिन ऐरा केरका रहचकर? नेखा सिखाब'अना ताका ती नुकुरना पोंडा बेसे रई आसिन का?
- 25 महले एका बेसे आलासिन ऐरा केरका रहचकर? लेपलेपे किचरी अतका आलासिन का? मला, ने लेपलेपे किचरी अतनर आर बेल एडपा नूर'अनर।
- 26 होले नीम एका बेसे आलासिन ऐरा केरका रहचकर? ओन्टा धर्मसी कत्था तिगुसिन का? हाँ, लिकिन ऐन निमन ब'अदन का योहन ओन्टा धर्मसी कत्था तिगुस ती कोहँस।
- 27 ईसी पत नू नेम्हा पुथी नू एन्ने लिखकी रई, ‘ऐरा, ऐन एंग्हे पैकासिन निंग्हे ती मुन्द तइय्या लगदन, आस निंग्हे मुन्द निंगा गे डहरेन सपड़'ओस।’
- 28 ऐन निमन ब'अदन का जेतेक कुन्द्रका र'अनर, अबड़र नू योहनस ती कोहाँ ने हूँ मत्कर, लिकिन धर्मसी राजी नूर'ऊ ओर्मर नू ने सन्नी ती सन्नी र'अदस, आस हूँ योहनस ती कोहाँ हिकदस।”
- (29 अरा ओर्मा आलर अरा मालगुजारी ऊज'उर हूँ येसुसी कत्थन मेंजर खने, धर्मसी कत्था मानिम ब'अरकी इंझर। एन्देरगेका ईर मुन्द योहनस ती नोड़र।
- 30 लिकिन फरिसीर अरा नेग सिखाब'उर तमन योहनस ती नोड़रत'आ गे मल चिच्चर, अदही चड्डे तमा गे धर्मसी मने आबोन तरकूटी नंजर चिच्चर।)
- 31 फिन येसुस बाचस, “ने योहनसी सिखाब'अना अरा एंग्हे मेन्नर अबड़ा आलर ही पत नू तेंगदन।
- 32 आर बजार नू बीचू खद्दर लेक्खा र'अनर, आर तम्है तम्है नू चिच्चियारनर ती ब'अनर का ‘ऐम निमा गे खुसमारना बंसरी ऊरचकम, नीम मल नलकर, ऐम भोकरारकम नीम मल चींखकर।’
- 33 योहन नूड़रत'उस गा ओर्मर मोखना ओन्ना-मोखना लेक्खा मोखनुम अरा अंगुर रासी उन्नुम मल बरचकादस, लिकिन नीम ब'अदर का आसी मइय्याँ मलदौ बोलता लक्की रई।
- 34 अरा मनवा खद्दन ऐन बने उन्नुम मोखनुम बरचकादन। खने नीम ब'अदर का ऐन पेट पोसा अरा उंखुस अरा मलगुजारी ऊज'उर अरा नन्ना पपहर ही संगेन हवे।
- 35 लिकिन एंग्हे लूर मानिम ब'अरकी अदिन इंझरना ती ने ऐकनर आर ही उज्जना ओक्कना ती आद ईथर'ई।”
- 36 अक्कुन सिमोन नामे ओन्टा फरिसीस येसुसिन तंग्हे गुसन मंडी ओना गे मीखियस। खने आस आ फरिसीसी एडपा केरस अरा मंडी ओना गे उक्कियस।



- 37 आ नगरे नू ओन्टा मलदौ मुक्का अक्खा का येसुस फरिसीसी एडपा नू मंडी ओनालदस। होले आद नेता पखना ही ओन्टा कुडवा नू महमहरना इसुंगन ओन्द्रा बरचा।
- 38 अरा येसुसी खेड्डे गुसन खोखा इज्जा ती चींखनुम, आसी खेड्डेन खंजलखो ती नूडिया। अरा तंगहै कुक्कु ता चुट्टी ती चींचा हेलरा, अरा आसी खेड्डेन घड़ी घड़ी चुंखिया ती अइय्या महमहरना इसुंगन नलबिया।
- 39 येसुसिन मंडी ओना गे मीखका आ फरिसीस तंगहै जिया नू सोच'आ हेलरस का, “ईस धर्मसी कत्था तिंगुस रहचका होले अख'ओस दने का आसिन ऐंसड'आ लगी आद ने तंगहै अरा एकासे मुक्का हवे, अरा आद गा मलदौ आली हवे।”
- 40 येसुस आसिन आना बिडदस, “अना सिमोन, एंगा निंगन ओन्टा कत्था ब'अना रई।” आस बाचस, “अना गुरु, ब'आ।”
- 41 येसुस बाचस, “ओन्टा मड़वारीसी ऐंड आलर लगा मोक्का रहचर। ओतोस पाँच सौ अउर ओतोस पचास चांती ही ढिबा ही लगहर रहचर।
- 42 आर गुसन लगन किर्त'आ गे एन्द्रा हूँ मल रहचा, खने आस इरबर ही लगन अम्बियस चिचस। होले अबड़ा इरबर ती ने आसिन बग्गे चोन्हा ननो?”
- 43 सिमोनस आनाकिर्ताचस, “नेखअय बग्गे लगा अम्बतार'आ केरा आसिम एन्ने सोचदन।” येसुस आसिन बाचस, “नीन ठौका बाचकय।”
- 44 तहाँ येसुस आ मुक्का तरा ईरयस ती सिमोनसिन बाचस, “ई मुक्कन नीन ऐरदय का? ऐन निंगहै एडपा नू बरचकन, लिकिन नीन नम्है चाल लेक्खा एंगा एंगहै खेड्डेन नौदू'आ गे अम्मू मल चिचकय। लिकिन ईद एंगहै खेड्डेन खंजलखो ती नूडिया अरा तंगहै चुट्टी ती चींचिया।
- 45 नीन एंगन मल चुंखकय, लिकिन एकाबारी ती ऐन बरचकन आ बारी ती ईद एंगहै खेड्डेन चौंखनन मल अम्बिया।
- 46 नीन एंगहै कुक्कु नू इसुंग मल नलिबकय, लिकिन ईद एंगहै खेड्डे नू महमहरना इसुंगन नलबिया।
- 47 औंगे ऐन निंगन ब'अदन का इदही पाप बग्गे रहचा आद अम्बतारा केरा, एन्देरगेका ईद एंगहै मइय्याँ बग्गे चोन्हा नंजा। लिकिन नेख'आ जुक्की अम्बतारा आर जुक्की चोन्हा नन्नर।”
- 48 अरा येसुस आ मुक्कन बाचस, “निंगहै पाप अम्बतारा केरा।”



49 खने आसी गने मंडी ओना उक्काचर, आर ताम ताम नू बाचर का, “ईस ने तंगहै, पाप गुट्ठिन हूँ छमा नन्दस?”

50 लिकिन आस आ मुक्कन बाचस, “नीन एंगन पत्ताचकय, आँगे धर्मस निंगन नाड़ियस, कोड़े गने किरिम बिअय।”

लूकस 8

1 इदही खोखा येसुस नगरे नगरे अरा पद्दा पद्दा कुद्दनुम धर्मसी राजी ही दौ कत्था मेन्त आनुम कुद्दा लगियस। अरा अबड़ा बारो चेलर आसी गने रहचर।

2 अरा जोक्क मुक्कर हूँ आर ही गने रहचर। इबड़र मलदौ बोलता अरा रोगे ती कोड़े मंतारका रहचर। अन्नु ती मरियम एकदा ही नामे मगदलेनी बारा अदही ती सात गोटंग मलदौ बोलतन येसुस ओथ्रकाचस।

3 अरा हेरोदेसी भंडारी खूसासी तंगआली योअन्ना अरा सूसन्ना अरा बग्गे नन्ना मुक्कर हूँ रहचर। ईर तम्है खुर्जी ती येसुस अरा आसी चेलर गे संगरा नना लगियर।

4 कोहाँ गोंहड़ा खोंड़रा अरा नगरे नगरे ता आलर येसुस हेद्दे बरते रआ लगियर। आस जोक्खा खीरी ती बाचस।

5 “ओन्टा चाँख'उस चाँख'आ उरखस। चाँख'ओ बारी जोक्को बिहनी डहरे नू खतरा, अरा तिखरा नाब्रा, अरा ओड़ा अदिन पेत्ता मोक्खा।

6 जोक्को पखनोरी खेखेल नू खतरा, लिकिन कुन्दिया अरा हल्ले मल खक्खिया खने खइय्या केरा।

7 जोक्को बिहनी अच्च-खोप्पा नू खतरा, अरा खोप्पा लट्टी गने पर्दिया ती अदिन अर्बिया चिच्चा।

8 जोक्को बिहनी दौ खेखेल नू खतरा, अरा कुन्दिया ती सौ गुना खंजा।” एन्ने बाचस ती आस जोरसरिया बाचस, “नेका मेना गे मने रई, आस मेन्दस ती बुझना रई।”

9 आसी चेलर आसिन मेंजर ई जोक्खा खीरी ही माने एन्देर हिके?

10 आस बाचस, “निमा धर्मसी राजी ही नूखका कत्था आबोन बुझ'आ गे चीरकी रई, लिकिन नन्नर गे जोक्खा खीरी ती तेंगई। ईगेका, नेम्हा पुथी नू एन्ने लिक्खरकी रई, ऐन नन्दन अदिन ऐरदर लिकिन अत्रु ती एन्द्रा हूँ मल सिख'ओर, ऐन ब'अदन अदिन मेन्दर लिकिन अदही माने मल बुझ'ओर।”

11 ई जोक्खा खीरी ही माने ईद हवे। बिहनी धर्मसी कत्था हवे।



- 12 जोक्क आलर बिहनी खत्रका डहरे लेक्खा हिकनर। आर कत्थन मेन्नर लिकिन सैतान बर'अरकी आर ही जिया ती आ कत्थन पिसी हुई। आँगे आर अदन मल पत'ओर ती अम्बोर नाइर'आ।
- 13 जोक्क आलर बिहनी खत्रका पखनोरी खेखेल लेक्खा हिकनर। आर कत्थन मेन्नर ती रिङ्गनुम इङ्गनर। लिकिन आर तम्हें जिया नू गड्डी गूटी कत्था मल खुपना चड्डे आर जुक्किम उल्ला गे कत्थन पत'अनर अरा सस्ती बर'ई खने अदिन लेम अम्बनर।
- 14 जोक्क आलर बिहनी खत्रका अच्छ-खोप्पा खेखेल लेक्खा हिकनर। आर कत्थन मेन्नर लिकिन आर तंग्हे उज्जना नू मुन्द कालो बारी खेखेल ता फिकर अरा खुर्जी अरा मया-मोह आरिन अरबी खने आर बड़ियर मना पोलनर।
- 15 अरा जोक्क आलर बिहनी खत्रका दौ खेखेल लेक्खा हिकनर। आर कत्थन मेन्नर ती सत अरा फरी जिया नू सम्ड़'अरकी उइय्न्र अरा सहेलहे गने खंजनर।
- 16 ने हूँ बिल्ली लघा ब'अनर ती संजगी ती मल कुल्लनर महले खटी किइय्या मल उइय्न्र। लिकिन अदिन पक्खा नू उइय्न्र का भितरी बर'ऊ आलर गे बिल्ली ऐथ्र'ओ।
- 17 एन्ने धर्मस तंग्हे सत आबोन नुइ'आ मल बेद्ददस, आस अदिन ऐद'आ बेद्ददस, अरा एन्ने एन्द्रा हूँ एन्ने मल्ला नूस्रका का आद मल अखतार'ओ अरा मल ऐथ्र'ओ।
- 18 आँगे चिह्ंक र'आ का नीम धर्मसी कत्थन एकन्ने मेन्दर, ने एंग्हे सिखाब'अना ही पत नू चिह्ंक लगे सोचनर, आर गे बग्गे बुझुर'आ गे धर्मस मदइत ननोस, लिकिन ने एंग्हे सिखाब'अना ही पत नू चिह्ंक लगे मल सोचनर, आर ही बुझुरका जोक्क कत्था गुट्ठिन हूँ धर्मस मोधरत'ओस चि'ओस।”
- 19 येसुसी तंगियो अरा भईर आसी गुसन बरचर, लिकिन गोंहड़ा ही चड्डे भेंटार'आ पोल्लर।
- 20 खने ओर्तोस येसुस ती बाचस, “निंगयो अरा निंग्हे भइय्योर बहरी इज्जका र'अनर अरा निंगन भेंट मना बेद्दालनर।”
- 21 येसुस आरिन किर्त'अर बाचस, “एंग्हे अयंग अरा भइय्योर ईरिम हिकनर, ने धर्मसी कत्थन मेन्नर ती अदही लेक्खा ऐकनर।”
- 22 उन्दुल येसुस अरा आसी चेलर डोंगा नू अर्गियर अरा आस आरिन बाचस, “बरा, नाम समुदर ही आ पक्खे क'ओत।” तहाँ आर काला हेलरर।
- 23 अरा डोंगा कालालिया खने, येसुस खन्द्रस केरस। अरा समुदर नू घटा बरचा अरा डोंगा अम्मु ती नीदा हेलरा, अरा आर अपलोक नूरहचर।



- 24 खने आर येसुस हेददे बरचर ती एज्जर ती बाचर, “उर्बायो! नाम मूलखा कालदत।” खने येसुस चोचस ती घटन अरा लहरन केप्पस। खने अबड़ा मड़चा केरा।
- 25 येसुस आरिन बाचस, “नीम एन्देगे एंगहै मड़य्याँ असरा मल नंजकर?” आर इल्चियर केरर अरा अकबक मंजर ती ताम ताम ब'आ हेलरर, “ईस एकासे आलस हिकदस, ईस गा घटा अरा अम्मन हूँ पेसदस, अबड़ा हूँ आसहीन मिनी?”
- 26 फिन आर गेरासेनोस चक नू अंडिसियर, आद गलिलेया समुदर ही पुरुब पक्खे नूर ई।
- 27 येसुस एकासे पिंडी नू इत्तियस, अन्नेम आस गुसन आ नगरे ता ओन्टा नाद गुट्ठी धरचका आलस बरचस। आस नगदे उल्ला ती किचरी मल अता लगियस अरा आस एड़पा नू मल र'अरकी मसड़ा गुट्ठी नूर'आ लगियस।
- 28_29 आ मलदौ बोलता गा आ आलासी मड़य्याँ घड़ी घड़ी छटियारका रहचा। आलर आसिन सिकड़ी बिड़ी गुट्ठी ती हें'अरकी पहरा नंजकाचर। अन्नु हूँ आस हेंचकन खच्चा चि'आ लगियस, अरा नाद आसिन उछिन्द अड़डा गुट्ठी नू कुत्त'आ लगिया। आस येसुसिन ईरयस ती चिच्चियारस ती आसी मुन्दहारे खत्रस ती जोरसरिया बाचस, “अना उर्मी ती कोहाँ धर्मसी खद्दायो येसु! एंगहै गने निंगा एन्दे नलख? ऐन निंगहै ती गोहरारदन एंगन दुक्खे अमा चि'आ।” एन्देगेका येसुस आ मलदौ बोलता आबोन आसी मड़य्याँ ती उरखा गे पेसकाचस।
- 30 येसुस आसिन मैजस, “निंगहै एन्दे नामे?” आस बाचस, “लेगिओन” एन्देगेका नगदे नाद आस नू समसारकी रहचा।
- 31 अबड़ा आसिन गोहरार'आ का, “एमन भयभयान खोड़खा गड़डी नू काला गे अमा पेस'आ।”
- 32 असन परता नू किस्सी ही ओन्टा कोहाँ खरखा बेद्दा मोखा लगिया, अबड़ा नाद गोहरार'आ का, “एमन अबड़ा किस्सी नू समसार'आ चि'आ।” येसुस अबड़न काला चिच्चस।
- 33 खने नाद गुट्ठी आ आलस ती उरखा ती किस्सी नू केरा, अरा आ किस्सी खरखा दलखा ती डिघया ती समुदर नू केरा ती मूलखिया।
- 34 ई मंजकन ईरयर ती किस्सी खापुर बोंगर, अरा नगरे नू अरा पद्दा नू केरर ती हलन तिंगियर।
- 35 अबड़ा मंजकन आलर ऐरा गे उरखर, अरा येसुसी गुसन बरचर ती एका आलस ती नाद गुट्ठी उरखकी रहचा आसिन येसुसी खेड़डे गुसन किचरी अत्तका अरा कोड़े उक्का ईरयर ती इल्चियर केरर।



- 36 अरा ने इबड़न ईरकाचर आर अबड़ा आलारिन तिंगियर का आ नाद रस्सका आलस एकासे कोड़े मंजस।
- 37 खने गेरासेनोस चक ही अड्डे-बेड्डे ता आलर येसुसिन गोहरारर का, “एम्है गुसले किरिम बि'आ” एन्देरगेका आर अउर हूँ नठार'ओ ब'अरकी नगदे इल्चका केरका रहचर। होले येसुस डोंगा नू अर्गियस ती किरियस केरस।
- 38 एका आलस ती नाद गुट्ठी उरखकी रहचा आस येसुस ती गोहरारस ती बाचस का एंगन निंग्हे गने र'आ चि'आ। लिकिन येसुस आसिन तइय्यस ती बाचस,
- 39 “निंग्हे एड़पा किरिम बि'आ अरा आलारिन तेंगा का धर्मस निंगा गे एका कोड़हे नलख नंजकादस।” आस केरस ती गोट्टा नगरे नू तेंगा कुद्दा हेल्स का येसुस तंगा गे एका कोड़हे नलख नंजकाचस।
- 40 येसुस किरियस खने आलर रिङ्ग ती परघाचर, एन्देरगेका अबड़ा ओर्मर आसी पाब ऐरा लगियर।
- 41 ई बेड़ा नू याईर नामे ओन्टा गोड़हा एड़पा ता ओन्टा मुद्धस असन बरचस ती येसुसी खेडमूली खत्रस ती गोहरार'आ हेल्स का, “एंग्हे एड़पा गुचा।”
- 42 एन्देरगेका आसी बारा बछर ही ओन्टे लेका तंग्दा रहचा, आद खे'आ बेद्दा लगिया। येसुस आसी गने काला लगियस खने आलर आसिन ओनबेंडर'आ ती चिप'आ लगियर।
- 43 ओन्टा आली आ गोंहड़ा नू रहचा। आद बारा बछर ती खेंस काना रोगे ती लिंड़िरकीचा। अरा आद तंग्हे उर्मी खुर्जिन बैधर नू मुंजा खच्चकी रहचा, अन्नु हूँ ने हूँ अदिन उजग'आ पोल्सर।
- 44 आद खोखा तरती बरचा ती येसुसी किचरी ही अंचरन ऐंवसड़ा। खने लेम अदही खेंस काना ठकरा केरा।
- 45 तहाँ येसुस बाचस, “एंगन ने ऐंवसड़ा?” ओर्मर ऐम मल्ला ऐंवसड़का बाचर। खने पतरस बाचस, “अना उर्बायो, गोंहड़ा निंगन ओनबेंडर'आ ती चिप्प'आ लगी।”
- 46 लिकिन येसुस बाचस, “नेकइम एंगन ऐंवसड़कर, एन्देरगेका ऐन अक्कन का एंग्हे ती कोड़े नन्ना ही सवंग उरखकी रई।”
- 47 खने आ मुक्का ईरया का ऐन नुस्र'आ पोल्लोन ब'अरकी इल्चनुम बरचा ती आसी खेडमूली खत्रा ती ओर्मर ही मुन्दहारे तिंगिया का ऐन एन्देरगे आसिन ऐंवसड़कन अरा लेम एकासे कोड़े खक्खन।
- 48 येसुस अदिन बाचस, “अना खद्दो, नीन एंगन पत्ताचकी औंगेम नीन उजगारकी, कोड़ेम किरिम बि'अय।”



- 49 आस एन्ने ब'अते रहचस खनेम गोइहा एइपा ता मुद्धस गुसले ओन्टा आलस बरचस ती गोइहा एइपा मुद्धासिन बाचस, “निंग्दा गा केच्चा केरा गुरुसिन दुक्खे अमा चि'आ।”
- 50 येसुस इदिन मेंजस ती आसिन आनाकिर्ताचस, “अमा एल्चा! एंगन पत्त'आ हो'आ का आद उजगार'ओ।”
- 51 आस एइपा नू बरचस ती पतरस, योहन अरा याकोब अरा खद्दो ही तंग्यो तम्बन अम्बरकी नेकन हूँ तंग्हे गने भितरी कोर'आ मल चिच्चस।
- 52 ओर्मर अदगे चींखा ओलखा लगियर, लिकिन येसुस बाचस, “अमा चींखा! आद मल्ला केचका लिकिन खन्द्र'आ लगी।”
- 53 आलर येसुसिन अलखालियर एन्देरेगेका आर अक्खर का आद किचकी रई।
- 54 लिकिन येसुस खेक्खा ती अदिन धरचस अरा जोर ती बाचस, “अनय खद्दो चो'अय!”
- 55 खने अदही जिया किरिया बरचा अरा आद लेम चोचा ती उक्किया। तहाँ आस अदगे मोखा गे इन्द्रिइम चि'आ गे पेसस।
- 56 अरा अदही तंगियो तम्बा अनचकरर। लिकिन येसुस आरिन चेताबाचस का ई मंजकन नेकन हूँ अमके तेंगा।

लूकस 9

- 1 येसुस तंग्हे बारो चेलारिन मीखियस ती आर गे उर्मी मलदौ बोलता गुट्ठी मइय्याँ अरा बेमार गुट्ठिन उजग'आ गे सवंग अरा आकुस चिच्चस।
- 2 अरा आरिन धर्मसी राजी ही पत्त नू तेंगा कुद्दा गे अरा बेमार गुट्ठिन उजग'आ गे तइय्यस।
- 3 आस आरिन बाचस, “इहरे ऐका गे एन्द्रा हूँ अमके हो'आ, सोट्टा मला, झोला मला, मंडी मला, ढिबा मला, अरा दुई गोटंग किचरी मला।
- 4 एका एइपा नू नीम कोर'ओर आ एइपा नुम र'अके एका गूटी आ नगरे ती नीम किर्रोर।
- 5 अरा आलर निमन मल परघ'अनर होले नीम आ नगरे ती उरखो बारिम निम्है खेइडे ता रीडोन खेतके चि'अके। निम्है कत्थन माल इंझना चइडे धर्मस तरती आर गे खक्खरना दंडे ही ईद आर गे निम्है चेताब'अना मनो।”
- 6 अरा चेलर उरखर ती पद्दा पद्दा दौ कत्था मेन्त'आनुम अरा उर्मी अइडा आलारिन उजग'आ नुम केरस।



- 7राजी खापुस हेरोदेस अंटिपस इबड़ा मंजका ओर्मा हलन मेंजस ती दोभिदिया मंजस केरस। एन्देगेका जोक्क आलर बाचर का योहन नूडरत'उस केचका ती उज्जा चोचकादस।
- 8अरा जोक्कोर बाचर का धर्मेसी कत्था तिंगू एलियस किरियस बरचस, अरा नन्नर बाचर चीरान ता ओन्टा धर्मेसी कत्था तिंगुस केचका ती उज्जा चोचकादस।
- 9लिकिन हेरोदेस बाचस, “ऐन गा योहनसी कुक्कुन एडबताचकन, अक्कु ईस नै तंग्हे अकबक नलख ननालदस? नेखा पत्त नू एन्ने कत्था मेन्दन?” अरा आस येसुसिन ऐरा बिद्दियस।
- 10फिन बारा तइरकर किरियर ती ताम एन्दे एन्दे नंजकाचर अदिन येसुसिन तिंगियर। अरा येसुस आरिन बेतसैदा नामे नगरे नू तंग्हे गने होच्चस केरस असन आर तामलेका र'आ ओंगोर।
- 11लिकिन आलर इदन अक्खर ती आसी खोखा चोखर। अरा येसुस आरिन परघाचस, अरा आर ही गने धर्मेसी राजी ही पत्त नू तिंगियस, अरा नै कोड़े मना बिद्दियर आरिन कोड़े नंजस।
- 12अक्कुन बीड़ीपुता लगिया खने बारो चेलर येसुसिन बरचर ती बाचर, “गोहड़ा आबोन तइय्या का आर हेददे ता पद्दा गुट्ठी नू कालरकी ओना गे अरा र'आ गे अड्डा बेद्दोर, एन्देगेका नाम इसन उछिन्द अड्डा नू र'अदत।”
- 13लिकिन येसुस आरिन बाचस, “नीमिम ईर गे ओना मोखा गे इन्द्रिम चि'आ।” आर बाचर, “एम्है गुसन पाँच गोटंग असमा अरा ऐनोटा इंजोन अम्बरकी एन्द्रा हूँ मल्ला। ऐम क'ओम ती ओर्मर गे मंडी खेन्दोम होलेम मना ओंगो।”
- 14आर पाँच हजार केम मेतर रहचर। खने आस तंग्हे चेलारिन बाचस, “आलारिन पचास पचास नना ती पाती पाती ओक्त'आ चि'आ।”
- 15आर अन्नेम नंजर अरा ओर्मरिन ओक्ताचर चिचर।
- 16खने येसुस अबड़ा पांच गोटंग असमन अरा ऐनोटा इंजोन होच्चस, अरा मेर्खा तरा ऐररकी आद गे धर्मेसिन धन्यवाद नंजस, अरा अबड़न किच्चियस ती अदिन खट्टा गे चेलर गे चिचस। चेलर गोहड़ा गे अबड़न खट्टियर।
- 17खने ओर्मर मोक्खर ती उइचर केरर अरा एंगरका कुटकन बारा डउड़ा निन्दर।
- 18उन्दुल येसुस उछिन्द अड्डा नू बिन्ती नना लगियस अरा तंग्हे चेलर आसी गने रहचर। खने आस आरिन मेंजस, “आलर एंगन नै तंग्हे ब'अनर?”



- 19 आर किर्ता'अर बाचर, “जोक्क आलर ब'अनर योहन नूडरत'उस केचका ती उज्जा चोचस अरा जोक्कोर ब'अनर धर्मेसी कत्था तिंगू एलियस मेर्खा ती किरियस बरचस, अरा नन्नर ब'अनर चीरान ता धर्मेसी कत्था तिंगुस ओर्तोस उज्जा चोचकादस।”
- 20 अरा आस आरिन मेंजस, “ लिकिन नीम एंगन ने तंग्हे ब'अदर?” पतरस किर्ता'अर बाचस, “नीन धर्मेस ती तडरका मसी हिकदय।”
- 21 खने आस आरिन चेताबाचस अरा आनियस का, “इदिन नेकन हूँ अमके तेंगा।”
- 22 तहाँ येसुस आरिन बाचस, “मनवा खद्दन एंगा गे अजम खिलपत मन्ना मनो, अरा यहूदी सेयान आलर अरा मुध नैगर अरा नेग सिखाब'उर एंगन दुस'ओर अरा पिटोर। लिकिन ऐन तिसर उल्ला उज्जा चोर'ओन।”
- 23 फिन आस ओर्मारिन बाचस, “नीकईम एंग्हे खोखा चोख्र'आ बेद्दोस होले, आस गे तान तंग्हे नना बेद्दना लेका अम्बोर नना अरा उर्मी उल्ला तंग्हे मने ती खिलपत सहना अरा क्रुस नू खे'अना ती एंग्हे गने चोख्र'ना रई।
- 24 नीकईम तंग्हे उज्जनन तंग्गा गे उज्जा बेद्ददस होले आस धर्मेस गने जनमजुग ही उज्जनन एबस'ओस, लिकिन आस एंग्हे चड्डे तंग्हे उज्जनन चि'अदस होले आस धर्मेस गने जनमजुग ही उज्जनन खक्खोस।
- 25 ओन्टा आलस ई खेखेल ता उर्मी जिनिसन अर्ज'अदस, लिकिन तंग्हे जियन नठाब'अदस महले एबसदस होले, आस गे एन्देर नाफा मनो?
- 26 नीकईम एंग्हे कत्थन इङ्ग'आ गे अरा 'ऐन येसुसी चेला हिकदन' एन्ने आलर मुन्दहारे तेंगा गे लजर'ओस होले, आसिन ऐन हूँ 'ईस एंग्हे चेलस हिकदस' एन्ने ब'आ गे लजर'ओन, इकला ऐन नेम्हा मेर्खा पैकर गने एंग्हे महबा अरा एम्बासी महबा नू किरौन।
- 27 ऐन ओन्टा मुदे कत्थन निमन ब'अदन, अक्कुन इसन इज्जका आलर ती जोक्को आलर, धर्मेसी राजी नन्नन बिगर ईरका मल खे'ओर।”
- 28 इबड़ा कत्था तेंगना ही आठ उल्ला खोखा येसुस पतरस अरा योहन अरा याकोबसिन तंग्हे गने होचचस ती परता मड्य्याँ बिन्ती नना गे केरस।
- 29 अरा आस बिन्ती ननो बारी आसी मुही ही ऐथना बदलारा केरा, अरा आसी किचरी फुर्फुर'आ पंडरू मंजा ती बिल्चा हेलरा।
- 30 अरा ऐरा! आचका ऐंड आलर मूसस अरा एलियस आसी गने कछनख'आ लगियर।



- 31 ईर मेर्खा ता महबा गने ऐथर अरा आसी खेअना ही पत्त नू कछनख'आ लगियर, एकाद येरुसलेम नू मन्ना रहचा।
- 32 पतरस अरा आसी संगेर खन्द्रना ती मथलारका रहचर, अरा निजड़ियर खने, आर येसुसिन महबा गने ईरयर अरा आसी गने ऐंड़ आलारिन इजका ईरयर।
- 33 आ आलर येसुस गुसले गुछर'आ दिम लगियर खने, पतरस येसुस ती बाचस, “अना उर्बायो! नमा इसन र'अना बेस र'ई, नाम तीन गोटंग कुम्बा कमदत नेकअन, ओन्टा निंगा गे अरा ओन्टा मूसस गे अरा ओन्टा एलियस गे।” आस बल्लालियस का एन्देर ब'आ लगदस।
- 34 आस ब'अम लगियस का बदाली बरचा ती आरिन कुल्लिया चिच्चा। अरा आर आ बदाली नू मंडर'आ हेलरर खने इल्चियर केरर।
- 35 धर्मेस बदाली ती बाचस, “ईस एंग्हे खद्दस, अरा एंग्हे चज्जिका हिकदस, ओंगे ईसहीन मेना।”
- 36 ई ब'अना मेन्द्रना मुंज्रना गनेम येसुस ओर्ते लेका ऐथस। अरा आर कलेकसे रहचर, अरा आर एन्द्रा ईरकाचर अदही पत्त नू इन्द्रिइम कत्था अबड़ा उल्ला नू नेकन हूँ मल तिगियर।
- 37 दोसर उल्ला आर परता ती एत्ता लगियर खने, ओन्टा कोहाँ गोंहड़ा येसुसिन भँटारा।
- 38 अरा गोंहड़ा ती ओर्तोस चिच्चियारस ती बाचस, “अना गुरु, ऐन निंगन गोहरारदन का एंग्हे खद्दासिन सोग्गे ऐरा, ईस एंग्हा ओन्टे लेका खद्दस र'अदस।
- 39 आसिन ओन्टा मलदौ बोलता धरई, अरा आस आचका चिच्चियारदस, अरा आद आसिन एन्ने मुर्कुट'ई का आसी बई ती बोट्टो उरखी, अरा आसिन पखड़'ई पिदख'ई ती नगदे ढेवाँ ती अम्बी।
- 40 ऐन निंग्हे चेलर ती अदिन ओथ्र'आ गे गोहरारकन, लिकिन आर ओथ्र'आ पोल्लर।”
- 41 येसुस किर्त'अर बाचस, “अना मल पत्त'ऊ आलारो, ऐन इकला गूटी निम्है गने र'ओन? ऐन इकला गूटी निम्है गने निम्है मल पत्त'अनन सह'ओन? निंग्दासिन इसन ओन्द्र'आ।”
- 42 आ कुक्कोस बर'आ लगियस आ बारी नाद आसिन पखड़ाचा ती मुर्कुट'चा, लिकिन येसुस आ मलदौ बोलतन केप्पस, अरा खद्दासिन कोड़े नंजस ती आसिन तम्बस गे सोंपचस चिच्चस।
- 43 खने ओर्मा आलर धर्मेसी कोहाँ सवंगन ऐररकी अकबकरर केरर। ओर्मर येसुसी हैकट नलख ती अकबक मंजर, आ बारी आस तंग्हे चेलारिन बाचस,
- 44 “नीम इबड़ा कत्थन मेना, आलर मनवा खद्दन एंगन नन्ना आलर ही खेक्खा नू सोंप'ओर।”
- 45 लिकिन आर ई कत्थन मल बुझर अरा ईद ही माने आर गे नूखकी रहचा का आर अदिन अम्बोर अख'आ, अरा आर ई कत्था ही पत्त नू आसी ती मेना गे एल्चा लगियर।



- 46 फेन आसी चेलर नू एन्ने आनानखरना मना हेलरा का नम्है नू ने कोहाँ मनोत।
- 47 तहाँ येसुस आर ही जिया ता कथन अक्खस ती ओन्टा खद्दासिन ओन्द्रस ती आर ही मझी नू इजताचस,
- 48 अरा आरिन बाचस, “एका ओर्तोस ई बेसे ओन्टा खद्दासिन एंग्हे बदली नू इंझदस आस एंगन इंझदस। अरा एका ओर्तोस एंगन इंझदस आस एंगन तइय्का एंग्हे बबासिन हूँ इंझदस। अरा ने निम्है नू तंगन सन्नी ती सन्नी अखदस आसिम धर्मसी ऐरना नू कोहाँ र'अदस।”
- 49 खने योहनस बाचस, “अना गुरु! ऐम ओन्टा आलासिन नीन आस गे आकुस चिचकय ब'अरकी नाद गुट्ठिन ओथ्रनन ईरकम, अरा ऐम आसिन छेकचकम, एन्देरगेका आस ऐम चेलर नू ती मलदस।”
- 50 येसुस आसिन बाचस, “नीन आसिन अमा छेक'आ, एका ओर्तोस निंग्हे बिड़दो मलकस आस निंग्हे सहाड़ा ननुस हिकदस।”
- 51 तहाँ आसी मेर्खा चौदतारना ही उल्ला पूरना रहचा खने येसुस येरुसलेम काना ही मने नंजस।
- 52 आस पैकारिन तंग्हे मुन्द तइय्यस। आर समारिया ता आलर ही ओन्टा पद्दा नू आसी अंइसना ही सपड़'आ गे केरर।
- 53 लिकिन अबड़र येसुसिन मल परघाचर, एन्देरगेका आस येरुसलेम काला गे मुहरारका रहचस।
- 54 अरा आसी चेलर याकोब अरा योहनस इदिन ईरियर ती बाचर, “अना उर्बायो! नीन बेद्ददय का एलियस नंजस आ लेक्खा ऐम पेस'ओम का मेर्खा ती चिच्ची खत्र'ओ ती ई आलारिन बस्सो चि'ओ?”
- 55 लिकिन येसुस किरा बिड़दस ती आरिन केप्पस। ती बाचस, “नीम बलदर का नीम एका बोलता ही आलर हिकदर?”
- 56 मनवा खद्दन ऐन गा आलर ही जियन नटाब'आ गे मला लिकिन बछाब'आ गे बरचकादन।” अरा आर नन्ना पद्दा नू किरिम बिच्चियर।
- 57 आर इहरे नू कालियर खने ओन्टा आलस येसुसिन बाचस, “नीन एसन एसन क'ओय ऐन निंग्हे गने चोँख'ओन।”
- 58 लिकिन येसुस आसिन बाचस, “सिकटा गुट्ठी ही लाता र'ई, अरा ओड़ा गुट्ठी ही खोता र'ई, लिकिन मनवा खद्दन एंगा गे कुक्कन हूँ बेड़त'आ ती खन्न ऐखा गे अड़ा मलकी।”
- 59 येसुस नन्नासिन बाचस, “एंग्हे गने चोँख'आ।” आस आसिन बाचस, “अना उर्बायो! एंगन मुन्द एम्बासिन माड़ा गे काला चि'आ।”



60 लिकिन येसुस आसिन बाचस, “केचकारिन तम्है बोलता नू केचका आलर माइनर नेकअन। लिकिन नीन कला ती धर्मस आलर ही उज्जना नू राजी नन्ना ही पत नू मेन्त'आ।”

61 अरा अउर ओर्तोस बाचस, “अना उर्बायो! ऐन निंगहै गने चौर'ओन, लिकिन मुन्द एंगन एंगहै एइपा ता आलर गुसते बिदा मना गे काला चि'आ।”

62 येसुस आसिन चेता बाचस, “एका ओर्तस गोहला मुठिया नू खेक्खा उइय्दस ती खोखा किरै ऐरदस, आसी उज्जना नू धर्मस राजी नना गे आस जोगे मलदस।”

लूकस 10

1 इबड़ा कत्था ही खोखा उर्बस बहतर अउर आलारिन चज्जियस अरा दुई दुई इन नंजस ती उर्मी पद्दा अरा अइडा नू एकसन तान कालू रहचस असन तंगहै ती मुन्द तइय्यस।

2 आस आरिन बाचस, “खोयना गा बग्गे रई, लिकिन बनीहार जुक्किम र'अनर, इदगे तंगहै खोयना गे बनीहार आलारिन तइय्या गे खोयना ही उर्बासिन गोहरार'आ।

3 कला, ऐन निमन भेंडो खद्द लेक्खा भुसुड़ ही मझी नू तइय्दन।

4 ढिबा अरा इन्द्रिइम जिनिस हो'अना ही झोला अरा खरपा अमके हो'आ, अरा डहरे नू नेकन हूँ मोंजरा ननरकी बेइन अमके नठाब'आ।

5 एका एइपा नू कोर'ओर मुन्द ब'आ का 'ई एइपा नू धर्मसी सान्ति मनन नेकअन।’

6 असन नीकइम सान्ति खक्खना जोगे र'अनर होले आर मइय्याँ निम्है सान्ति ओकर'ओ मला होले निम्है गुसन किरौ बर'ओ।

7 अरा आ एइपा नुम र'अके, अरा आर एन्द्रा चि'ओर अदिनिम ओनके मोखके। इदगे का बनीहार गे तंगहै बनी खक्खना रई। एइपा एइपा अमके काला।

8 एका पद्दा नू कोर'ओर अरा आलर निमन परघ'ओर होले आर इन्द्रिइम ओना मोखा गे चि'ओर अदिन ओनके मोखके।

9 अरा अइय्या ता बेमरहारिन कोड़े ननके अरा आरिन ब'अके, ‘धर्मस आलर ही उज्जना नू राजी नन्ना ही बेड़ा निम्है हेददे अंडसकी रई।’

10 एकअम पद्दा नू नीम कोर'ओर अरा अइय्या ता आलर निमन मल परघ'ओर होले गली गुट्ठी नू कालके ती ब'अके,



11. धर्मस निमा गे दंडे चिआ गे एम्है खेइडे नू लक्का निम्है पद्दा ता रीडोन हूँ ऐम निम्है बिइदो नू गोवाह रूपे नू खेतदम। लिकिन इदन हूँ अख'आ का धर्मस आलर ही उज्जना नू राजी नन्ना ही बेड़ा हेददे अंडसकी रई।'
12. ऐन निमन ब'अदन का रायबड़ी उल्ला नू सोदोम नगरे ता आलर ही खक्खका दंडे ती ई नगरे ता आलर ही खक्खना दंडे बग्गे मलदौ मनो।
13. ओहरे निमा खोराजिन नगरे ता आलारो, ओहरे निमा बेतसैदा नगरे ता आलारो। एका सवंग ही नलख निम्है नू मंजकी रई, अबड़ा तुरोस दरा सीदोन नगरे नू मंजकी रहचा होले, आ उल्लम अइय्या ता आलर तमन सन्नी ऐद'आ गे बोरन झपर'अरकी अरा चिन्द नू ओक्करकी जियन किर्ताचका र'ओर दने।
14. औंगे रायबड़ी उल्ला नू तुरोस दरा सीदोन नगरे ही दंडे ती निम्है दंडे बग्गे मलदौ मनो।
15. अरा अना कफरनहूम नगरे ता आलारो, नीम मेर्खा मइय्याँ चोदतार'ओर कालोर का? मला, नीम गा खोइखा चिच्ची गइडी नू टिइतार'ओर कालोर।
16. एका ओर्तस निम्हैन मेन्दस आस एंगहैन मेन्दस। अरा एका ओर्तस निमन खाँइदस आस एंगन खाँइदस। अरा एका ओर्तस एंगन खाँइदस आस एंगहै तइय्कासिन खाँइदस।"
17. अबड़ा बहतर आलर खुसमारनुम किरियर अरा ब'आ हेलरर, "अना उर्बायो, निम्है नामे ती नाद गुट्ठी हूँ एमन पेस'ई।"
18. येसुस आरिन बाचस, "ऐन सैतान आबोन बिल्चत'अना लेक्खा मेर्खा ती खतरनन ईरकन।
19. ऐरा! निमन ऐन मलदौ बोलता लेक्खा नेरें गुट्ठिन दरा बिछी गुट्ठिन तिरखा गे अरा बैरी सैतान ही उर्मी सवंग ही मइय्याँ सवंग चिच्कादन, अरा निमा इन्द्रिम आलो ती एन्देर हूँ मल मनो।
20. लिकिन मलदौ बोलता गुट्ठी एमन पत'ई ब'अके ती लेका अमके खुसमार'आ, इदगे हूँ खुसमार'आ का निम्है नामे मेर्खा नू लिखकी रई।"
21. आ बारिम येसुस नेम्हा बोलतस नू खुसमारस ती बाचस, "अना बबा होय! मेर्खा दरा खेखेल ही उर्बायो! ऐन निंगन महबा नन्दन का नीन इबड़ा कत्था गुट्ठिन अख'उर अरा लूरगर आलर लेक्खा तमन सोचनर आर ती नुड्डकादय, अरा लुदऊ लेक्खा ई सन्नी खद्दर गे ऐदकय। हाँ, अना बंग, निंगा ईदिम बेस लग्गिया।



- 22 एम्बस एंगा गे उर्मी लूर अरा सवंगन सौपचकादस। अरा ने हूँ बलनर का ऐन ने हिकदन एम्बस लेका अखदस। अरा बंगस एकास अदिन ने हूँ बलनर ऐन लेका अखदन, अरा ऐन नेकन नेकन बंगासिन ऐद आ बेद्ददन आर अख ओर।”
- 23 खने येसुस चेलर तरा पछली किरियस ती उछिन्त नू बाचस, “नीम एकाबइन ऐरदर अदिन ईरू आलस आसीस खक्खू र’अदस।
- 24 ऐन गा निमन ब’अदन का नगदे धर्मेसी कत्था तिंगुर अरा बेलर हूँ एका कत्थन नीम ऐरदर अदिन ऐरा बिद्दियर लिकिन मल ईरियर, अरा एका कत्थन नीम मेन्दर अदिन मेना बिद्दियर लिकिन मल मेंजर।”
- 25 तहाँ ओर्त नेग सिखाब’उस चोचस ती येसुसिन बिद्द आ गे आसिन मेंजस, “अना गुरु, जनमजुग उज्जना खक्खा गे एंगा एन्देर नन्ना र’ई।”
- 26 येसुस आसिन बाचस, “मूसासी पेसका नू एन्द्रा लिखकी र’ई, अन्नु नीन एन्देर पढ़दय?”
- 27 आस आनाकिर्ताचस, “नीन निंगहै धर्मे उर्बासिन निंगहै उर्मी जिया गने अरा निंगहै उर्मी बोलता गने अरा निंगहै उर्मी लूर गने अरा निंगहै उर्मी सवंग गने चोन्हा नना। अरा नीन निंगन एकासे चोन्हा नन्दय अन्ने नन्नारिन हूँ चोन्हा नना।”
- 28 येसुस आसिन बाचस, “नीन ठौकम तिंकय, एन्नेम नना, होले नीन उज्जोय।”
- 29 लिकिन आस तंगन उजगो ऐद आ गे येसुसिन मेंजस, “होले एंगहै अरबर-परबर एका ओर्तर?”
- 30 येसुस आनाकिर्ताचस, “ओन्टा आलस येरुसलेम ती येरिहो कालियस। आसिन डाकुर छेकचर ती आसी किचरी गुट्ठिन चड्डर अरा आसिन लौचर ती दरमरा अम्बियर।
- 31 अरा एन्ने मंजा का आ डहरे नू ओन्टा नैगस कालालियस। तहाँ आस आसिन ईरियस ती छेरन्डारस ती कट्टियस केरस।
- 32 एन्नेम लेवी गोतर ता ओन्टा आलस हूँ आ डहरे नू केरस अरा आस हूँ आसिन ईरियस ती छेरन्डारस ती केरस।
- 33 तहाँ ओन्टा डहरे ईकू समारिया ता आलस आ अड्डा नू बरचस ती आसिन ईरियस दरा आसिन सोग्गे ईरियस।
- 34 अरा आसी गुसन केरस ती आसी खादी गुट्ठी नू इसुंग अरा अंगुर रासी तुन्दियस ती पट्टी हेंचस अरा आसिन तंगहै गदहा नू लच्चस ती डेरा एडपा नू होच्चस अरा आसिन सुसराचस।



35 दोसर उल्ला आस ऐनोटा देनारी ओथ्रस ती डेरा एड़पा ही उर्बस गे चिच्चस, अरा बाचस, 'ईसिन सुसर'आ अरा इदिन ती बग्गे निंग्हे लग्गे होले अदिन ऐन किर्रो बारी निंगा चि'ओन।'36 अक्कुन नीन एन्देर बुझ्दय, डाकुर ही खेक्खा नू खत्रका आलस गे अरबर-परबर लेक्खा ई तीन आलर ती ने नलख नंजर?"

37 नेग सिखाब'उस बाचस, "ने आसिन सोग्गे ईरियस आसिम हिकदस।" खने येसुस आसिन बाचस, "कला नीन हूँ एन्नेम ननके।"

38 तहाँ आर कानुम कानुम येसुस ओन्टा पद्दा नू कोरचस। अरा मारथा नामे ओर्ते आली येसुसिन तंग्हे एड़पा नू परघाचा।

39 अदही मरियम नामे ही ओन्टा तंग्डी रहचा। आद उर्बासी खेइडे गुसन उक्किया ती आसी सिखाब'अनन मेनालिया।

40 लिकिन मारथा नगदे तेतर-सुसर नन्ना नू हिलरिकीचा। अरा आद आसी गुसन बरचा ती बाचा, "अना उर्बायो, एन्देर नीन मल ऐरदय का इंग्डी एंगन ओर्ते लेका सुसर'आ गे अम्बिया चिच्चा? अदिन एंगन संगरा गे आना।"

41 लिकिन उर्बस अदिन आनाकिर्ताचस, "अनय मारथा, मारथा, नीन बग्गे कत्था ही तिहा ती कैरारकी र'अदी।

42 लिकिन ओन्टा कत्था चाइ र'ई। मरियम गा धर्मसी कत्थन मेन्ना ही आ बेस बटा आबोन चज्जकी र'ई, अदिन अदही गुसते पोल्लोर बच्चा।"

लूकस 11

1 ओंग्होन येसुस ओन अइडा नू गोहरार'आ लगियस। आस मुंजियस खने आसी चेलर ती ओर्तोस आसिन बाचस, "अना उर्बायो, नीन एमन गोहरार'आ गे सिखाब'आ एकन्ने योहनस तंग्हे चेलारिन सिखाबाचस।"

2 येसुस आरिन बाचस, "एकाबारी नीम गोहरार'ओर आ बारी एन्ने ब'आ, 'अना बबा, निंग्हे नामे नेम्हा मनन नेकअन, निंग्हे राजी बर'अन नेकअन।

3 एम्है उल्ला उल्लन्ता ओन्ना-मोखनन उर्मी उल्ला एमा गे चि'आ।

4 अरा एकासे ऐम एम्है उर्मी अक्का-बलकारिन अम्बदम चि'अदम अन्ने एम्है अक्का-बलकन अम्बा चि'आ, अरा एमन पाप नन्ना ही चिबाखारना नू खतर'आ अमा चि'आ।"



- 5 तहाँ येसुस आरिन अउरिम बाचस, “निम्है ती ओर्तोस तंग्हे संगेसिन अधा माखा कओस ती बओस, अना संगी, एंगा तीन गोटंग असमा नहड़ा चिआ।
- 6 एन्देरगेका ओन्टा डहरे ईकुस एंग्हे संगीस एंग्हे गुसन बरचकादस, अरा आस गे चिआ गे एन्द्रा हूँ मल्ला।’
- 7 अरा आस भितरी ती बओस, अक्कुन एंगन अमा रेंघआ, अक्कुन बली उर्दकी रई, एंग्हे खद्दर एंग्हे गने खन्दालनर, ऐन चोअरकी निंगा एन्द्रा हूँ चिआ पोलदन।’
- 8 ऐन निमन बअदन, आस तंग्हे संगीस बअरकी चोओस ती मल चिओस होले हूँ, आसी गोरगोरा नेअना चड्डे आस चोओस ती आस गे एवंदा चाड़ रई अवंदा चिओस।
- 9 खने ऐन निमन बअदन, धर्मसिन नेआ, होले निमा चीरओ, बेद्दा, होले निमा खक्खओ, बलिन ठोकठोकमबआ, होले धर्मस ती निमा तिसगरओ।
- 10 ईगेका ने नेअनर आर खक्खनर, अरा ने बेद्दनर आर गे खक्खई, अरा ने ठोकठोकमबअनर आर गे तिसगरई।
- 11 निम्है नू एकास एन्ने बंगस रअदस का तंग्दस इंजो नेअदस होले अदही ऊजी नू नेरेंन चिओस का?
- 12 महले बी नेअदस होले आस गे बिछी चिओस का?
- 13 अन्ने नीम मलदौ मनरकी निंग्हे खद्द-खरर गे दौ जिनिसन चिआ अखदर होले, मेर्खा बंगस तंग्हे गुसते नेउर गे नेम्हा बोलतन चिओस दिम।’
- 14 ओंग्होन येसुस ओन्टा कोन्दा नादन ओथ्रस। नाद उरखा खने कोन्दा आलस कछनख्रआ हेलरस। खने आलर अकबक मंजर।
- 15 लिकिन अबड़ा आलर ती जोक्क आलर बाचर, “ईस गा नाद गुट्ठी ही मुद्धस बेलजेबूल ती नाद गुट्ठिन ओथ्रदस।”
- 16 नन्ना आलर आसिन बिढ़आ गे मेर्खान्ता ओन्टा चिन्हा नेचर का आस धर्मस ती बरचस का मला।
- 17 आस आर ही सोचनन अक्खस ती आरिन बाचस, “एका राजी तंग्हे नू लड़ाई ननी होले आ राजी नठारई कई। अरा एका एड़पा ता आलर तम्है नू लड़ाई नन्नर होले आ एड़पा ता आलर खतरनर कानर।



- 18अन्नेम सैतान हूँ तंग्हे नाद गुट्ठी ही बिड़दो नू लड़ाई ननी होले अदही राजी एकन्ने इज्जकी र'ओ? एन्देरगेका नीम ब'अदर का ऐन बेलजेबूल ही सवंग ती नाद गुट्ठिन ओथ्रदन।
- 19अरा ऐन बेलजेबूल ही सवंग ती नाद गुट्ठिन ओथ्रदन होले, निम्हें आलर अबड़न नेखा सवंग ती ओथ्रनर? आँगो आर निम्हें नैवई ननुर र'अनर।
- 20लिकिन ऐन धर्मसी सवंग ती नाद गुट्ठिन ओथ्रदन होले ईद ईद'ई का धर्मस आलर ही जिया नू राजी नन्ना निम्हें नू अंडस खच्चिया।
- 21ओन्टा सवंगियस तंग्हे उर्मी कमहड़ गने तंग्हे एड़पन खापदस होले आसी खुर्जी गुट्ठी बछरकिम र'ओ।
- 22लिकिन आसिन ती कोड़हे सवंगियस बरदस ती आसिन ती जितदस होले आसी अबड़ा कमहड़ नू आसी असरा र'ई अबड़न बच्चदस अरा आसी खुर्जी गुट्ठिन हो'अदस कादस।
- 23ने एंग्हे गने मलकी आर एंग्हे बिड़दो र'अनर अरा ने एंग्हे गने नलख मल नन्नर आर एंग्हे बिड़दो नू नलख नन्नर।
- 24मलदौ बोलता आलस ती उरखी खने खैका अड्डा नू खन्न ऐखा गे अड्डा बेद्दा कुद्दी। अरा मल खक्खी खने ब'ई, 'ऐन एसले उरखकी रहचअन आ आलस नुम किर्रोन।' 25अरा बर'ई ती नेम्हा बोलतासी आकुस नू मल र'अना आलस लेक्खा आ एड़पन ईगका ओथ्रका चेमचेम ने खक्खी।
- 26खने आद क'ई तहाँ तंगन ती बग्गे मलदौ सात गोटंग नादन उन्द्र'ई। अरा अबड़ा अइय्या रस'ई ती मड़'ई, अरा आ आलासी दसा खोखा ता दसा ती बग्गे मलदौ मनी।”
- 27येसुस इबड़ा कत्थन ब'अना बारिम रहचस खने, गोंहड़ा ती ओन्टा मुक्का जोरसरिया बाचा, “आसीस खक्खू र'ई एका अयंग निंगन कुन्द्रताचा अरा पोसा परदा।”
- 28लिकिन येसुस बाचस, “अदिन ती कोड़हे आसीस खक्खू र'अनर आर ने धर्मसी कत्थन मेन्नर ती पेस्रनर।”
- 29एकाबारी गोंहड़ा अउर खोंडर'आ लगिया, खने येसुस ब'आ हेलरस, “ई बेड़ा ता आलर मलदौ हिकनर। आर चिन्हा बेद्दनर, लिकिन धर्मसी कत्था तिंगू योनासी उज्जना नू मंजका अकबक नलखन अम्बरकी आर गे नन्ना एन्देर चिन्हा हूँ मल चितार'ओ।
- 30योनास गे एन्देर मंजा आद निनवे नगरे ता आलर गे चिन्हा मंजा। योनस तीन उल्ला कोहाँ इंजो ही कूल नू रहचस, फिन आस बहरी बरचस। अन्नेम मनवा खद्दन ऐन हूँ ई बेड़ा ता आलर गे चिन्हा मनोन।



- 31 दखिन देस ता रानी खेखेल ही ओन्टा कोंडा ती सालोमोनसी लूर ही कत्थन मेना गे बरचा। अरा ऐरा, इसन सालोमोनस ती हूँ कोहाँ ओर्तस र'अदस। आँगे रायबड़ी उल्ला नू आद ई बेड़ा ता आलर गने चो'ओ ती ईरिन दुस'ओ।
- 32 निनवे नगरे ता आलर योनासी कत्थन मेंजर ती जियन किर्ताचर। अरा ऐरा, इसन योनास ती हूँ कोहाँ ओर्तस र'अदस। आँगे रायबड़ी उल्ला नू निनवे ता आलर ई बेड़ा ता आलर गने चो'ओर ती आरिन दोस'ओर।
- 33 ने हूँ बिल्लिन लघा ब'अरकी ओदहा नू महले ढक्की ती मल कुल्लनर, लिकिन पक्खा नू उइय्नर का भितरी कुर'उर गे बिल्ली ऐथ्र'ओ।
- 34 निम्है खन्न निम्है मेद ही बिल्ली हिके। निम्है खन्न फरी र'ई होले निम्है सौंसे मेद हूँ बिल्ली र'ओ। लिकिन निम्है खन्न फरी मलकी होले निम्है मेद ऊखा र'ओ।
- 35 आँगे चिहुंक र'अके एका बिल्ली निम्है जिया नू र'ई ऊखा अम्बो मना काला।
- 36 निम्है गोट्टा मेद बिल्ली मनो होले एकन्ने का एकअम अंग हूँ ऊखा मल र'ओ, आद गोट्टा बिल्ली मनो। एकासे का बिल्ली तंग्हे बिलचना ती निमन लौकारना मन्त'ई चि'ई।”
- 37 येसुस कछनख्र'आ लगियस खने, ओर्त फरिसीस आसिन मीखियस एंग्हे गने मंडी ओना गुचा। खने येसुस भितरी कोरचस ती मंडी ओना गे उक्कियस।
- 38 मंडी ओन्ना ती मुन्द येसुस खेखन मल नोंदरस, इदन फरिसीस ईरियस ती अकबक मंजस।
- 39 उर्बस आसिन बाचस, “नीम फरिसीर मौनी दरा छिपा गुट्ठिन बहरी बहरी मंजदर, लिकिन निम्है भितरी चिबाखारना अरा मलदौ ती निन्दकी र'ई।
- 40 अना नीम लूर मलका आलारो, धर्मस नम्है मेद ही बहरी ता कत्थन समड़'अदस अरा मेद ही भितरी ता कत्थन हूँ समड़'अदस।
- 41 आँगे नीम कीड़र गे चि'अदर होले, निमा गे उर्मिद सफा र'ओ।
- 42 ओहरे निमा फरिसी आलारो, नीम गा फुदेना अरा जीरा अरा उर्मी अइखा-चेखेल ही दसमान्स चि'अदर, लिकिन नेंवई आबोन ताइदर चि'अदर अरा धर्मसिन चोन्हा मल नन्दर। इबड़न नन्ना र'ई अरा अबड़न हूँ अमा अम्बा।
- 43 ओहरे निमा फरिसी आलारो, नीम गोइहा एइपा गुट्ठी नू मुध मचिया गुट्ठी नू ओक्कनन अरा बजार गुट्ठी नू मौंजरा खेखनन बेद्दर।



44ओहरे निमा फरिसी आलारो, नीम गा नूख्रका मसड़ा गड्डी लेक्खा र'अदर, अदही भितरी ता कितका पुचका र'ई अदिन आलर बलनर ती अदही मइय्याँ ऐकनर कुद्दनर।”

45खने नेग सिखाब'उर ती ओर्तोस येसुसिन बाचस, “अना गुरु, एन्ने ब'अदय ती नीन एमन हूँ हींइदय।”

46येसुस बाचस, “ओहरे निमा नेग सिखाब'उरो, नीम आलर पेस्र'आ पोलना टांठ पेसकन कमदर ती पेसदर, लिकिन नीम अबड़न पेस्र'आ गे चिहुट हूँ मल नन्दर।

47ओहरे निम्है मइय्याँ। नीम धर्मसी कत्था तिंगुरिन मईन नना गे आर गे मसड़ा कमदर नेकन निम्है पूरखर पिटका रहचर, लिकिन आर ही सिखाब'अनन मल पेस्रदर।

48इत्रु नीम निम्है पूरखर ही नलख नू भागी मन्दर ती इदही गोवाह चि'अदर। आर गा धर्मसी कत्था तिंगुरिन पिटियर अरा नीम आरिन मल पेस्र'अरकी आर ही मसड़न कमदर।

49औंगे धर्मसी लूर ती बाचस, ‘ऐन नीम यहूदीर गुसन धर्मसी कत्था तिंगुरिन, अरा तइरकारिन तइय्योन, लिकिन नीम अबड़र ती जोक्कोरिन पिटोर अरा जोक्कोरिन खिलपत ननोर।’

50.51औंगे खेखेल ही गढूका ती ऐ बग्गे धर्मसी कत्था तिंगुर ही खेंस बाहतारकी र'ई, हाबेलसी खेंस ती जकरियासी खेंस गूटी गोइहा अरा नेम्हा अइडा ही मइी नू बाहतारकी र'ई। इबड़ा जम्मर ही लेखा ई परियन्ता आलर ती होर'ओ। ऐन निमन मानिम ब'अदन इबड़ा जम्मर ही लेखा ई परियन्ता आलर ती होर'ओ।

52ओहरे नीम नेग सिखाब'उर गे, नीम लूर ही कुंचिन होच्चका र'अदर। लिकिन नीम हूँ मल कोरदर अरा कुर'उरिन हूँ कोर'आ मल चि'अदर।”

53येसुस इबड़ा कत्था गुट्ठिन आनियस ती उरखस खने, नेग सिखाब'उर अरा फरिसीर बग्गे कत्था ही पत नू कत्था बरता नन्ना ती बयसन नना हेलरर,

54का आर आसिन दोस'आ गे अरा तंग्हे बई तिम आसिन धर'आ गे ताक ऐरा जोह'आलियर।

लूकस 12

1आ बारी हजारों आलर ही गोंहड़ा खोंइरा केरा। इय्या गूटी गा आलारिन आलर तिरखा हेलरर। तहाँ येसुस मुन्द तंग्हे चेलारिन बाचस, “फरिसीर ही उतुरमाइना लेक्खा अमा र'आ, लिन्डका गुन्डा नू बिदगी एकासे मेसर'ई अन्ने आर ही मलदौ कत्था बीन्ड'ई।

2एन्ने आर ही एन्द्रा हूँ मलदौ नलख मल्ला कुलुरका का मल चलखतार'ओ अरा एन्ने एन्द्रा हूँ मल्ला नूख्रका का मल ऐरतार'ओ।



- 3 औंगे नीम ऊखा नू एकदन बाचका र'अदर आद बिल्ली नू मेन्तार'ओ, अरा नीम एकदन कुड़िया गुट्ठी ही भितरी कलेकसे बाचकादर आद ओर्मर ही ऐरना नू चिच्चियारनुम तेंगतार'ओ।
- 4 अना एंग्हे संगीरो, ऐन निमन ब'अदन, ने मेदन पिटनर लिकिन अदही खोखा नू एन्देर हूँ नना पोलनर आर ती अमा एल्चा।
- 5 ऐन निमन ब'अदन का निमा नेकन एल्चना र'ई। नेका पिटका खोखा नू नरक नू सजना ही सवंग र'ई आसिन एल्चा। हाँ, ऐन निमन ब'अदन आसीनिम एल्चा।
- 6 एन्देर ऐंड डिबा ती पाँच गोटंग चोरो मल बीसर'ई का? अन्नु हूँ धर्मस अबड़ा ती ओन्टन हूँ मल मोधरदस।
- 7 निम्है कुक्कु ता चुट्टी हूँ उर्मी गनरकी र'ई। औंगे अमा एल्चा, धर्मस निमन मल मोधर'ओस, नीम बग्गे चोरो ती बग्गे मूल्ली ही र'अदर।
- 8 ऐन निमन ब'अदन का, ने एंगन आलर ही मुन्दहारे अखदन ब'अदस, आसिन मनवा खद्दन ऐन हूँ धर्मसी पैकर ही मुन्दहारे आस एंग्हे आलस ब'ओन।
- 9 लिकिन ने एंगन आलर ही मुन्दहारे बलदन ब'अदस, आसिन ऐन हूँ धर्मसी पैकर ही मुन्दहारे आस एंग्हे आलस मलदस ब'ओन।
- 10 ने मनवा खद्दन एंगहा पत नू बिड़दो कत्था कछनख'ओस, आद आस गे अम्बतार'आ उंगी। लिकिन ने नेम्हा बोलतासी बिड़दो हींड़'ओस, आद आस गे मल अम्बतार'ओ।
- 11 एकाबारी आलर निमन गोड़हा एड़पा अरा मुद्धर अरा आकुस उइय्युर ही मुन्दहारे हो'ओर, आ बारी एकासे अरा एन्देर आनाकिर्त'ओन अरा एन्देर ब'ओन ब'अरकी अमके सोच'आ।
- 12 आ बारिम एन्देर ब'अना मनो अदिन नेम्हा बोलतस निमन तेंगोस।”
- 13 फिन गोंहड़ा ती ओर्तोस येसुसिन बाचस, “अना गुरु! एंग्हे भईसिन एम्बासी खुर्जी ती एंग्हे बटा चि'आ गे आना।”
- 14 लिकिन येसुस आसिन बाचस, “अना आलायो! ने एंगन निम्है मइय्याँ नैवई ननू महले बटा खट्टू कमचकी र'ई।”
- 15 अरा आस आरिन बाचस, “चिहूंक र'अके, ओर्मा मदहे चिबाखारना ती बछ्का र'अके, एन्देरगेका एकअम ओर्तोस गुसन अजम कोड़हे खुर्जी र'ओ होले हूँ आद आस गे मानिम उज्जना मल मनो।”
- 16 तहाँ आस आरिन ओन्टा जोक्खा खीरी तिगियस: “ओन्टा उरुब आलासी खल्ल नू नगदे खुर्जी मंजा।



- 17 खने आस सोच'आ हेलरस, ऐन एन्देर ननोन? एंग्हे खुर्जिन उइय्या गे अइडा मल्ला।
- 18 अरा आस बाचस, ऐन एन्ने ननोन, एंग्हे कुट्ठी आबोन धस'ओन ती कोहाँ कम'ओन अरा अइय्यम ऐन एंग्हे धन्नन अरा एंग्हे नन्ना जिनिसन उइय्योन।
- 19 अरा ऐन एंग्हे जियन ब'ओन, 'निंगा गे नगदे चान गुट्ठी गे बग्गे जिनिस उइरकी र'ई, नीन खन्न ऐखय, ओनय, मोखय अरा रिङ्गा'अय।'
- 20 लिकिन धर्मस आसिन बाचस, 'अना बोया! इन्ना माखम नीन खे'ओय, होले निंग्हे उर्मी खोंइचका जिनिस नेख'आ मनो?'
- 21 एन्नेम आ आलासी दसा हूँ मनो, ने तंगा गे लेका खुर्जी खोंइरकी उइय्यदस। आस धर्मसी ऐरना नू उरुब मलकस।'
- 22 तहाँ येसुस तंग्हे चेलारिन बाचस, "इदगे ऐन निमन ब'अदन, एन्दरन ओनोम एन्ने निम्है उज्जना गे, महले एन्दरन अतोम एन्ने निम्है मेद गे घोख अमा नना।
- 23 एन्देरगेका उज्जना मंडी ती अरा मेद किचरी ती कोहाँ र'ई।
- 24 ओइा खाखा गुट्ठिन ऐरा, अबड़ा मल चाँख'ई अरा मल खुई अरा अबड़ा गे न खली अरा न कुट्ठी र'ई। अन्नु हूँ धर्मस अबड़न ओन्त'अदस। निंग्हे मूली गा ओइा गुट्ठी ती बग्गे र'ई।
- 25 नीम घोख नन्ना ती निम्है उज्जनन ओन घड़ी हूँ बग्गे नना पोल्लोर।
- 26 ओँगे नीम ई सन्नी नलखन नना पोलदर होले, नन्ना कत्था ही घोख एन्देरगे नन्दर?
- 27 पूंप गुट्ठी ही पत्त नू सोच'आ, अबड़ा एकासे परदी। अबड़ा नलख मल ननी अरा तमा गे किचरी मल कमत'ई। अन्नु हूँ ऐन निमन ब'अदन, सालोमोन बेलस एका कोहाँ उरुब आलस रहचस, लिकिन आस इबड़ा पूंपन ती ओन्टा बेसे हूँ फबना मल अतका रहचस।
- 28 इन्ना टोंका नू र'ऊ अरा नेला चिच्ची नू च'ऊ लट्ठी गे धर्मस फबना ऐथ्रना चि'अदस होले, अना पत्त'अना नू पयहा आलारो, धर्मस निमन मानिम नू ऐरोस खोजोस दने।
- 29 ओँगे नीम अमा घोख'आ का एन्दरन मोखोम अरा एन्दरन ओनोम अरा अमा दोलखा।
- 30 ई खेखेल ही मल पत्त'ऊ आलर इबड़ा ही तिहा नू र'अनर, लिकिन निम्है बंगस अखदस का निमा गे इबड़ा आलो ही चाइ र'ई।
- 31 लिकिन धर्मस निम्है उज्जना नू राजी नन्ना ही पत्त ता सोच नू र'आ, होले इबड़ा उर्मी आलो निमा चीतार'ओ।



- 32 अनय सन्नी गौहड़ा, अमय एल्चय। एन्देरगेका निम्बस निमा गे तंगहै गने मेर्खा राजी नू राजी नना गे आकुस चि'आ गे मने नन्दस।
- 33 औंगे निम्है खुर्जिन बीसा चि'आ अरा कीड़र गे चि'आ। अरा मल पच्चना ढिबा झोला अरा मल खंगर'ओ खुर्जी आबोन मेर्खा नू बेन्द'आ। असन खलबर मल खड़नर अरा सुरही मल मूखी।
- 34 एन्देरगेका निम्है खुर्जी एकसन रई असन निम्है जिया हूँ लक्की र'ओ।
- 35 निम्है कड़मा गुट्ठी भिड़चका अरा बिल्ली गुट्ठी लघरते र'अन नेकअन।
- 36 अरा नीम अबड़ा आलर बेसे मना। ने तम्है उर्बासिन पाब ऐरते र'अनर का आस एकाबारी बेंजा मदी ती किर्रोस ती बलिन ठोकठोकमब'ओस होले आस गे लेम तिसग'ओर।
- 37 इनाम खक्खू हिकनर अबड़ा जौंखर, नेकन उर्बस बर'ओ बारी एजरका खक्खोस। ऐन मानिम ब'अदन का उर्बस कड़मन भिड़'ओस ती आरिन मंडी ओना गे ओकत'ओस, अरा हेद्दे बर'अरकी आरिन सुसर'ओस।
- 38 अरा उर्बस अधरात माखा महले बिजबेड़ा नू बर'ओस ती हूँ अन्नेम एजरका खक्खोस होले अबड़ा जौंखर ती आस रिड़'ओस।
- 39 लिकिन इदन अख'आ का एड़पा उर्बस खलबर एकाबारी बर'ओर अदिन अख'ओस होले एजरका र'ओस अरा तंगहै एड़पन उम्पा मल चि'ओस।
- 40 औंगे नीम हूँ सपड़ारका र'आ, एन्देरगेका एकाबारी नीम सोच'आ हूँ मल सोचदर आ बेड़ा नू मनवा खद्दन ऐन बर'ओन।”
- 41 खने पतरस मेंजस, “अना उर्बायो, ई खीरिन नीन एमा गे का महले ओर्मर गे तिकय?”
- 42 खने उर्बस बाचस, “ने लूरगर अरा असरा जोगे जौंखस र'अदस। उर्बस आसिन नन्ना जौंखर गे ठौका बेड़ा नू तम्है ओन्नन मोखनन चि'आ गे असरा नन्दस, फिन आस डहरे ऐका गे कादस।
- 43 उर्बस बरदस ती आ जौंखासिन एन्ने नन्ते खक्खदस होले उर्बस आस नू रिड़'ओस।
- 44 ऐन निमन मानिम ब'अदन का उर्बस आसिन तंगहै उर्मी आलो मड़्य्याँ जिमा चि'ओस।
- 45 लिकिन आ जौंखस तंगहै उर्बस दीरी ती बर'ओस ब'अरकी तंगहै जिया नू ब'ओस ती जौंखारिन दरा जौंख-पोल्लोरिन लौना अरा ओना मोखा दरा ऊंखनुम र'ओस होले,
- 46 आ जौंखस इकला पाब मल ऐरोस अरा एका बेड़न बलदस आ बारिम आसी उर्बस बर'ओस ती आस गे कोड़हे दंडे चि'ओस अरा आसिन सज'ओस चि'ओस एसन मल पत'उर र'अनर।



- 47 एका जोंखस तंग्हे उर्बासी मनेन अक्खस, लिकिन आस सपडारका मल रहचस अरा आसी मने लेक्खा मल नंजस, आस बग्गे मार मोखोस।
- 48 लिकिन ने तंग्हे उर्बासी मनेन बल्लना ती मार मोखना ही जोगे नलख नंजस, आस जुक्की मार मोखोस। नेका बग्गे चीरकी रई आर गुसते बग्गे नेरओ। अरा धर्मस नेका गे बग्गे सोंपचकादस आस गुसते बग्गे होरओस।
- 49 ऐन खेखेल नू सस्ती ओन्द्रआ गे बरचकादन, अरा ऐन मने नन्दन का आद ओड़ मनो दने।
- 50 एंगा सस्ती अरा खेअना ही ओन्टा नोडरना होअना रई अरा अदही मन्ना गूटी ऐन खिलपत नू रअदन।
- 51 नीम एन्देर सोचदर, ऐन खेखेल नू सान्ति चिआ गे बरचकन का? ऐन निमन बअदन, ऐन एंगन पतऊ आलर अरा मल पतऊ आलारिन भिने नना गे बरचकादन।
- 52 एकासे का अक्कु ती ओन्टा एडपा नू पाँच झन तम्है ती छिन्डरओर। तीन झन दुई झन ही बिड़दो नू अरा दुई झन तीन झन ही बिड़दो नू छिन्डरओर।
- 53 तम्बस तंग्दासी बिड़दो नू अरा तंग्दस तम्बासी बिड़दो नू अरा तंग्यो तंग्दा ही बिड़दो नू अरा तंग्दा तंग्यो ही बिड़दो नू अरा सास तंग्सेडो ही बिड़दो नू अरा सेडो तंग्सास ही बिड़दो नू छिन्डरओर।”
- 54 तहाँ येसुस गोंहडा नू इदन हूँ बाचस, “एकाबारी नीम बदालिन पच्छिम तरती अरगना कुलनन ऐरदर होले चाइहेम बअदर, ‘चेप बरओ’ अरा अन्नेम मनी।
- 55 अरा एकाबारी नीम दखिन ताका तागरना ऐरदर होले बअदर, ‘बिड़ओ’ अरा अन्नेम हूँ मनी।
- 56 अना उत्तरमाडू आलारो, नीम खेखेल दरा मेर्खा ही मूठन चिन्हआ ओंग्दर, लिकिन ई बेड़न चिन्हआ पोलदर।
- 57 अरा नीम नीमिन एन्देरगे नेवई नना पोलदर एन्द्रा मानिम रई?
- 58 निंग्हे बैरी निंगन कछेरी नू होअदस होले डहरेनुम आस ती मेसर नखरआ गे चिहुट नना। मला होले आस निंगन नेवई ननुस गुसन होओस अरा नेवई ननुस निंगन सैनस गे चिओस, अरा सैनस निंगन जेहेल एडपा नू सजओस।
- 59 ऐन निमन बअदन, एका गूटी नीन निंग्हे उर्मी खुर्जिन चिअरकी मुंजओय आ गूटी मल उरखोय।”

लूकस 13



- 1 आ बेड़ा नू जोक्क आलर असन रहचर, आर येसुसिन तिंगियर का राजी खापू पिलातुस जोक्क गलिलेया ता आलारिन पिटियस ती आर ही खेंसन तम्है दाँडे ही खेंस नू मेसा बाचस।
- 2 खने येसुस आरिन आनाकिर्ताचस, “नीम एन्देर सोचदर, इबड़ा गलिलेयर नन्ना गलिलेयर ती बग्गे पपहा रहचर का आर मइय्याँ एन्ने खिलपत मंजा?
- 3 ऐन निमन ब'अदन, एन्ने मला, लिकिन नीम जियन मल किर्त'ओर होले नीम ओर्मर एन्नेम नास मनोर।
- 4 एन्नेम नीम एन्ने सोचदर का सिलोवम ता गुम्मत अठारा आलर मइय्याँ खतरा ती आरिन पिटिया, ईर येरुसलेम नू र'ऊ ओर्मा आलर ती बग्गे पपहा रहचर का?
- 5 ऐन निमन ब'अदन, एन्ने मला, लिकिन नीम जियन मल किर्त'ओर होले नीम ओर्मर एन्नेम नास मनोर।”
- 6 तहाँ येसुस ओन्टा जोक्खा खीरी तिंगियस, “ओर्त आलस तंग्हे अंगुर बटकी नू ओन्टा अंजीर मन्न इद्रकी रहचा। आस अइय्या खंजपा बेद्दा उर्मी चानुम बरचस, लिकिन मल खक्खियस।
- 7 खने आस बटकी खापुसिन बाचस, ‘ऐरा, ऐन तीन बछर ती इय्या ई अंजीर मन्न ही खंजपा बेद्दा बरदन लिकिन मल खक्खदन। अदिन खंडा चि'आ, एन्देरगे आद अइडन छेकचकी र'ई?’
- 8 खने जोंखस आसिन आनाकिर्ताचस, ‘अना उर्बायो, ई मन्नन इदना खोन्द र'आ चि'आ, ऐन इदही ओनबेडर'आ अरखोन अरा सारे ननोन।
- 9 अरा मुन्द चान खंज'ओ होले दौ हिके, मला होले खंडके चि'अके।”
- 10 येसुस ओन्टा खन्न ऐखना उल्ला नू ओन्टा गोइहा एइपा नू सिखाब'आलियस।
- 11 अरा ओन्टा मुक्का अइय्या रहचा। आद पयहा ननू मलदौ बोलता ती अठारा चाँन खइदकी रहचा। अरा आद कुबरी मंजकी रहचा, अरा एकन्ने ती हूँ सोज मना पोल्ला लगिया।
- 12 येसुस अदिन ईरयस ती मीखियस अरा अदिन बाचस, “अनय आली, नीन निंग्हे रोगे ती उजगार'अय।”
- 13 अरा आस अदही मइय्याँ तंग्हे खेक्खा उइय्यस, खने आद लेथेम उजगारा केरा, अरा धर्मसी ओहमा नना हेलरा।
- 14 लिकिन गोइहा एइपा ता मुद्धस जंगारस केरस, एन्देरगेका येसुस खन्न ऐखना उल्ला नू उजगाचस। अरा आस आलारिन बाचस, “हपता नू नलख नना गे छै उल्ला र'ई, अबड़ा उल्ला नू बरा ती कोड़े नना, लिकिन खन्न ऐखना उल्ला नू मला।”



- 15 खने उर्बस आसिन बाचस, “अना उत्तरमाडू आलारो, निम्है ती ओर्मर खन्न ऐखना उल्ला नू अड्डोन महले गदहान गोयसाली ती बिछरदर ती अम्मू ओन्त आ गे मल हो अदर का?
- 16 ई आलिन ऐन कोड़े नंजकन आद अब्राहमसी तंगदा हवे आद गा मेखो मल्ली। एकदन सैतान अठारा बछर ती धरचकी रहचा। इदिन खन्न ऐखना उल्ला नू हूँ कोड़े नन्ना दौ दिम रई।”
- 17 एकाबारी येसुस ई कथन बा आलियस खने आसी बिड़दोर लज्जर केरर। अरा उर्मी आलर आसी नंजका महबा ही नलख ती खुसमारर।
- 18 तहाँ येसुस बाचस, “धर्मसी राजी नू बग्गे आलर बढरना एन्देर लेक्खा रई, अरा अदिन ऐन एन्देर गने जोक्ख ओन?
- 19 आद राई बिहनी लेक्खा रई। अदिन ओर्त आलस होचस ती तंगहै बटकी नू चाँखस। अरा आद परदिया ती कोहाँ मन्न मंजा, अरा मेर्खा ता ओड़ा गुट्ठी अदही डाड़ा नू खोता अट्टिया।”
- 20 फिन आस बाचस, “ऐन ब ओन का धर्मसी राजी एकासे गोट्टा खेखेल नू बीड़ ओ।
- 21 आद बिदगी लेक्खा रई। ओर्त आली अदिन कटी गुना होच्चा ती तीन तामी गुंडा नू लिंडया, ई लेक्खा आद उर्मी तिस्सा मंजा केरा।”
- 22 येसुस नगरे नगरे अरा पद्दा पद्दा सिखाब अनुम येरुसलेम तरा कालालियस।
- 23 ओर्तोस आसिन मैजस, “अना उर्बायो, जुक्किम आलर लेका लाड़र ओर का?” खने आस आरिन बाचस,
- 24 “हाँ, औंगे सकुड़ बली ती मेर्खा कोर आ गे चिहूट नना, ऐन निमन ब अदन, बग्गे आलर गा कोर आ बेददोर, लिकिन कोर आ पोल्लोर।
- 25 एकाबारी एड़पा ता उर्बस चो अदस ती बलिन मुच्चदस। खने नीम बहरी इज्जदर ती एन्ने ब अनुम बलिन ठोक ठोकम ब अदर ‘अना उर्बायो, एमा गे बलिन तिसग आ।’ आस निमन आना किर्त ओस, ‘ऐन निमन बलदन एसला हिकदर?’
- 26 होले नीम ब आ हेलर ओर, ‘ऐम निगहै संगे संगे ओँडकम मोककम, अरा नीन एम्है गली नू एमन सिखाबाचकय।’
- 27 लिकिन आस आना किर्त ओस, ‘ऐन निमन ब अदन, ऐन निमन बलदन नीम एसते बरचकर। मलदौ नलख ननू आलारो, नीम एंगहै गुसते बाँगा।’



- 28 आ बारी नीम अब्राहम अरा इसाक अरा याकोबस अरा ओर्मा धर्मसी कथा तिगुरिन गेच्छा धर्मसी राजी नू उक्का ऐरोर अरा निमन गा ओथ्रका ऐरोर। आ बारी अइय्या निमा गे चींखना अरा पल्ल चबर्ना मनो।
- 29 अरा नन-यहूदी आलर पुरुब अरा पच्छिम अरा दखिन अरा उत्तर तरती बर'ओर अरा धर्मसी राजी ही मदी नू ओक्कोर।
- 30 अरा ऐरा, ने अक्कु किइय्या पद नू र'अनर आर आ बारी नू कोहाँ पद नू नन्तार'ओर, अरा ने अक्कु कोहाँ पद नू र'अनर आर आ बारी नू किइय्या पद नू नन्तार'ओर।”
- 31 आ बारिम जोक्क फरिसीर बरचर ती येसुसिन बाचर, “इय्या ती उरखा ती किरिमबि'आ, एन्देरगेका हेरोदेस अन्टिपास निंगन पिटा बेददस।”
- 32 आस आरिन बाचस, “कला अरा आ सिकटासिन ब'आ। ऐरा, ऐन इन्ना दरा नेला नाद गुट्ठिन ओथ्रदन अरा बेमरहारिन कोड़े नन्दन, अरा तिसर उल्ला नू एंगहै तिगिचका नलखन मुंज'ओन।
- 33 इन्ना नेला अरा नेलबेंजा येरुसलेम नू एंगा कुद्दना र'ई। लिकिन खोखा ऐन पिटतार'ओन, एन्देरगेका ईद एन्ने मना पुल्ली का ऐन अरा एकअम धर्मसी कथा तिगुस येरुसलेम ती बहरी पिटतार'ओस।
- 34 अना येरुसलेम ता आलारो, नीम धर्मसी कथा तिगुरिन पिटकर अरा नेकन धर्मस निम्है गुसन तइय्यस आरिन पखना ल'अदर ती पिटदर। खेर तंगहै खद्दन डेना किइय्या खिवड़ई, अन्नेम धर्मस हूँ ढेर हेल निम्है खद्दारिन खेवड़'आ बिददियस, लिकिन नीम एन्ने नना मल चिचचकर।
- 35 इदन मेना, निम्है एइपा निमा उझड़ारका अम्बतार'ई। अरा ऐन निमन ब'अदन, ‘ने उर्बासी आकुस ती बरदस आस आसीस खक्खू र'अदस’ एन्ने नीम एंगहै पत नू अरगी ब'अना बेड़ा गूटी नीम एंगन मल ऐरोर।”

लूकस 14

- 1 ओन्टा खन्न ऐखना उल्ला नू येसुस फरिसीर ही मुद्धासी एइपा नू मंडी ओना केरस, अरा आलर येसुसिन जोह'आलियर।
- 2 ओन्टा आलस आसी मुन्दहारे रहचस, आस गे जलान्धर रोगे रहचा।
- 3 खने येसुस फरिसीरिन अरा नेग सिखाब'उरिन बाचस, “एन्देर खन्न ऐखना उल्ला नू कोड़े नना गे नेग छिक'ई का?”
- 4 लिकिन आर कलेकसे रहचर। खने आस आसिन ऐंसइस ती कोड़े नंजस अरा तइय्यस चिचचस।



- 5 अरा आस आरिन बाचस, “निम्है ती नेखअम गदहा महले अड्डो तूसा नू खतरओ होले, आ बारिम आस खन्न ऐखना उल्ला नू हूँ अदिन मल ओत्रओस का? आद हूँ नलख दिम रई।”
- 6 आर इदही पत नू एन्देर हूँ ब'आ पोल्लर।
- 7 पाहियर ओक्का गे मईन जोगे अड्डा चाजनन येसुस ईरयस खने ओन्टा जोक्खा खीरी ती आरिन तिगियस।
- 8 “निंगन बैजा मंडी ओना गे नीकईम एड'ओर होले मईन जोगे अड्डा नू अमके ओक्का, एन्देरगेका आस निंगन ती कोहाँ ओहमा जोगे नैकअनिम एड्डका र'ओस।
- 9 होले निमन इरबारिन एड्डका आलस बर'ओस ती निंगन ब'ओस, ‘ईस गे अड्डा चि'आ।’ होले नीन लजर'ओय ती उर्मी ती किय्या अड्डा नू ओक्कना मनो।
- 10 औंगे इकला निंगन एड्ड'ओर होले, कालके ती उर्मीन्ती किय्या अड्डा नू ओक्कके। होले एड्डका आलस बर'ओस ती निंगन ब'ओस, ‘अना संगी मइय्याँ ओक्का’, होले उक्कुर ही मुन्दहारे निंगहा मईन मनो।
- 11 अरा इदन सुरता नना का ने तमन कोहाँ ऐदनर आर सन्नी मन्तार'ओर, अरा ने तमन सन्नी ऐदनर आर कोहाँ मन्तार'ओर।”
- 12 तहाँ येसुस तंगन एड्डका आलासिन बाचस, “इकलअम नीन उल्ला महले माखा ता मंडी चि'ओय होले, निंगहै संगियर महले भईर महले पाहियर महले उरुब अरबर-परबारिन अमके एड'आ। एन्देरगेका इदही बदली नू आर हूँ निंगन एड'ओर, अरा बदली किरत'ओर।
- 13 लिकिन इकलअम नीन मदी चि'अदय होले, किडारिन, लूलारिन, लेंगडारिन अरा अन्धहारिन एड्डके।
- 14 एन्देरगेका आर निंगा गे मल किरत'ओर, होले नीन आसीस खक्खोय। लिकिन उजगो आलर ही उज्जा चो'अना उल्ला नू नीन आसीस खक्खोय अरा निंगा किरतार'ओ।”
- 15 येसुस गने मंडी ओना उक्का मदहेर ती ओर्तोस इबडा कत्थन मेंजस ती आसिन बाचस, “ने धर्मसी राजी नू मंडी ओनोर आर कोइहे आसीस खक्खू आलर हिकनर।”
- 16 खने येसुस आसिन बाचस, “ओर्त आलस कोहाँ मदी चिच्चस अरा बग्गे आलारिन एड्डस।
- 17 अरा ओन्ना-मोखना सरचा खने तंगहै जोंखासिन एड्डका आलारिन मेखा गे तइय्यस ‘बरा, अक्कु उर्मी सरचकी रई।’



- 18 लिकिन आर ओर्मर छमा नेआ हेलरर। मुन्द ता आलस बाचस, 'ऐन खल्ल खिन्दकादन, अरा अदिन एंगा ऐरा काना रई। ऐन निंगन गोहरारदन एंगन छमा ननके।'
- 19 अरा नन्नस बाचस, 'ऐन पाँच गोहला अड्डो खिन्दकादन, अक्कुन अबडन बिढ़ा कादन, ऐन गोहरारदन एंगन छमा ननके।'
- 20 अरा अउर ओर्तोस बाचस, 'ईपालीम एंग्हे बेंजा मंजकी रई, आँगे ऐन बर'आ पोलदन।'
- 21 आ जोंखस किरियस ती तंग्हे उर्बासिन तिगियस। खने एडपा उर्बस खीस मंजस ती तंग्हे जोंखासिन बाचस, 'नगरे ही बजार अरा गली गुट्ठी नू चाँडेम कला ती कीड़ारिन, लूलारिन, लेंगड़ारिन अरा अन्धहारिन ओन्द्र'आ बरा।'
- 22 अरा जोंखस बाचस, 'अना उर्बायो, नीन एकासे आनकय अन्नेम नंजकन अन्नु हूँ अड्डा रई।'
- 23 उर्बस जोंखासिन बाचस, 'सडक गुट्ठी नू अरा खल्ल डहरे गुट्ठी तरा कला ती आलारिन बडपेलहा नना ओन्द्र'आ, एकत्रु एंग्हे एडपा निन्दन नेकअन।'
- 24 ऐन निमन ब'अदन, 'धर्मस एड्डका आलर ती जुक्किम यहूदी आलर दिम धर्मसी मदिन आँडे ऐरोर।'''
- 25 कोहाँ गोंहड़ा गुट्ठी येसुस गने कालालिया, अरा आस किरें ऐरर आरिन बाचस,
- 26 "एकअम ओर्तस एंग्हे गुसन बरदस, आस तंग्योन अरा तम्बासिन, मुक्कन अरा खद्द-खर्ी, भईरिन अरा बहिनरिन तंग्हे जियन हूँ एंग्हे ती कोड़हे चोन्हा नन्दस होले, आस एंग्हे चेला मना पोलदस।
- 27 अरा एकअम ओर्तस तंग्हे क्रुसन चेड़'अरकी एंग्हा चड्डे सस्ती सार'आ गे मने मल नन्दस आस एंग्हे चेला मना पोलदस।
- 28 निम्है नू एकास एडपा कम'आ बेद्ददस होले, आस ओक्कदस ती चिताबुता नन्दस, अदही खरचा ऐ बग्गे मनो अरा अत्रु ऐन कम'आ मुंजा आँगोन का?
- 29 मला होले आस नेव चौदकादस अरा कम'आ मुंजा पोलदस होले, ईरु आलर ओर्मर आसिन अलखोर।
- 30 अरा ब'ओर, 'ईस कम'आ गा हेलरस लिकिन कम'आ मुंजा पोल्लस।'
- 31 अन्ति एका बैलस नन्ना बैलस गने लड़ाई नना कादस होले, मुन्द आस ओक्कदस ती चिहुंक ती मल सोचदस का? एकास लड़ाई नना बरदस आस बीस हजार आलारिन ओन्द्रदस ती एंग्हे गने लड़ाई नना बरदस। ऐन दस हजार हो'अरकी आसिन लड़ाई नू जित'आ आँगोन का?



32महले आसी गेच्छा र'अनुम पैका तइय्योस अरा आसी गने मेसर'आ बेद्दोस।

33एन्नेम निमा हूँ एंग्हे चेला मना गे उर्मीन मुरछ'आ गे सपड़'अना र'ई।

34नीम बेक लेक्खा र'अदर। बेक डउल हिके। लिकिन बेक ही तीनना मेटर'ओ कालो होले, आद अउरिम बेक मल कमर'ओ

35होले आद खेखेल गे अरा सारे गे हूँ मल मनी। अदिन आलर हेबड़नर चि'अनर। ऐन एन्ना बाचकन अदिन नीन बुझुर'आ बेद्ददय होले, अदही पत नू चिहुंक लगाय सोच'आ।”

लूकस 15

1अक्कु येसुस गुसन ऊज'ऊ आलर अरा नन्ना पपहा आलर ओर्मर आसी कत्थन मेना गे बर'आलियर।

2फरिसीर अरा नेग सिखाब'उर, “ईस गा पपहा आलर गने भिड़ाब'अदस अरा आर ही गने ओन्दस मोखदस” ब'अरकी कुटमुटर'आ हेलरर।

3खने आस आरिन ई जोक्खा खीरिन तिंंगियस।

4“निम्है ती एकअम आलासी ओन सौ भेन्डो र'ई, अबड़ा ती ओन्टा एबस'ओ होले, एन्देर आस निनाबे गोटंगन टोडंग नू अम्बोस ती आ एबसकन अरगी खक्खना गूटी मल बेद्दोस?

5अरा आस अदिन खक्खदस ती खुसमारनुम अदिन खेसेर नू चेड़दस।

6अरा आस एड़पा बरदस ती तंग्हे संगीरिन अरा अरबर-परबारिन खोंड़दस अरा ब'अदस, ‘एंग्हे गने खुसमार'आ, एन्देरगेका ऐन एंग्हे एबसका भेन्डोन बिद्दका र'अदन।’

7ऐन निमन ब'अदन, ई लेक्खम जिया किर्त'अना ही चाड़ मलका निनाबे उजगो आलर गे मेर्खा नू ऐ बग्गे खुसमारना मनो अदिन ती कोड़हे खुसमारना मेर्खा नू मनो इकला ओन्टा पपहा आलस जियन किर्त'अदस।

8ओन्टा मुक्का गुसन दस गोटंग चान्दी ही ढिबा र'ई। अरा आद ओन्टन एबस'ई चि'ई होले, आद बिल्ली दग'ई ती एड़पन इरी उथरी अरा अदन अरगी खक्खना गूटी चिहुंक ती बिद्दी।

9अरा अदिन बिद्दी होले, आद तंग्हे संगियारिन अरा अरबर-परबारिन मीखी ती तिंगी, ‘एंग्हे गने खुसमार'ए एन्देरगेका ऐन एंग्हे एबसका ढिबन बिद्दिय'अन।’

10ऐन निमन ब'अदन, एन्नेम ओन्टा जियन किर्ताचका आलासी पत नू धर्मसी पैकर ही मुन्दहारे रिझी मनी।”



- 11 फिन येसुस बाचस, “ओर्त आलासी ऐनोटा खद्दर रहचर।
- 12 अबड़र ती सन्निस तम्बासिन बाचस, ‘अना बबा, खुर्जी ती एंग्हे बटन एंगा चि’आ।’ खने तम्बस आर गे तम्हे खुर्जिन खट्टियस चिच्चस।
- 13 जोक्क उल्ला हूँ मल मंजा, सन्नी खद्दस तंग्हे उर्मिन जोगइस ती गेच्छा राजी केरस। अरा असन मलदौ उज्जना ती तंग्हे खुर्जिन नठाबाचस।
- 14 अरा इकला आस उर्मिन मलदौ इहरे ती मुंजा खच्चियस, आ राजी नू कोहाँ राजी कीड़ा मंजा अरा आस कीड़ा सार’आ हेलरस।
- 15 औंगे आस आ राजी ता ओर्त आलस गुसन बूता गे केरस। आस आसिन तंग्हे खल्ल नू किस्सी खापा तइय्यस।
- 16 आस कीड़ा ही चड्डे किस्सी गुट्ठी मोखालिया आ कुन्डो ती तंग्हे कूलन उइत’आ बिद्दियस। लिकिन ने हूँ आस गे एन्द्रा हूँ मल चिच्चर।
- 17 अक्कु आस तंग्हे फरीफरी सुरता नू बरचस ती बाचस, ‘एम्बस गुसन बग्गे जोंखर र’अनर। आर गे उडुच लिंग्हा ओन्ना-मोखना र’ई। लिकिन ऐन इसन कीड़ा ती खे आलदन।
- 18 ऐन अक्कु इसते अम्बोन ती एम्बस गुसन किर्’ओन अरा आसिन ब’ओन, ‘अना बबा, ऐन धर्मसी अरा निंग्हे बिड़दो नू पाप नंजका र’अदन।
- 19 अरा ऐन अक्कु ती निंग्हे खद्द बारना जोगे मलकन, निंग्हे ओर्त जोंखर लेक्खा एंगन उइय्या।”
- 20 तहाँ आस अम्बियस ती तम्बस गुसन बरचस। लिकिन आस गेच्छम रहचस खनेम तम्बस आसिन ईरियस अरा सोग्गे ईरियस ती बुंगनुम केरस ती आसिन खिंच्चियस अरा चुंखियस।
- 21 तंग्दस आसिन बाचस, ‘अना बबा, ऐन धर्मसी अरा निंग्हे बिड़दो नू पाप नंजका र’अदन। ऐन अक्कु ती निंग्हे खद्द बारना जोगे मलकन।’
- 22 लिकिन तम्बस तंग्हे जोंखारिन बाचस, ‘चाँइहे बेस ती बेस किचरी गुट्ठिन ओन्द्र’आ अरा आसिन अत्त’आ, अरा आसी खेक्खा नू मुद्दी अत्त’आ, अरा खेइडे नू जुता अत्त’आ।
- 23 अरा इढरका बछरन ओन्द्र’आ अरा एइबा, अन्ति नाम ओनोत दरा रिरयार’ओत।
- 24 ई एंग्दस केचका बेसे रहचस, लिकिन आस अक्कु उज्जालदस, अरा एबसका रहचस, लिकिन अक्कु खक्खरस।’ खने आर रिरयार’आ हेलरर।
- 25 लिकिन आसी कोहाँ खद्दस खल्ल नू रहचस। आस एइपा हेद्दे अंइसियस खने, अस्सना पाइनन अरा नलनन मैजस।



- 26अन्ति आस ओन्टा जोंखासिन मीखियस ती मेंजस, 'एन्देर मना लगी?'
- 27जोंखस आसिन बाचस, 'निंग्डीस बरचकादस, निम्बस डढरका बछरन इडबियस, एन्देरगेका आस कोडेम किरियस।'
- 28कोहाँ खद्दस कैरारस केरस, अरा भितरी कोर'आ मल बिद्दियस। खने तम्बस उरखस ती आसिन गोहरारस।
- 29लिकिन आस तम्बासिन आनाकिर्ताचस, 'ऐरा, ऐन इव्दा चाँन ती निंग्हे नलख नन्दन अरा इकला हूँ निंग्हे पैसकन मल चाडकन। अन्नु हूँ नीन एंगा गे इकला हूँ ओन्टा बोकइन एंग्हे संगियर गने रिरयार'आ गे मल चिचकय।
- 30लिकिन ई निंग्दस भइवा नलख ती निंग्हे उर्मी खुर्जिन मुंजियस ती बरचस। नीन आस गे डढरका बछरन इडबका र'अदय।'
- 31तम्बस आसिन बाचस, 'अना बेटा, नीन गा सगरो एंग्हे गने र'अदय, अरा एंग्हे उर्मी निंग्हे दिम हिके।
- 32लिकिन अक्कु नमा रिरयारना अरा रिङ्गना चाड रई। एन्देरगेका ईद एन्ने बेसे का निंग्दिस केचका रहचस, लिकिन अक्कु उज्जदस, अरा एबस्रका रहचस, लिकिन अक्कु खक्खरस।'''

लूकस 16

- 1फिन येसुस तंग्हे चेलारिन ई जोक्खा खीरिन हूँ बाचस, "ओन्टा उरुब आलस रहचस, आसी ओर्त ईरु-खूजू रहचस। अरा आलर उरुबस गुसन कालरकी आ ईरु-खूजू मड्य्याँ बदी ठेकाबाचर का आस निंग्हे खुर्जिन बुडाब'आ चि'आलदस।
- 2खने आस आसिन मीखियस ती बाचस, 'नीन एंग्हे खुर्जिन नठाब'आलदस ब'अरकी निंग्हे पत नू मेंजकादन, निंग्हे नलख ही लेखा चि'आ, नीन खोखा एंग्हे ईरु-खूजू मल र'ओय।'
- 3खने आ ईरु-खूजुस तंग्हे ती बाचस, 'ऐन एन्देर ननोन? एंग्हे उर्बस गा एंगन ईरु-खूजू नलख ती ओथ्र'आ लगदस। एंगा गा खज्ज अरखा गे पया मल्ला, अरा तेम्बा गे हूँ लजरदन।
- 4ऐन अक्कु अक्कन का ऐन एन्देर ननोन, आस एंगन ईरु-खूजू नलख ती ओथ्रना चि'अना ही खोखा हूँ आलर एंगन तम्है एडपा नू परघ'ओर।'
- 5खने आस तंग्हे उर्बासी नहड़ा होच्चका आलारिन ओर्त ओर्त मीखियस। अरा मुन्दतासिन बाचस, 'नीन एंग्हे उर्बासी एका बग्गे नहड़ा मोक्कादय?'



- 6आस बाचस, 'सौ मन जैतून इसुंग।' आस आसिन बाचस, 'निंग्हे खता ओन्द्र'आ अरा ओक्का ती चाँइहे पचास लिख'आ।'
- 7फिन आस नन्नासिन बाचस, 'नीन एका बग्गे नहड़ा मोक्कादय?' आस बाचस, 'सौ मन गंहू।' आस आसिन बाचस, 'निंग्हे खता ओन्द्र'आ अरा अस्सी लिख'आ।'
- 8खने उर्बस मलदौ ईरु-खूजुसी लूर आबोन ईरियस ती आसिन सहारस। एन्ने ई परिया ता मल पत'ऊ आलर गा तम्है आलर मदहे नू धर्मसी राजी गे जोगे आलर ती लूरगर र'अनर।
- 9अरा ऐन निमन ब'अदन, खेखेल ही खुर्जी ती निमा संगेरिन कम'आ, एन्देरगेका एकाबारी खुर्जी निम्है ती अम्बर'ओ, होले ईर निमन जनमजुग ता एड़पा गुट्ठी नू परघ'ओर।
- 10एकास जुक्की नू पत'अना जोगे र'अस आस बग्गे नू हूँ पत'अना जोगे र'अस, अरा एकास जुक्की नू उजगो मल र'अदस आस बग्गे नू हूँ उजगो मल र'अदस।
- 11औंगे नीम खेखेल ता खुर्जी नू पत'अना जोगे मल र'अदर होले ने निमन मेर्खा ता मानिम खुर्जी नू पत'ओर?
- 12अरा नन्नर ही जिनिस गुट्ठी नू नीम पत'अना जोगे मल मन्दर होले एकाद निम्है र'ई अदिन निमा ने चि'ओ?
- 13एका जोंखस हूँ ऐंड उर्बर ही सुसर नना पोलदस। आस गा ओर्तासिन हींइ'ओस अरा नन्नासिन चोन्हा ननोस, महले ओर्तस गने मेस्रका र'ओस अरा नन्नासिन खॉइ'ओस। ई लेक्खम नीम धर्मसी अरा खेखेल ता खुर्जी ही सुसर नना पोलदर।"
- 14फरिसीर ने ढिबा ही चिबाखार'ऊ रहचर, आर इबड़ा कत्थन मेंजर ती येसुसिन भेसड़'आ हेलरर।
- 15खने आस आरिन बाचस, 'नीम आलर ही ऐरना नू गा दौ ऐथ्रदर, लिकिन धर्मस निम्है जिया ता कत्थन अखदस। एकाद आलर ही ऐरना नू कोहाँ र'ई आद धर्मसी ऐरना नू खॉइ'ना र'ई।
- 16मूसासी पेसका अरा धर्मसी कत्था तिंगुर ही कत्था गुट्ठी योहन नूइरत'उसी बरना गूटी तेंगरा। आ बेड़ा ती धर्मसी राजी ही दौ कत्था तेंगर'आ लगी, अरा ओर्मर कोइहे चिहुट ती अइय्या कोरनर।
- 17लिकिन मेर्खा दरा खेखेल ही टाइरना काना धर्मसी पेसका ही ओन्टा कड़ी ही बदलारना ती सेब्बा र'ई।
- 18नीकइम तंग'आलिन अम्बदस ती नन्ना बैज्रदस, आस नन्ना आली गुसन काना ही पाप नन्दस। अरा एकास अम्बरका आलिन बैज्रदस आस हूँ नन्ना आली गुसन काना ही पाप नन्दस।



- 19ओर्त उरुब आलस रहचस। आस लेपलेप अरा बग्गे दामी किचरी गुट्ठिन अत्तालियस ती उर्मी उल्ला सुख-सौरत गने उज्जालियस।
- 20अरा लाजरस नामे ओन्टा कीड़ा आलस खसरा ती लिन्डरका ती आ उरुब आलासी चाली बली गुसन बिडरका र'आ लगियस।
- 21अरा आस उरुब आलासी टिबुल ती खत्रका जुट्टा कट्ठा ती तंग्हे कूलन उइत'आ बेद्दालियस। अरा अल्ला गुट्ठी बर'आ ती आसी खसरा गुट्ठिन टाटालगिया।
- 22फिन आ कीड़ा आलस केच्चस केरस अरा मेर्खा पैकर आसिन होच्चर ती अब्राहमसी कोरा नू ओकताचर। अरा आ उरुब आलस हूँ केच्चस अरा आसिन मंडियर।
- 23अरा आस चिच्ची गड्डी नू कलपारनुम मेन ईरयस। खने गेच्छान्ती अब्राहमसी कोरा नू लाजरसिन ईरयस।
- 24खने आस चिच्चियारस ती बाचस, 'अना बंग अब्राहम, एंगन सोग्गे ऐरा, अरा लाजरसिन तइय्या चि'आ का आस तंग्हे अंगलिन अम्म नू बोथारकी एंग्हे ततखन कीरत'ओस, एन्देरगेका ऐन ई चिच्ची नू कलपार'आ लगदन।'
- 25लिकिन अब्राहमस बाचस, 'अना खद्द, सुरता नना नीन निंग्हे उज्जना ही बेड़ा नू निंग्हे दौ जिनिसन खक्खा चुकुरकय, अन्नेम लाजरस मलदौ जिनिसन खक्खियस। लिकिन अक्कुन आस इसन जिया सालना खक्खालदस अरा नीन गा कलपार'आ लगदय।
- 26ईद लेका मला, निंग्हे अरा एंग्हे मझी नू खोइखा खैइ र'ई। औंगे ने हूँ इसलेक ती असन कट्टा बेद्दोर आर पोल्लोर काला, अरा असलेक ती इसन बर'आ बेद्दोर आर पोल्लोर बर'आ।'
- 27खने आस बाचस, 'होले अना बंग, ऐन निंगन गोहरारदन का नीन लाजरसिन एंग्हे बंगासी एइपा तइय्या।
- 28एन्देरगेका एंग्हे पांच भईर र'अनर, लाजरस आरिन तिगाब'ओस। एन्ने अम्बन मना का आर हूँ ई कलपारना अइडा नू बर'ओर।' 29लिकिन अब्राहमस आसिन बाचस, 'आर गुसन गा मूसासी पेसका अरा धर्मेसी कत्था तिंगुर ही पुथी गुट्ठी र'ई, अय्या ती आर मेन्नर नेकअन।'
- 30अरा आ उरुब आलस बाचस, 'अन्ने मला, बबा अब्राहम, लिकिन केच्चर ती नीकईम आर गुसन क'ओर होले, आर जियन किर्त'ओर।'



31 लिकिन अब्राहमस आसिन बाचस, 'मूसासी पेसका अरा धर्मसी कत्था तिगुर ही पुथी गुट्ठिन मल मेनोर होले, नीकड़म केचका ती उज्जा चो'ओस ती आरिन तेंगोस होले हूँ आसिन मल मेनोर।'”

लूकस 17

1 फिन येसुस तंग्हे चेलारिन बाचस, “पाप नन्ना ही चिबाखारना गुट्ठी बर'ओ दिम। लिकिन ओहरे अबड़ा नेखा ती बर'ई।

2 एका आलस ई सन्नी ती एकअम ओतोस गने पाप ही नंगु मन्दस, आसी खेसेर नू जतन हें'अरकी समुदर नू मुलखत'अना चि'अना धर्मसी चि'अना दंडे ती जुक्की र'ई।

3 चिहुंक र'आ, निम्है भईस पाप नन्दस होले आसिन बुझा ब'आ, अरा आस खोबरारदस ती जियन किर्त'अदस होले आसिन छमा नना।

4 अरा आस ओन उल्ला नू सात हेल निंग्हे बिड़दो नू पाप नन्दस ती सातो हेल निंग्हे गुसन बर'अरकी ब'अदस, 'ऐन खोबरारदन जियन किर्त'अदन' होले हूँ आसिन छमा नना।”

5 बारो तइरकर उर्बासिन बाचर, “एमन कोइहे बड़ियर पत'आ गे संगरा नना।”

6 उर्बस बाचस, “निमा गे ओन्टा मनी बिहनी लेक्खा पत'अना रहचका होले हूँ, नीम ई तुंती मन्नन ब'ओर, 'नीन चड़र'अय ती समुदर नू इदर'अय कलय' होले आद निम्है पेसकन मन'ओ दने।”

7 उर्बस अउरिम बाचस, “निम्है ती नेखय जोंखस र'अदस। आ जोंखस गोहला उइय्ना महले भेंडो खापना ती खल्ल ती एड़पा किर्दस होले, आसिन नीम ब'ओर का 'नीन लेम कला मंडी ओना गे ओक्का?’

8 आस आसिन एन्ने ब'ओस, 'एंगा मंडी सराजमा नना, एंग्हे ओन्ना-मोखना गूटी कड़मन भिड़'अरकी सुसर'अत र'आ, अरा अदही खोखा नीन हूँ ओनके मोखके।’

9 आ जोंखस उर्बासी पेसकन नंजका चइडे उर्बस आस गे धन्यवाद मल ब'ओस।

10 एन्नेम नीम हूँ निमा गे पेसका जम्मन नंज मुंजका खोखा एन्ने ब'अके, 'ऐम लेइपोयहा जोंखम, एंग्हे नन्ना नलखन लेका नंजकम।’”

11 येसुस येरुसलेम कालो बारी समारिया अरा गलिलेया मझी नू कालालियस।

12 अरा आस ओन्टा पददा नू कोरना गनेम दस इन खसरा रोगियारिन खक्खियस। आर गेच्छम इज्जर ती¹³ चिच्चियारर ती बाचर, “अना येसु उर्बायो, एमन सोग्गे ऐरा, कोड़े नना।”



- 14 आस आरिन ईरियस ती बाचस, “कला निमन नैगारिन ऐदके।” खने कानुम कानुम आर कोड़े मंजर केरर।
- 15 तहाँ अबड़र ती ओर्तोस ईरियस का “ऐन कोड़े मंजकन केरकन।” आस येसुस गुसन किरियस ती जोर ती धर्मेसी ओहमा नंजस।
- 16 अरा येसुसी खेडमूली खतरस ती आसिन धन्यवाद नंजस। आस समारिया ता आलस रहचस।
- 17 खने येसुस बाचस, “एन्देर दसो झन कोड़े मल मंजर, होले अबड़ा नौ झन एसन केरर?”
- 18 एन्देर ई समारिया ता आलासिन अम्बर अउर नै हूँ धर्मेसी ओहमा नना गे मल बरचर का?”
- 19 खने येसुस आसिन बाचस, “चो'आ, कला। नीन एंगन पत्ताचकय आदिम निंगन नाड़िया।”
- 20 जोक्क फरिसीर येसुसिन मंजर, “धर्मेसी राजी इकला बर'ओ?” खने आस आरिन बाचस, “धर्मेसी राजी नीम निम्है खन्न ती ऐरा आँगना लेक्खा मल बर'ई।
- 21 अरा आलर मल ब'ओर, ऐरा, इसन र'ई महले असन र'ई। धर्मेसी राजी गा निम्है मझी नू र'ई।”
- 22 फिन आस तंग्हे चेलारिन बाचस, “एन्ने बेड़ा बर'ओ का नीम मनवा खद्दन एंगा ओन उल्लन ऐरा बेद्दोर, लिकिन अदन ऐरा पोल्लोर।
- 23 आलर निमन ब'ओर, ‘ऐरा, आस इसन र'अस महले असन र'अस।’ होले नीम असन अमके काला अरा आर ही खोखा अमके बोंगा।
- 24 एन्देरगेका, बिजली एकासे मेर्खा ही ओन कोड़ा ती आ कोड़ा गूटी लौकारनुम बिलची, अदिन आलर ऐरनर, अन्नेम मनवा खद्दन ऐन हूँ एंग्हे उल्ला नू ऐथ्र'ओन।
- 25 लिकिन अदहीन्ती मुन्द मनवा खद्दन एंगा गे बग्गे खिलपत चोदना मनो अरा ई परिया ता आलर ती ऐन हींड़र'ओन।
- 26 अरा एकन्ने नूहसी बेड़ा नू मंजा अन्नेम मनवा खद्दन एंगा बरना बेड़ा नू हूँ मनो।
- 27 नूहस कोहाँ डोंगा नू कोरना गूटी आलर ओँडर, मोक्खर, बेंज़र, बिंजियर। खने कोहाँ बहड़ी बरचा अरा ओर्मरिन नठाबाचा।
- 28 ईद लोथसी बेड़ा नू एकन्ने मंजा अन्ने मनो। आलर ओँडर, मोक्खर, खिन्दियर पिटियर अरा मन्न मास इद्दर अरा एडपा कमचर।
- 29 लिकिन लोथस तंग्हे एडपातर गने सोदोम ती उरखस अउलम मेर्खा ती चिच्ची अरा धूप पोस्सा अरा आर ओर्मरिन नटाबाचा।



- 30 अन्नेम मनवा खद्दन एंगा बरना उल्ला हूँ मनो।
- 31 अउला ने मेसगा मइय्याँ र'ओस, आस तंग्हे जिनिस् एडपा नू र'ई ब'अरकी आस अदिन हो'आ गे अम्बोस एता। अरा अन्नेम खल्ल नू र'उस खोखा अम्बोस किर्रा, असलेक ती बोंगोस।
- 32 लोथस तंग्हालिन् सुरता नना का आद इकला किर्रे ईरिया।
- 33 ने तंग्हे उज्जनन तंगा गे बने बछाब'अरकी उइय्या गे बेद्ददस आस धर्मेस गने जनमजुग ही उज्जनन एबस'ओस। अरा ने तंग्हे उज्जनन चि'ओस आस धर्मेस गने जनमजुग ही उज्जनन खक्खोस।
- 34 ऐन निमन ब'अदन, एंग्हे बरना उल्ला माखा इरिब आलर ओन्टा खटी नू खन्द्र'अत र'ओर, ओर्त होर'ओस ओर्त अम्बर'ओस।
- 35 अन्नेम इरिब मुक्कर संगेम जता किन्द्र'आते र'ओर, ओर्त होर'ओ ओर्त अम्बर'ओ।
- 36 [इरिब आलर खल्ल नू र'ओर, ओर्त होर'ओस ओर्त अम्बर'ओस।"]
- 37 चेलर येसुसिन् मँजर, “अना उर्बायो, ईद एक्सन मनो?” खने येसुस आनाकिर्ताचस, “एक्सन मरी र'ई, असन गिद्हा गुट्ठी खुंइर'ई। अन्नेम एसन पाप र'ई असन दंडे बर'ओ”

लूकस 18

- 1 येसुस तंग्हे चेलर गे मल हेन्दवारना ती सगरोम गोहरारते र'अना र'ई इदन तेंगा गे ई जोक्खा खीरिन तिगियस।
- 2 “ओन्टा पद्दा नू ओर्त नैवई ननुस रहचस, आस धर्मेसिन् गा मल एल्चालियस अरा आलारिन हूँ मल गदन'आ लगियस।
- 3 आ पद्दा नू ओर्त रड़ियाही आली रहचा। आ आली आस गुसन बरच बरच ब'आ लगिया, ‘एंग्हे अरा एंग्हे बैरीसी मझी ता नलखन नैवई नना चि'आ।’
- 4 जोक्क उल्ला गूटी गा आस अदिन मल मँजस, लिकिन खोखा तान तानिम बाचस, ‘ऐन धर्मेसिन् मल एल्चदन अरा आलारिन हूँ मल गदन'अदन।
- 5 अन्नु हूँ ई रड़ियाही आली एंग्हे गुसन रेंघ'ई, अदगे ऐन अदिन नैवई ननोन, होले आद घड़ी घड़ी बर'ओ ती एंगन अम्बन खइद'आ।”
- 6 उर्बस बाचस, “मेना ई मलदौ नैवई ननुस एन्देर बाचस?”
- 7 होले एन्देर धर्मेस तंग्हे चज्जिका आलारिन ने उल्ला माखा आसिन् गोहरारते र'अनर आर गे नैवई तिजाम मल ननोस का? एन्देर आस आर ही पत्त नू दिरी ननोस का?



- 8 ऐन निमन ब'अदन, आस लेम आरिन नैवई ननोस। अन्नु हूँ मनवा खद्दन ऐन इकला फिन बर'ओन, आ बारी खेखेल नू एंगन पत्त'ऊ आलारिन खक्खोन का?"
- 9 फिन येसुस ने तमन उजगो मननर ती नन्नारिन खाँड़नर आर ही पत्त नू ई जोक्खा खीरिन तिगियस।
- 10 "एँड आलर धर्मसी मन्दिर नू गोहरार'आ केरर। ओतोस फरिसीस अरा नन्नस ऊज'उस रहचस।
- 11 फरिसीस गा इज्जस ती एन्ने गोहरारस, 'अना धर्म, ऐन निंगन धन्यवाद नन्दन का ऐन नन्ना आलर लेक्खा खड़'ऊ, अरा मलदौ ननू अरा भडुवा मलदन महले ई ऊज'उस लेक्खा हूँ मलदन।
- 12 ऐन हप्ता नू दुई हेल उपास नन्दन, अरा ऐन एंग्हे उर्मी अर्जाचका ही दसमांस हूँ चि'अदन।'
- 13 लिकिन ऊज'उस गेच्छम इज्जस ती मेर्खा तरा मेन ऐरा हूँ मल बिद्दियस, अन्ति तंग्हे एवंगन ठोकोर ठोकोर बाचस, 'अना धर्म! ऐन पपहा आलन मइय्याँ सोग्गे ऐरा।'
- 14 ऐन निमन ब'अदन, हूस मला ईस धर्मसी ऐरना नू उजगो मनरकी एड़पा केरस। एन्देगेका ने तंगन कोहाँ नन्दस आस सन्नी मन्तार'ओस। अरा ने तंगन सन्नी कम'ई आस कोहाँ मनतार'ओस।"
- 15 उन्दुल जोक्क आलर खद्दारिन येसुस गुसन ओन्दर का आस खद्दर ही मइय्याँ तंग्हे खेक्खा उइयरकी आसीस ननोस। लिकिन चेलर इदन ईरियर ती येसुसिन अम्बोर थोकबोकामब'आ ब'अरकी आरिन केप्पर।
- 16 लिकिन येसुस खद्दारिन तंग्हे गुसन मीखियस ती बाचस, 'खद्दारिन एंग्हे गुसन बर'आ चि'आ, आरिन अमा छेक'आ, एन्देगेका ने इबड़ा खद्दर लेक्खा तमन किइय्या ननोर आरिन धर्मस राजी ननोस।
- 17 ऐन निमन ओन्टा मानिम कत्था ब'अदन, एकासे खद्दर अयंग बंगर गे सोंपरनर, अन्नेम एका ओर्तर धर्मस गे सोंपरनर आरिन दिम धर्मस राजी ननोस।"
- 18 ओंग्होल ओर्त मुद्धस येसुसिन मेंजस, "अना गुरु, नीन दौ आलय हिकदय, एंगा धर्मस गने जनमजुग ही उज्जना खक्खा गे एन्दे नन्ना मनो?"
- 19 खने येसुस आसिन बाचस, "नीन एंगन बेस एन्देगे ब'अदय?, धर्मसिन अम्बरकी ने हूँ बेस मलकर। नीन सोचदय का ऐन धर्म हिकदन?"



- 20 आलारिन अमके पिटा, नन्ना आली गुसन अमके काला, अमके खड़'आ, बेगर नू अमके ब'आ, निंग्हे अयंग बंगन मईन नना, धर्मैसी इबड़ा पेसकन नीन अखदय।”
- 21 खने आस बाचस, “ऐन गा इबड़ा उर्मी पेसकन खद्दपरिया ती मन'आ लगदन।”
- 22 इदन मैजस ती येसुस आसिन बाचस, “अन्नु हूँ नीन अक्कुन गूटी ओन्टा कत्थन मल नंजकादय, नीन निंग्हे उर्मी खुर्जिन बीसरकी कीड़र गे खट्टा चि'आ। फिन बरा अरा एंग्हे गने चोंख'आ। होले निंगा मेर्खा नू इनाम खक्ख'ओ।”
- 23 आस इदन मैजस खने नगदे हेन्दवारस, एन्देरगेका आस नगदे उरुब रहचस।
- 24 येसुस आसिन ईरियस ती बाचस, “ने नगदे खुर्जी उइय्दस आसिन धर्मैस गे राजी नना अजम ससइत मनो।
- 25 एका ओर्तस तंग्हे खुर्जी मइय्याँ भरसा उइय्दस आसिन धर्मैस राजी नन्ना ती ओन्टा ऊँट सुजी ही भोंका नू तुरदना सेब्बा र'ई।”
- 26 खने इदन मिनू आलर बाचर, “होले ने बछर'आ ओँगोर?”
- 27 आस आरिन बाचस, “आलर ती गा ईद मना पुल्ली, लिकिन धर्मैस ती ईद मनो दिम।”
- 28 खने पतरस बाचस, “ऐरा, ऐम निंग्हे चेला मन्ना चड्डे एंग्हे उर्मिन अम्बकम।”
- 29 आस आरिन बाचस, “ऐन निमन मानिम ब'अदन, एका ओर्तस धर्मैस आलारिन राजी नना गे तंग्हे एड़पा पलिन महले तंग'आलिन महले तंग्हे भइय्योरिन महले तंग्हे अयंग बंगारिन महले तंग्हे खद्द-खरान अम्बका चिच्का र'अनर।
- 30 आर ई जुग नू कइय्योँ गुना खक्खोर, अरा बरना जुग नू धर्मैस गने जनमजुग ही उज्जनन खक्खोर।”
- 31 तहाँ येसुस बारो चेलारिन तंग्हे गुसन मीखियस ती बाचस, “ऐरा, नाम येरुसलेम कादत, अरा एवँदा कत्था मनवा खद्दन एंगा पत नू धर्मैसी कत्था तिंगुर ती लिखकी र'ई अबड़ा जम्मा मनो।
- 32 एन्देरगेका ने यहूदी मलकर आर ही खेक्खा नू ऐन सोंपतार'ओन क'ओन। अरा आर एंगन लज्जे मोखत'ओर अरा हींड़ोर, अरा एंग्हे मइय्योँ तुप्पोर।
- 33 अरा एंगन कोर्रा ती ल'ओर अरा पिटोर। अरा तिसर उल्ला ऐन उज्जा चो'ओन।”
- 34 लिकिन आर इबड़ा कत्था गुट्ठिन ओन्टा हूँ मल बुझर, अरा इबड़ा कत्था आर ती नुखकी रहचा। अरा एन्देर बातारकी रहचा अबड़ा ही मनेन आर अखअम बल्लर।



- 35 येसुस येरिहो नगरे हेद्दे अंडसियस खने, असन ओर्त अन्धहस सडक हेद्दे ओक्करकी तेम्बा लगियस।
- 36 आस गोंहड़ा ही ऐकना ही अरोन खक्खियस खने आलारिन मैजस, “ईद एन्देर मना लगी?”
- 37 अबड़र आसिन तिंगियर, “नासरेत ता येसुस कट्टालदस।”
- 38 खने आस चिच्चियारस ती बाचस, “अना येसु! दाऊदसी खद्दायो! एंगन सोग्गे ऐरा।”
- 39 गोंहड़ा ही मुन्द रऊ आलर आसिन दन्दकाचर ती बाचर, “कलेकसे र'आ।” लिकिन आस अउरिम चिच्चियारस, “अना दाऊदसी खद्दायो! एंगन सोग्गे ऐरा।”
- 40 खने येसुस इज्जस ती आनियस, “आसिन एंग्हे गुसन ओन्द्र'आ।” अरा आस हेद्दे बरचस। खने येसुस आसिन मैजस,
- 41 “नीन एन्देर बेद्ददय का निंगा गे ऐन ननोन?” आस बाचस, “अना उर्बायो, ऐन ऐरा बेद्ददन।”
- 42 येसुस आसिन बाचस, “ऐरा हो'आ, नीन उजगारकय एन्देरगेका नीन एंगन पत्ताचकय।”
- 43 अरा आस आ बारिम ऐरा उंगियस, अरा धर्मेसी ओहमा नन्नुम येसुसी खोखा चोख्रस। अरा ओर्मर इदन ईरियर ती धर्मेसी ओहमा नंजर।

लूकस 19

- 1 येसुस येरिहो नू कोरचस ती काला लगियस।
- 2 असन जक्कई नामे ओर्त आलस रहचस। आस मुध ऊज'उस अरा उरुब रहचस।
- 3 आस येसुसिन ने ब'अरकी ऐरा बिद्दियस। लिकिन आस पुड्डा रहचका चड्डे गोंहड़ा ती ऐरा पोल्ला लगियस।
- 4 खने आस मुन्द बाँगस अरा आसिन ऐरा गे ओन्टा डुम्बारी मन्न नू अरगियस। एन्देरगेका येसुस आ डहरे नू काना रहचा।
- 5 अरा येसुस आ अड्डा अंडसियस खने, मेन ईरियस ती आसिन बाचस, “अना जक्कई, लेम एत्ता बरा, इन्ना एंगा गे निंग्हे एडपा नूर'अना रई।”
- 6 खने आस लेम इतियस ती रिङ्ग गने आसिन तंग्हे एडपा होच्चस।
- 7 खने ओर्मर इदन ईरियर ती टुरपुसर'आ हेलरर का ईस पपहस गुसन पाही कोरचस।
- 8 जक्कईस उर्बासी मुन्द इज्जस ती बाचस, “अना उर्बायो! ऐन एंग्हे ओन भाग खुर्जिन किडर गे चि'ओन, अरा नेखैन नैवई ती बिडदो होच्चकादन होले, आर गे चार गुना किर्रत'ओन चि'ओन।”



- 9 खने येसुस आसिन बाचस, “इन्ना ई एडपा गे नाइना बरचा, एन्देरगेका ईस हूँ गा अब्राहमसी खद्दस र'अदस।
- 10 मनवा खद्दन ऐन एबस्रकारिन बेद्दा अरा नाइा बरचकादन।”
- 11 आलर इबड़ा कत्थन मेना लगियर खने, येसुस ओन्टा जोक्खा खीरी तिगियस। एन्देरगेका आस येरुसलेम हेद्दे रहचस अरा आर सोच'आ लगियर का धर्मसी राजी लेम दहदर मन्ना रई।
- 12 आस बाचस, “ओन्टा उर्बस तंगा गे बेल अदिया खक्खा ती फिन किर्रा गे गेच्छा राजी केरस।
- 13 आस काना ती मुन्द तंगहै दस जोंखारिन मीखियस अरा आर गे दस गोटंग मोहोर चिचस ती बाचस, ‘एंगहै किर्ना गूटी खेन्दके पिटके।’
- 14 लिकिन आसी नगरे ता आलर आसिन हींइ'आ लगियर। अरा एन्ने ब'अरकी आसी खोखा ओन्टा पैकारिन तइय्यर का ईसिन एम्है बेल उइय्या गे एमा मने मलकी।
- 15 लिकिन आस बेल अदिया खक्खियस ती किरियस। खने आस तंगहै जोंखारिन मेखा गे आनियस ने तंगहै ती मोहोर खक्खर। इदगे का आस अख'आ ओंगदस का आर ऐ बग्गे अदिन ती अर्जाचर।
- 16 खने मुन्दतस बरचस ती बाचस, ‘अना उर्बायो। निंगहै चिच्का ओन मोहोर ती दस मोहोर अर्जाचकन।’
- 17 खने बेलस आसिन बाचस, ‘बेस बने! नीन दौ जोंखस हिकदय। नीन जुक्किम नू पत'अना जोगे रहचकय, खने नीन दस गोटंग नगरे ही उर्बस मना।’
- 18 अरा दुसरस बरचस ती बाचस, ‘अना उर्बायो। निंगहै चिच्का ओन मोहोर ती पांच गोटंग मोहोर अर्जाचकन।’
- 19 खने बेलस आसिन बाचस, ‘नीन हूँ पांच गोटंग नगरे ही उर्बस मना।’²⁰ तहाँ तिसरस बरचस ती बाचस, ‘अना उर्बायो, ऐरा, इदिम निंगहै मोहोर, इदिन ऐन ओन्टा किचरी नू गठिय'अरकी नुड्डका उइयका रहचकन।
- 21 ऐन गा निंगन एल्चा लिक्कन, इदगे का नीन खरखर आलय हिकदय, नीन मल खोंइचकय अदिन हो'अदय अरा मल चाँखकय अदिन खोयदय।’
- 22 खने बेलस आसिन बाचस, ‘अना मलदौ जोंख, निंगहै कत्था तिम ऐन निंगन नैवई नन्दन। नीन एंगन अक्कय का ऐन खरखर आलन हिकदन, ऐन मल खोंइचकन अदिन हो'अदन अरा मल चाँखकन अदिन खोयदन।



- 23 होले नीन एंग्हे मोहोरन एन्देरगे नहड़ा हो'उर गे मल चिचकय? होले ऐन बर'ओन ती अदिन खद गनेम हो'ओन दने।' 24 खने बेलस हेददे इज्जका आलारिन बाचस, 'ई मोहोरन ईसी गुसते हो'आ अरा नेखा गुसन दस मोहोर र'ई आस गे चि'आ।'
- 25 अरा आर आसिन बाचर, 'अना उर्बायो, आसी गुसन गा दस गोटंग मोहोर र'ई।'
- 26 बेलस बाचस, 'ऐन निमन ब'अदन का नेखा गुसन र'ई आर गे चीर'ओ, अरा नेखा गुसन मल्ला आसी ती र'ई अदिन हूँ होतारो।
- 27 लिकिन एंग्हे अबड़ा बैरीरिन ने तम्है मइय्याँ ऐन राजी नना गे मल बिददियर, आरिन एंग्हे मुन्दहारे ओन्द्र'आ ती पिटा।'''
- 28 इबड़ा कत्थन बाचस ती येसुस येरुसलेम तरा काला हेलरस।
- 29 अरा आस जैतून नामे परता हेददे बैतफगे अरा बेतानिया पद्द गुट्ठी हेददे बरचस। खने तंग्हे चेलर ती इरिबारिन एन्ने बाचस ती तइय्यस।
- 30 "निम्है मुन्दहारे ता पद्दा नू कला, अरा नीम अइय्या कोरना गनेम ओन्टा गदहा खद्दन खुटुरका खक्खोर, अइय्या ने हूँ इकला हूँ मल अरगकी र'ई, अदिन बिछर'आ ती ओन्द्र'आ।
- 31 नेकईम इदन एन्देर नना गे बिछरदर ब'ओर होले, ब'अके, उर्बस गे इदही चाड़ र'ई।"
- 32 तइरका आलर केरर अरा एकासे येसुस आरिन बाचस अन्नेम खक्खियर।
- 33 अरा आर गदहा खद्दन बिछर'आलियर, खने अदही उर्बर आरिन मेंजर, "नीम खद्दन एन्देरगे बिछरदर?"
- 34 आर बाचर, "उर्बा येसुस गे इदही चाड़ र'ई।"
- 35 आर अदिन येसुस गुसन ओन्द्रर, अरा तम्है किचरी गुट्ठिन गदही खद्द मइय्याँ झपचर अरा येसुसिन अइय्या ओकताचर।
- 36 आस एकासे एकासे मुन्दहारे काला लगियस खने आलर तम्है किचरिन डहरे नू अट्टनुम केरर।
- 37 आस जैतून परता ही दलखा हेददे अंइसियस खने चेलर ही गोट्टा गोंहड़ा आर ईरका आसी जम्मा सवंग ही नलख गुट्ठी चड्डे खुसमारर अरा जोर चिचियारर ती धर्मसी ओहमा नना हेलरर।
- 38 अरा बाचर, "आ बेलासिन धर्मस आसीस चि'ओस एकास उर्बासी नामे ती बरदस। अक्कु धर्मस अरा आलर ही मझी नू सान्ति अरा उर्मी ती कोहाँ धर्मस गे ओहमा मनन नेकअन।"



- 39 अरा गोंहड़ा नू जोक्क फरिसीर रहचर। आर येसुसिन बाचर, “अना गुरु! निंगहै चेलर ही चिच्चियारनन छेकआ।”
- 40 येसुस आनाकिर्ताचस, “ऐन निमन ब'अदन, ईर ठकर'ओर होले पखना चिच्चियार'आ हेलर'ओ।”
- 41 एकाबारी येसुस येरुसलेम हेददे अंडसियस खने, नगरेन ईरियस ती चींखियस।
- 42 अरा बाचस, “निंगहै खक्खका ई उल्ला नू गा नीन निंगहै सान्ति ही कत्थन अख'ओय होले दौ मनो दने। लिकिन अक्कु इबड़ा निंगहै खन्न ती नूखकी रई।
- 43 निंगहै मइय्याँ एन्ने उल्ला बर'ओ का निंगहै बैरिनिंगन ओनबेंडर'आ घेर'ओर ती मझि'ओर, अरा ओर्मा तरती निंगन चिप'ओर।
- 44 अरा आर निंगन अरा निंगहै उर्मी आलारिन नठाब'ओर, अरा निंगहै नू ओन्टा पखना मइय्याँ ओन्टा पखना र'आ गे मल चि'ओर, एन्देरगेका नीन निंगहै गुसन धर्मस बरना ही बेड़न मल चिन्हचकी।”
- 45 तहाँ येसुस धर्मसी मन्दिर ही चाली नू कोरचस ती अइय्या ता खीन्दू पिटुरिन ओथ्र'आ हेलरस।
- 46 अरा आरिन बाचस, “नेम्हा पुथी नू लिखकी रई, ‘एंगहै एइपा गोहरारना ही एइपा मनो।’ लिकिन नीम अदिन डाकुर ही मड़ा कमचकादर।”
- 47 येसुस उल्ला उल्ला नू धर्मसी मन्दिर ही चाली नू सिखाब'आ लगियस। अरा मुध नैगर अरा नेग सिखाब'उर अरा आलर ही जोक्क मुद्धर आसिन पिटा गे मोका बेद्दा लगियर।
- 48 लिकिन एन्देर उपाय हूँ नना पोल्लर का एन्ने एकासे ननोम, एन्देरगेका ओर्मा आलर आसहीन मेना लक्का रहचर।

लूकस 20

- 1 उन्दुल येसुस धर्मसी मन्दिर ही चाली नू आलारिन सिखाब'आ लगियस अरा दौ कत्था मेन्त'आ लगियस खने, मुध नैगर अरा नेग सिखाब'उर अरा सेयान आलर आसी गुसन बरचर।
- 2 अरा आसिन बाचर, “इबड़ा नलखन नीन नेखा आकुस ती नन्दय, अरा निंगा इबड़न नन्ना ही आकुस नै चिच्चा? अदिन एमन तेंगा।”
- 3 आस आरिन आनाकिर्ताचस, “ऐन हूँ निमन ओन्टा कत्था मेन्दन अदिन तेंगा।
- 4 योहनस गे नोडरत'अना ही आकुस धर्मस चिच्चस का आलर चिच्चर?”



- 5 खने आर ई पत नू ताम तामिम कछनरखर। अरा बाचर “नाम धर्मस आकुस चिचस अन्ने बओत होले, आस बओस अन्नु हूँ नीम एन्देगे योहनसिन मल पताचकर?”
- 6 अरा आलर आकुस चिचर एन्ने बओत होले, ओर्मा आलर नमन पखना ती लोड़गओर। एन्देगेका आर पताचर का योहनस धर्मसी कत्था तिगुस रहचस।”
- 7 औंगे आर किर्तअर बाचर, “ऐम बलदम का आद एका तरती रहचा।”
- 8 खने येसुस आरिन बाचस, “नीम एंगन मल तिकर औंगे ऐन हूँ निमन मल तेंगोन इबड़ा नलखन नेखा आकुस ती नन्दन।”
- 9 तहाँ येसुस आलारिन ई जोक्खा खीरिन तेंगा हेलरस। “ओर्त आलस ओन्टा अंगुर ही बटकी कमचस, अरा उर्बर गे अदिन ठिका चिचस। अरा तान बग्गे उल्ला गे नन्न राजी केरस।
- 10 फिन आस पानना ही बेड़ा नू ठिका होच्चका उर्बर गुसन अंगुर ही जोक्क खंजपा ओन्द्रआ गे ओन्टा जौंखासिन तइय्यस। लिकिन उर्बर आसिन लौचर दरा नीदी तइय्यर।
- 11 फिन आस नन्ना जौंखासिन तइय्यस। आसिन हूँ आर लौचर दरा आसिन लज्जे मोखताचर ती नीदी तइय्यर।
- 12 फिन आस तिसरसिन तइय्यस। अरा अबड़र आसिन हूँ कुहुरकुट्टा लौचर दरा ओथ्रर चिचर।
- 13 तहाँ बटकी उर्बस बाचस, ‘ऐन एकासे ननोन? ऐन एंगहै चोन्हा खद्दासिन तइय्योन, होले आर आसिन मईन ननोर दने।’
- 14 लिकिन उर्बर तंग्दासिन ईरियर ती ताम ताम कछनरखआ हेलरर, ‘ईस गा जईपुई रअदस, बरा, ईसिन पिटोत, होले बटकी नम्है दिम मनो।’
- 15 अरा आर आसिन अंगुर बटकी ती बहरी ओथ्रर ती पिटियर। अन्ति बटकी उर्बस आरिन एन्दे ननोस?
- 16 आस बरओस ती इबड़ा बटकी ठिका होच्चका उर्बारिन पिटोस, अरा अंगुर बटकी ही ठिका नन्ना उर्बर गे चिओस।” इदन आलर मेंजर ती बाचर, “धर्मस एन्ने अम्बन नना नेकअन।”
- 17 फिन येसुस आर ही तरा ऐररकी बाचस, “फिन ईद एन्दे नेम्हा पुथी नू लिखकी रई? एका पखना आबोन राजमिस्त्रर तरकूटी ताइचका रहचर, आ पखना दिम गोट्टा एड़पन बड़ियर ननू पखना मंजा केरा।’
- 18 आ पखना नू खतरओर अबड़ा ओर्मर कुटकूटा मनोर कओर, अरा नेखा मइय्याँ आद खतरओ आरिन खोसो चिओ।”



- 19 आ बारिम नेग सिखाब'उर अरा मुध नैगर आसिन धर'आ बेद्दा लगियर, एन्देरगेका आर बुझुर खच्चिका रहचर का येसुस आर ही बिड़दो ई जोक्खा खीरिन बाचकाचस। लिकिन आर आलारिन इल्चियर।
- 20 औंगे आर ताक ऐरर अरा जोह'ऊ आलारिन तइय्यर का धरम ही भेंस ननोर ती येसुसी एकअम कत्थन धर'ओर ती आसिन राजीखापुसी खेक्खा नू अरा आसी अदिया नू चि'ओर।
- 21 अबड़ा जोह'ऊ आलर येसुसिन मेंजर, “अना गुरु! ऐम अखदम का नीन मानिम आबोन ब'अदय अरा सिखाब'अदय, अरा तीना मल खाँड़दय, लिकिन धर्मसी डहरेन मानिम गने सिखाब'अदय।
- 22 एन्देर कैसरस गे टिकस चि'अना ठौका रई का मला?”
- 23 आस आर ही चतरन अक्खस ती आरिन बाचस,
- 24 “ओन्टा रोमी ढिबन एंगन ऐद'आ। इय्या नेखा छपा अरा नामे रई?” आर बाचर, “कैसरसी।”
- 25 खने आस आरिन बाचस, “होले कैसरस गे एन्देर चि'अना रई, अदिन कैसरस गे चि'आ, अरा धर्मस गे एन्देर चि'अना रई, अदिन धर्मस गे चि'आ।”
- 26 ई लेक्खा आर आलर ही मझी नू आसी बाचकन धर'आ पोल्लर, अरा आसी आनाकिर्ताचका ती अनचकरर अरा कलेकले मंजर केरर।
- 27 तहाँ केचका खोखा उज्जा चो'अना र'अम मलकी ब'ऊ जोक्क सदुकीर येसुस गुसन बर'अरकी मेंजर,
- 28 “अना गुरु! मूसस एमा गे एन्ने पेसका चिच्चस का एकअम ओर्तस बिगर खद्द-खर्रा ही खे'अदस कादस, अरा आसी तंग'आली बछरकी रई होले, आसी भइय्योस अदिन बैज्रना ती केचका तंगहे भइय्योस गे खद्द कुन्द्रत'अना रई।
- 29 ओंग्होन सात भइय्योर रहचर। कोहँस बैज्र'अरकी बिगर खद्द-खर्रा ही केच्चस केरस।
- 30 खने मझलस अदिन बैज्रस।
- 31 अरा सझलस अदिन बैज्रस। अरा अन्नेम सतियो भइय्योर अदिन ओरोत ही खोखा ओरोत बैज्र ती जम्मर बिगर खद्द-खर्रा ही केच्चर।
- 32 छेद्दे नू आ आली हूँ केच्चा केरा।
- 33 होले केचकन्ती उज्जा चो'अना नू आद नेखा मुक्का मनो? एन्देरगेका सतियो इन अदिन बैज्रकाचर।”
- 34 येसुस आरिन बाचस, “खेखेल नू आलर बैज्रनर अरा बैजनर।



- 35 लिकिन एका ओर्तर केचकन्ती उज्जा चो'अना ती मेर्खा राजी नू उज्जा गे जोगे मनोर, आर मल बेंज'ओर अरा मल बेंजोर।
- 36 अरा आर फिन इकला हूँ मल खे'ओर, आर उज्जा चो'अना ही खद्द मंजर, खने आर मेर्खा पैकर लेक्खम र'ओर, अरा धर्मसी खद्दर मनोर।
- 37 लिकिन केचका आलर उज्जा चो'ओर। मूसस हूँ लघरना खोप्पा ही कत्था ती इदन ऐद्दस। अइय्या आस उर्बासिन अब्राहमसी धर्म, इसाकसी धर्म अरा याकोबसी धर्म एन्ने मेखदस।
- 38 धर्मस गा केचका आलर ही मला, उज्जना आलर ही धर्मस हिकदस, एन्देरगेका आस नू जम्मर उज्जनर।”
- 39 खने जोक्क नेग सिखाब'उर बाचर, “अना गुरु! नीन दौ बाचकय।”
- 40 अरा इदही खोखा आर गे येसुसिन इन्द्रिम मेना गे डिढ मल मंजा।
- 41 तहाँ येसुस आरिन मँजस, “आलर एन्देरगे मसीसिन दाऊदसी बनस ब'अनर?
- 42 दाऊदस तानिम अस्सना-पाइना डंडी ही पुथी नू बाचस, ‘धर्म उर्बस एंग्हे उर्बासिन बाचस का नीन एंग्हे तीना पक्के ओक्करकी एंग्हे गने राजी नना,
- 43 ऐन निंग्हे बैरीरिन नास नंज खच्योन।’
- 44 दाऊदस गा तानिम आसिन उर्बस ब'अदस, होले आस दाऊदसी पिइही ता लेका मला आसी उर्बस हूँ हिकदस।”
- 45 उर्मी आलर मेना लगियर खने येसुस तंग्हे चेलारिन बाचस,
- 46 “नेग सिखाब'उर ती चिहंक र'आ। आर दिगहा किचरी अतरकी कुद्दका कुद्दनर, अरा बजार टोंका गुट्ठी नू मोंजरा खक्खा गे बेद्दनर। आर गोइहा एइपा गुट्ठी नू मुध मचिया गुट्ठिन अरा मदी गुट्ठी नू मईन अइडा गुट्ठिन खक्खा गे बेद्दनर।
- 47 आर रइयाहीर ही एइपन अमल'अनर, अरा आर धरम नू तमन कोहाँ ऐद'आ गे दिगहा दिगहा बिन्ती नन्नर। धर्मस आर गे कोइहे दंडे चि'ओस।”

लूकस 21

- 1 फिन येसुस उरुब आलारिन दान बकसा नू दान सजनन थिथाब'अर ईरियस।
- 2 अरा आस ओन्टा कीड़ा रइयाही मुक्कन हूँ ऐंड सन्नी सिक्कन अइय्या सजना ईरियस।



- 3 खने आस बाचस, “ ऐन निमन मानिम ब'अदन, ई कीड़ा रड़ियाही मुक्का जम्मर ती बग्गे सज्जकी रई।
- 4 एन्देरगेका इबड़ा ओर्मर तम्है खुर्जी ही बढती ती सज्जर। लिकिन ईद नगदे कीड़ा आली हवे। ईद गुसन ऐ बग्गे रहचा उर्मिन सज्जा। ईद तंगहै उज्जा गे रहचा जम्मन धर्मस गे चिच्चा।”
- 5 फिन जोक्क आलर धर्मसी मन्दिर ही पत नू ब'आ लगियर का, एकासे आद बेस पखना अरा दान ती सिंगरारकी रई। खने येसुस बाचस,
- 6 “नीम ऐरदर ईद उर्मी, आ उल्ला बर'ओ का पखना मइय्याँ पखना मल र'ओ, उर्मी दिम धंसतार'ओ कालो।”
- 7 आर येसुसिन मैजर, “अना उर्बायो! इबड़ा कत्था इकला मनो? अरा इबड़ा कत्था जम्मा मनो, इदन अख'आ गे एन्देर चिन्हा मनो?”
- 8 आस आरिन बाचस, “चिहूंक र'आ, निमन नीकईम अम्बोर ठक'आ। नगदे आलर एंगहै नामे ती बर'अरकी ब'ओर, 'ऐन मसीस हिकदन' अरा बेड़ा अंडसा खच्चकी रई, नीम आर ही खोखा अमके काला।
- 9 अरा इकला नीम लइई अरा हलहली गुट्ठी ही हलन मेनोर, आ बारी अमके बयार'आ। एन्देरगेका इबड़ा ही मुन्द मन्ना चाइ रई, लिकिन मुंजना बेड़ा लेम मल बर'ओ।”
- 10 तहाँ आस आरिन बाचस, “ ओन्टा जातियर नन्ना जातियर ही बिड़दो नू, अरा ओन्टा राजी नन्ना राजी ही बिड़दो नू लड़ाई गे चो'ओ।
- 11 अरा खेखेल नू कैनो अइडा नू कोइहे खेखेल नुकुरना अरा आकाल अरा कोहाँ कोहाँ बेमार गुट्ठी मनो। अरा मेर्खा नू नगदे भयभयान ऐथ्रना अरा कोहाँ कोहाँ चिन्हा गुट्ठी ऐथ्र'ओ।
- 12 लिकिन इबड़ा उर्मी कत्था ही मुन्द आलर निमन धर'अरकी सताब'ओर। अरा निमन गोइहा एइपा नू बिढ़'आ गे सोंप'ओर अरा जेहेल नू सज'ओर अरा बेलर अरा राजीखापुर ही मुन्द इजतार'ओर। एन्देरगेका नीम एंगहै गने चोंख'उर हिकदर।
- 13 लिकिन ईद निमा गे एंगहै पत नू आरिन तेंगना ही मोका मनो।
- 14 औंगे नीम मुन्द तिम तम्है तम्है जियन सपड़'आ का ऐम एन्देर आनाकिर्त'ओम ब'अरकी अमा एल्चा।
- 15 एन्देरगेका ऐन निमन एन्ने ब'अना अरा लूर चि'ओन का निम्है जम्मा बैरिर निम्है बिड़दो नू खंडा अरा इज'आ पोल्लोर।



- 16निंग्यो निम्बर अरा भइय्योर अरा पाहियर अरा संगेर हूँ निमन धरत'ओर अरा निम्है ती जोक्क आलारिन पिटोर।
- 17नगदे आलर निमन बिड़दो ननोर, एन्देरगेका नीम एंगहै गने चौखरकर।
- 18लिकिन निम्है कुक्क ता ओन्टा चुट्टी हूँ मल खतर'ओ।
- 19नीम बड़ियर सहना गने इज्जका र'ओर होले निम्है जियन लाड़ोर।
- 20एकाबारी नीम येरुसलेम नगरेन ओनबेंडर'आ ती फउद बेदचका ऐरोर। आ बारिम अखके का अदही उझड़ारना अंडसकी रई।
- 21अउलम यूदेया जिला नूर'उर परता मइय्याँ बोंके कालके। अरा ने येरुसलेम भितरी र'ओर आर गे बहरी उरखना मनो, अरा ने नगरे ही बहरी नूर'अनर आर अइय्या अम्बोर कोर'आ।
- 22एन्देरगेका इदिम दंडे चि'अना उल्ला मनो, एकत्रु धरम पुथी नू लिखचका उर्मी कत्था मंज खच्चो।
- 23अबड़ा उल्ला नू ओत्था ऐख अरा खदमाखो मुक्कर गे नगदे सस्ती मनो। अरा खेखेल नू नगदे सस्ती मनो, अरा धर्मस आलर मइय्याँ कोहॉ खींस ननोस।
- 24आर तबेल ती पिटतार'ओर, अरा उर्मी राजी नू हें'अरकी होतार'ओर। अरा नन-यहूदी आलर ही उल्ला अरगी मन्ना गूटी येरुसलेम आर ही आकुस नूर'ओ।
- 25चन्दो बीड़ी अरा बीनको नू चिन्हा गुट्ठी ऐथ्र'ओ। अरा समुदर अरा लहरा ही खरखना ती खेखेल नू राजी राजिन्ता आलर एलचोर अरा अन्भूल मनोर।
- 26आलर खेखेल नू बरना खिलपत ही पाब ऐरना ती बयार'ओर अरा केचका आलर लेक्खा मनोर, एन्देरगेका धर्मस मेर्खा नूर'ऊ उर्मी आलोन नुक'ओस।
- 27फिन उर्मी आलर मनवा खददन एंगन बदाली नू बरनन ऐरोर। अरा एंगा खेखेल ता आलारिन राजी नना गे कोइहे महबा अरा आकुस मनो।
- 28अरा इकला इबड़ा कत्था ही ओइ मनो नीम मेन ऐररकी इज्जका र'अके। एन्देरगेका निम्है नाइरना लेम बर'ऊ रई।”
- 29तहाँ येसुस आरिन ई जोक्खा खीरिन तिंंगियस। “अंजीर मन्नन अरा उर्मी नन्ना मन्नन ऐरा।
- 30अबड़ा नू खोरनन नीम ऐरदर होले, नीम अखदर का बिड़ना उल्ला अंडसिया।
- 31ई लेक्खम इकला नीम इबड़ा कत्थन एन्ने मन्नुम ऐरोर, निमा अखना रई का धर्मस आलारिन राजी नन्ना ही बेड़ा हेददे रई।



- 32 ऐन निमन मानिम ब'अदन, एका गूटी इबड़ा उर्मी कत्था मनो आ गूटी ई परिया ता जोक्को आलर उज्जोर।
- 33 मेर्खा अरा खेखेल छपर'ओ कालो, लिकिन एंगहै कत्था मनो दिम।
- 34 नीम चिहुंक ननके। खेखेल ता ओन्ना-मोखना ही चिबाखारना अरा उंखना अरा खेखेल ही जिनिस ता फिकर ती निम्है जिया अम्बन बेहड़ार'आ का आ उल्ला निमा गे अचका ही अंडसा खच्चो।
- 35 आद गा खेखेल ता ओर्मा र'ऊ आलर मइय्याँ एन्नेम फन्दा बेसे बर'ओ।
- 36 ओंगे उर्मी बेड़ा एज्रका र'आ। अरा गोहरार'आ का बर'ऊ अबड़ा जम्मा खिलपत ती बछर'आ गे सवंग अरा मनवा खद्दन एंगहा मुन्दहारे इजना जोगे मन्दर नेकअन।”
- 37 येसुस उल्ला बारी धर्मेसी मन्दिर ही चाली नू सिखाब'आ लगियस, अरा माखा बारी नगरे ही बहरी कालरकी जैतून नामे परता नू र'आ लगियस।
- 38 अरा पैरिम ओर्मा आलर आसहीन मेना गे धर्मेसी मन्दिर ही चाली नू आसी गुसन बर'आ लगियर।

लूकस 22

- 1 अक्कु बिगर बिदगी असमा ही परब एकदा कट्टना परब बातार'ई अइसकीचा।
- 2 मुध नैगर अरा नैग सिखाब'उर येसुसिन पिटा गे आलर नम्है बिड़दो नू इन्द्रिइम ननोर एन्ने एल्चियर ती एकासे आसिन पिटोत बाचर ती मोका बेद्दालियर।
- 3 तहाँ यूदस इसकारियोत ने बारो चेलर ती ओर्तोस रहचस। सैतान आस मइय्याँ समसारा।
- 4 खने आस मुध नैगर अरा धर्मेसी मन्दिर खापुर ही मुद्धर गुसन कछनख'आ गे केरस का एका बने घत ती येसुसिन धरत'आ गे आर गे संगे चि'आ ओंगोस।
- 5 आर इदन मेंजर ती खुसमारर, अरा आस गे ढिबा चि'आ गे बाचर।
- 6 खने आस हुकमारस ती येसुसिन एकाबारी गोंहड़ा मल र'ओ आ बारी आसिन धरत'अना नू संगे चि'आ गे मोका बेद्दा हेलरस।
- 7 अक्कु बिगर बिदगी असमा ही परब उल्ला अइसिया, अउला कट्टना ही भेंडो खद्द गुट्ठिन दाँडे नन्ना रहचा।
- 8 खने येसुस पतरस अरा योहनसिन एन्ने बाचस ती तइय्यस, “कला नमा गे कट्टना ही सराजमा नना का नाम ओन संगे ओना मोखा ओंगदत।”



- 9 खने आर मेंजर, “नीन एसन सराजमा नना गे बेददय?”
- 10 खने आस बाचस, “निम्है येरुसलेम नगरे नू कोरना गनेम ओन्टा आलस संजगी नू अम्मू चेड्डका निमा खक्ख'ओस। आसी खोख खोखा कालके, एका एड़पा नू आस कोर'ओस अइय्या नीम हूँ कोर'आ।
- 11 अरा आ एड़पा उर्बासिन ब'अके, ‘गुरुस ब'अदस का एंग्हे पाही कुठली एसन र'ई, ईगेका कट्टना ही ओन्ना-मोखनन एंग्हे चेलर गने ओनोन?’
- 12 अरा आस निमन ओन्टा सिंगराचका सपड़ाचका मइय्याँ ता कोहाँ कुठलिन ऐद'ओस। अइय्यम नीम सराजमा ननके।”
- 13 खने आर केरर ती एकासे येसुस बाचकाचस अन्नेम खक्खियर। अरा कट्टना ही सराजमा नंजर।
- 14 बेड़ा अइसिया खने, येसुस तंग्हे बारो तइरकर गने ओना मोखा गे उक्कियस।
- 15 अरा आरिन बाचस, “एंग्हे कोइहे मने रहचा का ऐन दुक्खे सारना ती मुन्द निम्है गने ई कट्टना ही ओन्ना-मोखनन ओनोन।
- 16 ऐन फिन इकला हूँ ई कट्टना ही ओन्ना-मोखनन मल ओनोन, एका गूटी ईद ही माने धर्मसी आलारिन राजी नन्ना नू पूरा मल मनो।”
- 17 फिन ओन डुभा अंगुर रासी आबोन होच्चस ती धर्मस गे धन्यवाद नंजस। फिन आस बाचस, “इदन ओँदा, अरा निम्है मझी नू खटर'आ।
- 18 ऐन एका गूटी धर्मस आलारिन राजी नन्ना बेड़ा मनो अदिन ती मुन्द इकला हूँ ई अंगुर रासी आबोन मल ओनोन।”
- 19 एन्ने ब'अरकी असमन होच्चस ती धर्मस गे धन्यवाद नंजस। फिन अदिन किच्चियस ती चेलर गे चिच्चस अरा बाचस, “ईद एंग्हे मेद हिके, ईद निमा गे चीतारकी र'ई, एंग्हे सुरता गे इदन नना।”
- 20 एन्ने चाल तिम ओँडका खोखा आस अउर ओन डुभा अंगुर रासिन होच्चस अरा बाचस, “ई डुभा धर्मस अरा आलर ही मझी ता पुना गच्छरका हवे। ई गच्छरकन ऐन एंग्हे खेंस ती बड़ियर नन्दन, ईद निमा गे दाँडे बेसे बाहतार'ई।
- 21 ऐरा! लिकिन निम्है ती ओर्तोस एंगन धरत'ओस, आस हूँ एंग्हे गने ओनालदस।
- 22 धर्मस मनवा खददन एंगा गे एकासे चिताबुता नंजकादस अन्ने गा ऐन खे'ओन दिम। लिकिन ने एंगन धरत'आ गे संगे चि'अदस आसी मुंजना नगदे भयभयान मनो।”



- 23 खने चेलर ताम ताम मेंजनखर'आ हेलरर, नम्है मझी ती ने एन्ने नलख ननो?
- 24 अरा चेलर तम्है मझी नू हबड़ा हबड़ी मंजर का तम्है नू ने जम्मेर ती मुद्ध हिके।
- 25 खने येसुस बाचस, “ई खेखेल नू बेलर अरा आकुस उइयुर आलर मइय्याँ आकुस नन्नर। अन्नु हूँ आर आलर ही संगेर बातारनर।
- 26 निम्है नू गा अन्ने मल नन्ना रई, निम्है मझी नू ने ओर्मर ती कोहाँ र'अदर आर सन्नी पद हो'अना रई। अरा मुद्धर जौखर लेक्खा तेतर-सुसर नन्ना रई।
- 27 कोहाँ मुखिया ने? एकास मंडी ओना उक्कादस का आस गे सुसर'अदस आस? मंडी ओना गे उक्कादस आस दिम मुखियस। ऐन गा निम्है मझी नू जौखर लेक्खा र'अदन।
- 28 नीमिम एंग्हे बिदूना नू एंग्हे गने रहचकादर।
- 29 खने एंग्हे बंगस आसी आलारिन राजी नना गे एंगा आकुस चिचस, अन्नेम ऐन हूँ निमा गे आकुस चि'अदन।
- 30 अरा एंग्हे राजी नन्ना उल्ला नू नीम एंग्हे गने ओना मोखा ओक्कोर। अरा नीम बेल-गद्दी नू ओक्कोर ती इस्राएल ही बारा गोतरन नैवई ननोर।”
- 31 फिन उर्बस बाचस, “सिमोन हे सिमोन, सैतान निमन निम्है पत'अनन गहूँ जब्बना बेसे निंग्हे पत'अनन बिदू'आ गे धर्मस ती नीचकी होचकी रई।
- 32 ऐन गा निंग्हा पत'अना मल अम्बर'आ गे बिन्ती नंजकन। एकाबारी नीन एंग्हे गुसन किर्रौय निंग्हे भइयोरिन बड़ियर ननके।”
- 33 खने सिमोनस बाचस, “अना उर्बायो, ऐन निंग्हे गने जेहेल एइपा काला गे महले खे'आ गे हूँ सपड़ारकादन।”
- 34 येसुस बाचस, “पतरस, ऐन निंगन ब'अदन का इन्नम खेर चींखना ती मुन्द नीन एंगन तीन हेल बलदन ब'ओय।”
- 35 अउरिम येसुस बारोरिन बाचस, “इकला ऐन निमन दौ कत्थन मेन्त'आ गे बिगर थईला, बिगर झोला अरा अगरहा जूता ही तइय्कन खने निमा इन्द्रिम जिनिस ही घटी मंजकीचा का?” खने आर बाचर, “मला।”
- 36 खने आस बाचस, “अक्कुन गा नीम निमा थईला अरा झोलन हो'आ। अरा निम्है गुसन तलवार मल्ला होले निम्है किचरिन बीसा ती ओन्टा तलवार खेन्दा।



- 37 ऐन इदन ब'अदन, एन्देरगेका नेम्हा पुथी नू धर्मसी कत्था तिगुर एंग्हे पत्त नू लिखचकानर का 'ऐन दोसी बेसे बातार'ओन' ईद पूरा मन्ना रई, हाँ, धर्मसी कत्था तिगुर एंग्हे पत्त नू लिखचका जम्मा पूरा मनो दिम।”
- 38 खने आर बाचर, “उर्बायो, ऐरा, इसन दुई गोटंग तलवार रई।” खने आस बाचस, “अम्बा चि'आ।”
- 39 तहाँ येसुस असले उरखरकी तंग्हे चाल बेसे जैतून परता नू केरस, अरा आसी चेलर हूँ आसी गने चोंखर।
- 40 तहाँ असन अंडसियर ती आस बाचस, “धर्मसिन बिन्ती नना का निमन बिदूना ती बछाब'आ।”
- 41 अरा आस तान ढेला हेबड़ना गेच्छा केरस। अरा मूकलिदरस ती बिन्ती नना हेलरस।
- 42 “अना एंग्हे बबा, निंग्हे मने रई होले ई सस्ती अरा खे'अनन एंग्हे ती ताड़'आ। लिकिन एंग्हे मने ती मला निंग्हे मने ती दिम नना।”
- 43 तहाँ मेर्खा ती ओन्टा पैकस ऐथ्रस आसिन डिठ ननत'आलियस।
- 44 अरा आस अउरिम कोइहे सस्ती ती उकुलबुकुल मंजस गोहरार'आलियस अरा आसी एरचरना खेंस ही कोहाँ टिप्पा लेक्खा खेखेल नू खतरा।
- 45 आस गोहरारना ती चोचस ती तंग्हे चेलर गुसन बरचस। अरा आस आरिन हेन्दवारका अरा खड़दिका ही मारे खन्द्रना खक्खियस।
- 46 खने आस बाचस, “एन्देरगे नीम खन्द्र'आलदर?, चो'आ, धर्मस निमन बिदूना ती बछाब'आ गे बिन्ती नना।”
- 47 येसुसी एन्ने ब'अना बारिम ओन्टा गोंहड़ा बरचा। अदिन बारा चेलर ती ओर्तोस यूदस कइहाब'आलियस। आस येसुस हेददे आसिन चोंखा गे बरचस।
- 48 तहाँ येसुस बाचस, “यूदस नीन चोंखदय ती मनवा खद्दस एंगन धरतादय का?”
- 49 तहाँ येसुसी चेलर ईरयर का अक्कून एन्देर मना बेद्दाली, खने बाचर, “अना उर्बायो, ऐम तलवार ती ल'ओम का?”
- 50 अरा आर ही ती ओर्तोस कोहाँ नैगासी जोंखासिन खोतस। खने आसी तीना खेबदा खंडरा।
- 51 तहाँ येसुस “हुरू, अमा नना” बाचस ती आसी खेबदन कप्पियस ती आसिन कोड़े नंजस।



- 52 तहाँ येसुस एका ओर्तर आसिन धर'आ गे बरचकाचर, अबड़ा मुध नैगर अरा धर्मसी मन्दिर खापू सैनर ही मुद्धर अरा सेयान आलारिन बाचस, “नीम बटपार आलर ही बिड़दो नू बरना लेक्खा तलवार गुट्ठी अरा सोट्टा गुट्ठी धर'अरकी बरचकादर।
- 53 ऐन गा उर्मी उल्ला धर्मसी मन्दिर नू निम्है गने रहचकन। आ बारी नीम एंगन मल धरचकर। लिकिन अक्कुन गा निमा गे धर्मस एन्ने नना गे चिच्चस, अरा ऊखा ही आकुस राजी ननी।”
- 54 तहाँ आर येसुसिन धरचर ती होच्चर। अरा आसिन कोहाँ नैगासी एड़पा ओन्द्रर। पतरस गेच्छा गेच्छा ती खोखा खोखा ईकनुम बरचस।
- 55 तहाँ आर ती जोक्कोर चाली मझी नू चिच्ची ओद्धर ती असन खोंडर ती उक्कियर। आर ही गने पतरस हूँ उक्कियस।
- 56 तहाँ ओन्टा जोंख पेल्लो पतरसी उक्कन चिच्ची ही बिल्ली ती ईरिया। अरा आसिन थिथवाँ ईरिया ती बाचा, “ई आलस हूँ आसी गने रहचस।”
- 57 खने पतरस नटचस ती बाचस, “अनय कुकेय, ऐन आसिन बलदन।”
- 58 अरा एगघड़ी खोखा नन्ना ओर्तस आसिन ईरियस ती बाचस, “नीन हूँ आर ही मदहे ता हिकदय।” खने आस बाचस, “अना आलायो, ऐन आर ही मदहे ता मलदन।”
- 59 ओन घंटा केम खोखा अउर ओन्टा आलस ढिट्ठ लगे ब'आलियस, “ईस गा गलिलेया जिला ता हिकदस खने मानिम ईस हूँ आस गने रहचस।”
- 60 खने पतरस बाचस, “अना आलायो, ऐन बलदन का नीन एन्देर ब'आलदय?” अरा आस एन्ने ब'आलियस खनेम खेर चींखिया।
- 61 अरा येसुस पतरसिन किरे ईरियस। खने पतरस गे उर्बासी कत्था सुरता बरचा का, “इन्नम खेर चींखना ती मुन्द नीन एंगन तीन हेल बलदन ब'ओय।”
- 62 अरा आस चाली ती बहरी उरखस ती भोकरार भोकरार चींखयस।
- 63 अक्कु एका सैनर येसुसिन धरचर आर येसुसिन लज्जे मोखतालियर अरा लौआ पस्स'आ लगियर।
- 64 आर आसी खन्नन मुद्धर ती मेंजर, “मुन्द तेंगना ती ब'आ का निंगन ने लौचा?”
- 65 अरा आर नगदे भेंसड़'अना कत्था गुट्ठिन हूँ आसी बिड़दो नू ब'आलियर।
- 66 बिज्जया खने सभा ही पचगी मुद्धर अरा मुध नैगर अरा नेग सिखाब'उर खोंडरर। आर येसुसिन तम्है कोहाँ सभा नू ओन्द्रर ती मेंजर।



67“नीन मसी हिकदय होले एमन ब'आ चि'आ।” खने आस बाचस, “निमन ऐन ब'ओन होले हूँ नीम मल पत'ओर,

68अरा निमन ऐन मेनोन होले हूँ नीम आना मल किर्त'ओर।

69अक्कु ती गा मनवा खददन ऐन उर्मी सवंगिय धर्मसी तीना चोक्ख उक्का ती राजी ननोन।”

70तहाँ आर ओर्मर बाचर, “होले नीन धर्मसी खददय हिकदय का?” खने आस बाचस, “नीमिम ब'आलदर का ऐन हिकदन।”

71खने आर बाचर, “नमा गे अउरिम गोवाह ही चाड़ मलकी, नामिम गा आसी बई तिम मेंजकत।”

लूकस 23

1तहाँ सौंसे गोंहड़ा चोचा ती येसुसिन राजी खापू पिलातुस गुसन होच्चा।

2अरा आर आसी मइय्याँ एन्ने बाचर ती दोस ठेका ब'आ हेलरर, “ऐम ईसिन एम्है आलारिन बहक'अना अरा कैसरस गे मालगुजारी चि'आ गे छेकना अरा तंगन मसी बेल ब'अना मेंजका र'अदम।”

3खने पिलातुस येसुसिन मेंजस, “नीन यहूदीर ही बेलय का?” येसुस किर्त'अर बाचस, “नीन ब'अदय अन्ने दिम हवे।”

4खने पिलातुस मुध नैगर अरा गोंहड़ा ती बाचस, “ऐन ई आलस मइय्याँ इन्द्रिइम दोस मल खक्खदन।”

5लिकिन आर कोड़हे ब'आ लगियर, “ईस गलिलेया जिला ती ओरे ननारकी इय्या गूटी यूदेया राजी नू ओर्मा अड्डा नू सिखाबाचस ती आलारिन भइक'अदस।”

6पिलातुस इदन मेनरकी मेंजस, “एन्देर ईस गलिलेया नू र'ऊ आलस का?”

7अरा आस एन्ने अक्खस का येसुस गलिलेया ता हिकदस अरा आस हेरोदेसी आकुस ता हिकदस। खने आस आसिन हेरोदेस गुसन तइय्यस चिच्चस। अबड़ा उल्ला नू हेरोदेस येरुसलेम नुम र'आलियस।

8हेरोदेस येसुसीन ईरियस ती नगदे खुसमारस। आस गा नगदे उल्ला ती आसिन ऐरा बेद्दा लगियस। एन्देरगेका आस येसुसी पत नू बग्गे कत्थन मेंजकाचस, अरा आस आसी ती एकअम अकबक नलखन ऐरा बेद्दा लगियस।

9आस आसिन अजम कत्थन मेंजस, लिकिन येसुस एन्देर हूँ आना मल किर्ताचस।



- 10 अरा मुध नैगर अरा नेग सिखाब'उर इज्जर ती मुर्ता मुर्ता आसी मइय्याँ दोस लगा बाचर।
- 11 खने हेरोदेस तंग्हे सैनर गने येसुसिन खॉइचस, लज्जे मोखताचस अरा बेलस लेक्खा बिलचना किचरिन अत्ताचस अरा येसुसिन पिलातुस गुसन किर्ताचस।
- 12 अउलम पिलातुस अरा हेरोदेस सखी मंजर केरर, इदिन ती मुन्द आर बैरी रहचर।
- 13 तहाँ पिलातुस मुध नैगर दरा नन्ना यहूदी मुद्धर अरा आलारिन मीखियस ती खॉइचस।
- 14 अरा आरिन बाचस, “नीम ई आलासिन हुलहुली ननू बाचकर ती एंग्हे गुसन ओन्द्रकर। अरा ऐरा, ऐन ईसिन निम्है मुन्दहारे जंचकन। लिकिन एका कत्था ही पत नू नीम ईस मइय्याँ दोस ठेकबाचकर अदिन ऐन आस मइय्याँ मल खक्खकन।
- 15 अरा हेरोदेस हूँ मल खक्खियस। आस गा एम्है गुसन ईसिन किर्ताचस। अरा ऐरा, पिटरना जोगे एन्देर नलख हूँ ईस मल नंजकादस।
- 16 औंगे ईसिन ऐन कोर्ता लौत'ओन ती अम्बोन चि'ओन।”
- 17 [अक्कुन पिलातुस गे चानुम कट्टना परब ही उल्ला नू ओन्टा गुड्रकासिन यहूदी आलर गे अम्बना चाइ रहचा।]
- 18 लिकिन ओर्मा आलर चिच्चियारनुम ब'आ लगियर, “ईसिन पिटा अरा एमा गे बरब्बसिन अम्बा।”
- 19 ई बरब्बस नगरे नू हुलहुली नंजका दरा आल पिटका चड्डे जेहेल नू गुड्रका रहचस।
- 20 पिलातुस गा येसुसिन अम्बा बेद्दना चड्डे आलारिन अउर ओंग्हेन मेंजस।
- 21 आर गा, “ईसिन क्रुस नू ठोक'आ, क्रुस नू ठोक'आ” ब'अरकी चिच्चियारर।
- 22 पिलातुस तिसर हेल आरिन बाचस, “एन्देरगे, ईस एन्देर मलदौ नंजकादस? ऐन गा ईस नू पिटरना जोगे एन्देर हूँ गुन्हा मल खक्खकन। औंगे ईसिन लौत'ओन ती अम्बोन चि'ओन।”
- 23 लिकिन आर कोइहे चिच्चियार चिच्चियार आना लगियर का ईसिन क्रुस नू ठोकना र'ई। अरा आर ही चिच्चियारना दिम जीतचा।
- 24 खने पिलातुस आर ही ने'अना लेक्खा नना गे हुकमारस।
- 25 अरा आस हुलहुली नंजका दरा पिटका चड्डे जेहेल नू गुड्रकासिन आर ही ने'अना लेक्खा आसिन अम्बियस चिच्चस अरा येसुसिन आर ही मने लेक्खा नन्त'आ गे सोंपचस।



- 26 सैनर येसुसिन होआ लगियर, आ बारी सिमोन नामे कुरेने नगरे ता आलस पद्दा तरती येरुसलेम बर'आ लगियस। आसिन देवां नंजर ती क्रुस आबोन चेड़ताचर अरा येसुसी खोखा खोखा होआ काला गे बाचर।
- 27 बग्गे आलर ही गोंहड़ा अरा आस गे चींखनुम ओलखनुम मुक्कर हूँ आसी खोखा खोखा काला लगियर।
- 28 लिकिन येसुस आर ही तरा बिड़दरस ती बाचस, “अना येरुसलेम ता मुक्कारो, एंगहै चड्डे अमा चींखा, निमा गे अरा निम्है खद्दर गे चींखा।
- 29 ऐरा, आ सस्ती ही उल्ला बर'आ लगी एकइय्या आलर ब'ओर, ‘बंझली मुक्कर गे दौ मनी, अरा एका मुक्कर इकला हूँ खद्द मल्ला पक्का अरा खद्दारिन मल्ला पोसका आर गे दौ मनी।’
- 30 तहाँ आलर परता गुट्ठिन ब'ओर, ‘एम्है मइय्याँ खतर'अय’ अरा टुंगरिन ब'ओर ‘एमन डब'अय।’
- 31 एन्देरगेका आर हरियर मन्न गने एन्ने नन्नर होले खैका मन्न गने एन्देर एन्देर मल ननोर?”
- 32 आर दुई झन मलदौ नलख नंजका आलारिन हूँ येसुस गने पिटा गे होआ लगियर।
- 33 आर खपरोही बारना अड्डा अंझसियर खने, आर असन येसुसिन दरा मलदौ नंजका आलारिन क्रुस नू ठोकचर। ओर्तोसिन तीना अरा ओर्तोसिन डेब्बा पक्खा ठोकचर।
- 34 खने येसुस बाचस, “अना बबा, ईरिन छमा नना, ईर गा एन्देर नन्नर अदिन बलनर।” अरा सैनर चिठी टिड्डर ती आसी किचरी गुट्ठिन खट्टरर।
- 35 आलर इज्जर ती ऐरना बारी रहचर। अरा यहूदी मुद्धर येसुसिन लज्जे मोखताचर ती बाचर, “ईस गा नन्नारिन नाड़ियस, ईस धर्मेसी चज्जिका आल मसीस हिकदस होले तंगन नाइदस नेकअन।”
- 36 अरा सैनर हूँ आसिन लज्जे मोखताचर, अरा बरचर ती आस गे तिस्सा अंगुर रासी चिचचर।
- 37 अरा बाचर, “नीन यहूदीर ही बेलय हिकदय होले निंगन नाड़ा।”
- 38 अरा दोस चिठी हूँ आसी मइय्याँ क्रुस नू लिखकी रहचा का “ईस यहूदीर ही बेलस हिकदस।”
- 39 क्रुस नू ठोकचका मलदौ आलर ती ओर्तोस येसुसिन निंदा नंजस दरा बाचस, “नीन मसी मलदय का? अन्ने होले निंगन अरा एमन हूँ नाड़ा।”
- 40 लिकिन नन्नस आसिन घुड़काचस ती बाचस, “एन्देर नीन धर्मेसिन हूँ मल एल्चदय? नीन हूँ गा अन्नेम दंडे खक्खालदय।



- 41 अरा नम्है दंडे गा नेग ती मानिम रई, नाम नम्है नलख ही जोक्खा दंडे खक्खा लगदत। लिकिन ई आलस एन्देर हूँ मलदौ मल नंजकादस।”
- 42 खने आस बाचस, “अना येसु, इकला नीन निंग्हे राजी नू राजी ननोय एंगन सुरत अके।”
- 43 येसुस आसिन बाचस, “ऐन निंगन मानिम ब'अदन, इन्नम नीन एंग्हे गने परदेसोस नू र'ओय।”
- 44 अक्कु मलागूटी लोहाड़ी बारा बजे रहचा। ई बारी ती तीन बजे गूटी गोट्टा चक ऊखा मंजा केरा।
- 45 बीड़ी ऊखा मंजा। अरा धर्मसी मन्दिर ही परदा मइय्याँ ती किइय्या गूटी चर्चा ती दुई फड़ा मंजा केरा।
- 46 अरा येसुस जोरसरिया चिच्चियारनुम बाचस, “अना बबा, ऐन एंग्हे बोलतन निंग्हे खेक्खा नू अम्बदन।” अरा एन्ने बाचस ती आस तंग्हे जियन बिच्छरस।
- 47 ई मंजकन रोमी सैनर ही मुद्धस ईरियस ती धर्मसी ओहमा नंजस अरा बाचस, “मानिम ई आलस उजगो रहचस।”
- 48 अरा असन खोंडरका उर्मी आलर ई मंजकन ईरियर ती दुक्खे ती तम्है एंवखन ठोकोरनुम तम्है एइपा किरियर।
- 49 अरा येसुसी ओर्मा चिन्हार आलर अरा गलिलेया जिला ती आस गने चोंख्रका मुक्कर गेच्छम इज्जर ती इबड़ा उर्मिन ऐरा लगियर।
- 50 असन योसेफस नामे यहूदीर ही सभा ता आलस रहचस। आस दौ अरा उजगो आलस रहचस।
- 51 आस यूदेया जिला ही अरिमतिया पद्दा ता आलस रहचस। आस गे यहूदी मुद्धर ही इबड़ा चिताबुता अरा नलख ती मने मल रहचा। अरा आस धर्मस इकला तंग्हे आलारिन राजी ननोस अदिन आस पाब ऐरालियस।
- 52 आस पिलातुस गुसन केरस ती येसुसी मेदन नेचस।
- 53 अरा अदिन एत्ताचस ती ओन्टा दिगहा कफन किचरी ती मुसगियस अरा चचड़ी नू पत्तरकी कम्बका ओन्टा मसड़ा नू कीदस, अइय्या इकला हूँ नेकन हूँ मल उइयका रहचा।
- 54 आ उल्ला सपड़ अना ही उल्ला रहचा अरा बीड़ी पुतका ती खन्न ऐखना उल्ला ओरे मन्ना रहचा।
- 55 अबड़ा मुक्कर ने येसुस गने गलिलेया जिला ती बरचका रहचर आर योसेफसी खोखा खोखा केरर दरा मसइन दरा आसी मेद एकासे उइरा अदिन ईरियर।



56 खने आर किरियर ती येसुसी मेद नू नलबा गे गमगमरना आलोन दरा गमगमरना इसुंगन सराजमा नंजर। अरा खन्न ऐखना उल्ला ही मूसासी नेग ही लेक्खा खन्न ऐखरर।

लूकस 24

1 हप्ता ही पहिल उल्ला ऊखूर ऊखूर नू अबड़ा मुक्कर ताम सराजमा नंजका गमगमरना आलो गुठिन ओन्द्र ती मसड़ा गुसन केरर।

2 खने आर मसड़न उर्दका पखनन मसड़ा ती ताड़रका ईरियर।

3 लिकिन भितरी केरर होले उर्बा येसुसी मेदन मल खक्खियर।

4 आर ई कत्था ही पत्त नू अकबकरर खने, दुई झन आलर बिल्चना किचरी अत्तका आर ही हेद्दे इज्जर।

5 आर इल्चियर ती खेखेल तरा तुर'उ नंजर चिच्चर। तहाँ आ आलर आरिन बाचर, “नीम उज्जुसिन केचका नू एन्देरगे बेद्ददर?”

6 आस इसन मलकस, आस गा उज्जा चोचस। सुरता नना का आस गलिलेया नूर'ओ बारी निमन एन्देर बाचका रहचस?

7 का मनवा खद्दस गे पपहा आलर ही खेक्खा नू धरतारना ती क्रुस नू पिटरना रई, अरा तिसर उल्ला नू उज्जा चो'अना रई।”

8 खने येसुसी कत्था आर गे सुरता बरचा।

9 खने आर मसड़ा ती किरियर ती ग्यारा चेलारिन अरा नन्नारिन हूँ इबड़ा उर्मी कत्थन तिंगियर।

10 आर ईर हिकनर का मरियम मगदलेनी अरा योअन्ना अरा याकोबसी तंगियो मरियम अरा नन्ना मुक्कर हूँ आर ही गने रहचर। आरिम इबड़ा मंजका ओर्मा कत्थन तड़रकारिन तिंगियर।

11 लिकिन आर ही कत्था चेलर गे कमचका खीरी लेक्खा लग्गिया। अरा आर आरहीन मल पत्ताचर।

12 खने पतरस चोचस दरा बुंगनुम मसड़ा केरस अरा खोलखरस ती ईरियस। खने असन मुसगका कफन किचरिन लेका ईरियस। अरा एन्ने मंजकी रई अदिन ईरियस ती अकबक मन्नुम किरियस।

13 अउलम आर ही ती दुई झन एम्माउस नामे ओन्टा पद्दा काला लगियर। आद येरुसलेम ती सात कौंस केम गेच्छा रहचा।

14 अरा आर इबड़ा मंजका उर्मी कत्था ही पत्त नू ताम तामिम कछनखनुम काला लगियर।



- 15 आर कछनख्रतेम रहचर। आ बारिम येसुस तानिम बर'अरकी आर गने केरस।
- 16 लिकिन आर आसिन चिन्ह'आ पोल्लर का आस ने हिकदस।
- 17 आस आरिन मँजस, “नीम एन्देर कत्थन ईकनुम ईकनुम नीम नीम नू कछनख्रदर।” आर हेन्दवारर ती इज्जर केरर।
- 18 खने आर ती किलेयोपास नामे ओर्तोस आसिन आनाकिर्ताचस, “एन्देर नीन येरुसलेम नू नीन लेका एन्ने आलय हिकदय का इन्नेला नू अइय्या एन्देर एन्देर मंजकी र'ई अदन बलदय?”
- 19 अरा आस आरिन मँजस, “एन्देर कत्था?” आर बाचर, “नासरेत ता येसुसी पत्त नू। आस धर्मसी अरा ओर्मा आलर ही मुन्दहारे नलख नू अरा ब'अना नू कोइहे सवंगिय धर्मसी कत्था तिगुस रहचस।
- 20 नम्है मुध नैगर अरा मुद्धर आसिन पिटना दंडे चि'आ गे सौंपचर। तहाँ आर आसिन क्रुस नू ठोकचर।
- 21 लिकिन एमा असरा रहचा का आस इस्राएल आलारिन नाडोस। इबड़ा कत्था ही मंजका इन्ना तीन उल्ला मंजा।
- 22 अरा इन्ना एम्है मदहे ती जोक्क मुक्कर हूँ एमन अकबक नंजर चिचचर। आर पैरिम मसड़ा गुसन केरकाचर।
- 23 अरा आर आसी मेदन मल खक्खियर। तहाँ आर किरियर ती एन्ने बाचर का आर असन मेर्खा पैकारिन ईरियर। अरा आर बाचर का येसुस उज्जालदस।
- 24 तहाँ एम्है संगेर ती जोक्कोर मसड़ा गुसन केरकाचर। अरा आर हूँ एकासे मुक्कर बाचकाचर अन्नेम खक्खियर, लिकिन येसुसिन मल ईरियर।”
- 25 खने येसुस आरिन बाचस, “अना लूर मलका आलारो, अरा धर्मसी कत्था तिगुर ही उर्मी बाचकन पत्त'अना नू भकुवा आलारो!
- 26 एन्देर ईद चाड़ मल रहचा का मसीस गे एन्ने इबड़ा खिलपतन चोद'अरकी तंग्हे महबा नू कोर'ओस?”
- 27 खने आस मूसस अरा ओर्मा धर्मसी कत्था तिगुर तंग्हे पत्त नू लिखचका ओर्मा कत्थन आर गे बुझाबाचस।
- 28 इवंदा नू आर एसन काला लगियर आ पद्दा अंडसियर। अरा येसुस अउर मुन्द काना बेसे ऐदस।



- 29 लिकिन आर आसिन गोहरारर, “एम्है गने र'आ, एन्देरगेका बीड़ी पुतया ने, अरा उल्ला केरा।” खने आस आर गने र'आ केरस।
- 30 एकाबारी आस आर गने मंडी ओना उक्कियस, खने असमन होचस ती आसीस नंजस अरा अदिन किच्चियस ती आर गे चिच्चस।
- 31 खने आर ही खन्न तिसगरा अरा आर येसुसिन चिन्हचर। अरा आस आर गे मल ऐथ्रस।
- 32 आर ताम तामिम ब'आ हेलरर, “एकाबारी आस नम्है गने डहरे नू कछनख'आ लगियस अरा नेम्हा पुथी ती बुझुरत'आ लगियस खने नम्है जिया नू एन्देर धुकधुकी मल मंजा?”
- 33 आर आ बारिम चौचर ती येरुसलेम किरियर अरा अबड़ा ग्यारो चेलर अरा आर ही संगेरिन खोंडरका खक्खियर।
- 34 अबडर ब'आ लगियर, “येसुस मानिम उज्जा चौचकादस, अरा सिमोनस गे ऐथ्रस।”
- 35 खने आर इरबारिम डहरे नू एन्देर एन्देर मंजा अरा आर येसुसिन एकासे असमा किच्चो बारी चिन्हचर अदिन तिगियर।
- 36 आर इबड़ा कत्थन ब'अम लगियर, येसुस तानिम आर ही मझी नू इज्जस अरा बाचस, “धर्मस निमन कोड़े उइय्दस नेकअन।”
- 37 आर गा इल्चियर ती बयारर अरा सोचचर का ऐम नादन ऐरा लगदम।
- 38 लिकिन येसुस बाचस, “एन्देरगे एल्चदर? अरा एन्देरगे भरटालदर?”
- 39 एंग्हे खेक्खा अरा खेड्डे गुट्ठिन ऐरा, ऐनिम हिकदन। एंगन ऐन्डर'आ अरा ऐरा, एन्देरगेका नाद ही खोचोल दरा अहड़ा मल मनी एकासे एंग्हे नू ऐरदर।”
- 40 एन्ने बाचस ती आस तंग्हे खेड्डे खेक्खा गुट्ठिन ऐदस।
- 41 आर रिझ मंजर होले हूँ आर मल पत'आ लगियर अरा अकबकरका रांगे रहचर। होले येसुस आरिन बाचस, “निम्है गुसन इन्द्रिम मोखना रई होले चि'आ”
- 42 खने आर आस गे ओन कूड़ी कुट्टका इंजो चिच्चर।
- 43 अरा आस अदिन आर ही मुन्दहारे मोक्खस।
- 44 तहाँ आस आरिन बाचस, “एका कत्थन ऐन निम्है गने र'अना बेड़ा निमन तिंकन, एन्देर एंग्हे पत नू मूसासी पेसका नू अरा धर्मसी कत्था तिंगुर अरा अस्सना-पाड़ना डंडी पुथी नू लिखकी रई अबड़ा उर्मी कत्था मन्ना चाड़ रई।”



- 45 खने आस धर्मेसी पुथिन बुझा आ गे आर ही जियन कुल्लियस।
- 46 अरा आरिन बाचस, “नेम्हा पुथी नू लिखकी रई का मसीस दुक्खे चोदओस अरा तिसर उल्ला केचका ती उज्जा चोओस।
- 47 अरा येरुसलेम ती ओड़ मनरकी जम्मा राजी नू आसी नामे नू जियन किर्तअना दरा पाप छमा गे तेंगा कुद्दना मनो।
- 48 नीम इबड़ा कत्था ही गोवाह हिकदर, एकदन नीम एंग्हे ती मेंजकर अरा ईरकर।
- 49 अरा नेम्हा बोलतन एकदन एम्बस गच्छरका रअस अदिन ऐन निमा गे तइय्योन, अरा नीम नेम्हा बोलतासी सवंग खक्खना गूटी येरुसलेम नगरे नुम रअके।”
- 50 तहाँ आस आरिन बेतानिया नगरे गूटी होच्चस दरा तंग्हे खेक्खन चोदस ती आर गे बरकत चिच्चस।
- 51 आर गे बरकत चिअनुम चिअनुम आरिन ती छिन्डरस दरा मेर्खा चोदरस केरस।
- 52 तहाँ आर आसिन ओड़ लग्गियर दरा खुसमारनुम खुसमारनुम येरुसलेम किरियर।
- 53 अरा आर उर्मी उल्ला धर्मेसी ओहमा नना गे धर्मेसी मन्दिर काला लगियर।



योहनस

योहनस 1

- 1ओरे नू कत्था रहचा, अरा आ कत्था धर्मस गने रहचा, अरा आ कत्था धर्मस रहचस।
- 2आस ओरे तिम धर्मस गने रहचस।
- 3उर्मी आलो आसी तिम गढ़रा, अरा गढ़का ती ओन्टा हूँ आसी बिगर मल्ला गढ़का।
- 4अरा गढ़का ओर्मा तंगहै उज्जनन आसी ती खक्खिया, अरा आसी उज्जना ओर्मर गे बिल्ली चिच्चा।
- 5अरा आ बिल्ली ऊखा नू बिल्ली, अरा ऊखा अदिन तेभा आ पुल्ली।
- 6धर्मस ती तइयका ओर्तोस रहचस, आस योहन नूडरत'उस।
- 7आस आ बिल्ली ही पत नू गोवाह चि'आ गे ओन्टा गोवाह लेक्खा बरचस, ओँगे ओर्मर आस ती पत'आ ओँगोर नेकअन।
- 8आस गा तान आ बिल्ली मल रहचस, लिकिन आस आ बिल्ली ही पत नू गोवाह चि'आ गे लेका बरचस।
- 9एकास मानी बिल्ली र'अदस, आस ओर्मर गे बिल्ली चि'अदस, आस अक्कु खेखेल नू बर'आ लगियस।
- 10आस खेखेल नू रहचस। अरा खेखेल आस तिम गढ़रा, अन्नु हूँ खेखेल आसिन मल चिन्हचा।
- 11आस तंगहै आलर गुसन बरचस, अन्नु हूँ तंगहै आलर आसिन मल इंझर।
- 12लिकिन जेतेक आलर आसिन इंझर अरा आसी नू पताचर, अबड़ा ओर्मर गे आस धर्मसी खद्द मना गे अदिया चिच्चस।
- 13आर अयंग-बंग ती, महले मेद ही मने ती, महले मेत-मुक्का ही मने ती धर्मसी खद्दर मल मंजर, लिकिन धर्मस तंगहै मने ती आरिन तंगहै खद्दर कमचस।
- 14अक्कु आ कत्था आल मंजस ती मया दरा मानिम ती निद्रका ती नम्है मझी नू उज्जियस। अरा नाम आसी महबन ईरकत, आद धर्म बंगासी ओर्त लेका खद्दासी महबा ही जोक्खा महबा दिम रहचा।
- 15योहनस आसी पत नू गोवाह चिच्चस अरा चिच्चियारस ती बाचस, “नेख'आ पत नू ऐन बाचकन, आस ईसिम हिकदस, आस एंगहै खोखा बरदस, लिकिन एंगहै ती कोहँस र'अदस, एन्देरगेका आस एंगहै ती मुन्द दिम रहचस।”



- 16 अरा आसी मया ही निद्रका ती नाम ओर्मत आसीस ही मइय्याँ आसीस खक्खकादत।
- 17 एन्देरगेका धर्मसी पेसका मूसस ती चीतारा, लिकिन मया अरा मानिम येसु मसीस ती बरचा।
- 18 धर्मसिन इकला हूँ ने हूँ मल ईरकानर। धर्म बंगासी जिया हेददे र'ऊ आसी ओर्त लेका खद्दस धर्मस, धर्मसिन नमा गे दहदर नंजकादस।
- 19 येरुसलेम ता यहूदीर नैगारिन अरा लेवी गोतोर ता आलारिन “नीन एका ओर्तय?” एन्ने मेना गे योहनस गुसन तइय्यर।
- 20 आ बारी योहनस एन्ने गोवाह चिच्चस, अरा मल नुड्स ती आस मानिम गने तेंगरस, “ऐन मसीस मलदन।”
- 21 खने आर आसिन मेंजर, “होले नीन एका ओर्तय? नीन धर्मसी क्त्था तिगू एलियस हिकदय का?” योहनस बाचस, “ऐन एलियस मलदन।” अरा आर अउरिम मेंजर, “नीन बर'ऊ र'अदस आ धर्मसी क्त्था तिगू हिकदय का?” आस बाचस, “मला।”
- 22 खने आर बाचर, “होले नीन एका ओर्तय? ने एमन तइय्कानर आरिन एन्देर तेंगोम? निंग्हे पत नू एन्देर ब'अदय?”
- 23 योहनस आरिन धर्मसी क्त्था तिगू यसायासी बाचका क्त्थन आनाकिर्ताचस, “ऐन उर्बस गे डहरेन चत्र'आ एन्ने टोडंग नू चिच्चियारना सड़ा हिकदन।”
- 24 फेन तइय्का रहचका जोक्क फरिसीर योहनसिन मेंजर,
- 25 “नीन मसीस मलदय, महले एलियस मलदय, महले बर'ऊ र'अदस आ धर्मसी क्त्था तिगू मलदय होले, नीन एन्देरगे आलारिन नोडरत'अदय?”
- 26 खने योहनस आनाकिर्ताचस, “ऐन गा अम्मु ती नोडरत'अदन, लिकिन निम्है मड़ी नू इसन ओर्तोस र'अदस, आसिन नीम बलदर।
- 27 आस एंग्हे खोखा बर'ऊ र'अदस, लिकिन ऐन आसी खरपन इँचना ही हूँ जोगे मलदन।”
- 28 इबड़ा ओर्मा क्त्था यरदन खाड़ ही पुरुब तरा बेतानिया पद्दा नू मंजा, असन दिम योहनस आलारिन नोडरत'आ लगियस।
- 29 दोसर उल्ला योहनस येसुसिन तंग्हे तरा बरना ईरयस ती बाचस, “ऐरा, ईस धर्मसी भेंडो खद्दो, ईस दिम सौंसार ही पापन ओथ्र'ओस।
- 30 ईस आसिम हिकदस, ईसी पत नुम ऐन निमन बाचका रहचकन का, ‘आस एंग्हे खोखा बरदस, लिकिन एंग्हे ती कोहँस र'अदस, एन्देरगेका आस एंग्हे ती मुन्द तिम रहचस।’



- 31 ऐन आसिन बल्ला लिक्कन, लिकिन आस इस्राएल आलर गे दहदर मना गे दिम ऐन अम्मु ती नोडरत'आ गे बरचकन।”
- 32 फेन योहनस गोवाह चिच्चस, “ऐन नेम्हा बोलतन मेर्खा ती पेरवाँ लेक्खा एतना अरा आस मड्य्याँ ओक्कना ईरकादन।
- 33 ऐन हूँ आसिन बल्ला लिक्कन। लिकिन एंगन ने अम्मु ती नोडरत'आ गे तड्य्यस, आसिम एंगन बाचस ‘नीन नेख'आ मड्य्याँ नेम्हा बोलतन एतना अरा ओक्कनन ऐरोय, आसिम नेम्हा बोलतस ती नोडरत'ओस।’
- 34 इदन ऐन ईरकन, अरा गोवाह चि'अदन का ईस दिम धर्मेसी खद्दस।”
- 35 दोसर उल्ला अउरिम योहनस तंग्हे चेलर ती इरबर गने असानिम रहचस।
- 36 अरा योहनस येसुसिन काना ईरियस ती बाचस, “ऐरा, ईस धर्मेसी भेंडो खद्दो।”
- 37 अबड़ा ऐंड चेलर आसी कत्थन मेंजर ती येसुस गने चोख्रर।
- 38 येसुस किर्ईरियस ती आरिन तंग्हे गने चोख्रनन ईरियस ती आरिन बाचस, “नीम एन्द्रन बेद्ददर?” आर आसिन बाचर, “अना रब्बी! नीन एसन र'अदय? (‘रब्बी’ ही मने ‘गुरु’।)”
- 39 येसुस आरिन बाचस, “बरा, खने नीम ऐरोर।” ई बेड़ा मलागूटी पुतबारी चार बजे रहचा। आस एसन र'अदस अदिन आर केरर ती ईरियर, अरा अउला आर आसी गने रहचर।
- 40 योहनसी कत्थन मेंजर ती येसुस गने चोख्रका आर ती ओतोस सिमोन पतरसी भड्य्योस अन्द्रेयस रहचस।
- 41 अन्द्रेयस मुन्द तंग्हे भड्य्योस सिमोनस गने भेंट मंजस ती बाचस, “ऐम मसीसिन खक्खकादम। (मसीसिन ‘ख्रिसतोस’ एन्ने हूँ ब'अनर।)”
- 42 अरा आस सिमोनसिन येसुस गुसन होच्चस। येसुस आसिन ईरियस ती बाचस, “नीन योहनसी तंग्दय सिमोन हिकदय। नीन ‘केफास’ बार'ओय। (केफासिन ‘पतरस’ एन्ने हूँ ब'अनर।)”
- 43 दोसर उल्ला येसुस गलिलेया जिला काला गे बिद्दियस। अरा आस फिलिप्पोसिन खक्खियस ती आसिन बाचस, “एंग्हे गने चोख्र'आ।”
- 44 फिलिप्पोस गा अन्द्रेयस अरा पतरसी नगरे बेतसैदा ता रहचस।
- 45 फिलिप्पोस नतनऐलसिन खक्खियस ती बाचस, “नेख'आ पत नू मूसस नेग नू लिखचकादस अरा धर्मेसी कत्था तिंगुर हूँ लिखचकानर, आसिन ऐम ईरकम। आस योसेफसी तंग्दस नासरेत पद्दा ता येसुस दिम हिकदस।”



- 46 लिकिन नतनऐलस फिलिप्पोसिन बाचस, “नासरेत हिके का! नासरेत ती एकअम बेस बर'आ ऊंगी का?” फिलिप्पोस बाचस, “बरा ती ऐरा।”
- 47 येसुस नतनऐलसिन तंग्हे तरा बरनन ईरियस ती आसी पत नू बाचस, “ऐरा, ईस ओन्टा मानिम इस्राएल आलस, ईसी नू कुटमुटरना मलकी।”
- 48 नतनऐलस येसुसिन बाचस, “नीन एंगन एकासे अखदय?” येसुस आनाकिर्ताचस, “फिलिप्पोस निंगन मेखना ती मुन्द अंजीर मन्न मूली नू रहचकय खने, निंगन ईरकाचकन।”
- 49 नतनऐलस आसिन आनाकिर्ताचस, “अना गुरु! नीन धर्मेसी खदय! नीन इस्राएल ही बेलय!”
- 50 येसुस आसिन आनाकिर्ताचस, “ऐन निंगन बाचकन, ऐन निंगन अंजीर मन्न मूली नू ईरकन' खने नीन एंगन पत'अदय का? नीन इदिन ती हूँ कोहाँ कोहाँ नलखन ऐरोय।”
- 51 येसुस एन्ने हूँ बाचस, “ऐन निमन मानिमन ब'अदन, नीम मेखन तिसगरका अरा धर्मेसी पैकारिन मेखा अरा खेखेल ही मझी नू अडार लेक्खा मनवा खददन एंगा मइय्याँ अरगनन अरा एतनन ऐरोर।”

योहनस 2

- 1 अक्कुन तिसर उल्ला गलिलेया जिला ही काना नामे पद्दा नू बेंजा रहचा। येसुसी तंग्यो असन रहचा।
- 2 येसुस अरा आसी चेलर हूँ आ बेंजा नू एडरका रहचर।
- 3 अंगुर रासी मुंज्रा खने, येसुसी तंग्यो आसिन बाचा, “ईर ही गुसन अंगुर रासी मुंज्रा।”
- 4 खने येसुस अदिन बाचस, “अनय आली! इदिन एंगन एन्देगे तेंगालदी? अक्कुन एंग्हे बेडा अरगी अंइसा।”
- 5 आसी तंग्यो जोंखारिन बाचा, “आस निमन एन्दे नना आनोस, अदिन ननके।”
- 6 असन यहूदीर ही चाल लेक्खा सुध मना गे पखना ही छै गोटंग अम्मु उइय्ना कुंड़ा गुट्ठी उइय्का रहचा। उर्मी कुंड़ा नू पछतर ती ओन सौ पन्द्रा लिटर अम्मु सम'आ लगिया।
- 7 येसुस आ जोंखारिन बाचस, “कुंड़ा गुट्ठी नू अम्मु नीदा चि'आ।” अन्नेम जोंखर अबडा नू छलछलरना निंदर चिचचर।
- 8 फेन येसुस आरिन बाचस, “अक्कु कटिक ओथ्र'आ ती मदी ही मुद्धस गुसन हो'आ।” आर अन्नेम अदन होचचर।



- 9 मदी ही मुद्धस अंगुर रासी मंज खचकी रहचा आ अम्मन उंडी ईरियस। आस बल्ला लगियस का आ अंगुर रासी एसले बरचा, लिकिन एका जोंखर अम्मु ओथ्रका रहचर आर इदन अक्खर। मदी ही मुद्धस बेंजा जोंखासिन मीखियस,
- 10 अरा आसिन बाचस, “ओर्मर मुन्द बने अंगुर रासिन चिअनर, अरा ओंडका ती उइचका खोखा सिठारका अंगुर रासिन चिअनर। लिकिन नीन अक्कुन गूटी बने अंगुर रासिन उइयकादय।”
- 11 ईद दिम येसुस नंजका पहिल अजगुत नलख ही चिन्हा हवे। इदन आस गलिलेया जिला ही काना पद्दा नू नंजस। ई लेक्खा आस तंग्हे महबन ऐदस। अरा आसी चेलर आसी नू पत्ताचर।
- 12 इदही खोखा येसुस तंग्यो अरा तंग्हे भईर अरा तंग्हे चेलर गने कफरनहूम नगरे केरस, अरा असन आर जोक्क उल्ला रहचर।
- 13 यहूदीर ही कट्टना ही परब हेददे अंडसिया खने, येसुस येरुसलेम केरस।
- 14 अरा आस धर्मेसी मन्दिर ही चाली नू दाँडे गुट्ठी गे अड्डो, भेंडो, अरा पेरवाँ गुट्ठिन बीसू आलारिन अरा रोमी राजी ता ढिबन धर्मेसी मन्दिर ही ढिबा नू बदलना आलारिन उक्का ईरियस।
- 15 खने आस ऐप ही कोर्ता कमचस ती भेंडो अरा अड्डो गुट्ठी गने उर्मिन धर्मेसी मन्दिर ही चाली ती बहरी ओथ्रस चिचस। अरा रोमी राजी ही ढिबन धर्मेसी मन्दिर ही ढिबा नू बदलना आलर ही ढिबा गुट्ठिन छिरयाचस चिचस, अरा आर ही कंडो गुट्ठिन बिइदाचस चिचस।
- 16 अरा पेरवाँ गुट्ठी बीसुरिन बाचस, “इबइन इसले होआ, एम्बासी एइपन खीन्दू-पिटू अड्डा अमा कमआ।”
- 17 खने आर ही चेलर गे “निंग्हे एइपा ही पत्त ता एंग्हे चोन्हा एंगा नू चिच्ची बेसे ऊली” एन्ने नेम्हा पुथी नू लिख्रका कत्था सुरता बरचा।
- 18 खने यहूदी मुद्धर येसुसिन मँजर, “इबइ कत्थन नीन नना गे निंगा एन्देर अदिया रई? निंगा इदगे धर्मेस ती अदिया रई होले, इदन पुरुब नना गे एमा ओन्टा अजगुत नलख ही चिन्हा ऐदआ।”
- 19 येसुस आनाकिर्ताचस, “ई धर्मेसी मन्दिर आबोन धंसआ चिआ, ऐन इदन तीन उल्ला नू कमओन चिओन।”
- 20 खने आर बाचर, “एन्द्रा! ई धर्मेसी मन्दिर गा छियालिस बछर नू कम्मरा, नीन इदन तीन उल्ला नू कमओय का?”
- 21 लिकिन येसुस गा तंग्हे मेद मन्दिर ही पत्त नू बआलियस।



22 येसुसी ई बाचका कत्था येसुस केचका ती उज्जा चोचका खोखा आसी चेलर गे सुरता बरचा। अरा आर नेम्हा पुथिन अरा येसुसी बाचका कत्थन पताचर।

23 येसुस कट्टना परब बारी येरुसलेम नू रहचस खने, ढेर आलर आसी ती मंजका अजगुत नलख ही चिन्हा गुट्ठिन ईरियर ती आसी नू पताचर।

24 लिकिन येसुस आरिन मल पताचस, एन्देरगेका आस उर्मी आलारिन अक्खस।

25 आस गे चाड़ मल रहचा का नीकईम आसिन आलर ही पत नू तेंगोर, एन्देरगेका आस तानिम अक्खस का आलर ही जिया नू एन्देर रई।

योहनस 3

1 फरिसीर ती निकोदेमोस नामे ओन्टा आलस रहचस। आस ओन्टा मुध यहूदीर ही मुद्धस रहचस।

2 आस उन्दुल माखा येसुस गुसन बरचस ती बाचस, “अना गुरु, ऐम अखदम का नीन धर्मस तरती बरचका ओन्टा गुरु हिकदय। एन्देरगेका नीन नन्दय आ अजगुत नलख ही चिन्हा गुट्ठिन नै हूँ नना पोल्लोस, एका गूटी धर्मस आस गने मल र'अदस।”

3 येसुस आसिन आनाकिर्ताचस, “ऐन निंगन मानिमन ब'अदन, नीकईम अउरिम मल कुन्द्रदस, आस धर्मस तंगहै उज्जना नू राजी नन्नन अनुभव मल ननोस।”

4 निकोदेमोस बाचस, “एन्द्रा! ओर्तोस पक्का केरका ती आस एकासे अउर कुन्द्र'आ ओंगदस? आस अयंग ही कोख नू अउरिम कोरदस ती कुन्द्र'आ ओंगदस का?”

5 येसुस आनाकिर्ताचस, “ऐन निंगन मानिमन ब'अदन, नीकईम अम्मु अरा बोलतस ती मल कुन्द्रदस, आस धर्मस तंगहै उज्जना नू राजी नन्नन अनुभव मल ननोस।

6 कया कया ही उज्जनन लेका कुन्द्रत'आ उंगी, लिकिन नेम्हा बोलतस बोलता ही उज्जनन कुन्द्रत'अदस।

7 निमा अउरिम कुन्द्रना चाड़ रई, एन्ने ऐन बाचकन। नीन अदही पत नू अमा अकबकरा।

8 ताका एका तरा बिददी अत्रम तागर'ई। अरा नीन अदही सइन मेन्दय, लिकिन एका तरती बर'ई अरा एका तरा कई अदिन बलदय। ओंगे नेम्हा बोलतस ती कुन्द्रका ओर्मर ही कुन्द्रना एन्नेम रई।”

9 खने निकोदेमोस मेंजस, “ईद एकासे मना उंगी?”

10 येसुस आसिन बाचस, “नीन इस्राएल नू ओन्टा मुध गुरु र'अदय, अन्नु हूँ इबड़ा कत्थन नीन मल बुझदय का?”



- 11 ऐन निंगन मानिमन ब'अदन, ऐम अखदम अदिनिम ब'अदम, अरा ईरकादम अदही पत नू गोवाह चि'अदम, लिकिन नीम एम्है गोवाह आबोन मल इंझर।
- 12 ऐन निमन खेखेल ता कत्थन तिंकन अदिन नीम मल पत'अदर, लिकिन ऐन निमन मेखन ता कत्थन तेंगोन होले, नीम एकासे पत'ओर?
- 13 मेर्खा ती इतका मनवा खद्दस एंगन अम्बरकी ने हूँ मेर्खा नू मल अरगनर।
- 14 अरा एकासे मूसस टोङ्ग नू नेरेंन खुटा नू टंगचस, आ लेक्खम मनवा खद्दन ऐन हूँ मइय्याँ अरगतारना ही चाड़ रई।
- 15 औंगे ने मनवा खद्दन एंगा नू पत'अनर, आर ओर्मर जनमजुग उज्जनन खक्खोर।
- 16 धर्मेस गा खेखलन एन्ने कोइहे चोन्हा नंजस का आस तंगहै ओर्त लेका खद्दासिन चिचस। औंगे एकार आस नू पत'अनर आर मल नठार'ओर, लिकिन जनमजुग ही उज्जनन खक्खोर।
- 17 धर्मेस तंग्दासिन खेखेल नू खेखलन नेंवई नना गे मल तइय्यस, लिकिन आस ती खेखलन नाड़ा गे तइय्यस।
- 18 ने धर्मेसी खद्दस नू पत'अदस, आस गे दंडे ही नेंवई मल मनी। लिकिन ने आस नू मल पत'अदस, आस गे दंडे ही नेंवई मंज खचकी रई, एन्देरगेका आस धर्मेसी ओर्त लेका खद्दासी नामे नू मल पत'अदस।
- 19 आर गे दंडे ही नेंवई ही चड्डे ईद दिम का, बिल्ली खेखेल नू बरचा, लिकिन आलर बिल्ली ती कोइहे ऊखन पतारर, एन्देरगेका आर ही नलख गुट्ठी मलदौ रहचा।
- 20 मलदौ नलख ननू ओर्मर बिल्लिन खाँडनर, अरा बिल्ली नू मल बरनर, एन्देरगेका तम्है मलदौ नलख गुट्ठी दहदर मनो अदगे एल्चनर।
- 21 लिकिन ने मानी गने उज्जनर, आर बिल्ली हेददे बरनर, अत्रु ईद दहदर मनी का आर ही नलख धर्मेस ती मंजकी रई।”
- 22 इदही खोखा येसुस अरा आसी चेलर यूदेया चकभार नू बरचर। असन आस जोक्क उल्ला आर गने रहचस, अरा आलारिन नोइरत'आ लगियस।
- 23 योहनस हूँ सलेम ही हेददे ऐनोन खाड़ नू नोइरत'आ लगियस, एन्देरगेका असन बग्गे अम्मु रहचा, अरा आलर नोइर'आ गे बरतेम र'आ लगियर।
- 24 (ईद योहनसिन जेहेल नू सजना ती मुन्द मंजकीचा।) 25 योहनसी चेलर अरा ओन्टा यहूदी ही मझी नू चाल ही सुध मन्ना ही पत नू आनानखरना मंजा।



- 26 अरा योहनसी चेलर योहनस गुसन बरचर ती बाचर, “अना गुरु, एका ओर्तोसिन नीन यरदन खाइ ही पुरुब तरा भेंट मंजकय, अरा आसी पत नू नीन गोवाह चिच्चकय, आस हूँ आलारिन नोडरत'अदस, अरा ओर्मा आलर आस गुसन कानर।”
- 27 योहनस आनाकिर्ताचस, “ने हूँ एन्ड्रन हूँ मल खक्खनर, एका गूटी धर्मस मेर्खा ती अदिन मल चि'अदस।
- 28 ऐन 'मसीस' मलदन, लिकिन आस गे डहरेन चत्र'आ गे तडरका आलन हिकदन' एन्ने ऐन बाचका रहचकन, अदगे नीम दिम एंगा गे गोवाह र'अदर।
- 29 बेंजा पेल्लो बेंजा जोंखसी दिम हवे। लिकिन बेंजा जोंखासी संगेस गा आसी हेददे इज्जदस ती आसी कथन मेन्दस। आस बेंजा जोंखासी कथन मेन्दस ती नगदे रिझदस। एंग्हे रिझ एन्ने दिम हवे। आद अक्कु पुरचा।
- 30 अरा चाइ रई का आस कोहाँ मन्नुम काना रई, अरा ऐन सन्नी मन्नुम ती काना रई।”
- 31 मइय्याँ ती बर'उस ओर्मर ती कोहँस दिम र'अस। अरा खेखेल ती बर'उस खेखेलतस हिकदस। आस खेखेल ता कथा गुट्ठिन कछनखदस। लिकिन मेर्खा ती बर'उस ओर्मर ती कोहँस दिम र'अस।
- 32 आस एन्ड्रन ईरकादस अरा मेंजकादस अदही पत नू गोवाह चि'अदस। लिकिन आसी गोवाह आबोन ने हूँ मल पत'अनर।
- 33 ने आसी गोवाह आबोन पत'अदस, आस धर्मस मानिम जोगे र'अदस एन्ने ऐदस।
- 34 नेकन धर्मस तइय्कादस, आस धर्मसी कथा गुट्ठिन ब'अदस, एन्देरगेका धर्मस आस गे नेम्हा बोलतासिन बिगर नपदस जोक्खदस ती चि'अदस।
- 35 बंगस तंग्दासिन चोन्हा नन्दस, अरा उर्मिन आसी खेक्खा नू सोंपचकादस।
- 36 ने धर्मसी खद्दस नू पत'अदस, आस गे जनमजुग उज्जना रई। लिकिन ने धर्मसी खद्दासिन मल मन्दस, आस आ उज्जनन मल खक्खोस, एन्देरगेका धर्मसी खींस आसी मइय्याँ रई।

योहनस 4

- 1.3 येसुस योहनस ती बग्गे आलारिन चेला कमदस अरा नोडरत'अदस, एन्ने फरिसीर मेंजर, अदन येसुस अक्खस। खने आस यूदेया जिला आबोन अम्बियस ती गलिलेया जिला किरिम बिच्चियस। (येसुस तान मला, लिकिन आसी चेलर नोडरत'आ लगियर।)
- 4 आस गे समारिया राजी नू मन्नुम काना रहचा।



- 5 खने आस समारिया राजी ता सुखार नामे पद्दा नू बरचस। ई पद्दा याकोबस तंगदस योसेफस गे चिच्का खल्ल गुसन रहचा।
- 6 आ खल्ल नू याकोबसी तूसा रहचा। येसुस इहरे इक्कियस ती खड़दिकाचस, आँगे असन उक्कियस। ईद मलागूटी लोहाड़ी ही बेड़ा बारा बजे रहचा।
- 7-8 येसुसी चेलर ओन्ना-मोखना खेन्दा गे पद्दा नू केरका रहचर। आ बारी ओन्टा समारिया ता आली अम्मु ओन्द्र'आ बरचा। येसुस अदिन बाचस, “एंगा अम्मु ओना गे चिई।”
- 9 समारिया ता आली आसिन बाचा, “एन्द्रा! नीन यहूदी आलय, अरा ऐन गा समारिया ता आली। एकासे नीन एंग्हे गुसते ओना गे अम्मु ने'अदय?” (एन्देरगेका यहूदीर समारिया ता आलर गने मल ओक्कनर इज्जनर।) 10 येसुस अदिन आनाकिर्ताचस, “धर्मसी चि'अना इनामन अरा ने निंगन 'एंगा ओना गे अम्मु चिई' एन्ने ब'अदस, अदिन नीन अक्का होले, नीनिम एंग्हे गुसते अम्मु ने'ओय दने। अरा ऐन निंगा गे उज्जना चि'ऊ अम्मन चिच्का र'ओन दने।”
- 11 खने आ आली आसिन बाचा, “अना उर्बायो, निंग्हे गुसन अम्मु नीदा गे एन्द्रा हूँ मल्ला, अरा तूसा हूँ खोड़खा रई, होले उज्जना चि'ऊ अम्मु नीन एसले खक्खोय?”
- 12 नीन एम्हे पूरखस याकोबस ती हूँ कोहँस हिकदय का? आस एमा गे ई तूसन चिच्कादस। आस तान अरा तंग्हे खद्दर अरा ओय ऐड़ा गुट्ठी इय्या ती ओन्डर।”
- 13 येसुस बाचस, “ने ई अम्मन ओन्दस आस फेन ओनक'आ सार'ओस।
- 14 लिकिन ने एंग्हे चि'अना अम्मन ओन्दस आस फेन इकला हूँ ओनक'आ मल सार'ओस। एका अम्मन आस गे ऐन चि'अदन, आद आस नू ओन्टा पझरा फुटना ती जनमजुग उज्जनन चि'ओ।”
- 15 आ आली आसिन बाचा, “उर्बायो, आ अम्मन एंगा चि'आ का, ऐन ओनक'आ मल सार'ओन, अरा इसन एंगा अम्मु ओन्द्र'आ बर'आ गे मल लग्गो।”
- 16 येसुस अदिन बाचस, “कलय, निंग'आलासिन इसन मेखय ओन्द्र'अय।”
- 17 आ आली आनाकिर्ताचा, “एंग्हा मेतस मलकस।” येसुस अदिन बाचस, “ठउकम ब'अदी, बिगर मेत ही र'अदी।
- 18 निंगा गा पाँच गोटंग मेतर रहचर, लिकिन अक्कुन नीन नेख'आ गने उज्जालदिन आस हूँ निंग्हे मेतस मलदस। नीन एन्द्रन बाचकय आद मानिम हवे।”
- 19 आ आली बाचा, “उर्बायो! अक्कु ऐन अखदन का नीन ओन्टा धर्मसी कत्था तिगू हिकदय।



- 20 एम्है पूरखर गा ई परता नू धर्मसी महबा नंजर, अरा नीम यहूदीर ब'अदर का, धर्मसी महबा नन्ना अड्डा येरुसलेम नगरे लेका रई।”
- 21 येसुस अदिन बाचस, “अनय आली! एंग्हे कत्थन पत'अय, बेड़ा बर'आली, आ बारी नीम धर्म बंगासिन ई परता नू हूँ मला महले येरुसलेम नगरे नू हूँ मल महबा ननोर।
- 22 नीम समारिया ता आलर मानिम नू बलदर, नेकन महबा नन्दर, अरा ऐम यहूदीर अखदम, नेकन महबा नन्दम, एन्देरगेका नाइरना यहूदीर ती बर'ई।
- 23 लिकिन बेड़ा बर'आली, अरा अक्कुन बरचकी रई। मानी ती महबा ननू आलर, आ बारी तम्है बोलता गने अरा मानी जिया ती धर्म बंगासिन महबा ननोर। धर्म बंगस एन्नेम महबा ननुरिन बेद्ददस।
- 24 धर्मस बोलतस हिकदस, आँगे ने आसी महबा नन्नर, आर गे तम्है बोलता गने अरा मानी जिया ती आसी महबा नन्ना रई।”
- 25 आ आली येसुसिन बाचा, “ऐन अखदन का 'ख्रिसतोस' एन्ने बारना 'मसीस' बर'आ लगदस। आस बरदस खने, एमन उर्मी कत्थन फरीफरी तेंगोस चि'ओस।”
- 26 येसुस अदिन बाचस, “निंग्हे गने कछनखर'ऊ ऐन दिम आस हिकदन।”
- 27 आ बारिम आसी चेलर किरियर बरचर अरा आसिन ओन्टा आली गने कछनखनन ईरियर ती अनचकरर। अन्नु हूँ ने हूँ मल मेंजर का नीन एन्देर बेद्ददय? महले नीन ई आली गने एन्देरगे कछनखदय?
- 28 आ आली अम्मु कट्टुन अम्बिया ती पद्दा नू केरा ती आलारिन बाचा,
- 29 “बरा, एंग्हे नंजका उर्मी कत्थन एंगा तिका ओर्त आलासिन ऐरा! आस मसीस र'ओस दने का?”
- 30 खने आर पद्दा ती उरखर ती येसुस गुसन बर'आ हेलरर।
- 31 इदही मझी नू चेलर आसिन मेनालियर, “गुरु, आँदा कटइकेम मोखा।”
- 32 लिकिन येसुस आरिन बाचस, “एंग्हे गुसन मोखा गे ओन्ना-मोखना रई, अदही पत नू नीम बलदर।”
- 33 खने चेलर ताम तामिम कछनखर'आ हेलरर, “ईस गे नीकईम इन्द्रिइम ओन्ना-मोखना चिच्का र'ओर दने का?”
- 34 खने येसुस बाचस, “ने एंगन तइयकादस आसी मने लेक्खा नन्ना, अरा आसी नलखन मुंजना ईदिम एंग्हे ओन्ना-मोखना हवे।



- 35 नीम ब'आ आँगदर का, अक्कु खोया गे चार महिना गूटी रई। लिकिन ऐन निमन ब'अदन, खन्नन चलखा ती खल्ल गुट्ठिन ऐरा, अक्कुन अबड़ा खोया गे पंज खचकी रई।
- 36 एकासे खुयू आलस तंगहै भूतिन खक्खदस ती खेतिन सकल'अदस, अन्नेम धर्मसी नलख ननुस जनमजुग उज्जना गे आलारिन सकल'अदस। आँगे चाँख'उस अरा खुयुस संगे मेस'ओर ती खुसमार'ओर।
- 37 इसन ई ब'अना ठौका जोक्खा उक्की, 'ओरत आलस चाँखदस अरा नन्ना आलस खोयदस।'
- 38 एका अइय्या नीम मल चाँखकर, अइय्या ऐन निमन खोया गे तइय्कन। नन्नर अइय्या तम्है नलखन नंज खच्चिकाचर, अरा आर ही अर्जाचका खंजपन नीम खोय'ओर।”
- 39 एंगहै नंजका उर्मी कत्थन आस एंगा तिग्गियस, एन्ने आ आली चिच्का गोवाह ती, आ पद्दा ता बग्गे समारिया ता आलर येसुसिन पत्ताचर।
- 40 समारिया ता आलर आसी गुसन बरचर खने, आर आसिन तम्है गुसन र'आ गे गोहरारर। खने आस असन ऐंड उल्ला रहचस।
- 41 देर बग्गे आलर आसी कत्थन मैजर ती आसिन पत्ताचर।
- 42 अरा आर आ आलिन बाचर, “ऐम आसिन पत्ताचकम, निंगहै बाचका ती लेका मला, अक्कुन ऐमिम मैजकम अरा अक्कम होच्चकम मानिम नू ईसिम गोट्टा खेखेल ही नाडुस हिकदस।”
- 43 ऐंड उल्ला खोखा येसुस असले गलिलेया केरस।
- 44 (येसुस तानिम बाचकाचस का धर्मसी कत्था तिगुस तंगहै पद्दा नू मान मरजात मल खक्खदस।) 45 आस गलिलेया नू बरचस खने, गलिलेया ता आलर आसिन परघाचर। एन्देरगेका आर कट्टना परब नू येरुसलेम नू रहचकाचर, अरा येसुस अइय्या नंजका उर्मिन ईरका रहचर।
- 46 फेन आँगहोल येसुस गलिलेया ही काना पद्दा केरस, एसन आस अम्मन अंगुर रासी कमचका रहचस। असन बेलासी ओन्टा मुध आलस रहचस, आसी तंगदस कफरनहूम नगरे नू बेमार खत्रकाचस।
- 47 येसुस यूदेया ती गलिलेया बरचकादस एन्ने आस मैजस खने, आसी गुसन केरस ती गोहरारस का नीन बर'अरकी एंगदासिन कोड़े नना, आस खे'आ बिददियस।
- 48 खने येसुस आसिन बाचस, “नीम गा चिन्हा अरा अजगुत नलख गुट्ठिन बिगर ईरका इक्ला हूँ मल पत्त'ओर।”
- 49 खने आ बेलासी मुध आलस येसुसिन बाचस, “उर्बायो, एंगदासी खे'अना ती मुन्द बरा।”



50 येसुस आसिन बाचस, “कला, निंग्दस उज्जोस।” आ आलस येसुसी कत्थन पत्ताचस ती किरिम बिच्चियस।

51 आस डहरेनुम रहचस खनेम, आसी जोंखर आसिन भेंट मंजर ती बाचर, “निंग्दस कोड़े र'अदस।”

52 आस आरिन मँजस, “आस एकाबारी कोड़े मना हेल्सरस।” आर बाचर, “चेरो लोहाड़ी ओन बजे आसी नड़ी तम्मिया केरा।”

53 खने तम्बस अक्खस का आ बारिम येसुस आसिन बाचकाचस, “निंग्हे खद्दस उज्जोस।” अरा आस अरा आसी उर्मी एड़पातर येसुसिन पत्ताचस।

54 ईद येसुस यूदेया ती गलिलेया बरचका खोखा आस नंजका दोसर अजगुत नलख ही चिन्हा रहचा।

योहनस 5

1 इबड़ा ही खोखा येसुस यहूदीर ही ओन्टा परब नू येरुसलेम केरस।

2 येरुसलेम नू भेन्डो बकड़े गुसन ओन्टा पोखारी रहचा, अदिन इब्रानी भखा नू “बेतसता” ब'अनर। अदही ओनबेंडर'आ पाँच गोटा झला रहचा।

3 इबड़ा नू ढेर बग्गे रोगियर अन्धहा, लेंगड़ा, खेड्डे-खेक्खा खड़का आलर बिड़िरका रहचर। [अरा अम्मु ही नुक्रनन पाब ऐरा लगियर।

4 एन्देरगेका बेड़ा बेड़ा नू उर्बासी पैकस पोखारी नू एता लगियस ती अम्मुन नुक'आ लगियस, अम्मु नुक्रना गनेम ने मुन्द आ पोखारी नू एता लगियस, आस इन्द्रिइम रोगे र'ओस होले हूँ कोड़े मना लगियर।]

5 असन ओन्टा आलस बिड़िरका रहचस। आस अड़तिस बछर ती बेमार रहचस।

6 येसुस आसिन बिड़िरका ईरियस, अरा नगदे उल्ला ती एन्ने बिड़िरका दसन अक्खस ती, आसिन मँजस, “नीन कोड़े मना बेद्ददय का?”

7 रोगे आलस बाचस, “उर्बायो, अम्मु नुक्र'ओ खने, एंगन पोखारी नू एता'आ गे ने हूँ मल्कर। एंग्हे अंइसना ती मुन्द दिम नन्नर एतनर कानर।”

8 खने येसुस आसिन बाचस, “चो'आ, अरा निंग्हे पिटरिन चोद'आ ती ऐका।”

9 आ बारिम आ आलस कोड़े मंजस केरस, अरा तंग्हे पिटरिन होच्चस ती कुद्दा नुंगा हेल्सरस। लिकिन ईद मंजका उल्ला खन्न ऐखना उल्ला रहचा।



- 10 औंगे कोड़े मंजका आलासिन यहूदी मुद्धर बाचर, “इन्ना खन्न ऐखना उल्ला, औंगे नेग ही लेक्खा निंगा पिटरिन चोदना ती काना ठौका मल्ली।”
- 11 लिकिन आस आरिन बाचस, “ने एंगन कोड़े नंजस आस बाचस, ‘निंगहै पिटरिन चोद'आ ती ऐका।’ “
- 12 खने आर आसिन मेंजर, “ ‘निंगहै पिटरिन चोद'आ ती ऐका’ एन्ने निंगन बाचस, आस ने हिके?”
- 13 कोड़े मंजका आलस बल्ला लगियस का आस ने हिकदस। एन्देगेका असला आलर ही गोंहड़ा ही मारे येसुस असले गुच्छरका केरकाचस।
- 14 खोखा येसुस आ आलासिन धर्मसी मन्दिर नू खक्खियस ती आसिन बाचस, “ऐरा, नीन कोड़े मंजकादय, अउरिम पाप अमके नना। महले इन्द्रइम कोड़े खिलपत निंगा मना औंगी।”
- 15 आ आलस केरस ती यहूदी मुद्धारिन तिगियस का एंगन कोड़े नंजस आस येसुस हिकदस।
- 16 इबड़ा नलख गुठिन येसुस खन्न ऐखना उल्ला नू नंजका ती, यहूदी मुद्धर आसिन डाहा हेलरर।
- 17 लिकिन येसुस आरिन बाचस, “एम्बस इन्ना गूटी बिगर खन्न ऐखका ती नलख नना लगदस, अरा ऐन हूँ नलख नना लगदन।”
- 18 औंगे यहूदीर आसिन पिटा गे अउर कोड़े बेद्दा लगियर का आस खन्न ऐखना उल्ला ही नेगन लेका मल चाड़ा लगियस, लिकिन धर्मसिन तंगहै बंगस ब'आलियस ती तंगन धर्मसी जोक्खा ननालियस।
- 19 औंगे येसुस आरिन इदन फरीफरी तिगियस, “ऐन निमन मानिम ब'अदन, ऐन धर्मसी खददन एंगहै मने लेक्खा एन्द्रा हूँ नना पोलदन। एन्द्रन एम्बासी नन्नन ऐन ऐरदन अदिन लेका ऐन नन्दन। एन्द्रन एन्द्रन एम्बस नन्दस अदिन ऐन हूँ अन्नेम नन्दन।
- 20 एम्बस गा एंगन चोन्हा नन्दस, अरा आस एन्दे एन्दे नन्दस अबड़ा उर्मिन एंगा ऐददस। आस इबड़ा ती अउर कोहाँ नलख गुठिन हूँ एंगा ऐद'ओस। होले नीम अनचकर'ओर।
- 21 एकन्ने एम्बस केचका आलारिन चोददस ती आर गे उज्जना चि'अदस, अन्नेम ऐन हूँ नेकन ऐन बेदददन आर गे उज्जना चि'अदन।
- 22 एम्बस नेकन हूँ नैवई मल नन्दस, लिकिन नैवई नन्ना ही उर्मी अदियन एंगा सोंपचकादस।



- 23 औंगे ओर्मा आलर एकासे धर्मे बंगासिन मईन नन्नर, अन्नेम धर्मेसी खद्दस एंगन हूँ मईन नना गे एन्ने नंजस। ने एंगन मईन मल नन्दस, आस एंगन तइय्का धर्मे बंगासिन हूँ मईन मल नन्दस।
- 24 ऐन निमन मानिम ब'अदन, ने एंगहै कत्थन मेन्नर ती एंगन तइय्का धर्मेसिन पत्त'अनर, आर जनमजुग उज्जनन खक्खकानर। आर गे दंडे ही पेसका इकला हूँ मल मनो। आर खे'अना ती कट्टियर अरा उज्जना नू कोरच खच्चकानर।
- 25 ऐन निमन मानिम ब'अदन, बेड़ा बर'आ लगी, अरा आद अक्कुन बरचकी रई। आ बेड़ा नू बोलता नू केचका आलर ऐन धर्मेसी खद्दन ही सइन मेनोर। अरा अदन ने मेनोर आर उज्जोर।
- 26 धर्मे बंगस गे उज्जनन चि'अना सवंग रई, अरा आस आ उज्जना चि'अना सवंगन आसी खद्दन एंगा चिच्कादस।
- 27 अरा आस एंगा आलारिन नैवई नना गे अदिया हूँ चिच्कादस, एन्देरगेका ऐन मनवा खद्दन हिकदन।
- 28 इदही पत्त नू अमा हैकटर'आ, एन्देरगेका बेड़ा बर'आ लगी, केचका ओर्मा आलर एंगहै सइन मेनोर।
- 29 अरा आर उज्जा चो'ओर। दौ नलख नंजका आलर जनमजुग उज्जनन खक्खा गे उज्जा चो'ओर, अरा मलदौ नलख नंजका आलर दंडे खक्खा गे उज्जा चो'ओर।
- 30 ऐन एंगहै मने लेक्खा एन्देर हूँ नना पोलदन। धर्मे बंगस ब'अना लेक्खम दिम ऐन नैवई नन्दन। अरा एंगहै नैवई नन्ना उजगो रई, एन्देरगेका ऐन एंगा पत्तार'आ गे मला, एंगन तइय्का एम्बासिन पत्तार'आ गे बेद्दन।
- 31 ऐन ऐनिम एंगहै पत्त नू गोवाह चि'अदन होले, एंगहै गोवाह ही मोल मल मनी।
- 32 एंगहै पत्त नू गोवाह चि'उस अउर ओर्तस र'अदस। अरा ऐन अखदन का एंगहै पत्त ता आसी गोवाह ठउकम रई।
- 33 नीम योहन नूइरत'उस गुसन मेना गे आलारिन तइय्कर, अरा आस एंगहै पत्त नू चिच्का गोवाह मानी हवे।
- 34-35 योहनस गा लघरना अरा बिलचना कन्डेल लेक्खा रहचस, अरा नीम जोक्क उल्ला आसी बिल्ली नू रिरयार'आ बेद्दा लिक्कर। एंगा आलासी गोवाह ही चाड़ मल मनी। लिकिन नीम नाइर'आ गे दिम ऐन इबड़ा कत्थन तैगदन।



- 36 एंगा योहनसी गोवाह ती कोहाँ गोवाह एंग्हे सिखाब'अना अरा एंग्हे हैकट नलख हवे। धर्मे बंगस इबड़ा नलखन नन्ना ती मुंजा गे एंगा चिच्चस, अरा अबड़ा पुरुब नन्ती का आस एंगन तइय्कादस।
- 37 एंगन तइय्का धर्मे बंबस हूँ तानिम एंग्हे पत्त नू गोवाह चिच्कादस। नीम इकला हूँ आसी सइन मल मेंजकादर महले आसी मुहिन मल ईरकादर।
- 38 अरा नीम आसी कत्थन निम्है जिया नू मल उइय्दर, एन्देरगेका आस निम्है गुसन तइय्का एंगन मल पत्त'अदर।
- 39 नीम नेम्हा पुथी ही कत्था गुट्ठिन चिहूंक ती पढ़'आ, एन्देरगेका अबड़ा नू ती जनमजुग उज्जनन खक्खोर एन्ने सोचदर। अबड़ा दिम एंग्हे पत्त नू गोवाह चिई।
- 40 अन्नु हूँ आ उज्जनन खक्खा गे नीम एंग्हे गुसन मल बरदर।
- 41 ऐन आलर ती बरना ओहमन मल बेद्ददन।
- 42 एन्देरगेका ऐन निम्है पत्त नू अखदन का निम्है नू धर्मेसी चोन्हा मल र'ई।
- 43 ऐन एम्बासी नामे ती बरचकादन, लिकिन नीम एंगन मल इंझरदर। नन्नस ओर्तस तंग्हे नामे ती बरदस होले, आसिन नीम इंझर'ओर।
- 44 नीम गा निम्है नू ओर्त ओर्तोस ती ओहमन खक्खा गे बेद्ददर। लिकिन नीम ओर्त लेका धर्मेस ती बरना ओहमन खक्खा गे मल बेद्ददर। होले नीम एकासे पत्त'आ ऑंगोर?
- 45 धर्मे बंगस गुसन ऐन निमन बदी ननोन एन्ने अमके सोच'आ। नीम असरा ननू मूसस दिम निमन बदी ननोस।
- 46 नीम मूसासिन मानिम नू पत्त'अदर होले, नीम एंगन हूँ पत्त'ओर दने, एन्देरगेका आस एंग्हे पत्त नू लिखचकादस।
- 47 लिकिन नीम आस एन्देर लिखचकादस अदिन मल पत्त'अदर होले, ऐन एन्देर ब'अदन अदिन एकासे पत्त'ओर?"

योहनस 6

- 1 इबड़ा ही खोखा येसुस गलिलेया समुदर आ फड़ा केरस, अदिन तिबेरया समुदर हूँ ब'अनर।
- 2 ओन्टा कोहाँ गोंहड़ा आसी खोखा कालिया, एन्देरगेका आस रोगियारिन कोड़े नंजस ती अजगुत नलख ही चिन्हा ऐदकाचस, अदिन आर ईरका रहचर।



- 3 खने येसुस परता मइय्याँ अरगियस ती तंगहै चेलर गने उक्कियस केरस।
- 4 यहूदीर ही कट्टना परब हेद्दे अंडसकी रहचा।
- 5 येसुस मेन ईरियस ती तंगहै गुसन जतरा लेक्खा आलारिन बरना ईरियस ती फिलिप्पोसिन बाचस, “ईरिन ओन्त'आ मोखत'आ गे एस्तेक असमा खेन्दा ओंगोत?”
- 6 आस गा फिलिप्पोसिन बिद्ध'आ गे एन्ने बाचस, एन्देरगेका तान एन्देर नना कादन अदिन अक्खस।
- 7 फिलिप्पोस आसिन आनाकिर्ताचस, “आठ महिना नलख ही भूती ती असमा खेन्दोम होले हूँ इव्दा आलर गे कटी कटी हूँ मल मनो।”
- 8 आसी चेलर ती ओर्तोस, सिमोन पतरसी भइय्योस अन्द्रेयस आसिन बाचस,
- 9 “इसन ओन्टे सन्नी खद्दस र'अस, आसी गुसन पाँच गोटंग बजरा ही असमा अरा दुई गोटंग इंजो र'ई। लिकिन इव्दा जतरा आलर गे आद एव्दा मनो?”
- 10 येसुस आरिन बाचस, “आलारिन ओक्त'आ चि'आ।” असन नगदे लट्टी रहचा, अइय्या आलर उक्कियर केरर। मेतर लेका पाँच हजार केम रहचर।
- 11 खने येसुस असमन होच्चस, अरा धर्मेसिन धन्यवाद नंजस, अरा असन उक्का आलर गे खट्टियस, अरा अन्नेम इंजोन हूँ खट्टियस। अरा आर ओर्मर एव्दा चाइ रहचा अवंदा मोक्खर।
- 12 आर उइचर केरर खने, आस चेलारिन बाचस, “बछ्का कुटकन सकल'आ का ओन्टा हूँ अम्बो नठार'आ।”
- 13 खने आर मोक्का ती एंगेरका पाँच गोटा बजरा ही असमा ही कुटकन खोंइचर, खने बारा गोटंग डउड़ा निंदिया।
- 14 येसुसी ई अजगुत नलख ही चिन्हन ईरियर खने, आर ब'आ हेलरर, “मानिम ईस खेखेल नू बर'ऊ रहचस आ धर्मेसी कत्था तिंगुस हिकदस।”
- 15 खने येसुस अक्खस का ईर बइपेलहा ती तंगन आर ही बेल कम'आ गे सपड़ारका र'अनर। खने आस ओर्तेलेका परता नू गुच्छरस केरस।
- 16 पुत्तिया खने येसुसी चेलर परता ती इतियर ती समुदर ही पिंडी नू केरर।
- 17 अक्कुन ऊंखिया केरा, अन्नु हूँ येसुस आर ही गुसन मल बरचका रहचस। आर ओन्टा डोंगा नू अरगियर ती कफरनहूम नगरे तरा काला गे समुदरन कट्टा हेलरर।
- 18 ई बेड़ा नू समुदर हलकार'आ हेलरा, एन्देरगेका ताका जोर ती तागर'आ लगिया।



- 19 आर तीन चार कौंस चलनुम केरर खने, आर येसुसिन समुदर नू ईकनुम डोंगा गुसन बरनन ईरियर, अरा इल्चियर केरर।
- 20 लिकिन येसुस आरिन बाचस, “अमा एल्चा, ऐन हिकदन।”
- 21 खने आर आसिन डोंगा नू अरग'आ बेद्दा लगियर, अरा लेम एक्सन काला लगियर असन धरी नू डोंगा अंडसिया केरा।
- 22 दोसर उल्ला ने समुदर आ फड़ा रहचर, आर अक्खर का असन ओन्टे लेका डोंगा रहचा, अरा येसुस आ डोंगा नू मल अरगकाचस, आसी चेलर ताम लेका किरिम बिच्चकाचर।
- 23 फेन तिबेरया ती जोक्को डोंगा गुट्ठी, उर्बस धन्यवाद नंजस ती असमन आलर गे खट्टका अड्डा हेद्दे बरचकी रहचा।
- 24 खने आ आलर ईरियर का इसन येसुस हूँ मलकस अरा आसी चेलर हूँ मलकर खने, आर डोंगा गुट्ठी नू अरगियर ती येसुसिन बिदनुम कफरनहूम तरा केरर।
- 25 अबड़र समुदर ही आ फड़ा येसुसिन खक्खियर ती आसिन मेंजर, “अना गुरु! नीन इसन एकाबारी बरचकय?”
- 26 येसुस आनाकिर्ताचस, “ऐन निमन मानिम ब'अदन, नीम अजगुत नलख ही चिन्हन ईरका ती मला, लिकिन नीम उडुच लिंघ'आ असमा मोक्का चड्डे नीम एंगन बेद्ददर।
- 27 नठारना ओन्ना-मोखना गे अमा अर्ज'आ। लिकिन जनमजुग उज्जनन चि'ऊ ओन्ना-मोखना गे अर्ज'आ। ई ओन्ना-मोखनन मनवा खद्दन ऐन चि'ओन, एन्देरगेका धर्मे बंगस एन्ने नन्ना ही अदियन एंगा चिच्कादस।”
- 28 अबड़र आसिन बाचर, “एन्देर एन्देर ऐम नना गे धर्मेस बेद्ददस?”
- 29 येसुस आनाकिर्ताचस, “ई ओन्टा नलखन दिम नीम नना गे धर्मेस बेद्ददस का, नेकन आस तड्यकादस आसिन पत्त'आ।”
- 30 खने आ आलर आसिन मेंजर, “होले नीन एमा एका अजगुत नलख ही चिन्हन ऐद'ओय का अदिन ऐम ऐरोम ती निंगन पत्त'आ ओंगदम? नीन एन्देर ननोय?”
- 31 नम्है पूरखर टोडंग नू मन्ना मोक्काचर। नेम्हा पुथी नू एन्ने लिखकी रई, ‘आस मोखा गे मेर्खा ती आर गे असमा चिच्चस’”
- 32 खने येसुस आरिन बाचस, “ऐन निमन मानिम ब'अदन, मूसस निमा मेर्खा ती असमा मल चिच्काचस। एम्बस दिम निमा मेर्खा ती मानिम असमन चि'अदस।



- 33 एन्देरगेका धर्मेसी असमा ईद हवे का, एकास मेर्खा ती इतियस ती खेखेल ता आलर गे उज्जना चि'अदस।”
- 34 खने अबड़र येसुसिन बाचर, “अना उर्बायो, उर्मी उल्ला ई असमन एमा चि'आ।”
- 35 येसुस आरिन बाचस, “ऐन दिम उज्जना चि'ऊ असमा हिकदन। ने एंग्हे गुसन बरदस आस इकला हूँ कीड़ा मल सार'ओस, अरा ने एंगन पत्त'अदस आस इकला हूँ ओनक'आ मल सार'ओर।
- 36 ऐन निमन मुन्द तिंकादन का नीम एंगन ईरकादर, अन्नु हूँ एंगन मल पत्त'अदर।
- 37 बंगस नेकन एंगा चि'अदस, अबड़र ओर्मर एंग्हे गुसन बर'ओर, अरा ने एंग्हे गुसन बरदस आसिन इकला हूँ ऐन मल दुस'ओन।
- 38 एन्देरगेका ऐन एंग्हे मनेन नना गे मला, लिकिन एंगन तइय्का धर्मेसी मनेन नना गे मेर्खा ती इतकादन।
- 39 अरा एंगन तइय्का धर्मेसी मने ईद र'ई का, एवंदा आलारिन आस एंगा चिचकादस, आरिन ती नेकन हूँ मल एबस'ओन, लिकिन छेद्दे उल्ला नू आरिन उज्जा चोद'ओन।
- 40 अरा एम्बासी मने ईद र'ई का, ने ने आसी खद्दन एंगन ईरका ती एंगा नू पत्त'अदर, आर गे जनमजुग उज्जना खक्ख'ओ, अरा छेद्दे उल्ला नू आरिन उज्जा चोद'ओन।”
- 41 फेन यहूदीर आसी मइय्याँ कुड़कुड़र'आ हेलरर। एन्देरगेका येसुस “ऐन दिम मेर्खा ती इतका असमा हिकदन” एन्ने बाचस।
- 42 अरा आर ब'आ लगियर, “ईस गा येसुस, योसेफसी तंगदस, ईसी तंग्यो तम्बन नाम अखदत, होले अक्कु ईस एकासे ब'अदस, ‘ऐन मेर्खा ती इतका हिकदन?’ “
- 43 येसुस आरिन आनाकिर्ताचस, “नीम निम्है नू अमा कुड़कुड़र'आ।
- 44 एंगन तइय्का बंगस ओर्तोसिन एंग्हे गुसन मल नतगदस होले, ने हूँ एंग्हे गुसन बर'आ पोल्लनर, अरा ऐन छेद्दे उल्ला नू आरिन उज्जा चोद'ओन।
- 45 धर्मेसी कत्था तिंगुर ती नेम्हा पुथी नू लिखकी र'ई, ‘आर ओर्मर धर्मेस ती सिखाबाचका र'ओर।’ अन्नेम ने बंगासिन मँजका ती आस ती सिखर, आर ओर्मर एंग्हे गुसन बर'ओर।
- 46 ने धर्मेस तरती बरचकादस, आसिन अम्बरकी ने हूँ बंगासिन मल ईरका र'अनर।
- 47 ऐन निमन मानिम ब'अदन, ने पत्त'अदस आस गे जनमजुग उज्जना र'ई।
- 48 ऐन दिम उज्जना चि'ऊ असमा हिकदन।



- 49निम्है पूरखर टोडंग नू मन्ना मोक्खर, अन्नु हूँ आर केचर केरर।
- 50ईद मेर्खा ती इतका असमा हवे। एकास इदन मोखदस, आस इकला हूँ मल खे'अदस।
- 51मेर्खा ती इतका उज्जना चि'ऊ असमा ऐन हिकदन। नेकईम ई असमन मोखदस होले, आस उमी उल्ला उज्जोस। अरा ई असमा एंगहै अहड़ा हवे। इदन ऐन खेखेल ता आलर ही उज्जना गे चि'ओन।”
- 52तहाँ यहूदीर ताम तामिम अरबानख'आ हेलरर, “ई आलस तंगहै अहड़न एकासे नमा मोखा गे चि'आ ओंगदस।”
- 53खने येसुस आरिन बाचस, “ऐन निमन मानिम ब'अदन, नीम ऐन मनवा खद्दासी अहड़न मल मोखदर अरा एंगहै खेंसन मल ओन्दर होले, निम्है नू मानिम उज्जना मल र'ओ।
- 54ने एंगहै अहड़न मोखदस, अरा एंगहै खेंसन ओन्दस, आस गे जनमजुग उज्जना र'ई, अरा छेद्दे उल्ला आसिन फेन उज्जा चोद'ओन।
- 55एन्देरगेका एंगहै अहड़ा अरा एंगहै खेंस मानी ओन्ना-मोखना हवे।
- 56ने एंगहै अहड़न मोखदस अरा एंगहै खेंसन ओन्दस, आस एंगहै नू र'अदस अरा ऐन आस नू र'अदन।
- 57उज्जना चि'ऊ बंगस एंगन तइय्कादस, अरा बंगासी चड्डे दिम ऐन उज्जदन। अन्नेम ने एंगन मोखदस, आस गे एंगहै ती उज्जना खक्ख'ओ।
- 58ईदिम मेर्खा ती इतका असमा हवे। ईद आ असमा लेक्खा मल्ली, एकदन निम्है पूरखर मोक्काचर। आर गा केचर केरर, लिकिन ने ई असमन मोखोस, आस जनमजुग उज्जोस।”
- 59इबड़ा कत्थन कफरनहूम नू येसुस गोड़हा एड़पा नू सिखाब'आ लगियस खने बाचस।
- 60इदन मेंजर ती आसी बग्गे चेलर बाचर, “ई सिखाब'अना बुझुर'आ गे नगदे मसकिल र'ई, एकासे ओर्तस इदन इंझ'आ ओंगदस?”
- 61येसुस तंगहै चेलर इदही पत्त नू कुड़कुड़'आ लगनर एन्ने अक्खस ती आरिन बाचस, “नीम ई कत्था ती भेंवार'आ लगदर का?
- 62मनवा खद्दन ऐन मुन्द रहचकन आ अड्डा नू होतारनन नीम ऐरोर होले, एकासे र'ओ! 63नेम्हा बोलतस दिम उज्जनन चि'अदस, आल सवंग ती ईद मना पुल्ली, एका कत्था गुट्ठी निमन तिंकन अबड़ा उज्जना चि'ऊ बोलतस ती हवे।



- 64 अन्नु हूँ निम्है नू जोक्कोर मल पत्ताअनर।” (येसुस गा ओर तिम अक्खस का अबड़र ती ने ने तंगन मल पत्ताचर अरा ने तंगहै बिड़दो पपहर गे संगे चिओस।)
- 65 फेन येसुस बाचस, “इदगेम ऐन निमन बाचकन का, बंगस ओर्तोसिन एंगहै गुसन बर'आ गे मल चिअदस होले, ने हूँ एंगहै गुसन बर'आ पोल्लनर।”
- 66 इदही खोखा येसुसी बग्गे चेलर पछली किरियर अरा आसी गने चोख्रनन अम्बियर।
- 67 ओंगे येसुस अबड़ा बरियो चेलर ती मेंजस, “नीम हूँ अम्बा बेद्दर का?”
- 68 सिमोन पतरस आसिन आनाकिर्ताचस, “उर्बायो, ऐम नेख'आ गुसन क'ओम? निंगहै गुसन गा जनमजुग उज्जना ही कत्था गुट्ठी रई।
- 69 ऐम पत्ताअदम अरा अखदम का नीन धर्मसी नेम्हा आलय।”
- 70 फेन येसुस आरिन बाचस, “ऐन नीम बरियोरिन चज्जिकन, अन्नु हूँ निम्है ती ओर्तोस मलदौ आलस हिकदस।”
- 71 आस सिमोन इसकारियोतसी तंगदस यूदसी पत्ता नू एन्ने बाचस। आस अबड़ा बरियोर ती ओर्तोस रहचस, अन्नु हूँ आस दिम येसुसी बिड़दो नू पपहर गे संगे चिचस।

योहनस 7

- 1 इबड़ा ही खोखा येसुस गलिलेया नू धर्मसी कत्था तेंगा कुद्दा हेलेरस। आस यूदेया नू तेंगा कुद्दा मल बेद्दा लगियस, एन्देरगेका यहूदी मुद्धर आसिन पिटा गे बेद्दा लगियर।
- 2 अक्कु यहूदीर ही कुमबा परब हेद्दे अंडसकी रहचा।
- 3 ओंगे येसुसी भईर आसिन बाचर, ई अड्डन अम्बा ती यूदेया कला, होले नीन ननू निंगहै अजगुत नलखन असन निंगहै चेलर ऐरा ओंगोर।
- 4 ओर्तोस कोहाँ आल मना बेद्ददस होले, आस नूख्रना ती नलख मल ननोस। नीन एन्ने नलख गुट्ठिन नना लगदय होले, सौंसे खेखेल निंगहै पत्ता नू अख'आ नेकअन।
- 5 येसुसी भईर हूँ गा आसी मइय्याँ मल पत्ताचर।
- 6 खने येसुस आरिन बाचस, “अक्कुन गूटी एंगा गे ठौका बेड़ा मल अंडसकी रई, लिकिन उर्मी बेड़ा गा निमा ठौका रई।
- 7 ई सौंसार ही आलर निमन हींइ'आ पोलनर, लिकिन आर एंगन हींइ'नर, एन्देरगेका ऐन आरिन तेंगदन का आर मलदौ नलख गुट्ठी नन्नर।



- 8नीम ई परब नू कला। ऐन अक्कु ई परब नू मल कादन, एन्देरगेका अक्कुन गूटी एंगा गो ठौका बेड़ा मल अंडसकी रई।”
- 9येसुस इबड़ा कत्थन बाचस ती आस गलिलेया नू रहे केरस।
- 10लिकिन आसी भईर परब नू केरका खोखा येसुस हूँ केरस, लिकिन हरकटनुम मला नूखुर नूखुरनुम केरस।
- 11आ परब नू यहूदी मुद्धर आसिन बेद्दा लगियर अरा “आ आलस एसन?” एन्ने मेना लगियर।
- 12अरा गौहड़ा नू आलर ढेर कत्था आसी पत नू तम्है नू कले कले कछनख्र'आ लगियर। जोक्क आलर ब'आ लगियर, “आस दौ आलस”, लिकिन नन्नर ब'आ लगियर “मला, आस आलारिन भेवाब'अदस।”
- 13अन्नु हूँ यहूदी मुद्धर ही इलिच्च'आ ती ने हूँ आसी पत नू हरकट मल ब'आ लगियर।
- 14लिकिन परब ही मझी बेड़ा नू येसुस धर्मेसी मन्दिर ही चाली नू केरस ती सिखाब'आ हेलरस।
- 15खने यहूदीर हैकट मंजर ती ब'आ हेलरर, “ईस गो बिगर सिखिरकम इवंदा लूर एकासे बरचा?”
- 16खने येसुस आरिन आनाकिर्ताचस “एंगहै सिखाब'अना एंगहै मल्ली, ईद एंगन तइय्का धर्मेस ती बरई।
- 17नेकईम धर्मेसी मनेन नना बेद्ददस होले, आस ई सिखाब'अना ही पत नू अख'ओस का ईद धर्मेस तरती रई का महले ऐन एंगहै ती ब'अदन।
- 18ने तंगहै तरती ब'अदस आस तंगा गो मईन बेद्ददस। लिकिन ने तंगहै तइय्युस गो मईन बेद्ददस, आस मानिम जोगे आलस र'अस, अरा आस नू फंगटिया कत्था मलकी।
- 19मूसस निमा गो नेग चिच्चस, अन्नु हूँ निम्है नू ने हूँ नेग लेक्खा मल ऐकदर। होले एन्देरगे एंगन पिटा बेद्ददर?”
- 20खने खोंड़रका आलर आसिन बाचर, “नीन नाद रस्का आल हिकदय, ऐम निंगन पिटा मल बेद्ददम।”
- 21येसुस आरिन बाचस, “ऐन ओन्टा अजगुत नलख खन्न ऐख्रना उल्ला नू नंजकन, आद ती नीम हैकट मन्दर।
- 22मूसस निमन खतना नना गो पेसका चिच्का ती नीम खन्न ऐख्रना उल्ला नू हूँ खद्दासिन खतना नन्दर। लिकिन मानिम नू खतना ही पेसकन मूसस मल चिच्चस, ईद पुरखा बंगर ती बर'आ लगी।



- 23 मूसासी नेगन मल चाड़ा गे नीम खन्न ऐखना उल्ला नू हूँ खद्दासिन खतना नन्दर होले, ऐन ओर्तो आलासिन उर्मी मेदन खन्न ऐखना उल्ला नू कोड़े नंजकन खने, नीम एंगहै गने एन्देगे खीस मन्दर?
- 24 मुंही ऐरा ती नैवई अमा नना, लिकिन ठौका ठौका नैवई नना।”
- 25 तहाँ येरुसलेम नू र'ऊ जोक्का आलर ब'आ लगियर, “ई आलस आसिम मलदस का नेकन आर पिटा गे बेद्दा लगनर।
- 26 ऐरा! ईस गा हरकट कछनखदस, अरा आर ईसिन एन्दे हूँ मलम ब'अनर, एन्दे मानिम नू नम्है मुद्धर सोचनर का ईसिम मसीस?
- 27 लिकिन नाम ईसिन अखदत का ईस एस्तस। एकाबारी मसीस बर'ओस, आ बारी ने हूँ बल्लोर आस एस्तस।”
- 28 खने येसुस धर्मेसी मन्दिर नू सिखाब'अनुम रहचस ती जोर ती बाचस, “हाँ, एंगन नीम अखदर अरा इदिन हूँ अखदर ऐन एस्तन। लिकिन ऐन एंगहै मने ती मल बरचकन, एंगहै तइय्युस मानिम र'अस, आसिन नीम बलदर।
- 29 लिकिन ऐन आसिन अखदन, एन्देगेका ऐन आसी गुस्ते बरचकादन, अरा आसिम एंगन तइय्यस।”
- 30 तहाँ जोक्क आलर येसुसिन हें'आ बेद्द लगियर, लिकिन ने हूँ आसिन धर'आ गे मुन्द मल बरचर, एन्देगेका अक्कन गूटी आसी ठौका बेड़ा मल अंडसकीचा।
- 31 लिकिन खोंडरका आलर ती बग्गेर आसिन पत्ताचर। अरा अबडर बाचर, “मसीस बरदस खने, आस ई आलस नंजका ती कोड़े अजगुत नलख ननोस का?”
- 32 फरिसीर असन खोंडरका आलर आसी पत नू इबड़ा कत्थन टुरुफुसरनन मेंजर। खने मुध नैगर अरा फरिसीर जोक्क धर्मेसी मन्दिर खापू सैनारिन आसिन हें'आ गे तइय्यर।
- 33 येसुस बाचस, “ऐन जोक्क उल्ला लेका निम्है गने र'ओन, फेन एंगहै तइय्युस गुसन किरिम बि'ओन।
- 34 नीम एंगन बेद्दोर, लिकिन मल खक्खोर, अरा ऐन एसन र'अदन असन नीम बर'आ पोल्लोर।”
- 35 खने यहूदी मुद्धर ताम तामिम बाचर, “ईस एक्सन क'ओस, खने नाम ईसिन बेद्दा पोल्लोत? ईस नन्ना राजी गुट्ठी नू युनानीर मझी नू उज्जू नम्है आलर गुसन क'ओस ती युनानीरिन सिखाब'ओस का?



36. नीम एंगन बेददोर, लिकिन मल खक्खोर, अरा ऐन एसन र'अदन असन नीम बर'आ पोल्लोर' एन्ने ईस गा ब'अदस। इदही माने एन्देर?"
37. परब ही छेददे उल्ला मुध उल्ला नू येसुस इज्जस ती जोरसरिया बाचस, "नीकईम ओनक'आ सार'आ लगदर होले, एंगहै गुसन बरा ती ओना।
38. नेम्हा पुथी ब'अना लेक्खा एंगहै मइय्याँ पत'उसी जिया ती उज्जना चि'ऊ अम्मु खाइ लेक्खा बाह'ओ उरखो।"
39. तंगहै मइय्याँ पत'ऊ आलर खोखा खक्खना नेम्हा बोलतासी पत नू गा येसुस एन्ने बाचस। अक्कु गूटी नेम्हा बोलतस मल चीरकी रहचस, ईगोका येसुस अक्कु गूटी तंगहै महबा नू मल चोदकाचस।
40. खने इबड़ा कत्थन मेंजका ती गोंहड़ा ती जोक्कोर बाचर, "मानिम नू ई आलस बरना धर्मैसी कत्था तिगुस हिकदस।"
41. अरा नन्नर बाचर, "ईस मसीस हिकदस।" लिकिन अउर जोक्कोर बाचर, "मसीस गलिलेया ती मल बर'ओस।
42. नेम्हा पुथी एन्ने बई, 'मसीस दाऊद बेलासी खुटी ती बर'ओस, अरा दाऊद रहचका बेतलहेम पददा ती बर'ओस।"
43. खने येसुसी चड्डे गोंहड़ा केरेंग कोटेंग मंजा।
44. जोक्कोर आसिन हें'आ बेददा लगियर, लिकिन ने हूँ आसिन धर'आ गे मुन्द मल बरचर।
45. तहाँ धर्मैसी मन्दिर खापू सैनर मुध नैगर अरा फरिसीर गुसन बरचर खने, आर आरिन मेंजर, "नीम येसुसिन एन्देरगे मल ओन्द्रकर।"
46. धर्मैसी मन्दिर खापू सैनर आनाकिर्ताचर, "ने हूँ ई आलस लेक्खा एन्ने कछनरक्कन ऐम इकला हूँ मल मेंजकम!"
47. खने फरिसीर आरिन बाचर, "नीम हूँ ठगरकर केरकर का?
48. एकअम अक्स'उर महले फरिसीर आसिन पताचका र'अनर का?
49. लिकिन इबड़ा आलर गा नैगन बलनर अरा सरपारका आलर।"
50. निकोदेमोस ने मुन्द माखा बारी येसुस गुसन भेंट मंजचकाचस, अरा आर ही मधेतस रहचस। आस आरिन बाचस,



51 नम्हें नेग ओर्तोसिन आस ती बेगर मेंजका ती अरा आस एन्देर नंजकादस एन्ने बेगर अक्का ती आसिन नेंवई मल ननी।

52 खने आर आसिन आनाकिर्ताचर, “नीन हूँ गलिलेया ता आलय का? नेम्हा पुथिन पढ़अरकी ऐरा, खने अखओय कओय का गलिलेया ती धर्मसी कत्था तिगुस मल बरदस।”

[53 तहाँ ओर्मर तम्हें तम्हें एड़पा केरर।

योहनस 8

1 येसुस गा जैतून मन्न परता केरस।

2 अरा पैरी बारी आस धर्मसी मन्दिर चाली नू अउरिम बरचस। खने ओर्मा आलर आसी गुसन बरचर, अरा आस उक्कियस ती आरिन सिखाब'आ हेलरस।

3 आ बारी यहूदी नेग सिखाब'उर अरा फरिसीर नन्ना आलस गुसन काना पाप नू धरका ओन्टा मुक्कन अइय्या ओन्दर। अरा अदिन गोंहड़ा ही मुन्दहारे इजताचर।

4 अरा येसुसिन बाचर, “अना गुरु, ई आली नन्ना आलस गुसन काना पाप नन्नुम धरकी रई।

5 नेग नू मूसस नमन पेसकादस, एन्ने मुक्कारिन पखना ती लोड़ग'आ पिटा। अक्कु नीन एन्देर ब'अदय, ऐम एन्देर ननोम?”

6 अबड़र आसिन बिढ़'आ गे एन्ने मेना लगियर का आसी मइय्याँ इन्द्रिइम बदी नना गे अड्डा खक्खोर। लिकिन येसुस खोलखरस ती अंगली ती खेखेल नू लिख'आ हेलरस।

7 अरा आर आसिन मेन्ना बारी रहचर खने, आस चोचस ती बाचस, “निम्हें नू ने पाप मल्ला नंजका आर मुन्द लोड़ग'आ।”

8 अरा अउरिम आस खोलखरस ती खेखेल नू लिख'आ लगियस।

9 आर आसी ब'अनन मेंजर ती कोहाँ ती सन्नी ओर्त ओर्त गुच्छरर केरर। येसुस लेका असन रहचस, अरा आ मुक्का मझी नू इज्जकी रहचा।

10 तहाँ येसुस चोचस ती अदिन मेंजस, “अनय आली, अबड़र एंहाँ? ने हूँ निंगन दंडे ही नेंवई मल नंजर का?”

11 आद बाचा, “उर्बायो, ने हूँ मला।” तहाँ येसुस अदिन बाचस, “ऐन हूँ दंडे ही नेंवई मल नन्दन, कलय, अरा अक्कु ती पाप नन्नन अम्बय चिई।”]



- 12 तहाँ येसुस अउरिम आलर गने कछनख'आ हेलरस, अरा बाचस, “ऐन खेखेल ही बिल्ली हिकदन। एकास एंग्हे गने चोख्रदस आस इकला हूँ ऊखा नू मल र'ओर, लिकिन आस उज्जना चि'ऊ बिल्लिन खखोस।”
- 13 खने फरिसीर आसिन बाचर, “नीनिम निंग्हे पत नू गोवाह चि'अदय, होले निंग्हे गोवाह आबोन ऐम मल इङ्ग'आ ओंग्दम।”
- 14 खने येसुस आरिन बाचस, “ऐन ऐनिम एंग्हे पत नू गोवाह चि'चकन, अन्नु हूँ एंग्हे गोवाह मानिम र'ई, एन्दरगेका ऐन एस्ते बरचकन अरा एसन कादन ऐन अदिन अखदन। लिकिन नीम बलदर का ऐन एस्ते बरचकन महले एसन कादन।
- 15 नीम आलर नन्ना लेखा नैवई नन्दर, लिकिन ऐन गा नेख'आनिम नैवई मल नन्दन।
- 16 लिकिन ऐन नैवई ननोन होले, एंग्हे नैवई ठउकम र'ई, एन्दरगेका ऐन ओर्तेलेका ती नैवई मल नन्दन, एंगन तइय्का एम्बस हूँ एंग्हे गने र'अस।
- 17 निम्है नेग नू हूँ लिखकी र'ई 'दुई आलर ही गोवाह ओन्टेम उक्की होले, आद मानिम र'ई।’
- 18 ओन्टा गा ऐन एंग्हे पत नू गोवाह चि'अदन, अरा दोसर गा एंगन तइय्का एम्बस एंग्हे पत नू गोवाह चि'अदस।”
- 19 तहाँ आर येसुसिन मेंजर, “एसन र'अस निम्बस?” खने आस बाचस, “नीम ऐन ने हिकदन महले एम्बस ने हिकदस अदिन बलदर। लिकिन नीम एंगन अक्कर होले, एम्बासिन हूँ अख'ओर दने।”
- 20 येसुस धर्मसी मन्दिर नू सिखाब'अना बारी भंडार एडपा गुसन इज्जस ती इबड़ा कथन बाचस। लिकिन ने हूँ आसिन मल हेंचर, एन्दरगेका अक्कु गूटी आसी ठौका बेड़ा मल अंडसकी रहचा।
- 21 फेन येसुस अउरिम आरिन बाचस, “ऐन कादन अरा नीम एंगन बेद्दोर, अन्नु हूँ निम्है पाप गुट्ठी नू खे'ओर। एक्सन ऐन कादन असन नीम बर'आ पोल्लोर।”
- 22 ओंगे यहूदी मुद्धर मेंजर, “ईस तान तंगन पिटोस का? ओंगेम 'एक्सन ऐन कादन असन नीम बर'आ पोल्लोर' एन्ने ब'अदस का?”
- 23 येसुस अउरिम आरिन बाचस, “नीम किय्यातर, ऐन गा मइय्याँ ता हिकदन। नीम ई खेखेल ही हिकदर, ऐन गा ई खेखेल ही मलदन।
- 24 ओंगे नीम निम्है पाप गुट्ठी नू खे'ओर एन्ने ऐन बाचकन। ने बर'ऊ र'अस आस ऐनिम हिकदन एन्ने नीम मल पत'ओर होले, नीम निम्है पाप गुट्ठी नू खे'ओर।”



- 25 खने आर आसिन मेंजर, “नीन एका ओर्तय?” येसुस बाचस, “अदन दिम ऐन ओरे तिम निमा गे तिगनुम तिगनुम बरचकन।
- 26 ऐन निम्है पत नू तेंगा गे अरा नैवई नना गे ढेर कत्था रई। एंगन तइय्युस मानिम र'अदस, आस गुसते ऐन एन्दन मेंजकन अबड़ा कत्थन लेका खेखेल नू तेंगदन।”
- 27 तम्है बंगासी पत नू दिम आस तेंगा लगदस, एन्ने आर मल बुझर।
- 28 खने येसुस आरिन बाचस, “एकाबारी नीम मनवा खद्द एंगन मइय्याँ अरगत'ओर, आ बारी अख'ओर का ऐन आसिम हिकदन ने बर'ऊ रहचस। अरा ऐन ऐनिम एन्दर हूँ मल नन्दन, लिकिन एन्दन एम्बस एंगन सिखाबाचस, अदन दिम ऐन निमन ब'अदन एन्ने हूँ अख'ओर।
- 29 ने एंगन तइय्यस आस एंगहे गने र'अस। आस एंगन ओर्तेलेका मल्ला अम्बिका, एन्दरगेका एकदा आसिन खुसमारतई अदिनिम ऐन उर्मी उल्ला नन्दन।”
- 30 आस इबड़ा कत्था ही पत नू ब'आ लगियस खने, ढेर बग्गे आलर आसिन पताचर।
- 31 तहाँ येसुस तंगन पताचका अबड़ा यहूदीरिन बाचस, “नीम एंगहे कत्था नू बन्चका र'ओर होले, नीम मानिम नू एंगहे चेला मनोर।
- 32 अरा नीम मानिमन अख'ओर, अरा मानिम आबो निमन छछिन्द ननो।”
- 33 खने आर आसिन बाचर, “ऐम अब्राहमसी बनस ता हिकदम, ऐम इकला हूँ नेख'आ हूँ बिट्ठी ननू जौख मल रहचकम। अन्ने होले ऐम छछिन्द मनोम एन्ने नीन एकासे ब'आ ओंगदय?”
- 34 खने येसुस आरिन बाचस, “ऐन निमन मानिमन ब'अदन, ने पाप नन्नर आर पाप ही जौख र'अनर।
- 35 ओर्त बिट्ठी ननू जौखस गे ओन्टा एइपा नू उर्मी उल्ला अइडा मल र'ओ, लिकिन खद्दस गा उर्मी उल्ला आ एइपा ता दिम र'अदस।
- 36 ओंगे ऐन खद्दन निमन छछिन्द नन्दन होले, नीम मानिम नू छछिन्द मनोर।
- 37 ऐन अखदन का नीम अब्राहमसी बनस हिकदर, अन्नु हूँ नीम एंगन पिटा गे बेददर, एन्दरगेका नीम एंगहे सिखाब'अनन मल इंझर।
- 38 ऐन एम्बस गुसन रहचकन खने, एन्दरन ऐन ईरकादन, अबइन ऐन निमा तेंगदन। नीम निम्बस ती एन्दरन मेंजकादर अदिन नन्दर।”



- 39 खने आर बाचर, “अब्राहमस दिम एम्बस।” येसुस गा आरिन बाचस, “नीम मानिम नू अब्राहमसी खद्दर र'अदर होले, अब्राहमस एन्देर एन्देर नलख नंजस आ नलख गुट्ठिन ननोर दने।
- 40 लिकिन नीम गा एंगन पिटा बेद्दर, इगेका ऐन धर्मेस ती मेंजका मानिमन निमन तिकादन। अब्राहमस इकला हूँ एन्ने नलख मल नंजस।
- 41 नीम निम्है निम्बस नंजका नलखन दिम नना लगदर।” खने आर येसुसिन बाचर, “ऐम नन्ना आली गुसन काना ही पाप ती कुन्द्रका खद्दम मलदम। एम्है ओर्तेलेका एम्बस र'अस आस धर्मेस।”
- 42 खने येसुस आरिन बाचस, “मानिम नू धर्मेस निम्है बंगस रहचस होले, नीम एंगन हूँ चोन्हा ननोर दने, एन्देरगेका ऐन धर्मेस ती बरचका र'अदन, अरा अक्कु इसन र'अदन। ऐन एंगहै मने ती मल बरचकादन, धर्मेस दिम एंगन तइय्कादस।
- 43 ऐन एन्देर ब'अदन अदिन नीम एन्देरगे बुझुर'आ पोलदर? ईद ई चड्डे का एंगहै सिखाब'अनन नीम मल इङ्गदर।
- 44 नीम निम्है बंगस सैतान ही र'अदर। अरा निम्है बंगासी मने गुट्ठिन पूरा नना बेद्दर। आस गा ओरे तिम पिटू रहचस। आस नू मानी मलकी, औंगे मानी आस नू इज्जकी र'आ पोल्ला। आस ठक'ओ बारी आसी मानी सुबहा आबोन ऐद्दस, एन्देरगेका आस ठकवा हवदस, अरा ठकना गुट्ठी ही बंगस हवदस।
- 45 औंगे ऐन मानिमन ब'अना चड्डे, नीम एंगन मल पत्त'अदर।
- 46 ऐन पाप नंजकन एन्ने एंगहै मइय्याँ बदी नन्ना ती अदन पुरुब नना नीम ओंगदर का? ऐन मानिम तैगदन होले, नीम एन्देरगे एंगन मल पत्त'अदर?
- 47 एकास धर्मेसी आलस र'अदस, आस धर्मेसी कत्थन मेन्दस। नीम इदगे मल मेन्दर का नीम धर्मेसी आलर मलदर।”
- 48 तहाँ यहूदीर बाचर, “ऐम एन्देर ब'अदम आद मानिम हिके, नीन समारिया ता आलय हिकदय, अरा नीन नाद ती रस्का आलय हिकदय।”
- 49 खने येसुस बाचस, “ऐन नाद ती रस्का आलन मलदन। ऐन एम्बासिन मईन नन्दन, लिकिन नीम एंगन हींइदर।



- 50 ऐन एंगा गे मईन मल बेदददन, लिकिन एंगा गे अदन बिददू ओतोस र'अस, आसिम नैवई ननू र'अदस।
- 51 ऐन निमन मानिम ब'अदन, नेकईम एंगहै कथन पेसदस होले, आस इकला हूँ मल खे'ओस।”
- 52 खने यहूदीर आसिन बाचर, “ऐम अक्कुन अक्कम का नीन नाद ती रस्का आलय हिकदय। अब्राहमस केचस अरा धर्मसी कथा तिगुर हूँ केचर। लिकिन नीन ब'अदय का 'नेकईम एंगहै कथन पेसदस होले, आस इकला हूँ मल खे'ओस।”
- 53 नीन एम्है बंगस अब्राहमस ती कोहँस हिकदय का? आस केचस, अन्नेम धर्मसी कथा तिगुर हूँ केचर। नीन निंगन ने सोचदय?”
- 54 येसुस आनाकिर्ताचस, “ऐन ऐनिम एंगन मईन ननोन होले, एंगहै मईन एन्देर हूँ मल्ली। लिकिन एंगन मईन ननुस एम्बस हिकदस, अरा नीम ब'अदर आस निम्है धर्मस।
- 55 अरा नीम आसिन मानिम नू बलकर, लिकिन ऐन आसिन अखदन। अन्नु हूँ ऐन आसिन बलदन ब'ओन होले, ऐन हूँ निम्है लेकखा ठकवा मनोन। लिकिन ऐन आसिन अखदन, अरा आसी कथन पेसदन।
- 56 निम्है बंगस अब्राहमस एंगहै उल्लन ऐरा ओंगोन ब'अरकी नगदे खुसमारस, अरा आस अदन ईरियस ती रिझस।”
- 57 खने यहूदीर आसिन बाचर, “अक्कुन गा निंगहै पचास बछर हूँ अरगी मना, अन्नु हूँ नीन अब्राहमसिन ईरकादय का!”
- 58 येसुस बाचस, “ऐन निमन मानिम ब'अदन, अब्राहमस कुन्द्रस ती मुन्द तिम ऐन र'अदन।”
- 59 इदन मँजर ती आर आसिन लोङग'आ गे पखना गुट्ठी पत्तर। लिकिन येसुस नूखस ती धर्मसी मन्दिर ती गुच्छरस केरस।

योहनस 9

- 1 फेन येसुस कालो बारी ओन्टा आलासिन ईरियस, आस कुन्द्रका तिम अन्धहा रहचस।
- 2 अरा आसी चेलर येसुसिन मँजर, “अना गुरु, ने नंजका पाप ती ईस अन्धहा कुन्द्रस, ईसी पाप ती का महले ईसी अयंग-बंग ही पाप ती का?”
- 3 येसुस आरिन बाचस, “ईद ईसी पाप महले ईसी अयंग-बंग ही पाप ही चड्डे मला, लिकिन धर्मसी नलख गुट्ठी ईस नू दहदर मना गे ईद मंजा।



- 4 उल्ला उल्लम बारिम नाम एंग्हे तइय्युसी नलखन नन्ना रई। माखा बर'आ लगी, आ बारी ने हूँ एन्देर हूँ नना पोल्लोर।
- 5 ऐन खेखेल नूर'अना बारी ऐन खेखेल ही आलर गे बिल्ली र'अदन।”
- 6 इबड़न बाचस ती येसुस खेखेल नू तुप्पियस ती तुप्पलखो ती खज्जो सनचस, अरा आ खज्जोन आसी खन्न नू टुड़ियस।
- 7 अरा आसिन बाचस, “कला ती सिलोवम पोखारी नू नोंढरके।” (“सिलोवम” ही माने तइय्का हवे।) आस अन्नेम केरस ती नोंढरस अरा ईरनुम ती एडपा किरियस।
- 8 खने अरबर-परबर अरा अबड़ा आलर ने मुन्द आसी तेम्बनन ईरका रहचर, आर बाचर, “ईस आसिम मलदस का ने ओक्करकी तेम्बा लगियस?”
- 9 जोक्कोर ब'आ लगियर, “ईस आसिम हिकदस।” लिकिन नन्नर ब'आ लगियर, “मला, ईस आस लेक्खम ऐथ्रदस।” लिकिन आस गा बाचस, “ऐनिम आ आलस हिकदन।”
- 10 खने आर मैजर, “होले निंग्हे खन्न एकासे चलखरा?”
- 11 आस बाचस, “येसु एन्ने आर ती बारना ओन्टा आलस खज्जो सनचस ती एंग्हे खन्न नू टुड़ियस ती एंगन बाचस, ‘कला ती सिलोवम पोखारी नू नोंढरके।’ खने ऐन केरकन ती नोंढरकन अरा ऐरा हेलरकन।”
- 12 आर आसिन मैजर, “आ आलस एक्सन र'अस?” आस बाचस, “ऐन बलदन।”
- 13 तहाँ आर अन्धहा रहचका आ आलासिन फरिसीर गुसन ओन्द्रर।
- 14 एन्देरगेका इकला येसुस खज्जो सनचस ती आ आलासी खन्नन कोड़े नंजस, आ उल्ला खन्न ऐखना उल्ला रहचा।
- 15 खने फरिसीर हूँ आ आलासिन मैजर का आस एकासे ऐरा उंगियस। खने आस आरिन बाचस, “आस एंग्हे खन्न नू खज्जो टुड़ियस, ऐन नोंढरकन अरा अक्कुन ऐरा ओंग्दन।”
- 16 तहाँ फरिसीर ती जोक्कोर बाचर, “ईस धर्मेस तरती मलकस, एन्देरगेका ईस खन्न एखना उल्ला ही नेगन मल मनदस।” लिकिन नन्नर बाचर, “ओर्त पपहा आलस एकासे एन्ने लेक्खा अजगुत नलख ही चिन्हन नना ओंग्दस?” खने आर तम्हे नू खाडरर केरर।
- 17 ओंगे अबड़र आ आलासिन अउरिम मैजर, “आस निंग्हे खन्नन चलखस ती आसी पत्त नू नीन एन्देर ब'अदय?” खने आस बाचस, “आस ओन्टा धर्मेसी कत्था तिगुस।”



- 18अन्नु हूँ यहूदी मुद्धार पत्ता पोल्ला लगियर का आस अन्धहा रहचस अरा अक्कु ऐरा आंगदस। आंगे आर आसी तंग्यो तम्बन मीखियर।
- 19अरा आर आरिन मैजर, “ईस निंगदस का? नैकन नीम ब'अदर का अन्धहा कुन्द्रका रहचस? होले अक्कु ईस एकासे ऐरा आंगदस?”
- 20आसी तंग्यो तम्बा बाचर, “ऐम अखदम का ईस एंगदस अरा अन्धहा कुन्द्रका रहचस।
- 21लिकिन अक्कु ईस एकासे ऐरा आंगदस, अरा ने ईसी खन्नन कोड़े नंजा अदिन ऐम बलदम। आस चेटगर र'अस, आसिनिम मेना, आस तंग्हे पत्त नू तेंगोस।”
- 22आसी तंग्यो तम्बा यहूदी मुद्धारिन इल्चका ती एन्ने बाचर, ईगेका यहूदी मुद्धार ताम मुन्द तिम सलहा नंजका रहचर का नीकईम येसुसिन मसी ब'ओर होले, आरिन गोइहा एइपा ती ओथ्र'ओम चि'ओम।
- 23आंगे आसी तंग्यो तम्बा बाचर, “आस चेटगर र'अस आसिनिम मेना।”
- 24फेन आर अन्धहा रहचस आसिन दोसर खेप हूँ मीखियर ती बाचर, “धर्मसी मुन्दहारे किरिया मोखा का नीन मानिम ब'अदय। ऐम अखदम का आस पपहा आलस।”
- 25खने आस बाचस, “आस पपहा र'अस का मला, ऐन बलदन। ऐन ओन्टे लेका कत्थन अखदन ऐन अन्धहा रहचकन अरा अक्कु ऐरा लगदन।”
- 26खने आर आसिन मैजर, “आस निंगा गे एन्देर नंजस? आस एकासे निंग्हे खन्नन कोड़े नंजस?”
- 27आस आरिन बाचस, “ऐन निमन मुन्द तिम तिका रहचकन, नीम मल मैजकर। अक्कु नीम फेन एन्देरगे मेना बेददर? नीम आसी चेला मना बेददर का?”
- 28खने आर आसिन हींइचर ती बाचर, “नीनिम आसी चेलय, ऐम गा मूसासी चेलम।
- 29ऐम अखदम का धर्मस मूसस गने कछनरस, लिकिन आ आलासी पत्त नू ऐम अख'आ हूँ बलदम का आस एस्ते बरचस।”
- 30आस आरिन बाचस, “निम्है ई कत्था गा हैकट कत्था हवे। आस एंग्हे खन्नन कोड़े नंजस, अन्नु हूँ नीम इदिन हूँ बलदर आस एस्तेक बरचस।
- 31ऐम अखदम का धर्मस पपहा आलर हीन मल मेन्दस। अरा आस तंग्हे भगततर हीन अरा आसी मने लेक्खा नलख ननुर हीन मेन्दस।
- 32खेखेल ही ओर ती ने हूँ इकला हूँ एन्ने मल्ला मेन्द्रका का नेकईम कुन्द्रका ती अन्धहा आलासिन कोड़े नंजस।



- 33 आस धर्मस तरती मल र'अना होले, आस एन्ने एन्देर हूँ नना पोल्लोस दने।”
- 34 अरा आर आसिन बाचर, “नीन गा कुन्द्रका तिम पपहा र'अदय। नीन एमन सिखाब'आ गे चिहुट नन्दय का?” अरा आर आसिन गोइहा एइपा ती ओथ्रर चिच्चर।
- 35 यहूदी मुद्धर आसिन गोइहा एइपा ती ओथ्रर चिच्चर एन्ने येसुस मेंजस। अरा येसुस आसिन खक्खियस खने, आसिन बाचस, “नीन मनवा खद्दस मइय्याँ पत्त'अदय का?”
- 36 आस मेंजस, “उर्बायो, एंगन तेंगा का आस ने तंगहै? खने आसी मइय्याँ ऐन पत्त'आ ओंग्दन।”
- 37 येसुस आसिन बाचस, “नीन आसिन ईरका र'अदय, अरा ने निंगहै गने कछनर'आ लगदस आसिम आस हिकदस।”
- 38 खने आस “उर्बायो! ऐन पत्त'अदन।” एन्ने बाचस ती आसिन ओइ लग्गियस।
- 39 तहाँ येसुस बाचस, “नेवई गे ऐन खेखेल नू बरचकन। खने ने अन्धहा र'अनर आर ऐरोर, अरा ने तमन ऐम ऐरदम एन्ने सोचनर, आर अन्धहा बार'ओर।”
- 40 जोक्क फरिसीर आसी गने रहचर, आर इदन मेंजर ती बाचर, “ऐम हूँ अन्धहा र'अदम का?”
- 41 येसुस आरिन बाचस, “नीम अन्धहा रहचकर होले, नीम पाप ही बदी नू मल र'ओर दने। लिकिन नीम ब'अदर का 'ऐम ऐरा ओंग्दम,' ओंगे निम्है पाप ही बदी निम्है मइय्याँ र'ई।”

योहनस 10

- 1 येसुस बाचस, “ऐन निमन मानिम ब'अदन, ने भेंडो गुदड़ी नू बली तरती मल कोरदस, लिकिन नन्ना तरती कोरदस, आस खलबस मलता बच्चुस हिकदस।
- 2 लिकिन ने बली ती कोरदस आस भेंडो ही महरस हिकदस।
- 3 आस गे बली खापुस बलिन तिसगदस चि'अदस। अरा आसी भेंडो आसी सइन मिनी। अरा आस तंगहै भेंडोन नामे पिंजदस ती मेखदस, अरा अबइन बहरी कइहाब'अदस।
- 4 आस तंगहै उर्मी भेंडोन बहरी ओन्द्रदस खने, आस अबड़ा ही मुन्द मुन्द ऐकदस, अरा अबड़ा आसी खोखा गुड़ियार'ई, एन्देरगेका अबड़ा आसी सइन ओखई।
- 5 लिकिन अबड़ा नन्नस गने इकला हूँ मल गुड़ियार'ओ। आस ती गेच्छा बोंगो, ईगेका अबड़ा नन्नासी सइन बल्ली।”
- 6 येसुस आलारिन ई खीरिन तिंगियस, लिकिन आर मल बुझर का आस आर गने एन्देर कत्थन कछनर'स।



- 7 औंगे येसुस अउरिम बाचस, “ऐन निमन मानिमन ब'अदन, ऐन भेंडो गे बली हिकदन।
- 8 एंग्हे ती मुन्द बरचकाचर, आर ओर्मर खलबर दरा बच्चुर र'अनर, लिकिन भेंडो आरहिन मल मँजा।
- 9 ऐन दिम बली हिकदन। ने एंग्हे नू मनरकी कोरदस, आस नाइर'ओस। अरा आस भितरी बहरी कोर'ओस उरखोस अरा आस बने ओन्ना-मोखना खक्खोस।
- 10 खलबस गा खइ'आ पिटा अरा नठाब'आ गे बरदस। लिकिन ऐन आर उज्जनन खक्खा गे अरा आ उज्जनन अख लगय खक्खा गे बरचकन।
- 11 ऐन दिम बेस महारा हिकदन। बेस महरस तंग्हे भेंडो गे तंग्हे जियन चि'अदस।
- 12 बनियहार आलस गा भेंडो गुट्ठी ही उर्बस मलदस। अरा आस भुसुइ बरनन एरदस खने, आस भेंडो गुट्ठिन अम्बदस ती बोंगदस कादस। खने भुसुइ अबइन बच्ची हुंई, अरा भिइकई चि'ई।
- 13 आस बनियहार आलस र'अना ती अरा भेंडो ही पत्त नू फिकिर मल र'अना ती बोंगदस कादस।
- 14_15 ऐन दिम बेस महारा हिकदन। एकासे बंगस एंगन अखदस अरा ऐन बंगासिन अखदन, अन्नेम ऐन एंग्हे भेंडोन अखदन अरा एंग्हे भेंडो एंगन अखई। ऐन भेंडो गुट्ठी गे एंग्हे जियन चि'अदन।
- 16 एंग्हे अउर हूँ भेंडो रई, अबड़ा ई गुहड़ी ता मल्ली। अबइन हूँ एंगा ओन्द्रना चाइ रई। अबड़ा एंग्हे सइन मेनो। खने ओन्टे गुहड़ी मनो अरा ओन्टे महरस मनोस।
- 17 बंगस इदगे एंगन चोन्हा नन्दस का ऐन एंग्हे जियन चि'अदन का ऐन अदिन फिन हो'आ ओंगदन।
- 18 अदिन ने हूँ एंग्हे गुसते मल हो'अदस। ऐन अदिन एंग्हे मने तिम चि'अदन। एंगा अदिन चि'आ गे हूँ अदिया रई, अरा अदिन फिन हो'आ गे हूँ अदिया रई। एम्बस एंगन पेंसका लेक्खा ऐन एन्नेम नन्दन।”
- 19 येसुसी इबड़ा कत्था चइडे यहूदीर नू फिन खाइरना मँजा।
- 20 आर ती नगदे आलर ब'आ लगियर, “आस नू नाद रस्सकी रई। आस बयहस, आसी कत्थन नीम एन्देगे मेन्दर?”
- 21 जोक्क आलर ब'आ लगियर, “इबड़ा कत्था नाद रस्सका आलासी मल्ली। नाद अन्धहा आलारिन कोड़े नना उंगी का?”
- 22 येरुसलेम नू बैजना परब मना लगिया। ईद पइय्याँ उल्ला रहचा।



- 23 अरा येसुस धर्मेसी मन्दिर नू सालोमोनसी परछी पिंडा ब'अनर अइय्या कुद्दा लगियस।
- 24 तहाँ यहूदीर आसी ओनबेडर'आ खोंडरर ती मेंजर, “नीन ऐ उल्ला गूटी एमन ओदहा नू उइय्योय? नीन मसी हिकदय होले, एमन फरी तेंगा चि'आ।”
- 25 खने येसुस आरिन बाचस, “ऐन निमन तिंकन, लिकिन नीम मल पत'अदर। एका नलखन ऐन एम्बस ही नामे ती नन्दन, आदिम एंग्हे पत नू गोवाह चि'ई।
- 26 लिकिन नीम मल पत'अदर, एन्देरगेका नीम एंग्हे भेंडो मलदर?
- 27 एंग्हे भेंडो एंग्हे सड़न मिनी। ऐन अबड़न अखदन, अरा अबड़ा एंग्हे गने गुड़ियार'ई।
- 28 अरा अबड़ा गे ऐन जनमजुग उज्जनन चि'अदन। अरा इकला हूँ अबड़ा मल नठार'ओ, अरा अबड़न ने हूँ एंग्हे खेक्खा ती बच्चा पोल्लोर।
- 29 एम्बस ने इबड़न एंगा चिचकादस, आस ओर्मर ती कोहाँ र'अस। अरा अबड़न ने हूँ एम्बासी खेक्खा ती बच्चा पोलदस।
- 30 ऐन दरा बंगस ओन्टे दिम हिकदम।”
- 31 फेनिम यहूदीर येसुसिन लोड़ग'आ पिटा गे पखना पेत्र।
- 32 लिकिन येसुस आरिन बाचस, “ऐन एम्बस तरती कैनो गोटंग कोइहे अजगुत नलख गुट्ठिन निमा गे ऐदकन। अबड़ा ती एका नलख गे नीम एंगन लोड़ग'आ बेद्ददर?”
- 33 खने यहूदीर आसिन बाचर, “ऐम निंगन निंग्हे इन्द्रिइम अजगुत नलख गे लोड़ग'आ पिटा मल बेद्ददम। नीन धर्मेसी निंदा नन्दय, नीन गा आलय हिकदय, अन्नु हूँ निंगन धर्मे ब'अदय, अदगे ऐम निंगन लोड़ग'आ पिटा बेद्ददम।”
- 34 येसुस आरिन बाचस, “निम्है नेग नू लिखकी र'ई, ऐन बाचकन, नीम देवता गुट्ठी हिकदर।”
- 35 नेख'आ गुसन धर्मेसी कत्था अंडसिया, आस आरिन 'देवता गुट्ठी' बाचस। नेम्हा पुथी ता कत्था अयन्दहा मल मना उंगी।
- 36 एंग्हे पत नू ईद का, एंगन बंगस चज्जियस ती एंगन खेखेल नू तइय्यस। होले ऐन धर्मेसी खददन हिकदन बाचका ती नीम एकासे एंगन ब'आ ओंग्दर का ऐन धर्मेसिन निंदा नन्दन?
- 37 एम्बस नन्दस आ नलखन ऐन मल नन्दन होले, एंगन अमा पत'आ।
- 38 लिकिन ऐन अदन नन्दन होले, नीम एंगन मल पत'अदर होले हूँ अजगुत नलखन पत'आ। खने नीम अख'ओर अरा बुझुर'ओर का बंगस एंग्हे नू र'अस अरा ऐन बंगस नू र'अदन।”



39 औंगे अउरिम आर आसिन धर'आ गे बिद्दियर, लिकिन आस आर ही खेक्खा ती बुचडारस केरस।

40 तहाँ आस योहनस मुन्द नोडरत'आ लगियस असन यरदन खाड़ ही आ पक्खे किरिम बिच्चियस, अरा असन रहचस।

41 अरा बग्गे आलर आसी गुसन बरचर अरा ताम तम्है नू ब'आलियर, “योहनस इन्द्रिम हूँ अजगुत नलख मल नंजस, अन्नु हूँ योहनस ईसी पत नू एन्देर बाचस अबड़ा उर्मी मानिम हवे।”

42 अरा अइय्या बग्गे आलर आसिन पताचर।

योहनस 11

1-2 लाजरस नामे ओन्टा आलस बेमार रहचस। आस तंगहै बहिनर मरियम अरा मारथा गने बेतानिया पद्दा नू रहचस। ई मरियम दिम रहचा ने खोखा उर्बासी मइय्याँ महमहरना इसुंगन नलबिया अरा आसी खेड्डेन तंगहै चुट्टी ती चींचया।

3 औंगे अबड़ा दुयो बहिनर येसुसिन कत्था तइय्यर, “उर्बायो, नीन नेकन चोन्हा नन्दय आस बेमार र'अस।”

4 येसुस इदन मेंजस खने बाचस, “ई बेमार पिटा गे मला, लिकिन धर्मेसी महबा गे बरचकी र'ई। इत्रु ती धर्मेसी खद्दासी महबा मनो।”

5 येसुस मारथा अरा अदही बहिन अरा लाजरसिन चोन्हा नंजस।

6 अन्नु हूँ आस लाजरस बेमार र'अस एन्ने मेंजस खने, आस एसन रहचस असन दुई उल्ला अउर रहचस।

7 फेन इदही खोखा आस तंगहै चेलारिन बाचस, “बरा, नाम अउरिम यूदेया किर्रोत कओत।”

8 लिकिन चेलर बाचर, “अना गुरु, अक्कु जोक्क उल्ला ही मुन्द दिम यूदेया ता यहूदीर निंगन लोडग'आ पिटा बेद्दा लगियर, अन्नु हूँ नीन अइय्यम अउरिम कादय का?”

9 येसुस बाचस, “उल्ला ही बारा घंटा मनी। एकअम ओर्तस उल्ला बारी ऐकोस होले, मल मूडदस, एन्देरगेका ई खेखेल ता बिल्लिन ऐरदस।

10 लिकिन आस माखा नू ऐकदस होले, मूडदस, एन्देरगेका अइय्या उल्ला बारी बेसे बिल्ली मल र'ई।”

11 आस एन्ने बाचस अदही खोखा आस आरिन अउरिम बाचस, “नम्है संगेस लाजरस खन्द्रकादस, आसिन ऐन खन्द्रना ती एज'आ कालदन।”



- 12 औंगे चेलर आसिन बाचर, “अना उर्बायो, आस खन्द्रा आ लगदस होले, उजगारोस कओस।”
- 13 येसुस गा आसी केचका ही पत नू बाचकाचस, लिकिन आसी चेलर गा खन्न ऐखना गे खन्द्रना ही पत नू बअदस एन्ने बुझर।
- 14 औंगे येसुस आरिन फरीफरी तिगियस का “लाजरस केचस केरस।
- 15 अरा ऐन निम्है चड्डे खुसमारदन का ऐन असन मल रहचकन, एकत्रु नीम अउर कोडहे पत'आ ओंगोर। बरा, नाम आसी गुसन कओत।”
- 16 खने तोमस नेकन दिदुमोस हूँ बअनर, आस तंगहै संगे चेलारिन बाचस, “गुचा, आस गने नाम हूँ खे'आ गे कओत।”
- 17 असन अंडसका खोखा येसुस अखस का लाजरसिन मसड़ा नू मंडका चार उल्ला मंजा केरा।
- 18 बेतानिया येरुसलेम ती ऐंड कोस केम गेच्छा नू रहचा।
- 19 भईसी खे'अना ही जिया सालत'आ गे बग्गे यहूदीर मारथा अरा मरियम गुसन बरचका रहचर।
- 20 मारथा येसुसी बरना ही हलन मेंजा खने, आसिन भेंट मना केरा, लिकिन मरियम एडपा नू रहचा।
- 21 मारथा येसुसिन बाचा, “उर्बायो, नीन इसन रहचका होले, एंगहै भईस मल खे'ओस दने।
- 22 लिकिन अक्कुन हूँ ऐन अखदन का नीन धर्मस ती इन्द्रिम हूँ ने'ओय अदिन धर्मस निंगा चि'ओस।”
- 23 येसुस अदिन बाचस, “निंगहै भईस अउर उज्जा चो'ओस।”
- 24 मारथा आसिन बाचा, “ऐन अखदन का छेददे उल्ला उज्जा चो'अना ही बेड़ा नू आस हूँ उज्जा चो'ओस।”
- 25 येसुस अदिन बाचस, “ऐनिम आलारिन उज्जा चोदत'अदन अरा आर गे जनमजुग उज्जनन चि'अदन। ने एंगहै मइय्याँ पत'अदस आस खे'ओस कओस अन्नु हूँ उज्जोस।
- 26 अरा ने उज्जा लगदस अरा एंगहै मइय्याँ पत'अदस, आस हुल्लो गूटी मल खे'ओस। मारथा, नीन इदिन पत'अदी का?”
- 27 आद बाचा, “हाँ उर्बायो, ऐन पताचकादन का नीन धर्मसी खद्दय मसी हिकदय, ने ई खेखेल नू बर'ऊ रहचस।”



- 28एन्ने बाचा ती आद किरिम बिच्चिया, अरा तंग्हे बहिन मरियम आबोन कले कले मीखिया ती बाचा, “गुरुस इसन र'अस, अरा निंगन मेखदस।”
- 29मरियम इदिन मेंजा ती लेम चोचा ती येसुस गुसन काला लगिया।
- 30येसुस अक्कु गूटी पद्दा नू मल कोरचकाचस। मारथा आसिन एसन भेंट मंजा आ अड्डा नुम रहचस।
- 31जिया सालत'आ गे बरचका यहूदीर मरियम गने एडपा नू रहचर। आर अदिन लेम चोचा ती बहरी काना ईरियर खने, मसड़ा नू चींखा काला लगी बाचर ती अदही खोखा खोखा केरर।
- 32लिकिन मरियम येसुस रहचस असन अंडसिया अरा आसिन ईरिया खने, आद आसी खेडमूली खतरा ती बाचा, “उर्बायो, नीन इसन रहचका होले, एंग्हे भईस मल खे'ओस दने।”
- 33येसुस मरियमन अरा अदही गने बरचका यहूदीरिन हूँ चींखना ईरियस खने, जिया नू हेंदवारस अरा अकबकरस ती³⁴आरिन मेंजस, “आसिन नीम एक्सन मंडका र'अदर?” अबडर आसिन बाचर, “गुचा ती ऐरा उर्बायो।”
- 35येसुस खंजलखो चुरखस।
- 36खने यहूदीर बाचर, “ऐरा, आस आसिन ऐ कोइहे चोन्हा नंजस।”
- 37लिकिन अबडर ती जोक्कोर बाचर, “ईस अन्धहा आलासिन कोडे नंजस। ईस लाजरसिन खे'अना ती बछाब'अरकी उड्य्या गे पोल्लस का?”
- 38येसुस जिया ती अउरिम कोइहे हेंदवारस अरा मसड़ा गुसन बरचस। आद ओन्टा खोल रहचा, अरा अड्य्या ओन्टा पखनन उर्दका रहचा।
- 39येसुस बाचस, “पखनन गुछाब'आ।” केचकासी बहिन मारथा बाचा, “उर्बायो, अक्कु गा आद ती बसनाफूटचा मनो, एन्देरगेका आसी केचका चार उल्ला मंजा केरा।”
- 40येसुस अदिन बाचस, “ऐन निंगन नीन पत्त'ओय होले धर्मसी महबन ऐरोय एन्ने मल बाचका रहचकन का?”
- 41खने आर पखनन टाँडचर। फिन येसुस मड्य्याँ मेन ईरियस ती बाचस, “अना बंगायो, ऐन निंगन धन्यवाद नन्दन का एंग्हेन नीन मेंजका र'अदय।
- 42अरा ऐन अख'आ लिक्कन, नीन सदौ एंग्हेन मेन्दय। लिकिन इसन ओनबेंडर'आ इज्जका आलर ही चड्डे ऐन एन्ने बाचकन का आर पत्त'आ ओंगोर का नीन एंगन तड्य्यादय।”
- 43येसुस एन्ने बाचस ती जोरसरिया चिच्चियारस, “अना लाजरस, उरखा बरा।”



- 44 आ केचका आलस कफन किचरी ती खेक्खा खेड्डे पोजरका रांगे बहरी उरखस, अरा आसी मुंही नन्ना किचरी ती मुढ्चका रहचा। अरा येसुस आरिन बाचस, “ईसी हेंरका गुट्ठिन कोल्ला अरा ईसिन काला चि'आ।”
- 45 मरियम गने भेंट मना गे बरचका बग्गे यहूदीर येसुसी ई नलख नंजकन ईरियर ती आसी मइय्याँ पत्ताचर।
- 46 लिकिन अबडर ती जोक्कोर फरिसीर गुसन केरर ती येसुसी नंजका नलखन तिंगियर।
- 47 खने मुध नैगर अरा फरिसीर यहूदीर ही कोहाँ सभा आबोन मीखियर ती बाचर, “नाम एन्देर ननोत? ई आलस गा कोइहे अजगुत नलख ही चिन्हन ऐददस।
- 48 ईसिन एन्नेम नाम अम्बोत चि'ओत होले, ओर्मा आलर आसिन पत्ताओर। फिन रोमी आलर बर'ओर ती नम्हें धर्मसी मन्दिरन अरा नम्हें राजिन नठाब'ओर।”
- 49 खने अबडर ती ओर्तोस आ चाँन ता कोहाँ नैगस कैफस आरिन बाचस, “नीम एन्ड्रन हूँ बलदर।
- 50 अरा नीम मल बुझुरदर का नम्हें गोट्टा राजी नठारना काना ती, नम्हें आलर गे ओर्तोस खे'अना काना बने रई।”
- 51 ई कत्थन आस तंग्हे ती मल्ला बाचका, लिकिन आस आ चाँन ता कोहाँ नैगस र'अना ती धर्मसी कत्थन मुन्द तिंगियस का, येसुस यहूदी राजी गे खे'आ कादस।
- 52 अरा आ राजी गे लेका मला, छितिर बितिर मंजका धर्मसी आलारिन हूँ खोंइ'अरकी ओन्टम मना गे हूँ खे'आ कादस।
- 53 खने अउला तिम आर येसुसिन पिटना ही चिताबुता नना हेलरर।
- 54 आँगे येसुस आ बेड़ा ती हरकट ती यहूदीर मझी नू मल कुदुदियस। लिकिन आस असते उरखस ती टोडंग ही हेददे ता चकभार नू एफ्राईम नामे ओन्टा पद्दा नू केरस, अरा तंग्हे चेलर गने अइय्यम रहचस।
- 55 अक्कु यहूदीर ही कट्टना परब हेददे अंडसकी रहचा। खने पद्दा तरती ढेर आलर तमन चाल ही सुध मना गे कट्टना परब ही मुन्द तिम येरुसलेम केरर।
- 56 खने आर येसुसिन बेद्दा कुद्दा लगियर, अरा धर्मसी मन्दिर नू बखडे नू इज्जर ती ओर्त ओर्त नू कछनस्र'आ लगियर, “नीम एन्देर सोचदर, ई परब गे आस बर'ओस का?”
- 57 लिकिन मुध नैगर अरा फरिसीर पेसका चिच्का रहचर का निकईम येसुस एसन र'अस एन्ने अखदस होले, आस आर गे तेंगना दिम रई। खने आर आसिन हें'आ आँगोर।



योहनस 12

- 1 कट्टना परब ही छै उल्ला मुन्द येसुस बेतानिया बरचस। असन दिम येसुस केचका ती उज्जताचका लाजरस रहचस।
- 2 अइय्या येसुसिन मईन नना गे आर आस गे मदी चिचर। मारथा ओन्ना-मोखना खट्टा लगिया। अरा येसुस गने ओन्ना आलर नू लाजरस हूँ ओर्तोस रहचस।
- 3 फेन मरियम अधा लिटर नगदे दाम ही जटामासी ही अरगा गमगमरना इसुंगन ओन्द्रा ती येसुसी खेड्डे नू खस्सिया, अरा आसी खेड्डेन तंगहै चुट्टी ती चीचया। अरा इसुंग ही महकारना गोट्टा एडपा नू निंदिया केरा।
- 4 लिकिन येसुसी ओन्टा चेलस यूदस इसकारियोत ने येसुसिन धरत'आ गे पपहर गे संगे चिऊ रहचस, आस बाचस,
- 5 “ई इसुंग ही दाम ओर्तोसी ओन बछर ही कमाब'अना ही भुती मनी, इदन बीसरकी कीडर गे चि'आ ओँगो दने।”
- 6 आस गे कीडर ही तिहा रहचा अदगे मल बाचस, लिकिन आस खलबस रहचस, अरा आसी गुसन आर ही थोलको र'आ लगिया। अरा अइय्या ती एन्द्रा उइय्या लगियर अदिन कभो कभो तंगा गे ओत्र'आ हो'आ लगियस।
- 7 खने येसुस बाचस, “अदिन अम्बा चि'आ, अमा थोकबोकामब'आ, आद अदिन एंगहै माइना उल्ला गे उइय्की रहचा।
- 8 कीडर गा निम्है गने सगर घड़ी र'अनर, लिकिन ऐन निम्है गने सगरो मल र'ओन।”
- 9 ढेर बग्गे यहूदी आलर मेंजर का येसुस बेतानिया नू र'अस। आर असन येसुसिन लेका ऐरा मल बरचर, लिकिन येसुस केचका ती उज्जताचका लाजरसिन हूँ ऐरा बरचर।
- 10 ओँगो मुध नैगर लाजरसिन हूँ पिटा गे चिताबुता नंजर।
- 11 एन्देरगेका आसी चड्डे नगदे यहूदी आलर आरिन अम्बा लगियर ती येसुसिन पत'आ लगियर।
- 12 नन्ना उल्ला कट्टना परब गे बरचका कोहाँ आल गोंहड़ा मेंजा का येसुस येरुसलेम बर'आ लगदस।
- 13 ओँगो आर कीन्दा डहुड़ा ओन्द्रर ती सडक नू आसिन भेंट मना गे उरखर, अरा चिचियारनुम ब'आ हेलरर, “धर्मसी महबा मनन! धर्मस ईसिन बरकत नन्दस, ने उर्बासी आकुस गने बरदस! धर्मस इस्राएल ही बेलासिन बरकत नन्दस!”



- 14 येसुस ओन्टा गदही खद्द खक्खियस ती आस अइय्या उक्कियस। एकासे का नेम्हा पुथी बई,
- 15 “येरुसलेम ता आलारो, अमा एल्चा! ऐरा, निम्है बेलस गदही खद्द नू उक्कियस ती बर'आ लगदस।”
- 16 येसुसी चेलर मुन्द इबड़न मल बुझ'आ लगियर। लिकिन येसुस महबा नू होतारना ही खोखा, आर सुरता नंजर का इबड़ा आसी पत नू धर्मसी कत्था तिंगुर ती लिखकी रहचा, अरा इबड़न आलर आसी गने एन्नेम नंजका रहचर।
- 17 येसुस लाजरसिन मसड़ा ती मीखियस ती केचका ती उज्जताचका बारी, आसी गने एका आल गोंहड़ा रहचा, आर इदही गोवाह नन्नर गे चि'आ लगियर।
- 18 बग्गे आलर आस ई लेक्खा ओन्टा अजगुत नलख नंजका रहचस एन्ने मेंजर ती, आसिन भेंट नना गे केरर।
- 19 खने फरिसीर ताम तामिम कछनक्खरर, “नीम ऐरा, नम्है ती एन्देर हूँ मना पुल्ली, ऐरा! गोटा खेखेल आसी खोखा कालाली।”
- 20 परब गे येरुसलेम नू महबा नना बरचका आलर ती जोक्क आलर युनानी आलर हूँ रहचर।
- 21 अबड़र गलिलेया ही बेतसैदा ता फिलिप्पोस गुसन बरचर ती बाचर, “उर्बायो, ऐम येसुसिन भेंट मना बेद्दम।”
- 22 फिलिप्पोस बरचस ती अन्द्रेयसिन तिंगियस। अरा अन्द्रेयस अरा फिलिप्पोस केरर ती येसुसिन तिंगियर।
- 23 येसुस बाचस, “मनवा खद्दासी महबा मन्ना ही बेड़ा अंडसकी रई।
- 24 ऐन निमन मानिम ब'अदन, गहूँ ही दना खज्ज नू खत्रना ती अरगी खे'अना गूटी ओन्टे गुना रई, लिकिन खिई कई होले, नगदे खंजपा चिई।
- 25 एकास तंगहै उज्जनन तंगा गे उज्जा बेद्ददस, आस धर्मस गने जनमजुग उज्जनन एबस'ओस। लिकिन एकास ई खेखेल नू तंगहै उज्जनन दुस'ओस, आस अदिन खापोस अरा जनमजुग उज्जनन खक्खोस।
- 26 ने एंगन सुस'आ बेद्ददस आस एंगहै गने चोंखदस नेकअन, अरा एसन ऐन र'ओन असन एंगहै जोंखस हूँ र'ओस। ने एंगन सुस'अदस, आसिन एम्बस मईन ननोस।
- 27 अक्कुन एंगहै जिया उकुल बुकुल मंजकी रई। ऐन एन्देर ब'ओन? बंगायो, ई सस्ती ही बेड़ा ती एंगन बछाब'आ ब'ओन का? मला, ऐन इदगेम ई बेड़ा गूटी बरचकादन।



- 28अना बंगायो, निंग्हे नामे गे महबन ओन्द्र'आ।" खने मेर्खा ती ओन्टा सड़ा मेन्द्रा, "ऐन गा एंग्हे नामे गे महबन ओन्द्रका र'अदन अरा फेनिम अदगे महबन ओन्द्र'ओन।"
- 29खने असन इज्जका आलर इदिन मेंजर ती बाचर बदाली मुरिया। नन्नर बाचर एकअम मेर्खा पैकस आसी गने कछनरस।
- 30खने येसुस आरिन बाचस, "आ सड़ा निमा दौ गे रहचा, एंगा गे मला।
- 31अक्कु दिम ई खेखेल ता नैवई मन्ना ही बेड़ा हवे। अरा अक्कु दिम ई खेखेल ही अक्स'ऊ सैतान बहरी हेबड़तार'ओ।
- 32अरा ऐन खेखेल ती मइय्याँ चोदतार'ओन खने, ओर्मा आलारिन एंग्हे गुसन नतगोन।"
- 33एका लेक्खा खे'अना आस गे मनो अदिन ऐद'आ गे दिम इदन आस बाचस।
- 34तहाँ असन खोंड़रका आलर आसिन बाचर, "ऐम नेग ती मेंजकादम का मसीस सगरो उज्जोस। अन्ने र'ई होले नीन एकासे ब'आ ओंग्दय का 'मनवा खद्दासिन मइय्याँ चोदतारना ही चाड़ र'ई?' ई मनवा खद्दस एका ओर्तस?"
- 35खने येसुस आरिन बाचस, "बिल्ली अक्कुन निम्है गने जुक्किम बेड़ा गे र'ओ। ऊखा निमन कुलना ती मुन्द, बिल्ली निम्है गने र'अना बारिम नीम अइय्या नू ऐका। ऊखा नू ईकू आलस तान एसन कादस अदिन बलदस।
- 36बिल्ली निम्है गने र'अना बारिम, नीम आ बिल्लिन पत'आ, होले नीम बिल्ली ही खद्दर मना ओंगोर।" येसुस इबड़न बाचस ती किरिम बिच्चियस, अरा आस मल ऐथ्रस।
- 37येसुस आलर ही मुन्दहारे कोड़हे बग्गे अजगुत नलख ही चिन्हा नंजका ती हूँ आर आसिन मल पताचर।
- 38धर्मसी कत्था तिंगू यसायास ती बाचका कत्था पूरा नना गे दिम ईद मंजा। "अना उर्बायो, एम्है कत्थन ने पताचका र'अनर। अरा नेख'आ गे उर्बासी कोड़हे सवंग दहदर मंजा?"
- 39ई चड्डे दिम आर पत'आ पोल्लर, एन्देरगेका यसायास एन्ने हूँ बाचका र'अस।
- 40"धर्मस आर ही खन्नन कना, अरा आर ही जियन बेड़हा नंजका र'अस। एन्ने अम्बो मना का आर खन्न ती ऐरोर, अरा जिया ती बुझुर'ओर, अरा आर एंग्हे गुसन किरोर बर'ओर, अरा ऐन आरिन कोड़े ननोन।"
- 41यसायास येसुसी महबन ईरका चड्डे आसी पत नू तिंगियस खने, इबड़ा कत्थन बाचस।



- 42अन्नु हूँ यहूदी मुद्घर ती ढेर आलर येसुस मइय्याँ पत्ताचर। लिकिन फरिसीर चड्डे आर आसी मइय्याँ ता तंग्हे पत'अनन मल तेंगरर। आर इदगे इल्चियर का आर आरिन गोइहा एइपा ती ओथ्र'ओर चि'ओर दने।
- 43आर गा धर्मस ती बरना ओहमा ती आलर ती बरना ओहमन कोइहे पतर'आ लगियर।
- 44तहाँ येसुस चिच्चियारस ती बाचस, “ने एंग्हे मइय्याँ पत'अदस, आस एंग्हे मइय्याँ लेका मला, एंगन तइय्युस मइय्याँ हूँ पत'अदस।
- 45अरा ने एंगन ऐरदस आस एंग्हे तइय्युसिन ऐरदस।
- 46ऐन खेखेल नू बिल्ली लेक्खा बरचका र'अदन। औंगे ने एंगन पत'ओस आस ऊखा नू मल र'ओस।
- 47नेकईम एंग्हे कत्था गुट्ठिन मेन्दस ती अबइन मल मनदस होले, आसिन ऐन नैवई मल नन्दन, एन्देरगेका ऐन खेखेलन नैवई नना गे मला, लिकिन अदिन नाड़ा गे बरचका र'अदन।
- 48ने एंगन खाँइना ती एंग्हे कत्था गुट्ठिन मल इंझदस, आस गे ओन्टा नैवई ननुस र'अस। ऐन बाचका ई कत्था दिम छेद्दे उल्ला नू आसिन नैवई ननो।
- 49एन्देरगेका ऐन एंग्हे तरती मल कछनखदन। लिकिन एंगन तइय्युका बंगस दिम एंगन पेसस, एन्देर एन्देर ब'अना र'ई अरा अदन एकासे नन्ना र'ई।
- 50अरा ऐन अखदन का आसी पेसका जनमजुग उज्जना गे कइहाबई। औंगे बंगस एंगन ब'आ गे आनदस, अदन दिम ऐन ब'अदन।”

योहनस 13

- 1कट्टना परब ही मुन्द येसुस अक्खस का ई खेखेलन अम्बना ती तम्बस गुसन तंग्हे काना बेड़ा अंइसिया। आस तंग्हे आलर ने ई खेखेल नू रहचर, आरिन सगरो चोन्हा नंजका रहचस, अरा आरिन मुंजा गूटी चोन्हा नंजस।
- 2येसुस अरा आसी चेलर पुतबारी ता मंडी ओना उक्का रहचर। नाद सिमोनसी तंग्दस यूदस इसकारियोतसी जिया नू येसुसिन धरत'आ गे पपहर गे संगे चि'आ गे मतिन सज्ज खचकी रहचा।
- 3येसुस अक्खस का बंगस उर्मी ही मइय्याँ तंगा गे आकुस चिच्का रहचस, अरा तान धर्मस गुसते बरचकाचस, अरा धर्मस गुसन किरा लगदन।
- 4येसुस ओन्ना पाँती ती चोचस, अरा तंग्हे थालर आबोन इच्चियस ती संफी ती तंग्हे कइमन हेंचस।



- 5 फिन थरा नू अम्मु एल्खस ती तंग्हे चेलर ही खेड्डेन नोड़ा हेलरस, अरा कड़मा नू हेंरका संफी ती चींचा हेलरस।
- 6 फिन आस सिमोन पतरस गुसन बरचस खने, पतरस आसिन बाचस, “उर्बायो! नीन एंग्हे खेड्डेन नोड़ा कालदय का?”
- 7 येसुस आनाकिर्ताचस, “ऐन एन्देर नना लगदन अदिन नीन अक्कुन मल बुझुरदय, लिकिन खोखा बुझुरओय।”
- 8 पतरस बाचस, “मला, नीन एंग्हे खेड्डेन इकला हूँ मल नोड़ना रई।” खने येसुस बाचस, “ऐन निंग्हे खेड्डेन मल नोड़ोन होले, नीन एंग्हे आलर ती ओर्त मलदय।”
- 9 खने सिमोन पतरस आसिन बाचस, “अना उर्बायो, होले एंग्हे खेड्डे लेका मला खेक्खा अरा कुक्कन हूँ नोड़ा।”
- 10 येसुस बाचस, “ओर्तोस एमच्का खोखा, आसी गोटा मेद सफा रई, आस खेड्डेन लेका नोड़ा गे चाड़ रई। नीम सफा रअदर, लिकिन निम्है ती ओर्मर मला।”
- 11 एन्देरगेका येसुस अक्खस का ने तंग्हे बिड़दो मनोस, ओँगे आस बाचस, “निम्है ती ओर्मर सफा मलकर।”
- 12 आस आर ही खेड्डेन नूड़ियस मुंजियस ती तंग्हे थालर आबोन अतियस। फेन तंग्हे अड्डा नू उक्कियस अरा आरिन मेंजस, “नीम बुझुरदर का ऐन निम्है गने एन्देर नंजकादन?”
- 13 नीम एंगन ‘गुरु’ अरा ‘उर्बय’ एन्ने मेखदर, अरा एन्ने निम्है मेखना ठउकम हिके, एन्देरगेका ऐन आसिम हिकदन।
- 14 ऐन निम्है उर्बय अरा गुरु हिकदन, अन्नु हूँ ऐन निम्है खेड्डेन नूड़कन, नीम हूँ अन्ने ओर्त ओर्तोसी खेड्डेन नोड़के।
- 15 एन्देरगेका ऐन निमा नमुना ऐदकन। एकासे ऐन निम्है गने नंजकन, अन्नेम नीम हूँ ननके।
- 16 ऐन निमन मानिम बअदन, जौखस तंग्हे उर्बस ती कोहँस मलदस, अरा तइरकस आसिन तइय्युस ती कोहँस मलदस।
- 17 अक्कुन नीम इबड़ा कथन अखदर, अरा इबड़न नीम नन्दर होले, धर्मस निमन बरकत ननोस।
- 18 ऐन नीम ओर्मर ही पत नू मल बअदन। ऐन अखदन का ऐन नेकन नेकन चज्जिकादन। लिकिन ईद इदगे मनी का नेम्हा पुथी नू लिखका कथा मन्ना रई, ‘एकास एंग्हा गने मोक्खस आस दिम एंग्हे बिड़दो मंजकादस।’



- 19 ऐन अक्कु आद मन्ना ती मुन्द तेंगदन, आँगे एकाबारी आद मनी आ बारी नीम पत्त'ओर का ऐन आसीम हिकदन।
- 20 ऐन निमन मानिम ब'अदन, ऐन तइय्का नेक'अनिम ने इंझदस, आस एंगन हूँ इंझदस। अरा ने एंगन इंझदस, आस एंगन ने तइय्कादस आसिन हूँ इंझदस।”
- 21 इबड़न बाचस ती येसुस जिया नू उकुल बुकुल मंजस ती हरकट ती बाचस, ऐन निमन मानिम ब'अदन, “निम्है ती ओर्तोस एंगन धरत'आ गे संगे चि'ओस।”
- 22 चेलर पयपयारर केरर ती आस नेख'आ पत्त नू ब'अदस बाचर ती ताम तामिम ऐरा नख'आ हेलरर।
- 23 चेलर ती ओर्तोस, नेकन येसुस चोन्हा नंजस, आस येसुसी धरी नू उक्का रहचस।
- 24 सिमोन पतरस आसिन मिटकाचस ती येसुस नेख'आ पत्त नू बाचस एन्ने येसुसिन मेना गे बाचस।
- 25 खने आस होबोर मंजस ती येसुसिन मँजस, “उर्बायो, आस एका ओर्तोस?”
- 26 खने येसुस बाचस, “नेकन ऐन असमा कुटकन थरा नू ओत्तोन ती चि'ओन, आसिम हिकदस।” अरा आस असमा कुटकन होचस ती उत्तियस ती सिमोनसी तंगदस यूदस इसकारियोतस गे चिचस।
- 27 अरा यूदस असमा कुटकन इंझना गनेम सैतान यूदस नू समसारा केरा। फिन येसुस आसिन बाचस, “निंगा एन्देर नन्ना र'ई अदिन चाँइहे नना।”
- 28 ओना उक्का आलर ने हूँ मल बुझर का येसुस आसिन एन्ने एन्देरगे बाचस।
- 29 यूदस ढिबा ही थोलकोन उइय्या लगियस, खने जोक्कोर सोचर का परब नू चाइ मनो अबड़न खेन्दा गे महले कीइर गे इन्दिइम चि'आ गे येसुस आसिन बाचस।
- 30 असमा कुटकन इंझस ती आ बारिम यूदस बहरी किर्रिम बिचियस। आ बारी माखा रहचा।
- 31 यूदस केरका खोखा येसुस बाचस, “अक्कु मनवा खद्दन एंगा महबा दहदर मनी, अरा एंगहै ती धर्मेसी महबा दहदर मनी।
- 32 अरा एंगहै ती धर्मेसी महबा दहदर मनी होले, धर्मेस हूँ मनवा खद्दन एंगा महबन तंगहै ती दहदर ननोस, अरा लेम अदन ननोस।



33खद्दारो! जोक्क घड़ी लेका निम्है गने र'ओन। अरा नीम एंगन बेद्दोर, अरा ऐन एकासे यहूदी मुद्धारिन बाचकन अन्नेम अक्कुन ऐन निमन ब'अदन का ऐन एक्सन कादन असन नीम काला पोल्दर।

34ऐन निमा गे ओन्टा पुना पेसका चि'अदन, नीम ओर्त ओर्त गने चोन्हा नना। एकासे ऐन निमन चोन्हा नंजकन, अन्नेम नीम हूँ ओर्त ओर्त गने चोन्हा नन्ना र'ई।

35नीम एन्ने ओर्त ओर्त गने चोन्हा ननोर होले, ओर्मा आलर अख'ओर का नीम एंग्हे चेलर हिकदर।”

36सिमोन पतरस येसुसिन मेंजस, “उर्बायो, नीन एक्सन कालदय?” येसुस बाचस, “एक्सन ऐन कालदन असन नीन अक्कुन एंग्हे गने चोंख'आ पोलदय, लिकिन खोखा नीन एंग्हे गने चोंख'ओय।”

37पतरस आसिन मेंजस, “उर्बायो, एन्देरगे अक्कुन ऐन निंग्हे गने चोंख'आ पोलदन? ऐन गा निंगा गे एंग्हे जियन हूँ चि'ओन।”

38येसुस आसिन बाचस, “नीन एंगा गे निंग्हे जियन हूँ चि'ओय का? निंगन ऐन मानिम ब'अदन, खेर चोंखना ती मुन्द तीन हेल नीन एंगन बलदन ब'ओय।”

योहनस 14

1येसुस तंग्हे चेलारिन बाचस, “निम्है जिया उकुल बुकुल अम्बो मना। धर्मस मइय्याँ पत'आ, एंग्हे मइय्याँ हूँ पत'आ।

2एम्बासी एइपा नू ढेर बग्गे र'आ गे अइडा र'ई, अन्ने मल रहचका होले, ऐन निमन बाचका र'ओन दने। ऐन असन निमा गे ओन्टा अइडा सपइ'आ कालदन।

3ऐन असन कालरकी निमा गे ओन्टा अइडा सपइ'आरका खोखा, अउरिम बर'ओम ती नीम एंग्हे गने र'आ गे निमन हो'ओन क'ओन। खने ऐन एसन र'ओन असन नीम हूँ र'ओर।

4ऐन एसन कालदन आ अइडा काना ही डहरेन नीम अखदर।”

5तोमस येसुसिन बाचस, “उर्बायो, नीन एसन कालदय ऐम बल्दम। होले अदही डहरेन ऐम एकासे अख'ओम?”

6येसुस आसिन बाचस, “डहरे अरा मानिम अरा उज्जना ऐनिम हिकदन। एंग्हे त्रु बिगर ने हूँ बंगस गुसन काला पोलनर।



- 7नीम एंगन मानिम नू अक्का होले, एम्बासिन हूँ अख'ओर दने। अरा अक्कु ती नीम आसिन अखदर, अरा आसिन ईरका हूँ र'अदर।”
- 8फिलिप्पोस आसिन बाचस, “उर्बायो, बंगासिन एमन ऐद'आ, ईदिम एमा जबर हवे।”
- 9येसुस आसिन बाचस, “फिलिप्पोस, ऐन एन्ने उल्ला गूटी निम्है गने रहचकन, अन्नु हूँ अक्कु गूटी नीन एंगन बलकय का? ने एंगन ईरकादस, आस बंगासिन हूँ ईरकादस। होले नीन एन्देगे ब'अदय, 'बंगासिन एमन ऐद'आ'?
- 10एन्दे नीन मल पत'अदय का ऐन बंगस नू र'अदन अरा बंगस एंग्हे नू र'अस? ऐन एकदन निमन ब'अदन आद एंग्हे मल्ली, अबड़ा एम्बासी कत्था हवे। आस एंग्हे नू र'अस ती आसिम तंग्हे नलखन नन्दस।
- 11ऐन बंगस नू र'अदन, अरा बंगस एंग्हे नू र'अदस, एन्ने ऐन ब'अदन खने, नीम अदिन पत'आ, मला होले ऐन नंजका अजगुत नलख चड्डे अदिन पत'आ।
- 12ऐन निमन मानिमन ब'अदन, ने एंग्हे मड्य्याँ पत'अदस, आस ऐन एका नलख गुट्ठिन नंजकादन अबड़न तान हूँ ननोस। अरा ऐन बंगस गुसन कालदन ई चड्डे आस अबड़ा ती हूँ कोहाँ नलख गुट्ठिन ननोस।
- 13अरा नीम एंग्हे नामे ती इन्द्रिइम ने'अदर, अदिन ऐन निमा गे ननोन। खने बंगासी महबा ऐन खददस ती दहदर मनो।
- 14नीम एंग्हे ती एंग्हे नामे ती इन्द्रिइम ने'अदर होले, अदिन ऐन निमा ननोन।
- 15नीम एंगन चोन्हा नन्दर होले, नीम एंग्हे पैसका गुट्ठिन मन'ओर।
- 16अरा ऐन बंगस गुस्ते ने'ओन, अरा आस निमा अउर ओन्टा सालत'उसिन चि'ओस। आस सगरो निम्है गने र'ओस।
- 17आस दिम उर्मी मानिमन दहदर ननू नेम्हा बोलतस हिकदस। आसिन ई खेखेल ता आलर मल इंझर'ओर, एन्देगेका आर आसिन मल ऐरनर महले आसिन बलनर। लिकिन नीम आसिन अखदर, एन्देगेका आस निम्है गने उज्जदस अरा निम्है नू र'ओस।
- 18ऐन निमन टुरा गुट्ठी लेक्खा मल अम्बोन, ऐन निम्है गुसन किर्'ओन बर'ओन।
- 19जोक्क घड़ी खोखा खेखेल एंगन ऐरा दिम पोल्लो। लिकिन नीम गा एंगन ऐरोर, ईगेका ऐन उज्जालदन, नीम हूँ उज्जोर।



- 20 इकला ऐन उज्जा चो'ओन, आ उल्लम नीम अख'ओर का ऐन एम्बस नूर'अदन, अरा नीम एंग्हे र'अदर, अरा ऐन निम्है नूर'अदन।
- 21 ने एंग्हे पेसका गुट्ठिन इङ्गदस, अरा अबड़न मनदस, आस दिम एंगन चोन्हा ननूर'अदस। ने एंगन चोन्हा नन्दस आसिन एम्बस चोन्हा ननोस। अरा ऐन आसिन चोन्हा ननोन ती एंगन आस गे दहदर ननोन।”
- 22 फिन यूदस ने यूदस इसकारियोतस मलदस, आस येसुसिन बाचस, “उर्बायो, एन्देरगे नीन निंगन खेखेल ता आलर गे दहदर मल नन्ना ती एमा गे लेकम दहदर नना बेद्दय?”
- 23 येसुस आसिन किर्त'अर बाचस, “नीकईम एंगन चोन्हा नन्दस होले, आस एंग्हे सिखाब'अनन मनदस। अरा एम्बस आसिन चोन्हा ननोस, अरा ऐम आसी गुसन बर'ओम, अरा आस गने उज्जोम।
- 24 अरा ने एंगन चोन्हा मल नन्दस, आस एंग्हे सिखाब'अनन मल मन'ओस। अरा एका कथा गुट्ठिन नीम मेन्दर, अबड़ा एंग्हे कथा मल्ली, अबड़ा एंगन तइयका बंगासी हवे।
- 25 ऐन निम्है नूर'अना बारी इबड़ा उर्मी कथन ऐन निमा गे तिका र'अदन।
- 26 लिकिन सालत'उस, नेम्हा बोलतस नेकन बंगस एंग्हे नामे ती तइय्योस, आस निमन उर्मी कथन सिखाब'ओस अरा एंग्हे आनका उर्मी कथन निमन सुरता नन्त'ओस।
- 27 ऐन निमा गे कोड़े चि'अरकी कादन, एंग्हे कोड़ेन चि'अदन। खेखेल चि'अना कोड़े लेक्खा ऐन मल चि'अदन। आँगे नीम अमके उकुल बुकुल मना, अरा नीम अमके एल्चा।
- 28 ऐन निमन एन्ने ब'अना मैजकर, ‘ऐन कालदन, अरा निम्है गुसन फेन बर'ओन।’ नीम एंगन चोन्हा नन्दर होले, नीम रिङ्ग'ओर दने का ऐन बंगस गुसन किर्दन कादन, एन्देरगेका बंगस एंगन ती कोहाँ र'अस।
- 29 अरा अक्कुन ऐन इदही मन्ना ती मुन्दिम निमन तिकादन। एकत्रु आद मनो बारी नीम एंगन पत'ओर।
- 30 ऐन निम्है गने अउर घड़ी मल कछनख'ओन, ईगेका ई खेखेल ता अक्स'उस बर'आ लगदस। आस गे एंग्हे मइय्याँ अदिया मल्ला।
- 31 अन्नु हूँ खेखेल अखना रई का ऐन बंगासिन चोन्हा नन्दन, अरा एकन्ने बंगस एंगन पेसस, अन्नेम ऐन नन्दन। गुचा, नाम इसलेक क'ओत।”

योहनस 15



- 1 येसुस तंगहै चेलारिन बाचस, "ऐन मानिम अंगुर खोप्पा हिकदन, अरा एम्बस बटकी उर्बस।
- 2 एका लड़ंग एंगहै नू रई अरा मल खंजई अदिन आस तारदस, अरा एकाबड़ा खंजई अबड़न छटदस का बग्गे खंज'ओ।
- 3 नीम गा ऐन निमन बाचका कत्था गुट्ठी ती मुन्द दिम छटका अरा सफा मंजकादर।
- 4 नीम एंगहै नू बन्चका र'आ, अरा ऐन निम्है नू बन्चका र'ओन। एकन्ने लड़ंग अंगुर खोप्पा नू मल बन्चकी र'ओ ती, आद तंगहै ती खंजपा चि'आ पुल्ली। अन्नेम नीम हूँ एंगहै नू मल बन्चका र'ओर होले, खंजपा चि'आ पोल्लोर।
- 5 ऐनिम अंगुर खोप्पा हिकदन, नीम गा लड़ंग गुट्ठी हिकदर। एकास एंगहै नू बन्चका र'अस अरा ऐन आस नू बन्चका र'अदन होले, आस नगदे खंजपा चि'ओस, एन्देरगेका एंगन अम्बरकी नीम एन्देर हूँ नना पोल्लोर।
- 6 नीकईम एंगहै नू मल बन्चका र'ओस होले, आस खंडरकी हेबड़का खैका लड़ंग बेसे र'अस। एन्ने लेक्खा लड़ंग गुट्ठिन आलर खोजनर ती चिच्ची नू झपाब'अनर ती बस्सनर चि'अनर।
- 7 नीम एंगहै नू बन्चका र'अदर अरा एंगहै कत्था गुट्ठी निम्है नू बन्चकी रई होले, इन्द्रिइम हूँ निम्है मने मनो अदिन ने'आ, आद निमा गे चितार'ओ।
- 8 नीम कोइहे खंजपा चि'अदर ती एंगहै चेलर एन्ने ऐद'आ। इत्रुतिम एंगहै बंगस महबा खक्खोस।
- 9 एकन्ने बंगस एंगन चोन्हा नंजकादस, अन्नेम ऐन हूँ निमन चोन्हा नंजकादन। एंगहै चोन्हा नू बन्चका र'आ।
- 10 ऐन एम्बासी पेसका गुट्ठिन मनचका ती आसी चोन्हा नू बन्चका र'अदन। अन्ने नीम एंगहै पेसका गुट्ठिन मनदर होले, एंगहै चोन्हा नू बन्चका र'ओर।
- 11 ऐन इबड़ा कत्थन इदगे तिका र'अदन का एंगहै रिझना निम्है नू बन्चका र'ओ, अरा निम्है रिझना नीदो कालो।
- 12 एंगहै पेसका ईद का एकन्ने ऐन निमन चोन्हा नंजकन अन्नेम नीम ओर्त ओर्त गने चोन्हा नना।
- 13 नीकईम तंगहै संगेर गे खे'अना ती कोहाँ चोन्हा नेख'आ हूँ मल्ला।
- 14 ऐन एन्देर एन्देर पेसकन अदिन नीम नन्दर होले, नीम एंगहै संगेर र'अदर।
- 15 निमन अक्कन ती ऐन जौंखर मल ब'ओन, एन्देरगेका जौंखस बलदस का आसी उर्बस एन्देर ननालदस। लिकिन निमन ऐन संगेर बाचकादन, एन्देरगेका ऐन एम्बस ती मैजका उर्मी कत्थन निमन मेन्ताचका र'अदन।



- 16 नीम एंगन मल चज्जकर, लिकिन ऐन निमन चज्जिकादन, अरा नीम कालरकी खजपा चि'आ गे अरा निम्है खंजपा बन्चका र'आ गे निमन ओक्ताचकादन। होले नीम एंगहै नामे ती बंगस गुस्ते इन्द्रिइम हूँ ने'ओर, अदन आस निमा गे चि'ओस।
- 17 नीम ओर्त ओर्त गने चोन्हा नना, ईदिम एंगहै पेसका हवे।
- 18 खेखेल निमन हींइई होले, नीम अख'आ का अदिन ती मुन्द आद एंगन हींइचा।
- 19 नीम खेखेल ता रहचकर होले, आद निमन तंगहै ब'अरकी निम्है गने चोन्हा नंजकी र'ओ दने। लिकिन नीम खेखेल ता मलदर, एन्देरगेका ऐन निमन खेखेलन अम्बा ती बर'आ गे चज्जिका र'अदन, खने खेखेल निमन हींइई।
- 20 एका कत्थन ऐन निमन तिंकन अदिन सुरता नना। जोंखस तंगहै उर्बस ती कोहँस मलदस। आर एंगन सताबाचर होले, निमन हूँ सताब'ओर। अरा आर एंगहै कत्थन पेस्र होले, निम्है कत्थन हूँ पेस्र'ओर।
- 21 नीम एंगहै र'अना चड्डे आर निमा गे इबड़ा ओर्मन ननोर, एन्देरगेका आर ने एंगन तइय्यस आसिन बलनर।
- 22 ऐन मल बरचका अरा आरिन धर्मसी कत्थन मल तिंका रहचकन होले, पाप ही बदी आर ही मइय्याँ मल लग्गो दने। लिकिन आर गे अक्कु तम्है पाप गे एन्देर नंगु हूँ तेंगा पोल्नोर।
- 23 ने एंगन हींइदस, आस एंगहै बंगासिन हूँ हींइदस।
- 24 एका अजगुत नलख गुट्ठिन ने हूँ मल नंजका रहचर आ अजगुत नलख गुट्ठिन आर ही मझी नू ऐन मल नंजका रहचकन होले, आर ही मइय्याँ पाप ही बदी मल लग्गो दने। लिकिन अक्कु गा आर ऐन एन्देर नंजकन अबड़ा ओर्मन ईरियर, अन्नु हूँ आर एंगहै गने अरा एम्बस गने हींइका र'अनर।
- 25 ईद इदगे मंजा का 'आर अयन्ध'आ एंगहै गने हींइचर' एन्ने कत्था आर ही नेग नू लिखकी रई, आद मंज खचो।
- 26 सालत'उस निम्है गुसन बर'ओस। आसिन ऐन बंगस तरती निम्है गुसन तइय्योन। आस बंगस गुस्ते बरदस अरा मानिमन दहदर ननू नेम्हा बोलतस हिकदस। एकाबारी आस बर'ओस, आ बारी एंगहै पत नू गोवाह चि'ओस।
- 27 अरा नीम हूँ एंगहै पत नू गोवाह चि'अना रई, एन्देरगेका ओइ तिम नीम एंगहै गने रहचकादर।

योहनस 16



- 1 एन इबड़ा कत्थन निमन इदगे तिका र'अदन का नीम निम्है पत्त'अनन अम्बोर अम्बा।
- 2 आलर निमन आर ही गोड़हा एड़पा गुट्ठी ती ओत्र'ओर चि'ओर। मानिम नू ओन्टा बेड़ा बर'आ लगी, ने निमन पिटोर आर सोच'ओर का आर इदन नन्ना ती धर्मसी सुसर नन्नर।
- 3 आर इबड़न इदगे ननोर, एन्देरगेका आर बंगासिन हूँ बलनर अरा एंगन हूँ बलनर।
- 4 एन अक्कु इबड़ा कत्थन निमन तिकादन, औंगे बेड़ा अंडसो खने, नीम सुरता ननोर का एन इबड़ा कत्थन तिकन। एन इबड़ा कत्थन निमन मुन्द मल बाचकन, एन्देरगेका एन निम्है संगे रहचकन।
- 5 अक्कु एन एंगहै तइय्युस गुसन किरा कालदन। अन्नु हूँ निम्है ती ओर्त हूँ एंगन अक्कुन मल मेन्दर का 'नीन एक्सन कादय?'
- 6 इबड़ा कत्थन एन निमन तिकादन, औंगे निम्है जिया दुक्खे ती निंदिया केरा।
- 7 लिकिन एन निमन मानिम कत्थन तेंगदन, निम्है दौं गे दिम एन निमन ती कादन, एन्देरगेका एन मल क'ओन होले, सालत'उस मल बर'ओस। लिकिन एन क'ओन होले एन आसिन निम्है गुसन तइय्योन।
- 8 अरा सालत'उस बरदस खने, आस खेखलन पाप ही पत्त नू अरा उजगो र'अना ही पत्त नू अरा नैवई ही पत्त नू तेंगोस, अरा ऐद'ओस का आर इबड़ा पत्त नू एकासे ठउकम मल बुझकर।
- 9 आर एंगन मल पत्त'अना ती पाप ही पत्त नू आस तेंगोस।
- 10 अरा एन बंगस गुसन काना ती नीम एंगन अउर मल ऐरोर ई चड्डे उजगो र'अना ही पत्त नू आस तेंगोस।
- 11 अरा ई खेखेल ही उर्बस नैवई मंज खच्चिका ती नैवई ही पत्त नू आस तेंगोस।
- 12 एन निमन तेंगा गे ढेर कत्था र'ई, लिकिन नीम अक्कु अदन सह'आ पोल्लोर।
- 13 लिकिन मानिमन दहदर ननू नेम्हा बोलतस बरदस खने, आस निमन उर्मी मानिमन दहदर ननोस। आस गा तंगहै ती मल ब'ओस, लिकिन एकदन आस मेनोस अदिन दिम ब'ओस, अरा आस बरना कत्थन निमन तेंगोस चि'ओस।
- 14 आस एंगा गे महबन ओन्द्र'ओस, एन्देरगेका आस एंगहै ती खक्खदस ती अदिन निमन तेंगोस।
- 15 बंगासी उर्मी एंगहै दिम हवे। खनेम एन बाचकन का आस एंगहै ती खक्खदस ती अदिन निमन तेंगोस।
- 16 एगघड़ी खोखा नीम एंगन मल ऐरोर, अरा एगघड़ी खोखा नीम एंगन अउर ऐरोर।”



- 17 खने आसी चेलर जोक्कोर ओर्त ओर्त कछनख्र'आ लगियर, “ ‘एगघड़ी खोखा नीम एंगन मल ऐरोर, अरा एगघड़ी खोखा नीम एंगन अउर ऐरोर’ अरा ‘ऐन बंगस गुसन कादन’ एन्ने ईस नमन ब'अदस, इदही एन्देर मने हिके?”
- 18 आर अउरिम मेना लगियर, “ ‘एगघड़ी’ एन्ने ब'अदस, इदही मने एन्देर मनी? आस एन्देर ब'अदस अदिन नाम मल बुझुर'आ लगदत।”
- 19 येसुस अक्खस का आर इदही पत नू तंगन मेना बेददनर। खने आस आरिन बाचस, “‘एगघड़ी खोखा नीम एंगन मल ऐरोर, अरा एगघड़ी खोखा नीम एंगन अउर ऐरोर’ एन्ने ऐन बाचकन, इदही मने एन्देर एन्ने नीम ओर्त ओर्त नू मेना लगदर का?
- 20 ऐन निमन मानिम ब'अदन, नीम चींखोर ओलखोर अरा खोबरार'ओर, लिकिन खेखेल रिझ'ओ। नीम दुक्खे मनोर, लिकिन निम्है दुक्खे रिझ मनो।
- 21 ईद एन्ने लेक्खा र'ई का ओर्त आली गे तंगहै नेबना बेड़ा अंडसी खने, आद गे सस्ती मनी। लिकिन छुटा मंजका खोखा आद आ सस्तिन मोध'ई क'ई, अरा अदगे रिझ मनी, एन्देरगेका आद खेखेल नू ओर्त खद'ओन्द्रकी र'ई।
- 22 ई लेक्खम नीम हूँ अक्कु सस्ती सारदर, लिकिन ऐन निमन फेन ऐरोन, खने नीम रिझ'ओर। निमन ती निम्है रिझनन ने हूँ पोल्लोर बच्चा।
- 23 अरा आउला नीम एंगन एन्द्रन हूँ मेना गे चाड़ मल र'ओ। ऐन निमन मानिम ब'अदन, एंगहै नामे ती नीम एन्द्र'आनिम बंगस गुस्ते ने'ओर, अदिन आस निमा गे चि'ओस।
- 24 नीम अक्कुन गूटी एंगहै नामे ती एन्द्रन हूँ मल नेचका र'अदर। ने'आ, होले नीम खक्खोर का निम्है रिझना नीदो क'ओ।
- 25 ऐन निमन इबड़ा कत्थन खीरी गुट्ठी ती कछनख्र'कादन। लिकिन बेड़ा बर'आ लगी, आ बारी ऐन खीरी गुट्ठी ती मल कछनख्र'ओन। लिकिन ऐन निमन बंगासी पत नू फरीफरी तैंगोन।
- 26 आ उल्ला नू नीम एंगहै नामे नू बंगासिन ने'ओर। औंगे ऐन निमा गे बंगस गुसन ने'आ गे चाड़ मल र'ओ।
- 27 एन्देरगेका बंगस तानिम निमन चोन्हा नन्दस। आस निमन चोन्हा नन्दस, एन्देरगेका नीम एंगन चोन्हा नंजकर, अरा पताचकर का ऐन धर्मस गुस्ते बरचका र'अदन।
- 28 ऐन बंगस तरती उरखकन ती खेखेल नू बरचकन, अरा अक्कुन ऐन खेखलन अम्बदन ती बंगस गुसन किरा कालदन।”



29 तहाँ येसूसी चेलर आसिन बाचर, “अक्कुन गा नीन फरीफरी कछनखदय, खीरी गुट्ठी ती मल कछनखदय।

30 अक्कु ऐम अखदम का नीन उर्मिन अखदय, ने हूँ निंगन मेना गे चाड़ मल्ला। इत्रु ती ऐम पत'अदम का नीन धर्मस ती उरखकय बरचकादय।”

31 खने येसुस बाचस, “अक्कु गा नीम पत'अदर, आद दौ हिके।

32 ऐरा, बेड़ा बर'आ लगी, अरा अंडसा खच्चकी रई। आ बारी नीम छितिर बितिर मनोर ती तंग्हे तंग्हे एड़पा बोंगोर। अरा एंगन ओर्तेलेका अम्बोर चि'ओर। अन्नु हूँ ऐन ओर्तेलेका मलदन, एन्देरगेका बंगस एंग्हे गने र'अस।

33 ऐन इबड़ा कत्थन निमन तिकादन का नीम एंग्हा नू कोड़े खक्खा ओंग्दर। ई खेखेल नू निमा खिलपत मनो, लिकिन डिढ मना, ऐन खेखलन जितिचका र'अदन।”

योहनस 17

1 इबड़ा कत्थन येसुस बाचस मुंजियस ती आस मेर्खा तरा मेन ईरियस ती गोहरारस, “अना एंग्हे बंगायो, बेड़ा अंडसकी रई, निंग्दस एंग्हे महबन नीन आलर गे दहदर नना, का ऐन आलर गे निंग्हे महबन ऐद'आ ओंग्दन।

2 नीन ओर्मा आलर मइय्याँ एंगा गे अदिया चिचकादय, नीन एंगा चिच्का ओर्मर गे ऐन जनमजुग ही उज्जना चि'आ गे दिम नीन इदन नंजकय।

3 ओन्टेम मानिम धर्म निंगन अरा नीन तइय्का येसु मसीसिन अखना ती दिम आर जनमजुग उज्जनन खक्खोर।

4 नीन एंगा नना गे चिच्का नलखन नंजकन मुंजकन ती, ऐन इय्या खेखेल नू निंग्हे महबन दहदर नंजकन।

5 अरा अना एंग्हे बंगायो, खेखेल ही मन्ना ती मुन्द निंग्हे गने एंगा गे रहचका महबा ती अक्कु निंग्हे मुन्दहारे एंगन महबा नना।

6 एका आलारिन नीन खेखेल ती एंगा चिचकय, आर गे ऐन निंगन दहदर नंजकन। आर निंग्हे दिम रहचर, आरिन नीन एंगा चिचकय, अरा आर निंग्हे कत्थन मनचर।

7 नीन एंगा चिच्का उर्मिद निंग्हे तिम बर'ई, एन्ने आर अक्कु अखनर।

8 एन्देरगेका नीन एंगा चिच्का कत्था गुट्ठिन ऐन आर गे चिचकन, अरा आर अबड़न इङ्गर। अरा ऐन निंग्हे गुस्ते बरचकादन, एन्ने मानिम ती अक्खर ती नीनिम एंगन तइय्कय, एन्ने पत'अनर।



- 9 ऐन आर गे गोहरारदन। ऐन खेखेल गे मल गोहरारदन। नीन एंगा चिच्का ईर गे दिम गोहरारदन, एन्देरगेका आर निंग्हे हिकनर।
- 10 अरा एंग्हे रई आद उर्मी निंग्हे हवे, अरा एन्द्रा निंग्हे रई अबड़ा एंग्हे हवे। अरा अत्रु तिम एंग्हे महबा दहदर मंजकी रई।
- 11 अक्कु ती ऐन खेखेल नू मल र'ओन, लिकिन ईर खेखेल नू र'अनर, अरा ऐन निंग्हे गुसन बरदन। अना नेम्हा बंगायो, नीन एंग्हे चिच्का निंग्हे नामे ही सवंग ती नीन आरिन खापा, का ईर नम्हे लेक्खा ओन्टेम र'ओर।
- 12 ऐन आर गने रहचकन खने, नीन एंगा चिच्का निंग्हे नामे ही सवंग ती ऐन आरिन खापकन अरा बछाबाचकन। आर ही मधे ती नठारना गे ठनचकासिन अम्बर ओर्त हूँ मल्ला नठारका। इदगेका नेम्हा पुथी ता लिरब्रका कत्था मनन नेकअन।
- 13 अक्कु ऐन निंग्हे गुसन बरदन, अरा ऐन खेखेल नू र'अना बारिम इबड़ा कत्थन ब'अदन, आँगो आर एंग्हे रिङ्गना ती नीदा आँगनर।
- 14 ऐन आर गे निंग्हे कत्थन चिच्कादन। अरा खेखेल आरिन कैर नंजा, एन्देरगेका ऐन एकासे खेखेल ही मलदन, अन्नेम आर हूँ खेखेल ही मलनर।
- 15 ऐन आरिन खेखेल ती हो'आ कला गे मल गोहरारदन, लिकिन आरिन मलदौ नाद ती खापा गे गोहरारदन।
- 16 एकासे ऐन खेखेल ही मलदन, अन्नेम आर हूँ खेखेल ही मलनर।
- 17 नीन आरिन निंग्हे मानी ती निमा गे नेम्हा कम'आ, निंग्हे कत्था दिम मानिम हवे।
- 18 एकन्ने नीन एंगन खेखेल नू तइय्कय, अन्नेम ऐन आरिन खेखेल नू तइय्कादन।
- 19 अरा ऐन आर ही चड्डे एंगन नेम्हा दाँडे बेसे निमा गे चि'अदन, का आर हूँ निंग्हे मानी ती नेम्हा मना आँगनर।
- 20 ऐन इबड़ा चेलर गे लेका मल गोहरारदन, लिकिन ईर तेंगना कत्था ती ने एंगन पत्त'ओर, आर गे हूँ गोहरारदन।
- 21 अना बंगायो, एकन्ने नीन एंग्हे नू र'अदय, अरा ऐन निंग्हे नू र'अदन, अन्नेम आर हूँ नम्हे नू ऑटम मना गे गोहरारदन। होले नीन एंगन तइय्कय, एन्ने खेखेल पत्त'आ आँगो।
- 22 अरा एकन्ने नाम ऑटम र'अदत अन्नेम आर हूँ ऑटम मना गे नीन एंगा चिच्का महबन ऐन आर गे चिचकन।



23 ऐन आर ही नू र'अदन, अरा नीन एंगहै नू र'अदय, होले आर ऑटम र'अना नू पखड़ मन्नर नेकअन। औंगे नीनिम एंगन तइय्कादय, अरा एकासे नीन एंगन चोन्हा नन्दय, अन्नेम आरिन हूँ चोन्हा नन्दय, एन्ने खेखेल अक्ख खच्चो।

24 अना बंगायो, खेखेल ही कम्मना ती मुन्द नीन एंगन चोन्हा नंजका ती नीन एंगा चिच्का एंगहै महबन ईर ऐरा बेद्दनर। औंगे नीन एंगा चिच्का आत्तर ऐन एक्सन र'अदन असन आर हूँ र'आ गे बेद्दन।

25 अना उजगो बंगायो, खेखेल निंगन बल्ली, लिकिन ऐन निंगन अक्कन। अरा नीन एंगन तइय्कय एन्ने ईर हूँ अक्खर केरर।

26 अरा ऐन निंगन आर गे दहदर नंजकन, अरा अउर हूँ निंगन दहदर ननोन। नीन एंगहै मइय्याँ रहचका चोन्हा ईर ही मइय्याँ हूँ र'आ गे, अरा ऐन आर नू र'आ गे हूँ ऐन इदन ननोन।”

योहनस 18

1 येसुस गोहरारनन नंजस मुंजियस खने, आस तंगहै चेलर गने किद्रोन ढाबन कट्टियस ती आ पक्खे केरस। असन ओन्टा जैतून मन्न ही बटकी रहचा। अइय्या आस तंगहै चेलर गने केरस।

2 येसुसिन धरत'आ गे पपहर गे संगे चि'ऊ यूदस हूँ आ अड्डन अख'आलियस, एन्देरगेका येसुस घड़ी घड़ी तंगहै चेलर गने अइय्या काला लगियस।

3 खने यूदस ओन्टा रोमी सैनर ही फउद अरा मुध नैगर अरा फरिसीर तरती तइय्का धर्मसी मन्दिर खापू सैनर गने आ बटकी नू बरचस। आर होरा, कन्डेल अरा लइई ही कमहड़ गुट्ठिन ओन्द्र ती बरचर।

4 येसुस तंगहै मइय्याँ मन्ना उर्मी कत्थन अक्खस ती बहरी केरस ती आरिन मेंजस, “नीम नेकन बेद्ददर?”

5 आर आनाकिर्ताचर, “नासरेत ता येसुसिन बेद्ददम।” येसुस बाचस, “आस ऐनिम हिकदन।” (येसुसिन धरत'आ गे पपहर गे संगे चि'ऊ यूदस हूँ आर ही गने इज्जका रहचस।)

6 “आस ऐनिम हिकदन” एन्ने येसुस बाचस खने, आर पछली किर्रियर ती खेखेल नू खत्रर केरर।

7 खने येसुस अउरिम आरिन मेंजस, “नीम नेकन बेद्ददर?” आर बाचर, “नासरेत ता येसुसिन बेद्ददम।”

8 येसुस आनाकिर्ताचस, “ऐन गा निमन बाचकन ‘आस ऐनिम हिकदन’, लिकिन नीम एंगन बेद्ददर होले, इबड़ारिन काला चि'आ।”



- 9“नीन एंगा चिच्का अबडर ती ओर्तारिन हूँ मल एब्सकन” एन्ने येसुस बाचका कत्था मना गे ईद एन्ने मंजा।
- 10सिमोन पतरस गुसन ओन्टा तलवार रहचा, अदिन आस नतकियस ओथ्रस अरा कोहाँ नैगासी ओर्त जॉखासिन खोतस। खने आसी तीना खेबदा खंडरा। आ जॉखासी नामे मलखोस रहचा।
- 11खने येसुस पतरसिन बाचस, “निंगहे तलवारन खाप नू उड्य्या। एम्बस एंगा चिच्का सस्ती ही डुबहा ती एंगा ओन्ना दिम रई।”
- 12फेन सैनर अरा आर ही सैनर ही मुद्धस अरा धर्मेसी मन्दिर खापू सैनर येसुसिन धरचर ती हैचर।
- 13अरा आसिन मुन्द हन्नास गुसन होच्चर, आस आ चाँन ता कोहाँ नैगस कैफसी तंग ससिरस रहचस।
- 14ई कैफस दिम यहूदी मुद्धर गे सलहा चिच्का रहचस का, “ओर्त आलस उर्मी आलर गे खेअना दौ हवे।”
- 15सिमोन पतरस अरा अउर ओर्तो चेलस येसुसी खोखा खोखा केरर। ई चेलस कोहाँ नैगासी चिन्हार आलस रहचस, खने येसुस गने कोहाँ नैगासी चाली गूटी केरस।
- 16लिकिन पतरस बहरी बली गुसन इज्जका रहचस। खने नन्ना चेलस ने कोहाँ नैगासी चिन्हार रहचस, आस बहरी बरचस ती बली खापू आली गने बाचस ती पतरसिन भितरी होच्चस।
- 17खने बली खापू रहचा आद पतरसिन मेंजा, “नीन हूँ ई आलासी चेलर ती ओर्त मलदय का?” पतरस बाचस, “मला, ऐन मलदन।”
- 18आद पड्य्याँ उल्ला रहचा, खने जॉखर अरा धर्मेसी मन्दिर खापू सैनर चिच्ची ओद्दर ती ओनबेडरआ इज्जर ती अखरआ लगियर। अरा पतरस हूँ आर ही गने इज्जस ती अखरआ लगियस।
- 19फिन कोहाँ नैगस येसुस ती आसी चेलर ही अरा आसी सिखाबअना ही पत नू मेंजस।
- 20येसुस आनाकिर्ताचस, “ऐन एन्देर सिखाबाचकन अदन ओर्मर अखनर। ऐन उर्मी यहूदीर खोंडरना गोइहा एडपा गुट्ठी नू अरा येरुसलेम मन्दिर नू घड़ी घड़ी सिखाबाचकादन, अरा नुडअरकी एन्द्रन हूँ मल बाचकन।
- 21खने नीन एंगन एन्देरगे मेन्दय? एंगहे सिखाबअनन ने मेंजका रअनर आर गुसन मेना। ऐन एन्देर बाचकन अदिन आर अखनर।”



- 22 येसुस एन्ने बाचस खने, धर्मेसी मन्दिर खापू सैनर ती ओर्तोस असन हेद्दे इज्जका रहचस, आस येसुसिन चटकाचस अरा बाचस, “कोहाँ नैगासिन एन्नेम आनाकिर्त'अना का?”
- 23 येसुस आसिन आनाकिर्ताचस, “ऐन इन्द्रिइम बिड़दो बाचकन होले, अदिन तेंगा का एन्देर बिड़दो बाचकन। लिकिन ऐन मानिमन बाचकन होले, एन्देरगे एंगन ल'अदय?”
- 24 फिन हन्नास येसुसिन हेंरका रांगे कोहाँ नैगस कैफस गुसन तइय्यस।
- 25 सिमोन पतरस असन इज्जस ती अखर'आ लगियस खने, आर आसिन बाचर, “नीन हूँ गा आसी चेलर ती ओर्तोस मलदय का?” आस नटचस ती बाचस, “ऐन आसी चलन मलदन।”
- 26 कोहाँ नैगासी जोंखर ती ओर्तोस, नेख'आ खेबदन पतरस खंडका रहचस, आसी पाहीयस रहचस। आ जोंखस पतरसिन बाचस, “नीन गा येसुस गने जैतून बटकी नू रहचकय, अदन ऐन ईरकन।”
- 27 खने पतरस अउर हूँ अदिन नटचस। अरा आ बारिम खेर चींखिया।
- 28 फिन आर कैफस गुस्ते येसुसिन रोमी राजी खापुसी गढ़िया नू होच्चर। आ बारी बिज्जना बेड़ा रहचा। आर गढ़िया भितरी इदगे मल केरर का आर सोतरा मल मनोर अरा कट्टना परब ही ओन्ना-मोखनन मोखा ओंगोर।
- 29 खने पिलातुस बहरी आर गुसन बरचस ती मेंजस, “नीम ई आलासी बिड़दो नू एन्देर दोस नन्दर?”
- 30 खने आर आनाकिर्ताचर, “ईस गुन्हा नंजका आलस मल रहचका होले, निंग्हे गुसन ईसिन मल ओन्द्र'ओम दने।”
- 31 खने पिलातुस आरिन बाचस, “नीम ईसिन हो'आ अरा निम्है नेग लेक्खा नीमिम नैवई नना।” यहूदीर बाचर, “एमा नेख'आ हूँ जिया पिटना ही अदिया मल्ला।”
- 32 (येसुस तंग्हे खे'अना ही पत्त नू मुन्द तिका रहचस का ऐन एकन्ने खे'ओन, आद मना गे इबड़ा एन्ने मंजा।)
- 33 खने पिलातुस गढ़िया भितरी केरस अरा येसुसिन मीखियस ती आसिन मेंजस, “नीन यहूदीर ही बेलय का?”
- 34 येसुस मेंजस, “नीन ई कथन निंग्हे ती मेन्दय का, महले नन्नर एंग्हे पत्त नू निंग्हे गुसन तिंंगियर का?”



35पिलातुस किर्त'अर बाचस, “ऐन यहूदी मलदन। निंग्हे आलर दिम अरा आर ही मुध नैगर निंगन एंग्हे खेक्खा नू सोंपचका र'अनर। नीन एन्देर नंजकय?”

36येसुस आनाकिर्ताचस, “एंग्हे राजी ई खेखेल ता मल्ली। एंग्हे राजी ई खेखेल ता रहचका होले, एंग्हे जोंखर लड़'ओर दने, का ऐन यहूदीर ही खेक्खा नू मल चीतार'ओन दने। लिकिन एंग्हे राजी ई खेखेल ता मल्ली।”

37खने पिलातुस बाचस, “होले नीन बेलय का?” येसुस आनाकिर्ताचस, “नीन ब'अदय का ऐन बेलन। मानिमन आलर गे तेंगा गे ऐन कुन्द्रकन अरा खेखेल नू बरचकन, एका ओर्तस मानिम गे र'अदस, आस एंग्हे मेन्दस।”

38पिलातुस आसिन बाचस, “मानिम एन्देर हवे?” आस एन्ने बाचस ती अउर हूँ बहरी यहूदीर गुसन केरस ती आरिन बाचस, “ऐन गा आसी मइय्याँ एन्देर हूँ बदी मल खक्खदन।

39लिकिन ऐन निमा गे कट्टना परब नू ओर्त गुडरकासिन अम्बना ही चाल र'ई। एन्देर नीम बेद्ददर का 'यहूदीर ही बेलासिन' निमा गे अम्बोन?”

40खने आर चिच्चियार'आ हेलरर अरा बाचर, “ईसिन मला, बरब्बसिन अम्बा चि'आ।” (बरब्बस गा हुलहुली नंजका आलस रहचस।)

योहनस 19

1फेन पिलातुस येसुसिन हो'अरकी कोर्ता लौताचस।

2अरा सैनर अच्चोन बिन्डो लेक्खा मोड़चर ती आसी कुक्कु नू अत्ताचर अरा आसिन भेटांगो ऐखर'आ किचरी अत्ताचर।

3अरा आसी गुसन बर'आ लगियर ती ब'आ लगियर, “अना यहूदीर ही बेलायो जोहार!” अरा आसिन थपड़'आ लगियर।

4पिलातुस अउरिम गढ़िया ती बहरी बरचस ती आरिन बाचस, “ऐरा, ऐन आसिन निम्है गुसन ओन्द्रदन का, नीम अख'ओर का ऐन आसी मइय्याँ एन्देर बदी हूँ मल खक्खकन।”

5खने येसुस अच्चो ही मुकुट अरा भेटांगो ऐखर'आ किचरिन अतियस ती बहरी बरचस। अरा पिलातुस बाचस, “ऐरा, ईस आ आलस!”

6मुध नैगर अरा धर्मसी मन्दिर खापू सैनर आसिन ईरियर खने, आर चिच्चियारनुम बाचर, “ईसिन क्रुस नू ठोक'आ, ईसिन क्रुस नू ठोक'आ।” खने पिलातुस आरिन बाचस, “नीमिम ईसिन हो'आ ती क्रुस नू ठोक'आ। लिकिन ऐन गा ईसी मइय्याँ एन्द्रा हूँ बदी मल खक्खदन।”



- 7 खने यहूदीर आसिन आनाकिर्ताचर, “एमा गे नेग रई, अरा आ नेग ही लेक्खा ईस पिटना जोगे र'अस, एन्देरगेका ईस तंगन धर्मेसी खद्दस ब'अदस।”
- 8 पिलातुस इदिन मेंजस खने, अउर कोइहे इल्चियस केरस।
- 9 अरा आस येसुसिन होच्चस ती अउरिम गढ़िया भितरी कोरचस ती येसुसिन मेंजस, “नीन एस्तेक बरचका र'अदय?” लिकिन येसुस एन्देर हूँ मल आनाकिर्ताचस।
- 10 खने पिलातुस आसिन बाचस, “एन्देरगे नीन एंग्हे गने मल कछनखदय? नीन बलदय का एंगा निंगन अम्बा गे हूँ अरा क्रुस नू ठोक'आ गे हूँ अदिया रई?”
- 11 येसुस आनाकिर्ताचस, “निंगा गे धर्मेस ती अदिया मल चीरका होले, निंगा एंग्हे नू एन्द्रा हूँ अदिया मल र'ओ दने। औंगे ने एंगन निंग्हे खेक्खा नू सोंपचस, आस कोइहे पाप ही बदी नू र'अदस।”
- 12 आ घड़ी ती पिलातुस येसुसिन अम्बा गे बिद्दियस। लिकिन यहूदीर चिच्चियार चिच्चियार बाचर, “नीन ईसिन अम्बोय होले, नीन कैसरसी संगीस मलदय, ने तंगन बेल ब'अदस, आस कैसरसी बिड़दो नू चो'अदस।”
- 13 पिलातुस इबड़ा कत्थन मेंजस खने, येसुसिन बहरी ओन्द्रस ती आस नेंवई नन्ना गदिया नू उक्कियस। आद पखना ती कमचका चौरा नूरहचा, ई चौरा इब्रानी भखा नू “गब्बता” बार'ई।
- 14 ई उल्ला कट्टना परब ही हप्ता ही सराजमा नन्ना ही उल्ला रहचा। अरा ईद मलागूटी लोहाड़ी बारा बजे रहचा। पिलातुस यहूदीरिन बाचस, “ऐरा, इसन निम्है बेलस!”
- 15 लिकिन आर गा चिच्चियारर, “ईसिन पिटा चि'आ! ईसिन पिटा चि'आ! ईसिन क्रुस नू ठोक'आ।” पिलातुस आरिन मेंजस, “ऐन निम्है बेलासिन क्रुस नू ठोक'ओन का?” खने मुध नैगर आनाकिर्ताचर, “कैसरसिन अम्बरकी एमा गे नन्ना बेलस ने हूँ मलकर।”
- 16 खने पिलातुस येसुसिन क्रुस नू ठोक'आ गे आर गे सोंपचस। खने आर येसुसिन होच्चर।
- 17 अरा येसुस तंग्हे क्रुसन तानिम चेड्डस ती “खपरोही अड्डा” बारना अड्डा केरस। अदिन इब्रानी भखा नू “गोलगोता” ब'अनर।
- 18 असन आर येसुसिन क्रुस नू ठोकचर। आस गने अउर ऐंड आलारिन क्रुस नू ठोकचर, ओर्तोसिन ओन पक्खा नू अरा ओर्तोसिन ओन पक्खा नू अरा येसुसिन गा मड़ी नू ठोकचर।
- 19 अरा पिलातुस ओन्टा दोस चिठी लिखताचस ती क्रुस नू लगाबाताचस। अरा अइय्या एन्ने लिखकी रहचा का, “नासरेत ता येसुस यहूदीर ही बेलस।”



- 20 ई दोस चिठी इब्रानी, लतीन अरा युनानी भखा नू लिखकी रहचा। अरा येसुसिन क्रुस नू ठोकचका अड्डा नगरे ती हेद्देम रहचा, औंगे बग्गे यहूदीर ई चिठिन पढ़चर।
- 21 औंगे यहूदी मुध नैगर पिलातुसिन बाचर, “‘यहूदीर ही बेलस’ एन्ने अमा लिख’आ, लिकिन ‘ईस तंगन यहूदीर ही बेलस बाचका रहचस’ एन्ने लिख’आ।”
- 22 लिकिन पिलातुस आनाकिर्ताचस, “ऐन एन्देर लिखचकन अदिन लिखिच खच्चिकन।”
- 23 सैनर येसुसिन क्रुस नू ठोकचका खोखा, आर आसी किचरी गुट्ठिन ओर्त ओर्त गे ओन फड़ा नंजर ती चार फड़ा नंजर। अरा आर आसी थालरन हूँ होच्चर। लिकिन आद बेगर उज्जका किय्या ती मइय्याँ गूटी इस्सका रहचा।
- 24 खने आर ताम ताम कछनखर, “नाम इदिन अम्बोत चर्रा, लिकिन चिठी टिड’ओत ती ऐरोत का ईद नैका खक्ख’ओ।” ईद इदगे मंजा का नेम्हा पुथी नू लिखकी रई आद मनी नेकअन, “आर एंग्हे किचरी गुट्ठिन तमा नू खट्टरर अरा एंग्हे किचरी गे चिठी टिड्डर।” औंगे सैनर इबड़न नंजर।
- 25 येसुसी क्रुस ही हेद्दे येसुसी तंग्यो, अरा आसी तंग्यो ही तंग्डी, अरा क्लोपासी तंगआली मरियम, अरा मगदला पद्दा ता मरियम इज्जका रहचर।
- 26 येसुस तंग्योन अरा आस चोन्हा नंजका चेलासिन हेद्दे इज्जका ईरियस खने, आस तंग्योन बाचस, “अनय आली ऐरय, ईस निग्दस।”
- 27 फेन आस आ चेलासिन बाचस, “ऐरा, ईद निंग्यो।” अरा आ बारिम आ चेलस अदिन तंग्हे जिम्मा होच्चस।
- 28 इदही खोखा येसुस अक्खस का आस तंग्हे उर्मी नलखन नंज खच्चियस। औंगे नेम्हा पुथी ता लिखका मना गे आस बाचस, “ऐन ओनक’आ र’अदन।”
- 29 असन तिस्सा अंगुर रासी ती निंदका संजगी उइय्का रहचा। अइय्या आर तूलिन बोथचर ती हुस्सोप खोप्पा ही डंडा नू पुज्जियर ती आसी बई नू चबाबाचर।
- 30 येसुस तिस्सा अंगुर रासिन खक्खियस खने, आस बाचस, “ईद पूरचकी रई।” अरा तंग्हे कुक्कन तुरऊ नंजस ती तंग्हे जियन बिच्छरस।
- 31 ई उल्ला सराजमा नन्ना उल्ला रहचा, अरा ननउल्ला मुध खन्न ऐख्रना उल्ला रहचा। यहूदीर मल बेद्दा लगियर का खन्न ऐख्रना उल्ला नू मेद गुट्ठी क्रुस नूर’ओ। औंगे आर पिलातुस गुसन नेचर का “अबड़र ही खेड्डे गुट्ठिन एस्त’आ चि’आ अरा आर ही मेद गुट्ठिन एत’आ चि’आ।”



- 32 औंगे सैनर बरचर ती येसुस गने क्रुस नू ठोकचका पहिल आलासी खेड्डे गुट्ठिन एस्सर, अरा नन्नासिन खेड्डे गुट्ठिन एस्सर।
- 33 लिकिन आर येसुस गुसन बरचर ती ईरियर खने, आस केचका रहचस। खने आर आसी खेड्डे गुट्ठिन मल एस्सर।
- 34 लिकिन सैनर ती ओर्तोस आसी पंजरन बरछी ती जोबचस, खने लेम खेंस अरा अम्मु उरखा।
- 35 (एकास इदन ईरियस आस गोवाह चि'अदस, अरा आसी गोवाह मानिम रई। आस अखदस का आस मानिम ब'अदस। नीम हूँ पत'आ गे दिम आस इदन गोवाह चि'अदस।)
- 36 “आसी खोचोल ओन्टा हूँ मल एस्तार'ओ।” एन्ने नेम्हा पुथी नू लिखका कत्था मना गे इबड़ा मंजा।
- 37 अउर हूँ, “नेकन आर बरछी ती जोबचर आसिन आर थिथवाँ ऐरोर” एन्ने नेम्हा पुथी नू अउर नन्ना अड्डा नू लिखकी रई।
- 38 इबड़ा ही खोखा अरिमतिया पद्दा ता योसेफस येसुसी मेदन हो'आ गे पिलातुस गुसन नेचस। आस येसुसी चेला रहचस। यहूदीर ही इल्चका ती आस तंगन आसी चेलस एन्ने दहदर मल नंजकाचस। पिलातुस मेदन हो'आ चिच्चस खने, आस बरचस ती येसुसी मेदन होच्चस केरस।
- 39 निकोदेमोस हूँ आस गने केरस। ईस गा मुन्द आँगहोल माखा बारी येसुस गुसन भेंट नना गे केरका रहचस। ईस मलागूटी पैतीस किलो मेसाबाचका गन्धरस अरा मुरभा ओन्द्रस बरचस।
- 40 आर इरबारिम येसुसी मेदन एत्ताचर, अरा यहूदीर ही माइना ही चाल ही लेक्खा महकारना रासी गने दिगहा कफन किचरी ती आसी मेदन पुज्जियर।
- 41 येसुसिन क्रुस नू ठोकचका अड्डा हेद्दे ओन्टा बगिचा रहचा। अरा आ बगिचा नू ओन्टा पुना मसड़ा रहचा, अइय्या इकला हूँ नेकन हूँ मल उइय्का रहचा।
- 42 अरा आर येसुसी मेदन अइय्यम उइय्यर, एन्देरगेका ईद यहूदीर ही खन्न ऐख्रना उल्ला ही सराजमा ही उल्ला रहचा अरा आ मसड़ा हूँ हेद्देम रहचा।

योहनस 20

- 1 हप्ता ही पहिल उल्ला मगदला पद्दा ता मरियम पह पहरना बेड़ा नू ऊखुर ऊखुर नुम मसड़ा गुसन बरचा। अरा मसड़न उर्दका पखनन मसड़ा ही बली ती टाँडरका ईरिया।
- 2 खने आद बुंगनुम सिमोन पतरस अरा नन्ना चेलस गुसन बरचा, नेकन येसुस चोन्हा नना लगियस। अरा आरिन बाचा, “आर उर्बासी मेदन मसड़ा ती ओथर ती होच्चर केरर, अरा एक्सन उइय्का र'अनर ऐम बलदम।”



- 3 खने पतरस अरा नन्ना चेलस मसड़ा तरा केरर।
- 4 आर इरबर संगे संगेम बोंगर, लिकिन नन्ना चेलस पतरस ती चाँडेम बोंगस ती मसड़ा गुसन मुन्द अंडसियस।
- 5 अरा आस खोलखरस ती ईरियस खने, कफन किचरी गुट्ठिन खोप्रका ईरियस, लिकिन भितरी मल केरस।
- 6 फेन सिमोन पतरस आसी खोखा खोखा अंडसियस, अरा मसड़ा नू भितरी केरस अरा आस कफन किचरी गुट्ठिन खोप्रका ईरियस।
- 7 अरा येसुसी कुक्कु नू हेंचका कफन किचरी पट्टी गने मलकी, लिकिन नन्ना अड्डा सथियाचका अरा भिन्गे उड्यका रहचा।
- 8 फेन मसड़ा नू मुन्द अंडसका नन्ना चेलस हूँ भितरी कोरचस। आस ईरियस ती पताचस।
- 9 एन्देरगेका “येसुस केचका ती उज्जा चो'अना दिम र'ई” एन्ने नेम्हा पुथी नू लिख्रका कत्थन आर अक्कु गूटी मल बुझका रहचर।
- 10 इदही खोखा चेलर तम्है एडपा किर्रियर केरर।
- 11 मरियम गा मसड़ा ही बहरी इज्जा ती चींखा लगिया। अरा आद चींखनुम चींखनुम मसड़ा नू खोलखरा ती ईरिया।
- 12 अरा असन येसुसी मैदन उड्यका अड्डा नू पंडरु किचरी अत्तका ऐंड मेर्खा पैकारिन ओर्तोसिन कुक्कु तरा ओर्तोसिन खेड्डे तरा उक्का ईरिया।
- 13 अरा मेर्खा पैकर अदिन मेंजर, “अनय आली! नीन एन्देरगे चींखा लगदी?” आद बाचा, “आर एंग्हे उर्बासिन होचर केरर, अरा एक्सन उड्यका र'अनर ऐन बलदन।”
- 14 आद एन्ने बाचा ती मुहरारा खने, आद येसुसिन असानिम इज्जका ईरिया, लिकिन आद येसुसिन चिन्ह'आ पोल्ला।
- 15 खने येसुस अदिन बाचस, “अनय आली, नीन एन्देरगे चींखालदी? नेकन बेद्दालदी?” मरियम आसिन बटकी खपुस बाचा ती आसिन बाचा, “उर्बायो, नीन आसिन होचकादय होले, तेंगा एक्सन उड्यकादय, अरा ऐन आसिन होओन।”
- 16 येसुस अदिन बाचस, “मरियम!” आद पछली किर्रिया ती इब्रानी भखा नू बाचा, “रब्बुनी।” रब्बुनी मने गुरु हवे।



- 17 येसुस अदिन बाचस, “एंगन अमय ऐसइअय, ऐन अक्कु गूटी बंगस गुसन मइय्याँ मल अरगकन। लिकिन कलय ती एंग्हे भइय्योरिन तेंगय, ऐन एंग्हे बंगस निम्है बंगस अरा एंग्हे धर्मस निम्है धर्मस गुसन मइय्याँ अरगदन कालदन।”
- 18 मगदला पद्दा ता मरियम ई कत्थन केरा ती चेलारिन तिंंगिया का, “ऐन उर्बासिन ईरकन!” अरा येसुस एन्द्रन आद गने बाचका रहचस, अदिन आद आरिन तिंंगिया।
- 19 अउलम हप्ता ही पहिल उल्ला बीड़ी पुतबारी, चेलर खोंडरका रहचर। अरा यहूदी मुद्धर ही इल्चिकआ ती आर बलिन मुच्चरर ती भितरी रहचर। येसुस बरचस ती आर ही मझी नू इज्जस, अरा चेलारिन बाचस, “निमा कोड़े मनन!”
- 20 अरा आस इदन बाचस ती तंग्हे खेक्खन अरा पंजरन आर गे ऐदस। खने उर्बासिन ईरियर ती चेलर रिङ्गा'आ हेलरर।
- 21 फिन येसुस अउरिम आरिन बाचस, “निमा कोड़े मनन। एकन्ने बंगस एंगन तइय्कादस अन्नेम ऐन हूँ निमन तइय्दन।”
- 22 अरा एन्ने बाचस ती आस आर ही मइय्याँ ऊरचस ती बाचस, “नेम्हा बोलतासिन इंङ्गा'आ।
- 23 नीम नेखअम ही पाप गुट्ठिन अम्बदर होले, अबड़ा आर गे अम्बतार'ओ। नीम आर ही पाप गुट्ठिन मल अम्बदर होले, अबड़ा आर गे मल अम्बतार'ओ।”
- 24 एकाबारी येसुस बरचस, अबड़ा बारो चेलर ती ओर्तोस दिदुमोस बारना तोमस चेलर गने मल रहचस।
- 25 खने नन्ना चेलर आसिन ब'आ लगियर, “ऐम उर्बासिन ईरकादम।” लिकिन आस बाचस, “एका गूटी ऐन आसी खेक्खा गुट्ठी नू काँटी ही भोंकन मल ऐरोन, अरा काँटी ही भोंका नू एंग्हे अंगठिन मल सज'ओन, अरा आसी पंजर नू एंग्हे खेक्खन मल सज'ओन, आ गूटी मल पत्त'ओन।”
- 26 आठ उल्ला खोंखा येसुसी चेलर फेन आ एइपा नू खोंडरका रहचर, अरा तोमस हूँ आर ही संगे रहचस। बली मुच्चका रहचा, अन्नु हूँ येसुस भितरी बरचस ती मझी नू इज्जस अरा बाचस, “निमा कोड़े मनन!”
- 27 तहाँ आस तोमासिन बाचस, “निंग्हे अंगठिन इसन सज'आ, अरा एंग्हे खेक्खा गुट्ठिन ऐरा, अरा निंग्हे खेक्खन एंग्हे पंजर नू सज'आ। अरा मल पत्त'ऊ अमा मना, लिकिन पत्त'ऊ मना।”
- 28 खने तोमस आसिन बाचस, “अना एंग्हे उर्बायो! अना एंग्हे धर्मे!”



29 तहाँ येसुस आसिन बाचस, “नीन एंगन ईरकादय, आँगे नीन एंगन पताचकय। एंगन बिगर ईरका ती ने एंगन पत'अनर आरिन धर्मस बरकत ननोस।”

30 येसुस तंगहै चेलर ही मुन्दहारे अउरिम नगदे अजगुत नलख नंजस, अबड़ा ई पुथी नू मल लिखकी रई।

31 लिकिन येसुस दिम मसीस, अरा धर्मसी खददस एन्ने नीम पत'आ गे अरा पताचका ती आसी नामे ती नीम उज्जनन खक्खा गे दिम इबड़ा लिखकी रई।

योहनस 21

1 इदही खोखा अउरिम येसुस तंगन तंगहै चेलारिन तिबेरया समुदर पिंडी नू ऐथस। आद एन्ने मंजा।

2 सिमोन पतरस अरा दिदुमोस बारना तोमस अरा गलिलेया जिला ही काना पददा ता नतनऐलस अरा जेबदयुसी दुयो तंगदा बगर अरा येसुसी अउर ऐंड चेलर अइय्या जुमुरका रहचर।

3 सिमोन पतरस बाचस, “ऐन इंजो ल'आ कादन।” अबड़ा ओर्मर आसिन बाचर, “ऐम हूँ निंगहै गने क'ओम।” खने आर उरखर ती डोंगा नू अरगियर, लिकिन अउला ता माखा आर एन्द्रा हूँ मल खक्खियर।

4 पह पहर'आ लगिया आ बारी येसुस पिंडी नू बरचस ती इजस। लिकिन चेलर आसिन आस येसुस हिकदस ब'अरकी चिन्ह'आ पोल्लर।

5 खने येसुस आरिन बाचस, “अना खददारो, नीम जोक्केम इंजो लौचर का?” आर आनाकिर्ताचर, “मला।”

6 खने आस बाचस, “डोंगा ही तीना पक्खे जल्ली हेबड़ा, होले निमा गे इंजो खक्ख'ओ।” खने आर अन्नेम जल्ली हिबड़ियर, अरा इंजो ही बग्गे बड़रका ती जल्लिन डोंगा नू नतगा पोल्लर।

7 खने नेकन येसुस चोन्हा नना लगियस आ चेलस पतरसिन बाचस, “ईस गा उर्बस हिकदस!” ईस गा उर्बस एन्ने आसी ब'अनन सिमोन पतरस मंजस खने, आस बहरी ता किचरी मल अतका चड्डे थालरन पोज्जरस। तहाँ अम्मू नू डेघचस अरा पिंडी तरा ओगालियस।

8 नन्ना चेलर पिंडी ती कोइहे गेच्छा मला, दुई सौ हाँथ केम नू रहचर, खने इंजो ती निंदका जल्लिन नतकनुम डोंगा नू बरचर।

9 आर डोंगा ती पिंडी नू इतियर खने, कुइला पखना ही न्युर नू इंजो कुट्टका र'अनन अरा असन असमन उइयका ईरियर।



- 10 येसुस आरिन बाचस, “नीम अक्कुन लौचका इंजो ती जोक्क ओन्द्र'आ।”
- 11 सिमोन पतरस डोंगा नू अरगियस ती जल्लिन पिंडी नू नतकियस ओन्द्रस। अइय्या ओन सौ तिरपन गोट कोहाँ इंजो रहचा। अरा एन्ने ई बग्गे इंजो गुट्ठी र'अना ती हूँ जल्ली मल चर्चा।
- 12 येसुस आरिन बाचस, “बरा, मोखा” लिकिन चेला मधेर ती “नीन ने तंग्हे?” एन्ने मेना गे नेका हूँ डिढ मल मंजा। एन्देरगेका आर अक्खर का आस उर्बस हिकदस।
- 13 येसुस बरचस ती असमन होच्चस ती आर गे चिच्चस, अरा इंजोन हूँ अन्नेम चिच्चस।
- 14 येसुस केचका ती उज्जा चोचस ती तंग्हे चेलर गे ऐथ्रना, ईद तिसर खेप हवे।
- 15 आर मोक्का खोखा येसुस सिमोन पतरसिन मँजस, “अना सिमोन, योहनसी खद्दायो! नीन ईरहिन्ती एंगन कोइहे चोन्हा नन्दय का?” आस बाचस, “हाँ उर्बायो! ऐन निंगन चोन्हा नन्दन नीन अखदय।” आस पतरसिन बाचस, “एंग्हे भेंडो खद्द गुट्ठिन ओन्त'आ।”
- 16 येसुस आसिन दोसर हेल अउरिम मँजस, “अना सिमोन, योहनसी खद्दायो! नीन एंगन चोन्हा नन्दय का?” आस बाचस, “हाँ उर्बायो! ऐन निंगन चोन्हा नन्दन नीन अखदय।” आस पतरसिन बाचस, “एंग्हे भेंडो गुट्ठिन खापा।”
- 17 येसुस आसिन तिसर हेल मँजस, “अना सिमोन, योहनसी खद्दायो! नीन एंगन चोन्हा नन्दय का?” तिसर हेल हूँ “नीन एंगन चोन्हा नन्दय का?” एन्ने येसुस मँजका ती पतरस दुक्खे मंजस। आस येसुसिन बाचस, “अना उर्बायो! नीन गा उर्मिन अखदय। नीन इदन हूँ अखदय का निंगन ऐन चोन्हा नन्दन।” येसुस आसिन बाचस, “नीन एंग्हे भेंडो गुट्ठिन ओन्त'आ।
- 18 ऐन निंगन मानिम ब'अदन, नीन निंग्हे जौख परिया नू नीनिम अत्ता लिक्कय, अरा एक्सन काला तुक्का लगिया असन काला लिक्कय। लिकिन नीन पच्चोय खने, नीन निंग्हे खेक्खा गुट्ठिन लमाब'ओय अरा नन्नस निंगन अत्त'ओस, अरा एक्सन नीन काला मल बेद्ददय असन आस निंगन हो'ओस।”
- 19 पतरस एका लेक्खा खे'अनन खक्खोस ती धर्मसिन महबा ननोस, एन्ने ऐद'आ गे दिम इदन येसुस तिगियस। फेन येसुस आसिन बाचस, “नीन एंग्हा खोखा गुड़ियार'आ।”
- 20 पतरस किर्रे ईरियस ती नेकन येसुस चोन्हा ननालियस आ चेलासिन खोखा बरना इरियस। ई चेलस दिम माखा ही खुड़ती ओनो बारी येसुसी एंवख नू ठेकारस ती मँजस, “अना उर्बायो, निंग्हे बिड़दो नू पपहर गे संगे चि'उस एका ओर्तस?”
- 21 पतरस आसिन ईरियस खने, येसुसिन मँजस, “अना उर्बायो! ईसी पत नू एन्देर हिके?”



22 खने येसुस आसिन बाचस, “ऐन आसिन एंग्हे किरना गूटी आस उज्जा गे ऐन बेद्ददन होले, इत्रु निंगा एन्देर? नीन एंग्हे खोखा गुड़ियार आ।”

23 औंगे ई कत्था पत्त'उर ही नू बींइरा केरा का आ चेलस मल खेओस। लिकिन येसुस एन्ने मल बाचका रहचस का, आस मल खेओस। आस एन्ने लेका बाचस, “ऐन आसिन एंग्हे किरना गूटी आस उज्जा गे ऐन बेद्ददन होले, इत्रु निंगा एन्देर?”

24 आ चेलस दिम इबड़ा कत्था ही पत्त नू गोवाह चि'अरकी इबड़ा कत्थन लिखचस। ऐम अखदम का आसी गोवाह मानिम रई।


25 येसुस अउर हूँ कोइहे नलख नंजस। ऐन सोचदन का, अबइन उर्मिन ओन्टे ओन्टे लिखना होले, लिखचका पुथी गोट्टा खेखेल नू मल सम'ओ दने।



तइरकर

तइरकर 1

- 1अना थेओफिलुस! ऐन एंग्है मुन्द ता पुथी नू येसुसी नंजका अरा सिखाबाचका उर्मी कत्थन लिखचकादन।
- 2आस तान चज्जियस अबड़ा तइरकर गे नेम्हा बोलतस ती पेसका चिच्का ती मेर्खा होतारना गूटी येसुस नंजका अरा सिखाबाचका उर्मी कत्थन अइय्यम लिखचकन।
- 3येसुस दुक्खे भोगचका अरा केचका खोखा आर गे कोइहे सबुत ऐदस का तान उज्जालदस। अरा आर गे बग्गे हेल चालीस उल्ला गूटी ऐथ्रते रहचस अरा धर्मेसी राजी ही पत्त नू कछ्छनख्रते रहचस।
- 4ओंग्होल येसुस आर गने मंडी ओनो बारी आरिन पेसस का, “नीम येरुसलेम नगरेन अमके अम्बा, लिकिन बंगासी गच्छरका ही पाब ऐरा, एकदा ही पत्त नू ऐन निमन मुन्द तिंकन।
- 5योहनस गा अम्मु ती नोइरताचस, लिकिन जोक्क उल्ला खोखा नीम नेम्हा बोलतस ती नोइतार'ओर।”
- 6एकाबारी तइरकर खोंडरर खने येसुसिन मँजर, “अना उर्बायो, नीन अक्कुनिम इस्राएल आलर गे राजिन किर्त'ओय चि'ओय का?”
- 7येसुस आरिन बाचस, “बंगस एका उल्ला महले बेड़ा गुट्ठिन ओक्ताचस ती तंग्है आकुस नू दिम उइय्कादस, अदिन अखना निम्है चाइ मलकी।
- 8लिकिन इकला नेम्हा बोलतस निम्है मइय्याँ एतोस, नीम सवंग खक्खोर अरा येरुसलेम नू अरा गोट्टा यूदेया अरा समारिया नू अरा खेखेल ही ठुट्ठु गूटी नीम एंग्है गोवाह मनोर।”
- 9आस इबड़न बाचका खोखा, आर ही ईरनुम ईरनुम आस मइय्याँ होतारस। अरा ओन्टा बदाली आर ही ईरनुम ती आसिन कुल्लिया चिच्चा।
- 10अरा आसी कानुम, एकाबारी आर मेर्खा तरा मेन ऐरनुम रहचर, खनेम आचका ऐंड मेत्र पंडरू किचरी अत्तर आर गुसन बरचर इज्जर।
- 11अरा आर बाचर, “अना गलिलेया आलारो, नीम एन्देगे इज्जनुम मेर्खा तरा मेन ऐरालदर? ई येसुस, ने निम्है गुसते मेर्खा होतारस, एकासे नीम आसिन मेर्खा काना ईरकादर, अन्नेम आस फिन बर'ओस।”
- 12तहाँ आर जैतून नामे ही परता ती येरुसलेम किर्रियर। ईद येरुसलेम ती अधा कोस गेच्छा नू रई।



- 13 अरा असन आर अंडसियर खने, ओन्टा पाटन कुठला नू केरर। अइय्यम पतरस अरा योहन अरा याकोब अरा अन्द्रेयस अरा फिलिप्पोस अरा तोमस अरा बरतोलोमैस अरा मतायोस अरा हलफैसी तंगदस याकोब अरा यहूदीर ही छछिन्द सैना ता सिमोन अरा याकोबसी तंगदस यूदस र'आलियर।
- 14 इबड़ा ओर्मर अरा जोक्क मुक्कर येसुसी तंगयो मरियम, अरा आसी भइय्योर गने ओन जिया मंजर ती गोहरारना अरा ने'अना नू र'आलियर।
- 15 अबड़ा उल्ला नू उन्दुल मलागूटी ओन सौ बीस आलर खोंडरका रहचर, पतरस आर ही मझी नू इज्जस ती बाचस,
- 16 “अना भईरो, नेम्हा पुथी ता लिखका मन्ना चाड़ रहचा, आद नेम्हा बोलतस दाऊदसी बई ती येसुसिन हेंरका आलर गे कइहाब'ऊ रहचका यूदसी पत नू मुन्द बाचका रहचस।
- 17 यूदस गा एम्है गने गन्तारस, अरा ई सुसर'अना नू संगे रहचस।
- 18 (यूदस तंगहै मलदौ नलख ही अर्जाचका ती ओन्टा खल्ल खीन्दियस, अरा आस अइय्या कुक्कु भरसा खत्रस, अरा आसी कूल बिदिगरा केरा, अरा आसी पोट्टा बहरी उरखा केरा।
- 19 ई कत्थन येरुसलेम ता उर्मी र'ऊ आलर अक्खर। ओंगे आ खल्ल ही नामे तम्है भखा नू 'हकेलदामख' बातार'ई, इदही माने 'खेंस ही खल्ल' हवे।)
- 20 ईद गा दाऊदसी डंडी पुथी नू एन्ने लिखकी र'ई, 'आसी र'अना अइडा धंस'ओ क'ओ नेकअन, अरा अइय्या ने हूँ मल ओक्र'ओर नेकअन।' अरा 'आसी पद आबोन नन्नस इंझ'ओस नेकअन।'
- 21 ओंगे उर्बा येसुस एम्है संगे काला बर'आ लगियस अबड़ा उर्मी बेड़ा गूटी एम्है गने रहचका आलर ती ओर्तोसिन नाम यूदसी अइडा नू चाजना र'ई।
- 22 आस येसुस योहनस ती नोडरस ती मेर्खा होतारना गूटी एम्है गने रहचका आलर ती ओर्तोस र'अना र'ई। आस एम्है गने येसुसी उज्जा चो'अना ही गोवाह र'ओस।”
- 23 खने आर बरसब्बास बारना योसेफसिन (ईसी नन्ना नामे यूसतोस हवे) अरा मत्तियसिन इजताचर।
- 24 अरा आर एन्ने बिन्ती नंजर, “अना उर्बायो, नीन ओर्मर ही मनेन अखदय, इदिन दहदर नना का इबडर ती नेकन चज्जिकादय,
- 25 का आस ई सुसर'अना नलख अरा तइरकर ही अइडन हो'ओस, एकदन यूदस अम्बियस ती तंगहै अइडा किरिम बिच्चियस।”



26 तहाँ आर आर ही नामे ती चिठी टिड्डर अरा चिठी मतियसी नामे नू उरखा। खने आस अबड़ा ग्यारा तइरकर गने तइरकस मंजस।

तइरकर 2

- 1 पेन्तेकोस्ते परब ही उल्ला अंडसिया खने आर ओर्मर ओन अड्डा खोंडरका रहचर।
- 2 आचका ही मेर्खा ती कोहाँ बरन्डो ही खरखना लेक्खा खरखना मेन्द्रा, अरा आर उक्काचर आ गोट्टा एडपा गुदकारा केरा।
- 3 अरा आर गे चिच्ची ही हदकारना गुट्ठी लेक्खा ऐथा, अरा अबड़ा ओर्त ओर्त मइय्याँ उक्किया।
- 4 अरा अबड़ा ओर्मर नेम्हा बोलतस नू निन्दियर केरर, अरा बोलतस एकासे कछनख्र'आ गे सवंग चिच्चस अबड़ा ओर्मर नन्ना नन्ना भखा कछनख्र'आ हेलरर।
- 5 आ बारी खेखेल ता बग्गे राजी ती परब गे बरचका भगती यहूदीर येरुसलेम नूर'आलियर।
- 6 ई खरखना मंजा खने, गोंहड़ा खोंडरा ती तम्है तम्है भखा नू अबड़ा आलारिन कछनख्रनन मेंजर ती आर अकबकरर।
- 7 आर नगदे अकबकरर केरर अरा अनचकरर ती ब'आ हेलरर, “अबड़ा कछनख्र'ऊ ओर्मा आलर गलिलेयर मलनर का?
- 8 होले नाम एकासे तम्है तम्है अयंग भखा ही भखा नू मेन्दत?
- 9 नम्है नू पारथी अरा मेदी अरा एलामिती अरा मेसोपोतामिया नू र'उर अरा यूदेया अरा कप्पदोकिया अरा पोन्तोस अरा आसिया
- 10 अरा फ्रुगिया अरा पम्फुलिया अरा मिसर अरा कुरेने हेद्दे ता लीबिया चक ता आलर अरा रोम ती कुद्दा ऐरा बरचका आलर
- 11 अरा यहूदी अरा यहूदी मंजका आलर अरा क्रेस अरा अरब ता आलर हूँ र'अनर। नाम अपन अपन भखा गुट्ठी नू आर धर्मेसी अजगुत नलख गुट्ठी ही पत्त नू तेंगनन मेन्दत।”
- 12 अरा आर ओर्मर अकबक मंजर अरा दुभेदी मंजर ती अपन ती नन्नारिन ब'आ हेलरर, “ईद ही मने एन्देर हवे?”
- 13 लिकिन नन्नर हंसी नंजर ती बाचर, “ईर गा बग्गे उंखका र'अनर।”



- 14 तहाँ पतरस अबड़ा ग्यारा तइरकर गने इज्जस अरा जोरसरिया ब'आ हेलरस, “अना यहूदी आलारो अरा येरुसलेम ता र'ऊ आलारो, इदन अख'आ हो'आ अरा एंग्हे कत्थन चिहूंक लग'अय मेना।
- 15 एकासे नीम सोचदर अन्ने ईर उंखका आलर मलनर, अक्कुन गा उल्ला ही नौ बज'आली।
- 16 लिकिन ईद धर्मसी कत्था तिंंगू योऐलसी बाचका कत्था लेक्खा मना ली।
- 17 धर्मस बाचकादस ‘मुंजना ही उल्ला गुट्ठी नू ऐन उर्मी आलर मइय्याँ एंग्हे बोलतन तुन्दोन, होले निम्है कुक्को कुक्के खदर धर्मसी कत्थन मुन्द तेंगोर, अरा निम्है जोंखर देखार गुट्ठी ऐरोर, अरा निम्है पचगीर तुंगुल गुट्ठी ऐरोर।
- 18 अरा ऐन अबड़ा उल्ला नू एंग्हे जोंखर अरा जोंख पेल्लर मइय्याँ हूँ एंग्हे बोलतन तुन्दोन। होले आर धर्मसी कत्थन मुन्द तेंगोर।
- 19 अरा ऐन मइय्याँ मेर्खा नू अजगुत नलख ऐद'ओन, अरा किय्या खेखेल नू खेंस अरा चिच्ची अरा अजम कुहड़ा ही चिन्हा ऐद'ओन।
- 20 उर्बासी कोहाँ अरा लौकारना उल्ला ही बरना ती मुन्द बीड़ी ऊखा अरा चन्दो खेंस लेक्खा मनो कओ।
- 21 तहाँ एका एका ओर्तर उर्बासी नामेन गोहरार'ओर आर नाइर'ओर।”
- 22 इस्राऐल आलारो, इबड़ा कत्थन मेनके। नीम अखदर का धर्मस नासरेत ता येसुस ती एका कोहाँ अजगुत नलख अरा अकबक नलख अरा चिन्हा गुट्ठी निम्है मझी नू नंजस। इत्रु ती धर्मस आसिन निमन ऐदस का आस धर्मस तरती तइरकाचस।
- 23 धर्मसी ओक्ताचका चिता बुता अरा धर्मस ती मुन्द बाचका कत्था लेक्खा आस सोंपतारस। आ येसुसिन नीम धरतारकी पपहर ही खेक्खा ती क्रुस नू अरगकर ती पिटकर।
- 24 लिकिन धर्मस आसिन खे'अना ही सस्ती गुट्ठी ही नुंजना ती अम्बताचस ती आसिन उज्जताचस चोदस। खे'अना गा आसिन तंग्हे तबे नू उइय्या पोल्ला।
- 25 आसी पत नू दाऊद बेलस एन्ने ब'अदस, ‘ऐन ऐरदन का उर्बस सगरो एंग्हे मुन्दहारे र'अदस। आस एंग्हे तीना पक्खा उक्कादस, औंगे ऐन जिटजिट र'अदन।
- 26 औंगे एंग्हे जिया रिझाई, अरा एंग्हे ततखा एंग्हे रिरयारनन तिंंगई, अरा एंग्हे मेद असरा ती खन्न ऐखर'ओ।



- 27 एन्देरगेका नीन एंगहे बोलतन केचकर ही मझी नू मल अम्बोय, अरा नीन निंगहे नेम्हा आलासिन किता मल चि'ओय।
- 28 नीन एंगन उज्जना ही डहरे गुट्ठिन अखताचकय। अरा निंगहे मुन्दहारे एंगन रिझ ती नीन्द'ओय।
- 29 अना भईरो! पूरखा दाऊदसी पत नू ऐन निमन बड़ियर गने ब'आ ओंगदन का, आस केचस केरस अरा आसिन मंडियर हूँ, अरा आसी मसड़ा इन्ना गूटी हूँ नम्हे मझी नू रई।
- 30 दाऊदस ओन्टा धर्मसी कत्था तिगुस रहचस। आस अख'आलियस का धर्मस किरया मोक्खस ती आसिन एन्ने बाचका रहचस, 'ऐन निंगहे जईपुंईरिन ओर्त आलासिन निंगहे बेल-गदिया नू ओक्त'ओन।' 31 दाऊदस मुन्द तिम इदन अक्खस ती मसीसी उज्जा चो'अना ही पत नू एन्ने बाचस, 'धर्मस आसिन केचकर ही मझी नू मल अम्बियस अरा आसी मेदन किता मल चिच्चस।' 32 ई येसुसिन धर्मस केचका ती उज्जताचस चोदस, ऐम ओर्मम इदही गोवाह हिकदम।
- 33 तहाँ धर्मस आसिन होच्चस ती तंगहे गने ओक्तारकी राजी नन्ना ही मईन आबोन चिच्चस। अरा आस बबस गच्छरका नेम्हा बोलतासिन खक्खियस ती अदिन नमा चिच्चस, एकासे अक्कुन नीम ऐरदर अरा मेन्दर।
- 34 दाऊदस गा मेर्खा मल्ला अरगका। लिकिन आस ब'अदस, 'उर्बस एंगहे उर्बासिन बाचस, 'नीन एंगहे तीना पक्खे उक्का र'आ,
- 35 एका गूटी ऐन निंगहे बैरीरिन निंगहे तबे नू मल ओन्द्र'ओन।''
- 36 ओंगे इस्राएल ही ओर्मा आलर इदन मानिम गने अख'आ हो'आ का नीम क्रुस नू ठोकचका ई येसुसिन धर्मस उर्बस हूँ अरा मसीस हूँ कमचस।''
- 37 एकाबारी आलर इदिन मेंजर खने आर ही जिया दोलख्रा, अरा आर पतरस अरा नन्ना तइरकर ती मेंजर, "भईरो, एमा एन्देर नन्ना मनो?"
- 38 पतरस आरिन बाचस, "नीम जियन किर्त'आ, अरा नीम ओर्मा आलर निम्हे पाप गुट्ठी ही छमा गे येसु मसीसी नामे ती नोइर'आ। होले नीम इनाम नू नेम्हा बोलतासिन खक्खोर।
- 39 एन्देरगेका ई गच्छरका निमा गे अरा निम्हे खद्दर गे अरा नन्ना राजी गुट्ठी नू र'उर गे हूँ हवे। ईद उर्बस नम्हे धर्मस तंगहे गुसन मींखका ओर्मा आलर गे हवे।''
- 40 तहाँ पतरस अउरिम कोइहे कत्थन मेन्ताचस अरा चेता बाचस, "नीम निमन ई कुचुरहा परिया ती बछाब'आ।''



- 41 एकार पतरसी कल्थन पत्ताचर आर नोडरर। अउलम तीन हजार केम आलर चेलर गने मेसरर।
- 42 अरा आर तडरकर ही सिखाब'अना अरा अपन ती नन्नर गने चोन्हा ती संगे भेंटारना नू अरा संगे ओन्ना-मोखना ती उर्बासी दाँडे आबोन सुरता नन्ना नू अरा संगे गोहरारना नू लक्का रहचर।
- 43 ओर्मर मड्य्याँ इल्चका कोरचा केरा, अरा नगदे कोहाँ कोहाँ अजगुत नलख अरा चिन्हा तडरकर ती मनालिया।
- 44 अरा उर्मी पत्त'ऊ आलर ओन संगे र'आलियर, अरा आर ही एन्द्रा रहचा अबड़ा ओर्मर ही सजहा रहचा।
- 45 आर तम्है जिनिसन अरा कुर्जिन बीसालियर अरा अदही ढिबन ओर्मर ही चाड़ ही लेक्खा ओर्मर गे खट्टालियर।
- 46 आर उर्मी उल्ला ओन जिया मनरकी धर्मसी मन्दिर ही चाली नू खोंडर'आलियर। अरा तम्है एड़पा एड़पा गुट्ठी नू उर्बासी दाँडे आबोन सुरता नन्ना ती रिझ अरा उजगो जिया ती मंडी ओनालियर।
- 47 अरा धर्मसी ओहमा ननालियर ती उर्मी आलर ती मया खक्खियर। अरा ने ने नाडर'आलियर आरिन उर्बस उर्मी उल्ला आर नू मेस'आलियस।

तडरकर 3

- 1 पतरस अरा योहनस ओनबीड़ी तीन बजे बिन्ती ही बेड़ा नू धर्मसी मन्दिर कालालियर।
- 2 अरा आलर ओर्त आलासिन चेड़'अरकी बर'आलियर। आस कुन्द्रका तिम लेंगड़ा रहचस। आर आसिन उर्मी उल्ला ओन्द्र'आ लगियर ती सुन्दर बारना धर्मसी मन्दिर ही बखड़े बली गुसन ओक्त'आ लगियर का आस मन्दिर कालू आलर गुसते तेम्बोस।
- 3 आस पतरस अरा योहनसिन धर्मसी मन्दिर कोरना ईरियस ती आर ही गुसले तिम्बियस।
- 4 पतरस अरा योहनस आसिन थिथावाँ ईरियर, अरा पतरस बाचस, “एम्है तरा ऐरा!”
- 5 खने आस आर ही गुसले इन्द्रिइम खक्खना ही असरा ती आर ही तरा ऐरा हेलरस।
- 6 लिकिन पतरस आसिन बाचस, “सोना अरा चाँदी गा एंगहै गुसन मल्ला, लिकिन एंगहै गुसन एन्द्रा रई, अदिन निंगा चि'अदन। नासरेत ता येसु मसीसी नामे ती चो'आ अरा कुद्दा नुंगा।”
- 7 अरा पतरस आसी तीना खक्खन धरचस ती चोदस। आ बारिम लेंगड़ासी खेड्डे अरा मूका गुट्ठी नू पैया बरचा केरा।



- 8 अरा आस उदकारस ती इज्जस ती कुद्दा नुंगा हेलरस। अरा आस ईकनुम अरा उदकारनुम अरा धर्मेसी ओहमा नन्नुम आर ही गने धर्मेसी मन्दिर ही चाली नू कोरचस।
- 9 उर्मी आलर आसी कुद्दना नुंगना अरा धर्मेसी ओहमा नन्नन ईरियर।
- 10 आलर आसिन चिन्हचर का ईस गा धर्मेसी मन्दिर ही सुन्दर बखड़े बली गुसन ओक्करकी तेम्बालियस। आसी गने एन्देर मंजा अदिन आर ईरियर ती अकबकरर ती हैकटरर केरर।
- 11 आ लेंगड़ा आलस पतरस अरा योहनसिन नगदे बजर धरचका ती आर गने रहचस खने, उर्मी आलर अकबक मंजर ती सालोमोन नामे पिन्डा तरा आर ही गुसन बोंग बरचर।
- 12 पतरस इदन ईरियस ती आरिन बाचस, “इसाएल आलारो! नीम इदही पत नू एन्देरगे अकबक मन्दर? ऐम एम्है सवंग ती मलता एम्है भगती ती ई आलासिन ऐकना कुद्दना जोगे कमचकादम ब'अरकी नीम एम्है तरा एन्देरगे एन्ने ऐरा लगदर?”
- 13 अब्राहम अरा इसाक अरा याकोबसी धर्मेस, नम्है पूरखर ही धर्मेस तंग्हे जोंखस येसुसिन महबा नंजस। नीम आसिन पिलातुस गे सोंपचकर, अरा पिलातुस आसिन अम्बा बिद्दियस खने, नीम आसिन ताड़चकर।
- 14 नीम नेम्हा अरा उजगो आलासिन मल हुकमारकर, अरा आल पिटका आलासिन अम्बा गे आनकर।
- 15 अरा नीम उज्जना ही अक्स'उसिन पिटकर, अरा आसिन धर्मेस केचका ती उज्जना चोदस, अरा इबड़ा कत्था ही ऐम गोवाह र'अदम।
- 16 अरा आ येसु मसीस मइय्याँ ता पत'अना ती अरा आसी नामे तिम ई आलस पैया खक्खियस, नेकन नीम अखदर अरा ऐरदर। अरा येसुसी मइय्याँ ता पत'अना आद दिम नीम ओर्मर ही मुन्दहारे ईसिन दौ गने कोड़े नंजकी र'ई।
- 17 भईरो! ऐन अखदर का नीम अरा निम्है मुद्धर तम्है बल्लना ती इदिन येसुस गे नंजर।
- 18 लिकिन धर्मेस मुन्द तिम तंग्हे कत्था तिंगुर ती ‘मसीस गे दुक्खे चोदना र'ई’ एन्ने बाचका लेक्खा अदिन पूरा नंजस।
- 19 औंगे नीम जियन किर्त'आ, होले धर्मेस निम्है उर्मी पापन छमा ननोस।
- 20 तहाँ खन्न ऐख्रना ही बेड़ा उर्बा धर्मेसी मुन्दहारे ती बर'ओ। अरा आस येसुसिन तइय्योस, नेकन आस मुन्द तिम निमा गे मसी कमचकादस।



- 21 येसुस मेर्खा नूर आ गे चाड़ रई, एका गूटी धर्मस उर्मी जिनिनस गुट्ठिन पुना कम ओस। एकदन धर्मस चिरान नू तंग्हे कत्था तिगुर ती बाचकाचस।
- 22 मूसस बाचस, 'उर्बस निम्है धर्मस एंग्हे लेक्खा ओन्टा धर्मसी कत्था तिगुसिन निम्है आलर ती निमा गे चोद ओस। आस निमन एन्देर एन्देर ब ओस अबड़ा उर्मिन चिहुंक ती मेनके।
- 23 एकास आ धर्मसी कत्था तिगुसी कत्थन मल मेनोस, आस आलर मझी ती नठार ओस कालोस।'
- 24 उर्मी धर्मसी कत्था तिगुर सामुऐल ती खोखा गूटी ती बरचका धर्मसी कत्था तिगुर ओर्मर इबड़ा उल्ला ही पत नू तिकाचर।
- 25 नीम अबड़ा धर्मसी कत्था तिगुर ही जईपुई र अदर। अरा नीम धर्मस निम्है पूरखर गने नंजका गच्छरकन खक्खकर। आस निम्है बंगस अब्राहमसिन बाचस, 'निग्है बनस गुट्ठी ती गोटा खेखेल ता आलर बरकत खक्खोर।'
- 26 धर्मस निमन ओर्मरिन निम्है मलदौ नलख ती किरत आ गे अरा बरकत नना गे आस तंग्हे जौखस येसुसिन इजताचस ती निम्है गुसन मुन्द तइय्यस।”

तइरकर 4

- 1 पतरस अरा योहनस आलर गने कछनख आ लगियर खनेम, नैगर अरा धर्मसी मन्दिर ही सैनर ही मुद्धस अरा सदुकी आलर आर ही गुसन बरचर।
- 2 आर कैरारका रहचर, एन्देरगेका पतरस अरा योहनस आलरिन सिखाब आ लगियर का येसुस केचका ती उज्जा चोचका र अदस। ओंगे आर सोचचर का आलर ताम हूँ केचका ती उज्जा चो आ ओंग ओम एन्ने पत आ ओंगोर दने।
- 3 खने आर पतरस अरा योहनसिन हेंचर ती जेहेल नू सज्जर चिचर। पुतकी किरकी रहचा, खने आर आरिन दोसर उल्ला गूटी जेहेल नू उइयकाचर।
- 4 लिकिन ने आर ही तेंगनन मेंजका रहचर, अत्रु ढेर आलर पताचर। अक्कु मलागूटी मैतर पाँच हजार पत ऊ आलर मंजर केरर।
- 5 दोसर उल्ला यहूदी मुद्धर अरा सेयान आलर अरा नैग सिखाब उर येरुसलेम नू खौंड़रर केरर।
- 6 कोहाँ नैगस हन्नास अरा कैफस अरा योहन अरा अलेक्सन्द्रस अरा कोहाँ नैग एइपातर ता अउर ओर्मा आलर असन बरचकाचर।
- 7 आर पतरस अरा योहनसिन मझी नू इजताचर ती इबड़ा कत्थन मेना हेलरर, “नीम एका सवंग ती मलता एका नामे ती ई नलख आबोन नंजकर?”



- 8 खने पतरस नेम्हा बोलतस नू मंजस ती आरिन बाचस, “आलर ही मुद्धारो अरा सेयान आलारो!
- 9 ऐम ओन्टा लेंगड़ा आलस मइय्याँ दौ नंजकादम, अदही पत्त नू इन्ना एम्है ती मेन्तार आ लगी का? अरा ईस एकासे कोड़े मंजस केरस अदिन नीम अख आ बेद्ददर का?
- 10 नीम ओर्मर अरा इस्राएल ही उर्मी आलर इदिन अक्का र आ का नासरेत ता येसु मसीसी सवंग ती ई आलस कोड़े मंजस ती निम्है मुन्दहारे इज्जका र अदस। नीम गा येसुसिन क्रुस नू ठोकचकर, लिकिन धर्मस आसिन केचका आलर ती उज्जताचस चोदस।
- 11 ईद आ पखना हवे इदिन नीम मिस्त्री आलर तरकूटी नंजकाचकर, अरा आद दिम कोड़ा ही बड़ियर पखना मंजा केरा।
- 12 आसिन अम्बरकी एकअम नन्नर ती नाइरना मलकी। एन्देरगेका गोटा खेखेल नू आलर गे येसु नामे ती नन्ना नामे मल्ला चीरका का अत्रु नम्है नाइरना मना आँगो।”
- 13 पतरस अरा योहनसी डिढ आबोन ईरियर ती अरा आर मल्ला पढ़चका आलर अरा आर सोया आलर बाचर ती कोहाँ सभा ता आलर अकबक मंजर केरर। फिन आर चिन्हचर का ईर येसुस गने रहचका आलर हिकनर।
- 14 लिकिन कोड़े मंजका आलासिन संगे इज्जका ईरियर ती आर ही बिड़दो एन्देर हूँ ब आ पोल्लर।
- 15 आँगो आर पतरस अरा योहनसिन सभा ती बहरी काला गे आनियर। अरा आर अपन ती नन्नर गने सलहा नंजर,
- 16 अरा बाचर, “नाम ईर गने एकासे ननोत? येरुसलेम ता र ऊ उर्मी आलर गे इदही अरो मंजा केरा का ईर ओन्टा अजगुत नलख नंजकानर, इदिन नाम मला एकासे ब ओत?”
- 17 अन्नु हूँ आलर नू इदही बीड़रना अम्बो मना, इदगे नाम ईरिन डंट ओत का अक्कु ती येसुसी नामे ती नेकन हूँ एन्देर हूँ अमके ब आ।”
- 18 अबड़र पतरस अरा योहनसिन फिन मीखियर अरा आनियर का नीम आलारिन कहियों येसुसी नामे ती अमके ब आ महले अमके सिखाब आ।
- 19 खने पतरस अरा योहनस आरिन किर्त अर बाचर, “नीमिम फरिय आ, धर्मसी ऐरना नू एकदा बने मनो का ऐम धर्मसी कत्थन महले निम्है कत्थन पेस्र ओम।
- 20 एन्देरगेका ऐम एन्दरन ईरकादम अरा मंजकादम अदही पत्त नू मल तेंगना एम्है ती मल मनो।”



- 21 खने आर पतरस अरा योहनसिन फिन एलेकताचर ती अम्बियर चिच्चर। अरा आर आरिन दंडे चिआ गे एन्देर ओट्टा हूँ मल खक्खरा, एन्देरगेका ई मंजका पत्त नू उर्मी आलर धर्मेसी ओहमा नना लगियर।
- 22 आ अजगुत नलख ती कोड़े मंजका रहचस आस चालीस बछर ती बग्गे रहचस।
- 23 जेहेल ती अम्बका खोखा पतरस अरा योहनस तम्है आलर गुसन केरर, अरा मुध नैगर अरा मुद्धर आरिन एन्देर बाचका रहचर अदिन उर्मिन तिंगियर।
- 24 आर आर ही कत्थन मेंजर ती ओन संगे धर्मेसिन जोरसरिया गोहरारआ हेलरर, अरा बाचर, “उर्बायो! नीन खेखेलन अरा मेखन अरा समुदर आबोन अरा अबड़ा नू रऊ उर्मिन कमचकय।
- 25 नीन नेम्हा बोलतस ती निंग्हे जोंखस एम्है पूरखस दाऊदस ती एन्ने बाचकय, ‘एन्देरगे उर्मी नन-यहूदीर हुही ननरकी आलर अनभनियाँ कत्था गुट्ठिन सोचनर?’
- 26 खेखेल ता बेलर लड़ाई गे चोचर अरा अक्स'उर उर्बासी बिड़दो अरा आसी मसीसी बिड़दो नू खोंडरर।’
- 27 इसन हेरोदेस अरा पोन्तियुस पिलातुस नन-यहूदीर अरा इस्राएल आलर गने येरुसलेम नू खोंडरर ती नीन मसी कमचका निंग्हे नेम्हा जोंखस येसुसी बिड़दो नू चोचर।
- 28 लिकिन आर इन्द्रिम नंजर आद निंग्हे मने लेक्खा नीन मुन्द तिम ओकताचका रहचकय अदिन नंजर।
- 29 उर्बायो! अक्कु नीन आर ही एलेकताना गुट्ठिन ऐरा अरा निंग्हे जोंखर एमा गे निंग्हे दौ कत्थन कोइहे डिठ गने मेन्त'आ गे सवंग चिआ।
- 30 नीन निंग्हे कोहाँ सवंग आबोन ऐद'आ, एकाबारी ऐम निंग्हे नेम्हा जोंखस येसुसी नामे ती आलारिन उजग'ओम अरा चिन्हा अरा अजगुत नलख गुट्ठी ननोम।”
- 31 इकला आर गोहरारका रहचर अन्नेम आर खोंडरका रहचर आ अड्डा नुक्रा केरा, अरा अबडर जम्मर नेम्हा बोलतस ती निन्दियर ती धर्मेसी कत्थन डिठ गने तेंगा हेलरर।
- 32 पत्त'ऊ आलर ही खोंडहा ओन जिया अरा बोलता नू रहचर। अरा ने हूँ तम्है खुर्जी गुट्ठिन एम्है मल ब'आ लगियर अन्ति उर्मिदिम सजहा रहचा।
- 33 तइरकर कोहाँ सवंग गने आलारिन तम्है गोवाह आबोन तेंगा लगियर का उर्बा येसुस मानिम नू केचका ती उज्जा चोचस। अरा अबड़ा ओर्मर मइय्याँ धर्मेसी कोइहे मया रहचा।



- 34 अबड़र नू ने हूँ इन्द्रिइम जिनिस ही चांड नू मल रहचर, एन्देरगेका नेख'आ गुसन खल्ल महले एड़पा गुट्ठी रहचा अबड़न आर बीसरकी अदही दामन
- 35 तड़रकर गुसन ओन्द्र'आ चि'आ लगियर। अरा नेका चाड़ मना लगिया अन्नेम खट्टा चि'आ लगियर।
- 36 योसेफस नामे कुप्रियोस टापू ता लेवी गोतोर ता ओर्तोस रहचस, आस गे तड़रकर बरनबास नामे पिंजकाचर इदही माने “रिङ्गत'ऊ खद्दस” हवे।
- 37 आस तंगहै ओन्टा खल्ल आबोन बीसियस ती अदही दामन तड़रकर गे ओन्द्रस चिचस।

तड़रकर 5

- 1 हनानिया नामे ओन्टा आलस अरा तंग'आली सफिरा तम्है ओन्टा खल्लन बीसियर।
- 2 आस तंग'आली ही अखनुम अदही दाम ही ओन हींस आबोन अपन गे उइय्यस अरा ओन हींसन होच्चस ती तड़रकर गुसन उइय्यस चिचस।
- 3 तहाँ पतरस बाचस, “हनानिया, सैतान एन्देरगे निंगहै जिया नू नेम्हा बोलतासिन ठक'आ गे अरा खल्ल ही दाम ही ओन हींसन निंगा गे उइय्या गे आकुस नंजा?”
- 4 आ खल्लन बीसना ती मुन्द आद निंगहै दिम रहचा। अरा बीसका खोखा हूँ अदही दामन निंगहै मने लेक्खा नना ओंगा लिक्कय। एन्देरगे नीन एन्ने नलख नना गे सोचकय? नीन एंगन मला धर्मसिन ठकचकय।”
- 5 हनानियास ई कथन मेंजस ती असानिम खतरस ती केचस केरस। इदही पत नू मेंजका आलर ओर्मर मइय्याँ इल्चक'आ कोरचा केरा।
- 6 जोक्क जोंखर चोचर ती आसिन कफन नू मुसगियर ती बहरी होचर ती मंडियर चिचर।
- 7 मलागूटी तीन घंटा खोखा तंग'आली भितरी बरचा। लिकिन आद एन्ने मंजकी रहचा अदिन बल्ला लगिया।
- 8 पतरस अदिन बाचस, “एंगन तेंगय, खल्लन नीम इवन्दा तिम बीसकर का?” आद बाचा, “हाँ, इवन्दा तिम बीसकम।”
- 9 पतरस अदिन बाचस, “नीम उर्बासी बोलतन बिढ़'आ गे एन्देरगे भिंडरकर? ऐरय, निंगहै मेतासिन मंडियर आर बली गुसन र'अनर, आर निंगन हूँ बहरी हो'ओर।”
- 10 आ बारिम आद आसी खेडमूली नू खतरा ती केच्चा केरा, अरा जोंखर भितरी बरचर अरा अदिन केचका खक्खियर। अरा आर अदिन बहरी होचर ती तंग'मेतासी धरी नू मंडियर।



- 11 गोट्टा कलीसिया नू अरा एका बग्गे आलर इबड़ा कत्थन मेंजकाचर अबड़ा ओर्मर मइय्याँ इल्चका कोरचा केरा।
- 12 तइरकर ती आलर ही मझी नू नगदे चिन्हा अरा अजगुत नलख गुट्ठी मना लगिया। पत्त'ऊ आलर जम्मर धर्मसी मन्दिर नू सालोमोन कुड़िया ब'अना अड्डा नू उर्मी उल्ला खोंडर'आ लगियर।
- 13 नन्ना आलर नेखा हूँ आर ही गने मेसरा गे डिढ मल मना लगिया। अन्नु हूँ आलर आरिन नगदे मईन नना लगियर।
- 14 अरा नगदे बग्गे मैतर अरा मुक्कर उर्बा येसुसिन पत्त'आ लगियर। अरा आर पत्त'ऊ आलर ही खोंडहा नू मेसर'आ लगियर।
- 15 आलर रोगियारिन सइक गुट्ठी नू हो'आ लगियर ती पिटरी नू खटी नू कीद'आ चि'आ लगियर का पतरस अन्नु कट्टोस होले आसी ऐख अबडर ती जोक्कोर मइय्याँ मनो।
- 16 येरुसलेम ही अड्डे-बेड्डे ता नगरे गुट्ठी ती हूँ बग्गे आलर रोगियारिन अरा मलदौ बोलता गुट्ठी ती धरचका आलारिन ओन्द्र'आ लगियर, अरा आर ओर्मर कोड़े मना लगियर।
- 17 तहाँ कोहाँ नैगस अरा आसी गने रहचका संगेर सदुकी आलर कैर ती भरमारर केरर।
- 18 अरा तइरकारिन धरचर ती जेहेल नू मुच्चियर चिच्चर।
- 19 लिकिन माखा उर्बासी ओन्टा पैकस जेहेल ही बलिन तिसगस ती आरिन बहरी ओन्द्रस ती बाचस,
- 20 “कला, धर्मसी मन्दिर चाली नू इज'आ ती ओर्मा आलर गे पुना उज्जना ही पत्त ता उर्मी कत्थन तेंगा।”
- 21 आर इदिन मेंजर ती बिज बेड़ा नू धर्मसी मन्दिर नू कोरचर ती सिखाब'आ हेलरर। तहाँ कोहाँ नैगस अरा आसी संगेर बरचर ती इस्राएल ही उर्मी सेयान आलर र'अना कोहाँ सभा आबोन मीखियर। अरा जोक्क आलारिन जेहेल ती तइरकारिन ओन्द्र'आ गे तइय्यर।
- 22 लिकिन आ सैनर जेहेल नू अंडसियर ती तइरकारिन असन मल खक्खियर। अरा आर किरियर ती हलन तिंगियर।
- 23 “ऐम ईरकम का जेहेल एडपा गा बड़ियर गने मुच्चका रहचा अरा खापुर हूँ बहरी बली गुट्ठी गुसन इज्जका रहचर, लिकिन तिसगकम खने भितरी नेकन हूँ मल खक्खकम।”



- 24 इदिन मेंजर ती धर्मसी मन्दिर खापुर ही मुद्धस अरा मुध नैगर आर ही पत नू सोच नू मंजर केरर अरा अकबकरर का ईद एन्देर मना लगी।
- 25 आ बारिम एकअम ओर्तस बरचस ती तिंगियस, “नीम जेहेल नू मुच्चका रहचकर, आर धर्मसी मन्दिर चाली नू इज्जर ती आलारिन सिखाब'आ लगनर।”
- 26 खने धर्मसी मन्दिर खापुर ही मुद्धस सैनर गने केरर ती आरिन ओन्द्रर, लिकिन बड़पेलहा मला, एन्देरगेका आर आलारिन एलचियर का आलर तमन पखना ती लोड़ग'ओर।
- 27 आर तइरकारिन ओन्द्रर ती कोहाँ सभा ही मुन्दहारे इजताचर। खने कोहाँ नैगस आरिन मेंजस,
- 28 “ऐम निमन चेताबाचकम ती पेसका मल चिच्चकम का ई नामे ती अमके सिखाब'आ? अन्नु हूँ नीम गोटा येरुसलेम ता उर्मी आलारिन आसी पत नू तिंकर चिच्चकर। अरा आसी पिटका ही बदी एम्है मइय्याँ नना लगदर।”
- 29 खने पतरस अरा नन्ना तइरकर आनाकिर्ताचर, “एमा गे आलर ही ती धर्मसी पेसना कोइहे चाइ रई।
- 30 नीम गा येसुसिन क्रुस नू ठोकचकर ती पिटकर चिच्चकर, लिकिन नम्है पूरखर ही धर्मस आसिन केचका ती उज्जताचस।
- 31 धर्मस दिम आसिन उर्बस अरा बछाब'ऊ नंजस ती तंग्हे तीना चोक्ख मईन ही अइडन चिच्चस, एकत्रु का आस इस्राएल आलर गे जिया किर्ता'अना अरा पाप छमा चि'ओस।
- 32 ऐम इबड़ा कत्था ही गोवाह हिकदम, अरा धर्मस तंगन पेस'उर गे चिच्का नेम्हा बोलतस हूँ गोवाह र'अदस।”
- 33 इदिन मेंजर ती आर कैर ती निन्दियर केरर अरा आर तइरकारिन पिटा खच्चा गे अंगियाचर।
- 34 आ बारी ओर्मा आलर ती मईन खक्खका नेग सिखाब'ऊ गमालिएल नामे ओन्टा फरिसीस कोहाँ सभा नू इज्जस अरा तइरकारिन एगघड़ी गे बहरी तइय्या गे आनियस।
- 35 अरा कोहाँ सभा ता आलारिन बाचस, “इस्राएल आलारो, नीम चिह्क र'आ का इबड़ारिन एन्देर नना बेददालदर।
- 36 जोक्क उल्ला मुन्द थैउदास दहदर मंजस, आस ऐन कोहाँ आलस र'अदन बाचस, अरा चार सौ केम आलर आसी खोखा ईक् आलर रहचर। लिकिन आस पिटतारस, अरा आसी पेस'ऊ आलर ओर्मर छितियारर केरर अरा आर एन्देर हूँ नना पोल्लर।



37अदही खोखा नामे लेखना बेड़ा नू गलिलेया ता यूदस दहदर मंजस। आस नगदे आलारिन घुरियाचस ती तंग्हे खोखा बर'आ चिच्चस। आस हूँ केच्चस अरा आसी पेस्र'ऊ आलर ओर्मर छितियारर केरर।

38औंगे अक्कु ऐन ई पत्त नू निमन ब'अदन, नीम ई आलारिन एन्देर हूँ अमा नना अम्बा चि'आ। ई चिताबुता महले ई नलख आलर तरती र'ई होले, ईद तानिम नठार'ओ क'ओ।

39लिकिन ईद धर्मस तरती र'ई होले, इदिन नीम नठाब'आ पोल्लोर। नीम धर्मसी बिड़दो लड़ाई ननुर मनोर।”

40आर आसी कत्थन इंझर अरा तइरकारिन मीखियर अरा आरिन कोर्ी ती लौताचर। अरा आरिन चेताबाचर का नीम येसुसी नामे ती आलारिन अमके तेंगा ब'अरकी अम्बियर चिच्चर।

41तइरकर रिझ मंजर ती कोहाँ सभा एड़पा ती उरखर। एन्देरगेका आर येसुसी नामे चड्डे मार मोखा गे अरा लज्जे मोखर'आ गे जोगे गन्तारर।

42उर्मी उल्ला आर धर्मसी मन्दिर चाली नू अरा एड़पा एड़पा नू काला लगियर ती सिखाब'आ लगियर अरा तेंगा लगियर का येसुस दिम मसीस हिकदस।

तइरकर 6

1अबड़ा उल्ला नू पत्त'ऊ आलर बग्गे मन्नुम कालालियर खने, युनानी भखा कछनस्र'ऊ यहूदी पत्त'ऊ आलर इब्रानी भखा कछनस्र'ऊ यहूदी पत्त'ऊ आलारिन कुटमुटर'आ हेलरर, एन्देरगेका एम्हे रड़ियाहीर गे उर्मी उल्ला ता मंडी बटा बेस लगे मल खक्ख'ई।

2खने अबड़ा बारो तइरकर ओर्मा पत्त'ऊ आलारिन तम्हे गुसन मीखियर ती बाचर, “ईद दौ मलकी का ऐम धर्मसी कत्था तेंगनन अम्बरकी मंडी खट्टना नू र'ओम।

3औंगे अना भईरो, निम्हे ती सात गोटंग आलारिन चाजा, ने नेम्हा बोलतस अरा लूर ती निन्द्रका ती बेस नामे खक्खका र'अनर, आरिन ई नलख नू ओक्त'ओत।

4होले ऐम गा गोहरारना नू अरा दौ कत्था तेंगना नू लक्का र'ओम।”

5ई कत्था उर्मी खोंइहा गे बेस लगिया, खने आर सात आलारिन चज्जियर। आर ईर हिकनर का पत्त'अना अरा नेम्हा बोलतस नू पोकता रहचका स्तेफनोस अरा फिलिप्पोस अरा प्रोखोरोस अरा निकानोर अरा तीमोन अरा परमेनास अरा अन्तियोखेया नगरे ता निकालाउस एकास मुन्द यहूदी धरम नू मन्नका नन-यहूदी रहचस।

6ईरिन तइरकर ही मुन्दहारे ओन्द्रर। अरा आर गोहरारर ती आर ही मइय्याँ खेक्खा ओक्ताचर।



- 7 तहाँ धर्मसी कत्था बिंङरनुम केरा अरा येरुसलेम नू पत्तऊ आलर ही गनती बग्गे मन्नुम केरा। अरा बग्गे यहूदी नैगर हूँ पत्ताचर अरा मनचर।
- 8 स्तेफनोस धर्मसी मया अरा सवंग ती निन्दियस ती कोहाँ अजगुत नलख अरा चिन्हा गुट्ठी ऐद'आ लगियस।
- 9 तहाँ बिट्ठी नन्ना ती अम्बरका आलर ही गोड़हा एड़पा ता जोक्कोर स्तेफनोसी बिड़दो नू चोचर ती आनानस्र'आ हेलरर। आर कुरेने अरा अलेक्सन्द्रिया अरा किलिकिया अरा आसिया ता यहूदी आलर रहचर।
- 10 लिकिन स्तेफनोस एका लूर अरा बोलतस ती बाचस अदही बिड़दो नू आर ब'आ पोल्लर।
- 11 खने आर “ऐम स्तेफनोसिन मूसासी अरा धर्मसी बिड़दो नू निंदा नन्नन मेंजकम” एन्ने ब'आ गे आलारिन कलेकले तकाबाचर।
- 12 अरा आर आलारिन अरा सेयान आलारिन अरा नेग सिखाब'उरिन स्तेफनोसी बिड़दो नू तोतकाचर। फिन आर स्तेफनोसिन धरचर ती कोहाँ सभा नू होच्चर।
- 13 अरा आर ठकवा गोवाह गुट्ठिन इजताचर का “ईस नेम्हा अड्डा अरा मूसासी पेसका ही बिड़दो नू ब'अनन मल अम्बदस।
- 14 अरा ऐम गा ईसी एन्ने ब'अनन मेंजकम का नासरेत ता येसुस ई अड्डन नठाब'ओस अरा मूसस नमा चिच्का चाल गुट्ठिन बदल'ओस चि'ओस।”
- 15 कोहाँ सभा नू उक्का ओर्मर स्तेफनोसिन ओन ढिठ ऐरा लगियर का आसी मुही मुरुत मेर्खा पैकासी लेक्खा ऐथा।

तइरकर 7

- 1 तहाँ कोहाँ नैगस स्तेफनोसिन मेंजस, “इबड़ा कत्था मानिम हवे का?”
- 2 आस आनाकिर्ताचस, “भईरो अरा बंगारो, एंग्हेन मेना। नम्है बंगस अब्राहमस खरान नगरे नू ओक्रना ही मुन्द मेसोपोतामिया देस नूर'अना बेड़ा नू महबा ती निन्द्रका धर्मस आस गे ऐथ्रस।
- 3 अरा बाचस, ‘निंग्हे देसन अरा एड़पन अम्बा चि'आ, अरा निंगन ऐद'ओन आ देस नू कला।’
- 4 खने आस खलदेयोर ही देसन अम्बियस ती खरान नू ओक्रस। अरा तम्बासी केचका खोखा धर्मस असलेक आसिन गुछाबाचस ती ई देस नू ओन्द्रस, एकसन इन्ना नीम ओक्रदर।



- 5ई देस नू धर्मस आस गे एन्द्रा हूँ मल चिच्चस अरा खेड्डे उइय्या गे हूँ अड्डा मल चिच्चस, अरा आस गे ओन्टा हूँ खद्द-खर्रा मल रहचर। अन्नु हूँ धर्मस गच्छरस का ऐन ई देसन निंगा गे अरा निंगहै जईपुंईर गे चिओन।
- 6अरा धर्मस आसिन बाचस, का निंगहै जईपुंईर नन्ना देस नू उज्जोर। अरा असन आर बिट्ठी ननू जोंख मनोर अरा चार सौ बछर गूटी डाहर'ओर।
- 7लिकिन एका देस नू आर बिट्ठी ननू जोंख मनोर आ देसन ऐन दंडे चिओन। अदही खोखा आर असलेक उरखोर बर'ओर, अरा ई अड्डा नू एंगहै महबा ननोर।
- 8खने धर्मस अब्राहमस गे खतना ही गच्छरकन चिच्चस। अन्नेम अब्राहमस इसाकसिन कुन्द्रताचस अरा आठ उल्ला मंजा खने, आस इसाकसी खतना नंजस। इसाकस ती याकोब अरा याकोबस ती बारा गोतोर ही बंगर कुन्द्र।
- 9अरा याकोबसी तंगदाबगर इस्गहा ती तंगडिस योसेफसिन मिसर देस नू बीसियर चिच्चर। लिकिन धर्मस आसी गने रहचस,
- 10अरा आसी उर्मी सस्ती ती आसिन नाडियस। धर्मसी चिच्का लूर ही चड्डे मिसर देस ता बेलस फारओस आसिन पत्तारस अरा मईन नंजस। बेलस आसिन मिसर देस ही राजीखापू कमचस अरा गोट्टा गढ़िया अरा अइय्या ता आलारिन आसी अदिया नू चिच्चस।
- 11अबड़ा उल्ला नू गोट्टा मिसर देस नू अरा खानान देस नू अकाल मंजा अरा कोइहे सस्ती मंजा। खने नम्है पूरखर गे ओन्ना-मोखना मल खक्ख'आ लगिया।
- 12लिकिन याकोबस मिसर देस नू खेस्स-तीखील खक्ख'आ लगी मंजस खने, आस तंगहै खद्दारिन पहिल खेप असन तइय्यस।
- 13दोसर खेप नू योसेफस तंगन तंगहै भइय्योर नू दहदर नंजस। अरा फारओस गे हूँ योसेफसी एइपातर ही अरो मंजा।
- 14खने योसेफस तम्बस याकोबस अरा आसी गोट्टा एइपातारिन मेखा तइय्यस। अबड़र जम्मर गने पछतर आल रहचर।
- 15याकोबस मिसर देस केरस। आस अरा आसी खद्दर असानिम केचर।
- 16अरा आर ही मरिन सुखेम ओन्द्र ती कबर नू उइय्यर। एकदन अब्राहमस सुखेम नू हेम्मोरसी खद्दर ती चान्दी चिच्चस ती खिंदकाचस।



- 17 धर्मस अब्राहमसिन गच्छरकाचस, अदही मन्ना ही उल्ला हेददे अंडसा लगिया खने, निम्है आलर ही गन्ती मिसर देस नू नगदे बग्गे मना हेलरा।
- 18 खोखा ओन्टा पुना बेलस ने योसेफसी पत नू एन्देर हूँ बल्ला लगियस आस मिसर देसन राजी नना हेलरस।
- 19 आस नम्है आलर गने छलक'अर नलख नना हेलरस। आरिन सस्ती नंजस अरा आस नम्है पूरखारिन तम्है बोलो खद्दारिन हेबड़ा गे देवाँ नंजस का आर अम्बोर उज्जा।
- 20 अबड़ा उल्ला नू मूसासी कुन्द्रना मंजा। आस धर्मसी मुन्दहारे फब'आ लगियस, आसिन तीन महिना गूटी तम्बासी एड़पा नू पोसर।
- 21 अदही खोखा आसिन बहरी अम्बना दिम मंजा खने, फारओसी तंग्दा आसिन बेटा गढ़चा अरा तंग्हे खद्दस लेक्खा पोसा।
- 22 मूसस गे मिसर आलर ही उर्मी लूर सिखाबातारा का आस कछनख्रना अरा नलख नू सवंगिय मंजस।
- 23 आस चालीस बछर ही मंजस खने, आस तंग्हे इस्राएल भईर गने भेंट मना गे सोच'आलियस।
- 24 मूसस ओन्टा मिसर आलस ओन्टा इस्राएल आलासिन मलदौ नन्नन ईरियस ती आस मिसर आलासिन लौचस पिटियस ती इस्राएल आलासी सहाड़ा नंजस।
- 25 मूसासी सोच रहचा का एंग्हे भईर अख'ओर धर्मस एंग्हे ती आरिन नाड़ोस। लिकिन आर मल बुझर।
- 26 दोसर उल्ला मूसस ऐंड इस्राएल आलर ही नग्गानख्रनन ईरियस ती आरिन मेसाब'आ गे एन्ने बाचस, 'आलारो, नीम भईर हिकदर, नीम एन्देरगे अपन अपन नू मलदौ नना लगदर?'
- 27 लिकिन ने नन्नस मइय्याँ मलदौ ननालियस आस मूसासिन तुक्कियस अरा बाचस, 'ने निंगन एम्है मइय्याँ आकुस ननू अरा नैवई ननू कमचा?'
- 28 एकासे चरो नीन मिसर आलासिन पिटकय अन्नेम एंगन हूँ पिटा बेद्ददय का?'
- 29 एन्ने ब'अनन मूसस मंजस ती असले बोंगस अरा मदियाम देस नू नन्ना राजियस लेक्खा रहचस। अरा असन आसी ऐंड खद्दर मंजर।
- 30 चालीस बछर मंजा खने ओन्टा मेर्खा पैकस आसिन सीनाय परता ही टोड़ंग नू लघरना खोप्पा ही हदकारना नू ऐथ्रस।



- 31 मूसस इदिन ईरियस खने अकबक मंजस, अरा ऐरा गे हेददे केरस। खनेम धर्मसी ई ब'अना मेन्द्रा,
- 32 'ऐन निंगहे पूरखर ही धर्मन, अब्राहम, इसाक अरा याकोबसी धर्म हिकदन।' खने मूसस इल्चिक'आ ती असरा हेतरस अरा ऐरा गे डिढ मल मंजा।
- 33 खने उर्बस आसिन बाचस, 'खेड्डे ती खरपा गुट्ठिन इंचा, एन्देरगेका नीन एसन इज्जकादय आद नेम्हा खेखेल रई।
- 34 ऐन मानिम मिसर देस नू र'ऊ एंगहे आलर ही कलपारनन ईरकादन, अरा आर ही अउवारनन अरा चींखनन मेंजकादन। खने आरिन नाड़ा गे इतिका र'अदन। औंगे बरा, अक्कु ऐन निंगन मिसर देस तइय्योन।'
- 35 एका मूसासिन आर 'ने निंगन एम्हे मइय्याँ आकुस ननू अरा नैवई ननू कमचा?' बाचर ती मल इंझकाचर। आसिनिम धर्मस आकुस ननू अरा बछाब'ऊ कमचस ती लघरना खोप्पा नू ऐथ्रका रहचस आ मेर्खा पैकस ती आसिन तइय्यस।
- 36 ईसिम मिसर देस ती आरिन ओन्द्रस। अरा मिसर देस नू अरा खेंसो समुदर नू अरा टोडंग नू चालीस बछर गूटी अजगुत नलख अरा चिन्हा गुट्ठी ऐदस।
- 37 ई मूसस दिम इस्राएल आलारिन बाचस, 'धर्मस निम्हे मझी ती एंगहे लेक्खा ओन्टा धर्मसी कत्था तिगुसिन निमा गे चोद'ओस।'
- 38 ई मूसस दिम इस्राएल खोंडहा गने टोडंग नू रहचस। अरा सीनाय परता नू तंगहे गने कछनरखका मेर्खा पैकस गने रहचस अरा नम्हे पूरखर गने रहचस। आस उज्जनन चि'अना पेसकन धर्मस ती खक्खियस अरा आ पेसकन नमा चिच्चस।
- 39 लिकिन नम्हे पूरखर आसिन मन'आ मल बिददियर। आर आसिन दुस्सर अरा मिसर देस किरा बिददियर।
- 40 अरा आरोन ती बाचर, 'एम्हे मुन्द मुन्द काला गे एमा देवता गुट्ठी कम'आ, ई मूसस गा एमन मिसर देस ती ओथ्रस ओन्द्रकाचस, लिकिन ऐम बल्लालदम का आस गे एन्देर मंजा।'
- 41 खने अबड़ा उल्ला नू आर बछरु लेक्खा ओन्टा मूर्ती कमचर। अरा अदही मुन्दहारे दाँडे नंजर अरा तम्हे खेक्खा ती कमचका मूर्ती आबोन ओड़ लग्गर रिरयारर।
- 42 तहाँ धर्मस आर ही बिडदो मंजस ती आरिन चन्दो बीड़ी अरा बीनको गुट्ठिन ओड़ लग्गा गे अम्बियस चिच्चस। एन्ने धर्मसी कत्था तिगुर ही पुथी नू लिखकी रई का, 'अना इस्राएल आलारो, नीम टोडंग नू चालीस बछर गूटी एंगा गे दान गुट्ठी अरा दाँडे गुट्ठी मल ओन्द्रकर।



- 43 नीम निम्हें देवता मोलोख ही तमबुन अरा निम्हें देवता रैफान ही बीनकोन अरा अबड़न ओड़ लग्गा गे नीम कमचका मूर्ती गुट्ठिन निम्हें गने चेड्डकर ओन्द्रकर। औंगे ऐन निमन बाबुलोन देस नू हेंर आ हो आ चि ओन।
- 44 धर्मस आर ही गने रहचस अदही गोवाह ही तमबु टोडंग नू नम्हें पूरखर गने रहचा। धर्मस मूसासिन ई तमबुन एकासे कमना रई अदिन बाचस। अरा आस धर्मस एकासे ऐदस अन्नेम अदिन कमचस।
- 45 खोखा इकला यहोसुस नम्हें पूरखारिन नन्ना राजी गुट्ठी ही बिड़दो नू लड़ाई नना गे कड़हाबाचस का धर्मस आ अड्डा ती आ राजी ता आलारिन ओथ्रस चिचस। तहाँ तमबुन हूँ नम्हें पूरखर अड्य्या होच्चर ती केरर। अरा दाऊद बेलासी बेड़ा गूटी आद अड्य्यम रहचा।
- 46 दाऊदस गे धर्मसी ऐरना नू सोग्गे मंजा। खने दाऊदस तान याकोबसी धर्मस गे मन्दिर कम आ गे धर्मसिन गोहरारस।
- 47 लिकिन सालोमोनस गा धर्मस गे मन्दिर कमचस।
- 48 अन्नु हूँ उर्मी ती कोहाँ धर्मस आलर ही कमचका एडपा नू मल रअदस। एकासे का धर्मसी कत्था तिगुस बाचस,
- 49 उर्बस बअदस, मेर्खा एंग्हे बेल-गद्दी अरा खेखेल एंग्हे खेड्डे ओकत अना कंडो, नीम एंगा गे एका लेक्खा एडपा कम ओर? अरा एंगा ओक्र आ गे एक्सन अड्डा रई।
- 50 इबड़ा उर्मिन ऐन कमचकन।”
- 51 अना ओड़ मल लग्गू आलारो! नीम निम्हें जियन धर्मस गे मल चिचकर महले आसिन मल मेनदर, अरा सगरो नेम्हा बोलतासी बिड़दो नन्दर, एकासे निम्हें पूरखर नंजर अन्नेम नीम हूँ नन्दर।
- 52 धर्मसी कत्था तिगुरिन नेकन निम्हें पूरखर मल्ला डाहचका? आर आ उजगो आलासी बरनन ने ने मुन्द तिम तिगियर आरिन पिटियर। अक्कु नीम आ उजगो आलस मसीसिन धरचकर अरा पिटकर।
- 53 नीम मेर्खा पैकस ती पेसकन गा खक्खकर, लिकिन अदिन मल पेसकर।”
- 54 स्तेफनोसी इबड़ा कत्थन आर मँजर ती कैर ही मारे उडतरर केरर अरा आसी बिड़दो नू पल्ल चब्र आ हेलरर।



55 लिकिन स्तेफनोस गा नेम्हा बोलतस ती निन्दियस ती मेर्खा तरा मेन ईरियस अरा धर्मेसी महबन अरा धर्मेसी तीना चोक्ख येसुसी इज्जकन ईरियस।

56 अरा आस बाचस, “ऐरा! ऐन मेर्खन तिसगरका अरा मनवा खद्दासिन धर्मेसी तीना चोक्ख इज्जका ऐरदन!”

57 तहाँ आर जोरसरिया चिच्चियारर ती खेबदा गुट्ठिन कप्पियर अरा आर जम्मर जुम्मरर ती आसी मइय्याँ झपारर।

58 अरा आर आसिन नगरे ती बहरी ओथ्रर ती आसिन पखना ती लोडगाचर। अरा ने आसी बिडदो नू गोवाह रहचर, आर तम्है किचरिन सउल नामे ओन्टा जोंखासी खेडमूली ओक्ताचर चिच्चर।

59 आलर स्तेफनोस मइय्याँ पखना ती लोडगा आ लगियर खने, आस एन्ने गोहरारस, “उर्बायो येसु, एंग्हे बोलतन इंझ्र'आ।”

60 अरा आस मूकलिदरस ती जोरसरिया बाचस, “उर्बायो, ई पापन ईर ही मइय्याँ अमके नना।” अरा एन्ने बाचस ती आस जियन बिछरस।

तइरकर 8

1 सउलस स्तेफनोसिन पिटना नू हूँकारी नंजकाचस। अउलम येरुसलेम ता कलीसिया गे कोइहे खिलपत बरचा। तइरकारिन अम्बर जम्मर गोट्टा यूदेया राजी अरा समारिया राजी नू बींइरर केरर।

2 भगतर स्तेफनोसिन मंडियर चिच्चर अरा आस गे कोइहे खोबरारर।

3 लिकिन सउलस कलीसिया आबोन सस्ती नना लगियस। एइपा एइपा नू कोर्च कोर्च मुक्कारिन अरा मेटारिन घिडराच घिडराच जेहेल नू सज'आ लगियस।

4 एकार छितिर बितिर मंजका रहचर आर एसन एसन केरर असन दौ कत्था तेंगा लगियर।

5 तहाँ फिलिप्पोस समारिया ता ओन्टा नगरे नू केरस ती अइय्या ता आलारिन मसीसी पत नू तेंगा लगियस।

6 एकाबारी गोंहड़ा फिलिप्पोसी ब'अनन अरा आसी नंजका अजगुत नलख ही चिन्हा गुट्ठिन ईरियर ती आर आसी सिखाब'अनन चिहुंक लगे मेना लगियर।

7 नेखा नेखा नू मलदौ बोलता गुट्ठी रस्सकीचा, अबड़ा आर ती जोरसरिया चिच्चियारनुम उरखा। अरा कैनो बग्गे लकवा बेमरहर अरा लेंगड़ा आलर कोड़े मंजर।

8 औंगे आ नगरे ता आलर रिझ्र'आ लगियर।



- 9सिमोन नामे ही ओन्टा आलस आ नगरे नू रहचस। आस नस'आ लगियस ती समारिया ता आलारिन अकबक नना लगियस। अरा तंगन कोहाँ आल ब'आ लगियस।
- 10सन्नी कोहाँ उर्मी आलर आसी कत्थन मेना लगियर ती ब'आ लगियर, “ई आलस गुसन कोहाँ सवंग बारना धर्मेसी सवंग रई।”
- 11अरा आर आसी कत्थन मेना लगियर, एन्देरगेका आस नगदे उल्ला गूटी टोन्हा सवंग ती आरिन अनचका बाचका उइयका रहचस।
- 12लिकिन धर्मेस आलारिन राजी नन्ना ही पत नू अरा येसु मसीसी नामे ही पत नू फिलिप्पोस दौ कत्था मेन्त'आ लगियस खने, आर आसी कत्थन पत्ताचर ती मेतर मुक्कर ओर्मर नोडरर।
- 13सिमोनस हूँ पत्ताचस ती नोडरस ती आस फिलिप्पोसी गने गुडियारस। अरा आस फिलिप्पोस ती मंजका चिन्हा अरा कोहाँ अजगुत नलख गुट्ठिन ऐरा लगियस ती हैकटरस।
- 14तहाँ येरुसलेम नू र'ऊ तइरकर मेंजर का समारिया ता आलर धर्मेसी कत्थन इंझर खने, आर पतरस अरा योहनसिन आर ही गुसन तइय्यर।
- 15आर इरबर असन केरर ती आर समारिया आलर गे नेम्हा बोलतासिन खक्खा गे गोहरारर।
- 16अक्कु गूटी आर ही नू नेख'आ मइय्याँ हूँ नेम्हा बोलतस मल इतका रहचस। आर उर्बा येसु नामे ती नोडरका लेका रहचर।
- 17तहाँ पतरस अरा योहनस आर ही मइय्याँ खेक्खा उइय्यर अरा आर नेम्हा बोलतासिन खक्खियर।
- 18सिमोनस ईरयस का तइरकर तम्है खेक्खन आलर मइय्याँ उइय्यर खने नेम्हा बोलतासिन खक्खनर। खने आस आर ही गुसन रुपिया ओन्द्रस,
- 19अरा बाचस, “एंगा हूँ ई सवंग आबोन चि'आ का ऐन नेख'आ मइय्याँ खेक्खा उइय्योन आर नेम्हा बोलतासिन खक्खनर नेकअन।”
- 20लिकिन पतरस आसिन बाचस, “निंग्हे रुपिया निंग्हे गने नठार'आ नेकअन, एन्देरगेका नीन धर्मेसी इनाम आबोन रुपिया ती खक्खा गे सोचकय।
- 21ई पत नू निंगा एन्द्रा हूँ हिसा महले बटा मलकी, एन्देरगेका निंग्हे जिया धर्मेसी मुन्दहारे उजगो मलकी।
- 22नीन निंग्हे ई पाप गे जियन किर्त'आ अरा उर्बासिन गोहरार'आ होले, आस निंग्हे ई मलदौ सोच आबोन छमा ननोस।
- 23ऐन ऐरदन का नीन इस्गहा ती निन्द्रका र'अदय अरा नीन पाप ही आकुस नू र'अदय।”



- 24 खने सिमोनस आनाकिर्ताचस, “नीम एंगा गे उर्बस गुसन गोहरार'आ का नीम बाचकर अबड़ा कत्था ती एकदा हूँ एंग्हे मइय्याँ अम्बो मना।”
- 25 पतरस अरा योहनस तम्है गोवाह अरा उर्बासी कत्थन तिका खोखा येरुसलेम किरियर। अरा आर येरुसलेम किरिो बारी समारिया ही कैनो पद्दा नू दौ कत्था तेंगा कुद्दियर।
- 26 फिन धर्मेसी पैकस फिलिप्पोसिन बाचस, “नीन चो'आ ती दखिन तरा येरुसलेम ती गाजा काना ही टोड़ंग डहरे नू कला।”
- 27 खने आस चोचस ती केरस। डहरे नू आस ओन्टा एथियोपिया ता करबेलवसिन ईरियस। आस एथियोपिया रानी कनदाके ही मंत्री अरा खजानजी रहचस। आस येरुसलेम महबा नना गे केरका रहचस।
- 28 अरा अक्कु किरिा लगियस। आस तंग्हे रन्थ नू उक्कियस ती धर्मेसी कत्था तिगू यसायासी पुथिन पढ'आ लगियस।
- 29 बोलतस फिलिप्पोसिन बाचस, “कला ती रन्थ गने ऐका।”
- 30 खने फिलिप्पोस बुंगनुम आसी गुसन अंडसियस अरा आसिन धर्मेसी कत्था तिगू यसायासी पुथी पढनन मेंजस ती आसिन मेंजस, “नीन पढ'आ लगदय अदिन बुझदय का?”
- 31 खने आस बाचस, “नीकइम एंगन मल बुझाब'ओर होले ऐन एकासे बुझ'ओन?” तहाँ आस फिलिप्पोसिन अरगा ती तंग्हे गने ओक्का गे मीखियस।
- 32 आस नेम्हा पुथी ता ई भाग आबोन पढ'आ लगियस, “आस भेंडो बेसे पिटर'आ गे होतारस। चुट्टिन खन्दुर ही मुन्दहारे कलेकसे र'ऊ भेंडो खद्दो बेसे आस तंग्हे बइय्यन मल चलखस।
- 33 आस खाँड़तारस खने आसी नेंवई दौ गने मना पोल्ला। आसी बनस गुट्ठिन ने तंग्हे तेंगा ओंगनर? आसी उज्जना गा खेखेल ती चोदतारकी किरकी रहचा।”
- 34 आ मंत्रीस फिलिप्पोसिन बाचस, “नीन एंगन तेंगा का धर्मेसी कत्था तिगुस इदन नेख'आ पत्त नू तेंगा लगदस? तंग्हे पत्त नू का नन्नर ही पत्त नू?”
- 35 खने फिलिप्पोस ब'आ हेलरस का नेम्हा पुथी ही ई कत्था ती ओर नन्नुम येसुसी दौ कत्थन आस गे तिगियस।
- 36 आर कानुम कानुम ओन अड्डा नू अम्मु गुसन अंडसियर। खने मंत्रीस बाचस, “ऐरा, इसन अम्मु र'ई, एंगा नोड़र'आ गे एन्देर बधा र'ई?”



- 37[फिलिप्पोस बाचस, “नीन सौंसे जिया ती पत'अदय होले नीन नोडर'आ ओंगदय।” मंत्रीस बाचस, “ऐन पत'अदन का येसु मसीस धर्मसी खद्दस हिकदस।”]
- 38खने आस रन्थन इजत'आ गे आनियस। तहाँ फिलिप्पोस अरा मंत्रीस इरबारिम अम्मु नू इत्तियर अरा फिलिप्पोस आसिन नोडरताचस।
- 39आर अम्मु ती बहरी उरखर खने, उर्बासी बोलतस फिलिप्पोसिन चोदस होच्चस। मंत्रीस आसिन अउर मल ईरियस। अरा आस तंग्हे डहरे नू रिङ्गनुम केरस।
- 40लिकिन फिलिप्पोस असोतोस नगरे नू ऐथ्रस। अरा आस कैसरेया अंडसना गूटी उर्मी नगरे नू दौ कथन तेंगा लगियस।

तइरकर 9

- 1सउलस अक्कु गूटी हूँ उर्बासी चेलारिन एल्कत'अना अरा पिटा गे निसा रहचा। आस कोहाँ नैगस गुसन केरस ती
- 2दमसकोस नगरे ता गोडहा एडपा गुट्ठी ही नामे नू चिठी गुट्ठी नेचस। खने आस मसीसी डहरे नू ईक् मुक्कर महले मेटारिन असन खक्खोस होले, आरिन हें'ओस ती येरुसलेम ओन्द्र'आ ओंगोस।
- 3अक्कु आस कानुम कानुम दमसकोस गुसन अंडसियस खने, आचका ही मेर्खा ती ओन्टा बिल्ली आसी चरियो तरा बिल्चिया।
- 4खने आस खेखेल नू खतरस अरा आस ओन्टा ब'अनन मैजस, “सउल, सउल, नीन एंगन एन्देरगे सताब'आलदय?”
- 5खने आस बाचस, “उर्बायो, नीन एका ओर्तय?” खने आ ब'अना आसिन बाचा, “ऐन येसु हिकदन, नेकन नीन सताब'आलदय।
- 6अक्कु चो'आ ती नगरे नू कला, निंगा एन्देर नन्ना र'ई आद तेंगतार'ओ।”
- 7आसी गने डहरे ईक् आलर अनभूल इज्जर केरर, आर ब'अनन गा मेना लगियर, लिकिन नेकन हूँ मल ईरियर।
- 8सउलस चोचस ती खन्न चलखस, लिकिन आस एन्द्रन हूँ ऐरा पोल्लस। ओंगे आर आसी खेक्खन धरचर ती दमसकोस होच्चर।
- 9आस तीन उल्ला गूटी अन्धहा मंजका रहचस अरा मल ओंडस मोक्खस।
- 10दमसकोस नू हनानिया नामे ओन्टा चेला रहचस। उर्बस आस गे ऐथ्रस ती बाचस, “हनानिया!” अरा आस आनाकिर्ताचस, “उर्बायो, ऐन र'अदन।”



- 11 उर्बस आसिन बाचस, “चोआ अरा उजगो नामे गली नू कला। अरा यूदसी एडपन बेद्दा अरा सउल नामे तरसोस नगरे ता आलासिन मेना। आस असन अक्कु गोहरार'आ लगदस।
- 12 आस देखार नू ईरकादस का हनानिया नामे आलस बरदस ती आसी मड्य्याँ खेक्खा उइय्दस। खने आस ऐरा ओंग्दस।”
- 13 लिकिन हनानियास आनाकिर्ताचस, “उर्बायो! ऐन कैनो बग्गे आलर ती मेंजकादन का ईस येरुसलेम नू निंग्हे नेम्हा आलारिन नगदे डाहचकाचस।
- 14 आस इसन हूँ एकार निंगन ओइ लग्गनर आरिन हें'आ होआ गे मुध नैगर तरती अदिया खक्खकादस।”
- 15 लिकिन उर्बस हनानियासिन बाचस, “कला, आस गा नन-यहूदी आलर अरा बेलर अरा इस्राएल आलर नू एंग्हे पत नू तेंगा गे ऐन चज्जिका आलस हिकदस।
- 16 ऐन आसिन तेंगोन का एंग्हे नामे चड्डे आस गे एका बग्गे दुक्खे सारना रई।”
- 17 तहाँ हनानियास उरखस ती यूदसी एडपा कोरचस। अरा आस सउलसी मड्य्याँ खेक्खन उइय्यस ती बाचस, “अना भई सउल, उर्बा येसुस ने निंगन इसन बर'ओ बारी डहरे नू ऐथ्रकाचस, आस एंगन तइय्कादस का नीन अउर ऐरा ओंगोय, अरा नीन नेम्हा बोलतस ती नीन्द'ओय क'ओय।”
- 18 लेथेम आसी खन्न ती चोपला लेक्खा खतरा। खने आस अउर ऐरा उंगियस। तहाँ आस चौचस अरा नोडरस।
- 19 अरा आस मंडी ओडस ती पया खक्खियस। सउलस जोक्क उल्ला गूटी दमसकोस नू चेलर गने रहचस।
- 20 आस लेम गोइहा एडपा गुट्ठी नू येसुसी पत नू तेंगा हेलरस का, “येसुस धर्मसी खद्दस हिकदस।”
- 21 अरा ओर्मा मिन् आलर अनचकरर अरा बाचर, “ईस आसिम हिकदस, एकास येरुसलेम नू येसुसी नामे नू महबा ननुरिन पिटा लगियस। अरा ईस इसन हूँ अदगेम बरचस का येसुसी चो'उरिन हें'ओस ती मुध नैगर गुसन हो'आ गे बरचकादस।”
- 22 लिकिन सउलसी पया बडियर मन्नुम काला लगिया। अरा सबुती ती येसुस दिम मसी हिकदस एन्ने ब'अरकी दमसकोस ता यहूदी आलर ही बइय्यन खप्पा बाचस चिचस।
- 23 एन्ने एन्ने नू नगदे उल्ला मंजका खो'खा, यहूदी आलर आसिन पिटा गे चिताबुता ओइडर।



- 24 लिकिन सउलस गे अदही अरो खक्खरा। आर आसिन पिटा गे उल्ला माखा नगरे ही बकड़े गुसन जोहचका र'आ लगियर।
- 25 लिकिन जोक्क चेलर आसिन माखा होचर ती आसिन कोहाँ ढक्की नू ओकताचर ती आसिन नगरे ही मेच्छा कोहाँ पगड़ ही भौंका ती किय्या एताचर चिचर।
- 26 सउलस येरुसलेम अंडसियस ती पत'उर ही खोंइहा नू मेसर'आ गे चिहूट नंजस। लिकिन अबड़ा ओर्मर आसिन एल्चा लगियर, एन्देरगेका आर मल पत'आ लगियर का आस मानिम नू येसुसी पत'ऊ आलस मंज खच्चिकादस।
- 27 लिकिन बरनबास सउलसिन इंड्रस ती आसिन तइरकर गुसन होचस ती तिंगियस का उर्बस डहरे नू सउलस गे ऐथ्रस अरा उर्बस आसी गने कछनखकाचस अरा सउलस एकासे दमसकोस नू डिढ ती येसुसी दौ कथन तिंका रहचस।
- 28 इदही खोखा सउलस येरुसलेम नू आर गने काला बर'आ हेलरस अरा डिढ ती उर्बासी नामे ती दौ कथन तेंगा लगियस।
- 29 अरा आस युनानी भखा कछनख'ऊ यहूदी आलर गने कछनख'आ अरा आनानख'आ लगियस। आर गा आसिन पिटा गे चिहूट नना लगियर।
- 30 पत'ऊ भईर इदन अक्खर खने, आर सउलसिन कैसरेया होचर ती तरसोस नगरे तइय्यर।
- 31 आ उल्ला सौंसे यूदेया गलिलेया अरा समारिया नू कलीसिया नू सान्ति खक्खरा अरा बड़ियर मन्नुम केरा। अरा पत'उर उर्बासी एल्चना नू उज्जा लगियर। अरा आर नेम्हा बोलतासी जिया सालना खक्खियर ती गन्ती नू परदनुम काला लगियर।
- 32 पतरस जम्मा अड्डा नू कुद्दनुम कुद्दनुम उन्दुल लुद्दा नगरे नू र'ऊ नेम्हा आलर गुसन हूँ केरस।
- 33 असन आस ऐनेयास नामे आठ बछर ती पिटरी नू बिड़रका ओन्टा लकवा बेमरहा आलासिन खक्खियस।
- 34 पतरस आसिन बाचस, “ऐनेयास, येसु मसीस निंगन कोड़े नन्दस, चो'आ ती निंगहै पिटरिन तेरमा।” लेम आस चोचस ती इज्जस।
- 35 खने लुद्दा अरा सरोन नगरे ता उर्मी आलर आसिन ईरियर। अरा अबड़र उर्बा येसुसिन पताचर।



- 36 अक्कु योप्पे नगरे नू तबिता नामे ओन्टा पत्त'ऊ आली रहचा। युनानी भखा नू इदही नामे दोरका हवे। आद नगदे दौ नलख नना लगिया अरा कीडर गे संगरा नना लगिया।
- 37 अबड़ा उल्ला नू आद बेमार मंजा ती केच्चा केरा। अदही मरिन एमताचर ती मचा नू कीदर चिच्चर।
- 38 लुद्दा गा योप्पे ती हेददे रहचा, खने पत्त'ऊ आलर मेंजर का पतरस असन र'अदस। औंगे आर ऐंड आलारिन तइय्यर ती आसिन मीखियर का नीन एम्है गुसन लेम बरा।
- 39 खने पतरस चोचस ती आर ही गने केरस। आस योप्पे अंडसियस खने, आलर आसिन मचा कुटली नू होच्चर। असन उर्मी रड़ियाहीर चींखनुम आसी गुसन बरचर ती इज्जर ती अबड़ा किचरी गुट्ठिन ऐद'आ लगियर, एकदन दोरका आर ही गने रहचा खने कमचकी रहचा।
- 40 पतरस ओर्मरिन बहरी तइय्यस अरा मूकलिद्रस ती गोहरारस। अदही खोखा आस मरी तरा ईरियस ती बाचस, “तबिता चोअय!” आद खन्नन चलखा अरा पतरसिन ईरिया ती चोचा ती उक्किया।
- 41 पतरस तंगहै खेक्खा ती अदिन चोदस। अरा आस पत्त'ऊ आलारिन अरा रड़ियाहीरिन मीखियस ती अदिन आर गे उज्जना ऐदस।
- 42 ई कत्था योप्पे नू बींइरा केरा अरा ढेर आलर उर्बा येसुसिन पत्ताचर।
- 43 अरा पतरस बग्गे उल्ला योप्पे नू सिमोन नामे ओन्टा चमरस गुसन रहचस।

तइरकर 10

- 1 कैसरेया नू इतालियन पलटन ही सौ सैनर ही मुद्धस कोरनेलियोस नामे ओन्टा आलस रहचस।
- 2 आस अरा आसी एडपा ता उर्मी आलर धर्मसिन एल्चा लगियर अरा महबा ननू रहचर। अरा आस कीडर गे बग्गे चि'आ लगियस अरा ओर्मा बेड़ा धर्मसिन गोहरार'आ लगियस।
- 3 आस उन्दुल ओनबीड़ी तीन बजे ता बेड़ा नू ओन्टा देखार नू फरीफरी ईरियस का धर्मसी पैकस बरचस ती बाचस, “कोरनेलियोस।”
- 4 आस आसी मइय्याँ ओन ढिठ ईरियस ती इल्चियस अरा बाचस, “उर्बायो, एन्द्रा?” खने मेर्खा पौकस बाचस, “निंगहै गोहरारनन अरा निंगहै कीडर गे चि'अनन ओन्टा दाँडे बेसे धर्मस इंड्रका र'अदस।



- 5अरा नीन अक्कुन जोक्क आलारिन योप्पे नगरे तइय्या ती सिमोनसिन ने पतरस बारदस आसिन मेखा ओन्द्र'आ।
- 6आस सिमोन नामे चमरस गुसन ओक्रका र'अदस, आसी एडपा समुदर पिंडी नूर'ई।”
- 7आसी गने कछनरस आ पैकस किरिम बिच्चियस खने, आस तंग्हे इरिब जोंखारिन अरा धर्मसिन एल्चू ओन्टा सैनासिन मीखियस।
- 8अरा आरिन ओर्मा क्थन बाचस ती योप्पे तइय्यस।
- 9दोसर उल्ला आर बर'आ लगियर ती नगरे हेद्दे अंडसियर खने, पतरस नेख'ओन लोहाड़ी बारा बजे गोहरार'आ गे पाटन मइय्याँ केरस।
- 10आ बारी आस गे कीड़ा लगिया, खने आस गे मंडी ओना तुक्किया। आलर मंडी खट'आ लगियर खने, पतरस ओन्टा देखार ईरियस।
- 11आस मेखन तिसगरका ईरियस अरा चरियो गंडा ऐप ती हँरका दिगहा अरा चकड़ चदर बेसे एन्देर लो एतना ती खेखेल नू उइरना ईरियस।
- 12अइय्या उर्मी रकम ही मेक्खो गुट्ठी अरा खेखेल नू ऐकना आलो गुट्ठी अरा ओड़ा गुट्ठी रहचा।
- 13तहाँ आस गे ओन्टा ब'अना मेन्द्रा, “पतरस, चो'आ ती पिटा मोखा।”
- 14लिकिन पतरस बाचस, “मला उर्बायो, कहियोँ ऐन नेम्हा मलका अरा सोतबोड़'आ आलोन मल्ला मोक्का।”
- 15लिकिन अउरिम दोसर खेप आस गे आ ब'अना मेन्द्रा, “धर्मस नेम्हा नंजकादस, अदिन नीन सोतबोड़'आ अमा ब'आ।”
- 16एन्ने तीन खेप मंजा, अरा अदही खोखा आ चदर मेर्खा मइय्याँ होतारा केरा।
- 17पतरस ऐन ईरकन अदही मने एन्देर मना ऊंगी एन्ने तंग्हे नू अकबक मना लगियस। आ बारिम कोरनेलियोसी तइय्का आलर सिमोनसी एडपन मिन्नुम बली गुसन इज्जर।
- 18आर मेंजर, “सिमोन नेकन पतरस ब'अनर आस इसन ओक्रकादस का?”
- 19अक्कु पतरस आ देखार ही पत्त नू सोच'आ लगियस खने, नेम्हा बोलतस आसिन बाचस, “ऐरा, तीन झन आलर निंगन बेद्दा लगनर।
- 20चो'आ अरा किय्या एता बिगर धकधकर'आ ती आर ही गने कला, एन्देरगेका आरिन ऐन तइय्कादन।”



- 21 पतरस इतियस ती आर ही गुसन केरस ती बाचस, “नीम नेकन बेद्दा लगदर आस ऐन हिकदन। निम्है इसन बरना ही एन्देर चड्डे रई?”
- 22 खने आर बाचर, “कोरनेलियोस ने सौ सैनर ही मुद्धस अरा उजगो आलस अरा धर्मसी इल्चुस र'अदस। उर्मी यहूदी आलर आसी मईन नन्नर। आस गे ओन्टा नेम्हा पैकस निंगन आसी एडपा नू मेखा ओन्द्र'आ गे पेसस अरा निंग्हे ती सिख'आ गे बारकी रई।”
- 23 खने पतरस आरिन भितरी मीखियस ती पाही ईरियस। दोसर उल्ला पतरस चोचस ती आर ही गने केरस। अरा योप्पे ता जोक्क पत'ऊ भइय्योर हूँ आसी गने केरर।
- 24 नन्ना उल्ला आर कैसरेया अंडसियर। कोरनेलियोस तंग्हे संगीरिन अरा पाहियारिन मीखियस ती आर ही बरना ही पाब ऐरा लगियस।
- 25 एकाबारी पतरस कोरचस खने, कोरनेलियोस आसिन भेंट मंजस अरा आसी खेडमूली खतरस ती ओड़ लगियस।
- 26 लिकिन पतरस आसिन चोदस ती बाचस, “चो'आ, ऐन हूँ गा आलन हिकदन।”
- 27 अरा आसी गने कछनखनुम एडपा नू कोरचस अरा नगदे बग्गे आलारिन खोंडरका ईरियस।
- 28 अरा आस आरिन बाचस, “नीम गा अखदर का ओर्त यहूदी आलस गे नन-यहूदीर गने भेंट मन्ना मलता आर ही एडपा नू कोरना यहूदीर ही नेग ही बिडदो रई। लिकिन धर्मस एंगा गे दहदर नंजस का एकअम आलारिन नेम्हा मलकस मलता सोतबोड़'आ मल ब'अना रई।
- 29 औंगे निम्है मेखना ती ऐन बिगर चाडाम इसन बरचकन। अक्कु तेंगा नीन एंगन एन्देरगे मेखताचकय?”
- 30 कोरनेलियोस किर्त'अर बाचस, “चार उल्ला मुन्द ई बेड़ा नुम ऐन एंग्हे एडपा नू ओनबीड़ी तीन बजे गोहरार'आ लिक्कन। आ बारी आचका बिलचना किचरी अतका ओन्टा आलस एंग्हे मुन्दहारे बरचस ती इज्जस।
- 31 आस बाचस, ‘कोरनेलियोस, निंग्हे गोहरारना मेन्तारकी रई। अरा नीन कीडर गे चिक्कादय अदिन धर्मस सुरता नंजकादस।
- 32 औंगे नीन योप्पे नगरे नू आल तइय्या ती सिमोनसिन नेकन पतरस ब'अनर आसिन मेखा। आस चमरस सिमोनसी एडपा नू ओक्रकादस, आसी एडपा समुदर पिंडी नू रई।’
- 33 औंगे ऐन लेम निंगन मेखा तइय्कन। अरा नीन बरचकय ती दौ नंजकय। एमा तेंगा गे उर्बस निंगा एन्देर एन्देर पेसस अदिन मेना गे ऐम ओर्मम धर्मसी मुन्दहारे खोंडरका र'अदम।”



- 34 पतरस ब'आ हेलरस, “ऐन अक्कु बड़ियर लगे बुझकन का धर्मस नेकन हूँ तीना मल खाँडदस।
- 35 आलर एकअम हूँ राजी ता र'ओर आर धर्मसिन एल्चनर अरा एन्द्रा दौ र'ई अबइन नन्नर होले धर्मस आरिन इंझदस।
- 36 नीम अखदर का धर्मस इस्राएल आलर गो तंगहै दौ कत्था तइय्यस अरा येसु मसीस ती ने ओर्मर ही उर्बस हिकदस कोड़े ही दौ कत्था तिंगियस।
- 37 योहनस नोडरना ही पत्त नू तेंगना ही खोखा गलिलेया ती ओरे मंजा ती गोट्टा यूदेया नू एन्देर एन्देर मंजा अदिन नीम अखदर।
- 38 नासरेत ता येसुसिन धर्मस नेम्हा बोलतस ती अरा सवंग ती बड़ियर नंजस अरा धर्मस आसी गने रहचस। खने आस दौ नन्नुम अरा सैतान ती बझका आलारिन कोड़े नन्नुम कुद्दा लगियस।
- 39 आस एन्देर एन्देर यूदेया राजी अरा येरुसलेम नू नंजस अदही गोवाह ऐम हिकदम। आर आसिन क्रुस नू अरगर ती ठोकचर ती पिटियर।
- 40 लिकिन धर्मस आसिन तिसर उल्ला उज्जताचस अरा दहदर नंजस।
- 41 ओर्मा आलर गो मला, लिकिन नेकन धर्मस मुन्द तिम चज्जिका रहचस आ गोवाह गुट्ठिर गो आसिन दहदर नंजस। आ गोवाह ऐम हिकदम। आसी केचका ती उज्जा चोचका खोखा ऐम आसी गने ओँडकम मोक्कम।
- 42 अरा आस एमन पेसस का ऐम आलारिन तेंगोम अरा गोवाह चि'ओम का धर्मस आसिन उज्जना आलर अरा केचका आलर ही नैवई ननू कमचकादस।
- 43 आसी पत्त नू उर्मी धर्मसी कत्था तिंगुर गोवाह चि'अनर का ने आसिन पत्त'ओर आर गो आसी नामे ती पाप छमा खक्खोर।”
- 44 इबड़ा कत्था गुट्ठिन पतरस तेंगा लगियस खनेम, कत्थन मिनू आलर मइय्याँ नेम्हा बोलतस इत्तियस।
- 45 खने पतरस गने बरचका यहूदी पत्त'ऊ आलर इदिन ईरियर ती अनचकरर केरर, एन्देरगेका नन-यहूदीर गो हूँ नेम्हा बोलतासी इनाम खक्खकी रहचा।
- 46 एन्देरगेका आर नन-यहूदीर नन्ना नन्ना भखा नू कछनख्रना अरा धर्मसी ओहमा नन्नन मेना लगियर। खने पतरस बाचस,



47“ईर गे नम्है लेक्खम नेम्हा बोलतस खक्खका र'अदस, होले नेकईम ईरिन अम्मु ती नोडरना ती छेक'आ ओंगोर का?”

48अरा आस आर गे येसु मसीसी नामे ती नोडर'आ गे आनियस। तहाँ आर पतरसिन जोक्क उल्ला तम्है गुसन र'आ गे बाचर।

तइरकर 11

1अक्कु यूदेया नू र'ऊ तइरकर अरा पत'ऊ भइय्योर मेंजर का नन-यहूदीर हूँ धर्मसी कत्थन पताचर।

2ओँगे पतरस येरुसलेम अंडसियस खने, यहूदी पत'ऊ आलर आसी गने आनानखर।

3अरा बाचर, “नीन गा नन-यहूदीर ही एडपा नू कोर्चकय अरा आर ही संगे ओंडकय।”

4ओँगे पतरस जम्मा कत्थन ओड ती तेंगा हेतरस,

5“ऐन योप्पे नगरे नू रहचकन अरा ऐन गोहरार'आ लिक्कन खने, ऐन ओन्टा देखार ईरकन। ऐन चरियो गंडा ऐप ती हेंरका दिगहा अरा चकड़ चदर बेसे एन्देर लो एतना ती खेखेल नू उडरना ईरकन। अरा आद एंग्हे हेद्दे बरचा।

6ऐन अदिन ओन ठिठ ती ईरकन का अइय्या मेक्खो गुट्ठी अरा जंगल ता मेक्खो गुट्ठी अरा खेखेल नू ऐकना आलो गुट्ठी अरा ओड़ा गुट्ठी रहचा।

7अरा एंगा ओन्टा ब'अना मेन्द्रा ती बाचा, ‘पतरस, चो'आ ती पिटा मोखा।’

8लिकिन ऐन बाचकन, ‘मला उर्बायो, कहियोँ ऐन नेम्हा मलका अरा सोतबोड़'आ आलोन मल्ला मोक्का।’

9लिकिन अउरिम दोसर खेप मेर्खा ती आ ब'अना मेन्द्रा, ‘धर्मस नेम्हा नंजकादस अदिन नीन सोतबोड़'आ अमा ब'आ।’

10एन्ने तीन खेप मंजा, अरा अदही खोखा अबड़ा ओर्मा मेर्खा मइय्याँ होतारा केरा।

11आ बारिम कैसरेया ती एंग्हे गुसन तइय्का तीन इन आलर आ एडपा मुन्दहारे अंडसियर एसन ऐन ओक्रका रहचकन।

12नेम्हा बोलतस एंगन बिगर धकधकर'आ ती आर ही गने काला गे आनियस। इबड़ा छे भइय्योर हूँ एंग्हे संगे केरर, अरा ऐम कोरनेलियोसी एडपा नू कोर्चकम।



- 13 आस एमन तिंगियस का तंगहै एड़पा नू आस ओन्टा मेर्खा पैकासिन इज्जका ईरियस। अरा पैकस आसिन एन्ने बाचस, 'योप्पे नगरे जोक्क आल तइय्या ती सिमोन ने पतरस बारदस आसिन मेखा।
- 14 आस एन्देर कत्था सिखाब'ओस अदही ती निंगा अरा निंगहै सौंसे एड़पातर गे नाइरना खक्ख'ओ।'
- 15 ऐन ब'आ गे ओड़ नंजकन अन्नेम नेम्हा बोलतस आर ही मइय्याँ इतियस एकासे ओड़ नू नम्है मइय्याँ इतका रहचस।
- 16 तहाँ एंगा उर्बासी बाचका आ कत्था सुरता बरचा, 'योहनस अम्मु ती नोइरत'आ लगियस लिकिन नीम नेम्हा बोलतस ती नोइतार'ओर।'
- 17 धर्मेस गा आर गे एन्ने इनाम चिच्चस एकदन नमा गे चिच्चस इकला नाम उर्बस येसु मसीस नू पत्ताचकत। होले ऐन एका ओर्तन धर्मेसी नलखन छँका आँगदन?''
- 18 अबड़ा कत्थन मेंजर खने, आर कलेकले मंजर केरर। अरा आर एन्ने ब'अनुम धर्मेसी ओहमा नंजर, "धर्मेस नन-यहूदीर गे हूँ जियन किर्त'अना ती उज्जनन खक्खा गे मोका चिच्चस।"
- 19 स्तेफनोसिन पिटका ही खोखा मंजका कल्पारना चड्डे एका एका ओर्तर भगियारका केरका रहचर, आर फोइनिके चकभार अरा कुप्रोस टापू अरा अन्तियोखेया नगरे गूटी यहूदीर गे लेका दौ कत्था तेंगा कुद्दा लगियर।
- 20 लिकिन अबड़र नू जोक्कोर कुप्रोस टापू अरा कुरेने नगरे ता आलर रहचर। अरा अबड़र अन्तियोखेया अंइसियर ती नन-यहूदी आलारिन हूँ उर्बा येसुसी दौ कत्था तेंगा लगियर।
- 21 आर ही गने उर्बासी सवंग रहचा। खने नगदे बग्गे आलर पत्ताचर ती उर्बस तरा बरचर।
- 22 येरुसलेम कलीसिया ता आलर इबड़ा कत्था ही पत्त नू मेंजर खने, आर बरनबासिन अन्तियोखेया तइय्यर।
- 23 बरनबास असन अंइसियस ती धर्मेसी सोग्गे आबोन ईरियस खने आस रिझस। आस ओर्मारिन उर्बस नू सौंसे जिया ती मानिम गने बड़ियर र'आ गे रिझताचस।
- 24 आस गा दौ आलस रहचस अरा नेम्हा बोलतस अरा पत्त'अना ती निन्द्रका आलस रहचस। ईसी चड्डे नगदे आलर उर्बासिन पत्त'ऊ आलर मंजर केरर।
- 25 इदही खोखा बरनबास सउलसिन बेद्दना नू तरसोस नगरे किर्रिम बिच्चियस।



26 अरा आसिन बिद्वियस ती अन्तियोखेया ओन्द्रस। अबडर इरबारिम ओन बछर गूटी अइय्या ता कलीसिया नू रहचर ती नगदे बग्गे आलारिन सिखाब'आ लगियर। अरा अन्तियोखेया नू उर्मी ती मुन्द पत'ऊ आलर मसीर बातारर।

27 अबड़ा उल्ला नू जोक्क धर्मसी कथा तिगुर येरुसलेम ती अन्तियोखेया बरचर।

28 आर ही ती ओर्तोस हगाबोस नामे आलस इज्जस अरा नेम्हा बोलतासी संगरा ती बाचस का सौंसे रोमी राजी नू नगदे अकाल मन्ना रई। अरा ई आकाल बेल क्लौदियोसी राजी नन्ना बेड़ा नू मंजा।

29 तहाँ पत'ऊ आलर यूदेया राजी ता भइय्योर ही सहाड़ा गे ओर्मर तम्है ओंगना लेक्खा रुपया तइय्या गे सलहा मंजर।

30 आर अन्नेम नंजर ती इनाम आबोन बरनबास अरा सउलसी खेक्खा नू चिच्चर। आर अदिन येरुसलेम ता सेयान आलर गुसन ओन्द्र चिच्चर।

तइरकर 12

1 आ लगा-लगी नू हेरोदेस अगरिप्पा बेलस कलीसिया ता जोक्क आलारिन खिलपत नना हेलरस।

2 आस योहनसी भईस याकोबसिन तलवार ती पिटताचस।

3 एन्ने नन्ना यहूदीर गे बेस लग्गिया। अदिन ईरियस ती आस पतरसिन हूँ हेंताचस। अउला बिगर बिदगी असमा ही परब रहचा।

4 आस पतरसिन हेंताचस ती जेहेल नू गुड़ताचस अरा आसिन चार चार सैनर ही चार खोंडहा ही खापना नू उइय्यस चिच्चस। आस कट्टना परब ही खोखा आलर ही मुन्दहारे ओन्द्र'आ बेददा लगियस।

5 जेहेल नू पतरस गुडरकाचस खने, कलीसिया आस गे धर्मस गुसन सौंसे जिया ती नगदे गोहरार'आ लगिया।

6 इकला हेरोदेस आसिन आलर ही मुन्दहारे ओन्द्र'आ गे रहचस, अदही मुन्द ता माखा पतरस दुई गोट सिकड़ी ती हेंरका ती ऐंड सैनर ही मझी नू खन्द्र'आ लगियस। अरा नन्ना सैनर जेहेल ही बली ही मुन्दहारे खापा लगियर।

7 आचका उर्बासी ओन्टा पैकस बरचस ती इज्जस अरा कुठली नू बिल्ली बिल्चिया। आस पतरसी पंजर तरा ठुड्डस ती एज्जस अरा आसिन बाचस, “चाँडहे चो'आ।” अरा पतरसी खेक्खा ती सिकड़ी कोल्लरा ती खत्रा केरा।



- 8 तहाँ पैकस आसिन बाचस, “कड़मन भिड़'आ अरा जूतन अत्ता।” पतरस अन्नेम नंजस। पैकस आसिन अउरिम बाचस, “निंग्हे चदर आबोन झप्र'आ ती एंग्हे गने चोँख'आ”
- 9 अन्नेम पतरस आसी खोखा खोखा बहरी उरखस। आस बल्ला लगियस का पैकस एन्देर नना लगियस आद मानिम हवे। आस तुंगुल ऐरना बेसे सोच'आ लगियस।
- 10 तहाँ आर पहिल पहरा अरा दोसर पहरा आबोन कट्टियर ती पन्ना ही बखड़े-बली गुसन अंडसियर एकाद नगरे तरा हुंई। आद आर गे तान तानिम तिसगा केरा। आर बहरी उरखर ती गली नू काला लगियर। आ बारीम पैकस आचका आसिन अम्बियस ती किरिम बिच्चियस।
- 11 खने पतरस निजिड़यस ती बाचस, “अक्कु ऐन मानिम अक्ख खच्चिकन उर्बस तंग्हे मेर्खा पैकासिन तड़य्यस ती एंगन हेरोदेसी खेक्खा ती नाड़ियस अरा यहूदीर ही उर्मी असरन खच्चियस।”
- 12 इदिन अक्खस ती आस मरकुस बारना योहनसी तंगियो मरियम ही एड़पा बरचस। असन बग्गे आलर खोंडर ती गोहरार'आ लगियर।
- 13 आस बलिन ठोकठोकाम बाचस। आ बारी रोदे नामे ओन्टा जोंख पेल्लो ने तंग्हे ब'अरकी ऐरा बरचा।
- 14 अरा पतरसी ब'अनन ओरखाचा ती आद रिझ ती निन्दिया केरा अरा बलिन मल तिसगा अरा तेंगा गे बोंगोर नखनुम भितरी केरा ती तिंगिया का पतरस बली गुसन इज्जकादस।
- 15 आलर अदिन बाचर, “नीन पूरालदी।” अन्नु हूँ आद बड़ियर लगे बाचा, “मानिम हवे।” खने आर बाचर, “आसी पैकस नेखअन।”
- 16 लिकिन पतरस ठोकठोकाम ब'अना बारीम रहचस, अरा आर बलिन तिसगर खने, पतरसिन ईरियर ती नगदे अनचक मंजर केरर।
- 17 आस खेक्खा ती कलेकले र'आ गे टिवांबाचस। अरा आस आरिन तिंगियस धर्मस आसिन एकासे जेहेल ती ओथ्रस ओन्द्रस। फिन आस बाचस, “याकोब अरा पत्त'ऊ भड़य्योरिन इदही अरो चि'अके।” अरा आस असलेक उरखस ती नन्ना अड्डा किरिम बिच्चियस।
- 18 बिज्जिया खने सैनर नू अकबक मना हेलरा का पतरस गे एन्देर मंजा।
- 19 हेरोदेस आसिन नगदे बेदताची ईरियस अरा मल खक्खरस। खने आस सैनारिन मेंजस खूजियस ती आरिन पिटत'आ गे पेसस। अरा हेरोदेस यूदेया आबोन अम्बियस ती कैसरेया केरस ती असन र'आ हेलरस।



20अउला नू हेरोदेस तुरोस अरा सीदोन ता आलर ती कोइहे गोसा मंजकाचस। लिकिन आर ओर्मर ओन गोट मनरकी आसी गुसन भेंटार'आ गे बरचर। अरा आर बेलासी मुध जौखस बिलासतोसिन मना बाचर ती हेरोदेस ती सान्ति नैचर। एन्देरगेका आर ही राजी खेस्से तीखील गे बेलस हेरोदेसी राजी मइय्याँ असरा रहचा।

21भेंटार'आ गे ओक्ताचका उल्ला नू हेरोदेस बेल किचरी अतियस ती बेल-गदिया नू उक्कियस अरा आलारिन तेंगा हेलरस।

22आलर चिच्चियारर, “ईद आलासी ब'अना मल्ली धर्मसी ब'अना हवे।”

23आ बारिम उर्बासी पैकस आसिन बेमार ती लौचस, एन्देरगेका आस धर्मस गे महबा मल नंजस। अरा आस पुच्चियस ती खोखा केचस केरस।

24धर्मसी कत्था बढरनुम अरा बिंङरनुम केरा।

25बरनबास अरा सउलस तम्है नलखन मुंजियर अरा येरुसलेम ती किरियर। अरा तम्है गने मरकुस बारना योहनसिन ओन्द्रर बरचर।

तइरकर 13

1अन्तियोखेया कलीसिया नू कैनो बग्गे धर्मसी कत्था तिङ्गू अरा सिखाब'ऊ आलर रहचर। इबइर बरनबास अरा नीगेर बारना सिमोन अरा कुरेने नगरे ता लूकियोस अरा बेलस हेरोदेस अंतिपसी संगे परदका मनायेन अरा सउल हिकनर।

2आर उन्दुल उपास नन्नुम उर्बासी महबा नना लगियर खने, नेम्हा बोलतस बाचस, “ऐन सउलसिन अरा बरनबासिन एन्देर नलख गे मीखकादन अदगे आरिन भिनंग नना।”

3तहाँ गोहरारना अरा उपास नन्ना ही खोखा आर सउल अरा बरनबास मइय्याँ खेक्खा उइय्यर ती आरिन तइय्यर।

4अन्नेम बरनबास अरा सउलस नेम्हा बोलतस ती तइय्यका ती सेलुकिया केरर अरा असलेक ती आर कोहाँ डोंगा नू कुप्रोस टापू केरर।

5अरा आर सलामिस नगरे अंङसियर ती यहूदीर ही गोइहा एइपा गुट्ठी नू धर्मसी कत्था तिङ्गियर। योहन मरकुस आर ही गने रहचस ती आर ही सहाइ नना लगियस।

6आर गोट्टा टापुन कट्टियर मुंजियर ती अदही आ पक्खे नू र'अना पाफोस नगरे बरचर। असन आर बरयेसु नामे ओन्टा यहूदी टोन्हा अरा ठकवा धर्मसी कत्था तिङ्गुस गने भेंट मंजर।



- 7 आस राजीखापुस सेरगियुस पौलुस गने रहचस। आ राजीखापुस बुधमान रहचस। आस बरनबास अरा सउलसिन मीखियस ती आर ती धर्मसी कत्थन मेना बेद्दा लगियस।
- 8 लिकिन टोन्हा बरयेसुस नेकन युनानी भखा नू एलुमास नामे रहचा, आस आरिन हींइचस अरा राजीखापुस येसुस नू पत'अना ती छेक'आ बेद्दा लगियस।
- 9 तहाँ पौलुस बारना सउलस नेम्हा बोलतस ती निन्दियस ती आसिन ओन ढिठ ईरियस।
- 10 अरा बाचस, “नीन नाद ही खद्दय, अरा नीन चतरा अरा कटरहा ती निन्दका र'अदय, अरा उर्मी रकम ही दौ नलख ही बैरी हिकदय, अरा नीन उर्मी बारी उर्बासी उजगो इहरे गुट्ठिन बगड़'आ गे चिहुट नन्दय।
- 11 ऐरा! अक्कुनिम उर्बस निंगन दंडे चि'ओस, नीन अन्धहा मनोय अरा जोक्क उल्ला बीड़ी ही बिल्लिन ऐरा पोल्लोय।” आ बारिम आसी खन्न धुन्द्रा मंजा केरा अरा ऊखा मंजा केरा। अरा आस अत्रा इत्रा कप्पा कुद्दियस का नेकईम आसिन खेक्खन धर'अरकी हो'ओर।
- 12 ई मंजकन ईरियस ती आ राजीखापुस पत्ताचस अरा उर्बासी सिखाब'अना ही पत नू अकबकरस।
- 13 अक्कु पौलुस अरा आसी संगेर कोहाँ डोंगा ती पाफोस ती पम्फुलिया ता पेरगे नगरे बरचर। असन योहन मरकुस आरिन अम्बियस ती येरुसलेम किरियस।
- 14 पौलुस दरा बरनबास पेरगे ती उरखर ती पिसिदिया राजी ही अन्तियोखेया बरचर। अरा आर खन्न ऐरवना उल्ला नू गोइहा एइपा नू केरर ती उक्कियर।
- 15 पेसका ही पुथी अरा धर्मसी कत्था तिगुर ही पुथी ती पढचका खोखा, गोइहा एइपा ता मुद्धर आरिन एन्ने बाचर तइय्यर, “भईरो! नीम आलारिन रिइता गे इन्द्रिइम ब'आ बेद्ददर होले ब'आ।”
- 16 होले पौलुस इज्जस ती खेक्खा ती कलेकसे र'आ गे बाचस अरा तेंगा हेल्सर, “अना इस्राएल भईरो अरा धर्मसी इल्चूनन-यहूदी आलारो, मेना।
- 17 इस्राएल आलर ही धर्मस नम्है पूर्खारिन चज्जियस। अरा आर मिसर देस नू र'अना बारी आरिन कोहाँ कमचस ती तंग्हे कोइहे सवंग गने आरिन आ देस ती ओथ्रस ओन्द्रस।
- 18 अरा आस चालीस बछर गूटी टोइंग नू आरिन ईरियस खूजियस।
- 19 इदही खोखा आस खानान देस नू सात गोटंग जातियारिन पिटियस ती आर ही आ देसन चिच्यस।



- 20 इबड़ा जम्मा मलागूटी साढ़े चार सौ बछर मंजा। इदही खोखा धर्मस आर गे नैवई ननू आलारिन धर्मसी कत्था तिंगू सामुएलसी बेड़ा गूटी चिच्चस।
- 21 इदही खोखा आर तमा गे ओन्टा बेल नेचर। अरा धर्मस आर गे बेनियमिन गोतोर ता कीसी तंगदस सउलसिन बेल कमचस चिच्चस। आस चालीस बछर गूटी राजी नंजस।
- 22 खोखा धर्मस आसिन ताइचस ती दाऊदसिन आर ही बेल कमचस। अरा आसी पत नू धर्मस बाचस, 'ऐन एंग्हे जिया पतारना लेक्खा येसैसी तंगदस दाऊदसिन ईरकन। आस एंग्हे मने लेक्खा जम्मन ननोस।'
- 23 धर्मस तंग्हे गच्छरका लेक्खा आ दाऊदसी बनस तिम इस्राएल गे ओन्टा बछाब'उस येसुसिन इजताचस।
- 24 येसुसी बरना ही मुन्द योहनस ओर्मा इस्राएल आलर गे जियन किर्त'अना ती नोइरना ही पत नू तिंगियस।
- 25 योहनस तंग्हे नलखन नंजस मुंजियस ती बाचस, 'नीम एंगन ने तंग्हे सोचदर? ऐन मसी मलदन। आस एंग्हे खोखा बर'ऊ र'अदस। आसी खेड्डे ता जूता गुट्ठिन ईचना ही जोगे हूँ ऐन मलदन।'
- 26 अना भईरो, अब्राहमसी जईपुंई आलारो, अरा धर्मसिन इल्चू नन-यहूदी आलारो, मेना। ई बछरना ही पत ता कत्था नम्है गुसन तइरकी रई।
- 27 येरुसलेम नू र'ऊ आलर अरा आर ही मुद्धर येसुसिन बछाब'ऊ ब'अरकी मल चिन्हचर। अरा धर्मसी कत्था तिंगुर ही कत्थन मल बुझनुम उर्मी खन्न ऐर्रना उल्ला अबइन पढ़चर। औंगे येसुसिन बदी नंजर ती अबड़ा कत्थन पूरा नंजर।
- 28 आर गे आस नू पिटना दंडे जोगे एन्देर हूँ बदी मल खक्खा। अन्नु हूँ पिलातुस ती गोहरारर का आसिन पिटा।
- 29 आर आसी पत नू नेम्हा पुथी नू लिखचका जम्मन नंज मुंजका खोखा, आसिन क्रुस ती एत्ताचर अरा मसड़ा नू उइय्यर चिच्चर।
- 30 लिकिन धर्मस आसिन केचका ती उज्जताचस चोदस।
- 31 अदही खोखा आस नगदे उल्ला गूटी ने आसी पिटरना ही मुन्द आसी गने गलिलेया ती येरुसलेम बरचका रहचर आर गे ऐथ्र'आ लगियस। अक्कु आरिम आलर ही मुन्दहारे आसी गोवाह र'अनर।



- 32 अक्कु ऐम धर्मस नम्है पूरखर गने नंजका गच्छरका ही पत ता दौ कथन निमन तेंगदम।
- 33 आस येसुसिन केचका ती उज्जताचस चोदस ती आसी खद्दर नमा गे आ गच्छरकन मानिम नंजस। एकासे का दाऊदसी दोसर डंडी नू लिखकी रई, 'नीन एंगहै खद्दय, इन्ना ऐन निंगहै बंग मंजकादन।'
- 34 धर्मस येसुसिन केचका ती उज्जताचस चोदस अरा अक्कु आस इकला हूँ मल खेओस। औंगे धर्मस एन्ने बाचकादस, 'ऐन निंगा नेम्हा अरा मल ताड़रना आसीस आबोन चिओन, एकदा ऐन दाऊदसिन गच्छरकन।'
- 35 औंगे आस नन्ना डंडी नू अउरिम ब'अदस, 'नीन निंगहै नेम्हा आलासिन कित्ता मल चिओय।'
- 36 दाऊदस गा तंगहै उज्जना ही बेड़ा नू धर्मसी मने लेक्खा नंजस ती केचस। अरा आसिन तंगहै पूरखर हेददे मंडियर। अरा आसी मेद मसड़ा नू कितिया।
- 37 लिकिन धर्मस नेकन केचका ती उज्जताचस चोदस आसी मेद मल कितिया।
- 38 औंगे भईरो, नीम बेस लगे बुझ'आ हो'आ का एका कथा निमा तेंगर'आ लगी आद ईद हवे का येसुस ती निम्है पाप ही छमा खक्ख'ओ। मूसासी पेसका निमन निम्है पाप गुट्ठी ती अम्बता पोल्लो।
- 39 लिकिन येसुसिन पत'ऊ ओर्मर तम्है पाप ती बछर'ओर।
- 40 औंगे चिहंक र'आ का, एकाद धर्मसी कथा तिंगुर ती तिंका रई आद निम्है मइय्याँ अम्बन बर'आ।
- 41 'अना निंदा ननू आलारो! ऐरा, अकबक मना अरा खे'आ कला। ऐन गा ओन्टा नलखन निम्है उल्ला गुट्ठी ननोन। ओर्तोस अदही पत नू निमन तेंगोस। अन्नु हूँ नीम अदिन मल पत'ओर।'''
- 42 बरनबास अरा पौलुस गोड़हा एड़पा ती उरखा लगियर खने, बरना खन्न ऐख्रना उल्ला हूँ इबड़ा ही पत नू अउरिम तेंगा गे आलर गोहरारर।
- 43 सभा मुंज्रा अदही खोखा नगदे बग्गे यहूदीर अरा यहूदी धरम नू बरचका नन-यहूदीर पौलुस अरा बरनबास गने चोख्रर। पौलुस अरा बरनबास आर ही गने कछनख्रर अरा धर्मसी सोग्गे नू बड़ियर र'आ गे आनियर।
- 44 नन्ना खन्न ऐख्रना उल्ला नू मलागूटी नगरे ही उर्मी आलर उर्बासी कथन मेना गे खोंडरर।
- 45 एन्ने कोहाँ गोंहड़न ईरियर ती यहूदीर कुटमुटर'आ हेलरर अरा पौलुसी निंदा नंजर ती आसी कथा ही बिड़दो नू आनानखर'आ हेलरर।



- 46 पौलुस दरा बरनबास बिगर एल्चम बाचर, “ईद चाइ रहचा का मुन्द निमा गे धर्मसी कत्था तेंगना रहचा, लिकिन नीम इदिन मल इङ्गदर, अरा नीम निमन मुंजा मलका उज्जना खक्खना जोगे मल बुङ्गुरदर। औंगे ऐम अक्कु इदिन नन-यहूदीरिन तेंगदम।
- 47 औंगे उर्बस एमन एन्ने बाचस ती पेसकादस, ‘ऐन निमन नन-यहूदीर गे बिल्ली कमचकादन, एकत्रु निम्है ती बछरना ही दौ कत्था खेखेल ही ठुठु गूटी बिङ्गर'ओ क'ओ।’”
- 48 नन-यहूदीर इदिन मँजर खने, रिङ्ग'आ हेलरर अरा धर्मसी कत्था ही ओहमा नना लगियर। एका बग्गे आलर मुंजा मलका गुटी उज्जना गे चज्जकाचर, अबङ्गर दौ कत्थन पत्ताचर।
- 49 तहाँ गोट्टा चकभार नू उर्बासी कत्था बीङ्गरा केरा।
- 50 लिकिन यहूदीर जोक्क मईन जोगे धर्मसी इल्चू नन-यहूदी मुक्कारिन अरा नगरे ता मुद्धारिन पौलुस अरा बरनबासी बिङ्गदो इज्जताचर ती आरिन सस्ती नंजर। अरा आरिन तम्है चक ती बहरी ओथ्रर चिच्चर।
- 51 तहाँ आर ही बिङ्गदो गोवाह चि'आ गे पौलुस दरा बरनबास तम्है खेङ्गे ता रिङ्गेन खित्तियर, अरा इकोनियोन नगरे केरर।
- 52 अरा पत्त'ऊ आलर रिङ्ग ती अरा नेम्हा बोलतस नू निन्द्रका रहचर।

तइरकर 14

- 1 अक्कु इकोनियोन नगरे नू हूँ पौलुस दरा बरनबास यहूदी गोइहा एङ्पा नू कोरचर अरा एन्ने कत्था बाचर का यहूदीर अरा युनानी आलर इरिब जात्तियर बग्गे आलर पत्त'ऊ आल मंजर केरर।
- 2 लिकिन एका यहूदीर मल पत्ताचर आर नन-यहूदीरिन तकाबाचर ती पत्त'ऊ आलर ही बिङ्गदो नू नन्ताचर।
- 3 पौलुस अरा बरनबास बग्गे उल्ला गूटी असन रहचर अरा डिढ गने उर्बस येसुसी पत्त नू तेंगा लगियर। उर्बस हूँ आर ती चिन्हा अरा अजगुत नलख गुट्ठी ऐद'आ गे आर गे सवंग चिच्चस ती आर ही कत्थन मानिम ऐदस।
- 4 लिकिन नगरे ता आलर खट्टरर केरर। जोक्क आलर यहूदीर तरा मंजर केरर अरा जोक्क आलर तइरकर तरा मंजर केरर।
- 5 तहाँ जोक्क नन-यहूदीर अरा जोक्क यहूदीर अरा आर ही मुद्धर पौलुस अरा बरनबासिन हींङ'आ गे अरा पखना ती लोङ्ग'आ पिटा गे बेद्दा लगियर।



- 6 पौलुस अरा बरनबास इदिन अक्खर खने, आर लुकाओनिया अरा लुसत्रा अरा देरबे नगरे अरा अबड़ा ही अड्डे-बेड्डे ता अड्डा गुट्ठी नू बोंगर केरर।
- 7 अरा आर असन हूँ दौ कत्थन तिं गियर।
- 8 लुसत्रा नगरे नू ओन्टा एन्ने आलस उक्का रहचस। आसी खेड्डे नू पैया मल रहचा। आस कुन्द्रका तिम लेंगड़ा रहचस अरा आस इकला हूँ ऐका पोलकाचस।
- 9 आस पौलुसी ब'अनन मेना लगियस खने, पौलुस आसिन ओन ठिठ ईरियस ती धर्मस एंगन कोड़े नना ओंगदस एन्ने आसी पत'अनन अक्खस।
- 10 खने जोरसरिया बाचस, “चो'आ अरा निंग्हे खेड्डे ती उजगो इज'आ।” आस उदकारस ती कुद्दा नुंगा हेतरस।
- 11 गोंहड़ा पौलुसी ई नंजकन ईरिया खने, आर लुकाओनिया भखा नू जोरसरिया बाचर, “दैवता गुट्ठी आलर ही रूपे नू नम्है गुसन इतकी रई।”
- 12 तहाँ अबड़र बरनबासिन तम्है मुध दैवता जेयुस एन्ने बाचर अरा पौलुसिन तम्है पैका दैवता हेरमेस एन्ने बाचर, एन्देरगेका आस सिखाब'ऊ रहचस।
- 13 नगरे ता बहरी जेयुस ही मन्दिर रहचा। अइय्या ता नैगस अड्डो गुट्ठी अरा पूंप माला गुट्ठी ओन्द्रस ती नगरे ही बली गुसन अंइसियस। अरा आस अबड़ा आलर गने पौलुस अरा बरनबास गे दाँडे नना गे बिद्दियस।
- 14 लिकिन तइरकर पौलुस अरा बरनबास इदिन मेंजर खने, तंग्हे किचरी गुट्ठिन चरियर ती गोंहड़ा नू बोंगर ती चिच्चियारर,
- 15 “भईरो, नीम ईद एन्देर नना लगदर? ऐम हूँ गा निम्है लेक्खा सुक्खे दुक्खे भोग'ऊ आलम हिकदम। ऐम ई दौ कत्था तेंगा बरचकादम का इबड़ा अनभनियाँ आलो गुट्ठी ती तरकूटी मना अरा उज्जना धर्मस तरा किर्ी, एकास मेर्खा अरा खेखेल अरा समुदर अरा अबड़ा नू र'अना उर्मिन कमचस।
- 16 आस केरका बेड़ा नू उर्मी जातियारिन तम्है तम्है डहरे नू ऐका चिच्चस।
- 17 अन्नु हूँ आस तंग्हे दौ नलख ती तंग्हे पत नू गोवाह चि'अदस। आस मेर्खा ती चेप पुंइत'अदस अरा बेस बरखा ती खितिन बने मन्त'अदस। अरा आस निम्है जियन ओन्ना-मोखना अरा रिङ्गना नू निन्दत'अदस।”
- 18 इबड़ा कत्था गुट्ठिन तेंगना ती आर गोंहड़ा आबोन नगदे मसकिल ती तमा गे दाँडे नन्नन छेकचर।



- 19 इदही खोखा जोक्क यहूदीर अन्तियोखेया अरा इकोनियोन नगरे ती बरचर। अरा आर गोंहड़ा आबोन तम्है गने भिड़ाबाचर। अरा आर पौलुसिन पखना ती लोड़गर ती लौचर अरा आस केचस बाचर ती आसिन नगरे ती बहरी घिड़ाचर होचर।
- 20 लिकिन पत'ऊ आलर पौलुसी चरियो तरा मंजर खने, आस चोचस ती नगरे नू किरिम बिच्चियस। अरा नन्ना उल्ला आस बरनबास गने देरबे केरस।
- 21 पौलुस अरा बरनबास देरबे नगरे नू दौ कत्था तिंगियर अरा बग्गे आलर पत'ऊ मंजर केरर। इदही खोखा आर लुसत्रा अरा इकोनियोन अरा अन्तियोखेया किरियर।
- 22 अरा आर असन ता पत'ऊ आलारिन बड़ियर नंजर अरा पत'अना नू ठिमठिमने इज्जका र'आ गे रिड़ताचर। अरा बाचर, “नमा नगदे खिलपत मोखरकी धर्मसी राजी नू कोरना र'ई।”
- 23 अरा आर उर्मी कलीसिया नू नेकन आर पताचर आरिन बिन्ती अरा उपास नंजर ती सेयान कमचर अरा आरिन उर्बासी खेक्खा नू चिचर।
- 24 तहाँ आर पिसिदिया नगरे मन्नुम ती पम्फुलिया बरचर।
- 25 अरा आर पेरगे नगरे नू दौ कत्था तिंगियर, अदही खोखा अतालेया नगरे केरर।
- 26 असले ती आर कोहाँ डोंगा अरगियर ती सीरिया राजी ता अन्तियोखेया किरिम बिच्चियर। इसन दिम आर पत'ऊ आलर ती धर्मसी सोग्गे गे सोंपरकाचर ती अक्कु आर नंज मुंजका ई नलख गे तड़काचर।
- 27 असन आर अंइसियर ती कलीसियन खोंड़चर ती तिंगियर का धर्मस आर ही ती एन्देर एन्देर नलख नंजकाचस, अरा नन-यहूदीर हूँ पत'आ गे एकासे बलिन तिसगस चिचस।
- 28 अरा आर नगदे उल्ला गूटी असन पत'उर गने रहचर।

तड़कर 15

- 1 जोक्क आलर यूदेया राजी ती सीरिया राजी ता अन्तियोखेया बरचर ती नन-यहूदी पत'उरिन एन्ने सिखाब'आ लगियर, “मूसासी सिखाबाचका नेग ही लेक्खा निम्है खतना मल मनो होले नीम नाइर'आ पोल्लोर।”
- 2 इदही पत नू पौलुस दरा बरनबास अरा अबड़ा आलर गने कोइहे आनानखना मंजा। औंगे कलीसिया पौलुस अरा बरनबास अरा अन्तियोखेया ता जोक्क पत'उरिन येरुसलेम तड़य्या गे तिगचर का असन आर ई पत नू तड़कर अरा सेयान आलर गने कछनख'ओर।



- 3अन्तियोखेया कलीसिया आरिन तइय्या। आर फोइनिके दरा समारिया मन्नुम केरर ती असता उर्मी पत'उर गने तिंगियर का एकासे नन-यहूदीर धर्मेसिन इंझर। अरा ई कत्था ओर्मा पत'उरिन नगदे रिझताचा।
- 4आर येरुसलेम अंइसियर खने, कलीसिया अरा तइरकर अरा सेयान आलर आरिन परघाचर। अरा आर धर्मेस आर ही ती एन्देर एन्देर नलख नंजस अबड़ा उर्मिन तिंगियर।
- 5लिकिन फरिसीर ही खोंइहा ता जोक्क पत'ऊ आलर इज्जर ती बाचर, “नन-यहूदी पत'ऊ आलर खतना नन्ना दिम रई अरा मूसासी पेसकन पेसना रई।”
- 6औंगे तइरकर अरा सेयान आलर ई पत नू कछनख'आ गे खोंइरर।
- 7इदही पत नू बग्गे आनानखना मंजका खोखा पतरस इज्जस ती बाचस, “अना भईरो, नीम अखदर का धर्मेस पहिल खेप निम्हें मझी ती एंगन नन-यहूदीर नू दौ कत्था तेंगा गे चज्जियस, आर एंगहें ती दौ कत्था मेंजर अरा पताचर।
- 8धर्मेस ओर्मर ही सोच आबोन अखदस, आस आरिन इंझरस। अरा आस नमा गे एकासे नंजस अन्नेम आर गे नेम्हा बोलतासिन चिच्यस ती तंगहें इंझनन ऐदस।
- 9अरा आस आर ही जियन पत'अना ती नेम्हा नंजस अरा नम्हें नू अरा आर नू एन्देर हूँ फरक मल नंजस।
- 10औंगे अक्कु नीम एन्देरगे नन-यहूदी पत'ऊ आलर ही खेसेर नू ओत्था पगसीन लद'अरकी धर्मेसिन बिददर? एकदन नाम महले नम्हें पूरखर चेइ'आ पोल्तर।
- 11लिकिन नाम पत'अदत का नाम अरा आर हूँ उर्बा येसुसी सोग्गे ती नाइर'ओत।”
- 12तहाँ ओर्मा खोंइहा कलेकसे मंजा अरा पौलुसी अरा बरनबासी कत्थन मेंजा का धर्मेस आर ही ती एन्देर एन्देर चिन्हा दरा अजगुत नलख गुट्ठी नन-यहूदीर मझी नू नंजस।
- 13आर ही बाचका मुंजका खोखा याकोबस बाचस, “अना भईरो, एंगहैन मेना।
- 14सिमोनस नमन तिंगियस का धर्मेस नन-यहूदीर ती जोक्क आलारिन तंगा गे चज्जियस ती पहिल खेप एकासे सोग्गे ईरियस।
- 15धर्मेसी कत्था तिंगुर ही कत्था हूँ इदही गने ओन्टम उक्की। एन्ने लिखकी रई का,
- 16इबड़ा ही खोखा ऐन किर्रोन ती दाऊदसी धंसका एइपन फेन कम'ओन। अरा ऐन अदही घराइिन फेन कम'ओन अरा अदिन फेन इजत'ओन।



- 17 औंगे बछ्का आलर अरा ऐन एंगा गे चजकादन अबड़ा ओर्मा नन-यहूदीर उर्बासिन बेद्दोर। उर्बस ब'अदस,
- 18 इबड़न ने हुल्लो ती अखताचस।'
- 19 औंगे ऐन सोचदन का धर्मस तरा बरचका नन-यहूदीरिन नाम सस्ती अम्बोत चि'आ।
- 20 लिकिन नाम आर गे लिख'ओत का आर मूर्ती गुट्ठी गे अरगका ओन्ना-मोखना अरा उर्मी रकम ही पेहरन ही सोतरा नलख ती अरा घोंघन पेदखका मेक्खो गुट्ठी ही अहड़ा अरा खेंस ती तरकूटी र'ओर।
- 21 एन्देरगेका चिरान तिम नगरे नगरे नू मूसासी पेसकन तिंगुर र'अनर अरा आद उर्मी खन्न ऐखना उल्ला नू गोड़हा एड़पा गुट्ठी नू पढ़तार'ई।”
- 22 तहाँ तड़कर अरा सेयान आलर कलीसिया ता उर्मिर गने तिगचर का नम्है ती जोक्क आलारिन चाजोत ती पौलुस अरा बरनबास गने अन्तियोखेया तड़य्योत। आर इबड़र हिकनर का बरसब्बास बारना यूदस अरा सीलास, ईर पत्त'ऊ आलर नू मुध रहचर।
- 23 अरा आर ही खेक्खा नू ई चिठिन तड़य्यर: “अन्तियोखेया अरा सीरिया अरा किलिकिया ता नन-यहूदी पत्त'ऊ भड़य्योर गे ऐम तड़कर अरा सेयान आलर अरा येरुसलेम ता पत्त'ऊ भड़य्योर ही मोंजरा।
- 24 ऐम मैजकादम का एम्है ती जोक्क भड़य्योर निम्है हेद्दे बरचर ती तम्है कत्था ती निमन अकबकाम बाचर अरा निमन हदियाचर। लिकिन आर गे ऐम एन्ने एन्देर पेसका हूँ मल चिच्का रहचकम।
- 25 औंगे ऐम ओर्मर ही मने ती तिगचकम का जोक्क आलारिन चाजोत ती आरिन पौलुस अरा बरनबास गने तड़य्योत।
- 26 ईर इरबारिम एन्ने आलर हिकनर का तम्है उज्जनन हूँ मल ऐरकी उर्बस येसु मसीस गे सुसर ननू आलर हिकनर।
- 27 ऐम यूदस अरा सीलासिन हूँ निम्है गुसन तड़य्यदम। आर इबड़ा कत्थन निमन तम्है बई ती तेंगोर।
- 28 नेम्हा बौलतस अरा एमा गे ईद बेस लग्गिया का इबड़ा मुध कत्थन अम्बरकी अउर कोड़हे कत्था गुट्ठिन निम्है मड़य्याँ मल लद'ओम।



29 नीम मूर्ती गुट्ठी गे अरगका ओन्ना-मोखना अरा खेंस अरा घोंघन पेदखका मेक्खो गुट्ठी ही अहड़ा अरा उर्मी रकम ही पेहरन ही सोतरा नलख ती तरकूटी र'अके। इबड़ा ती नीम तरकूटी र'ओर होले निमा गे दौ मनो। निम्है दौ मनन नेकअन।”

30 आर बिदा मंजर ती अन्तियोखेया केरर अरा असन अंडसियर ती कलीसिया आबोन जुमाबाचर ती चिठिन चिच्चर।

31 चिठी नू लिखका जिया सालना कत्थन मंजर ती आलर कोड़े रिझर।

32 यूदस अरा सीलास हूँ गा धर्मेसी कत्था तिंगुर रहचर। आर भइय्योरिन कोड़े कत्था बाचर ती जिया सालना चिच्चर अरा आरिन बड़ियर नंजर।

33 जोक्क उल्ला आर असन रहचर ती भइय्योर आरिन कोड़े गने येरुसलेम कलीसिया किर्ी गे तइय्यर।

34 [सीलास गा असन र'आ गे तिगचस।]

35 लिकिन पौलुस दरा बरनबास अन्तियोखेया नुम रहचर अरा नगदे बग्गे आलर गने उर्बासी कत्थन सिखाब'आ अरा तेंगा कुद्दा लगियर।

36 जोक्क उल्ला खोखा पौलुस बरनबासिन बाचस, “बरा, नाम एका एका नगरे नू उर्बासी कत्था तिंका रहचकत असन फेन क'ओत ती भइय्योर गने भैंट मनोत अरा आर एकासे र'अनर अदिन ऐरोत।”

37 बरनबास गा मरकुस बारना योहनसिन संगे हो'आ गे तिगचस।

38 लिकिन पौलुसी सोच एन्ने रहचा का एकास पम्फुलिया नू आरिन अम्बियस चिच्चस अरा आर ही नलख नू संगे मल चिच्चस, आसिन हो'अना दौ मलकी।

39 ई पत नू इरबर नू कोड़े नग्गानखना मंजा का आर इरिबर छिन्डरर केरर। बरनबास मरकुसिन संगे होच्चस ती डोंगा ती कुप्रोस केरस।

40 लिकिन पौलुस सीलासिन चज्जियस, अरा भइय्योर ती उर्बासी सोग्गे नू सोंपरस ती असलेक किर्िम बिच्चियस।

41 अरा आस सीरिया दरा किलिकिया मन्नुम कलीसिया गुट्ठिन बड़ियर नंजस ती केरस।

तइरकर 16



- 1 इदही खोखा पौलुस अरा सीलास देरबे नगरे केरर, अरा असन ती लुसत्रा नगरे अंडसियर। असन तीमोथियुस नामे ओन्टा पत'ऊ आलस रहचस। आसी अयंग यहूदी पत'ऊ आली रहचा अरा बंगस युनानी आलस रहचस।
- 2 लुसत्रा अरा इकोनियोन ता पत'ऊ आलर आसी पत नू दौ तिगियर।
- 3 पौलुस तीमोथियुसिन तंग्हे गने संगे मना गे मने नंजस। लिकिन आ चक नू र'ऊ उर्मी यहूदी आलर अखनर का आसी बंगस युनानी रहचस। औंगे पौलुस आसिन होच्यस ती खतना नन्ताचस।
- 4 आर नगरे नगरे कालरकी येरुसलेम नू तइरकर अरा सेयान आलर तिगा बाचका कत्थन पेस्र'आ गे पत'ऊ आलारिन तेंगा लगियर।
- 5 औंगे कलीसिया गुट्ठी पत'अना नू बड़ियर मन्नुम केरा अरा अबड़र ही गनती बढरनुम काला लगिया।
- 6 नेम्हा बोलतस आरिन आसिया नू दौ कत्था तेंगा गे छेकचस ती आर फ्रुगिया अरा गलातिया चकभार नू मन्नुम केरर।
- 7 अरा आर मूसिया राजी ही हेद्दे अंडसियर ती बितुनिया काला गे चिहूट नंजर। लिकिन येसुसी बोलता आरिन काला मल चिच्चा।
- 8 खने आर मूसिया कट्टियर ती त्रोआस केरर।
- 9 असन माखा पौलुस ओन्टा देखार ईरियस। ओर्त मकेदोनिया जिला ता आलस मुन्द इज्जस ती गोहरारस ती बाचस, “मकेदोनिया बर'अरकी एमन सहाड़ा नना।”
- 10 पौलुसी ई देखार ईरका खोखा ऐम लेम मकेदोनिया काला बिद्दकम। अरा ऐम बुझकम का धर्मस एमन आरिन दौ कत्था तेंगा गे मीखकादस।
- 11 फिन ऐम त्रोआस ती डोंगा अरिगकम ती उजगोम समोत्राके टापू केरकम अरा दोसर उल्ला नियापुलिस बरचकम।
- 12 अइय्या ती ऐम फिलिप्पी अंडसकम, आद मकेदोनिया जिला ता मुध नगरे हवे। अरा आद रोमी आलर ही र'अना अइडा हवे। ऐम आ नगरे नू जोक्क उल्ला रहचकम।
- 13 खन्न ऐस्रना उल्ला ऐम नगरे ही फाटक ती बहरी खाइ ही पिंडी नू गोहरारना अइडा र'ई बाचकम ती केरकम। अरा ऐम असन उक्कम ती असन खोंडरका जोक्क मुक्कर गने कछनस्र'आ हेलरकम।



- 14थुअतीरा नगरे ता लुदिया नामे ही बैजनी किचरी बीसू धर्मसिन महबा ननू आली अदिन मेना लगिया। पौलुसी कत्थन मेना गे धर्मस अदही जिया बलिन तिसगस।
- 15आद तंग्हे गोटा एडपातर गने नोडरा। खने आद एमन गोहरार'आ, “नीम एंगन उर्बासी पत'ऊ आली बुझ्दर होले, एंग्हे गुसन गुचा ती र'आ।” अरा आद एमन बड़पेलहा ती होच्चा केरा।
- 16उन्दुल ऐम गोहरारना अड्डा काला लिक्कम खने, एमा ओन्टा बिट्ठी ननू जोंख पेल्लो भेंट मंजा। अदही मइय्याँ सगड़ी ऐरना ही ओन्टा बोलता रहचा, अरा आद सगड़ी ऐरना ती तंग्हे उर्बर गे नगदेम बग्गे ढिबा अर्जा'आ लगिया।
- 17आद पौलुसी अरा एम्हे खोखा बरचा ती चिच्चियार'आ हेलरा, “इबड़ा आलर उर्मी ती कोहाँ धर्मसी जोंखर हिकनर। ईर नीम एकासे नाडर'आ ओंग्दर अदही पत नू तेंगनर।”
- 18आद नगदे उल्ला गूटी एन्नेम नना लगिया। लिकिन पौलुस गोसा मंजस अरा किर्रे ईरियस ती आ बोलतन बाचस, “ऐन निंगन येसु मसीसी सवंग ती आनदन, इदही मइय्याँ ती उरखय कलय।” अरा आ बोलता आ बारिम आद ती उरखा केरा।
- 19तहाँ आ बिट्ठी ननू जोंख पेल्लो ही उर्बर इदन ईरियर ती अक्खर का तम्हे अर्जा'अना ही असरा मुंजा केरा। खने आर पौलुस अरा सीलासिन धरचर ती बजार नू नगरे ही अक्स'उर गुसन नतगियर ओन्द्रर।
- 20आर आरिन रोमी अक्स'उर गुसन होच्चर अरा बाचर, “ईर यहूदीर हिकनर अरा नम्हे नगरे नू हुही चोद'आ लगनर।
- 21अरा एन्ने चाल आबोन सिखाब'आ लगनर का एकदन नाम रोमी आलर गे अदिन नना गे अरा मन'आ गे मल्ला चीरका।”
- 22तहाँ गोंहड़ा पौलुस अरा सीलासी बिडदो नू लौ'आ गे खोंडरर। अरा रोमी अक्स'उर आर ही किचरिन चरियर ती ईचा गे अरा आरिन बेत ल'आ गे आनियर।
- 23बेत लौताचर ती आरिन जेहेल नू गुडचर चिच्चर अरा दरोगासिन आरिन चिहूंक लगे खापा गे आनियर।
- 24आस एन्ने पेसका मंजस ती आरिन जेहेल ही भितरी कुठली नू उइय्यस अरा आर ही खेड्डेन कंक नू हेंताचस चिच्चस।
- 25अधरात माखा नू पौलुस दरा सीलास गोहरारनुम धर्मसिन भजन नना लगियर। अरा गुडरकर आर ही भजनन मेना लगियर।



- 26 अरा आचका ही ओन्टा कोहाँ खेखेल नुक्रना मंजा। खने जेहेल एडपा ही नेव गुट्ठी हूँ नुकुर खच्चिया, अरा लेम उर्मी बली तिसग्रा केरा, अरा ओर्मा गुडरकर ही बींड़ी कोल्लरा केरा।
- 27 दरोगस एजरस ती चोचस अरा जेहेल एडपा ही बली गुट्ठिन तिसगरका ईरियस ती गुडरका आलर बोंगर केरर बाचस ती आस तलवार ओथ्रस ती तंगन पिटा बिद्दियस।
- 28 लिकिन पौलुस जोरसरिया चिच्चियारस ती बाचस, “निंगन अमा नठाब'आ, एन्देगेका ऐम ओर्मम इसानिम र'अदम।”
- 29 खने आस बिल्ली ओन्द्रताचस ती भितरी कोरचस, अरा इल्चका ती असरनुम पौलुस अरा सीलासी खेडमूली खत्रस।
- 30 अरा आरिन बहरी ओन्द्रस ती बाचस, “अना उर्बारी, नाडर'आ गे एंगा एन्दे नन्ना र'ई?”
- 31 आर बाचर, “नीन उर्बा येसुसिन पत्त'आ होले, नीन अरा निंग्हे एडपातर नाडर'ओर।”
- 32 अरा आर आसिन अरा आसी गोट्टा एडपा आबारिन उर्बासी कत्था मेन्ताचर।
- 33 आ माखा आ बारिम आस आरिन होचस ती आर ही खसरा गुट्ठिन नूडियस। अरा लेम तान अरा तंग्हे उर्मी एडपातर नोडरर।
- 34 तहाँ आस आरिन तंग्हे एडपा होचस ती आर गे मंडी चिचस। अरा आस तंग्हे गोट्टा एडपातर गने रिङ्गस, एन्देगेका आर धर्मेसिन पत्ताचकाचर।
- 35 बिज्जिया खने रोमी अक्स'उर सैनारिन दरोगासिन तेंगा गे तइय्यर, “अबड़ा आलारिन अम्बा चि'आ।”
- 36 खने दरोगस ई कत्थन पौलुसिन तिंगियस, “रोमी अक्स'उर निमन अम्बा चि'आ गे आनका तइय्कानर। ओंगे नीम उरखा ती कोडेम किरिम बि'आ।”
- 37 लिकिन पौलुस सैनारिन बाचस, “ऐम रोमी आलम हिकदम, अन्नु हूँ आर एमन बिगर मेना खोजम आलर ही मुन्दहारे लौचर अरा जेहेल नू गुडर। अक्कु आर एमन कलेकसे ओथ्रनर। एन्ने मल्ला, लिकिन आरिम बर'ओर ती एमन बहरी ओथ्र'ओर।”
- 38 सैनर ई कत्थन रोमी अक्स'उरिन तिंगियर। पौलुस अरा सीलास रोमी आलर हिकनर मेंजर ती आर इल्चियर केरर।
- 39 ओंगे आर बरचर ती आरिन छमा नेचर अरा आरिन बहरी होचर ती बिन्ती नंजर का नगरे ती बहरी किरिम बि'आ।



40 तहाँ आर जेहेल ती उरखर केरर। अरा लुदिया ही एड़पा केरर। असन पत'ऊ भइय्योरिन भेंट मंजर ती आरिन रिझ्रताचर। फिन आ नगरे ती किर्रिम बिच्चियर।

तइरकर 17

1 फिन पौलुस अरा सीलास अम्फिपोलिस अरा अपोल्लोनिया नगरे मन्नुम थेस्सलोनिके नू बरचर। असन यहूदीर ही ओन्टा गोइहा एड़पा रहचा।

2 पौलुस तंगहै चाल लेक्खा आर ही गुसन केरस अरा तीन खन्न ऐख्रना उल्ला गूटी आर ही गने नेम्हा पुथी ती तिगियस।

3 अरा आस अबड़ा ही माने आबोन बुझाब'आ लगियस अरा पुरुब नंजस का मसीस गे दुक्खे चोदना अरा केचका ती उज्जा चो'अना दिम रहचा, अरा ऐन निमन ई येसुसी पत नू तेंगदन, ईस दिम मसीस हिकदस एन्ने बाचस।

4 अबड़र ती जोक्क आलर पताचर ती पौलुस अरा सीलास गने मेसरर। अरा बग्गे धर्मेसी इल्चू युनानी आलर अरा बग्गे मुध मुक्कर हूँ पताचर ती मेसरर।

5 लिकिन यहूदीर इस्गहा मंजर। अरा आर बजार ती जोक्क मलदौ आलारिन खोंइचर ती गोंहड़ा मंजर ती नगरे नू कलम कलम नना हेलरर। अरा आर यासोनसी एड़पा नू कोरचर ती पौलुस अरा सीलासिन गोंहड़ा ही मुन्दहारे ओन्द्र'आ बेद्दा लगियर।

6 लिकिन आरिन असन मल खक्खियर ती यासोन अरा जोक्क पत'ऊ भइय्योरिन नगरे ता अक्स'उर हेद्दे नतगियर ओन्द्रर। अरा चिच्चियारनुम बाचर, “ईर गोट्टा राजिन हेलहेलम नंजकानर, इबड़र इसन हूँ बरचकानर।

7 यासोन ईरिन तंगहै गुसन उइय्का र'अदस। इबड़र जम्मर कैसरसी पेसका ही बिड़दो नू नन्नर अरा ब'अनर का अउर ओन्टा बेलस येसुस र'अदस।”

8 अबड़ा कत्थन गोंहड़ा अरा नगरे ता अक्स'उर मँजर ती हेन्दवारर केरर।

9 औंगे आर यासोन अरा अबड़ा पत'ऊ भइय्योरिन अम्बना ही ढिबा होचर ती अम्बियर चिच्चर।

10 पत'ऊ भइय्योर लेम पौलुस दरा सीलासिन माखेच माखा बेरोया नगरे तइय्यर चिच्चर। अरा आर असन अंइसियर ती यहूदीर ही गोइहा एड़पा नू केरर।

11 इबड़ा ता यहूदीर थेस्सलोनिके नगरे ता यहूदीर ती दौ ओक्कना इजना रहचर। अरा अबड़र कोइहे ओन्क'आ ती कत्थन इंझर, अरा उर्मी उल्ला आर नेम्हा पुथी नू बेद्दा लगियर का इबड़ा कत्था एन्नेम र'ई का मला।



- 12 औंगे अबडर ती बग्गे आलर पत्ताचर, अरा बग्गे युनानी मुध मुक्कर अरा मैतर हूँ पत्ताचर।
- 13 लिकिन थेस्सलोनिके ता यहूदीर अक्खर का पौलुस बेरोया नू हूँ धर्मसी कत्था तेंगदस। खने असन हूँ आर बरचर ती आलारिन तकाब'आ हेलरर अरा हेलहेलम नना हेलरर।
- 14 तहाँ पत्त'ऊ भइय्योर लेम समुदर मन्नुम काला गे पौलुसिन बिदा नंजर। लिकिन सीलास अरा तीमोथियुस असानिम रहचर।
- 15 पौलुसिन अंडसताचर उइय्यर आर अथेने नगरे गूटी केरर ती किरियर बरचर। अरा आर किर्रो बारी पौलुस ती सीलास अरा तीमोथियुस गे पेसका खक्खियर ती बरचर का एवंदा चाँइहे मनो अन्नेम बर'ओर।
- 16 पौलुस अथेने नू सीलास अरा तीमोथियुसी पाब ऐरा लगियस खने, आ नगरे नू मूर्ती गुट्ठिन निन्दिका ईरियस खने आसी जिया उल्लिया।
- 17 औंगे आस गोइहा एइपा नू यहूदीर गने अरा धर्मसी इल्चू नन-यहूदीर गने अरा बजार टोंका नू आलर खक्ख'आ लगियर आर ही गने उर्मी उल्ला कत्था बरता ननालियस।
- 18 अरा एपिकूरी अरा स्तोईकी धरम ता जोक्क सिखाब'उर आसी गने कत्था बरता मना हेलरर। अरा जोक्कोर बाचर, “ई पोरपोरोस एन्देर ब'आ बेद्ददस?” अरा नन्नर बाचर, “ईस गा नन्ना देवता गुट्ठी ही कत्था तिंगुस लगदस।” एन्देरगेका पौलुस येसुसी अरा आसी उज्जा चो'अना ही पत्त नू तेंगा लगियस।
- 19 खने आर आसिन अरेयोपगोस गुसन होच्चर केरर। अरा असन आर मैजर, “एन्देर ऐम अख'आ औंगदम का नीन पुना कत्था तेंगदय ईद एन्देर हवे?”
- 20 निंग्हे ब'अना ई कत्था एमा गे पुना कत्था हवे। अरा ऐम अख'आ बेद्ददम का ई सिखाब'अना ही मने एन्देर हवे?”
- 21 ई अथेने ता उर्मी आलर अरा नन-राजी ती बर'अरकी असन र'उर गा पुना पुना कत्था मेन्ना अरा ब'अना नू तम्है उल्ला आबोन खंडा लगियर।
- 22 अरेयोपगोस सभा ही मुन्दहारे इज्जस ती पौलुस बाचस, “अथेने नगरे नू र'ऊ आलारो, ऐन ऐरा लगदन का नीम उर्मी रकम ही ती कोइहे धरम मुवार र'अदर।
- 23 ऐन कुद्दनुम नुंगनुम निम्है महबा नन्ना आलोन ऐरा लिक्कन, खने एंगा ओन्टा एन्ने गोइहा खक्खरा, अइय्या लिखकी रहचा का 'बलना धर्मस गे।' नीम बलना नू एका धर्मसी महबा नन्दर, आ धर्मसी पत्त नू दिम ऐन निमन तेंगदन।



24ई धर्मस गोट्टा खेखेल अरा अइय्या र'ऊ उर्मिन कमचस, अरा आस मेर्खा दरा खेखेल ही उर्बस हिकदस। आस आलर ही खेक्खा ती कमचका मन्दिर नू मल र'अदस।

25अरा आस तंगा गे इन्द्रिइम जिनिस ही चाइ र'ई ब'अरकी आलर ही खेक्खा ती सुसर नना मल बेद्ददस। आस गा तानिम जम्मा गे उज्जना अरा नाखना अरा उर्मी जिनिसन चि'अदस।

26आस ओर्त आलस ती गोट्टा खेखेल नू र'आ गे उर्मी जाती गुट्ठिन कमचस। अरा आस मुन्द तिम आ जातियर ही चो'अना अरा खतरना ही बेइन ओक्ताचकादस, अरा आर ही सिवान गुट्ठिन हेंचकादस।

27अरा आस बेद्ददस का आर धर्मसिन बेद्दोर अरा उर्मी तरा बिद्दनुम बिद्दनुम आसिन खक्खोर। लिकिन आस नम्है नेखा ती हूँ गेच्छा मलकस।

28एन्देरगेका नाम आसी नू उज्जदत अरा कुद्दत नुंगदत अरा बड़ियर र'अदत। एकासे का निम्है जोक्क डंडी लिख'उर बाचकानर, 'ऐम गा आसी खद्दम हिकदम।'

29होले नाम धर्मसी खद्दर मनरकी नमा एन्ने मल सोचना का धर्मस आलर ही करिगार अरा सोच ती सोना अरा चान्दी अरा पखना ती कमचका मूर्ती र'अदस।

30केरका बेड़ा नू आलर धर्मसिन मल बुझर। इदिन आस अम्बियस चिच्चस। लिकिन अक्कु आस उर्मी अइडा ता उर्मी आलारिन जियन किर्त'आ गे आनदस।

31एन्देरगेका आस ओन उल्लन ओक्ताचकादस। अउला आस आसी चाजरका आलस ती गोट्टा खेखेल ता आलारिन उजगो ती नैवई ननोस। आ आलासिन आस केचका ती उज्जा चौदताचस ती ई कत्थन ओर्मारिन मानिम ऐदका र'अस।"

32केचका ही उज्जा चो'अना ही पत ता कत्थन आलर मेंजर ती जोक्क आलर अलखा हेलरर। अरा जोक्क आलर बाचर, "ई कत्था ही पत नू खोखा ऐम अउरिम निंग्हे ती मेनोम।"

33तहाँ पौलुस आर ही मझी ती किर्रिम बिच्चियस।

34लिकिन जोक्क आलर आसी गने मेसरर अरा पत्ताचर। आर ती अरेयोपगोस सभा ता आलस दियोनुसियोस रहचस, अरा दामारी नामे ओन्टा मुक्का रहचा, अरा आर ही गने अउर हूँ आलर रहचर।

तइरकर 18

1इदही खोखा पौलुस अथेने नगरेन अम्बियस ती कोरिन्थ नगरे नू बरचस।



- 2असन अकुलास नामे ओन्टा यहूदी आलासिन खक्खियस। अकुलासी जनम पोन्तोस राजी नू मंजकी रहचा। आस तंगआली प्रिसका गने जोक्क उल्ला मुन्द इताली देस ती बरचका रहचस, एन्देरगेका कोहाँ बेल क्लौदियोस जम्मा यहूदीरिन रोम राजी ती किरिमबि'आ गे पेंसकाचस। पौलुस आर गने भेंटारस।
- 3एन्देरगेका आर हूँ तंगहै लेक्खा कुम्बा कमना ही नलख ननू आलर रहचर। खने आस आर ही गने नलख नना लगियस ती र'आ लगियस।
- 4पौलुस उर्मी खन्न ऐस्रना उल्ला गोइहा एइपा नू यहूदीर अरा युनानी आलर गने कत्था बरता ननालियस ती येसुसिन पत्ता'आ गे बुझाब'आ गे चिहुट ननालियस।
- 5मकेदोनिया ती सीलास अरा तीमोथियुस बरचर खने, पौलुस दौ कत्था तेंगा गे उर्मी बेड़ा पहाबालियस। अरा यहूदीरिन येसुस दिम मसीस हवे बाचस ती गोवाह चि'आ लगियस।
- 6लिकिन अबड़ा आलर पौलुसिन हिड़'आ अरा निंदा नना हेलरर। खने आस तंगहै किचरी ता रीडोन खितियस ती बाचस, “धर्मस ती निमा खक्खना दंडे गे हुदा नीम दिम हिकदर, ऐन गा एंगहै नलखन मुंज खच्चकन। ऐन अक्कु ती नन-यहूदीर गुसन क'ओन।”
- 7अरा आस गोइहा एइपन अम्बियस ती किरिम बिच्चियस ती तितियोस यूसतोस नामे ही ओन्टा नन-यहूदी आलासी एइपा केरस। आस धर्मसी महबा ननू आलस रहचस। आसी एइपा गोइहा एइपा गने सट्टकी रहचा।
- 8गोइहा एइपा ता मुद्धस क्रिसपोस तंगहै एइपातर गने उर्बासिन पत्ताचस। अरा कोरिन्थ ता बग्गे आलर हूँ पौलुसी कत्थन मेंजर ती पत्ताचर अरा नोइरर।
- 9ओन माखा उर्बस पौलुसिन देखार चिच्चस ती बाचस, “अमा एल्चा, तेंगतेम र'आ, कलेकले अमा र'आ।
- 10ऐन निंगहै गने र'अदन। ने हूँ निंगन ल'ओर ती निंगन नठाब'आ पोल्लोर, एन्देरगेका ई नगरे नू नगदे आलर एंगहै र'अनर।”
- 11पौलुस आलारिन धर्मसी कत्था सिखाब'अनुम असन डेइ बछर रहचस।
- 12गल्लियोन अखाया देस ता राजी खापुस रहचस, आ बारी जोक्क यहूदीर जुम्मरर ती पौलुसी बिड़दो मंजर ती आसिन धरचर अरा आसिन नैवई नन्ना अइडा नू ओन्द्रर।
- 13अरा आर बाचर, “ई आलस धर्मसी एन्ने महबा नना गे सिखाब'अदस का आद पेंसका ही बिड़दो र'ई।”



- 14 पौलुस ब'अम बिदुदियस खनेम गल्लियोन बाचस, “अना यहूदी आलारो, एकअम मदहे मलदौ महले बदी ही कत्था रहचा होले गा ऐन चिहुंक लगे निम्है कत्थन मेनोन दने।
- 15 लिकिन ईद निम्है धरम ही कत्था अरा नामे अरा पेसका ही पत्त ता आनानखरना हवे। औंगे नीमिम इदन ऐरके। ऐन एन्ने कत्था गुट्ठी ही नैवई नना मल बेदददन।”
- 16 अरा आस आरिन नैवई अड्डा ती ओथ्रस चिच्चस।
- 17 खने ओर्मा आलर गोइहा एइपा ता मुद्धस सोस्थेनेसिन धरचर ती नैवई अड्डा ही मुन्दहारे दिम लौचर। लिकिन गल्लियोन इबडा पत्त नू एन्देर हूँ चिहुट मल नंजस।
- 18 पौलुस नगदे उल्ला गूटी कोरिन्थ नगरे नू रहचस। अदही खोखा आस पत्त ऊ भई बहिनर ती बिदा मंजस ती तान मोक्का किरिया चड्डे केंखेया नगरे नू तंगहे कुक्कन मुंडरस ती प्रिसका अरा अकुलासी गने कोहाँ डोंगा ती सीरिया राजी केरस।
- 19 आर इफेसुस नगरे अंडसियर। फिन पौलुस प्रिसका अरा अकुलासिन असानिम अम्बियस। अरा तान यहूदीर ही गोइहा एइपा नू केरस ती यहूदीर गने कत्था बरता ननालियस।
- 20 अबडर पौलुसिन अउर जोक्क उल्ला र'आ गे बाचर। लिकिन पौलुस मल मनचस।
- 21 अरा आस आर ही ती बिदा मंजस ती बाचस, “धर्मसी मने र'ओ होले ऐन अउरिम बर'ओन।” आस इफेसुस नगरे ती कोहाँ डोंगा ती उरखस।
- 22 अरा आस कैसरेया अंडसियस। अरा असलेक ती आस केरस ती कलीसियन मोंजरा नंजस, फिन आस अन्तियोखेया किरियस।
- 23 फिन पौलुस जोक्क उल्ला अन्तियोखेया नू रहचस। तहाँ आस गलातिया अरा फ्रुगिया चक मन्नुम ती अड्डा अड्डा कुदनुम उर्मी पत्त ऊ आलारिन बडियर नंजस।
- 24 आ बेडा नू अलेक्सन्द्रिया नगरे ता अप्पोल्लोस नामे ओन्टा यहूदी इफेसुस नगरे नू बरचस। आस नेम्हा पुथिन दौ अख'उस अरा बडियर कछनखर'ऊ आल रहचस।
- 25 आस गे उर्बासी डहरे ही सिखाब'अना खक्खकी रहचा। अरा आस तंगहे बोलता ही रिझ गने येसुसी पत्त नू मानिम कत्थन तेंगा अरा सिखाब'आ लगियस। अन्नु हूँ आस योहनसी नोडरनन लेका अक्काचस।
- 26 आस गोइहा एइपा नू डिडगर गने ब'आ हेलरस। अरा अकुलास अरा प्रिसका आसी सिखाब'अनन मेंजर खने, आर आसिन तम्है गुसन होच्चर, अरा आसिन अउर कोइहे बेस धर्मसी डहरे ही पत्त नू बुझाबाचर।



27 अक्कुन अप्पोल्लोस अखाया देस काला बिद्दियस खने, इफेसुस ता पत्त'ऊ भइय्योर आसिन काला गे रिङ्गताचर, अरा आसिन परघ'आ गे अखाया ता पत्त'ऊ आलर गे चिठी लिखचर। अप्पोल्लोस अखाया अंडसियस खने, धर्मसी मया ती पत्त'ऊ मंजका आलर गे कोइहे सहाड़ा नंजस।

28 अरा आस यहूदीरिन ओर्मा आलर ही मुन्दहारे कोइहे डिङ गने कत्था बरता नंजस ती येसुस दिम मसीस ब'अरकी नेम्हा पुथी ती पुरब नंजस।

तइरकर 19

1 एका बेड़ा नू अप्पोल्लोस कोरिन्थ नगरे नूरहचस, पौलुस भितरी चक गुट्ठी ती डहरे ऐका लगियस ती इफेसुस अंडसियस। आस गे असन जोक्क पत्त'ऊ आलर खक्खर।

2 पौलुस आरिन मेंजस, “नीम पत्ताचका बेड़ा नू नेम्हा बोलतासिन खक्खकर का?” अबड़र बाचर, “मला, ऐम गा नेम्हा बोलतस र'अदस एन्ने इकला हूँ मलम मेंजकम।”

3 खने पौलुस मेंजस, “अन्ने होले नीम एन्देर नोइरनन खक्खकर?” आर किर्तर बाचर, “योहन नूइरत'उसी नोइरनन खक्खकम।”

4 पौलुस बाचस, “आस तंग्हे ती खोखा बर'ऊ येसुसिन पत्त'आ गे आलारिन बाचस ती जियन किर्त'आ गे नोइरत'आ लगियस।”

5 अबड़र इदिन मेंजर ती उर्बा येसुसी नामे ती नोइरर।

6 अरा पौलुस आर ही मइय्याँ खेक्खा ओक्ताचस खने, आर ही मइय्याँ नेम्हा बोलतस इतियस, अरा आर नन्ना नन्ना भखा कछनख'आ हेलरर अरा धर्मसी कत्थन मुन्द तेंगा हेलरर।

7 अबड़ा आलर ओर्मर मलागूटी बारा झन रहचर।

8 फिन पौलुस तीन महिना गूटी गोइहा एइपा काला लगियस ती धर्मसी राजी ही पत्त नू डिङगर गने यहूदी आलारिन बुझाब'आ लगियस।

9 लिकिन जोक्क आलर बेइहा मंजर ती मल मना'आ हेलरर, अरा ई कत्था ही पत्त नू गोंहड़ा ही मुन्दहारे हींइ'आ लगियर। ओँगे पौलुस आरिन अम्बियस ती पत्त'ऊ आलारिन तंग्हे गने होचचस। अरा आस तुरान्नीसी सिखाब'अना एइपा नू कालरकी असन उर्मी उल्ला धर्मसी कत्था ही पत्त नू कछनख'आ लगियस।

10 दुई बछर गूटी एन्नेम मना लगिया। ओँगे आसिया देस ता ओर्मा आलर यहूदी अरा नन-यहूदी आलर उर्बासी कत्थन मेंजर।

11 धर्मस पौलुस ती अजगुत नलख गुट्ठी नंजस।



- 12 अरा पौलुस बउराचका उरमाल अरा संफी गुट्ठिन रोगियर मइय्याँ नना चि'आ लगियर खने, आर ही बेमार कोड़े मना काला लगिया, अरा मलदौ बोलता गुट्ठी उरखा लगिया।
- 13 लिकिन जोक्क यहूदी आलर हूँ पद्दा पद्दा कुद्दनुम मलदौ बोलता गुट्ठिन आलर ती ओथ्र'आ लगियर। आर मलदौ बोलता रस्सका आलर नू उर्बस येसुसी नामे ती मलदौ बोलता गुट्ठिन ओथ्र'आ गे चिहूट नंजर। आर ब'आ लगियर, “पौलुस नेखा पत्त नू तेंगदस आ येसुस ती ऐन निमन आनदन, ‘उरखय कलय’।”
- 14 ओन्टा यहूदी मुध नैगस स्केवासी सातियोँ खद्दर हूँ एन्नेम नना लगियर।
- 15 उन्दुल मलदौ बोलता आरिन आनाकिर्ताचा, “ऐन येसुसिन अख'एन, अरा पौलुसिन हूँ अख'एन, लिकिन नीम एका ओर्तर?”
- 16 मलदौ बोलता रस्सकी रहचा आ आलस आर ही मइय्याँ झपारा ती आरिन पखड़ाचा, खने आर लंगड़ा मंजर ती अरा रिहोन बोहोन मंजर ती आ एड़पा ती उरखर बोंगर।
- 17 इफेसुस ता उर्मी र'ऊ आलर यहूदी अरा नन-यहूदी आलर ई हलन मँजर, खने ओर्मर मइय्याँ इल्चका कोरचा केरा, अरा उर्बस येसुसी नामे ही ओहमा मना हेलरा।
- 18 अबड़र ती बग्गे आलर ने पत्ताचकाचर, आर बरचर ती तम्है मलदौ नलख गुट्ठिन परगट रूप नू हुकमारर।
- 19 देवड़ा मदहे ती कैनो आलर तम्है पुथी गुट्ठिन खोंड़चर ती ओर्मर ही मुन्दहारे बस्सियर। अरा अबड़ा ही दामन लेखतारा खने, पचास हजार चांदी ही सिक्का ही दाम रहचा।
- 20 ई लेक्खा उर्बासी कत्था डिड़गर गने बींइरनुम अरा बड़ियर मन्नुम केरा।
- 21 इबड़ा ही मंजका खोखा पौलुस मकेदोनिया दरा अखाया कुद्दनुम येरुसलेम काला गे तंग्हे बोलता नू ठंनचस। अरा आस बाचस, “असन अंडसोन ती ऐन रोम राजिन हूँ ऐरोन दिम।”
- 22 आस तंग्हे ती मुन्द तंग्हे सहाड़ा ननुर ती ऐंइ आलारिन तीमोथियुस अरा एरस्तुसिन मकेदोनिया तइय्यस। लिकिन तान जोक्क उल्ला गूटी आसिया नू रहचस।
- 23 आ बेड़ा नू उर्बासी ई डहरे ही पत्त नू कोड़हे हुलहुली इफेसुस नू चोचा केरा।
- 24 एकासे का देमेत्रियोस नामे सोनारस अरतेमिस देवी ही मन्दिर लेक्खा चांदी ही मुर्ती कमत'आ लगियस ती बढाई आलर गे नगदे नलख चि'आ लगियस।
- 25 आस इबड़ारिन अरा ई लेक्खा नलख ननू अउर बग्गे आलारिन खोंड़चस ती बाचस, “भईरो, नीम अखदर का ई नलख नन्ना नू नमा नगदे नफा मनी।



- 26 लिकिन नीम ऐरदर अरा मेना लगदर का आ पौलुस गा इफेसुस नू लेका मला लिकिन गोटा आसिया नू कोइहे आलारिन बुझाबाचस ती तंगहै आकुस नू नंजस, अरा ब'अदस का खेक्खा गुट्ठी ती कमरका देवता गुट्ठी मानिम धर्म मल्दस।
- 27 इत्रु इदही लेका इल्चिका मलकी का नम्है नलख मुंज'ओ क'ओ। लिकिन कोहाँ देवी अरतेमिस ही मन्दिर ही मान किरिमबि'ओ, अरा अरतेमिस देवी ही महबा हूँ मुंज'ओ क'ओ एकदा गोटा आसिया अरा खेखेल नू मनई।”
- 28 आर इदन मैजर ती खींस ती निन्दियर केरर अरा चिच्चियार'आ हेरर, “इफेसुस ता अरतेमिस देवी कोहाँ हवे।”
- 29 अरा सौंसे नगरे नू हलहली मंजा केरा। आर पौलुस गने डहरे ऐकना नू संगे मंजका मकेदोनिया ता आलर गायोस अरा अरिस्तरखोसिन धरचर ती अखड़ा टोंका नू बाँगर।
- 30 पौलुस आ सभा नू काला बेद्दा लगियस, लिकिन पत'ऊ आलर आसिन काला मल चिच्चर।
- 31 अरा आसिया ता जोक्क मुद्धर पौलुसी सखी रहचर। आर हूँ खभर तइय्यर अरा गोहरारर का आस अखड़ा टोंका नू अम्बोस काला।
- 32 सभा नू काँव काँव मना लगिया। जोक्क आलर ओन्टा कत्थन चिच्चियारर, जोक्क आलर नन्ना कत्थन चिच्चियारर। अरा बग्गे आलर गा इदिन हूँ बल्ला लगियर का आर एन्देर गे इसन खोंडरका र'अनर।
- 33 खने जोक्क यहूदी आलर अलेक्सन्द्रसिन गोंहड़ा ही मुन्दहारे तुक्कियर ती तिगियर का एन्देर ब'अना रई। अलेक्सन्द्रस खेक्खा चौदस ती कलेकसे र'आ बाचस का आस अइय्या ता दसा आबोन आलारिन बुझाब'आ ओंगोस।
- 34 लिकिन गोंहड़ा आसिन चिन्हचा का आस यहूदी आलस, खने आलर दुई घंटा गूटी चिच्चियार'आ लगियर, “इफेसुस ता अरतेमिस देवी कोहाँ हवे।”
- 35 तहाँ नगरे ता अक्स'ऊ आलस गोंहड़ा आबोन कलेकसे नंजस ती बाचस, “इफेसुस नगरे ता आलारो, ओर्मर अखदर का इफेसुस नगरे कोहाँ देवी अरतेमिस ही मन्दिर आबोन उइयका नगरे हवे, अरा अदही मूर्ती मेर्खा ती खत्रका हवे।
- 36 ई कत्था गा कत्था बरता नन्ना ही कत्था मल्ली। ओंगे नीम कलेकसे र'अरकी बिगर सोच'अम एन्देर हूँ मल नन्ना रई।



37नीम इबड़ा आलारिन धरचकर ती ओन्द्रका र'अदर, आर मन्दिर ती एन्द्रा हूँ मल्ला बचका, अरा नम्है देवी ही बिड़दो नू मल बाचका र'अनर।

38देमेत्रियोस अरा आसी बढई आलर गे नेख'आ ही बिड़दो नू इन्द्रिइम ब'अना र'ई होले, आर अदालत नू अरा नैवई ननुर हेददे काना र'ई। असन आर अपन ती नन्नर गने नग्गानखर'आ ओंग्दर।

39लिकिन नीम एन्नेम अउर इन्द्रिइम कत्था ही पत नू ब'आ बेददर होले, अदही फसला नगरे ही पंचायत नू ननो चिओ।

40एन्देरगेका इन्ना ता हूलहूली चड्डे नम्है मइय्याँ रोमी राजी चलाब'उर ती बदी मना उंगी। एन्देरगेका नाम ई हूलहूली ही एन्देर चड्डे हूँ तेंगा पोल्लोत।”

41अरा एन्ने बाचस ती आस गोंहड़ा आबोन बिदा नंजस चिचस।

तइरकर 20

1हूलहूली मइचा अदही खोखा पौलुस पत'ऊ आलारिन मेखताचस ती आर गे जिया सालना चिचस। तहाँ आस आर ती बिदा मंजस ती मकेदोनिया केरस।

2आस कानुम कानुम आ चक ता उर्मी पददा गुट्ठी नू पत'ऊ आलारिन कोइहे कत्था सिखाबाचस ती आरिन रिझाबाचस अरा युनान देस अंइसियस।

3असन तीन महिना पहाबाचस ती समुदर डहरे मन्नुम आस सीरिया राजी कालू रहचस। आ बारी आस गे खभर मंजा का यहूदी आलर आसिन पिटा गे चिताबुता कम'आ लगनर। खने आस मकेदोनिया मन्नुम किरा गे तिगचस।

4बेरोया नगरे ता पुरोसी तंगदस सौपत्रोस, अरा थेस्सलोनिके नगरे ता अरिस्तरखोस अरा सेकुन्दोस अरा देरबै नगरे ता गायोस अरा तीमोथियुस अरा आसिया ता तुखिखोस अरा त्रुफिमोस आसी गने केरर।

5आर मुन्द केरर ती त्रोआस नू एम्है पाब ऐरा लगियर।

6अरा ऐम बिगर बिदगी असमा ही परब ही खोखा मकेदोनिया ता फिलिप्पी ती कोहाँ डोंगा अरगकम ती पांच उल्ला खोखा त्रोआस नू आर ही गुसन अंइसकम। अरा सात उल्ला गूटी असानिम रहचकम।



- 7हप्ता ही पहिल उल्ला ऐम अइय्या ता पतऊ आलर गने असमा किच्चा गे खोंडरकम। दोसर उल्ला पौलुस किरिमबिआ गे रहचस खने आस आर ही गने कछनख्रतेम र'आलियस। अरा आस अथा माखा गूटी कछनख्रस।
- 8एका पाटन एइपा नू ऐम ओकरका रहचकम असन नगदे गोटंग बिल्ली लघ'आ लगिया।
- 9अरा युतुखोस नामे ओन्टा जोंखस भंवारी नू उक्का रहचस। पौलुस घइही माखा गूटी कछनख्र'आ लगियस खने आस कूगा लगियस अरा खन्द्रस केरस। खने आस खन्द्रनुम तिसर पाटन ती खत्रस अरा केचस।
- 10खने पौलुस इतियस ती खोलखरस ती आसिन खिवच्चियस ती बाचस, “अमके अकबकरा, ईस उज्जालदस।”
- 11अरा पौलुस मइय्याँ केरस ती असमा किच्चियस अरा मोक्खस। अरा आस बिज्जना बेड़ा गूटी कछनख्रते र'आलियस। फिन आस उरखस।
- 12अरा आर आ जोंखासिन उज्जना एइपा होच्चर केरर अरा आर खुसमारर।
- 13ऐम मुन्द तिम कोहाँ डोंगा ती आस्सोस नगरे केरकम का अइय्या ती एमा पौलुसिन अरगना रहचा। आस दिम एन्ने चिताबुता नंजकाचस, एन्देरगेका आस ईकनुम असन काला बिद्दियस।
- 14आस आस्सोस नू एमा खक्खस खने, ऐम आसिन कोहाँ डोंगा नू अरगकम ती मितुलेने नगरे नू बरचकम।
- 15अरा अइय्या ती ऐम कोहाँ डोंगा नू अरगकम ती दोसर उल्ला खिओस टापू ही हेद्दे अंडसकम। अरा दुसर उल्ला नू सामोस टापू आबोन कट्टकम, अरा तिसर उल्ला मिलेतोस नगरे नू अंडसकम।
- 16एन्देरगेका पौलुस इफेसुस नगरेन अम्बरकी काला गे तिगचका रहचस। अरा आस आसिया देस नू अउर हूँ घइही बेड़ार'आ गे मल बिद्दियस। एन्देरगेका आस येरुसलेम नू चाढेम अंडसा गे बिद्दियस का आस पेन्तेकोस्ते परब ही उल्ला नू असन र'आ ओँगोस।
- 17पौलुस मिलेतोस ती इफेसुस गे आलारिन तइय्यस ती कलीसिया ता सेयान आलारिन मेखताचस।
- 18आर आसी गुसन अंडसियर खने, आस आरिन बाचस, “नीम अखदर का ऐन इकला आसिया अंडसकन आ पहिल उल्ला ती उर्मी घड़ी ऐन निम्है गने एकासे रहचकन।
- 19नगदे लुदऊ अरा खंजलखो चूरखकन ती अरा यहूदी आलर ही मलदौ घतना ही चड्डे एंग्हे मइय्याँ मंजका बिद्दना गुट्ठी ती ऐन उर्बासिन सुसर नन्नुम बारी रहचकन।



- 20 अरा एका एका कत्था निम्है फैदा ही रहचा अदिन तेंगना नू, अरा आलर ही मुन्दहारे अरा एडपा एडपा काला काला सिखाब'आ गे मल इल्चिकन।
- 21 अरा यहूदी अरा नन-यहूदी आलारिन चेताबचकन का आर जियन किर्त'अना रई अरा नम्है उर्बस येसु मसीसिन पत'अना चांड रई।
- 22 अक्कु ऐरा ऐन नेम्हा बोलतासिन पेसकन ती येरुसलेम काला लगदन, अरा असन एंग्हे मड्य्याँ एन्देर एन्देर मनो अदिन बलदन।
- 23 अरा इदिन लेका अखदन का नेम्हा बोलतस उर्मी नगरे नू एंगन चेताब'अदस का एंगा गे हेंरना अरा कलपारना गुट्ठी उडरकी रई।
- 24 लिकिन ऐन एंग्हे उज्जनन चोन्हा मल नन्दन। धर्मसी मया ही पत ता दौ कत्थन उर्मी आलर गे तेंगा गे उर्बा येसुस एंगा गे चिच्का नलखन पूरा नना गे ऐन बेद्ददन।
- 25 अक्कु ऐरा, ऐन अखदन का निम्है ओर्मर नू नेख'आ मझी नू ऐन धर्मसी राजी ही कत्था तेंगा कुद्दकन, निम्है ती ने हूँ एंग्हे मुंहिन फेन मल ऐरोर।
- 26 ओंगे ऐन इन्ना ब'अदन का ऐन पत'अना जोगे रहचकन, निम्है ती निकईम नास मनोर क'ओर होले, अदही जिमा ऐन मलदन।
- 27 एन्देरगेका धर्मस एन्दन नीम अख'आ गे बिद्दियस अबड़ा उर्मिन ऐन निमा तिंकन।
- 28 ओंगे निम्है पत नू अरा धर्मस तंग्हे खद्दासी खेंस ती खीन्दका तंग्हे कलीसियन खापा गे नेम्हा बोलतस निमन ईरू-खूजू उड्यका उर्मी खोंडहा ही पत नू चिहुंक र'अके।
- 29 ऐन अखदन का एंग्हे केरका खोखा खरिखन मल अम्बना चरू मूखू भुसुड गुट्ठी निम्है मझी नू बर'ओ।
- 30 निम्है मझी तिम एन्ने आलर चो'ओर ती पत'ऊ आलारिन तम्है तरा नतगा गे टेंको बोंको कत्थन सिखाब'ओर।
- 31 इदगे एज्रका र'आ अरा सुरता नना का ऐन तीन बछर गूटी उल्ला माखा चींखा चींखा ओर्त ओर्तारिन चेताब'आ गे मल अम्बकन।
- 32 अक्कु ऐन निमन धर्मस गे अरा आसी मया ही कत्था नू अम्बदन, आद निमन परद'आ उंगी, अरा धर्मस नेम्हा मंजका उर्मी आलर नू मेस'अरकी आसीस चि'आ उंगी।
- 33 ऐन नेख'अम चाँदी महले सोना महले किचरी गे मल चिबाखारकन।



34 नीम अखदर का ऐन इबड़ा खेक्खा तिम एंग्हे अरा एंग्हे गने रहचका आलर ही चाड़ आबोन पूरा नना गे नलख नंजकन।

35 ऐन निमन उर्मिन नंजकन ती ऐदकन का एकासे कोइहे सकत नलख ननरकी पयहा आलारिन सम्इअना, अरा उर्बा येसुसी कत्था गुट्ठिन सुरता नन्ना चाड़ रई। आस तानीम बाचकादस का 'होअना ती चिअना कोइहे बेस हवे।' “

36 इबड़न बाचस ती आस मूकलिदरस अरा ओर्मर गने गोहरारस।

37 तहाँ अबड़ा ओर्मर नगदे चीखयर अरा पौलुसिन खेवचियर अरा आसिन चुंखियर।

38 कोइहे गा अबड़र ती बग्गे आलर, नीम एंग्हे मुहिन फेन मल ऐरोर एन्ने आसी बाचका चड्डे हेन्दवारर केरर। फिन आर आसिन कोहाँ डोंगा गूटी अंडसताचर।

तइरकर 21

1 एकाबारी ऐम आर ती छिन्ड्रकम ती कोहाँ डोंगा नू अरगकम खने, उजगोम कोस नू बरचकम, अरा दोसर उल्ला रोदोस अरा असले पतारा नू बरचकम।

2 असते फोइनिके चकभार काना ओन्टा कोहाँ डोंगा खक्खका ती ऐम अइय्या अरगकम ती उरखकम।

3 एकाबारी कुप्रोस टापू ऐथा खने, अदिन ऐम डेब्बा अम्बकम ती सीरिया राजी केरकम ती तुरोस नू इत्तकम, एन्देरगेका असन कोहाँ डोंगा ही माल एतअना रहचा।

4 असन ऐम पत'ऊ आलारिन खक्खकम ती सात उल्ला गूटी आर गने रहचकम। आर नेम्हा बोलतासी कइहाबअना ती पौलुसिन, “नीन येरुसलेम अमके काला” एन्ने तिंगियर।

5 अबड़ा उल्ला मुंज्रा खने, ऐम असले कोहाँ डोंगा तरा किरिम बिचकम। ओर्मा पत'ऊ आलर तम्है मुक्कर अरा खददर गने एमन नगरे ती बहरी अंडसताचर। असन ऐम पिंडी नू मूकलिदरकम ती गोहरारकम।

6 तहाँ ऐम बिदा मंजकम ती कोहाँ डोंगा नू अरगकम अरा आर एइपा किरियर।

7 तहाँ ऐम डहरे ऐकतेम ऐकतेम तुरोस ती उरखकम ती प्तोलेमयिस नू अंडसकम। असन ऐम पत'उरिन मोंजरा नंजकम ती आर ही गने उन्दुल रहचकम।

8 दोसर उल्ला ऐम असले केरकम ती कैसरेया बरचकम, अरा सतियोर ती ओर्तोस दौ कत्था तिंगू फिलिप्पोसी एइपा नू कोरचकम अरा आसी गने रहचकम।

9 आसी चार गोटंग डिंडा कुक्के खददर रहचर, आर धर्मेसी कत्थन मुन्द तिंगू रहचर।



- 10 असन ऐम ढेर उल्ला र'अना बेड़ा नू हगाबोस नामे ओन्टा धर्मसी कत्था तिगुस यूदेया ती बरचस।
- 11 आस एम्है गुसन बरचस ती पौलुसी कमरपटी आबोन होचस अरा तंग्हे खेड्डे खेक्खा गुट्ठिन हेंचस ती बाचस, “नेम्हा बोलतस एन्ने ब'अदस का ई कमरपटी नेख'आ हवे, आसिन येरुसलेम नू यहूदी आलर एन्नेम हें'ओर ती नन-यहूदी आलर ही खेक्खा नू सोंप'ओर।”
- 12 एकाबारी ऐम इदन मेंजकम खने, ऐम अरा असता आलर पौलुस ती गोहरारकम का येरुसलेम अमा काला।
- 13 लिकिन पौलुस बाचस, “नीम एन्देर नन्दर, चींखा चींखा एंग्हे जियन खोदखदर? ऐन गा येरुसलेम नू हें'आ गे लेका मला, लिकिन उर्बा येसुसी चड्डे खे'आ गे हूँ सपड़ारका र'अदन।”
- 14 ऐम आसी मनेन ताड़'आ पोलकम खने, ऐम एन्ने बाचकम ती कलेकसे मंजकम का उर्बासी मने पूरा मनन नेकअन।
- 15 इबड़ा उल्ला ही खोखा ऐम एम्है जिनिसन सपड़ाचकम ती येरुसलेम काला गे उरखकम।
- 16 अरा कैसरेया ती हूँ जोक्क पत'ऊ आलर एम्है गने केरर, अरा एमन कुप्रियोस टापू ता मनासोन नामे ओन्टा पच्चा पत'ऊ आलस गुसन ओन्दर बरचर का ऐम आसी गुसन र'आ ओंगोम।
- 17 एकाबारी ऐम येरुसलेम अंडसकम खने, अइय्या ता पत'ऊ भइय्योर एंगन कोइहे रिझ गने परघाचर।
- 18 दोसर उल्ला पौलुस अरा ऐम याकोबसिन भेंटार'आ गे केरकम, असन ओर्मा सेयान आलर रहचर।
- 19 खने आस आरिन मोजरा नंजस ती एन्देर एन्देर नलख धर्मस आसी दौ कत्था तेंगना नलख ती नन-यहूदी आलर नू नंजका रहचस, ओन्टा ओन्टा उर्मिन तिगियस।
- 20 अबड़र इदिन मेंजर ती धर्मसी महबा नंजर। फेन आस ती बाचर, “अना भई, नीन ऐरदय का यहूदी आलर ती कैयो हजार आलर पत्ताचका र'अनर। आर ओर्मर मूसासी नेग नू मूलखका र'अनर।
- 21 आर निंग्हे पत नू मेंजकानर का नीन नन-यहूदी आलर नू र'ऊ यहूदी आलारिन मूसासी नेग ती किरा काला गे सिखाब'अदय, अरा ब'अदय का निम्है खदर ही खतना नन्त'आ मला अरा चाल गुट्ठी ही लेक्खा अमा ऐका।
- 22 होले नाम एन्देर नन्ना र'ई? आर मेनोर दिम का नीन इसन बरचका र'अदय।



- 23 औंगे ऐम निंगन एन्देर ब'अदम अदिन नना। एम्है गुसन चार झन आलर र'अनर, आर किरया मोक्का र'अनर।
- 24 आरिन हो'आ ती आर ही गने निंगन नेत ही लेक्खा सुध नना अरा आर कुक्कू मुंडर'आ गे नीन ढिबा चि'आ लघ'आ। होले ओर्मर अख'ओर का एका कत्था निंगहै पत नू बारकी र'ई, आद मानिम मल्ली, अरा नीन हूँ गा मूसासी नेगन मनदय ती अदही लेक्खा ऐकदय।
- 25 लिकिन अबड़ा नन-यहूदी पत'ऊ आलर ही पत नू ऐम एन्ने चिताबुता नंजकम ती लिखचकम तइय्कम का मूर्ती गुट्ठी ही दाँडे अरगका ओना-मोखना ती अरा खेंस ती अरा घोघन पेदखका मेक्खो गुट्ठी ही अहड़ा ती अरा पेहरन ही सोतरा नलख ती तरकूटी र'ओर।”
- 26 तहाँ पौलुस अबड़ा आलारिन होचस ती दोसर उल्ला आर ही गने चाल ही लेक्खा सुध मंजस। अरा सुध मन्ना ही उल्ला इकला पूर'ओ अरा अबड़ा ओर्मर गे दान अरगना इकला पूर'ओ एन्ने तेंगा गे आस धर्मसी मन्दिर नू केरस।
- 27 इकला सात उल्ला पूरना रहचा खने, आसिया ता जोक्क यहूदी आलर पौलुसिन धर्मसी मन्दिर नू ईरियर ती उर्मी गौहड़न ततकाचर ती आसिन धरचर।
- 28 अरा चिच्चियारर, “अना इस्राएल आलारो, एमा सहाड़ा नना! ईस आ आलस दिम, एकास नम्है आलारिन अरा मूसासी नेग ही अरा ई अड्डा ही बिड़दो नू उर्मी आलारिन अरा उर्मी अड्डा नू सिखाब'अदस, अरा नन-यहूदी आलारिन हूँ आस धर्मसी मन्दिर नू ओन्द्रस ती ई नेम्हा अड्डन सोतबोड़'आ नंजका र'अदस।”
- 29 (एन्देरगेका अबड़र इदिन ती मुन्द इफेसुस ता त्रुफिमोसिन आसी गने नगरे नू ईरका रहचर। औंगे एन्ने बुझ'आ लगियर का पौलुस आसिन धर्मसी मन्दिर नू ओन्द्रका र'अदस।)
- 30 तहाँ गोट्टा नगरे नू चोच-उक्कना मंजा केरा, अरा आलर बोंग जुमरर अरा पौलुसिन धरचर ती धर्मसी मन्दिर ही बहरी घिडराचर ओन्द्रर। अरा लेम मन्दिर ही बली मुचचतारा।
- 31 आर आसिन ल'आ पिटा बेद्दा लगियर खने, रोमी फउद उर्बस गे अरो खक्खरा का गोट्टा येरुसलेम नू चो'आ-ओक्का लगी।
- 32 खने आस लेम जोक्क सैनारिन अरा सैनर ही मुद्धारिन होचस ती आर ही गुसन बोंगस ती बरचस। अरा आर फउद उर्बासिन अरा सैनारिन ईरियर खने, पौलुसिन ल'अनन अम्बियर चिच्चर।
- 33 खने फउद उर्बस हेद्दे बरचस ती पौलुसिन हेंचस, अरा दुई गोटा सिकड़ी ती हें'आ गे आनियस ती मँजस, “ईस एका ओर्तस अरा ईस एन्देर नंजका र'अदस?”



- 34 लिकिन गोंहड़ा नू आलर बारो-बरनिया ब'आ ब'आ चिच्चियार'आ हेलरर। चोच-उक्कना मन्ना चड्डे आस डउल लगे मानी आबोन अख'आ पोल्लस। आँगे पौलुसिन फउद गढ़िया नू होआ गे आनियस।
- 35 एकाबारी आस सिड़ही गुसन अंडसियस खने, एन्ने मंजा का गोंहड़ा ही तुकना-बेकना ही मारे सैनर गे आसिन चोद'अरकी हो'अना मंजा।
- 36 एन्देरगेका आलर ही गोंहड़ा आसिन पिटा खच्चा ब'अरकी चिच्चियारनुम आसी खोखा नू रहचा।
- 37 सैनर पौलुसिन फउद गढ़िया नू हूऊ रहचर खने, पौलुस फउद उर्बासिन बाचस, “ऐन निंगन इन्द्रिडम ब'आ आँगदन का?” खने आस बाचस, “एन्देर नीन युनानी भखा अखदय का?”
- 38 नीन आ मिसर आलय मलदय का, एकास जोक्क उल्ला मुन्द हूलहूली नंजस ती चार हजार बलवा ननुरिन टोड़ंग तरा डगराचस होच्चस?”
- 39 पौलुस बाचस, “मला, ऐन गा किलिकिया देस ही तरसोस नगरे ता यहूदी आलन हिकदन। अरा ऐन आ मुद्ध नगरे तरसोस ता रऊ आलन। ऐन निंगन गोहरारदन का नीन एंगन ई आलर गने कछनख'आ चि'आ।”
- 40 फउद उर्बस कछनख'आ चिच्चस। खने पौलुस सिड़ही नू इज्जस ती आलारिन खेक्खन नुकचस ती कलेकसे र'आ गे बाचस। आर कलेकसे मंजर खने, आस इब्रानी भखा ती ब'आ हेलरस।

तइरकर 22

- 1 “अना भईरो अरा बंगारो, अक्कु एंग्है बहासन मेना।”
- 2 आस आर ही गने इब्रानी भखा ती कछनखनन आर मंजर खने, आर कलेकसे मंजर। खने पौलुस बाचस,
- 3 “ऐन गा यहूदी आलन हिकदन। ऐन किलिकिया देस ता तरसोस नगरे नू कुन्द्रकन। अरा ई येरुसलेम नगरे नू पर्दकन ती गमालिएेलसी खेड्डमूली उक्कन ती नम्है पूरखर ही नेग अरा चाल गुट्ठिन ठौका ठौका सिरकन। अरा धर्मस गे एन्ने मूलखका रहचकन, एकासे इन्ना नीम ओर्मर र'अदर।
- 4 ऐन गा येसुसी डहरे नू ईकू आलारिन पिटा खच्चना गूटी सताबाचकन, अरा मैतर अरा मुक्कर इरबारिन हेंच हेंच जेहेल नू सजताचकन।



- 5इबड़ा कत्था गे कोहाँ नैगस अरा सभा ही उर्मी सेयान आलर गोवाह र'अनर। ऐन आर ही ती दमसकोस ता यहूदी भइयोर गे चिठी होच्चकन। ई डहरे नू ईकू आलारिन हैं'ओन ती येरुसलेम ओन्द्र'ओन ती दंडे चि'आ गे दमसकोस काला लिक्कन।
- 6ऐन कानुम कानुम दमसकोस हेद्दे अंडसकन खने, एन्ने मंजा का लोहाड़ी बेड़ा नू आचका ही मेर्खा ती एंग्हे चरियो तरा ओन्टा कोहाँ बिल्ली बिल्चिया।
- 7अरा ऐन खेखेल नू खत्रकन केरकन अरा एन्ने सड़ा मँजकन, 'सउल, सउल, नीन एंगन एन्देगे सताब'आलदय?'
- 8खने ऐन आनाकिर्ताचकन, 'उर्बायो, नीन एका ओर्तय?' आस एंगन बाचस, 'ऐन नासरेत ता येसु हिकदन, नेकन नीन सताब'आलदय।'
- 9एंग्हे संगे रहचका आलर बिल्लिन गा ईरियर, लिकिन एकास एंग्हे गने कछनख'आ लगियस आसी ब'अनन मल मँजर।
- 10खने ऐन बाचकन, 'उर्बायो, ऐन एन्दे ननोन?' उर्बस एंगन बाचस, 'चो'आ ती दमसकोस कला, अरा एन्दे निंगा नना गे उडरकी र'ई असन निंगन जम्मा तँगतार'ओ कालो।'
- 11आ बिल्ली ही लौकारना ती ऐन ऐरा पोल्कन, खने ऐन एंग्हे संगेर ही खेक्खन ओदरकन ती दमसकोस बरचकन।
- 12तहाँ हनानिया नामे आलस एंगन ऐरा बरचस। आस मूसासी नेगन भगती गने पैस'ऊ आलस रहचस। आस असन र'ऊ उर्मी यहूदी आलर नू बेस नामे आलस रहचस।
- 13अरा आस एंग्हे हेद्दे इज्जस ती एंगन बाचस, 'अना भई सउल, ऐरा हेलर'आ।' आ बारिम ऐन आसिन ऐरा उंगकन।
- 14फेन आस बाचस, 'नम्हे पूरखर ही धर्मस निंगन इदगे ओकताचकादस का, नीन आसी मने आबोन अख'ओय, अरा एकास धर्मसी उजगो र'अस आसिन ऐरोय अरा आसी बई ती आसी कत्था मेनोय।
- 15एन्देगेका नीन उर्मी आलर गे आसी गोवाह मनोय, एकदन नीन ईरकय अरा मँजकय।
- 16अक्कु एन्देगे दिरी नन्दय? चो'आ नोडर'आ, अरा आसी नामे ती गोहरारना ती निंग्हे पाप गुट्ठिन नोड़ा चि'आ।'
- 17ऐन येरुसलेम किर्कन ती धर्मसी मन्दिर नू गोहरार'आ लिक्कन खने, मोखरकन केरकन।



- 18 अरा उर्बासिन ईरकन का आस एंगन बाचस, 'चाँड़हे येरुसलेम ती उरखा कला, एन्देरगेका आर एंगहै पत नू निंगहै गोवाह आबोन मल पत'ओर।'
- 19 खने ऐन बाचकन, 'अना उर्बायो, आर अखनर का उर्मी गोड़हा एड़पा नू ऐन निंगन पत'ऊ आलारिन जेहेल नू सज'आ लिक्कन अरा लौत'आ लिक्कन।
- 20 अरा निंगहै गोवाह स्तेफनोसिन पिटा लगियर खने, ऐन हूँ असन रहचकन, अरा ई कत्था नू संगे मंजकन, अरा आसिन पिटू आलर ही किचरिन खापा लिक्कन।'21 खने आस एंगन बाचस, 'कला, एन्देरगेका ऐन निंगन गेच्छा नू नन-यहूदी आलर गुसन तइय्योन।'''
- 22 आसी एन्ने ब'अना गूटी अबड़ा आलर आसहीन मेना लगियर। तहाँ जोरसरिया चिच्चियारर ती बाचर, "एन्ने आलासिन खेखेल ती पिटा चि'आ, ईस गा उज्जना जोगे मलकस।"
- 23 आर चिच्चियार'आ लगियर अरा किचरी गुट्ठिन हेबड़ा लगियर अरा धूली उदिय'आ लगियर खने,
- 24 फउद उर्बस आनियस, "ईसिन फउद गढ़िया नू हो'आ अरा कोर्ला लौ'आ ती जँच'आ, एंगा अखना रई का आलर एन्देर चड्डे ईसी बिड़दो नू एन्ने चिच्चियार'आ लगनर।"
- 25 सैनर आसिन कोर्ला लौ'आ गे हेंचर खने, पौलुस तंगहै हेददे इज्जका रहचस आ सैनर ही मुद्धासिन बाचस, "बिगर नेंवई नंजका ओन्टा रोमी आलासिन कोर्ला ती लौना नेग ही लेक्खा हवे का?"
- 26 एन्ने ब'अनन मेंजस ती सैनर ही मुद्धस फउद उर्बस गुसन केरस ती बाचस, "नीन एन्देर नना काला लगदय? ईस गा रोमी आलस हिकदस।"
- 27 तहाँ फउद उर्बस पौलुस गुसन बरचस ती बाचस, "एंगन तेंगा, नीन रोमी आलय हिकदय का?" आस बाचस, "हाँ।"
- 28 इदिन मेंजस ती फउद उर्बस बाचस, "ऐन रोमी मना गे नगदे रुपिया चिच्का रहचकन।" पौलुस बाचस, "ऐन गा कुन्द्रका तिम रोमी आलन हिकदन।"
- 29 खने आसिन जाँच ननू रहचर, आर लेम तरकूटी मंजर केरर। अरा फउद उर्बस हूँ गा ईस रोमी आलस हिकदस अरा ऐन ईसिन खूटचकादन ब'अरकी इलियस केरस।
- 30 दोसर उल्ला फउद उर्बस यहूदी आलर एन्देरगे पौलुस मइय्याँ बदी ठेका बाचर, इदन ठौका ठौका अख'आ बिददियस। औंगे आस आसी हेंचकन कुल्लियस चिच्चस ती मुध नैगर अरा गोट्टा कोहाँ



सभा ता आलारिन खोंडर आ गे आनियस। फिन आस पौलुसिन बहरी ओन्द्रस ती आर ही मुन्दहारे इजताचस।

तइरकर 23

1 पौलुस गा कोहाँ सभा तरा ओन ढिठ ती ईरियस अरा बाचस, “भईरो, ऐन इन्ना गूटी दौ लखना ती धर्मसी मुन्दहारे उज्जकादन।”

2 एन्ने आस बाचस खने, हनानिया कोहाँ नैगस पौलुसी हेददे इज्जका आलारिन आसी बइय्यन थपड़ आ गे आनियस।

3 खने पौलुस आसिन बाचस, “अना चुही इगका भीत, धर्मस निंगन ल'ओस। नीन नेग लेक्खा एंग्हे नैवई नना उक्कादय, अन्नु हूँ नेग ही बिड़दो एन्देरगे एंगन ल'आ गे आनदय?”

4 खने पौलुसी हेददे इज्जका रहचर अबड़र बाचर, “नीन एका ओर्तय, धर्मसी कोहाँ नैगासिन लज्जे मोखत'अदय?”

5 खने पौलुस बाचस, “ऐन बल्ला लिक्कन का ईस कोहाँ नैगस। नेम्हा पुथी नू गा एन्ने लिखकी रई का 'निंग्हे आलर ही मुद्धारिन मलदौ अमा ब'आ।”

6 फिन पौलुस अबड़र नू ओन्टा खोंडहा सदुकीर ही अरा नन्ना खोंडहा फरिसीर ही एन्ने अक्खस ती कोहाँ सभा नू चिच्चियारस ती बाचस, “अना भईरो, ऐन फरिसी आलन अरा फरिसीर ही खद्द हिकदन, केचका आलर ही उज्जा चो ओर एन्ने एंग्हे असरा ही पत नू एंग्हे नैवई मना लगी।”

7 आस एन्ने बाचस खने, फरिसीर अरा सदुकीर नू आनानखना मंजा अरा सभा भगियारा केरा।

8 एन्देरगेका सदुकीर ब'अनर का उज्जा चो अना मल्ला, अरा मेर्खा पैकस महले बोलता मलकी। लिकिन फरिसीर इबड़ा उर्मिन पत'अनर।

9 खने गोंहड़ा राँव राँव मना हेलरा, अरा फरिसीर ती जोक्क नेग सिखाब'उर बोंग चोचर अरा एन्ने बाचर ती आनानख'आ हेलरर, “ऐम ई आलस मइय्याँ एन्देर बदी हूँ मल खक्खदम, मना ऊंगी का एकअम मेर्खा पैकस महले बोलता आसी गने कछनखरा।”

10 आनानखना नगदे मंजा खने, फउद उर्बस पौलुसिन पिटोर ती कुटका कुटका ननोर ब'अरकी इल्लिक'आ ती सैनारिन आनियस, “एत्तरकी आसिन आर ही मड़ी ती बइपेलहा ओथ्र'आ ती फउद गदिया हो'आ कला।”

11 अउलम माखा उर्बस पौलुसी हेददे इज्जस ती बाचस, “अना पौलुस डिढ नना, एन्देरगेका एकासे नीन येरुसलेम नू एंग्हे गोवाह चिच्चय, अन्नेम निंगा रोम नगरे नू हूँ गोवाह चि'अना रई।”



- 12 बिज्जिया खने, जोक्क यहूदी आलर चिताबुता नंजर अरा किरया मोक्खर पौलुसिन पिटना गूटी ओनोत मला अरा मोखोत मला।
- 13 एकाबड़र ताम-ताम नू किरया मोक्का रहचर आर चालीस ती बग्गे रहचर।
- 14 अबड़र मुध नैगर अरा सेयान आलर गुसन केरर ती बाचर, “ऐम एन्ने किरया मोक्का र'अदम का, एका गूटी पौलुसिन मल पिटोम आ गूटी एन्द्रा हूँ मल ओनोम महले मोखोम।
- 15 औंगे अक्कु नीम अरा कोहाँ सभा ही संगेम फउद उर्बासिन खभर नना का पौलुसिन निम्है गुसन तइय्योस चि'ओस, अरा एन्ने का नीम इदही पत नू अउर बने जँच'आ बेद्ददर। अरा पौलुस एकासे इसन अंडसोस अदही मुन्द तिम आसिन पिटा गे सपड़ारका र'ओम।”
- 16 लिकिन इबड़ा कत्थन पौलुसी तंगभचस मेंजस, अरा आस फउद गढ़िया नू कोरचस ती इदही खभर पौलुसिन तिंगियस।
- 17 खने पौलुस ओन्टा सेना ही मुद्धासिन मीखियस ती बाचस, “ई जोंखासिन फउद उर्बस गुसन हो'आ, ईस आस ती एन्देर ब'आ बेद्ददस।”
- 18 औंगे आस आ जोंखासिन फउद उर्बस गुसन होचस ती बाचस, “हैरका पौलुस एंगन मीखियस ती बाचस का ई जोंखासिन निम्है गुसन ओन्द्र'ओन, एन्देरगेका ईस निंगन एन्देर ब'आ बेद्ददस।”
- 19 फउद उर्बस आ जोंखासी खेक्खन धरचस ती सुन अड्डा नू होचस ती आसिन मेंजस, “नीन एंग्हे ती एन्देर कत्थन तेंगा बेद्ददय?”
- 20 आस बाचस, “जोक्क यहूदी आलर एन्ने सलहा मंजका र'अनर का आर निम्है ती गोहरार'ऊ र'अनर का नेला पौलुसिन कोहाँ सभा नू ओन्द्र'आ बरा, इदगे का आसी पत नू अउर हूँ बने जँच'आ बेद्ददम।
- 21 नीन आर ही कत्थन अमके मेना, एन्देरगेका चालीस ती बग्गे आलर पौलुसिन इहरे नू पिटा गे नुखका र'अनर। एका गूटी आर आसिन मल पिटोर आ गूटी आर मल ओनोर महले मोखोर एन्ने किरया मोक्का र'अनर। अरा आर अक्कुन सपड़ारका र'अनर अरा निम्है पेसना खक्खना ही असरा नू र'अनर।”
- 22 फउद उर्बस पौलुसी तंगभचासिन एन्ने बाचस ती तइय्यस चिचस का “नीन इबड़ा कत्थन एंगन तिंकय एन्ने नेकन हूँ अमके तेंगा।”



- 23 तहाँ फउद उर्बस दो सैनर ही मुद्धारिन मीखियस ती बाचस, “कैसरेया नगरे काला गे इन्ना माखा नौ बजे गूटी दो सौ सैनर अरा सत्तर झन घोड़ो अरगुर अरा दो सौ बरछी भज'उरिन सपड़'अरकी उइय्या।
- 24 अरा पौलुस गे हूँ घोड़ो ही तिजाम नना ती आसिन कोडेम राजीखापुस फेलिक्स गुसन अंडसत'आ चि'आ।”
- 25 अरा आस इदही पत नू चिठी हूँ लिखचस।
- 26 “महबा जोगे फेलिक्स राजीखापुस गे क्लौदियोस लुसियस तरती बग्गे मौंजरा।
- 27 ई आलासिन जोक्क यहूदी आलर धरचका रहचर, अरा ईसिन पिटना पक्खे नू रहचर। ईस ओन्टा रोमी आलस एन्ने अक्कन ती ऐन एंग्हे सैनर गने असन कालरकी ईसिन नाइकन।
- 28 अरा ऐन अख'आ बेद्दा लिक्कन का आर ईस मइय्याँ एन्देर गुन्हा ठेकाब'अनर, अदगे ईसिन आर ही कोहाँ सभा नू होच्चकन।
- 29 असन ऐन अक्कन का आर तम्है धरम नेग ही पत ता कत्था नू गुन्हा ठेकाब'आलियर। अरा ईद एन्देर गुन्हा हूँ मल्ला का ईस जेहेल नू सजतारना महले पिटतारना जोगे रई।
- 30 इकला एंगा गे मेन्दरा का जोक्क यहूदीर ईसिन पिटा गे चिताबुता नंजकानर। होले ऐन लेम ईसिन निंग्हे गुसन तइय्कन चिच्चकन। ऐन ईस मइय्याँ गुन्हा ठेकाब'उरिन हूँ आनकन का निंग्हे गुसन आर ईसी पत नू गुन्हा ठेकाब'ओर।”
- 31 पेसका लेक्खा सैनर पौलुसिन आ माखम अन्तिपत्रिस पद्दा अइसताचर चिच्चर।
- 32 दोसर उल्ला घोड़ो अरगुरिन पौलुस गने काला चिच्चर अरा ताम फउद गढ़िया नू किरियर बरचर।
- 33 घोड़ो अरगुर कैसरेया नगरे अइसियर ती राजीखापुस गे चिठिन चिच्चर अरा पौलुसिन हूँ आस गे सौंपचर।
- 34 खने राजीखपुस चिठिन पढ़चस ती पौलुस ती मेंजस, “नीन एका चकभार ता हिकदय।” पौलुस किलिकिया चकभार ता एन्ने अक्खस खने,
- 35 आस बाचस, “निंग्हे मइय्याँ गुन्हा ठेकाब'उर बरना बेड़ा नू निंग्हे नेंवई मनो।” अरा आस पौलुसिन हेरोदेसी गढ़िया नू पहरा नू उइय्या गे पेसस।

तइरकर 24



- 1 पांच उल्ला ही खोखा हनानिया कोहाँ नैगस जोक्क सेयान आलर अरा तेरतुल्लोस नामे वकीलस गने कैसरेया नगरे अंडसियस। आर राजीखापुसी मुन्दहारे पौलुसी बिड़दो गुन्हा ठेकाबाचर।
- 2 पौलुस भितरी मेखतारस खने, तेरतुल्लोस एन्ने बअनुम आसी बिड़दो गुन्हा ठेकाबाचस, “अना महबा जोगे फेलिक्स, ऐम निंग्हे चड्डे बेस सुक्खे नू उज्जा लगदम अरा निंग्हे ऐरना खोजना ती एम्है जातियर ही दौ गे बेस परदना ही नलख नंजकय।
- 3 इबड़ा कत्थन ऐम ओर्मा मदहे ओर्मा अड्डा नू नरमिया गने रिझ ती इंझदम।
- 4 ऐन निंग्हे ती बग्गे बेड़ा मल होआ बेद्ददन, ऐन निंग्हे ती गोहरारदन का एम्है कत्था गुट्ठिन मेना गे एमा गे जोक्क बेड़ा चिआ।
- 5 एम्है अखना ती ई आलस गा हींङऊ आलस हवे, अरा खेखेल ता ओर्मा यहूदीर नू लड़ाई नन्तऊ आलस हवे, अरा नासरेत ता ओर्तोसी धरम खोंडहा ही मुद्ध आलस हवे।
- 6 ईस एम्है धर्मेसी मन्दिर आबोन सोतबोड़आ नना गे चिहूट नंजस। खने इसिन धरचकम [ती एम्है नेग लेक्खा दंडे चिआ बिद्दकम।
- 7 लिकिन फउद उर्बस लुसियस बरचस ती ईसिन एम्है खेक्खा ती बड़पेलहा होचस।
- 8 अरा ईस मइय्याँ गुन्हा ठेकाब'उरिन निंग्हे मुन्दहारे बर'आ गे पेसस।] नीनिम ईसिन नेंवई नन्ना ती ऐम ईसी बिड़दो नू ओन्द्रना गुन्हा पत्त ता मानिमन अख'ओय।”
- 9 यहूदीर हूँ गुन्हा ठेकाब'अना नू आसी गने मेस'अरकी इबड़ा कत्था मानिम बाचर।
- 10 राजीखापुस पौलुसिन कछनर'आ गे मोका चिचस खने, पौलुस आनाकिर्ताचस, “नीन नगदे चान ती ई राजी ही मइय्याँ नेंवई ननू हिकदय, इदिन अक्कन ती ऐन रिझ ती एंग्हे कत्थन निंग्हे मुन्दहारे ब'अदन।
- 11 एंगा येरुसलेम नू ओड़ नना गे बरचका बारा उल्ला ती बग्गे मल्ला मंजका, इदन नीन जँच'अरकी सेब्बा ती अख'आ ओंगदय।
- 12 ने हूँ एंगन धर्मेसी मन्दिर नू नेख'अम गने नग्गानखना मलता गोड़हा एड़पा नू महले नगरे नू एस'आनिम आलारिन तुतक'अनन मल ईरका र'अनर।
- 13 एका कत्था ही बदी ईर एंग्हे बिड़दो नू ओन्द्रनर, अदही एन्देर हूँ सबुती चिआ पोल्लोर।
- 14 ऐन निंग्हे मुन्दहारे ई कत्थन मन्दन का, एका इहरेन ऐन मन्दन ती ऐकदन आ इहरेन आर ठौका मल्ला ब'अनर। ऐन एंग्हे पूरखर ही धर्मेसिन ओड़ नन्दन, अरा एकदा एकदा मूसासी नेग अरा धर्मेसी कत्था तिगुर ही पुथी नू लिखकी रई, अबड़ा उर्मिन ऐन पत्त'अदन।



- 15 एंगा धर्मस ती असरा रई, एकासे ईर गे हूँ रई का, उजगो आलर अरा पपहर इरबर ही उज्जा चो'अना मनो।
- 16 इदगे ऐन धर्मसी ऐरना नू अरा आलर ही ऐरना नू एंग्हे लखना आबोन सफा उइय्या गे चिहूट नंजका र'अदन।
- 17 कयनो बछर गूटी नन्ना देस नू रहचका ही खोखा ऐन एंग्हे आलर गे दान अंडसत'आ गे अरा धर्मसी मन्दिर नू दाँडे अरग'आ गे येरुसलेम बरचका रहचकन।
- 18 ऐन धर्मसी मन्दिर नू चाल ही लेक्खा एंगा सुध मन्नन पूरा मंजकन, आ बारी एंग्हे मइय्याँ गुन्हा ठेकाब'उर एंगन खक्खयर। असन एंग्हे गने आलर ही गोंहड़ा मल रहचा, अरा इन्द्रिम नगगानखना मल मंजा।
- 19 लिकिन आसिया देस ता जोक्को यहूदीर असन रहचर। आर गे एंग्हे बिड़दो नू इन्द्रिम ब'अना रहचा होले, आर गे निंग्हे मुन्दहारे बरना ती एंग्हे मइय्याँ बदी ठेकाब'अना रहचा।
- 20 मला होले ईरिम तेंगोर का ऐन यहूदीर ही कोहाँ सभा ही मुन्दहारे इज्जका रहचकन खने, ईर एंग्हे मइय्याँ एन्देर बदी खक्खका रहचर।
- 21 ऐन आर ही मुन्दहारे इज्जना बेड़ा नू, 'केचकर ही उज्जा चो'अना ही पत नू इन्ना निम्हे मुन्दहारे एंग्हे नैवई मना लगी' एन्ने ई कत्था ही लेका ऐन जोरसरिया बाचका रहचकन।”
- 22 फेलिक्स येसु धरम ही पत नू ठौका ठौका अख'आ लगियस। आस आरिन एन्ने बाचस ती गुछाबाचस, एकाबारी फउद उर्बस लूसियस बर'ओस आ बारी निंग्हे कत्था ही फरियाना मनो।
- 23 फिन आस सौ सैनर ही मुद्धासिन पेसस “पौलुसिन जोक्क ढील उइय्या ती खापा, अरा आसी संगे मधेर ती नेकन हूँ सुसर नन्ना ती अमके छेक'आ।”
- 24 जोक्क उल्ला खोखा फेलिक्स तंग्हे मुक्का दुसिल्ला गने बरचस, एकाद यहूदी रहचा। अरा आस पौलुसिन मेखताचस अरा आस ती मसी येसुस नू पत'अना ही पत नू कत्था मँजस।
- 25 पौलुस उजगो अरा कयास अरा बरना रायबाडी ही पत नू तेंगा लगियस। खने फेलिक्स गे इल्लिक'आ कोरचा अरा आस बाचस, “अक्कन गा नीन काला ओंग्दय, मोका खक्ख'ओ, ऐन निंगन फेनिम मेखोन।”
- 26 फेलिक्स पौलुस ती घूस खक्खना ही असरा रहचा। ओंगे हूँ आस आसिन खनी खनी मेखा लगियस ती कछनख'आ लगियस।



27 लिकिन दुई बछर खोखा राजीखापू फेलिक्सी अड्डा नू पोर्कियुस फेस्तुस उक्कियस खने, फेलिक्स यहूदीरिन खुसमारत'अना ही मने ती पौलुसिन जेहेल नू अम्बियस चिच्चस।

तइरकर 25

1 फेस्तुस आ चक नू अंडसियस, अदही तीन उल्ला खोखा आस कैसरेया ती येरुसलेम केरस।

2 असन मुध नैगर अरा यहूदीर ही मुद्धर आस गुसन बरचर ती पौलुसी मइय्याँ बदी नंजर।

3 अबडर फेस्तुसिन गोहरारर का पौलुसिन येरुसलेम तइय्या गे मया नना, एन्देरगेका आर डहरे नू पौलुसिन पिटा गे चिताबुता नना लगियर।

4 लिकिन फेस्तुस आनाकिर्ताचस, “पौलुस कैसरेया नू गुडरका र'अस, ऐन हूँ गा चाँडहेम असन कालू र'अदन।

5 औंगे नीम अदिया उइय्यू आलर एंग्हे गने गुचा। आ आलस इन्द्रिइम गुन्हा नंजकादस होले, असानिम आसी मइय्याँ बदी ठेकाब'आ।”

6 आठ दस उल्ला आर ही गने रहचस ती फेस्तुस कैसरेया किरियस। नन्ना उल्ला फेस्तुस नैवई नना उक्कियस ती पौलुसिन ओन्द्र'आ गे पेसस।

7 पौलुस बरचस खने, येरुसलेम ती बरचका यहूदीर ही अदिया उइय्युर आसिन बेइहचर चिच्चर, अरा आसी मइय्याँ कैनो गोटंग कोइहे कोहाँ बदी ठेकाब'आ हेलरर, लिकिन अदही आर सबुती चि'आ पोल्लर।

8 पौलुस तंग्हे पत्त नू आनाकिर्ताचस, “ऐन यहूदीर ही नेग ही बिइदो महले धर्मसी मन्दिर ही बिइदो महले कैसरसी बिइदो एन्देर हूँ पाप मल नंजकादन।”

9 लिकिन फेस्तुस यहूदीरिन रिइत्र'आ गे मने नंजस ती पौलुसिन मँजस, “एन्देर नीन येरुसलेम काला बेददय का, असन एंग्हे मुन्दहारे इबडा कत्था ही पत्त नू नैवई नन्तार'ओ?”

10 खने पौलुस आनाकिर्ताचस, “ऐन कैसरसी नैवई नन्ना अड्डा ही मुन्दहारे इज्ज'आ लगदन, एंग्हे नैवई इसानिम मन्ना रई। नीन बेस अखदय का ऐन यहूदीर ही बिइदो इन्द्रिइम पाप मल नंजकादन।

11 ऐन पितरना जोगे इन्द्रिइम नलख नंजका र'अदन होले, ऐन खे'आ गे पछली मल किरदन। लिकिन ईर ही ती एंग्हे मइय्याँ बदी ठेकाबाचका मानिम मलकी होले, नै हूँ एंगन ईर ही खेखा नू चि'आ पुल्ली। ऐन कैसरसिन गोहरारदन।”



- 12 खने फेस्तुस तंग्हे सभा गने कछनखस ती बाचस, “नीन कैसरसिन गोहरारकादय, नीन कैसरस गुसन क'ओय।”
- 13 जोक्क उल्ला ही खोखा अग्रिप्पा बेलस अरा तंग्डी बेरनिके राजीखापू फेस्तुसी मौंजरा नना गे कैसरेया नू बरचर।
- 14 आर असन बग्गे उल्ला रहचर। फेस्तुस पौलुसी कथन बेलस गुसन बाचस, “फेलिक्स इसन ओन्टा हेरकासिन अम्बियस ती केरका र'अदस।
- 15 ऐन येरुसलेम नू रहचकन खने, यहूदीर ही मुध नैगर अरा सेयान आलर आसी बिडदो नू एंगा अरो चिचर ती आस गे दंडे चि'आ गे बाचर।
- 16 खने ऐन आरिन आनाकिर्ताचकन, ‘एका गूटी मुदई आलासिन तंग्हे मुदइसी मुन्दहारे इजत'अर अरा आसिन तंग्हे कथा ही पत नू कछनख'आ गे मोका बिगर चिचका आलासिन आर ही खेक्खा नू दंडे चि'आ गे चि'अना रोमी आलर ही चाल मलकी।’
- 17 औंगे आर इसन एंग्हे गने बरचर, अरा ऐन लेम नन्ना उल्ला नेंवई नना गे उक्कन, अरा आ आलासिन ओन्द्र'आ गे पेसकन।
- 18 आसी मुदई आलर इज्जर खने, एन्ने मलदौ कथा गुट्ठी बदी मल नंजर एकासे ऐन सोच'आ लिक्कन।
- 19 लिकिन आर तम्है धरम ही पत नू जोक्क कथा गुट्ठी नू अरा येसु नामे ओन्टा केचका आलासी पत नू आनानखर, लिकिन पौलुस येसुसिन उज्जा लगदस ब'अदस।
- 20 ऐन इबडा कथन एकासे नन्ना र'ई अदिन पोलकन बुझ'आ। औंगे ऐन पौलुसिन बाचकन, ‘एन्देर नीन येरुसलेम काला बेददय का, असन इबडा कथा ही पत नू नेंवई नन्तार'ओ?’
- 21 लिकिन पौलुस तंग्हे पिसी कोहाँ बेलस ती नेंवई मना गे गोहरारस। खने ऐन एका गूटी कैसरस गुसन मल तइय्योन आ गूटी आसिन खापा गे पेसकन।”
- 22 खने अग्रिप्पा बेलस बाचस, “ऐन हूँ ई आलासी ब'अनन मेना बेददन।” फेस्तुस बाचस, “नीन नेला मेनोय।”
- 23 नन्ना उल्ला अग्रिप्पा बेलस अरा बेरनिके कोहाँ महबा गने बरचर। आर फउद उर्बर अरा नगरे ही कोहाँ आलर गने सभा एडपा नू कोरचर। फिन फेस्तुसी पेसका लेक्खा पौलुसिन ओन्द्र।
- 24 खने फेस्तुस बाचस, “अग्रिप्पा बेलायो, अरा एम्है गने इसन र'ऊ उर्मी आलारो, नीम ई आलासिन ऐरा, नेख'आ पत नू येरुसलेम अरा इसन हूँ र'ऊ उर्मी यहूदीर चिचियार चिचियार एंग्हे ती नेचर



‘ईस गो उज्जना मलकी।’²⁵लिकिन ऐन ईस नू पिट्रना जोगे दोस मल खक्खकन। अरा ईस कोहाँ बेलासिन गोहार नंजस, खने ईसिन रोम तइय्या गो घतचकन।

²⁶नम्है उर्बस कोहाँ बेलस कैसरस गो ईसी पत नू लिख'आ गो इन्द्रिम हूँ ठौका कथन अरगम खक्खका। इदगे ऐन ईसिन निम्है मुन्दहारे नू अरा कोइहे गा बेलायो अग्रिप्पा, निंगहै मुन्दहारे ओन्द्रकन। नाम ईसिन बिदचका खोखा एंगा लिख'आ गो इन्द्रिम खक्ख'ओ।

²⁷एन्देरगेका एकअम हेंरकासिन आसी मइय्याँ ठेका बाचका बदिन मल तेंगना ती कैसरस गुसन तइय्या एंगा दौ मल लग्गिया।”

तइरकर 26

¹तहाँ अग्रिप्पस पौलुसिन बाचस, “निंगहै पत नू ब'आ गो निंगा बेड़ा चिर'आ लगी।” खने पौलुस तंगहै खेक्खा चोदस ती तंगहै पत नू ब'आ हेतरस।

²“बेलायो अग्रिप्पा, यहूदीर एंगहै मइय्याँ नगदे बदी ठेकाबाचकानर। इदही पत नू ऐन एंगहै कथन निंगहै मुन्दहारे तेंगा गो इन्ना एंगा मोका खक्ख'इदगे ऐन खुसमारदन।

³एन्देरगेका नीन यहूदीर ही उर्मी चाल गुट्ठिन अरा उर्मी आनानरना ही कथा गुट्ठिन बेस गने अखदय। ओंगे ऐन गोहाररदन का नीन एंगहैन खतीर गने मेना।

⁴एंगहै उज्जना खद्द परिया तिम एंगहै उज्जना ही ओर एंगहै देस नू अरा खोखा येरुसलेम नू एंगहै उज्जना ओक्कना एकासे रहचा, अदिन उर्मी यहूदीर अखनर।

⁵आर एंगन नगदे उल्ला ती अखनर। आर बेद्दनर होले, एंगहै गोवाह हूँ चि'आ ओंगनर का ऐन फरिसी मंजकन ती एकासे नम्है धरम ही कोइहे ठिम-ठिम खोंइहा ही लेक्खा उज्जा लिक्कन।

⁶नम्है पूरखर गो धर्मस एका गच्छरकन गच्छरकाचस, अइय्या ऐन नंजका एंगा असरा ही चड्डे दिम अक्कुन एंगहै मइय्याँ पिसी मना लगी।

⁷ई गच्छरका ही पूरा मन्नन ऐरना ही असरा ती दिम नम्है बारा गोतोर ता आलर उल्ला माखा धर्मसिन ओइ नन्नर। बेलायो, ई असरा ही चड्डेम यहूदीर एंगहै मइय्याँ बदी ठेकाब'आ लगनर।

⁸धर्मस केचका आलारिन उज्जा चोद्दस, इदिन असरा जोगे नलख मलकी एन्ने नीम एन्देरगे सोचदर?

⁹ऐन हूँ गा नासरेस ता येसुसी नामे नू एंगा उर्मी तरती कोइहे बिड़दो नन्ना र'ई एन्ने मुन्द सोच'आ लिक्कन।



- 10 अरा ऐन येरुसलेम नू एन्ने नंजकन हूँ, ऐन मुध नैगर ती अदिया खक्खकन ती अजम बग्गे नेम्हा आलारिन जेहेल नू सज्जकन। अरा आर पिटर'आ लगियर खने, आर ही बिड़दो नू हूँकारी चिच्का र'अदन।
- 11 ऐन आरिन उर्मी गोड़हा एड़पा नू कैनो खेप दंडे चि'अरकी येसु नामे ही निंदा नन्त'आ गे चिहूट नंजकन। ऐन आर ही बिड़दो ता एंग्हे खींस ही चड्डे ई गूटी पूरकन का नन्ना नगरे गुट्ठी नू हूँ कालरकी आरिन सताबाचकन।
- 12 एन्नेम आंग्होल ऐन मुध नैगर ती अदिया अरा पेसका खक्खकन ती दमसकोस नगरे काला लिक्कन।
- 13 खने बेलायो, डहरे नू लोहाड़ी बेड़ा नू ऐन बीड़ी ही बिलचना ती हूँ कोड़हे बिलचना बिल्लिन मेर्खा ती ईरकन, आद एंग्हे अरा एंग्हे गने बरचका आलर ही चरियो तरा बिल्या लगिया।
- 14 ऐम ओर्मम खेखेल नू खत्रकम। खने ऐन ओन्टा सड़ा इब्रानी भखा नू एंग्हे ती ब'अनन मेंजकन। आद बाचा, 'सउल, सउल, नीन एंगन एन्देरगे सताब'आलदय? अच्छो नू लथना निंगा सेब्बा मलकी।'
- 15 ऐन बाचकन, 'उर्बायो, नीन एका ओर्तय।' उर्बस बाचस, 'ऐन येसु हिकदन, नेकन नीन सताब'आलदय।
- 16 अक्कुन नीन चो'आ ती निंग्हे खेड्डे ती इज'आ। ऐन निंगन एंगन सुसर'ऊ अरा गोवाह चि'ऊ ओक्त'आ गे ऐन निंगन ऐथ्रका र'अदन। एकदन नीन एंग्हे पत्त नू ईरकादय अरा एकदन नीन ऐरोय, अबड़न नीन आलर गे तेंगोय।
- 17 ऐन निंगन निंग्हे आलर ती अरा नन-यहूदीर ती हूँ नाड़ोन।
- 18 ऐन आर ही खन्न चलख'आ गे निंगन आर गुसन तड़य्या लगदन। खने आर ऊखा ती बिल्ली तरा किर्रा ओंगोर, अरा सैतान ही अदिया ती धर्मस तरा किर्रा ओंगोर। फिन आर पाप गुट्ठी ही छमा खक्खा ओंगोर अरा एंग्हे मड़य्याँ ता पत्त'अना ती नेम्हा मन्नका आलर गने अड्डा खक्खा ओंगोर।'
- 19 इदगे बेलायो अग्रिप्पा, ऐन आ मेर्खा ता देखार आबोन पेसकन।
- 20 ओंगे मुन्द गा ऐन दमसकोस, फिन येरुसलेम ता र'ऊ आलारिन, अदही खोखा सौंसे यूदेया राजी नू, अरा नन-यहूदीर नू हूँ तेंगा कुद्दकन का आर जियन किर्त'अना र'ई अरा जिया किर्त'अना ही जोगे नलख नन्ना र'ई।



- 21 ई चड्डेम ऐन धर्मसी मन्दिर नूरहचकन खने, यहूदीर एंगन धरचर अरा पिटा बेद्दा लगियर।
- 22 लिकिन धर्मसी सहाड़ा ती इन्ना गूटी र'अदन अरा सन्नी ती कोहाँ ओर्मर ही मुन्दहारे गोवाह तेंगदन। एका कत्था मना ओंगो ब'अरकी धर्मसी कत्था तिंगुर अरा मूसस तिका रहचस अदिन दिम ऐन तेंगदन। अदही ती बग्गे ऐन एन्देर हूँ मल तेंगदन का,
- 23 मसीस दुखे भोग'ओस अरा केचका मधेर ती उर्मी ती मुन्द उज्जा चो'ओस ती यहूदीरिन अरा नन-यहूदीरिन हूँ धर्मसी बिल्लीन ओन्द्र'ओस।”
- 24 पौलुस एन्ने ब'आ लगियस खनेम, फेस्तुस जोरसरिया बाचस, “अना पौलुस, नीन पूरु हिकदय। निंगहै कोइहे पढ़चका निंगन पूरताचकी रई।”
- 25 लिकिन पौलुस बाचस, “अना कोइहे मईन जोगे फेस्तुस, ऐन मल्ला पूरना, मानिम आबोन अरा लूर ही कत्थन ब'अदन।
- 26 बेलस अग्रिप्पस हूँ गा इबड़ा कत्था ही पत्त नू अखदस। ओंगेम ऐन बेगर एल्चम ती आसिन ब'आ लगदन। ऐन अखदन का इबड़ा कत्था आस ती नूस्रका मल्ला, एन्देरगेका ईद एकअम कोड़ा नू मल्ला मंजका।
- 27 अना अग्रिप्पा बेलायो, नीन धर्मसी कत्था तिंगुर ही कत्था गुट्ठिन पत्त'अदय का? हाँ, ऐन अखदन नीन पत्त'अदय।”
- 28 तहाँ अग्रिप्पस पौलुसिन बाचस, “एन्ने जुक्कीम बेड़ा नू नीन एंगन मसी आल कम'आ ओंगोन एन्ने सोचदय का?”
- 29 खने पौलुस आनाकिर्ताचस, “जुक्की नू महले बग्गे नू एन्ने मला, धर्मस ती एंगहै गोहरारना रई का, इन्ना नीन लेका मला लिकिन नै नै एंगहै कत्थन मेना लगनर, आर येसुसिन पत्त'अना नू एंगहै लेक्खा मन्नर नेकअन, लिकिन एंगहै लेक्खा हेंरका मल मन्नर नेकअन।”
- 30 तहाँ अग्रिप्पा बेलस अरा राजीखापू फेस्तुस अरा बेरनिके अरा आर ही गने उक्का आलर चौचर।
- 31 अरा काना बेड़ा नू आर ताम-ताम बाचर, “ई आलस पिटरना मलता गुडरना जोक्खा एन्देर हूँ मल्ला नंजका।”
- 32 अग्रिप्पस फेस्तुसिन बाचस, “ई आलस कैसरसी गोहार मल नंजका होले अमब्र'आ ओंगा लगियस दने।”

तइरकर 27



- 1 ऐम कोहाँ डोंगा ती इताली देस काना रई एन्ने ओट्टा उक्किया खने, आर पौलुसिन अरा नन्ना हेंरकारिन यूलियस नामे रोमी फउद ही सौ सैनर ही मुद्धासी खेक्खा नू सोंपचर।
- 2 आसिया देस ही पिंडी पिंडी कालू अद्रमुतेनोस नगरे ती बरचका ओन्टा कोहाँ डोंगा रहचा, आद काना बारी रहचा। अइय्या नू ऐम अरगकम। अरा अरिस्तरखोस नामे थेस्सलोनिके नगरे ता ओन्टा मकेदोनिया ता आलस एम्है गने रहचस।
- 3 नन्ना उल्ला ऐम सीदोन अंडसकम। अरा यूलियस पौलुसिन सोग्गे ईरियस, ओंगे आस आसी संगेर गुसन काला गे अरा आर आस गे संगरा नना गे अम्बियस चिच्चस।
- 4 असलेक ती ऐम कोहाँ डोंगा ती उरखकम ती ताका मुन्द तरती धुकना चड्डे कुप्रोस टापू ही ओदहा नू मन्नुम केरकम।
- 5 फिन किलिकिया अरा पम्फुलिया हेद्दे समुदर नू मन्नुम लुकिया राजी ही मूरा नगरे नू इत्तकम।
- 6 असन सौ सैनर ही मुद्दस अलेक्सन्द्रिया नगरे ता ओन्टा इताली देस काना कोहाँ डोंगन खक्खियस ती एमन अइय्या अरगस चिच्चस।
- 7 अरा ऐम नगदे उल्ला गूटी लहे लहे चलाबाचकम ती सस्ती चोदनुम केरकम अरा किन्दोस टापू ही मुन्दहारे अंडसकम। ताका एमन मुन्द काला मल चिआ लगिया, खने ऐम सलमोने ही मुन्दहारे क्रेते टापू ही ओदहा नू केरकम।
- 8 सस्ती ती केरकम अरा “दौ घाट” नामे अड्डा अंडसकम, ईद लसैया नगरे हेद्दे रहचा।
- 9 नगदे उल्ला मंजकी किरकी रहचा, अरा उपास ही उल्ला मुंज्र अरकी पइय्याँ उल्ला ओरे मंजकीचा, ओंगे समुदर नू काना अउर कोइहे अलकरहा मंजकी किरकी रहचा। खने पौलुस आरिन चेताबाचस,
- 10 “अना आलारो, नम्है ई समुदर काना नगदे सस्ती मनो, अरा नमा जिनिस अरा कोहाँ डोंगा ही लेका मला नम्है जिया ही हूँ नठारना मनो एन्ने लग्गा ली।”
- 11 लिकिन सौ सैनर ही मुद्धस पौलुसी कत्था ती कोहाँ डोंगन चलाब'उस अरा डोंगा उर्बासी कत्थन कोइहे मन्चस।
- 12 आ डोंगा घाट किर्रना उल्लन पहाब'आ गे जोक्खा मल रहचा, अदगे कोइहे आलर असले ती काला गे बिद्दियर। आर गे एकअम अन्ने फेनिक्स अंडसना ती अइय्या किर्रना उल्लन पहाब'आ गे मने रहचा। फेनिक्स क्रेते टापू ता ओन्टा घाट हवे, एकदा दखिन पच्छिम अरा उत्तर पच्छिम तरा तिसगरका रई।



- 13 आ बारी दखिन ताका लहे लहे तागर'आ हेलरा खने, आर सोचर का तम्है चिताबुता बनचा केरा।
 औंगे आर कोहाँ डोंगन बिच्छरर अरा क्रेते टापू ही हेददे धरी धरी ती काला लगियर।
- 14 लिकिन जोक्क बेड़ा नू टापू तरती ओन्टा कोहाँ बरंडो चोचा, एकदा “उत्तर-पूरब ताका” बारई।
- 15 कोहाँ डोंगा गर्गा-घटा नू बज्झरा अरा ताका ही मुन्दहारे थेम'आ पोलकम, औंगे ऐम हार मंजकम
 ती ताका गने बाहनुम काला लिक्कम।
- 16 खने ऐम कौदा नामे ओन्टा सन्नी टापू ही छेका नू तुकुरनुम तुकुरनुम काना बारी कोहाँ डोंगा
 गने हेंरका जिया बछरना ही डोंगन थेम'आ उंकम।
- 17 फिन चलाब'उर जिया बछरना ही डोंगन चोद'अरकी कोहाँ डोंगा ही भितरी मंखियर। फिन आर
 कोहाँ डोंगा अम्बो एसा बाचर ती ओनबेंडर'आ ती कोहाँ डोंगन पगहा ती हेंचर चिच्चर। सुरतिस ही
 धरी ता चलकूर नू जुबुखना ही इल्लिक'आ ती अबडर ताका ती तुक्र'आ गे तिरपाल हेंचका खूटन
 एत्ताचर ती डोंगन ताका ही तागरना नू अन्नेम काला गे काला चिच्चर।
- 18 ऐम गर्गा घटा ती नगदे नूकना-तकना मंजकम खने, नन्ना उल्ला आर कोहाँ डोंगा नू खेन्दा-
 बीसा गे उइयका जिनि स गुट्ठिन समुदर नू हेबड़ा हेलरर।
- 19 तिसर उल्ला आर कोहाँ डोंगा ही मुध जिनि सन हूँ तम्है खेक्खा ती हिबिडियर चिच्चर।
- 20 नगदे उल्ला गूटी बीड़ी महले बीनको गुट्ठी एन्द्रा हूँ मल ऐथा, अरा गर्गा घटा हूँ जोरसरिया
 तागर'आ लगिया। खने एम्है नाइरना ही असरा हूँ मुंज्रा केरा।
- 21 आर बग्गे उल्ला गूटी उबसका रहचर। आ बारी पौलुस आर ही मझी नू इज्जस ती बाचस, “अना
 आलारो, नीम एंग्हे कत्थन मँजका ती क्रेते टापू ती मल उरखका होले, निमा ई अलकरहा अरा
 नठाब'अना मल मंजकी र'ओ दने।
- 22 अन्नु हूँ नीम डिठ गने र'आ गे ऐन ब'अदन। निम्है नेख'आ हूँ जिया ही नठारना मल मनो, कोहाँ
 डोंगा ही लेका मनो।
- 23 एन्देरगेका नेख'आ ऐन र'अदन अरा नेख'आ सुसर नन्दन, आ धर्मसी पैकस चरो माखा बरचस
 ती एंगन बाचस,
- 24 ‘अना पौलुस अमा एल्चा, निंगा कैसरसी मुन्दहारे फरियारना गे इजना दिम रई, ऐरा, धर्मस
 निंग्हे संगे कालू ओर्मर ही उज्जनन निंग्हे गने बछाबाचकादस।’
- 25 औंगे आलारो, डिठ नना, एन्देरगेका ऐन धर्मस मइय्याँ पत'अदन का एकासे एंग्हे ती बारकी रई
 अन्नेम मनो।



- 26 लिकिन नम्है डोंगा एकअम टापू नू चलकूर नू गइरना ही चाइ मनो।”
- 27 चउदा उल्ला ता माखा अद्रिया समुदर नू ठुडुर'आ चोबर'आ लिक्कम खने, अधरात माखा डोंगा चलाब'उर अगमाचर का ऐम एकअम देस ही हेददे अंडसा लगदम।
- 28 आर थाहचर खने बीस पुरसा गइडी खक्खियर, जोक्क गेच्छा कालरकी फिनिम थाहचर खने पन्द्रा पुरसा गइडी खक्खियर।
- 29 आ बारी चचड़ी नू ढोंसारना ही इल्चिक'आ ती आर कोहाँ डोंगा ही खोखा तरा चार गोटंग थेमहा नंजर, अरा बिज्जना ही पाब ऐरा लगियर।
- 30 तहाँ डोंगा चलाब'उर कोहाँ डोंगा ती बोंगा बिदियर ती थेमहा लगाब'अना ही नंगु ननरकी जिया बछरना ही डोंगन समुदर नू एताचर चिच्चर।
- 31 आ बारी पौलुस सौ सैनर ही मुद्धस अरा सैनारिन बाचस, “ईर कोहाँ डोंगा नू मल र'ओर होले, नीम हूँ मल बछर'ओर।”
- 32 खने सैनर दौइन खंडियर ती जिया बछरना ही डोंगन समुदर नू टिड्डर चिच्चर।
- 33 बिज बेड़ा नू पौलुस ओर्मरिन इन्द्रिम ओना मोखा गे आनियस। अरा आस बाचस, “इन्ना चउदा उल्ला मंजा, अरा नीम इन्द्रिम मल ओंडका मोक्का ती पाब ईरनुम ईरनुम कीड़ा कीड़ा र'अदर।
- 34 ओँगे निमन आनदन कटइम केम ओना मोखा, होले नीम उज्जा गे सवंग खक्खोर। निम्है मदहे ता नेख'आ दिम कुक्क ता ओन्टा चुट्टी हूँ मल खत्र'ओ।”
- 35 आस एन्ने बाचस ती असमन होच्चस अरा ओर्मर ही मुन्दहारे धर्मसी धन्यवाद नंजस ती किच्चियस ती मोखा हेलरस।
- 36 खने आर ओर्मर हूँ डिठ नंजर ती मोखा हेलरर।
- 37 ऐम ओर्मर कोहाँ डोंगा नू दुई सौ छिहतर आल रहचकम।
- 38 आर मोक्कर ती उइचर ती कोहाँ डोंगा आबोन नेब्बा नना गे गहूँन समुदर नू हेबड़ा हेलरर।
- 39 बिज्जिया खने, आर आ देस आबोन पोल्लर चिन्ह'आ, लिकिन ओन्टा धाँसड़े ईरियर अदही गंडा चकड़ रहचा। अरा आर सोच्चर का ओँगोत होले कोहाँ डोंगन इय्यम टिका ब'ओत।
- 40 तहाँ आर थेमहा आबोन कुल्लियर ती समुदर नू अम्बियर, अरा आ बारी अबड़ा नोल्लनन कुल्लियर चिच्चर। अरा डोंगा ही मुन्द ता ताका ती तुक्र'आ गे तिरपाल हेंचका खूटन ताका तरा तनाबाचर का ताका डोंगन पिंडी तरा होओ।



41 लिकिन डोंगा चलकूर ही आड़ी नू ठुडरा ती इज्जा केरा। खने डोंगा ही मुन्द फड़ा गड्डरा ती मल टसकारा, लिकिन खोखा फड़ा लहरा ही तुक्कना ती एसा केरा।

42 आ बारी सैनर हेंरका आलारिन पिटा गे मने नंजर का नीकईम ओगनुम बोंगोर।

43 लिकिन सौ सैनर ही मुद्धस पौलुसिन बछाब'अना ही मने ती आर अन्ने मल नना गे आरिन छेकचस। अरा आस आनियस, “ने ने ओगा ओंदर आर झपार'आ ती आ पक्खे ऊगनुम कट्टा कला।

44 अरा बछका आलर ने पटरा ती अरा ने कोहाँ डोंगा ही नन्ना आलो ही सहाड़ा ती उरखा कला।” ई लेक्खा ओर्मर कोडेम पिंडी टोंका नू उरखर केरर।

तइरकर 28

1 ऐम असले बछरकम उरखकम तहाँ अक्कम का ईदिम मेलिता टापू हवे।

2 अइय्या ता रऊ आलर एमन नगदे सोग्गे ईरियर। चेप पुंइना अरा पइय्याँ ही चड्डे आर चिच्ची ओदुदर ती एमन परघाचर।

3 पौलुस कंक ही बिंडन खूजियस ती चिच्ची नू किट्टचस खने, ओन्टा करैत नेर्रे सेकचा खने, उरखा ती आसी खेक्खा नू पोञ्जरा केरा।

4 असला आलर आसी खेक्खा नू पोजोरका नेर्रेन ईरियर खने, ताम ताम बाच नखरर, “मानिम ई आलस आल पिटुस हिकदस, समुदर ती बछरस, अन्नु हूँ नेवई ईसिन उज्जा मल चिच्चा।”

5 पौलुस गा नेर्रेन चिच्ची नू हिछड़ाचस चिच्चस, अरा आस गे एन्देर हूँ मल मंजा।

6 आर गा ऐरा लगियर का ई आलस पूखर'ओस कओस मलता आचका खत्र'ओस ती खेओस कओस। आर नगदे घड़ी गूटी ऐरा लगियर, लिकिन आस गे एन्देर हूँ मल मंजा खने, आर तम्है मनेन बदलाचर ती बाचर, “ईस गा एकअम देवता हिकदस।”

7 अइय्या अड्डे-बेड्डे ता गोड्डा आ टापू ता मुन्दस पोपलियोसी गोड्डा रहचा, आस तंगहै गुसन एमन परघाचस ती तीन उल्ला गूटी पाही ईरियस।

8 पोपलियोसी तम्बस नाड़ी अरा कूल ही रोगे ती बिडिरका रहचस। पौलुस भितरी कोरचस ती आसिन ईरियस, अरा आस गे गोहरारस ती आसी मइय्याँ खेक्खा गुट्ठिन उइय्यस ती आसिन कोडे नंजस।

9 एन्ने मंजा खने आ टापू ता अउर बछका रोगे आलर बरचर, अरा आस आरिन कोडे नंजस।



- 10 अबड़र एमन नगदे मईन नंजर। अरा ऐम काला उरखकम खने, एम्है डहरे ऐकना ही उर्मी चाड़ ही आलोन एमा गे चिच्चर।
- 11 तीन चन्दो खोखा अलेक्सन्द्रिया नगरे ता ओन्टा कोहाँ डोंगा नू केरकम। आ कोहाँ डोंगा पड़्य्याँ गूटी आ टापू नूरहचा, अरा अदही चिन्हा “जोड़ा देवता” रहचा।
- 12 सूरकुसा नगरे नू अंडसकम ती ऐम तीन उल्ला गूटी असन रहचकम।
- 13 असलेक ती ऐम किन्दरारकम ती रेगियोन बरचकम। अरा उन्दुल ही खोखा दखिन ताका तागरा, अरा दोसर उल्ला ऐम पोतियोली बरचकम।
- 14 असन एमा जोक्क पत'ऊ भईर खक्खरर। आर एंगन तम्है गुसन सात उल्ला र'आ गे एड्डर। अदही खोखा ऐम रोम बरचकम।
- 15 अइय्या ता पत'ऊ भइय्योर एम्है बरना ही हाल मेंजर ती जोक्कोर “अप्पियुस बजार” अरा जोक्कोर “तीन डेरा एडपा” गूटी एमन भेंट मना बरचर। पौलुस आरिन ईरियस ती धर्मसिन धन्यवाद नंजस अरा डिढ नंजस।
- 16 ऐम रोम अंडसकम खने, पौलुस गे ओन्टा सैनस ही पहरा नू ओर्त लेका र'आ गे पेसका खक्खरा।
- 17 तीन उल्ला खोखा पौलुस यहूदीर ही मुद्ध आलारिन मीखियस। आर जुम्मरर खने आरिन बाचस, “अना भईरो, ऐन नम्है आलर ही बिड़दो महले नम्है पूरखर ही चाल ही बिड़दो नू एन्देर हूँ मल नंजकन। अन्नु हूँ ऐन येरुसलेम नू हेंरकन ती रोमीर ही खेक्खा नू सौंपतारकन।
- 18 रोमी आलर एंगन जाँच नंजर ती एंगा नू पिटना दंडे जोक्खा दोस मल खक्खियर ती एंगन अम्बा बिद्दियर।
- 19 लिकिन यहूदीर एंगहै अम्बना ही बिड़दो नू ब'आ हेलरर खने, एंगा कैसरसिन गोहार नन्ना मंजा। अन्नु हूँ ऐन एंगहै आलर ही बिड़दो नू एन्द्रा हूँ बदी नना गे मने मल नंजकन।
- 20 इदही चड्डे ऐन निमन ओर्मारिन मीखकन का निम्है गने भेंट मनोन अरा कछनख'ओन। इस्राएल आलर बर'ओस एन्ने पाब ईरका मसीसी मइय्याँ ता एंगहै पत'अना ही चड्डे तिम ऐन सिकड़ी ती हेंरकादन।”
- 21 खने अबड़र पौलुसिन बाचर “ऐम निम्है पत नू यूदेया ती चिठी मल खक्खका र'अदम मलता असन ती बरचका भइय्योर निंगहै पत नू एमन इन्द्रिइम मल तिंगियर अरा इन्द्रिइम मलदौँ बाचकानर।



- 22 लिकिन निंग्हे ब'अना एन्देर र'ई अदिनिम ऐम मेना बेद्ददम। एन्देरगेका ऐम अखदम का उर्मी अड्डा ता आलर ई धरम खोंडहा ही बिडदो नू कछनखनर।”
- 23 खने आर पौलुस गे ओन्टा उल्ला ओकताचर। अउला नगदे आलर पौलुस डेरा नंजका अड्डा नू जुम्मरर। आस पैरी ती पुतबीरी गूटी धर्मेसी राजी ही पत नू फरीफरी आर गे तिगियस। अरा आस मूसासी नेग ती अरा धर्मेसी कथा तिगुर ही पुथी ती येसु मसीसी पत नू तेंगना ती आर येसुसिन पत'आ गे चिहुट नंजस।
- 24 खने पौलुस बाचका कत्थन जोक्क आलर गा पताचर, लिकिन नन्नर मल पताचर।
- 25 आर तम्है मझी नू ओन गुट मंजर ती असन ती केरर खने, छेद्दे नू पौलुस आरिन बाचस, “नेम्हा बोलतस धर्मेसी कथा तिगुस यसायास ती निम्है पूरखर गने ठौकम बाचकादस।
- 26 ई आलर गुसन कला ती ब'आ, नीम मेनते र'ओर, लिकिन मल बुझुर'ओर। नीम ऐरते र'ओर, लिकिन मल ओरख'ओर।
- 27 एन्देरगेका इबडा आलर ही जिया करचकी र'ई, अरा ईर ही खेबदा दडिया मंजकी किरकी र'ई, अरा ईर तम्है खन्नन मिंखका र'अनर। मला होले ईर तम्है खन्न ती ऐरा ओंगोर, अरा तम्है खेबदा ती मेना ओंगोर, अरा तम्है जिया ती बुझुर'आ ओंगोर, अरा एंग्हे तरा किरा ओंगोर, अरा ऐन आरिन कोडे ननोन।’
- 28 ओंगे नीम अख'आ गे ऐन बेद्ददन का धर्मेसी ई नाडरना नन-यहूदीर गुसन तडरकी र'ई, अरा आर इदिन इंझर'ओर।”
- 29 [पौलुस एन्ने बाचस, अदही खोखा यहूदीर ताम तम्है नू नगदे हबडा हबडी मना हेलरर अरा असलेक किरिम बिच्चियर।]
- 30 पौलुस गोट्टा दुई बछर गूटी तानिम भडा चि'अरकी भडा एडपा नू असन रहचस। आलर आसी गुसन बर'आ लगियर अरा आर ओर्मर गने भेंट मना लगियस।
- 31 अरा आस बिगर छेके-रुके ती डिढ गने धर्मेसी राजी ही पत नू तेंगा कुद्दा लगियस अरा उर्बस येसु मसीसी पत नू सिखाब'आ लगियस।



रोमी

रोमी 1

- 1 ऐन मसी येसुसी जौखन पौलुस धर्मसी तइरका मना गे मेखरका र'अदन। अरा आसी दौ कत्थन तेंगा कुद्दा गे चजरका र'अदन।
- 2 धर्मस ई दौ कत्थन मुन्द तिम नेम्हा पुथी नू तंग्हे कत्था तिगुर ती गच्छरका रहचस।
- 3 ई दौ कत्था तंग्हे खद्दासी पत नूर ई। आस आल कया ती गा दाऊद बेलासी बनस नू कुन्द्रस।
- 4 आस नेम्हा बोलतासी सवंग ती केचका ती उज्जा चोअना ती धर्मसी खद्दस नंज ऐदस। आसिम नम्हे उर्बस येसु मसीस हवे।
- 5 धर्मस येसुस ती एमा मया अरा तइरका मन्ना ही हदा चिचस का आसी नामे ही चड्डे उर्मी जातियर पत'ओर ती आसी पेसकन ननोर।
- 6 अबइर ती नीम हूँ येसु मसीसी आल मना गे मेखरकादर।
- 7 ऐन रोम नगरे नूर ऊ निमा ओर्मर गे ई चिठिन लिखदन। धर्मस निमन चोन्हा नन्दस अरा आसी आलर मना गे चज्जिका र'अदस। नम्हे धर्म बंगस अरा उर्बस येसु मसीस ती निमा मया अरा कोडे खक्खअन नेकअन।
- 8 मुन्द ऐन निमा ओर्मर गे येसु मसीस ती नम्हे धर्मसी धन्यवाद नन्दन का निम्हे पत'अना ही हूही गोट्टा सौंसार नू मना लगी।
- 9 एका धर्मसी ऐन आसी खद्दासी पत ता दौ कत्था तेंगना ती सौंसे जिया ती तेतर-सुसर नन्दन, आस अखदस का ऐन सगरो एंग्हे बिन्ती नू निमन सुरत'अदन।
- 10 ऐन एंग्हे गोहरारना नू सगरो धर्मस गुसन ने'अदन का आसी मने ती निमन ऐरा बर'आ गे बेड़ा खक्खओ।
- 11 एन्देरगेका एंगा निम्हे गने भेंटार'आ तुक्काली का ऐन निमन धर्मसी बोलता ती खक्खका आसीस आबोन खट्टा बेद्ददन का नीम निम्हे पत'अना नू बड़ियर मना ओंगोर।
- 12 ऐन एन्देर ब'आलदन का नम्हे नूर ई आ पत'अना ती नाम नन्नारिन सहाड़ा नना ओंगोत।
- 13 अना भईरो! ऐन निमन अखत'आ बेद्ददन का ऐन घड़ी घड़ी निम्हे गुसन बर'आ गे चिता बुता नंजकन का निमन बोलता ही उज्जना नू परदा गे सहाड़ा नना ओंगोन एकासे ऐन नन्ना नन-यहूदी आलर गे सहाड़ा नंजकन, लिकिन ऐन बर'आ पोलकन।



- 14 उज्जना बिज्जनन बड़ियर अख'उर अरा बल्लुर अरा पढ़चकर अरा बिगर पढ़चका ओर्मर ही ऐन नहड़ा र'अदन।
- 15 औंगे ऐन नीम रोम नगरे ता आलारिन हूँ दौ कत्थन तेंगा गे सपड़ारकादन।
- 16 ऐन गा दौ कत्थन मेन्त'आ गे मल लज्जरदन। ईदिम पत्त'ऊ आलर ओर्मर गे मुन्द यहूदीर गे अरा खोखा नन-यहूदी आलर गे नाड़रना ही धर्मसी सवंग ही डहरे हिके।
- 17 नेम्हा पुथी नू लिखकी र'ई, “उजगो आलर धर्मस नू असरा नन्ना ती उज्जोर।” एन्ने ई दौ कत्था नमन ब'ई का एकासे धर्मस नमन उजगो कमदस। ईद पत्त'अना ती दिम हुल्लो अरा हुल्लो गूटी मनी।
- 18 ने मलदौ ती मानिम आबोन अर्बनर उइयनर आर ही मलदौ अरा धर्मसिन महबा मल नना ही बिड़दो नू धर्मसी खींस मेखा ती दहदर मनी।
- 19 ईगेका धर्मसी पत्त नू इन्द्रिइम लो अखना र'ई आद आर ही मइय्याँ दहदर र'ई। धर्मस तानिम अदिन आर ही मइय्याँ दहदर नंजकादस।
- 20 इकला ती धर्मस खेखेलन गढ़चस आसी मल ऐथ्रना गुन्न गुट्ठी, आसी जनमजुग ता सवंग अरा आसी धर्म लेक्खा गुन्न ऐथ्रना नू बर'आ लगी। अबड़ा धर्मसी कमचका ती अखतार'ई। औंगे आलर धर्मसिन बलदम ब'आ पोलनर।
- 21 आलर धर्मसिन अक्खर, लिकिन आर आसिन धर्म लेक्खा मईन मल नन्नर महले धन्यवाद हूँ मल नन्नर। आर ही सोच अनभनियाँ मंजा केरा अरा आर ही मल लखरना ही जिया ऊखा मंजा केरा।
- 22 आर तमन लूरगर ब'अनर लिकिन आर बोया हिकनर।
- 23 आर सदौ उज्जना धर्मसिन महबा मल नन्नर। ऊजी नू नठार'ऊ आल, ओड़ा, मेक्खो अरा नेरें गुट्ठी लेक्खा मूर्ती गुट्ठी ही महबा नन्नर।
- 24 औंगे धर्मस आरिन पाप नन्ना ही मने, जिया ही चिबाखारना गुट्ठी ती सोतबोड़'आ मना गे अम्बियस चिचस। खने आर तम्है कयन ओरोत ईरीब नू लज्जे मलका सोतबोड़'आ नंजर।
- 25 आर धर्मसी पत्त ता मानिमन अम्बियर ती ठकनन इंझर। अरा आर सदौ सदौ ओहमा नन्ना जोगे धर्मसी ऊजी नू धर्मस ती गढ़चका आलोन महबा नंजर। आमैन!



26ई चड्डेम धर्मेस आरिन आर ही मने ही घिनघिना लज्जे मलका नलख नना गे अम्बियस चिच्चस। आर ही मुक्कर हूँ मेत उज्जनन अम्बियर ती अदही बिड़दो नू मुक्कर ताम ताम नू सोतबोड़'आ मना हेलरर।

27अन्नेम मेतर हूँ मुक्का उज्जनन अम्बियर ती ताम ताम सोतबोड़'आ मना गे कोइहे बेद्दालियर। मेत मेतर लज्जे मलका नलख नंजर ती तम्है इबड़ा बोया नलख गुट्ठी ती तम्है मेद नू दंडे भोघालनर।

28आर धर्मेसिन चिन्ह'आ मल बिद्दयर। खने धर्मेस हूँ आर ही बैड़ो बुधिन आर ही मइय्याँ राजी नना गे अम्बियस चिच्चस। औंगे आर इबड़ा उर्मी मलदौ नलखन नन्नर।

29आर उर्मी बेसे कुचरहा नलख, मलदौ, चिबाखारना, खाँइना ती निन्दयर केरर। अरा आर इस्गहा, पिटना, नग्गानखना, उत्तरमाइना, चिड़गना पड़गना ती निन्दका र'अनर। अरा आर जलिय'अना

30अरा निंदा नन्नर। अरा आर धर्मेसिन खाँइनर। अरा आर नन्नारिन कोड़े मल ब'उर र'अनर। अरा आर इतरार'ऊ अरा कोहाँ कोहाँ फुलई मनु आलर र'अनर। अरा आर मलदौ मलदौ कत्था कम'ऊ र'अनर। अरा आर तंग्यो तम्बा ही पेसकन मल मेन्नर।

31अरा आर लखना मलका दरा गच्छरका मल उइय्युर र'अनर। अरा आर चोन्हा दरा सोग्गे ननु मलनर।

32आर गा धर्मेसी ई नेगन अखनर का एन्ने एन्ने नलख ननुर खे'अना दंडे ही जोगे र'अनर। अन्नु हूँ आर ताम लेका एन्ने मल नन्नर, लिकिन एन्ने नलख ननु आलर ती हूँ रिझनर।

रोमी 2

1औंगे अना नन्नर मइय्याँ नैवई ननु आलारो, नीम नीकईम हूँ र'ओर, नीम बछर'आ पोलदर। एका कत्था ही नीम आरिन बदी नन्दर, अत्रुम नीम हूँ बदी खतरदर। एन्देगेका नीम एका बदी नन्नर मइय्याँ नन्दर आ मलदौ नलखन नीमिम नन्दर।

2नाम अखदत का एन्ने मलदौ नलख ननुर मइय्याँ धर्मेस ठौका दंडे चि'ओस।

3-4अना आलारो, नीम मलदौ नलख ननुर ही नैवई नन्दर, लिकिन नीमिम एन्ने नलख नन्दर। धर्मेस निमन कोइहे चोन्हा नन्दस अरा सहदस अरा निमन सोग्गे ऐरदस। ई चड्डे नीम एन्ने सोचदर का धर्मेसी नैवई नन्ना ती बछर'ओर? नीम गा आसी चोन्हा ही पत नू मल सोचदर अरा आसी चोन्हन मल बुझदर का नीम जियन किर्त'आ गे धर्मेस मोका गुट्ठी चि'आलदस।



- 5 लिकिन नीम निम्है ढिट्ठी अरा पाप नन्नन मल अम्बना चड्डे धर्मसी खीस ऐदना ही उल्ला नू अउर हूँ कोइहे दंडे बैददर। आ उल्ला नू ओर्मर धर्मसी ठौका नैवई नन्नन ऐरोर।
- 6 धर्मस ओर्मर गे तम्है तम्है नलख लेक्खा भूती चिओस।
- 7 एका ओर्तर सहेलहे दौ नलख नन्नुम महबा अरा मईन अरा मल नठारनन धर्मस ती बेद्दना नू र'अनर, धर्मस आर गे जनमजुग ही उज्जना चिओस।
- 8 एका ओर्तर लोभिया र'अनर अरा ठौका कत्थन ताइनर ती मलदौ नू ऐकनर आर गे धर्मसी खीस दरा कयरारना मनो।
- 9 मलदौ ननू उर्मी आलर गे सस्ती अरा कलपारना मनो। मुन्द यहूदीर गे खोखा नन-यहूदीर गे मनो।
- 10 लिकिन दौ नलख ननुर गे महबा अरा मईन अरा कोड़े मनो। मुन्द यहूदीर गे खोखा नन-यहूदीर गे मनो।
- 11 एन्देरगेका धर्मस नेख आ तरा हूँ मल मन्दस।
- 12 एका ओर्तर धर्मसी पेसकन बलनर ती पाप नन्नर, होले हूँ आर नठार'ओर। अरा एका ओर्तर धर्मसी पेसकन अखनर ती पाप ननतेम र'अनर, आर धर्मसी पेसका ती नैवई नन्तार'ओर।
- 13 एन्देरगेका धर्मसी पेसकन मिनू आलर उजगो मल मनोर, लिकिन धर्मसी पेसकन पेस'ऊ आलर उजगो मनोर।
- 14 एका ओर्तर यहूदी मलनर आर गे धर्मसी पेसका मल खक्खरा। अन्नु हूँ आर आ पेसकन पेस'नर होले, आर पेसका मलका नू हूँ ताम तम्है नू पेसका हिकनर।
- 15 ईर ऐदनर का एकासे धर्मसी पेसका र'ई अन्ने तम्है जिया नू अखनर, एन्द्रा ठौका र'ई अरा बिड़दो र'ई। अरा आर इदन तम्है लखना ती ऐदनर, एका एका बारी आर ही सोच तिङ्गी का आर ठौका नंजर अरा बिड़दो नंजर।
- 16 ऐन निम्है नू तिङ्का दौ कत्था ही लेक्खा धर्मस मसी येसुस ती आ उल्ला नू उर्मी आलर ही नूखुरका कत्था गुट्ठी ही नैवई ननोस।
- 17 अक्कुन नीन निङ्गन यहूदी ब'अदय अरा धर्मसी पेसका ही मइय्याँ भरसा उइय्दय अरा धर्मसी अरा निङ्गै मझी ता नता ही पत नू फुलई मन्दय।
- 18 अरा नीन पेसकन सिखकय ती नीन एन्देर नना गे धर्मस बेद्ददस अदिन अखदय। अरा एन्द्रा दौ अरा मलदौ र'ई अदिन हूँ नीन अखदय।



- 19 नीन सोचदय का नीन अन्धहा आलर ही कइहाब'उर अरा ऊखा नू र'उर ही बिल्ली।
- 20 अरा नीन सोचदय का नीन बोया आलर गे दौ आबोन ब'आ ओंगदय, अरा लूर मलकर गे सिखाब'ऊ हिकदय। ओंगे नीन सोचदय का धर्मसी पेसका निंगा उर्मी लूर अरा मानिम कत्थन चिई।
- 21 नीन नन्नारिन सिखाब'अदय लिकिन निंगन मल सिखाब'अदय। अरा नीन नन्नारिन अमके खइ'आ ब'अदय लिकिन नीनिम खइदय।
- 22 नीन गा आनदय नन्ना आली गुसन अमके काला, लिकिन नीनिम नन्ना आली गुसन कादय। नीन मूर्ती गुट्ठिन खँइदय, लिकिन नीन गा मन्दिर गुट्ठिन बचदय।
- 23 नीन धर्मसी पेसकन अखदन ब'अदय ती फुलई मन्दय, लिकिन नीन पेसकन टाइदय ती धर्मसी मईन मल नन्दय।
- 24 एकासे का नेम्हा पुथी नू लिखकी र'ई, “निम्है चइडे नन-यहूदीर नू धर्मसी नामे ही निंदा मनी।”
- 25 नीम खतना मंजका चइडे नीम पत'अदर का नीम धर्मस ती चजरकादर। नीन धर्मसी पेसकन पेसदय होले गा खतना ही नफा र'ई। लिकिन नीन पेसकन मल पेसदय होले, निंगहै खतना बिगर खतना ही लेक्खा मनी।
- 26 एन्नेम नन-यहूदीर खतना मल मंजका र'अनर। लिकिन आर पेसका एन्देर ब'ई अदिन पेसनर होले, ईद आर ही खतना मंजका बेसे र'ई।
- 27 निमा यहूदीर गे लिखका पेसका र'ई अरा निम्है खतना मंजकी र'ई, लिकिन नीम पेसकन टाइदर। ओंगे एका ओर्तर तम्है कया नू खतना मल्ला मंजका, लिकिन आर पेसकन पेसनर, आर निमन बदी ननोर।
- 28 एन्देरगेका यहूदी अयंग बंग ती कुन्द्रकादस महले कया ही मानिम खतना मंजका ती लेका आस मानिम यहूदी मलदस।
- 29 लिकिन एकास धर्मसी पेसकन पेसदस आस मानिम यहूदी हिकदस। लिखका नेग ती मला लिकिन नेम्हा बोलतस जियन बदलदस आद दिम मानिम खतना हिके। एन्ने आलासी आलर तरती मला धर्मस तरती मईन मनी।

रोमी 3

- 1 यहूदी र'अना ती बग्गे एन्देर खक्खरा? अरा खतना ती एन्देर फैदा?
- 2 उर्मी तरती ढेर बग्गे खक्खरा। उर्मी ती मुन्द धर्मसी कत्था गुट्ठी यहूदीर गे थोपरा।



- 3 जोक्क यहूदीर धर्मसिन मल पताचकर। होले ईर ही मल पत'अना ती धर्मस तंग्हे गच्छरका आबोन अम्बोस चि'ओस का?
- 4 कहियों मला! ओर्मा आलर ठकवा मनोर क'ओर होले हूँ धर्मस मानिम ब'अतेम र'ओस। एकासे का नेम्हा पुथी नू धर्मसी पत नू लिखकी र'ई, “नीन निंग्हे कत्था गुट्ठी ती उजगो बार'ओय, अरा निंग्हे नैवई बारी नीन जित'ओय।”
- 5 एकाबारी नाम बिड़दो नन्दत, आद फरीफरी ईद'ई का धर्मस उजगो र'अदस। ओंगे जोक्कोर ब'आ ओंग्दर का धर्मसी नमा गे दंडे चि'अना ठौका मलकी। ईद आलर ही सोचना लेक्खा र'ई।
- 6 ईद एन्ने मला का, धर्मस ईर गे दंडे चि'अना नू मानिम मल र'अदस होले आस ई खेखेल ही नैवई नना पोलदस।
- 7 ओर्तोस ब'आ ओंग्दस, “एकाबारी ऐन ठकदन, ईद मानिम नू धर्मसी महबा चि'ई, एकासे का एंग्हे ठकवा धर्मसी मानिम आबोन ईद'ई। होले एन्देगे ऐन नैवई नू पपहा टूडरतारदन?”
- 8 एन्ने होले “दौ खक्खा गे मलदौ ननोम” एन्ने एन्देगे मल ब'ओम? जोक्क आलर ऐम हूँ एन्ने ब'अदम ब'अनर ती निंदा नन्नर। ओंगे एन्ने आलारिन पपहा ठेकाब'अना बेस र'ई।
- 9 होले नाम एन्दे ब'ओत? नाम यहूदीयत नन्ना आलर ती बेस र'अदत का? कहियों मला। ऐम मुन्द दिम बाचकादत का यहूदीर अरा नन-यहूदीर ओर्मर पाप ही तबे नूर'अनर।
- 10 एकासे नेम्हा पुथी नू लिखकी र'ई, “ने हूँ धर्मसी ऐरना नू उजगो मल्ला, ओर्त हूँ मला।
- 11 ने हूँ धर्मसी पत नू बुझ'ऊ मल्ला, ने हूँ धर्मसिन बिद्दू मलनर।
- 12 ओर्मर बेहड़ारका केरका र'अनर, ओर्मर अनलोगा मंजका केरका र'अनर, ने हूँ दौ मल ननू र'अनर, ओर्त हूँ मला।”
- 13 “आर ही ब'अना गुट्ठी चलखरका मसड़ा लेक्खा र'ई, आर ही ततखा गुट्ठी लबरा हिके। आर ही लेवटो गुट्ठी नू नेरै ही बिक्ख र'ई।”
- 14 “आर ही बईय्यद सर्प'अना दरा खड़खा ती निन्दकी र'ई।”
- 15 “आर पिटा गे बोंगनर।
- 16 आर ही डहरे नू नठारना दरा कलपारना र'ई।
- 17 आर एकासे कोड़े उज्जना र'ई अदिन बलनर।
- 18 आर गे धर्मसी इल्चका दिम मलकी।”



- 19 नाम अखदत का धर्मसी पेसका एन्देर ब'ई, इबड़ा पेसका ही तबे नू र'ऊ आलर गे तिंगी। औंगे नाम उर्मी यहूदीर गे एन्द्रा हूँ ब'अना ही ओदहा मलकी। एन्ने गोट्टा खेखेल ता आलर गे धर्मसी रायबड़ी नू तम्है लेखा चि'अना र'ई।
- 20 औंगे ने हूँ पेसकन पेसना ती धर्मसी ऐरना नू उजगो मना पोलनर। पेसका नमन नम्है पापन लेका अखत'ई।
- 21 अक्कु बिगर पेसका ती नमन धर्मसी ऐरना नू उजगो मना गे धर्मस डहरे ऐद्दस। इदगे मूसासी पेसका अरा धर्मसी कत्था तिंगुर ही कत्था हूँ गोवाह र'ई।
- 22 धर्मस ती बर'ऊ ई उजगो पत्त'ऊ ओर्मर गे येसु मसीस नू ता पत्त'अना ती बर'ई। ईद यहूदीर अरा नन-यहूदीर ओर्मर गे ओन्टा दिम र'ई।
- 23 एन्देरगेका ओर्मर पाप नंजका र'अनर अरा धर्मसी महबा ही जोगे मल र'अनर।
- 24 लिकिन अक्कु मसी येसुस ती बरचका नाइरना ती धर्मसी मया ती सिथियम आर उजगो मन्नर कानर।
- 25 धर्मस येसुसिन ई खेखेल नू नम्है पाप गे पाप ही दाँडे गे तइय्यस। येसुस तंग्हे जियन दाँडे चिच्यस अरा तंग्हे खेंसन तरपाचस, इदिन इकला नाम पत्त'अदत अउला उजगो मन्तारदत। ई दाँडे ऐद्दस का येसुस तंग्हे जियन दाँडे चि'अना ही मुन्द ता आलर ही पाप गुट्ठिन धर्मस सहचस ती बिगर दंडे चि'अम छमा नंजस ती तंग्हे उजगो आबोन ऐदस।
- 26 ई परिया नू तंग्हे उजगो आबोन ऐद'आ गे धर्मस येसुसिन चिच्यस। धर्मस इदिन एन्ने ऐद'आ गे नंजस का आस ठौका ती नैवई नना आंगदस, अउर हूँ आस येसुस मइय्याँ पत्त'उरिन उजगो कमदस।
- 27 औंगे नैका हूँ फुलई नना गे अइडा र'ई का? अदगे अइडा मलकी। एन्देरगे एन्ने मलकी? उजगो मनरकी धर्मस ती इंझतारना पेसका आबोन पेसना ती मला लिकिन पत्त'अना ती मनी।
- 28 एन्देरगेका नाम मनदत का आलर पेसकन पेसना ती मला पत्त'अना ती उजगो मन्नर।
- 29 ईद मानिम का धर्मस यहूदीर ही लेका धर्मस हिकदस का? आस नन-यहूदीर ही धर्मस मल्दस का? आस मानिम नन-यहूदीर ही हूँ धर्मस हिकदस।
- 30 एन्देरगेका ओर्त लेका धर्मस र'अदस। आसिन इंझना ही ओन्टे लेका डहरे र'ई। आस खतना नंजका आलारिन पत्त'अना ती आरिन उजगो मन्दस। अरा बिगर खतना नंजका आलारिन हूँ पत्त'अना ती लेका उजगो मन्दस।



31 होले नाम ई पत'अना ती पेसकन मेटदत का? कहियों मला। नाम पेसकन कोइहे बड़ियर नन्दत।

रोमी 4

- 1 नाम एन्देर ब'ओत, नम्है यहूदीर ही पुरखा बंगस अब्राहमस पत'अना ही पत नू एन्द्रा सिखस?
- 2 अब्राहमस तंग्हे नलख गुट्ठी ती उजगो मंजका होले, आस गे फुलई नना गे अड्डा र'ई। लिकिन आस धर्मस गुसन फुलई नना गे अड्डा मलकी।
- 3 एन्देरगेका नेम्हा पुथी ब'ई, “अब्राहमस धर्मसिन पताचस, अरा धर्मस ई पत'अना ती आसिन उजगो मनचस।”
- 4 बनी नलख ननुर गे आर ही बनी चि'अना दान मल्ली, लिकिन आसी बनी चि'अना दिम मनी।
- 5 लिकिन एका ओर्तस मलदौ आलारिन छमा ननू धर्मसिन पत'ऊ र'अदस आस गे तंग्हे नलख नू मला आसी पत'अना दिम उजगो गनतार'ई।
- 6 एन्नेम दाऊद बेलस नेम्हा पुथी नू बाचस का नेकन धर्मस आर ही दौ नलख ती मला तंग्हे मया ती उजगो कमदस, आर आसीस खक्ख'ऊ हिकनर। दाऊदस ब'अदस,
- 7 “नेखा पाप छमा मंजा अरा नेखा मलदौ नलख मोद्रतारा, आर आसीस खक्ख'ऊ हिकनर।
- 8 नेखा पापन तंग्हे पुथी ती मेटदस, आर आसीस खक्ख'ऊ हिकनर।”
- 9 ई आसीस खतना मंजका आलर ही लेका का, महले बेगर खतना मंजका आलर गे हूँ र'ई का? नाम एन्ने ब'अदत का अब्राहमसिन धर्मस आसी पत'अना ती उजगो मनचस।
- 10 होले आस इकला उजगो मनचस? आस खतना मंजका ती मुन्द का, खतना मंजका ती खोखा का? आस खतना मंजका ती खोखा मला खतना मंजका ती मुन्द उजगो मनचस।
- 11 अब्राहमस खतना मंजका ही मुन्द दिम तंग्हे पत'अना ती खक्ख'का उजगो आबोन ऐद'आ गे खोखा आस खतना आबोन ओन्टा चिन्हा लेक्खा खक्ख'यस। ओँगे बिगर खतना ती हूँ ओर्मा पत'उर गे अब्राहमस बंग मनदस। ईर तम्है पत'अना ती उजगो आल मन्नर।
- 12 अरा अब्राहमस खतना मंजका आलर ही हूँ बंग र'अदस, एका ओर्तर खतना लेका मल मंजका र'अनर, लिकिन अब्राहमसी पत'अना लेक्खा ऐकनर एकासे आस खतना मंजका ती मुन्द पताचस।



- 13अब्राहमस अरा आसी बनस गोट्टा खेखेलन खक्ख'ओर एन्ने धर्मस ती गच्छरका खक्खियर। ई गच्छरका पेसकन पेसना ती मला लिकिन पत'अना ती धर्मसी ऐरना नू उजगो आल मन्ना ती खक्खकी रहचा।
- 14आलर पेसकन पेसना ती लेका धर्मसी गच्छरकन खक्खा ओंगोर होले, पत'अना अनभनियाँ रई। अरा अब्राहमस नू धर्मसी गच्छरका अनभनियाँ रई,
- 15एन्देरगेका पेसका धर्मसी खीसन लेका ओन्द्र'आ ऊंगी। एक्सन पेसका मल्ला असन अदिन टांङना ही कत्था मल मनी।
- 16ओँगे धर्मसी गच्छरना पत'अना ती खक्खरई। ई गच्छरका सिथिया ही मया ती अब्राहमसी जईपुँई ओर्मर गे चितारई। ईद मूसासी पेसका ही तबे नू र'उर गे लेका मला नाम ओर्मर ही बंग अब्राहमस एकासे पताचस, अन्ने पत'ऊ आलर गे हूँ चितारई।
- 17एकासे नेम्हा पुथी नू लिखकी रई, “ऐन निंगन अजम बग्गे जातियर ही बंग कमचकादन।” ई गच्छरका अब्राहमस गे आस धर्मसी मइय्याँ नंजका पत'अना ती खक्खरा। धर्मस दिम केचकारिन उज्जत'अदस अरा एन्द्रा हूँ मलकी अइय्या तिम पुना जिनिसन गढ़दस।
- 18अब्राहमस हदियारना नू हूँ असरा उइय्यस ती पताचस, अरा आस अजम बग्गे जातियर ही बंग मंजस केरस। एकासे का आसी गच्छरका रहचा, “निंगहै जईपुँई गन'आ पोलना मनो क'ओ।”
- 19अब्राहमस मलागूटी सौ बछर ही रहचस। अन्नु हूँ तंगहै पया मलका बेसे मेद अरा सारा ही गरब ओत्थाऐख मना गे केचका बेसे रहचा अदिन अक्खस ती हूँ पत'अना नू पयहा मल मंजस।
- 20अब्राहमस मल पत'ऊ मंजस ती धर्मसी गच्छरकन मल दोखचस। लिकिन आस पत'अना नू पोकता मंजस ती धर्मसी ओहमा नंजस।
- 21अब्राहमस निचट अक्खस का एका कत्थन धर्मस गच्छरकादस, आस अदिन पूरा नना गे सवंगिय र'अदस।
- 22ई चड्डे तंगहै पत'अना ती अब्राहमस उजगो लेखरस।
- 23“अब्राहमस उजगो लेखरस” इबड़ा कत्था अब्राहमसी फैदा गे लेका मला²⁴नम्है फैदा गे हूँ लिखकी रई। नाम हूँ उजगो लेखर'ओत, एन्देरगेका ने नम्है उर्बस येसु मसीसिन केचकर ती उज्जताचस आसिन असरा नन्दत।
- 25येसुस नम्है अक्का-बलका गुट्ठी गे खे'आ गे चितारस, अरा नमन उजगो आल कम'आ गे केचका ती उज्जा चोच्चस।



रोमी 5

- 1 औंगे नाम पत्त'अना ती उजगो आल मन्तारदत, होले नम्है उर्बस येसु मसीस ती धर्मस गने ओक्कना इजना र'ई।
- 2 येसुस नमन नम्है पत्त'अना चड्डे ई पुना नता नू ओन्द्रकादस एका इय्या नाम धर्मसी मया आबोन लखदत। धर्मस आसी महबा आबोन नमा गे खट्टोस, ई असरा ती नाम रिझदत।
- 3 अरा ईद ती लेका मला नाम नम्है खिलपत नू हूँ रिझदत। एन्देरगेका नाम अखदत का खिलपत ती सहना,
- 4 सहना ती चोखा उरखना, अरा चोखा उरखना ती असरा मनी।
- 5 असरा ती लज्जे मोखरना मल मनी, एन्देरगेका धर्मस नमा गे चिच्का नेम्हा बोलतस ती तंग्हे चोन्हा आबोन नम्है जिया नू चाचकादस।
- 6 एकाबारी नाम नमन नाड़ा पोल्ला लिक्कत, खनेम मसीस ठौका बेड़ा नू नम्है पाप गे केच्चस।
- 7 उजगो आलस गे बग्गे आलर तंग्हे जियन चि'आ मल बेद्दनर। अन्नु हों मना उंगी का दौ आलस गे नीकईम खे'आ गे डिढ ननोस।
- 8 लिकिन नाम पपहा र'अना बेड़ा नू मसीस नमा गे केच्चस। इत्रु ती धर्मस नम्है मइय्याँ ता तंग्हे चोन्हन दहदर नन्दस।
- 9 अक्कु गा नाम मसीसी खेंस ती उजगो मंजका र'अदत होले आस नमन धर्मसी खीस ती नाड़ोस दिम।
- 10 एन्देरगेका नाम धर्मसी बैरी र'ओ बारी नाम धर्मस गने आसी खद्दासी खे'अना ती निभ्रदत। अक्कुन नाम धर्मस गने निभ्रकत खने आस नमन तंग्दासी उज्जना ती दंडे ती नाड़ोस दिम।
- 11 ईद लेका मला अक्कुन धर्मस गने निभ्रनन चिच्का नम्है उर्बस येसु मसीस ती नाम धर्मस नू कोइहे रिझदत।
- 12 औंगे एकासे का ओन्टा आलस ती पाप खेखेल नू कोरचा, अरा पाप ती खे'अना मंजा। उर्मी आलर पाप नंजर खने ई लेक्खा ओर्मर मइय्याँ खे'अना मंजा।
- 13 मूसासी पेसका चि'अना ही मुन्द दिम पाप खेखेल नू रहचा। लिकिन पेसका मल र'अना ती पाप ही लेखरना मल मना लिया।



14 आदमसी परिया ती मूसासी परिया गूटी आलर आदमस धर्मसी पेसकन चाड़ियस आ लेक्खा आर हूँ पेसकन चाड़ियर ती पाप मल नंजर। अन्नु हूँ आर खेअना बारिम रहचर। ई आदमस खोखा बरचस आ मसीसी कटइसकेम चिन्हा र'अदस।

15 लिकिन आदमसी अक्का-बलका गने धर्मसी मया ही इनाम जोक्खा मल्ला। ओर्त आलासी अक्का-बलका ही चड्डे कोइहे आलर केचर। लिकिन धर्मसी मया कोइहे कोहाँ र'ई, धर्मसी मया ही इनाम उज्जना आबोन ओर्त आलस येसु मसीसी मया ती कोइहे आलर खक्खियर।

16 ओर्त आलासी पाप अरा धर्मसी मया ही इनाम नू एन्द्रा हूँ जोक्खा मलकी। ओर्तोसी पाप चड्डे दंडे गा चितारा। लिकिन नाम अजम अक्का-बलका गुट्ठी नंजका ती हूँ धर्मसी मया इनाम नमा गे चितारा, अत्रु ती नाम धर्मसी ऐरना नू उजगो मन्दत।

17 ओर्त आलस पाप नंजस, ई ओर्त आलस चड्डे खेअना ओर्मा आलर मइय्याँ राजी नंजा। लिकिन एका ओर्तर एका बग्गे धर्मसी भरपूर मया अरा आसी इनाम ही उजगो आबोन खक्खनर, आर मानिम नू मानी उज्जनन खक्खकी ओर्त आलस येसु मसीस ती राजी ननोर।

18 औंगे आदमसी ओन्टे लेका अक्का-बलका ओर्मा आलर गे खेअना ही दंडे आबोन ओन्दरा। ओन्टा दौ नलख एकदा मसीस नंजस, ईद ओर्मा आलारिन धर्मस गने उजगो कम'आ ऊंगी। अरा ईद जनमजुग उज्जनन ओन्द्र'ई।

19 एकासे का ओर्त आलस धर्मसिन मल मन्नना ती कोइहे आलर पपहा मंजर केरर। अन्नेम ओर्त आलस धर्मसिन मन्नना ती कोइहे आलर उजगो मन्न'ओर क'ओर।

20 आलर तमन एवंदा पपहा र'अनर अदिन अख'आ गे आर गे धर्मसी पेसका चितारा। लिकिन आलर अउरिम कोइहे पाप नंजर अरा धर्मसी मया हूँ कोइहे मंजा।

21 पाप खेअना ती राजी नंजा। ई लेक्खा धर्मसी चोन्हा हूँ उजगो ती नम्है उर्बस येसु मसीस ती जनमजुग ही उज्जनन ओन्द्र'आ गे राजी ननी।

रोमी 6

1 औंगे नाम एन्देर सोच'ओत? नाम पाप नन्ते बारिम र'ओत का, होले धर्मसी मया अउरिम कोइहे मनो का?

2 कहियोँ मला! मानिम नू अन्ने नन्ना मल्ला। नाम गा पाप नन्नन अम्बकत ती पाप नना गे केचकत केरकत, खने नाम अउरिम पाप नन्ते उज्जा पोलदत।



- 3 नीम इदिन बलदर का एकाबारी नाम नोइरकत नाम ओर्मर मसी येसुस नू मेसरकत अरा नम्है नोइरना नू आसी खे'अना नू मेसरकत?
- 4 इकला नाम नोइरकत नाम मसीस गने माइरकत अरा आसी खे'अना नू मेसरकत। होले एकासे मसीस बंगासी महबा ती निन्द्रका कोइहे सवंग ती केचका ती उज्जा चोचस, अन्नेम नाम हूँ ओन्टा पुना उज्जना उज्जा ओंगदत।
- 5 ई बेसे नाम मसीसी खे'अना नू मेसरकत होले दिम आसी गने उज्जा चो'ओत।
- 6 नाम अखदत का नम्है पच्चा आल सुबहा मसीस गने क्रुस नू केच्चा। खने नम्है पाप सुबहा नम्है मइय्याँ राजी पुल्ली नना अरा नाम इकला हूँ पाप ही जौख मल मनोत।
- 7 एन्देरगेका एकास केचस आस पाप ही तबे ती अम्बरदस।
- 8 नाम मसीस गने केचकत केरकत होले नम्है पत'अना ईद र'ई का आसी गने उज्जोत हूँ।
- 9 नाम गा अखदत का मसीस केचका ती उज्जा चोचकादस। आस अउर कहियोँ मल खे'ओस। खे'अना आसी मइय्याँ सवंग नना पुल्ली।
- 10 इकला आस केचस, आस पाप ही सवंग आबोन पिटा गे ओंगहोल लेका केच खच्चियस। लिकिन अक्कु आस उज्जदस आस धर्मस गे उज्जदस।
- 11 नीम हूँ निमन पाप ही सवंग गे केच खच्चिका अरा मसी येसुस नू धर्मस गे उज्जना अखके।
- 12 ओँगे नीम निम्है नठारना मेद नू पापन राजी नना अमके चि'आ अरा अदही चिबाखारना ही तबे नू अमके मना।
- 13 नीम निम्है मेद ही अंग गुट्ठिन मलदौ ही कमहइ मना गे पाप गे अमा थोप'आ। ऊजी नू निमन धर्मस गे थोप'आ। एन्देरगेका नीम केचकर केरकर, लिकिन अक्कु निमा पुना उज्जना र'ई। ओँगे निमा मेद ही अंग गुट्ठिन दौ नन्ना कमहइ बेसे धर्मस गे बउर'आ।
- 14 पाप निमा उर्ब मल र'ओ, एन्देरगेका नीम अक्कु पेसका ही तबे नू मल र'अदर, लिकिन धर्मसी मया ही तबे नू र'अदर।
- 15 होले नाम एन्देर ननोत? नाम पेसका ही तबे नू मल र'अदत अरा धर्मस नमन आसी मया आबोन ऐददस, खने नाम पाप नन्ते र'ओत का? कहियोँ मला।
- 16 नीम मानिम अखदर का नीम निमन एका ओर्तस गे मन'आ गे बिट्ठी ननू जौखस बेसे चि'अदर होले मानिम नीम आ आलासी बिट्ठी ननू जौख र'अदर। अन्ने नीम पाप गे बिट्ठी ननू



जोंख र'अदर होले, अदही बनी खे'अना र'ई मलता नीम धर्मसिन मनदर होले आद निमन उजगो कम'ई।

17 धर्मसी धन्यवाद नन्दन का नीम गा मुन्द पाप ही बिट्ठी ननू जोंख रहचकर, लिकिन अक्कु नीम मानिम नू आ सिखाब'अना ही डहरे नू ऐका हेरकर, एकदन ऐम निमा सिखाबाचकम।

18 अक्कु नीम पाप ही जोंख ती अम्बरकर ती उजगो उज्जना ही जोंख मंजका केरका र'अदर।

19 ऐन निम्है मैद सुबहा पयहा चड्डे निमन सेब्बा ती बुझ'आ गे ई कथन ब'अदन। नीम मुन्द निम्है मैद ही अंग गुट्ठिन पाप अरा मलदौ गे जोंख मना चिचकर, अरा नीम मलदौ गे लेका उज्जकर। अन्नेम नीम निमन उजगो उज्जना ही जोंख मना गे चि'अना मनो। एकत्रु नीम नेम्हा मनोर क'ओर।

20 इकला नीम पाप ही जोंख रहचकर, उजगो मन्ना ही तबे नू मल रहचकर।

21 नीम मलदौ नलख गुट्ठी नंजकर अरा अक्कु अदही चड्डे निमा लज्जे मनी। अबड़ा कथा खे'अना लेका ओन्द्र'ई।

22 लिकिन अक्कु नीम पाप ही सवंग ती अम्बरकर ती धर्मसी बिट्ठी ननू जोंखर मंजका र'अदर। ईद निमन नेम्हा उज्जा गे कइहाब'ई। एकदा ही खंजपा र'ई जनमजुग ही उज्जना।

23 एन्देरगेका पाप ही बनी गा खे'अना र'ई, लिकिन धर्मसी मया ही इनाम उर्बा मसी येसुस नू जनमजुग उज्जना र'ई।

रोमी 7

1 अना भईरो, मूसासी पेसका ही पत नू अख'ऊ आलर निमा गे ऐन ब'अदन। नीम अखदर का पेसका आलारिन आर ही उज्जना गूटी दिम आकुस ननी।

2 एकासे का ओन्टा आली तंग'आलस गने आसी उज्जना गूटी हीरकी र'ई। लिकिन तंग'आलस खे'अदस कादस होले आद बैज्रका नेग ती अमब्र'ई क'ई।

3 लिकिन आद तंग'आलासी उज्जनुम उज्जनुम नन्नर ही मुक्का मनो होले आद नन्ना आलस गुसन कालू आली बार'ओ। लिकिन तंग'आलस खे'अदस कादस होले आद बैज्रका नेग ती अमब्र'ई क'ई। अरा आद नन्ना आलासी मुक्का मनी होले आद नन्ना आलस गुसन कालू आली मल्ली।

4 ई लेक्खम अना एंगहै भईरो, निमा पच्चा आल सुबहा मसीस गने पेसका ही सवंग गे केच्चा केरा। अरा अक्कु नीम एका ओर्तस केचका ती उज्जा चोचस आसी गने मेसरकत। ई चड्डे नाम दौ नलख ही दौ खंजपा धर्मस गे चि'आ ओंगदत।



- 5इकला नाम नम्है पाप सुबहा ही तबे नू रहचकत खने पाप ही चिबाखारना नम्है नू नलख नंजा। अरा एमा ई पाप ही चिबाखारना पेसका ही सवंग ती एमा गे खे'अना ही खंजपा ओन्द्र'आ लगिया।
- 6लिकिन अक्कु नम्है मइय्याँ पेसका राजी मल ननी। नाम अदगे केचका आलर बेसे र'अदत अरा ईद नम्है मइय्याँ सवंग नना पुल्ली। अक्कु नाम पच्चा नेगन पेसना ती मला नेम्हा बोलतासिन पेसना ती धर्मेसिन पुना घत ती तेतर-सुसर नना ओं'दत।
- 7होले एन्देर नाम ब'आ ओं'दत? पेसका मलदौ हवे का? कहियोँ मला! एकासे का नेग मल रहचा होले ऐन पापन बल्लोन दने। नेग नन्नर ही आलोन चिबा अमके खार'आ मल बाचका होले चिबाखारना पाप हवे अदिन ऐन बलका र'ओन दने।
- 8लिकिन पेसका र'अना ही चड्डे अदिन चाड़ा गे पाप उर्मी रकम ही चिबाखार'आ गे एंगन इज'ई। नेग मलका नू पाप ही आ सवंग मल र'ई।
- 9मुन्द ऐन नेग आबोन बलना ती उज्जा लिक्कन। लिकिन इकला नेग ही पेसका एंगहै नू बरचा खने पाप सवंग गने चोच उज्जा हेलरा।
- 10अरा ऐन केचका बेसे मंजकन। ओं'गे एंगहा ऐरना नू एन्ने लगिया का पेसका उज्जनन ओन्द्रना रहचा, लिकिन एंगा गे खे'अनन ओन्द्रा।
- 11पाप गा अबड़ा पेसका र'अना ही चड्डे अदिन चाड़ा गे मोका बिद्दया ती एंगन ठकचा अरा पेसका ती एंगन पिटिया चिच्चा।
- 12नेग नेम्हा र'ई अरा अदही पेसका नेम्हा अरा ठौका अरा दौ र'ई।
- 13एन्ने होले एका कत्था दौ रहचा, आदिम एंगा गे खे'अनन ओन्द्रा का? कहियोँ मला! ईद पाप ही नलख हिके। पापन पाप एन्ने ऐद'आ गे एका नेग दौ रहचा, अत्रु तिम पाप एंगा खे'अना ही ओदहा मंजा। खने पेसका इदिन दहदर ननी का पाप एका कोइहे मलदौ र'ई।
- 14नाम अखदत का नेग धर्मेसी बोलता ती बर'ई। लिकिन ऐन गा मेद सुबहा आल हिकदन, पाप गे बिट्ठी ननू जोंख बेसे बीसरका र'अदन।
- 15ऐन एकदन नन्दन अदिन ऐन बुझुर'आ पोलदन। एन्देरगेका ऐन नना बेद्ददन अदिन मला, एकत्रु ऐन खॉइदन अदिनिम नन्दन।
- 16ऐन मल नना बेद्ददन अदिन नन्दन होले, ऐन हुकमारदन का नेग दौ हिके।
- 17लिकिन मानिम नू इबड़ा मलदौ नलखन ननू ऐन मलदन, एंगहै नू मइचका पाप इबड़न ननी।



- 18 ऐन अखदन का एंगहै नू एन्द्रा हूँ बेस मल मड़ई। मड़ऊ गा एंगहै पाप मेद सुबहा। एंगा बेस नलख नन्ना ही मने गा रई। लिकिन अबइन ऐन नन्त आ पोलदन।
- 19 ऐन एका दौ आबोन नना बेद्ददन अदिन मल नन्दन, लिकिन एका मलदौ आबोन नना मल बेद्ददन अदिनिम नन्दन चिअदन।
- 20 औंगे ऐन मल नना बेद्ददन अदिनिम नन्दन होले, अबइन ननू ऐन मलदन एंगहा नू मड़ई पाप अबइन ननी।
- 21 औंगे एंगहै अखना ईद रई, एकाबारी ऐन दौ नना बेद्ददन होले एंगहै नू रई आ मलदौ एंगन दौ नना मल चिई।
- 22 एंगहै जिया नू ऐन धर्मेसी नेग आबोन पतारदन।
- 23 लिकिन ऐन एंगहै मेद ही अंग गुट्ठी नू मेद सुबहा नलख ननी अदिन अगमअदन। ईद एकदन ऐन जिया नू पतारदन आ धर्मेसी नेग गने बिच्छानखई। मेद सुबहा एंगहै मेद नू नलख ननी आद पाप ही नेग हिके। अरा आद एंगन अदही गुड़रका कमई।
- 24 ऐन करम फटरका आलन हिकदन। खेअना नू होऊ ई कया ती एंगन ने नाड़ोर?
- 25 धर्मेस दिम नम्है उर्बस येसु मसीस ती नाड़ोस। ऐन धर्मेस गे धन्यवाद चिअदन। खने एंगहा जिया नू ऐन धर्मेसी नेग ही जोख रअदन, लिकिन एंगहै मेद सुबहा ती ऐन पाप ही नेग ही जोख हिकदन।

रोमी 8

- 1 औंगे अक्कु ने मसी येसुस नू रअनर आर गे एन्द्रा हूँ दंडे पेसका मल्ला।
- 2 एन्देरगेका नेम्हा बोलतासी नेग एकदा मसी येसुस नू उज्जना चिई, आद निंगन पाप दरा खेअना ही नेग ती नाड़की रई।
- 3 नमा पाप मेद सुबहा ही चड्डे मूसासी नेग लेड़पोयहा मंजा, खने आद तंगहै नलखन मुंज खच्चा गे पोल्ला। लिकिन धर्मेस गा अदिन नंजस एकदा मूसासी नेग नना पोल्ला। आस तंगहै खद्दासिन नाम पपहर ही कया बेसे ता कया नू पाप दाँडे चिआ गे तइय्यस। ई बेसे धर्मेस ओन्टा आल कया नू पाप आबोन दंडे चिच्यस।
- 4 धर्मेस इदिन इदगे नंजस का पेसका नम्है एकासे उज्जनन बिद्दी अन्ने नाम उज्जा आंगदत। अक्कु नाम मेद ही सुबहा लेक्खा मलकी लिकिन बोलतासी मने लेक्खा उज्जदत।



- 5एन्देरगेका एका ओर्तर पाप मेद सुबहा लेक्खा उज्जनर, आर पाप मेद सुबहा ही चिबाखारना नू तम्है मने नन्नर। लिकिन एका ओर्तर बोलतासी सुबहा लेक्खा उज्जनर, आर बोलतस पतारदस अइय्या तम्है मने नन्नर।
- 6आलर ही मने पाप सुबहा ही तबे नू र'ई होले आर खे'अना तरा कानर। आलर ही मने बोलतस ही तबे नू र'ई होले आर उज्जना अरा कोड़े तरा कानर।
- 7एन्देरगेका इकला आलर ही मने पाप मेद सुबहा ही तबे नू र'ई, आर धर्मसी बिड़दो नू र'अनर। आर धर्मसी नेग आबोन मल पेसनर, अरा पेस'आ हूँ पोलनर।
- 8एकार पाप मेद सुबहा ही तबे नू र'अनर आर धर्मसिन रिझाब'आ पोलनर।
- 9लिकिन नीम पाप मेद सुबहा ही तबे नू मल र'अदर। अरा धर्मसी बोलता निम्है नू मड़'ई होले, नीम बोलतस ही तबे नू र'अदर। एका ओर्तस नू मसीसी बोलता मलकी होले आस मसीसी मलदस।
- 10लिकिन निम्है नू मसीस र'अदस होले ओन तरती निम्है कया गा पाप ही चड्डे किचकी र'ई, लिकिन नन्ना तरती निम्है बोलता गा उजगो मन्ना चड्डे उज्जी।
- 11एकास येसुसिन केचका ती उज्जताचस, आसी बोलता निम्है नू मड़'ई होले, एकास मसी येसुसिन केचका ती उज्जताचस आस एकदा निम्है नू मड़'चकी र'ई आ तंगहै बोलता ती निम्है नठारना कयन उज्जत'ओस।
- 12औंगे अना भईरो! नाम पाप मेद सुबहा लेक्खा उज्जा गे नहड़ा मल्ला मोक्का।
- 13नीम गा पाप मेद सुबहा ही लेक्खा उज्जोर होले केच खचोर। लिकिन नीम नेम्हा बोलतासी सवंग ती पाप मेद सुबहा ही नलखन मल ननोर होले नीम मानिम उज्जनन खक्ख'ओर।
- 14ने धर्मसी बोलता ही कड़हाब'अना नू ऐकनर आर ओर्मर धर्मसी खद्द-खर्रा हिकनर।
- 15निमा जोंख मंज खचचना ही बोलता मल्ला खक्ख्रका का अन्ति नीम अत्रु मुन्द लेक्खा एल्चोर। लिकिन नीम धर्मसी बोलतन खक्खकर इकला आस निमन तंगहै खद्द-खर्रा बेसे गढ़चस। अक्कु नाम आसिन “अना बबा, अना बंग” ब'अदत।
- 16नाम धर्मसी खद्द-खर्रा एन्ने नेम्हा बोलतस नम्है बोलता गने मेसर'अरकी तेंगदस।
- 17अरा नाम धर्मसी खद्द-खर्रा होले नाम आसी पुंजी हूँ हिकदत। अरा मसीस गने धर्मसी खक्ख्र'ऊ मईन आबोन खक्ख'ऊ पुंजी हिकदत। नाम गा मसीस गने दुक्खे चौददत होले मसीस गे खक्ख्रना आ मईन नू हूँ आसी गने र'ओत।



- 18 ऐन बुझदन का नाम एका महबा हुल्लो नू खक्ख'ओत, अदही जोक्खा नू ई परिया ता नमा दुक्खे र'अम मलकी बेसे र'ई।
- 19 एन्देरगेका गोट्टा खेखेल ता गढ़रका आलो कोहाँ असरा ती धर्मस ने ने तंगहै खद्दस एन्ने दहदर ननोस अदिन ऐरा गे पाब ऐरा लगी।
- 20 ई गढ़रका ओर्मा तंगहै जोगे नू ती पयहा मंजा केरा। इबड़ा तम्है मने ती मला, लिकिन धर्मसी चिताबुता ती एन्ने पयहा मंजा। लिकिन ई असरा हूँ र'ई का,
- 21 इबड़ा गढ़रका ओर्मा एकदा नठारनन ओन्द्र'ई अदही तबे ती नाइर'ओ ती धर्मसी खद्दर ही खक्ख'ऊ मईन नू मेस'ओ।
- 22 एन्देरगेका नाम अखदत का गोट्टा गढ़रका अक्कु गूटी खद्द नेब्बना ही बेड़ा नू मन्ना नुंजना लेक्खा नुंजना ती रेक'आ लगी।
- 23 ई खेखेल लेका मला, लिकिन नाम हूँ पाब ऐरना ती भितरी भितरी रेक'आ लगदत। नाम गा नेम्हा बोलतासिन खक्खकादत एकदा धर्मसी गच्छरका ही पहिल खंजपा हिके। आँगे नाम धर्मसी गोद होच्चका खद्द मंज खच्चना ही पाब ऐरा लगदत। इदही माने का नम्है कया पाप अरा खिलपत ती नाइरना।
- 24 ई असरा ती दिम नम्है नाइरना मंजकी र'ई। एकदन नाम पाब ऐरा लगदत अदिन नाम ऐरदत होले आद मानिम नू असरा मल्ली। ने हूँ तंगहै गुसन एका जिनस र'ई अदही असरा मल ननी।
- 25 लिकिन अक्कुन गूटी नमा एकदा मल्ला अदही असरा नन्दत होले नाम कयास गने अदही पाब ऐरा लगदत।
- 26 ई लेक्खा नेम्हा बोलतस हूँ नम्है लेइपोयहा नू संगरा नन्दस। एन्देरगेका नाम बलदत का नमा बिन्ती एकासे नन्ना र'ई। लिकिन नेम्हा बोलतस तानिम नीखचारना ती एकदन कत्था ती ब'आ पोल्लर'ई, आस नमा गे धर्मसिन गोहरारदस।
- 27 धर्मस आलर ही जिया ही सोच आबोन अखदस। अरा आस नेम्हा बोलतासी मने एन्देर र'ई अदिन अखदस। एन्देरगेका नेम्हा बोलतस नेम्हा आलर गे धर्मसी मने लेक्खा धर्मसिन गोहरारदस।
- 28 नाम अखदत का एकार धर्मसी चिताबुता ती मेखरका र'अनर अरा आसिन चोन्हा नन्नर, आर गे धर्मस आर ही दौ गे दिम उर्मीन नन्दस।
- 29 धर्मस आरिन हुल्लु तिम अक्खस, अरा आस आरिन तंगहै खद्द बेसे मना गे ओट्टा ओकताचस। होले येसुस बग्गे भई बहिनर नू जेट्ठा मना आँगोस।



30 आस नेकन मुन्द तिम ओट्टा हेंचस आरिन मीखका हूँ रहचस। अरा नेकन मीखियस आरिन उजगो आल हूँ कमचस। अरा नेकन उजगो आल कमचस आरिन तंग्हे महबा नू भागी मना गे हूँ चिच्चस।

31 तहाँ नाम इबड़ा कत्था ही पत नू एन्देर ब'ओत? धर्मस नम्है तरा र'अस होले, नम्है बिड़दो ने मना ओंगोर?

32 धर्मस तंग्हे खद्दासिन हूँ मल अम्बियस, आसिन नमा ओर्मर गे थोपचस चिच्चस। होले इवंदा चिच्का खोखा हूँ आस एकासे नमा गे तंग्हे खद्दासिन चिच्चस अन्नेम नम्है उर्मी चाड़न सिथियम चि'ओस।

33 नेकन धर्मस चज्जिकादस, आरिन ने दोस ठेकाब'आ ओंगोर? ने हूँ पोल्लोर, एन्देरगेका धर्मस दिम आरिन उजगो आल नंजकादस।

34 आरिन ने नैवई ननरकी दंडे चि'आ उंगी? ने हूँ पुल्ली, एन्देरगेका मसी येसुस दंडे खक्खियस ती केचस। लिकिन आस गा केचका ती उज्जा चोचस, अरा आस अक्कु धर्मसी तीना पक्खा उक्कियस ती नमा गे गोहरारते र'अदस।

35 एन्देर लो नमन मसीसी चोन्हा ती छिंडा उंगी? सस्ती महले कलपारना महले दुक्खे मोखरना महले कीड़ा महले अतना कुन्द्रना मलका नू र'अना महले अपलोक महले खे'अना एन्देर नमन छिंडा उंगी?

36 एकासे का नेम्हा पुथी नू लिखकी र'ई, “निंगा चड्डे गा ऐम गोट्टा उल्ला नू खे'अना ही अपलोक नू र'अदम, अरा आलर ती ऐम पिटरना भेंडो लेक्खा बुझुरदम।”

37 लिकिन इबड़ा उर्मी कत्था गुट्ठी नू नाम धर्मस ती एकास नमन चोन्हा नंजकादस जितनन खक्खका ती हूँ कट्टिका र'अदत।

38 एन्देरगेका ऐन निचट अखदन का खे'अना मलता उज्जना अरा मेर्खा पैकर मलता उर्ब ननू नाद गुट्ठी अरा अक्कु ता मलता बरना उल्ला ता मन्ना कत्था मलता एकअम सवंग,

39 मेर्खा मइय्याँ ता आलो मलता खेखेल खोंइखा ता आलो ही सवंग, अरा एकअम इन्द्रिइम नन्ना गढ़का आलो नमन धर्मसी चोन्हा ती एकदा नम्है उर्बस मसी येसुस नू र'ई छिंडा पुल्ली।

रोमी 9

1 ऐन मसी नू मानिम ब'आलदन, ऐन ठकना कत्था मल ब'अदन, एंग्हे लखना हूँ नेम्हा बोलतस नू एंगा इदिन बड़ियर ननी,



- 2का एंग्हे जिया कोइहे दुक्खे रई अरा सगर घड़ी ऊली।
- 3ऐन एंग्हे भईर बहिनर एंग्हे जातियर गे संगरा नना गे बेद्ददन। आरिन नाड़ा गे ऐन तानिम सरपारना अरा मसीस ती ओथ्रतारना काना मनो होले हूँ अदिन सह'आ गे सपड़ारकादन।
- 4आर इस्राएल आलर हिकनर, अरा धर्मसी गोद उइयका खद्दर हिकनर। अरा आर धर्मसी महबा आबोन ईरका र'अनर। अरा आर गे धर्मसी अरा तम्है गने ता धर्मसी गच्छरना रई। अरा धर्मस आर गे चिच्का मूसासी पेसका अरा महबा नन्ना ही नेग अरा गच्छरना गुट्ठी रई।
- 5आर अब्राहमस, इसाक, याकोबसी जईपुई हिकनर, अरा आर ही बनस ती दिम कया नू मसीस हूँ कुन्द्रस। ईस दिम उमी ती कोहाँ धर्मस, ईसी दिम हुल्लो ती हुल्लो गूटी ओहमा मनन। आमेन।
- 6इदही मने ईद मल्ली का धर्मस तंग्हे गच्छरनन पूरा मल नंजस। इदगेका इस्राएल ही बनस ती बरचका ओर्मर मानिम इस्राएल आलर मलनर।
- 7अन्नेम अब्राहमसी बनस नू कुन्द्रना ती आर जम्मर आसी मानिम खद्दर मल मन्नर। एन्देगेका धर्मस अब्राहमसिन तिंंगयस, “इसाक ती कुन्द्रकर दिम निंग्हे जईपुई लेखर'ओर।”
- 8इदही माने ईद हवे का अब्राहमस गे मेद सुबहा ती कुन्द्रका खद्दर धर्मसी खद्दर मलनर, लिकिन धर्मसी गच्छरका ती कुन्द्रनर आर लेका अब्राहमसी जईपुई लेखरनर।
- 9एन्देगेका अब्राहमस गे गच्छरका ईद रहचा, “ठौका बेड़ा नू ऐन किर्रोन अरा सारा ही ओन्टा खद्दस र'ओ।”
- 10अरा ईद लेका मला, रेबेक्का ही ओदर नू ओर्त आलस नम्है पुरखस इसाक ती जवा खद्दर मंजर।
- 11-12दुयो खद्दर अक्कु गूटी कुन्द्र'आ हूँ मल कुन्द्रका रहचर। धर्मस रेबेक्का ती बाचस, “जेठ्ठा खद्दस सन्नी खद्दासी जोंख मनोस।” ईद गा खद्दर इन्द्रिम दौ महले मलदौ मल नंजका रहचर अदही मुन्द बातारा। धर्मस इदिन इदगे बाचस का एकास चज्जरदस आस धर्मसी चितापूता गे चज्जरदस। एकदा आलर ही दौ नलख ती मला लिकिन मीखुसी मने ती मनी।
- 13औंगे नेम्हा पुथी नू लिखकी रई, “ऐन याकोबसिन चोन्हा नंजकन लिकिन एसावसिन दुस्सकन।”
- 14तहाँ नाम एन्देर ब'ओत? एन्देर धर्मस भितरी बहरी मनदस का? कहियोँ मला।
- 15एन्देगेका आस मूसासिन ब'अदस, “ऐन नेख'आ मइय्याँ चोन्हा नना बेद्ददन आसिन चोन्हा ननोन। अरा नेख'आ मइय्याँ सोग्गे ऐरा बेद्ददन आरिन सोग्गे ऐरोन।”



- 16 औंगे ईद आलर ही मने ती मला महले आलर ही तिहा ती मला। धर्मस नेख'आ मइय्याँ सोग्गे ऐरा गे मने नन्दस आरिन आस चाज्जदस।
- 17 एन्देरगेका नेम्हा पुथी नू लिखकी रई का धर्मस मिसर राजी ही बेलस फारओसिन ब'अदस, “ऐन निंगन इदगे बेल कमचकन का निंगहै मइय्याँ एंगहै सवंगन ऐद'ओन ती एंगहै नामेन गोटा खेखेल नू बीड़'ओन।”
- 18 औंगे धर्मस नेकन सोग्गे ऐरा गे मने नन्दस आसिन सोग्गे ऐरदस, अरा नेकन बेड़हा नना ही मने नन्दस आसिन बेड़हा नन्दस।
- 19 औंगे निम्है ती ओर्तोस एंगन ब'ओर, “तहाँ धर्मस एन्देरगे एमन गुन्हा ठेका ब'अदस? ने आसी मने ही बिड़दो नना उंगी?”
- 20 अना आलायो! नीन एका ओर्तय? नीन आल लेका र'अदय, नीन धर्मसिन आनाकिर्त'ओय का? ओन्टा गढचका आलो गढ'उसिन ब'आ उंगी का नीन एंगन एन्ने एन्देरगे गढचकय?
- 21 एन्देर कुंमहरस गे अपन आकुस मल्ला का आस उनिम लोन्दा खज्जो ती ओन्टा संजगी मईन गे अरा ओन्टा बिगर महबा गे कम'ओस?
- 22 ई लेक्खम धर्मस हूँ तंगहै खीस ऐद'आ गे अरा तंगहै सवंगन दहदर नन्ना ही मने रई। लिकिन आस आलर ही मइय्याँ तंगहै कोइहे कयास नंजस एकार आसी खीस ही संजगी रहचर एकाबड़ा नठाब'आ गे सपड़ाचका रहचा।
- 23 आस एन्ने कोइहे कयास नंजस का ने आसी सोग्गेन इंझकर आर आसी कोइहे महबा आबोन ऐरा ओंगोर। आस आरिन मुन्द तिम आ महबा गे सपड़ाचस।
- 24 ऐम हूँ एन्ने मेखरका आलम र'अदम। यहूदीर ती लेका मला नन-यहूदीर गुट्ठी ती हूँ एमन आस मीखका र'अदस।
- 25 अन्नेम धर्मसी कत्था तिगू होसेसी पुथी नू धर्मस ब'अदस, “एका ओर्तर एंगहै आल मल रहचर आरिन एंगहै आल ब'ओन, अरा एका ओर्तारिन ऐन चोन्हा मल नना लिक्कन आरिन ऐन चोन्हा ननोन।”
- 26 “नीम एका अड्डा नू एंगहै आल मलनर बातारकर, आ अड्डा नुम नीम उज्जना धर्मसी खदर बातार'ओर।”
- 27 धर्मसी कत्था तिगू यसायास इस्राएल आलर ही पत नू चिच्चियारनुम आनदस, “इस्राएल आलर समुदर ता चलकुर लेक्खा बग्गे र'अनर, अन्नु हूँ अइय्या ती जुक्किम आलर नाइर'ओर।



- 28 एन्देरगेका धर्मस बड़ियर लगे अरा लेम खेखेल नू तंगहै नैवई ननोस।”
- 29 धर्मसी कत्था तिगू यसायास अउरिम बाचस, “फउदर ही उर्बस नमा गे जोक्क बनसन उज्जना मल अम्बका होले, नाम सोदोम अरा गोमोरा नगरे बेसे नठार खच्चिका रओत दने।”
- 30 होले नाम एन्देर बओत? नन-यहूदीर उजगो मन्नन मल बेद्दा कुद्दालियर, लिकिन आर तम्है पतअना ही चड्डे उजगो मंजर।
- 31 इस्राएल आलर गा उजगो मना गे नेगन पेस्र ती पूरा नना गे बेद्दा कुद्दालियर, लिकिन अदिन आर मल खक्खियर।
- 32 एन्देरगे मल खक्खियर? एन्देरगेका आर पतअना ती मला लिकिन तम्है नलख गुट्ठी ती अदिन खक्खा बेद्दालियर। अरा आलारिन मूडना ही पखना नू मुड्डियर।
- 33 एकासे नेम्हा पुथी नू लिखकी रई, “ऐरा, ऐन येरुसलेम नू ओन्टा पखना उइय्कन आद आलारिन मूडतओ, ईद आरिन टिडना ही चचडी हवे। लिकिन ने आसी मइय्याँ पतओर आर लज्जे मल मोखरओर।”

रोमी 10

- 1 अना भईरो! एंगहै जिया ही चिबाखारना अरा धर्मसिन एंगहै गोहरारना ईद रई का इस्राएल आलर नाइरना खक्खना रई।
- 2 ऐन आर ही पत नू ई गोवाह चिआ ओंगदन का आर ही मइय्याँ धर्मस गे इन्द्रिम नन्ना ही मने गा रई। लिकिन आर ठौका इहरेन बलनर।
- 3 एन्देरगेका धर्मस आलारिन एकन्ने उजगो कमदस अदिन आर बल्लर, अरा आर तमन तम्है मने ती उजगो नना गे चिहुट नंजर। खने आर धर्मस तमन उजगो नना गे मल चिचर।
- 4 एन्देरगेका धर्मस एन्देर गे नेग चिचस अदही मनेन मसीस पूरा नंजस, ओंगे एका ओर्तर मसीसिन पतओर आर उजगो मनतारओर।
- 5 मूसस नेग लेक्खा उजगो मन्ना ही पत नू लिखदस, “एका ओर्तस इबड़ा नेग नू बाचका उर्मी कत्थन पेस्रओस आस गे इत्रु ती उज्जना खक्खओ।”
- 6 लिकिन पतअना ती उजगो मन्ना इदिन बई, “नीम निम्है जिया नू एन्ने अमा सोचआ का ‘ने मेर्खा कओ?’ अन्ति मसीसिन किय्या ओन्द्रआ गे।
- 7 महले ‘ने खोइखा गड्डी नू एत्तो?’ अन्ति मसीसिन केचका ती मइय्याँ ओन्द्रआ बरआ गे।”



- 8 लिकिन नेम्हा पुथी एन्ने बई, “कत्था निम्है हेददे रई, बई नू अरा जिया नू रई।” ईद पत'अना ही कत्था हवे, एकदन ऐम तेंगा कुददम।
- 9 एन्देरगेका नीम निम्है बई ती “येसुस दिम उर्बस” ब'अना ती धर्मस आसिन केचका ती उज्जताचस एन्ने निम्है जिया नू पत'अदर होले, नीम नाइर'ओर।
- 10 एन्देरगेका जिया ती पत'अना चड्डे आलस उजगो मन्दस अरा बई ती तंग्हे पत'अनन तेंगरना चड्डे नाइरदस।
- 11 नेम्हा पुथी एन्ने बई, “ने तंग्हे आसी मइय्याँ पत'ई आस गे लज्जे मोखरना मल मनो।”
- 12 यहूदीर अरा नन-यहूदीर नू एन्देर हूँ भोड़ मलकी, ओर्मर ही ओन्टे लेका उर्बस र'अदस। आसिम सहाड़ा गे आसिन गोहरारनर अबड़ा ओर्मरिन बरकत नन्दस।
- 13 एन्देरगेका नेम्हा पुथी बई, “नीकईम उर्बासी नामे नू गोहरारनर आर नाइर'ओर।”
- 14 लिकिन आलर आसिन मल पत्ताचका होले आर नाइर'आ गे एकासे आसिन गोहरार'ओर? अबइर आसी पत नू मेना हूँ मल्ला मेंजका होले आसिन एकासे पत'ओर? ओर्त हूँ आसी पत नू तेंगा कुददु मल र'ओर होले आर एकासे मेनोर?
- 15 अरा आस मल तइर'ओस होले आस एकासे तेंगा कुददू मनोस? नेम्हा पुथी नू लिखकी रई, “दौ कत्था तिगू आलर ही खेड्डे ऐ कोडहे सुभई।”
- 16 अन्नु हूँ ओर्मा इस्राऐलर दौ कत्थन मल इंझर। होले धर्मसी कत्था तिगू यसायास एन्ने बाचस, “उर्बायो! ने एम्है कत्थन पत्ताचर?”
- 17 दौ कत्था मेन्ना ती पत'अना मनी, अरा मेन्तार'ई आद मसीसी कत्था हवे।
- 18 लिकिन ऐन मेन्दन, एन्देर इस्राऐलर दौ कत्थन मल्ला मेंजका का? आर मेंजकम र'अनर। एन्देरगेका नेम्हा पुथी बई, “आर ही सड़ा सौंसे खेखेल नू बीडूकी किरकी रई, अरा आर ही कत्था गुट्ठी खेखेल ठुट्ठु गुट्ठी गूटी अंइसिया।”
- 19 ऐन अउरिम मेन्दन, इस्राऐलर अबड़ा कत्थन मल बुझर का? आर बुझर। मुन्द गा, मूसस धर्मसी ई कत्थन ब'अदस, “निमन ऐन एकार एंग्हे चज्जिका जातियर मलनर आर ही ती इस्गा नन्त'ओन, अरा निमन ऐन एन्द्रा हूँ मल बुझर ऊ जातियर ती खीस नन्त'ओन।”
- 20 धर्मसी कत्था तिगू यसायास हूँ डिढ नंजस ती धर्मसी ई कत्थन ब'अदस, “ने एंगन मल बेद्दा लगियर अबइर एंगन खक्खियर अरा ने एंग्हे पत नू मल मेनालियर आर गे ऐन एंगन दहदर नंजकन।”



21 लिकिन इस्राएलर ही पत नू धर्मस ब'अदस, “गोट्टा उल्ला ऐन मल पेस्र'ऊ अरा हूलहूली ननू आलर तरा इङ्ग्रा आ गे खेक्खन पस्ती नंजकाचकन।”

रोमी 11

1 तहाँ ऐन मेन्दन का धर्मस तंग्हे आलारिन अम्बियस चिच्चस का? कहियोँ मला! ऐन हूँ गा इस्राएल आलन हिकदन, अब्राहमसी बनस तन अरा बेनियमिनसी गोतर तन।

2 धर्मस तंग्हे आलारिन एकदन आस मुन्द दिम चज्जिकाचस आरिन मल अम्बा खच्चियस। एन्देर नीम बलदर का? नेम्हा पुथी धर्मसी कत्था तिङ्गू एलियसी पत नू एन्देर ब'ई, एकासे आस धर्मसिन इस्राएलर ही बिड़दो नू गोहरारस।

3 “उर्बायो! आर निंग्हे कत्था तिङ्गुरिन पिटकानर आर निंग्हे गोइहा गुट्ठिन धंस्सकानर। ऐन ओर्त लेका बच्छकादन अरा आर एंगन हूँ पिटा बेद्दा लगनर।”

4 लिकिन धर्मस आसिन किर्त'अर बाचस, “ऐन सात हजार आलारिन एंगा गे बछाबाचका उइय्का र'अदन, एकार बाल नामे मूर्ती ही मुन्दहारे मूकलिद्रकर मलनर।”

5 ई लेक्खम ई परिया नू हूँ धर्मसी मया ती चज्जरका जोक्क आलर बछरकर।

6 अन्ति आस आरिन तंग्हे मया ती चाजदस होले ईद आर ही दौ नलख गुट्ठी ती मलकी। मला होले धर्मसी मया मानिम मया मल र'ओ।

7 ईद एन्ने र'ई का, इस्राएल आलर एका कत्थन बेद्दना नू रहचर अदिन उर्मीर गा पोल्तर खक्खा। लिकिन धर्मसी ती चज्जिका जोक्क आलर अदिन खक्खयर। अरा बछका आलर ही जिया बेइहा मंजा केरा।

8 एकासे का नेम्हा पुथी नू लिखकी र'ई, “धर्मस आर गे पयहा लूर आबोन चिच्चस। खने आर इन्ना गूटी तम्हे खन्न ती ऐरा पोल्तर अरा खेबदा ती मेना पोल्तर।”

9 अरा दाऊद बैलस एन्ने ब'अदस, “आर ही मदी आर गे फन्दा अरा जल्ली अरा मुइना पखना अरा दंडे ही जोगे मनन।

10 आर ही खन्न धुधरा मनन एकत्रु आर ऐरा पोल्लोरा। अरा आर ही कइमा सदौ खोलखरका र'अन।”

11 ओँगे ऐन मेन्दन, “एन्देर यहूदीर मूइना चड्डे सदौ गे नठार खच्चिकानर का?” कहियोँ मला! आर ही अक्का-बलका गुट्ठी ही चड्डे नन-यहूदीर गे नाइरना खक्खकी र'ई, एकत्रु यहूदीर नाइरना खक्खा गे हराजीता मनोर।



- 12अक्कुन यहूदीर ही अक्का-बलका सौंसे खेखेल ता आलर गे कोइहे बरकत ओन्द्रा, आर ही फोकरना नन-यहूदीर गे अजगुत मनी। होले सौंसे यहूदीर दौ कत्थन इंझका ती एवदा अजगुत बरकत ओन्द्राई।
- 13अक्कु ऐन नन-यहूदीर निमन ती ब'आलदन। ऐन गा नीम नन-यहूदीर ही तइरकन र'अना ती ऐन एंग्हे ई नलख ती फुलई नन्दन।
- 14एकअम अन्ने ऐन एंग्हे जातियारिन हराजीता मन्ना ती अरा ई लेक्खा आर ती जोक्कोर ही नाइरना ही हूँ असरा नन्दन।
- 15एन्देरगेका आर ही अम्बरना ही चड्डे धर्मसी खेखेल गने मेसना मंजकी किरकी रई, होले इकला आर ही इंझना मनो, आद केच्कारिन उज्जना ओन्द्रना बेसे र'ओ दने।
- 16लिंडका गुंडा ती पहिल दाँडे चिच्का असमा नेम्हा रई होले गोट्टा लिंडका गुंडा नेम्हा रई। अरा पादा नेम्हा रई होले डाड़ा हूँ नेम्हा रई।
- 17दौ जैतून मन्न ती जोक्क डाइन एस'अरकी तरकूटी नन्तारकी किरकी रई। अरा नीम नन-यहूदीरो! जंगली जैतून ही डाड़ा हिकदर, अदही अड्डा नू कलम नंजका हिकदर। अरा दौ जैतून ही पादा ती बर'ऊ अदही उज्जना ही रासी ही हिसा मंजकर।
- 18औंगे नीम खंड्रका आ डाड़ा गुट्ठिन खाँइना ती नीम अमा फुलई नना। एन्ने नीम सोचदर होले नीम सुरता उइय्या का नीम पादन मल सम्इ'अदर, लिकिन पादा निमन सम्इ'ई।
- 19नीम ब'आ औंगोर डाइन खंडरकी इदगे तरकूटी नंजका रई का एंगन कलम लगा बातार'ओ।
- 20मानिम दिम हिके। अबइर मल पत्त'अना चड्डे खंडरकी तरकूटी नन्तारकी रई, अरा नीम पत्त'अना ही जोर ती दिम अक्कु गूटी बड़ियर र'अदर। औंगे ई चड्डे अमा फुलई नना लिकिन चिहंकर'आ।
- 21एन्देरगेका धर्मस दौ जैतून मन्न ही मूर डाइन हूँ मल अम्बियस होले नीम कलम नंजका डाइन सेब्बा ती अम्बोस।
- 22औंगे धर्मसी सोग्गे ऐदरना अरा बेइहा सुबहन नीम सोच'आ। मल मनना ती खत्रका आलर मइय्याँ आसी सुबहा बेइहा मनी, अरा नीम आसी सोग्गे मइय्याँ असरा नन्तेम र'अदर होले आस निमन सोग्गे ऐरदस। मला होले नीम हूँ खंडत'अरकी तरकूटी नन्तार'ओर क'ओर।
- 23अरा यहूदीर हूँ तम्है मल पत्त'अना नू मल बन्चका र'ओर होले, आर हूँ कलम लगा बातार'ओर। एन्देरगेका धर्मस अबड़ारिन हूँ कलम नन्ना नू हूँ सवंगिय र'अदस।



- 24 नीम प्रकृति ती जंगली जैतून ही डाड़ा हिकनर अरा अत्रु खंडर'अरकी निम्है प्रकृति ही बिड़दो नू दौ जैतून ही कलम नन्तारका र'अदर। होले प्रकृति ती दौ जैतून ही डाड़ा बेसे यहूदीर तम्है अपन जैतून नू एवंदा सेब्बा ती असगतारोर।
- 25 अना भईरो! ऐन निमन ई भेद ही मनेन बुझुरत'आ गे बेद्ददन, होले नीम निमन कोइहे लूरगर अम्बोर बुझुर'ओर। इस्राएल ता कुदहा आलर अक्कुन बेड़हा मंजका र'अनर। लिकिन गोटा नन-यहूदीर हूँ आसिन पत्त'अना गूटी लेका आर एन्ने र'ओर।
- 26 एन्ने मन्ना ती खोखा उर्मी इस्राएलर नाडुर'ओर। एकासे का नेम्हा पुथी नू लिखकी र'ई, “नाडूस येरुसलेम ती बर'ओस। अरा आस इस्राएल ती महबा मलकन तरकूटी नंज खचोस।
- 27 ऐन आर ही पाप गुट्ठिन खड'ओन। आद आर ही एंग्हे गच्छरना हवे।”
- 28 यहूदीर दौ कत्थन इंझ'आ गे मने मल नन्नर, ओंगे आर धर्मसी बैरी हिकनर। इदही चड्डे नन-यहूदीर दौ खक्खयर। लिकिन चाजरना ही चड्डे अरा आर ही पूरखर अब्राहम, इसाक, अरा याकोबस गे चिच्का गच्छरना ही चड्डे धर्मस आर मइय्याँ अक्कु गूटी चोन्हा नन्दस।
- 29 धर्मस गा तंग्हे बरदान आबोन अरा तंग्हे मेखनन कहियोँ मल किर्त'अर हो'अदस।
- 30 एकासे का नीम मुन्द धर्मसी कत्थन मल पेस्र'आ लिक्कर, अक्कु यहूदीर ही मल पेस्रना ही चड्डे धर्मसी सोग्गे खक्खकादर।
- 31 आ बेसेम यहूदीर अक्कु धर्मसी कत्थन मल पेस्र। धर्मस निम्है मइय्याँ ऐदका सोग्गे लेक्खा आर हूँ खोखा सोग्गे खक्खोर।
- 32 धर्मस ओर्मरिन मल पेस्रना नू बझुर'आ चिच्चस, होले आस ओर्मर मइय्याँ सोग्गे ऐद'आ ओंग्दस।
- 33 बोह! धर्मसी खुरजी अरा लूर अरा अकिल एवंदा गड्डी र'ई। आसी नैवई आबोन बेद्दरकी अख'आ पोल्लना र'ई अरा आसी नन्ना ही घत आबोन बुझुर'आ पोल्लना र'ई।
- 34 नेम्हा पुथी एन्ने ब'ई, “उर्बासी जियन ने अक्की र'ई? आसी सलहा चि'ऊ ने मंजकी र'ई?”
- 35 तंगा गे ऊजी नू फेन खक्खा गे ने आस गे मुन्द इन्द्रिइम चिच्की र'ई?”
- 36 एन्देरगेका उर्मी दिम धर्मस तरती दिम बरचा। अरा उर्मी आसी तिम अरा आस गेम र'ई। आस गे महबा जनमजुग मनत र'अन नेकअन। आमैन।

रोमी 12



- 1अना भईरो! ऐन निमन बिन्ती नन्दन का धर्मस निमा गे नंजकादस आ नलखन सुरता उड्यरकी नीम निमन धर्मस गे उज्जना दाँडे बेसे चि'आ, अरा नेम्हा उज्जना ती आसिन रिझत'आ, इदिम आसी महबा नन्ना ही मानिम डहरे हिके।
- 2ई खेखेल ता आलर ही लेक्खा अमा मना, लिकिन धर्मस ती निम्है जिया सुबहन बदल'आ। होले नीम अख'ओर का निमा एन्देर नन्ना र'ई एकन्ने धर्मस बेददस, अरा एन्देर दौ र'ई अरा एन्द्रा धर्मसिन रिझतार'ई अरा एन्द्रा कोइहे बेस र'ई।
- 3एन्देरगेका धर्मस एंगा तड़रका मन्ना ही मया चिच्चस, आ आकुस ती ऐन निमन ओर्मरिन आनदन, एकासे नीम निमन बुझना र'ई अत्रु ती कोइहे अमा सोच'आ। एकासे का धर्मस निमा ओर्मर गे ऐ बग्गे पत'अना ही खंजपा खट्टिका चिच्का र'अदस अदही लेक्खा निमन लूरगर गने जोक्ख'आ।
- 4एन्देरगेका एकासे नम्है ओन्टा कया नू बग्गे अंग र'ई, अरा उर्मी अंग ही उनिम लेक्खा नलख मलकी,
- 5अन्ने नाम हूँ ओन कुदहा र'अदत, मसी नू ओन्टा कया मनरकी नम्है मझी नू ओरोत ओरोत ही अंग हिकदत।
- 6नमा खक्खका मया ही लेक्खा नमा गे नन्ना नन्ना खंजपा खक्खकी र'ई। नेका धर्मसी कत्था तेंगना ही खंजपा खक्खकी र'ई होले, आस आस गे खक्खका पत'अना ही जोखना लेक्खा अदिन नन्दस नेकअन।
- 7अन्नेम नेका तेतर-सुसर नन्ना ही खंजपा खक्खकी र'ई होले, आस तेतर-सुसर नन्ना नू बोथ्रका र'अना र'ई। अरा नेका सिखाब'अना ही खंजपा खक्खकी र'ई होले, आस सिखाब'अना नू बोथ्रका र'अना र'ई।
- 8एकास गे रिझाब'अना ही खंजपा र'ई, आस नन्नारिन रिझाब'अना नू बोथ्रका र'अना र'ई। अरा एकास गे दान चि'अना ही खंजपा र'ई आस चि'अना नू हरकट मन्ना र'ई। एकास गे कड़हाब'अना ही खंजपा र'ई आस गे अदिन मानिम गने नन्ना र'ई। एकास गे सोग्गे ऐदना ही खंजपा र'ई, आस गे अदिन रिझ ती नन्ना र'ई।
- 9निम्है चोन्हा मानिम चोन्हा मन्ना र'ई। मलदौ आबोन खाँड'आ अरा दौ नना गे मने नना।
- 10अपन ती नन्नर गने भई बहिन बेसे चोन्हा नना। निम्है ती बग्गे नन्नारिन मईन ननके।
- 11लंडी अमके मना, कोइहे नलख ननके, निम्है सौंसे जिया ती उर्बासी तेतर-सुसर ननके।
- 12असरा नू खुसमार'आ, खिलपत नू सहनुम र'आ, गोहरारना नू बोथ्रका र'आ।



- 13 चाइ नू र'ऊ धर्मसी आलर गे निम्है गुसन एन्द्रा र'ई अदिन खट्टा, पाही ऐरना नू बोथका र'आ।
- 14 निम्है डाह'उरिन बरकत नना। आरिन अमा सरप'आ लिकिन बरकत नना।
- 15 खुसमार'ऊ आलर गने खुसमार'आ अरा चींखू आलर गने चींखा।
- 16 अपन ती नन्नर नू कोड़े गने उज्जा। अमा फुलई नना, लिकिन टूटपुंजिया आलर गने मेस्र'आ ती र'आ। निमन लूरगर अमा सोच'आ।
- 17 मलदौ ही ऊजी नू मलदौ अमा नना। ओर्मा आलर ही ऐरना नू दौ नना गे चिहुट नना।
- 18 ऐ बग्गे मना ऊंगी आ गूटी ओर्मा आलर गने कोड़े गने र'आ।
- 19 दुलारो! अमके किर्त'अर बिड़द'आ, लिकिन धर्मस तंग्हे खीस ती दंडे चि'आ गे आसी खेक्खा नू अम्बा चि'आ, एन्देरगेका नेम्हा पुथी नू लिखकी र'ई, “उर्बस ब'अदस, ‘किर्त'अर बिड़द'अना एंग्हे नलख हवे, ऐनिम किर्त'अर बिड़द'ओन।”
- 20 ऊजी नू नेम्हा पुथी ब'अना लेक्खा, “निंग्हे बैरीस कीड़ा सार'आ लगदस होले, आसिन मंडी ओन्त'आ, अरा ओन्क'आ र'अदस होले, आसिन ओन्त'आ। एन्देरगेका नीम एन्ने नन्ना ती आसिन लज्जे मोखत'ओय।”
- 21 मलदौ ती अमा हार'आ, लिकिन दौ ती मलदौ आबोन जित'आ।

रोमी 13

- 1 उर्मी आलर अक्स'ऊ आलर ही तबे नू र'आ नेकअन। एन्देरगेका उर्मी आकुस धर्मस तरती बर'ई। एका ओर्तर आकुस नू र'अनर आरिन धर्मस दिम असन ओक्ताचका र'अदस।
- 2 औंगे एका ओर्तर आकुस ही बिड़दो नू हूलहूली नन्नर होले आर धर्मसी आनका ही बिड़दो नू हूलहूली नन्नर, आर दंडे खक्ख'ओर।
- 3 एका ओर्तर दौ नन्नर आर गे अक्स'ऊ आलर ती एल्चना मलकी, लिकिन मलदौ ननू आलर गे लेका आरिन एल्चना र'ई। नीम अक्स'ऊ आलर ती मल एल्चा बेद्ददर होले, नीम दौ नलख नना, होले आस निंगन सहार'ओस।
- 4 एन्देरगेका अक्स'ऊ आलस निम्है दौ नना गे धर्मसी जोंखस हिकदस। लिकिन नीम मलदौ नन्दर होले एल्चा। एन्देरगेका आस गे दंडे चि'आ गे आकुस र'ई। मलदौ ननुरिन दंडे चि'आ गे आस धर्मसी जोंखस र'अदस।
- 5 औंगे अक्स'ऊ आलर ही तबे नू र'अना चाइ र'ई। दंडे ही इल्चका ती लेका मला नम्है लखना ती हूँ नमा एन्ने नन्ना र'ई।



6ई चड्डे दिम नीम मालगुजारी हूँ चि'अदर, एन्देरगेका अक्स'ऊ आलर धर्मसी जॉखर हिकनर अरा आर अक्स'आ लगनर।

7निमा ओर्मर गे एन्देर एन्देर चि'अना रई अदिन चि'आ। नेका मालगुजारी चि'अना रई आर गे मालगुजारी चि'आ, नेका खल्ल गोड्डा ही मालगुजारी चि'अना रई आर गे खल्ल गोड्डा ही मालगुजारी चि'आ, नेकन एल्चना रई आरिन एल्चा, नेका मईन नन्ना रई आरिन मईन नना।

8अपन ती नन्नर नू चोन्हा नन्नन अम्बरकी एकअम हूँ कत्था नू नेखा हूँ नहड़ा अमा मना। एन्देरगेका ने तंगहै अरबर-परबर गने चोन्हा नन्दस आसिम नेगन पूरा नंजका र'अदस।

9एन्देरगेका नेग बई, “नन्ना आली गुसन अमके काला, अमके पिटा, अमके खड़'आ, नन्नर ही जिनिसन अमके चिबाखार'आ।” अरा इबड़ा गने अउरिम पेसका जुमर'अरकी ई नेग रई का, “निंगहै अरबर-परबर गने निंगहै लेक्खा चोन्हा नना।”

10चोन्हा अरबर-परबर ही एन्देर हूँ मलदौ मल ननी, आँगे ने चोन्हा नन्दस आस उर्मी नेगन पेसदस।

11अक्कुन ता बेड़ा एकासे रई एन्ने अख'अरकी इदिन नना। निमा अक्कु खन्द्रना ती एजरना ही बेड़ा अंडसकी रई। एन्देरगेका एका लेक्खा नाम पताचका रहचकत आ बेड़ा ती अक्कु नम्है नाइरना हेददे रई।

12माखा नगदे किरिम बिच्चकी रई अरा बिज्जना ही बेड़ा रई। आँगे नाम ऊखा ही नलख गुट्ठी अम्बरकी उजगो उज्जना गे बिल्ली ही कमहड़ आबोन भिड़'आ।

13उल्ला ता आलर लेक्खा नाम उजगो डहरे नू ऐकदत नेकअन। नाम रिझ रंग अरा ऊंक्खना अरा पेहरन ही सोतरा नलख अरा लम्पट नलख अरा अरबानखरना अरा डहना आबो ती तरकूटी र'अदत नेकअन।

14लिकिन उर्बस येसु मसीसिन अत्ता हो'आ, अरा पाप मैद सुबहा गुट्ठी ही चिबाखारनन पूरा नन्ना ही सोच आबोन अम्बा चि'आ।

रोमी 14

1एकास पत्त'अना नू पयहा र'अदस आसिन इंझ'आ, लिकिन आसी जिया ही ठुकठुकरना मइय्याँ अमा नग्गानखर'आ।

2ओर्तोस पत्त'अदस का उर्मी ओन्ना-मोखनन ओन्ना दौ रई, लिकिन नन्नस एकास पयहा र'अदस आस पत्त'अदस का अइखा-चेखेल लेका ओन्ना दौ रई।



- 3 उमी ओन्ना-मोखनन उनू मूखू आलर मल मूखू आलारिन अम्बोर खॉइ'आ। अन्नेम उमी ओन्ना-मोखनन मल उनू मूखू आलर मूखू आलर मइय्याँ बदी अम्बोर नना। एन्देरगेका धर्मेस आरिन इङ्गका र'अदस।
- 4 नन्नर ही जोंखस मइय्याँ बदी नना गे नीन एका ओर्तय हिकदय? उर्बस आर ही नैवई ननोस का आर दौ नन्नर महले मलदौ नन्नर। आस दौ ननोस दिम एन्देरगेका उर्बस आसिन दौ नना गे सहाड़ा ननोस।
- 5 ओर्तस एका उल्लन नन्ना उल्ला ती बेस मनदस। अरा नन्नस उमी उल्लन ओन्टम मनदस। ओर्मर ई पत नू तम्है तम्है जिया नू पोकता र'अना रई।
- 6 एका ओर्तस एका उल्लन नन्ना उल्ला ती बेस मनदस आस उर्बस गे मनदस। अरा एका ओर्तस उमी ओन्ना-मोखनन ओन्दस मोखदस आस उर्बस गे इदिन नन्दस, एन्देरगेका आस धर्मेसी धन्यवाद नन्दस। अरा एकास मल ओन्दस मोखदस आस उर्बस गे इदिन नन्दस। अरा आस धर्मेसी धन्यवाद नन्दस।
- 7 एन्देरगेका नम्है ती नीकईम तंगा गे लेका मल उज्जदस अरा तंगा गे लेका मल खे'अदस।
- 8 नाम उज्जा लगदत होले उर्बस गे उज्जा लगदत, अरा नाम खे'अदत होले उर्बस गे खे'अदत। औंगे नाम उज्जदत मलता खे'अदत नाम उर्बासी दिम हिकदत।
- 9 एन्देरगेका ई चड्डेम मसीस केचस अरा उज्जा हूँ चोचस का केचका आलर अरा उज्जना आलर इरबर ही दिम उर्बस मनोस।
- 10 एन्देरगे नीन निंग्हे भईस मइय्याँ बदी ठेकाब'अदय? मलता एन्देरगे नीन निंग्हे भईसिन लेइपोयहा ब'अदय? नाम ओर्मत गा धर्मेसी नैवई नन्ना अड्डा नू इज'ओत।
- 11 एन्देरगेका नेम्हा पुथी नू लिखकी रई, “उर्बस ब'अदस, 'ईद मानिम का ऐन उज्जदन, अन्ने ईद हूँ मानिम का ओर्मर एंग्हे मुन्दहारे मूकलिदर'ओर अरा ओर्मर ब'ओर का ऐन धर्मे हिकदन।”
- 12 औंगे नाम ओर्मत धर्मेस गे तम्है तम्है लेखा चि'ओत।
- 13 औंगे नाम अपन ती नन्नर नू बदी मल ठेकाब'अना रई। ऊजी नू नीम फरिय'आ का निम्है भईसिन आसी डहरे नू मूडना पखना अम्बोर मना महले आसिन मूडना ही चड्डे अम्बोर मना।
- 14 ऐन उर्बस मसीस नू र'अना चड्डे, ऐन मानिम अखदन का उमी ओन्ना-मोखना तमा नू सोतबोड़'आ मलकी। लिकिन एकास एकअम ओन्ना-मोखनन सोतबोड़'आ पत'अदस होले आद आस गे सोतबोड़'आ दिम रई।



- 15 नीन निंग्हे भई महले बहिन आबोन निंग्हे ओन्ना-मोखना ती हेन्दवारदय होले नीन चोन्हा ही डहरे नू मानिम गने मल ऐकदय। नीन निंग्हे ओन्ना-मोखना चड्डे आसी पत्त'अनन अमा नठाब'आ एकदन आस मलदौ सोचदस। एन्देरगेका मसीस आस गे हूँ केच्चस।
- 16 औंगे नीम एकदन बेस ब'अदर, अदिन नीम नन्ना ती नन्नर निमन हींङ'ओर होले, अदिन अमा नना।
- 17 एन्देरगेका धर्मसी राजी ओन्ना-मोखना ही पत्त ता मला, लिकिन ईद नेम्हा बोलतस नू उजगो मन्ना अरा कोडे अरा रिङ्गना ही पत्त नूरई।
- 18 एका ओर्तस ई लेक्खा मसीसी तेतर-सुसर नन्दस, आस धर्मसिन रिङ्गाब'अदस अरा आलर आसिन सहारनर।
- 19 औंगे नाम एकदा कोडे आबोन उन्द'ई अरा अपन ती नन्नर नू मेसरनन बड़ियर ननी अदिन नना गे चिहुट नन्दत नेकअन।
- 20 ओन्ना-मोखना धर्मस मड्य्याँ नाम नंजका पत्त'अना आबोन अम्बन बगड'आ नेकअन। उर्मी ओन्ना-मोखना बेस गा र'ई, लिकिन एका ओर्तस ओन्ना-मोखना चड्डे नन्नारिन पाप नू मूडत'अदस होले आद आस गे मलदौ र'ई।
- 21 अहडा मोखना महले अरखी झरा ओन्ना महले नन्ना इन्द्रिम नन्ना निंग्हे भई महले बहिन आबोन पाप नू मूडत'ई होले अदिन अमके नना।
- 22 इबडा ही पत्त नू नीन एन्देर पत्त'अदय अदिन धर्मसी अरा निंग्हे मङ्गी नू उड्य्या। एकदन एकास बेस बुङ्गदस अदही पत्त नू तान तंगानिम बदी मल ठेकाब'अदस होले आस बरकत खक्खूर'अदस।
- 23 लिकिन एकास एका ओन्ना-मोखनन ठुकठुकी मनदस ती ओन्दस मोखदस होले आस तान तंगानिम बदी ठेकाब'अदस। एन्देरगेका आस अदिन बेस मल पत्ताचस। अरा इन्द्रिम ईद दौ एन्ने मल पत्त'अना ती नन्नर होले आद पाप हवे।

रोमी 15

- 1 औंगे पत्त'अना नू बड़ियर र'अदत नाम नम्है नू लेका रिङ्गरना मलकी। लिकिन एका ओर्तस ई लेक्खा पयहा र'अनर आर ही पयहा नू नमा सहना र'ई।
- 2 नमा ओर्मत गे तम्है अरबर-परबारिन दौ गे आरिन पत्त'अना नू बड़ियर मना ओंगोर अदगे सहाडा नन्ना र'ई।



- 3 मसीस हूँ तान तंगानिम रिङ्गनुम मल उज्जियस, एकासे का नेम्हा पुथी नू लिखकी रई, “निंग्हे निंदा ननुर ही निंदा एंग्हे मइय्याँ बरचिम बिच्चिया।”
- 4 ऐ बग्गे कत्था मुन्द लिखकी रई अबड़ा नमा सिख'आ गेम लिखकी रई। नेम्हा पुथी नमा गे कयास दरा रिङ्गनन चिई। होले नाम असरा नना आँगदत।
- 5 कयास दरा रिङ्गनन चिऊ धर्मस, मसी येसुस एकन्ने बेद्ददस अन्ने निमा अपन ती नन्नर नू मेसर'आ ती उज्जा गे सहाड़ा नन्दस नेकअन।
- 6 तहाँ नीम ओन जिया अरा ओन सड़ा ती नम्है उर्बस येसु मसीसी बंगस धर्मसी ओहमा ननोर।
- 7 आँगे एकासे मसीस निमन इङ्गकादस अन्नेम नीम अपन ती नन्नारिन इङ्ग'आ। इत्रु ती धर्मसी मईन मनो।
- 8 ऐन ब'अदन का एका गच्छरका गुट्ठिन धर्मस यहूदी पूरखर गे चिच्का रहचस अबड़न पूरा नना ती मसीस धर्मसी पत्त'अना जोगेन ऐद'आ गे यहूदीर ही जौख मंजस।
- 9 अरा आस इदगे हूँ इदिन नंजस का नन-यहूदीर तम्है खक्खरका सोग्गे ही चड्डे धर्मसी ओहमा नना आँगोर। एकासे नेम्हा पुथी नू लिखकी रई, “आँगे ऐन नन-यहूदीर नू निंग्हे ओहमा ननोन। अरा निंग्हे नामे ही ओहमा पाड़ोन।”
- 10 अरा ईद बारकी रई, “अना नन-यहूदी आलारो, आसी आलर गने रिङ्ग'आ।”
- 11 अउरिम बई, “उर्मी नन-यहूदी आलारो, उर्बासिन ओहमा नना। अना खेखेल ता उर्मी आलारो, आसिन ओहमा नना।”
- 12 अरा फिन धर्मसी कत्था तिगू यसायास ब'अदस, “येसैसी बनस ती ओन्टा पुना बेलस बर'ओस। आस नन-यहूदीर नू राजी ननोस, अरा नन-यहूदीर आसी चड्डे असरा ननोर।”
- 13 धर्मस ने असरा चिऊ र'अदस आस निमन उर्मी बेसे रिङ्गना अरा कोड़े ती नीन्द'ओस, एन्देरगेका नीम आसिन पत्त'अदर। होले नेम्हा बोलतासी सवंग ती निम्है असरा नीन्दनुम क'ओ।
- 14 अना भईरो! ऐन एंग्हे तिम निम्है पत्त नू दौ अखदन का नीम दौ ती निन्ददर अरा उर्मी रकम ही लूर ती बड़ियर मनरकी अपन ती नन्नारिन चेता ब'आ आँगदर।
- 15 अन्नु हूँ ऐन एसन एसन सुरता नन्त'आ गे निमा एकदन डिठ नंजकन ती लिखचकन, एन्देरगेका धर्मस एंगा चिच्का ई मया ती



- 16 नन-यहूदीर गे मसी येसुसी जॉख मंजकन। ऐन आसी दौ कत्थन सिखाब'अना ती नैगस लेक्खा धर्मसी तेतर-सुसर नंजकन। होले नन-यहूदीर नेम्हा बोलतस ती नेम्हा मंजका ती धर्मस गे इंझना दाँडे बेसे मना आँगोर।
- 17 आँगो मसी येसुस नू धर्मस गे ऐन एन्देर नलख नंजकन अदगे फुलई नन्दन।
- 18 एन्देर ऐन बाचकन अरा एन्देर ऐन नंजकन, इत्रु ती नन-यहूदीर धर्मसिन मन'आ गे मसीस एंग्हे ती नंजका कत्थन अम्बरकी एंगा एकअम कत्था ही पत्त नू ब'अना ही डिठ मल मनो।
- 19 अबड़ा चिन्हा अरा अजगुत नलख गुट्ठी ही सवंग धर्मसी बोलता ही सवंग ती मंजा। ई लेक्खा ऐन येरुसलेम ती इल्लुरिकोन ही ओनबेंडर'आ मसीसी दौ कत्थन तेंगा कुद्दकन।
- 20 एसन एसन मसीसी पत्त नू मल्ला मेन्तारका असानिम ऐन दौ कत्थन मेन्त'आ बेद्ददन। नन्नर कलीसिया ओर नंजका अड्डा नू ऐन दौ कत्था मेन्त'आ मल बेद्ददन।
- 21 लिकिन एकन्ने नेम्हा पुथी नू लिखकी र'ई अन्नेम मनन, “नेका आसी पत्त नू मल्ला तेंगरका आर ऐरोर, अरा ने आसी पत्त नू मल्ला मँजका आर बुझ'ओर।”
- 22 ई चड्डे घड़ी घड़ी ऐन निम्है गुसन बर'आ गे छेकरका रहचकन।
- 23 लिकिन अक्कु ई राजी नू एंग्हे नलख गे अड्डा मल्ला बछ्का। अरा नगदे चाँन ती निम्है गुसन बर'आ गे बेद्दा लिक्कन।
- 24 आँगो ऐन स्पानिया गे कालो बारी निम्है गुसन कुरनुम काला गे असरा र'ई। अरा निम्है गने भेंट मनोन ती जोक्क बेड़ा र'अना ती रिझ'ओन। फिन एंगा असरा र'ई का एंग्हे डहरे ऐकना नू नीम सहाड़ा ननोर।
- 25 लिकिन अक्कुन गा ऐन धर्मसी आलर ही तेतर-सुसर नना गे येरुसलेम कालदन।
- 26 एन्देरगेका मकेदोनिया अरा अखाया जिला गुट्ठी ता आलर येरुसलेम ता धर्मसी आलर ती कीडर गे सहाड़ा नना गे रिझ ती तम्है बरार चिच्का र'अनर।
- 27 आर इदिन नना गे रिझर, अरा आर इदिन नना गे मानिम नू आर ही नहड़ा हूँ र'अनर। एन्देरगेका नन-यहूदीर यहूदीर ही बोलता बरकत गुट्ठिन खटरर, होले आर गे तम्है ढिबा खुरजी गुट्ठी ती यहूदीर गे सहाड़ा नन्ना र'ई।
- 28 आँगो ऐन ई नलखन नंज खच्चोन ती आर गे इबड़ा बरार आबोन सोंप'ओन ती निम्है गुसन कुरनुम स्पानिया क'ओन।



- 29 अरा ऐन अखदन का इकला ऐन निम्है गुसन बर'ओन, आ बारी मसीसी अजगुत बरकत गने बर'ओन।
- 30 अना एंग्हे भईरो! नम्है उर्बस येसु मसीस ती अरा नेम्हा बोलतासी चोन्हा ती ऐन निम्है गुसले नेअदन का, एंगा गे एंग्हे गने धर्मैसिन गोहरारना नू बोथका र'आ,
- 31 खने ऐन यूदेया ता मल पत्त'उर ती बछ्का र'ओन, अरा एकदन ऐन येरुसलेम ता पत्त'ऊ आलर गे बरार आबोन ओन्द्रदन अदिन आर रिझ गने इंझर'ओर।
- 32 होले ऐन धर्मैसी मने ती निम्है हेद्दे रिझ ती बर'ओन। अरा निम्है गने भेंट मनोन ती खन्न ऐखोन।
- 33 कोड़े ही धर्मैस निम्है ओर्मर गने र'अदस नेकअन। आमेन।

रोमी 16

- 1 ऐन नम्है बहिन फीबे ही पत नू निमन आन्दन, एकाद कैऱ्रेया कलीसिया ता ईरू-खूजू र'ई।
- 2 नीन अदिन उर्बस नू इंझ'आ एकासे नेम्हा आलर गे मईन नन्ना मनी। अरा एकअम कत्था नू अदगे निम्है चाड़ मनो, अदही सहाड़ा नना। एन्देरगेका आद कुदहा आलर ही अन्नेम एंग्हे हूँ सहाड़ा नंजकी र'ई।
- 3 प्रिसका अरा अकुलास गे एंग्हे मौंजरा चि'आ। ईर मसी येसुस नू एंग्हे गने तेतर-सुसर ननू रहचर।
- 4 आर एंग्हे जिया गे तम्है जियन अपलोक नू नंजका चिच्का रहचर। ऐन लेका मला अन्नेम नन-यहूदीर ही गोट्टा कलीसिया हूँ आर ही धन्यवाद ननी।
- 5 आर ही एडपा ता कलीसिया गे हूँ एंग्हे मौंजरा। एंग्हे बेस संगेस एपैनेतोस गे मौंजरा एकास आसिया राजी नू मसीस गे पहिल पत्त'ऊ आलस रहचस।
- 6 मरियम गे मौंजरा, आद निमा गे कोड़े चिहुट नलख नंजकी रहचा।
- 7 अन्द्रोनिकोस अरा यूनिया ने एंग्हे जातियर हिकनर अरा एंग्हे गने गुड्रका रहचर अरा तइरकर ती नामे खक्खका र'अनर। अरा एंग्हे ती मुन्द मसीसिन इंझका रहचर, आर गे मौंजरा।
- 8 अम्पलियातोस गे मौंजरा एकास उर्बस नू एंग्हे बेस संगेस र'अदस।
- 9 उरबानोस गे एकास मसी नू नम्है गने तेतर-सुसर ननू र'अदस। अरा एंग्हे बेस संगेस स्ताखुस गे मौंजरा।
- 10 अपेल्लेस गे मौंजरा एकास मसी नू पोकता उरखस। अरिस्तोबुलोसी एडपातर गे मौंजरा।



- 11 एंग्हे जातियस हेरोदियोन गे मोजरा। नरकिस्सोसी एडपाता आलर नू ने उर्बस नू र'अनर आर गे मोजरा।
- 12 त्रूफैना अरा त्रूफोसा गे मोजरा, इबड़ा मुक्कर उर्बस नू बग्गे नलख नंजका र'अनर। एंग्हे बेस संगेस पेरसिया गे मोजरा, ईद उर्बस नू कोइहे चिहुट नंजकी र'ई।
- 13 रूफोस गे एकास उर्बस नू चज्जरका र'अस अरा आसी अयंग गे ने एंग्हे हूँ अयंग हवे इरबर गे मोजरा।
- 14 असुंक्रितोस अरा फिलेगोन अरा हेरमेस अरा पत्रोबास अरा हेरमास अरा आर ही गने र'ऊ ओर्मा भइय्योर गे मोजरा।
- 15 फिलोलोगोस अरा यूलिया अरा नेरेयुस अरा आसी बहिन अरा ओलुम्पास अरा आर ही गने उर्मी नेम्हा आलर गे मोजरा।
- 16 अपन ती नन्नर नू नेम्हा चोंखना ती मोजरा नना। निमा मसीसी उर्मी कलीसिया तरती मोजरा।
- 17 अना भईरो! निमन ऐन गोहरारदन का नीम एन्देर सिखाब'अना खक्खकर अदही बिइदो नू निमन खाँइनर अरा निम्है डहरे ती मूइत'अनर आर ही ती चिहुंक अरा तरकूटी र'आ।
- 18 एन्देरगेका का एन्ने आलर नम्है उर्बस मसीसी मला तम्है कूल ब'ई ही तेतर-सुसर नन्नर। अरा एम्बा एम्बा अरा भुरिय'अना कत्था ती बोको जिया आलारिन बेड़ाब'अनर चि'अनर।
- 19 निम्है मनना ही पत ओर्मा आलर नू बीइरकी किरकी र'ई, औंगे ऐम निम्है पत नू रिइन्नदन। लिकिन ऐन बेद्ददन का नीम दौ गे लूरगर अरा मलदौ गे भकुवा मना।
- 20 कोड़े ही धर्मस लेम सैतान आबोन निम्है खेइडे किइय्या गेंजत'ओस चि'ओस। नम्है उर्बस येसु मसीसी मया निम्है मइय्याँ मन्तेम र'ओ।
- 21 एंग्हे गने तेतर-सुसर ननू तीमोथियुस अरा एंग्हे जातियर लूकियोस अरा यासोन अरा सोसीपत्रोस निमन मोजरा नन्नर।
- (22 ऐन तेरतियोस ई चिठी ही लिख'ऊ उर्बस नू निमन मोजरा नन्दन।)
- 23 गायोस एकास एंग्हे अरा गोट्टा कलीसिया ही पाही ईरू र'अदस, आस निमन मोजरा नन्दस। एरस्तोस ने नगरे ता भंडारी र'अदस अरा एम्है भई क्वार्तोस निमन मोजरा नन्दर।
- 24 [नम्है उर्बस येसु मसीसी मया नीम ओर्मर गने र'आ नेकअन। आमेन।]



- 25 धर्मेस गे ओहमा मनन नेकअन। आस दौ कत्था ती निमन पत'अना नू बड़ियर नना ओंगदस, एका कत्थन ऐन येसु मसीसी पत नू निमन तिंकन। ई कत्था ही गम हुल्लो ती नूर्रकी रहचा।
- 26 ईद गा अक्कुन जनमजुग धर्मेसी पेसका ती धर्मेसी कत्था तिंगुर ही पुथी गुट्ठी ती ईद उर्मी जातियर नू चलखरा अरा अखतारा, ओंगे उर्मी जातियर इदिन पत'अना ती आस गे मन'आ ओंगनर।
- 27 ओर्त लेका लूरगर धर्मेस गे येसु मसीस ती जनमजुग गूटी ओहमा मनन नेकअन। आमेन।



1 कोरिन्थ

1 कोरिन्थ 1

- 1 धर्मसी मने ती मसी येसुसी तइरका मना गे मेख्रका पौलुस एंग्हे तरती अरा नम्है भईस सोस्थेनेसी तरती ई चिठी रई।
- 2 कोरिन्थ नगरे नू मसी येसुस नू नेम्हा मन्तारका अरा नेम्हा मना गे मेख्रका धर्मसी कलीसिया गे अरा नमा अरा आर ही उर्बस नम्है येसु मसीसी नामेन उर्मी अड्डा नू ओड़ ननू ओर्मर गे ऐम लिखदम।
- 3 नम्है धर्म बबस अरा उर्बस येसु मसीस ती निमा गे मया अरा कोडे खक्ख'अन नेकअन।
- 4 नीम मसी येसुसी र'अना ती धर्मसी मया निमा गे चितारा, अदगे ऐन निमा चड्डे उर्मी बारी धर्मस गे धन्यवाद नन्दन।
- 5 नीम मसीसी र'अना ती नीम निम्है उर्मी ब'अना नू अरा निम्है उर्मी लूर नू उर्मी मदहे नू उरुब मन्तारका र'अनर,
- 6 एन्देरगेका मसीसी पत्त ता एम्है गोवाह निमा नू पखड ईथरकीचा।
- 7 ओंगे नम्है उर्बस येसु मसीसी किर्रना ही पाब ईरु आलर नीम एकअम बोलता ही इनाम नू खंगती मल मन्दर।
- 8 धर्मस निमन मुंजा गूटी पत्त'अना नू बड़ियर उड्योस। ओंगे नीम नम्है उर्बस येसु मसीसी किर्रना उल्ला नू बिगर बदी ही र'ओर।
- 9 धर्मस पत्त'अना जोगे र'अदस, आस निमन तंग्हे खद्दस नम्है उर्बस येसु मसीस गने मेसना नू र'आ गे मीखकादस।
- 10 अना भईरो! ऐन नम्है उर्बस येसु मसीसी आकुस ती निमन ने'अदन का नीम ओर्त ओर्त गने मेस'आ ती उज्जा, होले निम्है मझी नू खाइरना मल मनो। अरा नीम ओन जिया अरा ओन मने ती मेस'आ ती र'आ।
- 11 अना एंग्हे भईरो, निम्है मझी नू नग्गानखना गुट्ठी रई एन्ने ऐन खलोऐ ही एडपातर ती मेंजकन।
- 12 एंग्हे ब'अना ईद रई का, निम्है ती जोक्कोर ब'अनर, “ऐन पौलुसी चोखर'ऊ हिकदन” नन्नर ब'अनर, “ऐन अप्पोल्लोसी चोखर'ऊ हिकदन” नन्नर ब'अनर, “ऐन पतरसी चोखर'ऊ हिकदन” अरा नन्नर ब'अनर, “ऐन मसीसी चोखर'ऊ हिकदन।”



- 13 एन्देर मसीस भगीयरका केरका र'अदस का? एन्देर ऐन पौलुस निमा गे क्रुस नू पिटतारका रहचकन का? एन्देर नीम पौलुसी नामे नू नोडरका रहचकर का? अन्ने मल्ला।
- 14 ऐन क्रिसपोस अरा गायोसिन अम्बरकी निम्है ती नेकन हूँ मल्ला नोडरताचका, इदगे ऐन धर्मस गे धन्यवाद नन्दन।
- 15 औंगे ने हूँ ब'आ पोल्लदर का नीम एंगहै नामे ती नोडरकर।
- 16 (हाँ, ऐन स्तेफनासी एडपातारिन हूँ नोडरताचकन। एंगा सुरता मला का ईरिन अम्बरकी अउर नेकन हूँ ऐन नोडरकन।)
- 17 मसीस एंगन नोडरता गे मला, दौ कत्थन तेंगा गे तइयका र'अदस। अरा मसीसी क्रूस अनभनियाँ मल मना गे एंगन खेखेल ता बिगर लूर ती दौ कत्थन मेन्त'आ गे तइय्यस।
- 18 क्रूस ही पत ता सिखाब'अनन खे'अना ही डहरे नू कालू आलर खईता बुझुरनर। लिकिन नाडरनन खक्खू आलर नमा गे आद धर्मसी सवंग हवे।
- 19 नेम्हा पुथी नू एन्ने लिखकी रई का “लूरगर ही लूरन नठाब'ओन चि'ओन अरा अख'उर ही अखनन अनभनियाँ ननोन चि'ओन।”
- 20 एसन र'अनर लूरगर? एसन र'अनर बग्गे पढचका आलर? एसन र'अनर ई खेखेल ता कोइहे लूर उइय्यू आनानखर'उर? एन्देर धर्मस ई खेखेल ता लूरन खईता मल कमचका र'अदस का?
- 21 एकासे का खेखेल तंगहै लूर ती धर्मसिन मल अखना लेक्खा, तंगहै लूर ती धर्मस इदन नंजकादस। औंगे खईता लेक्खा ईथर'ऊ एम्है दौ कत्था तेंगना ती पत'उरिन नाडा गे धर्मस मने नंजस।
- 22 यहूदीर गा चिन्हा गुट्ठिन बेददनर अरा नन-यहूदीर लूरन बेददनर।
- 23 लिकिन ऐम गा क्रुस नू ठोकचका मसीसी पत नू तेंगा कुददम। ईद यहूदीर गे मूडना ही चड्डे रई, अरा नन-यहूदीर गे खईता रई।
- 24 लिकिन यहूदीर ती अरा नन-यहूदीर ती धर्मस नेकन मेखकादस, आर गे मसीस दिम धर्मसी सवंग अरा धर्मसी लूर हिकदस।
- 25 एन्देरगेका धर्मसी बोका मन्ना गा आलर ही लूर ती कोइहे लूर रई, अरा धर्मसी पयहा मन्ना गा आलर ही सवंग ती कोइहे सवंगिय रई।
- 26 अना भईरो, नीम मेखका बारी एकासे रहचकर अदिन सोच'आ। आलर ही ऐरना नू निम्है ती बग्गे लूरगर मलकर अरा सवंगिय मलकर अरा कोहाँ एडपा नू कुन्द्रका मलकर।



27 लिकिन धर्मस गा लूरगर आलारिन लज्जे मोखत'आ गे खेखेल ही ऐरना नू बोयारिन चज्जिकादस, अरा सवंगिय आलारिन लज्जे मोखत'आ गे खेखेल ही ऐरना नू पयहा आलारिन चज्जियस।

28 खेखेल कोहाँ बई अदन एन्द्रा हूँ मलका लेक्खा नना गे धर्मस खेखेल ही ऐरना नू सन्नीरिन अरा आलर ही ऐरना नू हींइरका बुझुरकारिन अरा खेखेल ही ऐरना नू एन्द्रा हूँ मलकर एन्ने बुझुरका आलारिन चज्जिकादस।

29 औंगे एकअम आलर हूँ धर्मसी मुन्दहारे फुलई नना पोल्लोर।

30 आसी तिम नीम मसी येसुस नू र'अदर। मसीस दिम नमा गे धर्मस तरती बरचका लूर। आस दिम नमन धर्मस गने उजगो कमदस, अरा आस नमन नेम्हा कमदस, अरा आस नमन पाप ती अम्बत'अदस।

31 औंगे नेम्हा पुथी नू लिखका लेक्खा, “एकास फुलई मन्दस आस उर्बासी पत्त नू लेका फुलई मन्दस नेकअन।”

1 कोरिन्थ 2

1 अना भईरो, इकला ऐन धर्मसी गम आबोन निम्है गुसन तेंगा बरचकन खने, ऐन ब'अना नू दौ गने महले कोइहे लूर गने मल बरचकन।

2 एन्देरगेका ऐन निम्है नू येसु मसी अरा क्रुस नू आसी खेअनन अम्बरकी नन्ना इन्द्रिइम ही पत्त नू मल तेंगा गे तिगचका रहचकन।

3 अरा ऐन लेइपॉयहा अरा इलिच्च'आ अरा बग्गे अस्रनुम तिम निम्है गने रहचकन।

4 अरा एंग्हे ब'अना अरा एंग्हे तेंगा कुद्दना नू लूर ही लोभाब'अना कत्था मल्ला, लिकिन नेम्हा बोलतासी सवंग ही ऐदना चि'अना रहचा।

5 होले निम्है पत्त'अना आलर ही लूर नू मला, लिकिन धर्मसी सवंग ही मइय्याँ मनो।

6 अन्नु हूँ पत्त'ऊ आलर ने पखइ मंज खच्चिकानर आर ही नू ऐम लूर ही पत्त ता कत्थन तेंगदम। लिकिन ई लूर खेखेल ता महले नठार'ऊ ई खेखेल ता राजी ननुर ही लूर मल्ली।

7 ऐम गा धर्मसी लूरन, नूख्रका गम आबोन लेका तेंगदम। इदन धर्मस खेखेल ही ओरे ती मुन्द तिम नाम मसीसी महबा नू हिसा मना गे ठनचस।

8 लिकिन इदन ई खेखेल ता राजी ननुर ने हूँ बल्लर। आर अक्का होले महबा ती निन्द्रका उर्बासिन क्रुस नू मल ठोक'ओर दने।



9लिकिन नेम्हा पुथी नू एन्ने लिखकी रई का, “धर्मस तंग्हे नू चोन्हा ननुर गे सपड़ाचका जिनिसन एका खन्न हूँ मल ईरकी रई, महले एका खेबदा हूँ मल मेंजकी रई महले एका मन हूँ मल सोचकी रई।”

10लिकिन धर्मस तंग्हे नेम्हा बोलतस ती अबड़न नमा गे दहदर नंजस, एन्देरगेका नेम्हा बोलतस उमी कथन अरा धर्मसी खोड़खा गम कथन हूँ अगमई।

11ओर्त आलासी सोच आबोन आ आलासी बोलतन अम्बरकी ने हूँ अख'आ पोलनर। ई लेखम धर्मसी बोलतासिन अम्बरकी नन्नर ने हूँ धर्मसी सोच आबोन अख'आ पोलनर।

12अक्कुन नाम ई खेखेल ता बोलतन मला, लिकिन धर्मस ती बरचका बोलतन खक्खकादत, इत्रु ती नाम धर्मस नमा गे सिथिया नू चिच्का दौ जिनिस गुट्ठिन अख'आ ओंगदत।

13इबड़ा कथन ऐम आलर ही लूर सिखाबाचका कथा गुट्ठी ती मला, बोलतासी सिखाबाचका कथा ती तेंगदम। एन्नेम बोलता ही मानिम कथा गुट्ठिन बोलतासी कथा गुट्ठी ती बुझाब'अदम।

14नेम्हा बोलतासिन मल खक्खका आलस धर्मसी बोलतस ती बरना मानिम कथा गुट्ठिन मल इंझ'ओस, एन्देरगेका अबड़ा आसी ऐरना नू बयला कथा हवे। अरा आस अबड़न मल बुझदस, एन्देरगेका नेम्हा बोलतस लेका आलर गे धर्मसी कथा गुट्ठिन बुझ'आ गे संगरा नना ओंगदस।

15लिकिन नेम्हा बोलतस तंग्हे नू र'ऊ आलस उर्मिन दिम बिददस ती बुझदस, लिकिन तान गा नेख'आ ती हूँ बिददस ती बुझ'आ पोलदस।

16एन्देरगेका नेम्हा पुथी नू बाचका लेक्खा, “उर्बस गे सिखाब'अना लेक्खा आसी जियन ने अक्की रई?” लिकिन नाम गा मसीस नन्ना लेक्खा सोच'ऊ आलत हिकदत।

1 कोरिन्थ 3

1अना भईरो, ऐन एकाबारी कोरिन्थ नू रहचकन आ बारी निम्हे गने नेम्हा बोलतस नू र'ऊ आलर गने ब'अना लेक्खा ब'आ पोलकन, लिकिन खेखेल ता आलर अरा मसी नू बोलोर लेक्खा सोच'अरकी दिम ब'आ ऊंगकन।

2ऐन निमन दुदही लेक्खा ओर ही कथन लेका सिखाबाचकन, बेइहा ओन्ना-मोखनन मल चिच्चकन, एन्देरगेका नीम अदन इंझ'आ पोलकर दने। अक्कुन गूटी हूँ नीम अदन इंझ'आ पोलदर दने।



- 3 एन्देरगेका नीम अक्कु गूटी निम्है कया सुबहा ही तबे नू र'अदर। अरा अक्कु गूटी निम्है नू इस्गहा अरा नग्गानखना मनी, खने नीम कया सुबहा ही आलर दिम हिकदर। नीम खेखेल ता आलर लेक्खा दिम उज्जदर।
- 4 निम्है ती ओर्तोस “ऐन पौलुसी चोखर'ऊ हिकदन” ब'अदस खने, नन्नस ब'अदस, “ऐन अप्पोल्लोसी चोखर'ऊ हिकदन।” अन्ने होले नीम खेखेल ही आलर लेक्खा दिम उज्जदर।
- 5 होले अप्पोल्लोस मुध हिकदस का? अरा ऐन पौलुस मुध हिकदन का? ऐम गा निमन पत'अना नू ओन्द्रका उर्बासी सुसर ननू लेका हिकदम। ऐम ओर्त ओर्त उर्बस एमा गे सोंपचका नलखन नंजकम।
- 6 ऐन इदकन, अप्पोल्लोस अम्म टेड़चस, लिकिन धर्मस गा अदन परदाचस।
- 7 ओंगे इद'उसी एन्द्रा हूँ मलकी, अरा अम्म टेड़'उसी हूँ एन्द्रा हूँ मलकी, लिकिन अदन परद'ऊ धर्मस दिम मुध हिकदस।
- 8 इद'उस अरा अम्म टेड़'उस इरबर ही मूली ओन्टा दिम र'ई। आर ओर्त ओर्त तंगहा तंगहा अर्ज'अना लेक्खा बनी खक्खोर।
- 9 ऐम गा धर्मस गने नलख ननू हिकदम, अरा नीम धर्मसी खल्ल अरा एड़पा लेक्खा हिकदर।
- 10 धर्मस एंगा गे चिच्का औसान लेक्खा, ओन्टा बेस मिस्त्रीर लेक्खा ऐन नेव उड़्यकन। अरा नन्ना ओर्तोस अदही मड़्य्याँ कमदस। लिकिन ओर्त ओर्त गे चिहूंक र'अना र'ई का आस एकासे कमदस।
- 11 मुन्द तिम कम्पका आ नेव आबोन अम्बरकी नन्ना नेव आबोन ने हूँ नना पोल्नर। आ नेव येसु मसीस दिम हिकदस।
- 12 लिकिन ई नेव नू नीकईम सोना, चाँदी, कोड़हे दाम ही पखना गुट्ठी, कंक, खमी, मलता लट्ठी ती कम'आ ओंगदस।
- 13 लिकिन रायबड़ी उल्ला नू उर्मी कम'उर ही नलख दहदर मनो क'ओ, एन्देरगेका ईद चिच्ची ती दहदर नन्तार'ओ क'ओ। ओर्त ओर्त नंजका नलख एकासे र'ई एन्ने चिच्ची बिढ़'ओ चि'ओ।
- 14 आसी नंजका नलख ठिमठिम ने इज्जकी र'ओ होले, आ कम'उस इनाम खक्खोस।
- 15 आसी नंजका नलख ओलो क'ओ होले, आ कम'उस नुकसान खक्खोस, लिकिन आस गा बछ्छ'ओस। अन्नु हूँ आसी दसा ओर्तस हदकारना चिच्ची ती भागिन बछ्छका लेक्खा मनो।
- 16 नीम धर्मसी मन्दिर हिकदर, अरा धर्मसी बोलता निम्है नू मड़'ई, इदिन नीम बलदर का?



- 17 नीकईम धर्मसी मन्दिरन नठाब'ओस होले, धर्मस आसिन नठाब'ओस। एन्देरगेका धर्मसी मन्दिर नेम्हा रई। नीम दिम आ मन्दिर हिकदर।
- 18 नीकईम तमन अम्बोर ठक'आ। निम्है मदहेर ती नीकईम तंगन खेखेल ही ऐरना नू लूरगर सोचदस होले, आस बोया मन्ना रई। होले दिम आस धर्मसी ऐरना नू लूरगर मना आंगदस।
- 19 एन्देरगेका ई खेखेल ता लूर धर्मसी ऐरना नू बोया रई। नेम्हा पुथी नू एन्ने लिखकी रई का, “आस लूरगर आलारिन आर ही चतरा लूर ती दिम बझाब'अदस।”
- 20 नेम्हा पुथी नू एन्ने हूँ लिखकी रई का, “उर्बस अखदस का लूरगर आलर ही सोचना गुट्ठी अनभनियाँ रई।”
- 21 आँगे ने हूँ एकअम मुद्धर ही पत नू अम्बोर फुलई मना, एन्देरगेका उर्मी दिम निम्है हवे।
- 22 एकासे का, ऐन पौलुस महले अप्पोल्लोस महले पतरस ऐम ओर्मम निम्है दौं गे दिम हिकदम। ई सौंसार महले उज्जना महले खे'अना महले ई उल्ला महले बरना उल्ला अबड़ा उर्मी निम्है दौं गे दिम हवे।
- 23 अरा नीम मसीसी हिकदर अरा मसीस धर्मसी हिकदस।

1 कोरिन्थ 4

- 1 आलर एमन मसीसी जौंख अरा धर्मसी गम ही कत्था गुट्ठिन बुझत'अना ही नलखन खक्खका आलर अखनर नेकअन।
- 2 अरा एन्ने नलख खक्खका ओर्तस मुन्द तंगन पत'अना जोगे आलस एन्ने ऐदना मनी।
- 3 लिकिन एंग्हे ऐरना नू ईद सन्नी कत्था हवे का ऐन नीम मलता आलर ही एकअम नैवई ननुस ती नैवई नन्तार'ओन। ऐन हूँ गा एंगन नैवई मल नन्दन।
- 4 एन्देरगेका एंग्हे जिया एंगन एकअम कत्था गुट्ठी नू बदी मल ठेकाब'ई, अन्नु हूँ इत्रु ऐन उजगो मल मन्दन। एंगन नैवई ननुस उर्बस दिम हिकदस।
- 5 आँगे ठंचका बेड़ा ही मुन्द नीम नेख'आदिम नैवई अमा नना, उर्बासी बरना गूटी पाब ऐरा। आस ऊखा नू नूखका कत्था गुट्ठिन बिल्ली नू ऐद'ओस, अरा आलर ही जिया गुट्ठी ही सोच गुट्ठिन दहदर ननोस। आ बारी धर्मस तरती ओर्त ओर्त तंग्हे ओहमन खक्खोर।
- 6 अक्कु अना भईरो, ऐन इबड़ा कत्थन निमा गे एंग्हे अरा अप्पोल्लोसी पत नू जोक्खा लेक्खा तिंकन, इदगेका नीम एम्है ती सिख'आ आंग्दर का नेम्हा पुथी नू लिखचका ही पत ती बग्गे अमा ऐका। तहाँ नीम निम्है ओर्तो मुद्धासी पत नू फुलई मनरकी नन्नासिन मल हींड़'ओर।



- 7 एन्देरगेका ने हूँ निंगन नन्ना पत्त'उर ती कोइहे मुध आलस एन्ने मल्ला कमचका। धर्मसी नलख नना गे इन्द्रिइम निंगहै गुसन रई, आद धर्मस ती बरई। औंगे अबड़ा आकुस धर्मस निंगा गे चिच्चस एन्ने नीन मन्दय होले, अबड़न ओन्टा इनाम रूपे नू खक्खकय एन्ने मल सोच'अरकी एन्देरगे फुलई मन्दय?
- 8 नीम सोचदर का नीम उइच खच्चिकादर, अरा नीम उर्ब मंज खच्चिकादर, अरा नीम एम्है बिगर राजी ननू हूँ मंजकादर। अन्नेम नीम मानिम नू राजी ननू र'आ गे दिम ऐन बेदददन। औंगे ऐम हूँ निम्है गने राजी ननोम दने।
- 9 लिकिन एंगा एन्ने लग्गी का, आलर ने खे'अना ही पेसेर खच्चिकानर आर लेक्खा धर्मस ऐम तइरकारिन ओर्मर ती खोखा र'आ गे नंजकादस। ऐम खेखेल राजी गे अरा मेर्खा पैकर गे अरा आलर गे बेचना लेक्खा मंजकादम।
- 10 ऐम मसीसी चड्डे बोया हिकदम, लिकिन नीम गा मसीस नू लुरगर सोचदर। ऐम लेइपोंयहा हिकदम, लिकिन नीम गा सवंगिय सोचदर। नीम मईन खक्खू सोचदर, लिकिन ऐम गा हींइतारदम।
- 11 ऐम अक्कुन गूटी हूँ कीड़ा अरा ओनक'आ नू र'अदम, अरा ठेठंगे र'अदम, अरा कुंहड़ारदम, अरा असन इसन ठुडुरदम जोबोरदम।
- 12 अरा एम्है खेक्खा ती कोइहे नलख नन्दम। आलर एमन हींइनर खने, ऐम आर गे आसीस चि'अदम। आर एमन सताब'अनर खने, ऐम सहदम।
- 13 आर एमन निंदा नन्नर खने, ऐम बेस कत्था ती किर्त'अर ब'अदम। ऐम इन्ना गूटी हूँ खेखेल ता चिंदी अरा कस्सा लेक्खा मंजकादम।
- 14 ऐन निमन लज्जे मोखत'आ गे इदन मल लिखदन। लिकिन निमन एंगहै चोन्हा खद्द ब'अरकी निमन तिगाब'अदन।
- 15 एन्देरगेका मसी नू निमा गे दस हजार सिखाब'ऊ र'ओर, लिकिन निमा गे कैनो गोतंग बंगर मला। ऐन मसी येसुस नू दौ कत्था ती निम्है बंग मंजकन।
- 16 औंगे ऐन निमन आनदन का एंगहै बेसे उज्जा ऐका।
- 17 ई चड्डे दिम ऐन उर्बस नू पत्त'अना जोगे एंगहै चोन्हा खद्दस तीमोथियुसिन निम्है गुसन तइयकादन। ऐन उर्मी अड्डा नू उर्मी कलीसिया नू सिखाब'अना लेक्खा आस मसी येसुस नू एंगहै उज्जना ओक्कनन निमा गे सुरता ननोस।



- 18 ऐन निम्है गुसन अउर मल बर'ओन एन्ने सोच'अरकी निमा नू जोक्कोर इतरारर केरर।
- 19 लिकिन उर्बासी मने र'ओ होले, ऐन चाँइहेम निम्है गुसन बर'ओन। अरा ऐन आ इतरार'उर ही कत्था गुट्ठिन लेका मला, आर ही नलख गुट्ठिन हूँ बिढ़'ओन।
- 20 एन्देरगेका धर्मैसी राजी कत्था गुट्ठी नू मला, लिकिन धर्मैसी सवंग ती उज्जना नूर'ई।
- 21 नीम एन्देर बेददर? ऐन टेम्पा धर'ओन ती बर'ओन का, महले चोन्हा अरा लुदऊ जिया ही बोलता गने बर'ओन का?

1 कोरिन्थ 5

- 1 निम्है नू पेहरन ही सोतरा नलख र'ई एन्ने ऐन मानिम नू मँजकन। ओन्टा आलस तंबासी मुक्कन उइयदस, एन्ने पेहरन ही सोतरा नलख गा धर्मैसिन बल्लुर नू हूँ मल मनी।
- 2 अन्नु हूँ नीम गा फुलई ननुर हिकदर। इदगे नीम जिया दोलखरना ती एन्ने नलख नंजका आलासिन निम्है मझी ती ओथ्रना रहचा।
- 3 ऐन गा मेद नू निम्है मझी नू मलदन, लिकिन बोलता नू निम्है मझी नू र'अदन। ऐन असन र'अदन एन्ने सोच'अरकी ई नलख नंजका आलासिन नैवई नंज खच्चिकादन।
- 4 नीम नम्है उर्बा येसुसी नामे ती खोंइरना बारी, बोलता नू ऐन हूँ निम्है गने र'अदन अरा नम्है उर्बा येसुसी आकुस हूँ निम्है गने र'ई।
- 5 आ बारी आ आलासिन आसी मेद ही नठाब'आ गे सैतान गे सोंप'आ का खोखा आस पाप नन्नन अम्बरकी धर्मैस तरा किर'ओस होले आसी बोलता गा उर्बासी किर'ना उल्ला नू नाइरा ओँगो।
- 6 निम्है फुलई मन्ना दौ मल्ला हिके। नीम एन्देर बलदर का कटी गुना तिस्सा ओर्मा लिंडका गुंडन तिस्सा ननी चि'ई?
- 7 पच्चा तिस्सन अम्बरकी पुना लिंडका गुंडा लेक्खा निमन नेम्हा कम'आ। मानिम नू नीम एन्ने बिगर तिस्सा ही आलर हिकदर, एन्देरगेका नम्है कट्टना ही भेंडो खद्द मसीस नमा गे दाँडे मन्नकादस।
- 8 ओँगो बरा नाम पच्चा तिस्सा ती मला अरा मलदौ नलख अरा कुचुरहा ही तिस्सा ती मला, लिकिन उजगो अरा मानी ही बिगर तिस्सा असमा ती परब मनोत।
- 9 पेहरन ही सोतरा नलख ननुर गने अमके मेस'आ एन्ने ऐन एंगहै चिठी नू निमन लिखचकादन।



10 लिकिन ई खेखेल ता पेहरन ही सोतरा नलख ननुर महले लोभिया महले ठक'उर महले मूर्तिन ओड़ लग्गू आलर गने अमके मेस्र'आ एन्ने ऐन मल लिखचकन। अन्ने होले निमा ई खेखेल ती उरुखना काना मनो दने।

11 लिकिन अक्कुन ऐन निमा गे लिखदन का नीकईम तंगन पत'ऊ ब'अरकी आस पेहरन ही सोतरा नलख ननू महले लोभिया महले मूर्तिन ओड़ लग्गू महले केबर'ऊ महले उंखू महले ठक'ऊ र'अदस होले, आस गने अमके मेस्र'आ, अरा एन्ने बेसे आलर गने ओन्ना मोखना नू हूँ अमके मना।

12 कलीसिया ही बहरी ता आलारिन नैवई नन्ना एंग्हे नलख मल्ला। लिकिन कलीसिया नू र'उर ने पाप नन्नर आरिन नैवई नन्ना मानिम नू निम्है नलख दिम रई।

13 धर्मस गा बहरी ता आलारिन नैवई ननोस। लिकिन नेम्हा पुथी नू लिखका लेक्खा, “नीम मलदौ आलारिन निम्है मझी ती ओथ्रना रई।”

1 कोरिन्थ 6

1 निम्है मदहे नू ओर्तोस गे नन्नस गने नग्गानखना मनी होले, आस नेम्हा आलारिन अम्बदस ती फरिय'आ गे मल पत'ऊ नैवई ननू आलर गुसन एकासे काला ओंग्दस?

2 एन्देर नीम इदिन बलदर का नेम्हा आलर सौंसार ही नैवई ननोर? नीमिम सौंसार ही नैवई ननू र'अदर होले, नीम सन्नी ती सन्नी कत्था ही नैवई नना गे पोलदर का?

3 एन्देर नीम बलदर का नाम मेर्खा पैकारिन हूँ नैवई ननोत? अन्ने होले नीम ई उज्जना ही कत्था गुट्ठिन मानिम नू फरिय'आ ओंग्दर।

4 ओंगे ई उज्जना ही एन्ने लेक्खा कत्था गुट्ठी ही फरिय'अना मनो होले, कलीसिया ही सन्नी ती सन्नी आलारिन नैवई ननू ओक्त'ओय का?

5 ऐन निमन लज्जे मोखत'आ गेम इदन ब'अदन। भई भईसी मझी ता नग्गानखनन नैवई नना गे निम्है मदहे नू ओर्त लूरगर आल हूँ मलकर का?

6 एन्ने मल ननरकी भई भईसी बिड़दो नू नैवई एड़पा कादस, आद हूँ मल पत'ऊ आलर ही मुन्दहारे एन्ने नन्दस।

7 मानिम नू निम्है नू कोहाँ बदी गा ईद रई का नीम नीम नू नालिस मंज नखदर। एन्ने मल नन्ना ती एन्देरगे नीम मलदौ आबोन मल सहदर, एन्देरगे घटा आबोन मल मोखदर?

8 लिकिन नीमिम गा मलदौ नन्दर अरा ठगदर, आद हूँ निम्है भइयोरिन एन्ने नन्दर।



- 9एन्देर नीम बलदर का मलदौ ननू आलर धर्मसी राजी नू मल कोर'ओर? अमके ठकर'आ! पेहरन ही सोतरा नलख ननुर, महले मूर्तिन ओड़ ननुर, महले नन्ना आली गुसन कालुर, महले लम्पट, महले मैतर मैतर गुसन अरा आलीर आलीर गुसन सोतरा ननुर,
- 10महले खलबर महले लोभिया महले उंखुर महले केबर'उर महले ठक'उर धर्मसी राजी नू हिसा मल मनोर।
- 11निम्है नू जोक्कोर एन्नेम रहचर, लिकिन नीम उर्बस येसु मसीसी नामे ती अरा नम्है धर्मसी बोलतस ती नोड़रकर अरा नेम्हा मंजकर अरा उजगो मंजकर।
- 12“जम्मन नना गे एंगा बधा मलकी” एन्ने नीम ब'आ ओंगदर। लिकिन उर्मी गा दौ मलकी। जम्मन नना गे एंगा बधा मलकी, लिकिन ऐन एकअम जिनिस ही जोंख मल मंज खचोन।
- 13“ओन्ना-मोखना कूल गे, अरा कूल ओन्ना-मोखना गे हवे” एन्ने हूँ नीम ब'आ ओंगदर। लिकिन धर्मस एंडानिम उन्दुल नाठाब'ओस। लिकिन मेद गा पेहरन ही सोतरा नलख गे मला, आद उर्बस गे दिम हवे। अरा उर्बस हूँ नम्है मेद मइय्याँ तिहा ननू र'अदस।
- 14अरा धर्मस तंगहै सवंग ती उर्बासिन केचकन ती उज्जताचस, अन्नेम आस नमन हूँ उज्जत'ओस।
- 15एन्देर नीम बलदर का निम्है मेद मसीसी अंग हवे? अन्ने होले ऐन मसीसी अंगन हो'ओन ती नन्ना आलस गुसन कालू आली ही अंग कम'ओन चि'ओन का? कहियों मला।
- 16अरा नीम इदिन बलदर का ने नन्ना आलस गुसन कालू आली गने तंगन मेसदस, आस अदही गने ओन्टा मेद मन्दस कादस? एन्देरगेका नेम्हा पुथी एन्ने ब'ई का, “आर इरबर ओन्टा मेद मनोर।”
- 17लिकिन ने उर्बस गने तंगन मेसदस, आस उर्बस गने ओन्टा बोलता मन्दस कादस।
- 18ओंगे पेहरन ही सोतरा नलख ती बाँगा। अउर नन्ना पाप एकदा आलस नन्दस, अबड़ा जम्मा पाप गुट्ठी मेद ती बहरी मनी। लिकिन पेहरन ही सोतरा नलखन ननू आलस तंगहै मेद ही बिड़दो दिम पाप नन्दस।
- 19नीम इदन बलदर का निम्है मेद नेम्हा बोलतासी मन्दिर हवे? अरा धर्मस ती नीम खक्खका नेम्हा बोलतस निम्है नू ओक्रदस। नीम निम्है मलदर।
- 20एन्देरगेका नीम कोड़हे दाम चि'अरकी खेन्द्रकादर। ओंगे नीम निम्है मेद ती धर्मसी महबा नना।

1 कोरिन्थ 7

- 1“ओर्तोस गे दौ र'ई का आस अम्बोस बैज्रा” एन्ने मुन्द नीम लिखका कत्था ही पत्त नू अक्कु ऐन लिखदन।



- 2पेहरन ही सोतरा नलख बग्गे मन्ना ही चड्डे, उर्मी आलस गे तंग्हे तंग्हे मुक्का र'अना र'ई, अरा उर्मी आली गे तंग्हे तंग्हे मेटस र'अना र'ई।
- 3अरा मेटस तंग्हे मुक्का ही पेहरन ही चाइ गुट्ठिन पूरा नन्ना र'ई। अन्नेम मुक्का हूँ तंग्हे मेटासी पेहरन ही चाइ गुट्ठिन पूरा नन्ना र'ई।
- 4मुक्का गे तंग्हे मेद ही अदिया मलकी, मेटस गा अदही अदिया र'अदस। अन्नेम मेटस गे तंग्हे मेद ही अदिया मलकी, मुक्का गा अदही अदिया र'ई।
- 5नीम ओर्त इरिब नू अमके छिंङ्रा। बिन्ती नना गे लेका नीम इरबर ही मने ती जोक्क बेड़ा गे छिंङ्रा ओंग्दर। अदही खोखा नीम मेसका र'आ, खने सैतान निमा सह'आ पोलना चड्डे निमन चिबाखारना नू अम्बो टिङ्गा।
- 6लिकिन ऐन इबड़न पेसका बेसे मला सलहा बेसे ब'अदन।
- 7ओर्मा आलर हूँ गा एंग्हे लेक्खा डिंडा र'आ गे ऐन बेद्ददन। लिकिन धर्मस तरती ओर्मर गे मुध इनाम खक्खकी र'ई। ईद ओर्तोस ओन बेसे नन्नस गे नन्ना बेसे र'ई।
- 8बिगर बेंजकर अरा रड़ियाहिर ही पत्त नू एंग्हे ब'अना ईद र'ई का आर गे एंग्हे लेक्खा बिगर बेंजका र'अना दौ र'ई।
- 9लिकिन आर तंगन सह'आ पोल्लोर होले बेंज्जर नेकअन, एन्देरगेका पेहरन ही चिबाखारना ती ओलना ती बेंजना दौ हवे।
- 10ने बेंजका र'अनर, आरिन ऐन पेसदन। ईद एंग्हे ती मला लिकिन धर्मस तरती र'ई का मुक्का तंग्हे मेटस ती अम्बो अम्बर'आ।
- 11(लिकिन आद अन्ने ननो होले, आद बिगर बेंजकम र'अना र'ई महले तंग्हे मेटस गने फेन मेसर नखरना र'ई।) अरा मेटस तंग्हे मुक्कन अम्बोस अम्बा।
- 12नन्नर ही पत्त नू उर्बस मला ऐनिम एन्ने ब'अदन का, ओर्त पत्त'ऊ आलासी मुक्का मल पत्त'ऊ आली र'ई, अरा आद आस गने र'आ गे पत्तार'ई होले, आस अदिन अम्बोस अम्बा।
- 13अन्नेम ओर्त पत्त'ऊ आली ही मेटस मल पत्त'ऊ आलस र'अदस, अरा आस अदही गने र'आ गे पत्तारदस होले, आद आसिन अम्बो अम्बा।
- 14एन्देरगेका मल पत्त'ऊ मेटस तंग्हे मुक्का चड्डे धर्मसी मया ही तबे नू बरदस, अरा एन्ने मल पत्त'ऊ मुक्का तंग्हे मेटस चड्डे धर्मसी मया ही तबे नू बर'ई। मला होले निम्है खद्द-खरर धर्मसी मया ही गेच्छा र'ओर दने, लिकिन अक्कु गा आर नेम्हा र'अनर।



- 15 लिकिन मल पत'ऊ मेतस महले मुक्का अम्बर नखनर बेददनर होले, अम्बरनर नेकअन। एन्ने दसा नू पत'ऊ मेतस महले मुक्का बेंजका ही हेंरका नू र'आ गे चाड़ मलकी, एन्देरगेका धर्मस नमन सान्ति ती उज्जा गे मीखकादस।
- 16 अना मुक्कायो, नीन सुरता नन्ना र'ई का नीन निंगहै मेतासी नाइरना ही चड्डे मना उंगदी। अना मेतायो, नीन सुरता नन्ना र'ई का नीन निंगहै मुक्का ही नाइरना ही चड्डे मना आंगदय।
- 17 आँगे ओर्त ओर्त गे उर्बस तंगहै उज्जना नू ओकताचका लेक्खा, अरा धर्मस तंगन मेखका मेखना लेक्खा दिम तंगहै उज्जनन चलाब'अना र'ई। ऐन उर्मी कलीसिया गे एन्नेम नेग चि'अदन।
- 18 नीकईम तान पत'ऊ मंजका ही मुन्द खतना मंजका आलस रहचस होले, आस खतना मल मंजका लेक्खा मना गे चिहूट मल नन्ना र'ई। अरा नेकईम पत'ऊ मंजका ही मुन्द खतना मल मंजका आलस रहचस होले, आस खतना मन्ना ही चाड़ मल्ला।
- 19 खतना मंजका ही हूँ, अरा खतना मल मंजका ही हूँ एन्देर हूँ मोल मल्ला। धर्मसी पेसकन पेसना दिम मोल र'ई।
- 20 ओर्त ओर्त आलस एका लेक्खा धर्मस ती मेखकादस आ लेक्खम ठिमठिम ने र'अदस नेकअन।
- 21 नीन बिट्ठी ननू जौख लेक्खा मेखकादय होले, अदही पत नू अमा घोख'आ, लिकिन निंगा अम्ब'आ गे बेड़ा खक्ख'ओ होले, अम्बनन इङ्ग'आ हो'आ।
- 22 एन्देरगेका ओर्तस उर्बासी मेखना बेड़ा नू बिट्ठी ननू जौख रहचस होले, आस उर्बस नू छछिन्द आल मन्दस। अन्नेम ओर्तस उर्बासी मेखना बेड़ा नू छछिन्द रहचस होले, आस मसीसी बिट्ठी ननू जौख मन्दस।
- 23 नीम कोइहे दाम चि'अरकी खेन्द्रकादर, आँगे आलर ही बिट्ठी ननू जौख अमा मना।
- 24 अना भईरो, ओर्त ओर्त नीम एका दसा नू धर्मस ती मेखकाचकर, आ दसा नुम धर्मस गने ठिमठिम ने र'अन नेकअन।
- 25 अक्कु डिंडा कुक्केर ही पत नू एंगा उर्बस ती एन्देर पेसका हूँ मल्ला खक्खका। लिकिन ऐन पत'अना जोगे मना गे उर्बासी सोग्गे ती एंगहै सलहा चि'अदन।
- 26 ऐन एन्ने सोचदन का इन्नेला ता कलपारना ही चड्डे आलस एकन्ने र'अदस अन्नेम र'अना दौ र'ई।
- 27 नीन बेंजकादय होले, निंगहै मुक्कन अम्बा गे चिहूट अमके नना। अरा नीन मल्ला बेंजका होले, मुक्का बेददना ही चिहूट नू अमके र'आ।



- 28 लिकिन नीन बेंज्रदय होले, नीन पाप मल नन्दय, अरा डिंडा कुक्के बिंज्रई होले, आद पाप मल ननी। लिकिन एकार बेंज्रनर आर ई उज्जना नू बग्गे सस्ती मनोर। इबड़ा ती ऐन निमन खापा बेद्ददन।
- 29 लिकिन भईरो! ऐन निमन एन्देर ब'अदन का बेड़ा गा जुक्की रई। औंगे अक्कु ती ने बेंज्रकानर, आर मल्ला बेंज्रका लेक्खा उज्जनर नेकअन।
- 30 अरा ने चींखनर, आर मल चींखना लेक्खा र'अन नेकअन। अरा ने रिरयरनर, आर मल रिरयारना लेक्खा र'अन नेकअन। अरा ने एन्दरन खीन्दू आलर र'अनर, आर आद तमा मल्ला बेसे र'अन नेकअन।
- 31 अरा ने ई खेखेलन ता जिनिसन बउरारनर, आर अबड़ा ही गने बग्गे पतार'ऊ मल मन्ना रई। एन्देरगेका ई खेखेल बग्गे उल्ला गूटी मल र'ओ।
- 32 ऐन बेद्ददन का निमा इन्द्रिइम फिकिर अम्बो मना। ने मल्ला बेंज्रका, आस उर्बासिन एकासे रिझाब'ओन ब'अरकी उर्बासी पत नू लेका फिकिर नन्दस।
- 33 लिकिन बेंज्रका आलस तंग्हे मुक्कन एकासे रिझाब'ओन ब'अरकी आस ई खेखेल ता कत्था नू फिकिर नन्दस।
- 34 अरा आसी मने ऐंड भाग मनी। अन्नेम मल बेंज्रका आली महले डिंडा कुक्के तंग्हे मेद अरा बोलता दुयो नू नेम्हा मना गे उर्बासी पत ता कत्था नू लेका फिकिर ननी। लिकिन बेंज्रका आली तंग्हे मेतासिन एकासे रिझाब'ओन ब'अरकी आद ई खेखेल ता कत्था नू फिकिर ननी।
- 35 ऐन इदन निमन अइझ'आ गे मल ब'अदन, लिकिन नीम ओन्टा मन मंजका ती उर्बासी सुसर नू बोथ्रका र'आ गे निमा दौ गे दिम इदन ब'अदन।
- 36 अरा नेकईम तंगा गे ठनचका डिंडा पेल्लो गने तान मलदौ नना ओंग्दन एन्ने एल्चदस, अरा अदही उम्मर खसलार'आ लगी एन्ने सोचदस होले, आस तंग्हे मने लेक्खा अदिन बेंज्रा ओंग्दस। आद पाप मल्ली। आर बेंज्रनर नेकअन।
- 37 अन्नु हूँ नेकईम बेंजा ही चाइ मल्ला एन्ने तंग्हे जिया नू पखड़ र'अस ती तंग्हे मेद ही चिबाखारना आबोन तंग्हे आकुस नू उइय्यू र'अस ती डिंडा पेल्लोन मल बेंज्रोन ब'अरकी ठनचका र'अदस होले, आस हूँ ठौकम नन्दस।
- 38 औंगे एकास डिंडा पेल्लोन बेंज्रदस, आस दौ नन्दस। लिकिन एकास अदिन मल बेंज्रदस, आस बेस दौ नन्दस।



39मुक्का एका गूटी तंग मेटस उज्जालदस आ गूटी आद आस ती हीरकी रई। लिकिन अदही मेटस खे'अदस होले, आद उर्बस नू र'ऊ नेकानिम तंगहै मने लेक्खा बेंज्र आ उंगी।

40अन्नु हूँ एंगहै सलहा ईद रई का, आद बिगर बेंज्रका ती अन्नेम रही क'ओ होले, आद कोइहे बरकत खक्खू आली रई। ऐन पत'अदन का धर्मसी बोलता एंगहै मइय्याँ रई।

1 कोरिन्थ 8

1अक्कु मूर्ती गुट्ठी गे दाँड़े अरगका ओन्ना-मोखना ही पत नू एंगहै ब'अना ईद रई का नाम ओर्मत गे इदही पत ता लूर रई का मूर्ती गुट्ठी गे दाँड़े अरगका ओन्ना-मोखनन मोखना पाप मलकी। लूर आलारिन फुलई मन्त'ई, लिकिन चोन्हा आलारिन कम'ई।

2एकास ऐन उर्मिन अखदन एन्ने सोचदस होले, मानिम नू आस एकन्ने अखना चाड़ रई अन्ने अक्कु गूटी बलदस।

3लिकिन ओर्तोस धर्मसिन चोन्हा नन्दस होले, आस धर्मस ती अखतारदस।

4मूर्ती गुट्ठी गे दाँड़े अरगका ओन्ना-मोखनन मोखना ही पत नू नाम अखदत का मूर्ती खेखेल नू एन्देर आलो हूँ मल्ली अरा धर्मस ओर्तोसिन अम्बरकी नन्ना ने हूँ धर्म मल्दस।

5मेर्खा नू अरा खेखेल नू देवता गुट्ठी बारना गा रई। (एकासे का अजम बग्गे देवता गुट्ठी अरा अजम बग्गे उर्बर र'अनर।)

6अन्नु हूँ नमा गे ओन्टे लेका धर्म बंगस र'अस, आस तिम उर्मी गढ़रा, अरा आस गेम नाम उज्जा लगदत। अरा नमा गे ओन्टे लेका उर्बस र'अस, आस दिम येसु मसीस, आस तरतिम उर्मी गढ़रा, अरा आस तरतिम नाम उज्जा लगदत।

7लिकिन उर्मी पत'ऊ आलर ई लूरन मल खक्खियर। जोक्क आलर अक्कु गूटी मूर्ती गुट्ठिन मानिम आलो एन्ने सोचनर। औंगे मूर्ती गुट्ठी गे दाँड़े अरगका ओन्ना-मोखनन मोखना बारी, आद मूर्ती गुट्ठी गे दाँड़े अरगका ओन्ना-मोखना एन्ने दिम सोचनर। अरा आर ही लखना इदही पत नू फरी मल र'अना चड्डे आद मइखी कई।

8ओन्ना-मोखना नमन धर्मस गुसन मल अइसत'ई। नाम इदन मल ओनोत होले हूँ, नमा गे एन्द्रा हूँ जुक्की मल मनो, अरा अदन ओनोत होले हूँ, नमा गे कोइहे बेस मल मनी।

9लिकिन नीम चिहुंक र'आ का, निम्है छछिन्द पत'अना नू पयहा आलारिन पाप नू अम्बोर खत्रत'आ।



- 10 एकासे का एन्ने लूर र'ऊ आलर नीम मूर्ती ही मन्दिर नू ओना गे ओक्कनन लखना नू पयहा र'ऊ आलस ऐरदस होले, आस हूँ मूर्ती गुट्ठी गे दाँड़े अरगका ओन्ना-मोखनन मोखा गे डिढ मनोस।
- 11 निम्है लूर ही चड्डे जुक्की पत्त'अना र'ऊ भईस मल नठारना र'ई। मसीस आस गे हूँ केचस।
- 12 ई लेक्खा निम्है भईसी बिड़दो नू पाप नन्ना ती इदही पत्त नू फरी मलका आसी लखनन नुंजत'अना ती नीम मसीसी बिड़दो पाप नन्दर।
- 13 औंगे ऐन एन्द्रन ओन्दन-मोखदन, आद एंग्हे पत्त'ऊ भईसिन पाप नन्त'आ गे ननी होले, ऐन एंग्हे पत्त'ऊ भईसिन पाप नू मल खत्रत'आ गे अहड़ा कभो मल मोखोन।

1 कोरिन्थ 9

- 1 ऐन छछिन्द आलन र'अदन। ऐन तइरकन हिकदन। ऐन नम्है उर्बा येसुसिन ईरकादन। उर्बस नू नीम एंग्हे अर्जाचका हिकदर।
- 2 नन्नर एंगन तइरकन मल बुझना ती हूँ, ऐन मानिम नू निमा गा तइरकन हिकदन। एन्देरगेका उर्बस नू नीम एंग्हे तइरका नलख ही पुरुब र'अदर।
- 3 एका ओर्तर एंग्हे मइय्याँ नैवई नन्नर, आर गे ईद एंग्हे आनाकिर्त'अना हवे।
- 4 एमा गे निम्है ओन्ना-मोखना नू बटा मन्ना ही अदिया मल्ला का?
- 5 नन्ना तइरकर अरा उर्बासी तंग्ड़िबगर अरा पतरस नन्ना लेक्खा एम्है गने पत्त'ऊ आलिन बेंज्रका ती हो'अना काना गे एमा गे अदिया मल्ला का?
- 6 महले बरनबास अरा ऐन लेका नलख नन्ना ती उज्जना बिज्जना र'ई का?
- 7 ने तंग्हे ओन्ना-मोखना गे ढिबा चि'अरकी सैना नू नलख नन्दस? ने अंगुर ही बटकी लगाब'अरकी अदही खंजपन मल मोखदस? ने अड्डो ऐड़ा पोसदस ती अदही दुदहिन मल ओन्दस?
- 8 ऐन इबड़ा कत्थन आलर ही ब'अना लेक्खा मल ब'अदन। धर्मेसी नेग हूँ ई बेसेम ब'ई।
- 9 ईद मूसासी नेग नू लिखकी र'ई, “दंउरी नाबना अड्डो ही बइय्यन अमके मुढ़'आ।” धर्मेस इसन अड्डो ही पत्त नू लेका घोख नन्दस का? मला।
- 10 मानिम नू आस इदन नमा गेम बाचकादस। हाँ, ईद नमा गेम लिखकी र'ई। एन्देरगेका खल्ल नू गोहला उइय्युस अरा नाबू आलस खोयना नू तंग्हे हिसन खक्खोस एन्ने असरा ती नन्ना र'ई।
- 11 ऐम निम्है मड़ी नू बोलता ही बिहनी लेक्खा दौ कत्थन चाँखकम, अन्ने होले एमा गे अदिया र'ई का ऐम निमा ती एमा उज्जा बिज्जा गे जोक्क जिनसन खोयोम।



- 12निम्है नू दौ कत्था तिंका नन्नर गे निम्है नू ती जोक्क खक्खा गे अदिया रई होले, एमा गे हूँ अदही ती बग्गे अदिया रई। लिकिन ई अदियन ऐम आलर नू मल लच्चकम। ऊजी नू मसीसी दौ कत्था गे बधा मल मना गे ऐम उर्मी खिलपत आबोन सारदम।
- 13नीम मानिम नू अखदर का एकार धर्मेसी मन्दिर नू नलख नन्नर, आर तम्है ओन्ना-मोखनन अइय्यम बरचका दान तिम खक्खनर। अरा एकार गोइहा नू नलख नन्नर, आर गोइहा ता दाँड़े ती ओन हिसन खक्खनर।
- 14ई लेक्खम उर्बस आनकादस का, दौ कत्था तेंगा कुद्दुर आर ही उज्जना बिज्जना ही चाइन अत्रुतिम खक्खना रई।
- 15अन्नु हूँ ऐन इबड़ा अदिया आबोन कहियों मल बउराचकन। अउर हूँ एन्ने लेक्खा कत्थन नीम एंगा गे ननोर एन्ने असरा ती इदन मल लिखदन। सिथियम दौ कत्था तेंगना ही एंगा ई फुलई नन्नन नीकईम अम्बत'अना ती एंगा खे'अना दौ रई।
- 16अन्नु हूँ ऐन दौ कत्था तेंगदन होले, इदगे एंगा फुलई मना गे अइडा मल्ली, एन्देरगेका ऐन इदन नना गे धर्मेस एंगन बइपेलहा नंजस। ऐन दौ कत्था मल तेंगोन होले एंगा गे ओहरे।
- 17ऐन इदन एंग्हे मने ती नन्दन होले, एंगा गे इनाम खक्ख'ओ। लिकिन ऐन एंग्हे मने ती मल नन्दन होले हूँ, एंगा चीरकी रई आ नलखन दिम ऐन नन्दन।
- 18अन्ने होले एंगा एन्देर इनाम खक्ख'ओ? ऐन एंगा अदिया आबोन मल खक्खरकी नेखा ती हूँ एन्द्रन हूँ मल खक्खना ही असरा ती दौ कत्थन सिथियम तेंगना ती खक्खना जिया सान्ति दिम एंगा इनाम हिके।
- 19ऐन छछिन्द र'अदन, नेखा हूँ एंग्हा मइय्याँ अदिया मलकी। अन्नु हूँ ऐन ओर्मर ही बिट्ठी ननू जौख मंजकन का बग्गे आलारिन मसीस नू ओन्द्र'ओन।
- 20ऐन यहूदीर गे यहूदी लेक्खा मंजकन, का यहूदीरिन मसीस गुसन ओन्द्र'ओन। एकार यहूदी नेग ही तबे नू र'अनर आर गे ऐन हूँ यहूदी नेग ही तबे नू मंजकन। एंगा गा यहूदी नेग ही तबे नू र'आ गे चाइ मलकी। अन्नु हूँ ने यहूदी नेग ही तबे नू र'अनर आरिन मसीस गुसन ओन्द्र'आ गे ऐन अन्ने मंजकन।
- 21ने यहूदी नेग नू मलनर आरिन मसीस गुसन ओन्द्र'आ गे ऐन हूँ यहूदी नेग मलका बेसे मंजकन। अन्नु हूँ ऐन धर्मेसी नेगन मल अम्बकन, अरा मसीसी नेगन ऐन पेसकन।
- 22पयहर गे ऐन पयहा मंजकन का पयहारिन मसीस गुसन ओन्द्र'ओन। एकअम अन्ने ती जोक्क आलारिन नाइरा गे ऐन ओर्मर गे ओर्मर लेक्खा मंजकन।



- 23 ऐन दौ कत्था ही आसीस नू बटा मना गेम दौ कत्था ही चड्डे ऐन इबड़ा उर्मिन नन्दन।
- 24 एन्देर नीम इदिन बलदर का बोंगना नू बुंगुर ओर्मर गा बोंगनर, लिकिन ओर्तोस लेका इनाम खक्खदस? ओँगे नीम जितना बेसे बोंगा।
- 25 ओर्मा बीचुर गा उर्मी मदहे कत्था नू तमन सम्ड़'अनर। ईर नठारना इनामन खक्खा गे एन्ने नन्नर। लिकिन नाम गा मल नठारना इनामन खक्खा गे एन्ने नन्दत।
- 26 ओँगे ऐन अयंध'आ बेसे मल बोंगदन। ने ताका ती अरबानखनर आर बेसे ऐन मल कुंहड़ाचनखदन।
- 27 लिकिन ऐन एंग्हे मेदन सम्ड़'अदन ती एंग्हे तबे नू नन्दन का नन्नारिन तेंगर मेन्त'अरकी खोखा ऐनिम इनाम खक्खना ही बिगर जोगे मल मनोन।

1 कोरिन्थ 10

- 1 अना भईरो! नीम इबड़ा कत्था ही पत नू बल्लुर लेक्खा र'आ गे ऐन मल बेदददन का, नम्है पूरखर ओर्मरिन धर्मस टुंगरी नू बदाली ऐख नू कड़हाबाचस ती होच्चस, अरा आर ओर्मर खेंसो समुदरन कट्टियर।
- 2 अरा आर ओर्मर बदाली ही ऐख नू काना अरा समुदरन कट्टरकी काना मूसासी चोखर'उर मना गे नोडरत'अना लेक्खा रहचा।
- 3 अरा आर ओर्मर धर्मस ती चिच्का ओन्टम ओन्ना-मोखनन मोक्खर।
- 4 अरा आर ओर्मर धर्मस ती चिच्का ओन्टम अम्मानिम ओँडर। एकासे का आर तम्है गने इक्किया आ बोलता ही चचड़ी ती ओँडर, आ चचड़ी मसीस रहचस।
- 5 अन्नू हूँ अबडर ती बग्गे आलर गने धर्मस मल रिङ्गस। ओँगे आर टुंगरी नू नठारर केरर।
- 6 आर मलदौ मइय्याँ चिबाखारियर, अन्ने नाम हूँ अम्बोत नना, इदगे इबड़ा कत्था नमा गे चेताब'अना लेक्खा र'ई।
- 7 “आलर ओना मोखा गे उक्कियर अरा लला तोका गे चोचर” एन्ने नेम्हा पुथी नू लिखकी र'ई। ई लेक्खा अबडर ती जोक्कोर मूर्ती गुट्ठी गे ओड़ नंजकाचर। आर ही लेक्खा नीम अमके मना नेकअन।
- 8 अरा अबडर ती जोक्कोर पेहरन ही सोतरा नलख नंजर ती उन्दुल लेका तेइस हजार आलर केचर केरर। आर ही लेक्खा नाम हूँ पेहरन ही सोतरा नलख अम्बोत नना नेकअन।



- 9 अरा अबडर ती जोक्कोर उर्बासिन बिद्धचर ती नेरें गुट्ठी ती पिटतारर। आर ही लेक्खा नाम हूँ मसीसिन अम्बोत बिद्ध'आ नेकअन।
- 10 अरा अबडर ती जोक्कोर कुनमुनरर ती पिटना मेर्खा पैकस ती नठाबारर। अन्ने नीम हूँ अमा कुनमुनर'आ।
- 11 नमा गे चेताब'अना लेक्खा इबड़ा उर्मी कत्था गुट्ठी आर गे मंजा। अरा खेखेल ही मुंजना बेड़ा नू र'अदत, नमा गे इबड़ा कत्था तिगाब'आ गे लिखकी र'ई।
- 12 औंगे एका ओर्तस सोचदस का आस बड़ियर इज्जकादस, आस चिहूंक र'अन नेकअन का अम्बोस खत्र'आ।
- 13 आलर गे बर'ई आ बिद्धना ती नन्ना बिद्धना निमा गे मल बर'ई। धर्मस पत्त'अना जोगे र'अस। आस निमन चोद'आ पोलना बिद्धना नू मल मना चि'ओस, अरा बिद्धना ही गने अइय्या ती उरखना ही डहरे हूँ ऐद'ओस, एकत्रु नीम अदिन सह'आ औंगोर।
- 14 औंगे एंग्हे चोन्हा आलारो! मूर्ती गुट्ठिन ओड़ लग्गना ती तरकूटी र'आ।
- 15 ऐन निमन लूरगर सोच'अरकी ब'अदन। ऐन एन्देर ब'अदन, अदिन नीमिम पारिख नना।
- 16 आ आसीस ही डुभा, एकाद गे नाम धर्मसिन धन्यवाद नन्दत, आद ती नाम मसीसी खेंसन खट्टर'आलदत। अरा आ असमा, एकदन नाम किच्चदत, आद ती मसीसी मेदन नाम खट्टर'आलदत।
- 17 नाम ओर्मत आ ओन्टे असमन खट्टरदत, ई चड्डे नाम बग्गेम र'अदत, अन्नु हूँ ओन्टे असमा ओन्टे मेद हिकदत।
- 18 इस्राएल आलर ही पत नू सोच'आ। एकार दाँडे नंजका आबोन मोखनर, आर गोड़हा नू धर्मसी सुसर नन्ना नू मेसनर।
- 19 अन्ने होले, मूर्ती एन्द्रिइम हिके, महले मूर्ती गे अरगका दाँडे एन्द्रिइम हिके, एन्ने ऐन ब'अदन का?
- 20 मला। लिकिन एकाबइन आर दाँडे अरगनर, अबइन धर्मस गे मला नाद गुट्ठी गे दाँडे अरगनर। अरा नीम नाद गुट्ठी गने मेस्र'आ गे ऐन मल बेद्ददन।
- 21 नीम उर्बासी डुभा अरा नाद ही डुभा दुनू ती ओना पोलदर। अरा नीम उर्बासी खुड़ती अरा नाद गुट्ठी ही खुड़ती दुनू नू मेस्र'आ पोलदर।
- 22 एन्ने नाम उर्बासिन कैर'अदत का? नाम आसी ती कोड़हे सवंगिय र'अदत का?



- 23निम्है ती जोक्कोर ब'अनर, "उर्मिन एंगा नना गे अदिया र'ई।" लिकिन उर्मिन नन्ना नू फैदा मलकी, उर्मिन एंगा नना गे अदिया र'ई, लिकिन उर्मी गा परदा गे सहाड़ा मल चि'ई।
- 24ओर्तोस तंगहै दौ आबोन लेका अमा ऐरा, नन्नर ही दौ आबोन हूँ ऐरा।
- 25अहड़ा बजार नू बीसना एकअम अहड़न निम्है लखना अदही पत नू बिड़दो इन्द्रिइम मल ब'अना चड़डे इन्द्रिइम बिगर मेंजकम नीम खेन्दा ती मोखा आंगदर।
- 26एन्देरगेका नेम्हा पुथी नू लिखकी र'ई, "खेखेल अरा अइय्या र'अना उर्मीदिम उर्बासी हवे।"
- 27मल पत'ऊ आलर ती ओर्तोस निमन मदी गे ऐड़दस अरा नीम असन काला बेद्ददर होले, असन एन्द्रा ओना मोखा गे चीर'ई, निम्है लखना अदही पत नू बिड़दो इन्द्रिइम मल ब'अना चड़डे इन्द्रिइम बिगर मेंजकम अदिन ओना मोखा आंगदर।
- 28लिकिन नीकईम निमन ईद मूर्ती गुट्ठी गे दाँडे अरगका एन्ने तेंगदस होले, नीम अदिन अमके मोखा। इदिन तिंका आलस चड़डे अरा आसी लखना अदही पत नू बिड़दो इन्द्रिइम ब'अना ही चड़डे अदिन अमके मोखा।
- 29एंगहै ब'अना निम्है लखना ही पत नू मला, लिकिन नन्नासी लखना ही पत नू र'ई। एन्देरगेका एंगहै छछिन्द नन्नासी लखना ती एन्देरगे पारिख नन्तार'ओ?
- 30ऐन धर्मसिन धन्यवाद नन्दन ती ओन्दन मोखदन होले, ऐन धन्यवाद नंजका ओन्ना-मोखना ही पत नू एन्देरगे एंगहै बदी मनी?
- 31औंगे नीम ओनोर महले मोखोर महले इन्द्रिइम ननोर, उर्मिन धर्मसी महबा गे नना।
- 32नीम यहूदीर गे महले नन-यहूदीर गे महले धर्मसी कलीसिया गे नेख'अम हूँ पाप नू खत्रना ही चड़डे अमा मना।
- 33अन्ने ऐन हूँ ऐन नन्दन अबड़ा उर्मी ती ओर्मरिन रिझत'आ गे चिहूट नन्दन। अरा ऐन एंगहै दौन मल बेद्ददन, लिकिन बग्गेर ही दौन बेद्ददन, होले आर नाइर'आ आंगनर।

1 कोरिन्थ 11

- 1नीम एंगहै ऐकना लेक्खा ऐका, एकासे ऐन मसीस लेक्खा ऐकदन।
- 2ऐन निमन सवर'अदन का नीम एंगन उर्मी कत्था नू सुरता नन्दर अरा ऐन एन्द्रा निमा गे सिखाबाचकन, अबड़न नीम नन्दर।
- 3लिकिन नीम इदन अख'आ ऐन बेद्ददन का, मसीस उर्मी आलर ही कुक्कु हिकदस, अरा मैतस मुक्का ही कुक्कु हिकदस, अरा धर्मस मसीसी कुक्कु हिकदस।



- 4 औंगे एका ओर्तस तंगहै कुक्कन कुलकुटुरदस ती गोहरारदस महले धर्मसी कत्थन मुन्द तेंगदस, आस तंगहै कुक्कु मसीसिन हींइदस।
- 5 अरा एका मुक्का तंगहै कुक्कन बिगर कुलकुटुरका गोहरार'ई महले धर्मसी कत्थन मुन्द तिंगी, आद तंगहै कुक्कु मेतासिन हींइ'ई। ईद तंगहै कुक्कन मुंडुरका लेक्खा र'ई।
- 6 एन्ने ओन्टा मुक्का तंगहै कुक्कन मल कुलकुटुर'ई होले, आद तंगहै कुक्कु ता चुट्टिन खंडना र'ई। लिकिन चुट्टी खंडरना महले मुंडुरना मुक्का गे लज्जे लग्गी होले, आद तंगहै कुक्कन कुलकुटुरना र'ई।
- 7 मेतस गे कुलकुटुरना चाड़ मलकी, एन्देरगेका आस धर्मसी रूपे अरा महबा हिकदस। लिकिन मुक्का मेतासी महबा र'ई।
- 8 एन्देरगेका मेतस मुक्का ती मल्ला गढूका, लिकिन मुक्का मेतस ती गढूकी र'ई।
- 9 अरा मेतस मुक्का गे मल्ला गढूका, लिकिन मुक्का मेतस गे गढूकी र'ई।
- 10 ई चड्डे, अरा मेर्खा पैकर अदही मइय्याँ ऐरना ही चड्डे, मुक्का गे तंगहै मेतासी अदिया ही किय्या र'अना ही ओन्टा चिन्हा आबोन तंगहै कुक्कु नू उइय्ना र'ई।
- 11 अन्नु हूँ उर्बस नू मुक्का बिगर मेतस मलकस, अरा बिगर मेतस ती मुक्का मलकी।
- 12 एन्देरगेका एकासे मेतस ती मुक्का गढूकी र'ई, अन्नेम मेतासी कुन्द्रना मुक्का ती र'ई। लिकिन उर्मी ही बरना धर्मस ती मनी।
- 13 मुक्का बिगर कुलकुटुर'अम धर्मसिन गोहरारना बेस ईथ्र'ई का? नीम अपन तिम सोच'आ।
- 14 आल सुबहा दिम निमन सिखाब'ई का मेतस दिगहा चुट्टी उइय्दस होले, आद आस गे लज्जे मोख्रना कत्था हवे।
- 15 लिकिन मुक्का दिगहा चुट्टी उइय्यी होले, आद अदगे महबा हवे, एन्देरगेका चुट्टी अदगे कुलकुटुर'आ गेम चीरकी र'ई।
- 16 लिकिन नेकइम ई पत्त नू आनानख'आ बेददस होले, इदन अख'आ हो'आ का एमा गे महले धर्मसी कलीसिया गुट्ठी गे अउर नन्ना नेगचार मल्ला।
- 17 ऐन खोखा ता तिगाब'अना गुट्ठी नू निमन मल सवर'अदन, एन्देरगेका निम्है खोंइरना दौ ती कोइहे मलदौ आबोन ओन्द्र'ई।
- 18 मुन्द गा ऐन एन्ने मेन्दन का नीम कलीसिया बेसे खोंइरदर खने, निम्है नू खाइरना गुट्ठी र'ई। अदन ऐन कटिक कटिक पत्त'अदन।



- 19ने निम्है नू बड़ियर उरखकानर आरिन अखतार'आ गे, खाड़रना निम्है मझी नू मन्ना ही चाड़ रई दिम हिके।
- 20नीम ओन अड्डा खोंड़रदर खने, नीम मानिम नू उर्बासी खुड़तिन मल ओन्दर।
- 21एन्देरगेका ओनो बारी ओर्त ओर्तस तंग्हे खुड़तिन नन्नारिन बिगर खोख'अम ओन्दस। औंगे ओर्तस कीड़म र'अदस, अरा नन्नस उंखदस कादस।
- 22ओना मोखा गे निम्है एड़पा मलकी का? नीम धर्मसी कलीसियन हींड़र ती कीड़ारिन लज्जे मोखत'अदर का? ऐन निम्है ती एन्देर ब'ओन? इदही पत नू ऐन निमन सवर'ओन का? ऐन मानिम नू मल सवर'ओन।
- 23एन्देरगेका ऐन ई कथन उर्बस ती खक्खन, अरा ऐन इदन निमा गे हूँ अंडसताचकन। उर्बा येसुस एका माखा पितर'आ गे धरतारस, आस असमन होचस,
- 24अरा धन्यवाद नंजस ती अदिन किच्चियस अरा बाचस, “ईद एंग्हे मेद हवे, ईद निमा गे हवे, एंगन सुरता नना गे इदन ननके।”
- 25ई लेक्खम खुड़तिन ओंडका खोखा, आस डुभा नू अंगुर रासिन होचस ती बाचस, “ई डुभा एंग्हे खेंस ती मंजका पुना गच्छरना हवे। नीम एका एका बारी इदन ओन्दर, आ बारी एंगन सुरता नना गे इदन ननके।”
- 26एन्देरगेका एका एका बारी नीम ई असमन मोखदर अरा ई डुभा ती ओन्दर, आ बारी उर्बासी बरना गूटी आसी खे'अनन मेन्त'अदर।
- 27औंगे नेकड़म उर्बासिन मईन मल नन्ना ही तरीका ती उर्बासी ई असमन मोखदस महले उर्बासी ई डुभा ती ओन्दस होले, आस उर्बासी मेद अरा खेंस ही बिड़दो नू पाप नन्ना ही बदी नू र'ओस।
- 28औंगे ओर्तस तंग्हे जिया ही अन्थन बिढ़चका ही खोखा ई असमन मोखदस अरा ई डुभा ती ओन्दस नेक'आ।
- 29एन्देरगेका एका ओर्तस उर्बासी मेद एन्ने बिगर चिन्हचका इदन ओन्दस अरा मोखदस होले, आस तंग्हे दिम दंडे गे ओन्दस अरा मोखदस।
- 30ई चड्डेम निम्है ती कोड़हे आलर पयहा अरा रोगे र'अनर, अरा जोक्कोर केचर हूँ केरर।
- 31लिकिन नाम नम्है जिया ही अन्थन ठौका ठौका बिढ़चकत होले, नाम धर्मस ती एन्ने नेंवई मल नन्तार'ओत।
- 32अन्नु हूँ नाम नेंवई मन्तारना बारी सौंसार गने दंडे अम्बोत मना गे उर्बस नमन कोड़दस।



33 औंगे अना भईरो, नीम ओना मोखा गे खोंडरदर होले, ओर्त इरिबारिन खोखोच नख्र'आ।

34 नेका कीड़ा लग्गी होले, आस तंग्हे एड़पा नू ओन्दस नेकअन। औंगे नीम खोंडरना बारी दंडे ही जोगे अम्बोर मनोर। अरा नन्ना कत्था ही पत्त ता तिगाब'अनन ऐन बरना बारी चि'ओन।

1 कोरिन्थ 12

1 अक्कुन अना भईरो! नीम नेम्हा बोलतासी इनाम ही पत्त नू बल्ला गे ऐन मल बेद्ददन।

2 नीम अखदर का नीम धर्मसिन बलना नू रहचकर खने, नीम कोन्दा मूर्ती गुट्ठिन ओड़ लग्गा गे बिड़दो डहरे गुट्ठी नू एकतार'आ लिक्कर।

3 औंगे ऐन निमन तेंगदन का, एका आलस हूँ धर्मसी बोलतस ती ब'अदस, आस एन्ने मल ब'अदस का, “येसुस सर्पारदस।” अरा एका आलस हूँ नेम्हा बोलतस ती बिगर तेंगना ही एन्ने ब'आ पोलदस का, “येसुस दिम उर्बस हिकदस।”

4 नेम्हा बोलतासी इनाम गुट्ठी गा कैनो मदहे रई, लिकिन नेम्हा बोलतस ओन्टा दिम र'अस।

5 अरा सुसर'अना गुट्ठी गा कैनो मदहे रई, लिकिन उर्बस ओन्टा दिम र'अस।

6 अरा धर्मसी नलख गुट्ठी गा कैनो मदहे रई, लिकिन ओन्टेम धर्मस उर्मी आलर नू उर्मी नलखन नन्दस।

7 ओर्मा आलर गे ओर्मर ही दौ नना गे नेम्हा बोलतासी इनाम खक्ख'ई।

8 एकासे का ओर्तस गे नेम्हा बोलतस ती हया ही कत्था, अरा नन्नस गे आ बोलतस तिम लूर ही कत्था चीरकी रई।

9 अरा नन्नस गे आ बोलतस तिम पत्त'अना चीरकी रई। अरा नन्नस गे आ बोलतस तिम कोड़े नन्ना ही इनाम गुट्ठी चीरकी रई।

10 अरा नन्नस गे हैकट नलख गुट्ठी नन्ना ही सवंग, अरा नन्नस गे धर्मसी कत्थन मुन्द तेंगना, अरा नन्नस गे बोलता गुट्ठिन लखना, अरा नन्नस गे कैनो मदहे बलना भखा गुट्ठिन कछनख्रना, अरा नन्नस गे आ कैनो मदहे बलना भखा गुट्ठी ही मने तेंगना ही सवंग चीरकी रई।

11 इबड़ा जम्मा आ ओन्टे बोलतस दिम नन्त'अदस, अरा आस तंग्हे मने लेक्खा ओर्त ओर्तस गे खट्टदस चि'अदस।

12 एकासे का आलर ही मेद ओन्टा रई, अन्नु हूँ अदही कैनो गोटंग अंग मनी। अरा उर्मी अंग कैनो गोटंग रई, अन्नु हूँ ओन्टा मेद मनी काली। एन्ने लेक्खम मसीस हूँ र'अस।



- 13 एन्देरगेका नाम यहूदीर मलता नन-यहूदीर मलता बिट्ठी ननू जौख मलता छछिन्द र'अदत। अन्नु हूँ नाम ओर्मत ओन्टे नेम्हा बोलतस ती ओन्टे मेद नू नोडरकत। अरा नाम ओर्मत ओन्टे नेम्हा बोलतासिन खक्खकत।
- 14 मेद गा ओन्टा मला कैनो गोटंग अंग ती मनी।
- 15 खेड्डे बई का, “ऐन खेक्खा मलदन, आँगे ऐन मेद ही मलदन” एन्ने होले, ई चड्डे आद मेद ही अंग मल्ली का?
- 16 अरा खेबदा बई का, “ऐन खन्न मलदन, आँगे ऐन मेद ही मलदन” एन्ने होले, ई चड्डे आद मेद ही अंग मल्ली का?
- 17 गोट्टा मेद ओन खन्न दिम र'अना होले, आद एकासे मेनो दने? अरा गोट्टा मेद ओन खेबदा दिम र'अना होले, आद एकासे नुसुंगा आँगे दने?
- 18 लिकिन धर्मस ओन्टा ओन्टा अंग गुट्ठिन तंग्हे मने लेक्खा मेद नू उड्यकादस।
- 19 अबड़ा उर्मी दिम ओन्टम अंग रहचा होले, मेद एसन र'ओ दने?
- 20 अक्कु अंग गुट्ठी गा कैनो गोटंग रई, लिकिन ओन्टम मेद मनी।
- 21 आँगे खन्न खेक्खा ती ब'आ पुल्ली का, “एंगा निंग्हे चाड़ मलकी।” अरा कुक्कु खेड्डे ती ब'आ पुल्ली का, “एंगा निंग्हा चाड़ मलकी।”
- 22 मानिम नू मेद ही अंग गुट्ठी नू एकाद पयहा ईश्रई, अबड़ा अंग गुट्ठी दिम कोडहे चाड़ रई।
- 23 अरा मेद ही एका अंग गुट्ठिन नाम मईन जोगे मल सोचदत, अबड़ानिम नाम कोडहे मईन चि'अदत। अरा नम्है नू मल सोभना अंग गुट्ठी दिम कोडहे फबना खक्खी।
- 24 अरा नम्है नू सोभई अबड़ा अंग गुट्ठी गे फबना ही चाड़ मलकी। लिकिन धर्मस गा एका अंग गुट्ठी गे जुक्की मईन जोगे रई, अबड़ा गे बग्गे मईन चि'अना लेक्खा मेद ही अंग गुट्ठिन संटचकादस।
- 25 ईद इदगे मंजा का मेद नू खाडरना अम्बो मना, अरा अदही उर्मी अंग गुट्ठी ओन्टा ओन्टा गे संगरा ननो।
- 26 अरा मेद नू ओन्टा अंग गे दुक्खे मनी होले, अदही संगे उर्मी अंग गे दुक्खे मनी। अरा ओन्टा अंग गे मईन मनी होले, अदही गने उर्मी अंग खुसमार'ई।
- 27 अक्कुन नीम ओर्मर मेस'अरकी मसीसी मेद हिकदर, अरा निम्है ती ओर्त ओर्त आसी मेद ही ओन्टा ओन्टा अंग हिकदर।



28 अरा धर्मस कलीसिया नू जोक्क आलारिन ओकताचकादस। पहिल गा तइरकारिन, दोसर धर्मसी कथन मुन्द तिगुरिन, तिसर धर्मसी कथा सिखाब'उरिन ओकताचकादस। अदही खोखा हैकट नलख गुट्ठी ननुरिन, अदही खोखा कोड़े नना गे सवंग खक्खका आलारिन ओकताचकादस। अदही गने नन्नर गे संगरा ननुरिन, अरा कइहाब'उरिन, अरा कैनो मदहे बलना भखा गुट्ठिन कछनख'उरिन ओकताचकादस।

29 ओर्मारिम तइरकर का? अरा ओर्मारिम धर्मसी कथन मुन्द तिगुर का? अरा ओर्मारिम धर्मसी कथा सिखाब'उर का? अरा ओर्मारिम हैकट नलख ननुर का?

30 अरा ओर्मारिम कोड़े नना गे सवंग खक्खका आलर का? अरा ओर्मारिम कैनो मदहे बलना भखा गुट्ठिन कछनख'उर का? अरा ओर्मारिम आ कैनो मदहे बलना भखा गुट्ठी ही मने तिगुर का? मला।

31 अन्नु हूँ नीम बेस ती बेस बोलतासी इनाम गुट्ठिन खक्खा गे कोड़े चिहूट नना। अक्कु गा ऐन निमन उर्मिन ती कोड़े बेस डहरे चोन्हा आबोन ऐद'ओन।

1 कोरिन्थ 13

1 ऐन आलर ही भखा गुट्ठिन अरा मेर्खा पैकर ही भखा गुट्ठिन कछनखदन, लिकिन एंग्हे नू चोन्हा मलकी होले, ऐन ठिन ठिनरना पितल अरा झनझनरना झाँझ लेका हिकदन।

2 ऐन धर्मसी कथन मुन्द तिगू आलन, अरा उर्मी नूखका ही गम्मन अरा उर्मी लूरन अखना ही सवंग र'ऊ आलन, अरा परता गुट्ठिन हूँ गुछाब'अना ही कोड़े बड़ियर पत'अना र'ऊ आलन, अन्नु हूँ एंग्हे नू चोन्हा मलकी होले, ऐन एन्देर हूँ मलकन।

3 अरा ऐन एंग्हे उर्मी खुर्जिन कीडर गे चि'अदन, अरा एंग्हे मेदन बस्सा गे चि'अदन, लिकिन एंग्हे नू चोन्हा मलकी होले, इत्रु एंगा एन्द्रा हूँ नफा मल्ला।

4 चोन्हा सह'ऊ अरा सोग्गे ईरू र'ई। चोन्हा इस्गहा मल ननी, चोन्हा फुलई मल ननी, अरा मल इतरार'ई।

5 चोन्हा मल सोभना कथा मल ननी, अरा आद तंगा दौ गे मल बिद्दी, अरा आद मल बरमार'ई, अरा आद नन्नर तंगा गे नंजका मलदौ ही लेखा मल उइय्यी।

6 चोन्हा उजगो मलका नू मल रिझ'ई, लिकिन मानी नू रिझ'ई।

7 चोन्हा उर्मी कथन सह'ई, अरा उर्मी कथन पत'ई, अरा उर्मी कथा नू असरा उइय्यी, अरा उर्मी कथा नू सहनुम चिहूट ननी।



- 8 चोन्हा इकला हूँ मल मुंजुर'ओ। लिकिन धर्मसी कत्थन मुन्द तेंगना मुंज'ओ कालो, अरा कैनो मदहे बलना भखा गुट्ठिन कछनखरना मोखोर'ओ क'ओ, अरा लूर मुंज'ओ।
- 9 एन्देरगेका नम्है लूर दरबंइया र'ई, अरा नम्है धर्मसी कत्थन मुन्द तेंगना दरबंइया र'ई।
- 10 लिकिन एकाबारी पूरखच्च'ऊ अंइसो खने, दरबंइया मुंज'ओ।
- 11 ऐन खद्द रहचकन खने, ओन्टा खद्द लेक्खा कछनखरकन, अरा ओन्टा खद्द लेक्खा सोचकन, अरा ओन्टा खद्द लेक्खा बुझकन। लिकिन ऐन परदकन ती आल मंजकन खने, ऐन खद्दबुधिया कत्थन अम्बकन चिचकन।
- 12 अक्कु गा नाम मइखका ऐना नू धुमलहा ऐरना बेसे धर्मसिन बड़ियर मल ऐरदत, लिकिन खोखा नाम उर्मी कत्थन बड़ियर फरीफरी ऐरोत। अक्कुन ऐन जुक्किम दिम अखदन, लिकिन खोखा धर्मस एंगन एकासे बनेम अखदस अन्नेम ऐन उर्मिन बनेम अख'ओन।
- 13 अक्कु गा पत्त'अना, असरा, अरा चोन्हा इबड़ा तीनो उर्मी उल्ला बन्चकी र'ओ, लिकिन इबड़ा ती चोन्हा दिम कोहँ र'ई।

1 कोरिन्थ 14

- 1 चोन्हा ही डहरे नू गुड़ियार'आ, नेम्हा बोलतासी इनाम गुट्ठिन खक्खना ही कोइहे पतारना नूर'आ, कोइहे गा धर्मसी कत्थन मुन्द तेंगना ही इनाम गे पतार'आ।
- 2 एन्देरगेका एकास कैनो मदहे बलना भखा गुट्ठिन कछनखरदस, आस आलर ती मला लिकिन धर्मस ती कछनखरदस। ने हूँ अदिन मल बुझनर, लिकिन आस बोलतस ती नुंखका मानिमन तेंगदस। लिकिन आद ओर्मर गे गम र'ई।
- 3 लिकिन धर्मसी कत्थन मुन्द तेंगुस आलारिन बड़ियर नन्त'आ गे अरा रिझत'आ गे अरा जिया सालनन चि'आ गे तेंगदस।
- 4 कैनो मदहे बलना भखा गुट्ठिन कछनखर'उस तंगन बड़ियर नन्त'आ गे कछनखरदस, लिकिन धर्मसी कत्थन मुन्द तिंगुस कलीसियन बड़ियर नन्त'आ गे तेंगदस।
- 5 नीम ओर्मर कैनो मदहे बलना भखा गुट्ठिन कछनखर'आ गे ऐन पतारदन। अन्नु हूँ कैनो मदहे बलना भखा गुट्ठिन कछनखर'उस कलीसियन बड़ियर मन्त'आ गे अदही मनेन मल तेंगदस होले, धर्मसी कत्थन मुन्द तिंगुस आस ती कोहँस र'अदस। औंगे नीम धर्मसी कत्थन मुन्द तिंगुस मना गे ऐन कोइहे पतारदन।



- 6अना भईरो! ऐन निम्है गुसन बरदन ती कैनो मदहे बकना भखा गुट्ठिन कछनखदन होले, आद ती निमा गे इन्द्रिम फैदा मनो का? लिकिन ऐन धर्मस ती दहदर मन्ना कत्थन मलता लूरन मलता धर्मसी कत्थन मुन्द तेंगनन मलता सिखाब'अनन निमा गे ओन्द्रदन होले, आद ती फैदा मनो।
- 7अन्नेम खरखना बसरी अरा तमुरा लेक्खा बजा गुट्ठिन ऐरा। अत्रु खरखना राग ती अदही बक्क मल फुटुर'ई होले, बसरी ती महले तमुरा ती एन्देर अस्सतार'आली एन्ने नेकईम अख'आ ओंग्दर का?
- 8अरा पेंडहे ही खरखना फरी मल मेन्दर'ओ होले, ने लड़ई गे सपड़ार'ओर?
- 9ई लेक्खम नीम हूँ आलर मल बुझुरनर, आ कत्थन आर गने कछनखदर होले, नीम एन्देर ब'आलदर अदिन आर एकासे अख'ओर? नीम गा ताका नू कछनख'उर लेक्खा मनोर।
- 10मानिम नू सौंसार नू कैनो रकम ही भखा गुट्ठी र'ई, अबड़ा नू ओन्टा हूँ बिगर मने ही मल्ला।
- 11लिकिन ओर्तस कछनखना भखा ही मनेन ऐन बल्दन होले, ऐन कछनख'उस गे नन्ना आलस र'ओन, अरा कछनख'उस हूँ एंगा गे नन्ना आलस र'ओस।
- 12निमा गे हूँ अन्नेम हिके। नीम बोलतासी इनाम गुट्ठिन खक्खा गे मने नन्दर खने, अबड़ा ती कलीसियन बड़ियर नन्त'आ गे बेद्दा।
- 13ई चड्डेम एकास कैनो मदहे बलना भखा गुट्ठिन कछनखदस, आस अदही मनेन तेंगना ही सवंग खक्खा गे गोहरारदस नेकअन।
- 14एन्देरगेका ऐन कैनो मदहे बलना भखा गुट्ठिन कछनखना ती गोहरारदन होले, एंग्हे बोलता गा गोहरार'ई, लिकिन एंग्हे मन अदही गने नलख मल ननी।
- 15ओँगे ऐन एन्देर नन्ना चाड़ र'ई? ऐन बोलता ती गोहरार'ओन, अरा मन ती हूँ गोहरार'ओन। ऐन बोलता ती पाड़ोन, अरा मन ती हूँ पाड़ोन।
- 16मला होले नीम निम्है बोलता ती धर्मसिन ओहमा ननो बारी, नेम्हा बोलतासी इनाम गुट्ठी ही पत्त नू बल्लू आलस निम्है मड़ी र'अदस होले, निम्है ओहमा नन्नन मेनोस ती आस एकासे “आमेन” ब'ओस। एन्देरगेका नीम एन्देर बाचकर अदिन आस गा बलदस।
- 17नीम गा नगदे बेस गने ओहमा नन्दर, लिकिन ने निम्हैन मेन्दस आसिन आद बड़ियर मल ननी।



- 18नीम ओर्मर ती बग्गे ऐन बलना भखा गुट्ठिन कछनखदन, इदगे ऐन धर्मस गे धन्यवाद चि'अदन।
- 19अन्नु हूँ कलीसिया नू बलना भखा नू दस हजार कत्था कछनखरना ती नन्नारिन सिखाब'आ गे बुझुरना बेसे पाँच गोटंग कत्था तेंगनन दिम ऐन कोइहे पतार'ओन।
- 20अना भईरो! नीम बुझुरना नू खददर लेक्खा अमा मना, मलदौ ही पत नू बोलो खददर बेसेम र'आ, लिकिन बुझुरना नू पखड़ मन्नुम कला।
- 21नेम्हा पुथी नू एन्ने लिखकी रई, “उर्बस ब'अदस का, 'ऐन नन्ना भखा कछनखर'उर ती नन-राजी ता आलर ही लेवटो ती एंग्हे आलारिन ब'ओन, अन्नु हूँ आर एंगन मल मेनोर।”
- 22औंगे बलना भखा नू कछनखरना पत'उर गे मला मल पत'उर गे धर्मसी रायबड़ी ही चेताब'अना ही चिन्हा हवे। अरा धर्मसी कत्थन मुन्द तेंगना मल पत'उर गे मला पत'उर गे रई।
- 23औंगे सौंसे कलीसिया ता आलर खोंडरर ती ओर्मर बलना भखा नू कछनखरना बारी बहरी ता आलर मलता मल पत'उर भितरी कोर'ओर होले, आर निमन पूरू मल ब'ओर का?
- 24लिकिन ओर्मर धर्मसी कत्थन मुन्द तेंगनर, अरा मल पत'उस मलता बहरी ता आलस भितरी कोर'ओस होले, आस आर ही कत्था ती मोंहर'ओस ती तंगन पापी ब'ओस अरा तंग्हे जियन जँच'ओस।
- 25अरा आसी जिया ता नूखका कत्था दहदर मनो क'ओ, अरा आस खेडमूली खत्र'ओस ती धर्मसिन ओइ लग्गोस, अरा ब'ओस का, “धर्मस मानिम निम्है मझी नू र'अदस।”
- 26तहाँ अना भईरो, नीम एन्देर नन्ना रई? नीम महबा नना गे खोंडरदर खने, ओर्तोस अस्सना-पाइना पाइोस, ओर्तोस सिखाब'ओस, ओर्तोस तंग्हे नू दहदर मंजका कत्थन तेंगोस, ओर्तोस बलना भखा नू कछनखर'ओस, ओर्तोस अदही मने तेंगोस। लिकिन इबड़ा ओर्मा कलीसियन बड़ियर मन्त'आ गे नन्ना रई।
- 27नेकईम बलना भखा नू कछनखदस होले, ऐंड झन मलता बग्गे ती बग्गे तीन झन ओर्तोसी खोखा ओर्तस कछनखदस नेकअन, अरा एकअम ओर्तस अदही मने तेंगना रई।
- 28लिकिन कलीसिया नू नीकईम अदही मने तिंगू मल र'ओस होले, आस कलीसिया नू कलेकसे र'अना रई, अरा आस तंग्हे जिया नू धर्मसिन कछनखदस नेकअन।
- 29धर्मसी कत्थन मुन्द तिंगुर ऐंड झन मलता तीन झन तेंगनर नेकअन, अरा नन्नर गा बाचका कत्थन चिहंक ती बिद्वनर नेकअन।



- 30 लिकिन ओर्तस धर्मेसी कथन मुन्द तेंगालदस खने, नन्ना ओर्तस गे उर्बस ती इन्द्रिम कथा दहदर मनी होले, एका ओर्तस तेंगालदस आस कलेकसे मन्दस कादस नेकअन।
- 31 ई लेखम नीम ओर्मर ओर्तोसी खोखा ओर्तस धर्मेसी कथन मुन्द तेंगा ओंगदर, ओंगे ओर्मर सिख'आ अरा बड़ियर मना ओंगनर।
- 32 अरा धर्मेसी कथन मुन्द तिंगुर ही बोलता धर्मेसी कथन मुन्द तिंगुर ही तबे नू रई, अरा आर तम्है बारी गे खोख'आ ओंगनर।
- 33 एन्देरगेका धर्मेस बिगड़अना ही मला लिकिन सान्ति ही धर्मेस हिकदस। नेम्हा आलर ही उर्मी कलीसिया गुट्ठी नू र'अना लेख्खा,
- 34 कलीसिया गुट्ठी नू मुक्कर कलेकसे र'अना रई। एन्देरगेका आर गे कछनख'आ गे मल चिरकी रई, लिकिन आर तबे नू र'अना रई। मूसासी नेग हूँ एन्नेम बई।
- 35 अरा आर इन्द्रिम कथा ही पत नू सिख'आ बेद्दनर होले, एडपा नू तम्है मैतर ती मेन्नर नेकअन। एन्देरगेका मुक्कर कलीसिया नू कछनख'ना लज्जे ही कथा हवे।
- 36 धर्मेसी कथा निम्है गुसते ओर मल मंजका, महले निम्है गुसन लेका मल अंडसकी रई।
- 37 ओंगे एकअम आलस तंगन धर्मेसी कथन मुन्द तिंगुस मलता बोलतासी इनाम खखका आलस एन्ने सोचदस होले, आस इदन इङ्गना रई का एका कथन ऐन निमा लिखदन आद उर्बासी पेसका गुट्ठी हवे।
- 38 लिकिन आस मल इङ्गदस होले, आसिन नीम मल इङ्गना रई।
- 39 ओंगे अना भईरो! नीम धर्मेसी कथन मुन्द तेंगना ही पतारना नू र'आ, लिकिन बलना भखा गुठिन ब'अनन अमा छेक'आ।
- 40 लिकिन उर्मी कथा गुट्ठी दौले अरा बेस लगे मनन नेक'आ।

1 कोरिन्थ 15

- 1 अना भईरो! अक्कुन ऐन निमन तिका दौ कथन अउर हूँ सुरत'आ गे बेद्ददन। अदिन नीम इङ्गकर हूँ अरा अइय्या नीम बड़ियर मंजकर ती र'अदर।
- 2 ऐन निमन तिका कथा नू नीम बड़ियर र'अदर होले, आ दौ कथा ती नीम नाइरदर, मला होले निम्है पत'अना अनभनियाँ मनो।
- 3 ऐन खखका कथा अरा कोइहे मुध एन्ने बाचर ती निमा गे अंडसताचका कथा ईद हवे का, नेम्हा पुथी नू एकासे लिखकी रई, एन्नेम मसीस नम्है पाप गुट्ठी गे केचस।



- 4 अरा आस मसड़ा नू उड़तारस। अरा नेम्हा पुथी नू लिखका लेक्खा तिसर उल्ला उज्जा चोचस।
- 5 अरा आस पतरस गे अरा खोखा बारो चेलर गे ऐथ्रस।
- 6 अदही खोखा आस ओन्टम बेड़ा नू पाँच सौ ती हूँ बग्गे भईर गे ऐथ्रस। अबडर ती बग्गे आलर इन्ना हूँ उज्जनर, लिकिन जोक्कोर केचकर हूँ केरर।
- 7 अदही खोखा आस याकोबस गे फेन ओर्मा तइरकर गे ऐथ्रस।
- 8 ओर्मर ही खोखा उल्ला मल पूरचका कुन्द्रका आलन लेक्खा र'अदन एंगा गे हूँ आस ऐथ्रस।
- 9 ऐन गा तइरकर ओर्मर ती सन्नी हिकदन। ऐन तइरकन बारना ही जोगे हूँ मलदन, एन्देरगेका ऐन धर्मसी कलीसियन खिलपत नंजकादन।
- 10 अन्नु हूँ ऐन तइरकन र'अदन होले, आद धर्मसी मया ती र'अदन। अरा आसी मया एकदा एंगहा मइय्याँ र'ई, आद एन्द्रा हूँ अयंध'आ मल मंजा। अबड़ा ओर्मा तइरकर ती ऐन कोड़हे तिहा नंजकन। लिकिन ऐन एंगहै ती मला, एंगहै नू नलख ननी आ धर्मसी मया तिम ऐन अदन नन्दन।
- 11 औंगे ऐन मलता आर, ऐम ई दौ कत्थन तेंगा कुद्दम अरा अइय्यम नीम पत्ताचकादर हूँ।
- 12 अन्नु हूँ मसीस केचका ती उज्जा चोचस एन्ने तेंगतार'ई होले, निम्है मधेर ती जोक्कोर केचकर ही उज्जा चो'अना मलकी एन्ने एकासे ब'आ औंगदर?
- 13 लिकिन केचकर ही उज्जा चो'अना मलकी होले, मसीस हूँ उज्जा मल चोच्कादस।
- 14 अरा मसीस उज्जा मल चोच्कादस होले, एम्है दौ कत्था तेंगा कुद्दना अनभनियाँ र'ई, अरा निम्है पत'अना हूँ अनभनियाँ र'ई।
- 15 अउर हूँ केचकर उज्जा मल चो'अनर एन्ने ईद मानिम होले, इदही मने ईद का धर्मस मसीसिन उज्जा मल चोदस। औंगे धर्मस मसीसिन उज्जा चोदस एन्ने ऐम गोवाह चि'अना ही चड्डे, ऐम धर्मसी पत नू ठकवा गोवाह चि'ऊ आलम र'ओम दने।
- 16 एन्देरगेका केचकर उज्जा मल चो'अनर होले, मसीस हूँ उज्जा मल्ला चोचका।
- 17 अरा मसीस मल्ला उज्जा चोचका होले, निम्है पत'अना अनभनियाँ र'ई, अरा नीम अक्कु गूटी निम्है पाप नू बझकादर।
- 18 अन्ने होले एकार मसीस नू पत्ताचर ती केचकानर, आर हूँ नठारकानर।
- 19 नाम ई खेखेल ही उज्जना गूटी गे लेका मसीस नू असरा उइय्यू र'अदत होले, नाम उर्मी आलर ती कोड़हे खत्रका दसा नू र'अदत।



- 20 लिकिन मानिम नू मसीस केचका ती उज्जा चोचकादस, अरा केचकर मधेर ती उज्जा चोअना नू पहिल आल मंजस।
- 21 एन्देरगेका खेअना ओर्त आलस तिम बरचा, अन्नेम ओर्त आलस तिम केचकर ही ती उज्जा चोअना हूँ मंजकी रई।
- 22 एकासे उर्मी आलर आदमस नू खेअनर, अन्नेम ओर्मर मसीस नू उज्जा चोदतारओर।
- 23 लिकिन ओर्मर तम्है तम्है बारी नू उज्जा चोदतारओर, मसीस गा पहिल उज्जा चोचस, अदही खोखा मसीस बरना बेड़ा नू मसीसी आलर उज्जा चोदतारओर।
- 24 इदही खोखा खेखेल ही मुंजना मनो। आ बारी मसीस उर्मी उर्बे ननुरिन अरा उर्मी अदिया गुठिन अरा उर्मी सवंग गुठिन नठाबअरकी राजिन धर्मे बंगासी खेक्खा नू सोंपओस चिओस।
- 25 एन्देरगेका मसीस तंगहै ओर्मा बैरीरिन तंगहै खेड्डे किय्या नन्ना गूटी आस दिम राजी नन्ना रई।
- 26 उर्मी ती छेददे नठाबतारना बैरी खेअना हवे।
- 27 एन्देरगेका नेम्हा पुथी नू एन्ने लिखकी रई का, “धर्मेस ‘उर्मिन’ आसी खेड्डे किय्या नंजका चिचकादस।” “उर्मिन” आसी तबे नू नंजकादस एन्ने बअना बारी, ईद फरीफरी ईथरई का इय्या नू धर्मेस मल बरदस। एन्देरगेका धर्मेस दिम उर्मिन मसीसी तबे नू नंजकादस।
- 28 अरा उर्मीदिम आसी तबे नू मनी काली खने, खदस हूँ उर्मिन तंगहै तबे नू चिक्का धर्मेसी तबे नू तंगन ननोस। ओँगे धर्मेस दिम उर्मी नू उर्मी मनोस।
- 29 केचका ती उज्जा चोअना मल्ला होले, केचकर गे नोडरनर आर एन्देर ननोर? केचकर उज्जा मल चोदतारओर होले, केचकर गे एन्देरगे आर नोडरनर?
- 30 अरा ऐम हूँ एन्देरगे उर्मी बारी अपलोक नू रअदम?
- 31 अना भईरो! नम्है उर्बा मसी येसुस नू निम्है पत नू रई आ एंगहै फुलई ती ऐन किरया मोखदन ती बअदन का ऐन उर्मी उल्ला खेअदन।
- 32 ऐन इफेसुस नगरे नू खेखेल ता उज्जना गे लेका जंगल-मेक्खो लेक्खा अइय्या ता आलर गने अरबानरखकन होले, एंगा एन्देर फैदा मनो? लिकिन केचकर उज्जा मल चोओर होले, “नाम ओनोत अरा मोखोत, एन्देरगेका नेला गा नाम खेओत” एन्ने बआ ओँगोत दने।
- 33 अमके ठगरआ, मलदौ आलर गने भिंडरना दौ ऐकनन बगडई चिई।
- 34 उजगो गे एज्रआ चोआ, पाप अमा नना। एन्देरगेका ऐन निमन लज्जे मोखतआ गे इदन बअदन का निम्है नू जोक्कोर धर्मेसिन बलनर।



- 35 लिकिन जोक्कोर एन्ने मेनोर का, “केचकर एकासे उज्जा चो'ओर? एका लेक्खा मेद गने बर'ओर?”
- 36 अना बोया आलायो, इन्द्रिइम लो नीन चाँखदय एका गूटी आद मल खिई आद मल कुन्दी।
- 37 अरा नीम एकदन चाँखदर आद मेद मल्ली एकदा कुन्दना रई, लिकिन बिहनिन लेका चाँखदर। आद गहूँ महले इन्द्रिइम नन्ना बिहनी र'ओ।
- 38 लिकिन धर्मेस तंगहै मने लेक्खा मेद चि'अदस। उर्मी दना गे अदही तंगहै मेद मनी।
- 39 उर्मी अहड़ा ओन बेसे मल्ला, लिकिन आलर ही अहड़ा ओन बेसे रई, अरा मेक्खो गुट्ठी ही अहड़ा नन्ना बेसे रई, अरा ओड़ा गुट्ठी ही अहड़ा नन्ना बेसे रई, इंजो गुट्ठी ही अहड़ा नन्ना बेसे रई।
- 40 अरा मेर्खा ता मेद गुट्ठी हूँ रई, अरा खेखेल ता मेद गुट्ठी हूँ रई। लिकिन मेर्खा ता मेद गुट्ठी ही महबा नन्नम रई, अरा खेखेल ता मेद गुट्ठी ही महबा नन्नम रई।
- 41 अरा बीड़ी ही महबा नन्नम रई, अरा चन्दो ही महबा नन्नम रई, अरा बीनको गुट्ठी ही महबा नन्नम रई। अरा बीनको गुट्ठी हूँ तंगहै महबा नू ओन्टा ओन्टा नन्नम रई।
- 42 केचकर ही उज्जा चो'अना हूँ एन्नेम रई, माइरना मेद नठारई अरा आद मल नठारना गे उज्जा चोदतारई।
- 43 आद बिगर मईन ती माइतारई, लिकिन आद महबा गने उज्जा चुई। अरा आद पयहा ती माइतारई, लिकिन आद सवंग गने उज्जा चुई।
- 44 प्रकृति मेद माइतारई अरा बोलता ही मेद उज्जा चुई। प्रकृति मेद रई होले, बोलता ही मेद हूँ रई।
- 45 औंगे नेम्हा पुथी नू एकासे लिखकी रई अन्ने, “पहिल आलस आदमस उज्जना आल मंजस।” लिकिन छेद्द ता आदमस गा उज्जना चि'ऊ बोलता मंजस।
- 46 लिकिन बोलता ही मेद मुन्द ता मल्ला, प्रकृति मेद गा मुन्द ता रई, बोलता ही मेद खोखा ता रई।
- 47 पहिल आलस खेखेल ता हिकदस खज्जो ती कम्मकादस। दोसर आलस मसीस मेर्खा ता हिकदस।
- 48 खज्जो ती कम्मका आलस एकासे रहचस, अन्नेम खज्जो ती कम्मका आलर हूँ र'अनर। अरा मेर्खा ती बरचका आलस एकासे र'अस, अन्नेम मेर्खा ही आलर हूँ र'अनर।



- 49 एकासे नाम खज्जो ती कम्मका आलासी रूप नू र'अदत, अन्नेम नाम मेर्खा आलासी रूपे नू मनोत।
- 50 अना भईरो! एंग्हे ब'अना एन्ने र'ई का, अहड़ा अरा खेंस मेर्खा राजी काना ही अदियन खक्खा पुल्ली। अरा एकदा नठार'ई आद मल नठारनन खक्खना ही अदियन खक्खा पोल्लो।
- 51_52 ऐरा! ऐन निमन ओन्टा नूख्रका भेद ही कत्थन तेंगदन। नाम ओर्मत मल खे'ओत, लिकिन छेद्द पेंडहे खरखना बारी, ओन घड़ी नू, खन्न मिटक'अना गनेम लेक्खा चाड़हेम नाम ओर्मत बदलार'ओत क'ओत। एन्देरगेका पेंडहे खरखो खने, केच्चकर जनमजुग उज्जा गे उज्जा चो'ओर, अरा नाम हूँ बदलार'ओत क'ओत।
- 53 एन्देरगेका ईद चाड़ र'ई का, ई नठारना मेद मल नठारनन अतो अरा ई खे'अना मेद मल खे'अनन अतो।
- 54 औंगे एकाबारी ई नठारना मेद मल नठारनन अतो अरा ई खे'अना मेद मल खे'अनन अतो खने, नेम्हा पुथी ही ई कत्था मनो का “जीत आबो खे'अनन नुलखिया चिच्चा।”
- 55 “अनय खे'अना! निंग्हे जीत एखो? अनय खे'अना! निंग्हे चार एखो?”
- 56 खे'अना ही चार पाप हवे, एन्देरगेका पाप खे'अना ही तरा कड़हाबई। अरा पाप ही सवंग पेसका हवे, एन्देरगेका पेसका ती नाम अखदत का एन्देर एन्देर पाप हवे।
- 57 लिकिन नम्है उर्बस येसु मसीस ती नमा गे जीत चि'ऊ धर्मस गे धन्यवाद मनन नेकअन।
- 58 औंगे एंग्हे चोन्हा भईरो! बड़ियर अरा ठिमठिम ने र'आ, अरा उर्बासी नलख नू सगरुम पर्दनुम कला, एन्देरगेका नीम इदन अखदर का उर्बस नू निम्है नलख अनभनियाँ मल मनो।

1 कोरिन्थ 16

- 1 अक्कु येरुसलेम ता नेम्हा आलर गे खोजना बरार ही पत नू एंग्हे ब'अना ईद र'ई का, गलातिया जिला ता कलीसिया गुट्ठी गे नना गे ऐन एन्देर पेसकादन, अदन नीम हूँ नना।
- 2 उर्मी हप्ता ही पहिल उल्ला नीम ओर्त ओर्त तंग्हे अर्जाचका ती जोक्को भिने उड़्यके, अरा अदन सैत'आ। औंगे ऐन बरना बेड़ा नू दान खोजना ही चाड़ मल मनो।
- 3 एकाबारी ऐन अइय्या बर'ओन खने, नीम नेकन बेद्ददर आर गे चि'ठी चि'ओन ती तइय्योन का आर निम्है बरार आबोन येरुसलेम अंडसत'ओर।
- 4 अरा एंगा काना चाड़ मनो होले हूँ, आर एंग्हे गने क'ओर।



- 5 ऐन मकेदोनिया जिला मन्नुम निम्है गुसन बर'ओन, एन्देरगेका एंगा गे मकेदोनिया मन्नुम ती कानम र'ई।
- 6 अरा मना आँगाली का ऐन जोक्क उल्ला निम्है गुसन र'ओन महले पड़य्याँ उल्लन हूँ पहाब'ओन। आँगो इदही खोखा एंगा एस'आनिम काना मनो होले हूँ, नीम एंग्हे इहरे ऐकना गे संगरा नना आँगदर।
- 7 अक्कु इहरे ऐकनुम ऐन निमन भेंटार'आ मल बेद्ददन, अन्नु हूँ ऐन असरा नन्दन का, उर्बासी मने मनो होले, ऐन जोक्क उल्ला निम्है गुसन पहाब'ओन।
- 8 लिकिन ऐन पेन्तेकोस्ते उल्ला गूटी इफेसुस नगरे नूर'ओन।
- 9 एन्देरगेका एंगा गे इसन ओन्टा कोड़हे नलख गे ओन्टा कोहाँ बली तिसगिरकी र'ई, लिकिन अइय्या छेंका ओरदू आलर हूँ बग्गेर र'अनर।
- 10 तीमोथियुस निम्है गुसन बर'ओस होले, आस निम्है मड़ी नूर'ओ बारी बिगर एल्चका ती र'आ गे तिहा ननके। एन्देरगेका आस एंग्हे लेक्खम उर्बासी नलख नन्दस।
- 11 आँगो ने हूँ आसिन सन्नी अमके अख'आ। लिकिन आस एंग्हे गुसन किरा गे आसिन कोड़े गने इसन तइय्के चि'अके। एन्देरगेका आस भइय्योर गने बर'आ गे ऐन आसिन पाब ऐरदन।
- 12 अक्कुन नम्है भइय्योस अप्पोल्लोसी पत्त नू, ऐन आसिन निम्है गुसन भइय्योर गने काला गे नगदे रिझाबाचकन। अक्कु आस काला गे मल बिद्दियस, लिकिन मोका खक्खोस खने आस बर'ओस।
- 13 नीम एज्रका र'आ, अरा पत्त'अना नू ठिमठिम ने र'आ, अरा डिढ नना, अरा बड़ियर मना।
- 14 नीम एन्देर एन्देर नन्दर उर्मिन चोन्हा ती नना।
- 15 अना भईरो! नीम स्तेफनासी एडपातारिन अखदर, आर अखाया चक नू मसीसिन इंझका पहिल आलर हिकनर। अरा आर नेम्हा आलर ही तेतर सुसर गे तमन चिच्का र'अनर। आँगो ऐन निमन नेअदन का,
- 16 एन्ने आलर ही तबे नूर'आ, अरा ई नलख नू संगे मनरकी उर्बस येसुस गे नलख नन्नर आर ओर्मर ही तबे नूर'आ।
- 17 अरा ऐन स्तेफनास अरा फोरतुनातुस अरा अख्यकोसी बरना ती खुसमारदन, एन्देरगेका आर निम्है मल रहचका ही खंगतिन पूरा नंजर।
- 18 अरा आर निम्है बोलतन एकासे रिझाबाचर अन्नेम एंग्हे बोलतन रिझाबाचर। ई बेसे आलारिन मान चि'आ।



- 19 आसिया जिला ता कलीसिया गुट्ठी निमन मोंजरा नन्नर। अकुलास अरा प्रिसका अरा आर ही एडपा नू ओक्कना कलीसिया निमन उर्बस नू कोइहे मोंजरा नन्नर।
- 20 इय्या ता ओर्मा पत'ऊ आलर निमन मोंजरा नन्नर। ओर्त ओर्तोरिन नेम्हा चोंखना ती मोंजरा नना।
- 21 ऐन पौलुस ई मोंजरन एंग्हे खेक्खा ती लिखदन।
- 22 नेकईम उर्बासिन चोन्हा मल नन्दस होले, धर्मस आस गे दंडे चि'अदस नेकअन। एम्हे उर्बायो बरा।
- 23 उर्बा येसुसी मया निम्हे गने र'अन नेकअन।
- 24 मसी येसुस नू र'अनर नीम ओर्मर गने एंग्हे चोन्हा र'अन नेकअन। आमेन।



2 कोरिन्थ

2 कोरिन्थ 1

- 1 धर्मसी मने ती मसी येसुसी तइरकन पौलुस, अरा नम्है भइय्योस तीमोथियुस, कोरिन्थ नगरे ता धर्मसी कलीसिया गे अरा सौंसे अखाया चक नू र'ऊ ओर्मा नेम्हा आलर गे लिखना चिठी ईद हवे।
- 2 नम्है बंगस धर्मस अरा उर्बस येसु मसीस तरती निमा मया दरा कोड़े मनन नेकअन।
- 3 नम्है उर्बस येसु मसीसी धर्म अरा बंगस गे ओहमा मनन नेकअन। आस सोग्गे ही बंगस अरा उर्मी रकम ही जिया सालना चि'ऊ धर्मस हिकदस।
- 4 आस दिम उर्मी कलपारना ती नमन जिया सालत'अदस। आँगे ऐम धर्मस तरती खक्खका जिया सालना ती, एकअम कलपारना नू र'उरिन जिया सालत'आ आँगदम।
- 5 एन्देरगेका एकासे ऐम मसीस गे बग्गे सस्ती गुट्ठिन सारदम, अन्नेम धर्मस मसीस तरती आसी जिया सालनन बग्गेम एमा गे ऐददस।
- 6 ऐम कलपारनन खक्खदम होले, आद निम्है जिया सालना गे अरा नाइरना गे रई। अरा एमा गे जिया सालना मनी होले, आद हूँ निमा जिया सालना गे दिम रई। आ जिया सालना, नीम हूँ एम्है लेक्खा सस्ती सारना बेड़ा नू निम्है नू खतिर नन्नन बड़ियर ननी।
- 7 अरा निम्है पत्त ता एम्है असरा बड़ियर रई। ऐम अखदम का एकासे नीम एम्है कलपारना नू मेस्रदर अन्नेम नीम एम्है जिया सालना नू हूँ मेस्रओर।
- 8 अना भईरो, ऐम आसिया चक नू एका दुक्खेन भोगचकम, अदन नीम बल्लुर लेक्खा र'आ गे ऐम मल बेददम। ऐम एन्ने कोड़े बोझा ती कजरकचकम, अरा आद एम्है सहना ती कोहाँ रहचा का एम्है उज्जना ही असरा हूँ मल रहचा।
- 9 ऐम एम्है जिया नू बुझुरकम का ऐम अक्कु खे'आ कालदम। लिकिन ऐम एम्है नू मल केचकारिन उज्जा चोद'ऊ धर्मस मइय्याँ असरा उइय्या गे दिम ईद मंजा।
- 10 आस एमन आ कोड़े खे'अना अपलोक ती नाडियस, अरा आस अउरिम नाड़ोस। अरा आस मइय्याँ एमा असरा रई का, बरना उल्ला नू हूँ अउरिम नाड़ोस।
- 11 नीम हूँ निम्है गोहरारना ती एम्है सहाड़ा नना। आँगे ई लेक्खा बग्गे गोहरारना चड्डे एमा आसीस मनो, अरा अदगे नगदे आलर धर्मसिन धन्यावाद ननोर।



- 12 अक्कुन ऐम खेखेल नू अरा कोइहे गा निम्है गने ता नता नू, धर्मस चिच्का नेम्हा अरा मानिम गने ईक्कम, इदगे दिम ऐम फुलई मन्दम। इदगे एम्है लखना गोवाह चिई। ऐम अदन खेखेल ता लूर ती मला, धर्मसी मया तिम नंजकम।
- 13-14 ऐम एम्है चिठी नू नीम मल पढ़ना लेक्खा महले मल बुझना लेक्खा एकअम कत्थन मल लिखचकम। एंम्है असरा ईद रई का, अक्कुन नीम एमन बुझ'आ पोल्दर होले हूँ, उन्दुल नीम एमन बेस गने बुझ'ओर। खने उर्बा येसुस अउरिम बरना उल्ला नू नीम एम्है पत नू फुलई मनोर, अन्नेम ऐम हूँ निम्है पत नू फुलई मनोम।
- 15 अरा ऐन ई असरा तिम नीम दुई गुना आसीस खक्खा गे बरना बारी ऐन निम्है गुसन मुन्द बर'आ गे चिताबुता नंजकन।
- 16 अरा ऐन मकेदोनिया जिला कालो बारी निम्है गुसन बर'आ गे, अरा मकेदोनिया ती किरना बारी हूँ निम्है गुसन बर'आ गे सोच'आ लिक्कन। फेन नीम एंगन यूदेया जिला तइय्या ओंगोर।
- 17 ऐन मल बरचका ती नीम एन्देर सोचदर? एन्देर ऐन इदन चिताबुता नन्ना बारी सेब्बा ती नंजकन का? महले ओन घड़ी नू “हाँ हाँ” एन्ने, अरा “मला मला” एन्ने ब'अना लेक्खा ऐन सौंसार आलर लेक्खा चिताबुता नन्दन का?
- 18 लिकिन धर्मस पत'अना जोगे र'अदस, अन्नेम एम्है कत्था निमा गे “हाँ” एन्ने बाचका खोखा “मला” एन्ने ब'अना लेक्खा मल्ला।
- 19 सीलास अरा तीमोथियुस अरा ऐन निम्है मझी नू तिका धर्मसी खद्दस येसु मसीस, “हाँ” एन्ने बाचका खोखा “मला” एन्ने ब'ऊ मलदस। लिकिन “हाँ” एन्ने ब'अदस होले, आस नू आद सगरो “हाँ” रई।
- 20 येसु मसीस धर्मसी उर्मी गच्छरना गे “हाँ” ब'अदस। ओंगेम धर्मसी महबा गे ऐम आस ती “आमेन” ब'अदम।
- 21 अक्कुन धर्मस निम्है गने एमन हूँ मसीस नू बेस बड़ियर नन्दस, अरा आस नमन खस्सकादस।
- 22 आस नम्है उर्बस एन्ने ऐद'आ गे आस नम्है मइय्याँ छाप चिच्कादस, अरा बयाना नू नम्है जिया नू आसी नेम्हा बोलतासिन चिच्कादस।
- 23 अक्कुन ऐन निमन चेताबचकन ती दुक्खे मल चि'आ गे दिम कोरिन्थ नगरे गे मल बरचकन। इदगे धर्मस दिम एंगा गोवाह र'अदस।



24 ऐम निम्है पत'अना मइय्याँ आकुस नना गे मल बिद्दकम। ऐम निम्है गने निम्है रिझ गे नलख ननू र'अदम, एन्देरगेका नीम पत'अना नू पखड़ र'अदर।

2 कोरिन्थ 2

1 औंगे ऐन जिया नू घतचकन का ऐन निमन दुक्खे चि'आ गे निम्हा गुसन भेंट मना गे अउर मल बर'ओन।

2 एन्देरगेका ऐन निमन दुक्खे चि'अदन होले, ने एंगन रिझाब'ओ? एका आलस गे ऐन दुक्खे चिचकन आसिम एंगन रिझाब'आ औंगदस का?

3 औंगे ऐन निमा गे एन्ने चिठी लिखचकन का, एंगहा बरना ती नेखा ती एंगा रिझ मन्ना रहचा, आर ती ऐन दुक्खे मना मल बेद्ददन। नीम ओर्मर एंगहै रिझना नू मेसोर, एन्ने निम्है ओर्मर ही पत नू एंगा असरा रई।

4 ऐन कोइहे कल्पारना ती अरा जिया ही दोलखना ती अरा खंजलखो चुरूखनुम चुरूखनुम ई चिठिन निमा गे लिखचकन। ऐन निमा दुक्खे चि'आ गे मला, लिकिन ऐन निमन एका कोइहे चोन्हा नन्दन, अदिन नीम अख'आ गे दिम ऐन एन्ने लिखचकन।

5 अक्कुन एकअम ओर्तस दुक्खे चिचस होले, आस एंगन लेका मला, ओन तरती नीम ओर्मरिन हूँ दुक्खे चिचकादस। ऐन इदिन कोइहे जोर नना मल बेद्ददन।

6 एन्ने आलस गे निम्है ती बग्गेर दंडे चिचकानर, आद जुक्की मल्ला।

7 औंगे अक्कु नीम आसिन छमा नन्ना ती जिया सालत'अना रई। मला होले आस कोइहे दुक्ख नू मुलखोस क'ओस।

8 औंगे नीम निम्है चोन्हन आस गे ऐद'आ गे ऐन निमन ने'अदन।

9 नीम उर्मी कत्थन पेसदर का मला एन्ने निमन बिद'आ गे ऐन एंगहै चिठी नू एन्ने लिखचकन।

10 अक्कुन नीम नेकन इन्द्रिइम छमा नन्दर, आसिन ऐन हूँ छमा नन्दन। ऐन छमा नना गे इन्द्रिइम रई होले, अदिन ऐन निम्है चड्डे मसीसी मुन्दहारे छमा नंजकादन।

11 सैतान नमन अम्बो बगड़'आ गे एन्ने नंजकन। एन्देरगेका नाम आसी चाल गुट्ठिन बलना लेक्खा मल्ला।

12 एकाबारी ऐन मसीसी दौ कत्था मेन्त'आ गे त्रोआस नगरे नू बरचकन खने, असन उर्बस एंगा गे ओन्टा बली तिसगस चिचस।



- 13 अन्नु हूँ असन एंग्हे जिया गे कोड़े मल खक्खरा, एन्देरगेका एंग्हे भइय्योस तीतुसिन असन मल खक्खन। ओंगे ऐन असता आलर ती बिदा मंजकन ती मकेदोनिया काला गे मुंहरारकन।
- 14 लिकिन धर्मैसी धन्यावाद मनन, आस सगरो जित'आ गे मसीस नू नमन कइहाब'अदस, अरा आसी पत ता लूरन एम्है ती गोट्टा अड्डा नू महकारना लेक्खा बींइदस।
- 15 एन्देरगेका ऐम नाइरना आलर ही मझी नू अरा नठारना आलर ही मझी नू दौ कत्था तेंगना ती धर्मैसी ऐरना नू मसीसी एम्बा महक हिकदम।
- 16 जोक्क आलर गे खे'आ गे खे'अना ही महक अरा जोक्क आलर गे उज्जा गे उज्जना ही महक र'अदम। इबड़ा कत्था गुट्ठिन नना गे नेखा जोगे र'ई?
- 17 बगेर तम्है नफा गे धर्मैसी कत्था नू मेसाब'अनर, लिकिन ऐम अबड़ा आलर लेक्खा मलकम। ऐम गा धर्मैस ती तइरका आलर लेक्खा धर्मैसी मुन्दहारे मसीसी सवंग गने मानिम गने कत्थन तेंगा कुद्दम।

2 कोरिन्थ 3

- 1 ऐम एमन अउर हूँ फुलई मना हेलरदम का? महले जोक्क आलर गे नालिस चिठी चाइ र'ई, अन्ने ऐम निमा गे नालिस चिठी ऐद'आ गे चाइ र'ई का? महले निम्है गुसते एमा गे नालिस चिठी चाइ र'ई का? कहियोँ मला।
- 2 नीम दिम एम्है जिया गुट्ठी नू लिखका अरा उर्मी आलर ती अखतारका अरा पढतारका एम्है नालिस चिठी र'अदर।
- 3 ईद दहदर र'ई का नीम एम्है सुसर ती मंजका मसीसी चिठी लेक्खा हिकदर। आद सियाही ती मला, लिकिन उज्जना धर्मैसी बोलतस ती लिखकी र'ई, पखना ही पट्टी नू मला, लिकिन आल जिया गुट्ठी ही पट्टी नू लिखकी र'ई।
- 4 एन्ने लेक्खा पखड़ असरा एमा गे मसीस ती धर्मैस मइय्याँ र'ई।
- 5 एम्है ती इन्द्रिइम मना ओंगे एन्ने ऐम इन्द्रिइम सोच'आ गे ऐम एम्है ती जोगे मलदम। लिकिन एम्है जोगे धर्मैस तरती बर'ई।
- 6 आस एमन तंग्हे पुना गच्छरना ही सुसर'ऊ मना गे जोगे मंजकादस। आ गच्छरना लिखका नेग ती मल्ली, लिकिन बोलतस ती मन्नकी र'ई। एन्देरगेका लिखका नेग गा पिटी, लिकिन बोलतस गा उज्जना चि'अदस।



- 7 मूसासी नेग पखना मइय्याँ अक्छरन पतका ती अरा महबा गने बरचका ती हूँ, आद खे अनन ओन्द्रना गच्छरनन लेका ओन्द्रका। मूसासी मुही बिल्यना बिल्ली र'अना ती इस्राएल आलर आसी मुहिन ऐरा पोल्ला लगियर। अन्नु हूँ आद मइखना ही बिल्ली दिम रहचा।
- 8 आद अन्ने रहचा होले, नेम्हा बोलतस ओन्द्रना गच्छरना एका कोइहे महबा ही मल र'ओ का?
- 9 आलर गे दंडे ही नेंवईन चिऊ सुसर'अना कोइहे महबा ही र'ई होले, उजगोन चिऊ सुसर'अना एका कोइहे महबा ही र'ओ दने!
- 10 मुन्द ता महबा गने अक्कु ता महबन जोख'ओम होले, अक्कु ता महबा कोइहे बेस र'ई।
- 11 खने एकदा मइखना रहचा आद महबा गने बरचा होले, एकदा उर्मी उल्ला र'ओ अदही महबा एका कोइहे र'ओ दने!
- 12 औंगे एन्ने लेक्खा असरा एमा गे र'अना चड्डे ऐम कोइहे डिढ गने र'अदम।
- 13 ऐम मूसस बेसे मलकम। आस मइखा लगिया आ महबन इस्राएलर मल ऐरा गे तंगहै मुहिन कुलकुटरका र'आलियस।
- 14 लिकिन आर ही जिया गुट्ठी बेइहा मंजकी किरकी रहचा। इन्ना गूटी हूँ गा पच्चा गच्छरनन पढ़ना बारी आ कुलकुटरना मल ओथ्रना बारिम र'ई। एन्देरगेका मसीस दिम अदिन चलख'आ औंगदस।
- 15 अरा इन्ना हूँ मूसासी नेग पढ़ना बारी आर ही जिया गुट्ठी नू ओन्टा कुलकुटरना र'ई दिम।
- 16 लिकिन निकईम उर्बस तरा किरनर खने, आ कुलकुटरना ताइतार'ई काली।
- 17 उर्बस दिम बोलतस र'अस, अरा एक्सन उर्बासी बोलतस र'अस, असन छछिन्द र'ई।
- 18 अरा नाम ओर्मत बिगर कुलकुटरका मुही तिम अयना लेक्खा उर्बासी महबन बिल्यदत। एन्नेम नाम महबा नू अउर महबा मनरकी आसी ऐथ्रना लेक्खा बदलतारदम। ईद उर्बस तिम बर'ई। आसिम बोलतस हिकदस।

2 कोरिन्थ 4

- 1 धर्मसी सोग्गे एम्है मइय्याँ मंजा ती एमा ई सुसर'अना ही नलख चीतारा, औंगे ऐम कहियों मल हदियारदम।
- 2 अरा ऐम लज्जे ही नुइना लेक्खा नलख गुट्ठी मल नन्दम, अरा ऐम कसरहा मल नन्दम, अरा ऐम धर्मसी कत्थन मल बदल'अदम। अन्ति मानिमन दहदहर'आ तेंगा कुद्दम ती धर्मसी मुन्दहारे ओर्त ओर्त आलासी लखना नू ऐम उजगो आलम एन्ने ऐद्दम चि'अदम।



- 3अन्ति एम्है दौ कत्था नू इन्द्रिइम ओदहा रई होले, आद ने नठारनर कानर आर गे अन्ने रई।
- 4ई सौंसार ही देवता मल पत'ऊ आलर ही जियन अन्धहा नंजकी चिच्चकी रई। औंगेम आर मसीस ने धर्मसी रूप हिकदस आसी महबा ही दौ कत्था ही बिल्चिनन ऐरा गे पोलनर।
- 5एन्देरगेका ऐम एमानिम तेंगा मल कुद्दम, लिकिन येसु मसीसिन उर्बस अरा एमन गा येसुस चड्डे निम्है जोंख एन्ने तेंगा कुद्दम।
- 6“ऊखा ती बिल्ली बिल्चन नेकअन” एन्ने बाचका धर्मस तंगहै बिल्लिन एम्है जिया नू बिल्चताचस चिच्चस। येसु मसीस नू रई आ धर्मसी महबा ही लूर ही बिल्लिन एमा चि'आ गे धर्मस इदन नंजस।
- 7लिकिन ई खुर्जिन खज्ज ही संजगी लेक्खा र'उर ऐम खक्खकादम। इत्रु अखतार'ओ का ई कोहाँ सवंग एम्है ती मला धर्मस ती हवे।
- 8ऐम ओनबेंडर'आ ती खोसरदम, लिकिन हार मल मन्दम। अकबक गा मन्दम, लिकिन मल हेन्दो मन्दम।
- 9पेदखतारदम, लिकिन धर्मस ती मल मोधतारदम, लौतारदम, लिकिन मल नठारदम।
- 10ऐम उर्मी बेड़ा दुक्खे सारना ती येसुसी खे'अनन एम्है मेद नू चोददम, ईगेका येसुसी उज्जना एम्है मेद नू दहदर मंज खच्ची नेक'आ।
- 11एन्देरगेका ऐम ने उज्जालदम येसुस चड्डे सगर घड़ी खे'अना ही अपलोक नू र'अदम, ईगेका येसुसी उज्जना एम्है खि'ऊ कालू मेद नू दहदर मनी क'ई नेकअन।
- 12ई खोदहा एम्है नू खे'अना नलख ननाली, लिकिन उज्जना निमा गे खक्खरई।
- 13नेम्हा पुथी नू एन्ने लिखकी रई का, “ऐन पत्ताचकन, औंगे बाचकन।” आ पत्ता'अना ही ओन्टे बोलता तिम ऐम पत्ता'अदम, औंगे ब'अदम।
- 14ऐम अखदम का धर्मस ने उर्बा येसुसिन केचका ती उज्जा चोदस, आस एमन हूँ येसुस लेक्खा उज्जत'ओस, अरा निम्है गने एमन हो'ओस ती तंगहै मुन्दहारे इजत'ओस।
- 15इबड़ा उर्मी निमा दौ गे दिम रई। अरा एकासे धर्मसी मया बग्गे ती बग्गे आलर नू अंडसतई, अन्नेम धर्मसी महबा गे धन्यवाद ही गोहरारना हूँ बग्गे मन्नुम क'ओ।
- 16औंगे ऐम पछली मल किर्दम। बहरी ता एम्है मेद गा खे'आली, लिकिन भितरी ता एम्है बोलता उल्लन ती पत्ती पुना मन्नुम क'ई।



17 बग्गे उल्ला मल र'अना अक्कु ता एम्है कट्टी गुसर खिलपत गा एमा गे अकय कोहाँ अरा कोइहे जनमजुग महबन कुन्द्रतई।

18 औंगे ऐम ऐथ्रना आलो गुट्ठी नू मला, लिकिन मल ऐथ्रना आलो गुट्ठिन ऐरते र'अदम। एन्देरगेका ऐथ्रना आलो गुट्ठी जुक्की उल्ला गे र'ई, लिकिन मल ऐरना आलो गुट्ठी जनमजुग गे र'ई।

2 कोरिन्थ 5

1 नाम अखदत का नम्है मेद एकदा इसन ई खेखेल नू नाम उज्जना एडपा धस्तार'ओ कालो, लिकिन नमा गे धर्मस तरती मेर्खा नू आलर ती मल कम्पका ओन्टा एडपा र'ई, आद जनमजुग र'ओ।

2 नाम अक्कु ता ई मेद नू रेकदत, अरा नाम पुना किचरी लेक्खा ता नम्है मेर्खा मेदन अत्ता गे चीबाखारदत।

3 एन्देरगेका नाम अन्ने मेर्खा मेदन अत्तदत खने, नाम लंगड़ा अम्बोत खक्खर'ओत।

4 नाम मेद ही ई कुम्बा नू र'अना बेड़ा गूटी ओत्था ती कज्जका रेक'अत र'अदत। ईद एन्ने मल्ला का नाम केचकत ती ई खेखेल ता मेदन अम्बना कानन पत्तारदत। लिकिन नाम गा मेर्खा मेदन अत्ता गे दिम पत्तारदत। खने ई खि'ऊ मेद जनमजुग उज्जना ती नुलखर'ओ क'ओ।

5 इदगे नमन सपड़'उस धर्मस दिम हिकदस, अरा बयाना लेक्खा आस तंगहै नेम्हा बोलतासिन नमा गे चिच्कादस।

6 औंगे नाम सगर घड़ी डिठ गने र'अदत, अन्नु हूँ नाम अखदम का एका गूटी ई मेद नू र'अदत आ गूटी उर्बस ती गेच्छा र'अदत।

7 एन्देरगेका नाम ईरका कत्था ती मला पत'अना ती ऐकदत।

8 नाम गा डिठ गने र'अदत, अरा ई खेखेल ता मेदन अम्बोत ती उर्बस गने उज्जा गे दिम कोइहे पत्तारदत।

9 औंगे नाम ई मेद नू र'अदत मलता ई मेद ती अम्बदत कालदत, उर्बासिन रिङ्गित'अना दिम नम्है मने र'ई।

10 एन्देरगेका नाम ओर्मत मसीसी नेंवई बेल-गद्दी ही मुन्दहारे इज्जना मनो। खने नाम ओर्त ओर्त कया नू र'अना बेड़ा नंजका दौ मलता मलदौ ही ऊजिन खक्खोत।



- 11 औंगे उर्बासिन एल्चना ही मनेन अखना ती ऐम आलारिन धर्मस तरा किरा गे रिङ्गत'अदम। ऐम एका लेक्खा आलम एन्ने धर्मस दौलेम अखदस। ऐन असरा नन्दन का अन्नेम नीम हूँ इदन अखदर।
- 12 ऐम गा निम्है मुन्दहारे एम्हा ओहमा अउरिम मल नन्दम, लिकिन नीम एम्है पत नू फुलई नना गे मोका चि'अदम। औंगे नीम आर गे किर्त'अर ब'आ औंगदर का एकार जिया ही कत्था नू मला बहरी ऐदना ही कत्था नू फुलई नन्नर।
- 13 ऐम पूरू र'अदम होले आद धर्मस गे अन्ने र'अदम, अरा ऐम बेस लूर नूर'अदम होले आद निम्हा दौ गे अन्ने र'अदम।
- 14 मसीसी चोन्हा गा एमन तंग्हे तबे ननी, एन्देरगेका ऐम इदन बुङ्गुरकम का ओर्तोस ओर्मर गे केचकादस, खने ईद एन्ने लेक्खा ईद'ई का, ओर्मर केचकानर।
- 15 मसीस नाम ओर्मर ही बदली नू केचस, ई चङ्डे अक्कु उज्जालनर आर तमा गे मल उज्जना र'ई। ने तमा बदली नू केचस ती फिन उज्जा चोचस आस गे दिम आर उज्जना र'ई।
- 16 औंगे ऐम अक्कु ती नेकन हूँ कया ही सुबहा ती मल लेखदम जोक्खदम, ऐम मुन्द मसीसिन एन्ने कया सुबहा ती लेखकम जोक्खकम, लिकिन अक्कु ती इकला हूँ आसिन अन्नेम मल नन्दम।
- 17 औंगे नीकईम मसी नूर'अदस होले, आस पुना गदूना हिकदस। पच्या कत्था गुट्ठी किरिम बिच्चिया, पुना उज्जना ओर मंजकी र'ई।
- 18 अरा इबड़ा उर्मी धर्मस ती मंजकी र'ई। आस दिम मसीस ती नमन तंग्हे गने मेसाबाचस, अरा ई मेसेर नख्रत'अना ही नलखन एमा सौंपचकादस।
- 19 ईद एन्ने हिके का धर्मस खेखेल ता ओर्मा आल जातियर ही अक्का-बलका गुट्ठिन मल गन'अरकी आरिन मसीस नू तंग्हे गने मेसाबाचस ती ई मेसाब'अना ही कत्थन एमा सौंपचकादस।
- 20 औंगे धर्मस एम्है तरती दिम तंग्हे ने'अनन नन्ना लेक्खा ऐम मसीसी पैकम हिकदम। ई चङ्डे नीम धर्मस गने मेसाब'आ ब'अरकी मसीसी ऊजी नू ऐम निमन ने'अदम।
- 21 धर्मस नमा गे इकला हूँ पाप मल नंजका येसुसिन पाप ही दाँडे कमचस। नाम मसीस नू धर्मसी उजगो मना गे दिम आस एन्ने नंजस।

2 कोरिन्थ 6



- 1 धर्मस गने नलख ननू आलम ऐम निमन ने'अदम का धर्मस ती नीम खक्खका मया आबोन अनभनियाँ मना अमा चि'आ।
- 2 एन्देरगेका धर्मस बाचकादस का, “एंगहै सोगगे ऐरना ही बेड़ा नू ऐन निमन मेंजकन, नाइरना ही उल्ला नू ऐन निमन सहाड़ा नंजकन।” ऐन निमन ब'अदन का, “ऐरा, अक्कुन दिम धर्मसी सोगगे ऐरना ही बेड़ा, अरा अक्कुन दिम नाइरना ही उल्ला र'ई।”
- 3 ऐम नेख'आ डहरे नू हूँ छेंका मना मल बेद्ददम का, एम्हा सुसर'अना नलख नू बदी अम्बो मना।
- 4 लिकिन ऐम धर्मसी मानिम जोंखम एन्ने उर्मी मदहे नू एम्है उज्जना ओक्कना ती ऐद्ददम। कोइहे खतीर नन्ना नू, कलपारना नू, कीड़ा नू, सस्ती नू,
- 5 कोर्ी लौरना नू, जेहेल काना नू, हलहली गुट्ठी नू बझना नू, कोइहे अर्जाना नू, बिगर खन्द्रका नू, उबसना नू,
- 6 नेम्हा र'अना नू, लूर नू, सहना नू, सोगगे ऐरना नू, नेम्हा बोलतस एम्है नू र'अना नू, मानी चोन्हा नू,
- 7 मानी कत्थन तेंगा कुद्दना नू, धर्मसी सवंग नू, अरा उजगो ही कमहइन तीना अरा डेब्बा खेक्खा नू धरना नू ऐम एम्है गोवाह आबोन ऐद्ददम।
- 8 मईन खक्खकी अरा लज्जे मोखरकी, ओहमा खक्खकी अरा हींइरकी, बहक'ऊ एन्ने सोचना ती हूँ ऐम मानिम जोगे जोंखम र'अदम।
- 9 ऐम चिन्हार मल्कम एन्ने सोचना ती हूँ बेस चिन्हार आलम र'अदम। ऐम खे'आ बेद्दालदम एन्ने सोचना ती हूँ उज्जू आलम र'अदम। ऐम पस्का कोइरका र'अदम, लिकिन मल पिटरदम।
- 10 ऐम दुक्खे सार'ऊ एन्ने सोचना ती हूँ उर्मी बेड़ा रिझ'ऊ आलम हिकदम। ऐम कीइर लेखदम अन्नु हूँ बग्गेरिन उर्ब कमदम। एम्है गुसन एन्दरा हूँ मलकी अन्नु हूँ उर्मी जिनिसन अर्ज'अदम।
- 11 कोरिन्थ नगरे ता आलारो! निम्है गुसन ऐम फरीफरी कछनखकम, एम्है जिया निम्है गुसन चोन्हा गने चल्खरकी र'ई।
- 12 ऐम निम्है मइय्याँ गोट्टा जिया ती चोन्हा नन्दम, लिकिन नीम गा एम्है मइय्याँ गोट्टा जिया ती चोन्हा मल नन्दर।
- 13 इदही ऊजी नू नीम हूँ एमा गे निम्हा जियन चल्ख'आ ती चोन्हा नना एन्ने ऐन निमन एंगहै खद्द-खर्ी अक्कन ती ब'अदन।



14मल पत'उर गने अमा पुन्दर'आ। उजगो अरा नेग मलका ही एन्देर मेसर-नखरना? बिल्ली ही ऊखा गने एन्देर संगे-लौंगे?

15मसीस अरा सैतान ही संगेर ही गने एन्देर मेल? पत'उर अरा मल पत'उर ही एन्देर मेसना?

16धर्मसी मन्दिर गे मूर्ति गुट्ठी गने एन्देर नता? नाम गा उज्जना धर्मसी मन्दिर हिकदत। एकासे का, धर्मस बाचकादस, “ऐन आर नू ओक्र'ओन, अरा आर ही मझी नू कुद्दोन नुंगोन, अरा ऐन आर ही धर्म र'ओन, अरा आर एंगहै आलर र'ओर।”

17औंगे उर्बस एन्ने ब'अदस, “मलदौ आलर ही मझी ती उरखा ती तरकूटी र'आ, अरा सोतबोड़'आ आलोन अमा एवंसड़'आ, खने ऐन निमन इंझ'ओन।

18ऐन निमा बंग र'ओन, अरा नीम एंगा खद्दर अरा खद्दो र'ओर, उर्मी ती सवंगिय उर्बन ब'अदन।”

2 कोरिन्थ 7

1अना एंगा चोन्हा भईरो! नमा एन्ने गच्छरना गुट्ठी खक्खकी रई, औंगे नाम नम्है कया अरा जियन सोतबोड़'आ ननू उर्मी जिनिस ती नमन सुध मंज खच्चदत नेकअन। अरा धर्मसी इल्चक'आ गने नमा नेम्हन पूरा मन्ना ही तरा नलख नन्दत नेकअन।

2ऐम मुन्द तिका लेक्खा नीम निम्है जिया नू एमा गे अड्डा चि'आ। ऐम नेख'अन हूँ मलदौ मल नंजकम। ऐम नेख'अन हूँ मल बगड़ाचकम। ऐम नेख'अन हूँ मल ठकचकम।

3ऐन निमन बदी टिड़'आ गे इदन मल ब'अदन। अन्ति ऐन गा मुन्देम बाच खच्चकन का ऐम निम्है गने उज्जा गे अरा खे'आ गे हूँ सपड़ारका र'अदम, ई लेक्खा नीम एम्है जिया नू अड्डा खक्खका र'अदर।

4ऐन निम्है पत नू कोड़हे डिठ गने र'अदन। ऐन निम्है पत नू कोड़हे फुलई मन्दन। ऐन जिया सालना ती नीन्द्रका र'अदन। ऐन एंगहै उर्मी खिलपत ही मझी नू हूँ रिझ ती नीन्द्रका र'अदन।

5एन्देरगेका ऐम मकेदोनिया बरचकम खने हूँ, एमा गे सल्ल मल खक्खा। लिकिन ऐम उर्मी तरती खिलपत खक्खकम, बहरी नग्गानखरना अरा भितरी इल्चका रहचा।

6अन्नू हूँ लुदऊ आलर गे जिया सालना चि'ऊ धर्मस, तीतुसी बरना ती एमा सल चिच्चस।

7आसी बरना ती लेका मला, लिकिन नीम एका लेक्खा आसिन रिझाबाचर एन्ने मेंजकम ती हूँ ऐम जिया सालना खक्खम। नीम एंगन ऐरा गे ऐ बग्गे पतारदर, अरा नीम ऐ बग्गे दुक्खे सारदर,



अरा नीम एंगहै मइय्याँ ऐ बग्गे तिहा उइय्दर, अबड़ा पत्त नू आस एमन तिंगियस, खने ऐन अउरिम कोइहे रिझ्ना आ हेलरकन।

8 ऐन निमा लिखचका चिठी निमा गे दुक्खे चिच्चा होले हूँ, ऐन अदिन लिखचका ती मल पस्तारदन। एंगहै चिठी निमन दुक्खे चिच्चा एन्ने ऐन अक्कन खने, ऐन मुन्द पस्तारकन। नीम जुक्किम घइही लेका दुक्खे सारचकर।

9 लिकिन अक्कु ऐन रिझ्नादन। नीम दुक्खे सारचकर इदगे मला, निम्है दुक्खे निम्है नू जिया किर्त'अनन ओन्द्रा, इदगे ऐन रिझ्नादन। नीम आ दुक्खेन धर्मसी मने लेक्खा इंझकर, खने एम्है तरती निमा गे एन्देर हूँ मल बगड़ारा।

10 एन्देरगेका एका दुक्खे धर्मसी मने ती नमा इंझना मनी अदही ऊजी जिया किर्त'अना मनी, अरा जिया किर्त'अना नाइरना तरा कइहाबई, अरा अत्रु खोबरारना मल मनी। लिकिन खेखेल ता दुक्खे ही ऊजी खे'अना मनी।

11 नीम ऐरा का, नीम एका दुक्खेन धर्मसी मने ही लेक्खा इंझकर, अत्रु ती निमा एवंदा भगती आबोन कुन्द्रा। नीम बिगर बदी आलर एन्ने ऐद'आ गे एवंदा अंगियारदर, अरा एवंदा कैर नन्दर, अरा एवंदा इल्चदर, अरा एवंदा चीबाखारदर, अरा एवंदा रिझ्ना, अरा नैवई मन्नन ऐरा गे एवंदा मने नन्दर। ई लेक्खा नीम ई पत्त नू उर्मी तरती बिगर बदी मना गे पुरुब नंजकादर।

12 मानिम नू ऐन आ चिठिन इदगे मल लिखचकन का मलदौ ननू आलर अरा मलदौ सह'ऊ आलर ही एंगा सोच रहचा। लिकिन धर्मसी ऐरना नू नीम निमन एमा गे ऐ कोइहे चिच्कादर एन्ने नीम अख'आ गे दिम ऐन आ चिठिन लिखचकन।

13 इबड़ा ही चड्डे एमा जिया सालना खक्ख्रा। इदिन ती कोइहे ऐम तीतुसी रिझ्ना आबोन ईरकम ती अउरिम कोइहे रिझ्नाकम, एन्देरगेका आसी जियन नीम ओर्मर हरियर नंजकर चिच्कर।

14 ऐन आसी मुन्दहारे निम्है पत्त नू फुलई मंजका ती बाचकन। इबड़ा कत्था नू ऐन लज्जे मोखा गे नीम हूँ मल चिच्कर। ऐम उर्मी बेड़ा निम्है गने मानिमन दिम बाचकम। अन्नेम तीतुस गने ऐम निम्है पत्त नू फुलई मंजका ती बाचका कत्था मानिम मंजा।

15 अरा नीम ओर्मर आसी कत्थन एकासे पेसकर अरा इल्चुनुम अरा असरनुम आसिन परघाचकर, इदन आस सुरता नन्दस खने, निम्है नू आसी चोन्हा कोइहे मनी क'ई।

16 उर्मी कत्था नू एंगा निम्है मइय्याँ असरा र'ई, इत्रु ऐन रिझ्नादन।

2 कोरिन्थ 8



- 1 अक्कु अना भईरो! मकेदोनिया ता कलीसिया गुट्ठी गे धर्मस ऐदका मया ती आर नंजका ही पत्त नू ऐम निमन अखत आ बेद्ददम।
- 2 आर कोइहे खिलपत ही बिट्टना बेड़ा नू हूँ कोइहे रिझर। अरा आर कोइहे कूल कीड़ा नू हूँ, गोट्टा जिया ती चि'अना खट्टना नू बग्गे ती बग्गे चिच्चर।
- 3 आर ही पत्त नू एंगा गोवाह ईद का आर तम्है औसान ती हूँ, अरा तम्है औसान ती चाड़ियर ती हूँ दान चिच्चर। अरा तम्है गोट्टा जिया ती दान चिच्चर।
- 4 आर एमन कोइहे अरजी गने नेचर का येरुसलेम ता नेम्हा आलर ही संगरा नना गे सुसर नलख नू भागी मना गे तमा गे हूँ मोका खक्खर ओ।
- 5 आर एकासे ऐम असरा नंजकम अदिन ती कोइहे नंजर का, आर मुन्द तमन उर्बस गे सोंपचर अरा खोखा धर्मसी मने लेक्खा एमा गे तमन सोंपचर।
- 6 ओँगे ऐम तीतुसिन नेचकन का आस एका दौ नलखन निम्है मझी नू ओइ नंजकाचस, अदिन मुंजा गे आस बर'अरकी निमन रिझरत ओस।
- 7 अक्कु गा नीम उर्मी कत्था नू पर्दका ऊसुका र'अदर, पत्त'अना नू, कत्था नू, लूर नू, उर्मी रकम ही चिह्ंक नू, एम्है मइय्याँ ता निम्है चोन्हा नू पर्दका ऊसुका र'अदर। अन्नेम नीम ई बरारन चि'अना नू हूँ पर्दना ऊसकना रई।
- 8 ऐन इदन ओन्टा पेसका लेक्खा मल ब'अदन। लिकिन नन्नर संगरा नन्ना नू एका लेक्खा अंगियारनर, इदन निमा गे ऐदना ती निम्है चोन्हा एका लेक्खा मानिम रई एन्ने अख'आ गेम ऐन बेद्ददन।
- 9 नीम गा नम्है उर्बस येसु मसीसी मया आबोन अखदर का, आस उरुब रहचका ती हूँ निम्है चड्डे कीड़ा मंजस, ईगेका नीम आसी कीड़ा मन्ना ती उरुब मना ओँगोर।
- 10 ई पत्त नू ऐन निमन ओन्टा सलहा चि'अदन का, इतिंगाली एका दौ नलखन नीम ओइ नंजकर, अदिन अक्कु नन्ना मुंजना दिम निम्है दौ रई। अदिन नन्ना नू लेका मला अदिन नना गे मने नन्ना नू हूँ नीमिम मुध रहचकर।
- 11 ओँगे आ नलखन ओइ नना गे निमा एवंदा अंगिय'अना रहचा, आद अदन नन्ना मुंजा गे हूँ र'अना रई। अक्कु निमा गुसन ऐ बग्गे रई अत्रु ती अदिन नंज मुंजके।



- 12अन्ति ओर्तस गे दान चिआ गे अंगियअना रई होले, तंगहै औसान लेक्खा इन्द्रिइमन हूँ चीतारदस, धर्मस अदिन इन्द्रदस। नेखआ तिम हूँ एन्ने असरा मल नन्तारई का आस अपन औसान ती बग्गे चिओस।
- 13एंगा एन्ने मने मल्ला का, नन्नर रिझाबओर अरा नीम दुक्खे मनोर। ओर्मर ओन्टा लेक्खा रआ गे दिम ऐन बेद्ददन।
- 14ई बेड़ा नू निम्है निन्द्रका रअना नन्नर ही चाड़न पुराबओ। अन्नेम नन्ना बेड़ा नू नन्नर ही निन्द्रका रअना निम्है चाड़न पुराबओ। ई लेक्खम नीम इरबर हूँ ओन्टम मनोर कओर।
- 15नेम्हा पुथी नू इदही पत्त नू एन्ने लिखकी रई का, “ने बग्गेम खुजकाचस, आस गुसन कोइहे बग्गे मल मंजा, अरा ने जुक्किम खुजकाचस आस गुसन कोइहे जुक्की मल मंजा।”
- 16ऐन निम्है मइय्याँ एका लेक्खा अंगियअना ती रहचकन, अन्नेम धर्मस तीतुस गे आ अंगियअना आबोन चिच्का ती ऐन धर्मसिन धन्यवाद नन्दन।
- 17एन्देरगेका तीतुस एमा नेअना आबोन इन्द्रना ती लेका मला, आस कोइहे अंगियअना गने तंगहै मने ती निम्है गुसन बरदस।
- 18ऐम आसी गने ओर्त भईसिन हूँ तइय्यालदम, ने दौ कत्था तेंगा कुद्दना चड्डे उर्मी कलीसिया नू कोइहे नामे खक्खका रअस।
- 19ईद लेका मला, अरा उर्बासी महबा गे अरा संगरा नना गे एमा गे रअना अंगियअना आबोन ऐदआ गे ऐम दान आबोन येरुसलेम होओम खने, एम्है डहरे ऐकना नू एम्है गने संगे चिआ गे कलीसिया आसिन चज्जकी रई।
- 20ई बरार आबोन ऐम खट्टरकी चिअना बारी, ने हूँ एमन अदही पत्त नू बदी अम्बोर नना बेद्ददम।
- 21एन्देरगेका धर्मसी ऐरना नू लेका मला आलर ही ऐरना नू हूँ उजगो आबोन नना गेम कोइहे चिहुट नन्दम।
- 22इबड़ा इरबर गने ऐम अउर ओन्टा एम्है भईसिन हूँ तइय्यालदम। ऐम घड़ीम घड़ी बिदचकम ती अक्कम का आस कयनो पत्त नू संगरा नना गे अंगियअना गने रअस। अक्कु आस गे निम्है मइय्याँ कोइहे असरा रअना ती आस संगरा नना गे मुन्द तिम कोइहे अंगियअना गने रअस।



23 तीतुसी पत नू गा आस एंगहै सझा र'अस अरा निमा गे सुसर नन्ना नू एंगहै संगे नलख ननू र'अस। अरा एम्है भइय्योर ही पत नू गा आर कलीसिया ती तइरका पैकर अरा मसीस गे महबा आबोन ओन्द्र'ऊ र'अनर।

24 औंगे निम्है चोन्हन अरा ऐम निम्है पत नू फुलई मन्ना ती बाचका कत्था गुट्ठिन कलीसिया ही मुन्दहारे आर गे पुरुब ऐद'आ।

2 कोरिन्थ 9

1 येरुसलेम ता नेम्हा आलर ही सहाड़ा गे नन्ना ई सुसर ही पत नू ऐन अउरिम निमा लिखना ही चाड़ मलकी।

2 एन्देरगेका संगरा नन्ना ही निमा अंगिय'अना आबोन ऐन अक्कन। मकेदोनिया नू र'उर ती एन्ने बाचकन ती फुलई मंजकन का, अखाया चक नू र'ऊ नीम पत'उर इतिंगाली ही दिम संगरा नना गे सपड़ारका र'अदर। निम्है ई अंगिय'अना आर ही ती कोड़हे आलारिन संगरा नना गे रिझाबाचा।

3 ऐम ई पत नू निम्है मइय्याँ फुलई मंजकम ती बाचका कत्था सिथिया अम्बो मना का, ऐन इबड़ा भइय्योरिन निम्है गुसन तइय्यालदन। नीम सपड़ारका र'ओर एन्ने आरिन बाचकन, अन्नेम नीम हूँ सपड़ारका र'आ।

4 मकेदोनिया ता आलर ती नीकईम एंगहै गने बर'ओर ती नीम चि'आ गे मल्ला सपड़ारका ऐरोर होले, ऐम निम्है मइय्याँ उइयका असरा ही चइडे एमा लज्जे मोखना मनो (एन्ने ऐम निमन ब'अना ही चाड़ मल्ला), नीम हूँ लज्जे मोख'ओर दने।

5 औंगे ऐन सोचकन का, ऐन इबड़ा भईरिन एंगहै ती मुन्द निम्है गुसन तइय्या गे चाड़ र'ई। आर क'ओर ती नीम चि'आ गे गच्छरकादर आ बरारन खोजरकी सराजमा ननोर। होले ईद ढेवाँ ढेवाँ ती मला लिकिन उर्मी जिया ती रिझ गने चि'अना बरार मनो।

6 सुरता उइय्या का, ने जुक्की चाँखदस आस जुक्की खोयोस, अरा ने बग्गे चाँखदस आस बग्गे खोयोस।

7 औंगे ओर्मर तान तंगहै जिया नू चि'आ गे एकासे तिगचकानर अन्नेम दान चि'अना र'ई, कुटमुटर'आ ती मला अरा बइपेलहा ती मला, एन्देरगेका रिझ ती चि'उरिन धर्मस चोन्हा नन्दस।

8 धर्मस उर्मी बरकतन निन्दका ती निमा चि'आ गे उंगूर'अस। औंगे निमा चाड़ र'ई अबड़ा उर्मिन उर्मी उल्ला खखोर, अरा उर्मी दौ नलख नू नीन्द्र'ओर क'ओर।



9इदही पत्त नू नेम्हा पुथी नू लिखकी रई का, “आस हरग जिया ती कीडर गे दान नंजस, आसी उजगो जनमजुग कम्की र'ओ।”

10धर्मस दिम चाँख'उर गे बिहनी अरा ओना-मोखा गे ओन्ना-मोखनन चि'अदस। अन्नेम आस निमा चाइ ही बिहनी चि'ओस ती अदिन पर्द'आ गे ननोस, अरा निम्है नू हरग जिया ती दान चि'अना ही कोइहे खंजपन कुन्द्रत'ओस।

11ई लेक्खा नीम उर्मी रकम ही खुर्जी ती उरुब मनोर ती हरग जिया ती चि'आ गे उंगू मनोर। ईद ती निम्है दान एम्है सिरे खट्टरकी दानन खक्ख'उर धर्मस गे धन्यवाद चि'आ गे चड्डे मनो।

12औंगे नीम नन्ना ई सुसर नलख नेम्हा आलर ही चाइन लेका मल पुराब'ई, लिकिन धर्मसिन धन्यवाद नना गे बग्गे आलारिन रिङ्ग'त'ई।

13निमा ई सुसर'अना नलख ती नीम निमन पुरुब मंजका र'अदर। आर धर्मसी ओहमा ननोर, ईगेका नीम उर्मी पेसना गने मसीसी दौ कत्थन इङ्ग'कर, अरा आर ही गने अरा ओर्मर ही गने हरग जिया ती दानन खट्टकर चि'चकर।

14आर कोइहे चोन्हा गने धर्मस गुसन निमा गे गोहरार'ओर, एन्देरगेका आर अखनर का धर्मस निमन एका कोइहे मया चि'चकादस।

15धर्मस चि'चकादस आ थाह'आ पोलना बरदान गे धन्यवाद।

2 कोरिन्थ 10

1अक्कु ऐन पौलुस मसीसी लुदऊ अरा सोग्गे ती निमन ने'आ लगदन। निम्है ती जोक्क आलर ब'अनर का, “ऐन निम्है मङ्गी नू र'अना बारी सन्नी अरा पयहा र'अदन लिकिन गेच्छा नू र'अना बारी निम्है मङ्ग्याँ डिढगर गने र'अदन।”

2ऐन निमन ने'अदन का, नीम एन्ने नना का ऐन निम्है गने र'अना बारी एंगा बेइहा मन्ना अम्बो मना, एन्देरगेका एकार अगम'अनर का ऐम सौंसार आलर लेक्खा नन्दन। आर ही गने ऐन मानिम नू बेइहा आलन लेक्खा नना गे तिगचकन।

3ऐम ई सौंसार नू उज्जदम, लिकिन सौंसार ता आलर लेक्खा चेत मल नन्दम।

4एम्है चेत ही कमहइ गुट्ठी सौंसार ता आलर बउर'अना कमहइ गुट्ठी मल्ली, लिकिन गदें गुट्ठिन धंस'ऊ धर्मसी सवंगिय कमहइ आबोन बउर'अदम।

5अत्रु ती ऐम आनानखना गुट्ठी अरा धर्मसी पत्त ता लूर ही बिइदो नू चोचकी र'ऊ उर्मी फुलई मन्नन खंडदम। अरा ओर्मा सोचनन मसीसिन पेस'आ गे हेंरदम।



- 6अरा नीम पूरी तरा पेस्र'उर मंजका ती खोखा, एंगरका मल पेस्र'उर गे दंडे चि'आ गे ऐम सपड़ारकादम।
- 7नीम बहरी ही ऐथ्रनन लेका ऐरदर। नीकईम तंगन मसीसी एन्ने असरा नन्दस होले, आस इदन बुझना रई का, एकासे आस मसीसी र'अस अन्ने ऐम हूँ मसीसी र'अदम।
- 8उर्बस एमा गे चिच्का अदिया ही पत नू ऐन कोइहे फुलई मन्दन होले हूँ, आ फुलई मन्ना ही पत नू ऐन मल लज्जदन, एन्देरगेका निमन नठार'आ गे मला, निमन परद'आ गेम आस आ अदियन चिच्का र'अस।
- 9नीम एन्ने अमके सोच'आ का, ऐन एंगहे चिठी ती निमन एल्कत'आ बेद्ददन।
- 10एन्देरगेका एंगहे पत नू जोक्क आलर एन्ने ब'अनर का, “आसी चिठी गुट्ठी बोझा अरा अरबना रई। लिकिन आस एम्है गने र'अदस खने, आस पयहा र'अस अरा कछनखना नू सवंगिय मलका बेसे र'अस।”
- 11ने इदन ब'अनर आर अख'आ हो'आ का, ऐम गेच्छा र'अरकी एका कथन चिठी ती लिखदम, अबड़न दिम ऐम निम्है गने र'अना बारी नलख नन्ना ती ऐद'ओम।
- 12निम्है मझी नू ने तमानिम कोहाँ ऐदनर, आर ही गने ऐम एमन बरुबर मन्ना महले जोक्खना गे डिढ मल नन्दम। लिकिन आर गा अपन ही जोक्खना ती अपन खोयनर, अरा तमन ओर्त ओर्त गने जोक्खनर खने, आर तम्है बोया मन्नन ऐदनर।
- 13ऐम गा एम्है सिवान आबोन चाड़ोम ती फुलई मल मनोम। धर्मेस एमा नलख नना गे सिवान ठंचकादस, अइय्यम दिम ऐम फुलई मनोम। अइय्या दिम निम्है मझी ता एम्है नलख हूँ मेसकी रई।
- 14ऐम एम्है सिवान ती मल चाड़दम, अन्नु हूँ ऐम निम्है गुसन बरचकम रहचकम। नीम एम्है सिवान ही भितरी र'अदर, एन्देरगेका ऐम मुन्द तिम निम्है गुसन मसीसी दौ कथन ओन्द्रकम बरचकम।
- 15ऐम नन्नर ननू नलखन एमा ब'अरकी फुलई मल नन्दम, आद हूँ सिवान ती चाड़ना नलख दिम हिके। अन्नु हूँ एम्है असरा ईद रई का, निम्है पत'अना पर्दनुम क'ओ अरा एम्है सुसर नलख निम्है मझी नू कोइहे बींइरनुम क'ओ।
- 16अदही खोखा ऐम निम्है सिवानन कट्टरकी मुन्द कालरकी अउर नन्ना चकभार नू दौ कथन तेंगा कुद्दोम। तहाँ नन्नर ही सिवान नू मंज खच्यका नलख ही मइय्याँ फुलई मना गे एमा मोका मल खक्ख'ओ।



17 नेम्हा पुथी ब'अना लेक्खा, “ने फुलई मना गे पतारदस, आस उर्बस नू दिम फुलई मन्दस नेकअन।”

18 एन्देरगेका ने तान तंगन ओहमा नन्दस आस मला, उर्बस ती ओहमा खक्खोस आस दिम इंझतारदस।

2 कोरिन्थ 11

1 एंगा असरा का नीम एंग्हे बयहन जोक्क सह'ओर दने। लिकिन मानिम नू नीम एंग्हेन सहदर दिम।

2 ऐन निमन ओर्त लेका मेटस मसीस गे गच्छरकन का ऐन निमन नेम्हा डिंडा पेल्लो लेक्खा मसीस गे सोंप'ओन। इदिन ती दिम धर्मेस गे तंग्हे आलर मइय्याँ र'अना क्याल एंगा गे हूँ निम्है मइय्याँ रई।

3 लिकिन ऐन एल्चदन का एकासे नेरद तंग्हे चतरा ती हवा आबोन भुरियाचा, अन्नेम निम्है जिया नू मसीस गे र'अना मानिमन ती अरा मानिम भगती ती नीम बेहडार'ओर दने।

4 एन्देरगेका नीकईम निम्है गुसन बर'अरकी ऐम मल्ला तिका एकअम नन्ना येसुसी पत्त नू तेंगदस, मलता नीम खक्खका नेम्हा बोलतासिन अम्बरकी एकअम नन्ना बोलता ही पत्त नू ब'अदस, मलता नीम इंझका दौ कत्था ती एकअम नन्ना दौ कत्थन ओन्द्रदस होले, नीम सेब्बा तिम अबडन इंझदर।

5 अबडा “कोहाँ तइरकर” ती ऐन एन्देर कत्था नू हूँ ती सन्नी मलदन एन्ने सोचदन।

6 ऐन भासन चि'अना नू सवंगिय मलदन, अन्नु हूँ लूर नू अन्ने मला। ऐम गा इदन उर्मी तरती उर्मी कत्था नू दहदर नंजकादम।

7 ऐन निमन कोहाँ कम'आ गे एंगन सन्नी नंजकन ती ऐन निमन धर्मेसी दौ कत्थन सिथियम तिकन। ऐन एन्ने नंजकन खने एन्देर इन्द्रिम पाप नंजकन का?

8 ऐन निमा गे सुसर नना गे नन्ना कलीसिया गुट्ठी ती संगरा खक्खकादन। एन्ने ऐन निमा गे आरिन बच्चकन।

9 अरा ऐन निम्है गने र'अना बारी एंगा गे चाइ मंजा खने, ऐन अदगे नेकन हूँ दुक्खे मल चिक्कन। एन्देरगेका एंगा एन्देर चाइ रहचा, अबडा उर्मी गे मकेदोनिया ती बरचका भइय्योर दिम चि'अरकी संगरा नंजर। ऐन मुन्द एकासे रहचकन अन्ने बरना उल्ला नू हूँ एंग्हे चाइ गे एका तरती हूँ ऐन निमा गे ओत्था मल मनोन।



- 10 मसीसी मानिम एंगहै नू रई, ईद मानिम दिम हिके। अन्नेम अखया चक नू रऊ ने हूँ एंगन ई फुलई मन्ना ती छेक'आ पोल्लोर, ईद हूँ मानिम हिके।
- 11 एन्देरगे ऐन इदन एन्ने ब'अदन? ऐन निमन चोन्हा मल नन्ना ती का? धर्मस अखदस ऐन निमन एका कोइहे चोन्हा नन्दन।
- 12 ऐम एकासे सुसर नलख नन्दम, अन्नेम आर हूँ सुसर नलख नन्नर एन्ने आर फुलाई मन्नर। अन्ने आर नना पोल्ला गे ऐन ई लेखम नन्तेम र'ओन।
- 13 एन्देरगेका एन्ने आलर ठकवा तइरकर र'अनर, अरा मसीसी तइरकर लेखा भेंस ऐदना ती फसवार नलख ओथ्र'ऊ आलर हिकनर।
- 14 लिकिन ईद हैकट मन्ना ही कथा मल्ली, एन्देरगेका सैतान हूँ गा बिल्चिना मेर्खा पैकस लेखा भेंस ननी।
- 15 आँगे अदही जोंखर हूँ उजगो ही जोंखर लेखा भेंस नन्ना कोहाँ कथा मल्ला। लिकिन एकासे आर ही नलख रई अन्नेम आर ही मुंजना र'ओ।
- 16 ऐन अउरिम ब'अदन ने हूँ एंगन बोया अमके सोच'आ। लिकिन अन्ने नीम सोचदर होले, एंगन बोया बेसेम इङ्ग'आ, खने ऐन हूँ अउर कटिक फुलई मना आँगदन।
- 17 एन्ने फुलई मन्ना डिठ ती ब'अना ही पत्त नू गा ऐन उर्बासी मने लेखा मल ब'अदन। लिकिन ऐन ओन्टा बोया बेसेम ब'अदन।
- 18 बग्गे आलर सौँसार ही लेखा फुलई मन्नर, ऐन हूँ अन्नेम फुलई मनोन।
- 19 नीम गा एका कोइहे लूरगर आलर र'अदर, बोयारिन रिझ गने सहदर।
- 20 एन्देरगेका नीकईम निमन बिट्ठी ननू जोंख कम'आ बेद्ददस, अरा नीकईम निमन नुलखदस, अरा नीकईम निम्है ओदहा ती अपन नफा हो'अदस, अरा नीकईम तंगन कोहाँ नन्दस, अरा नीकईम निमन चटक'अदस, होले हूँ नीम अबड़ारिन रिझ गने सहदर।
- 21 ऐन लज्जे मोखदन ती इदन ब'अदन का ऐम गा इबड़न नना गे सवंग मलका नू रहचकम। अन्नु हूँ नीकईम एका पत्त नू फुलई मना गे डिठ नन्नर होले, अन्नेम ऐन हूँ फुलई मना गे डिठ मनोन। ऐन ओन्टा बोया बेसे इदिन हूँ ब'अदन।
- 22 आर लेका इब्रानी आलर का? ऐन हूँ इब्रानी आलन हिकदन। आर लेका इस्राएल आलर का? ऐन हूँ इस्राएल आलन हिकदन। आर लेका अब्राहमसी बनस ता आलर हिकनर का? ऐन हूँ अब्राहमसी बनस ता हिकदन।



- 23 आर लेका मसीसी जोंखर का? (ऐन लूर मलका बेसे एन्ने ब'अदन।) ऐन आरहिन ती हूँ बड़ियर जोंखन हिकदन। ऐन ई सुसर नलख नू कोइहे अर्जाचकन, अरा बग्गे हेल जेहेल नू पहाबाचकन, अरा कोर्रा ती बग्गे लौर मोक्कन, ऐन बग्गे हेल खे'अना ती बछ्कन।
- 24 यहूदीर ती ऐन पाँच खेप ओन कोर्रा जुक्की चालीस कोर्रा लौर खक्खकन।
- 25 रोमीर ती ऐन तीन खेप बेंत ती लौर खक्खकन। आंग्होल पखना ती लोइगतारकन। तीन खेप एंगहा काना कोहाँ डोंगा एसरा ती धसरा केरा। आंग्होल गोट्टा उल्ला माखा ऐन मझी समुदर ता अम्मु नू अत्रा इत्रा बोहार'आ लिक्कन।
- 26 खनिम खनिम ऐन डहरे इक्कन। ऐन खाइ गुट्ठी ही अपलोक नू रहचकन। एंगा गे बच्चुर ती हूँ अपलोक बरचा, अरा यहूदीर ती हूँ अपलोक बरचा, अरा नन-यहूदीर ती हूँ अपलोक बरचा, अरा नगरे नू हूँ अपलोक बरचा, अरा टोइंग नू हूँ अपलोक बरचा, अरा समुदर नू हूँ अपलोक बरचा, अरा कसरहा भईर ती हूँ अपलोक बरचा।
- 27 ऐन कोइहे अर्जाचकन अरा तिहा नंजकन, अरा कैनो माखा मल खन्द्रकन, अरा कीड़ा नू अरा ओनक'आ नू रहचकन, अरा खनिम खनिम बिगर ओन्ना-मोखना नू रहचकन, अरा पइय्याँ नू अरा किचरी मलका नू रहचकन।
- 28 अरा इबड़ा उर्मी ती कोइहे गा, उर्मी कलीसिया ही पत्त ता एंगा घोख एंगन उर्मी बेड़ा बयाबाचकी रई।
- 29 नन्नर पयहा र'अनर खने, ऐन हूँ पयहा र'अदन। नन्नर पाप नू मूइनर खने, एंगहा जिया कैर ती ऊली।
- 30 एंगा एकअम कत्था नू फुलई मन्ना रई होले, एंगहे पयहा आबोन ईद'ऊ आलो मइय्याँ ऐन फुलई मनोन।
- 31 हुल्लो ती हुल्लो गूटी ओहमा खक्ख'ऊ धर्मस अरा उर्बा येसुसी बंगस अखदस का ऐन मल ठकदन।
- 32 ऐन दमसकोस नगरे नू रहचकन खने, हरेतास बेलासी राजीखापुस एंगन हेंर'आ गे नगरे नू पहरा ओक्ताचस।
- 33 लिकिन जोक्क आलर एंगन ओन्टा ढक्की नू उइय्यर ती नगरे ही भीत ही भंवारी ती एंगन किय्या एत्ताचर। ई लेक्खा ऐन बुचड़ारकन।

2 कोरिन्थ 12



- 1 एंगा अउर हूँ फुलई मना गे चाइ रई होले, ऐन फुलई मनोन, लिकिन अत्रु ती एन्द्रा हूँ दौ मल्ली। अन्नु हूँ उर्बस ती एंगा खक्खका देखार अरा दहदर गुट्ठिन ऐन तेंगोन।
- 2 मसी नू ऐन ओर्त आलासिन अखदन, चौदा चान ही मुन्द आस तिसर मेर्खा गूटी चौदतारस। आस मेद नू रहचस मलता मेद ही बहरी रहचस ऐन बलदन। अदिन धर्मस दिम अखदस।
- 3-4 ऐन आ आलासिन अखदन, आस परदेसोस गूटी चौदतारस। आस असन एन्ने कथा गुट्ठिन मेंजस, एकदा तेंगर'आ पुल्ली अरा अबड़न तेंगा गे एकअम आलस गे मल्ला चीरका। आस मेद नू रहचस मलता मेद ही बहरी रहचस ऐन बलदन। अदिन धर्मस दिम अखदस।
- 5 एन्ने आलासी पत्त तिम ऐन फुलई ननोन। लिकिन एंगहै पत्त नू एंगहै पयहा आबोन ईद'ऊ आलोन अम्बरकी अउर नन्ना इन्द्रिइम नू हूँ फुलई मल मनोन।
- 6 एन्ने ऐन फुलई मना बेद्ददन होले हूँ, ऐन बोया मल मनोन, एन्देरगेका ऐन मानिमन दिम तेंगदन। अन्नु हूँ ऐन एन्ने मल ननोन, एन्देरगेका ने हूँ एंगहै नू एन्द्रन ऐरदस अरा एंगहै ती एन्द्रन मेन्दस, अदिन ती कोइहे एंगहै पत्त नू अम्बोर सोच'आ।
- 7 अन्नु हूँ एंगा नू धर्मसी कोइहे देखार दहदर नन्तारकी रई। ऐन इबड़ा नू फुलई अम्बोन मना। ओंगे एंगहै कया नू ओन्टा अच्च कुइचका रई। ईद एंगा गे सस्ती चि'ऊ सैतान ही ओन्टा पैकस हवे, ओंगे ऐन फुलई मल मनोन दने।
- 8 इदन एंगहै ती तरकूटी मना गे ऐन उर्बस ती तीन खेप नेचकन।
- 9 लिकिन उर्बस बाचस, “एंगहै मया निंगा गे नीन्द्रकी रई, ईगेका निंगहै पयहा नू एंगहै सवंग दौलेम नलख ननी।” ओंगे अक्कु ऐन एंगहै पयहा गुट्ठी ही पत्त नू कोइहे रिझ ती फुलई मनोन। खने मसीसी सवंग एंगहा नू नलख नना ऊंगी।
- 10 ओंगेम ऐन मसीसी चड्डे एंगा मंजका पयहा ही पत्त नू, अरा लज्जे ही पत्त नू, अरा खिलपत्त ही पत्त नू, अरा खैतारना ही पत्त नू, सस्ती ही पत्त नू ऐन रिझ गने र'अदन। एन्देरगेका ऐन एकाबारी पयहा र'अदन, आ बारी ऐन सवंगिय र'अदन।
- 11 ऐन गा बैहा आलर लेक्खा कछनरखदन, लिकिन नीमिम एंगन एन्ने मना गे मंजकादर। नीम एंगन सुमर'अना रई। ऐन एन्द्रा हूँ मलदन, अन्नु हूँ निम्है ई “कोहाँ तइरकर” ती ऐन एन्देर कथा नू हूँ ती सन्नी मलदन।
- 12 ऐन निम्है गने रहचकन खने, ऐन मानिम नू एंगन पुरुब नंजकन का ऐन ओन्टा तइरकन। एकासे का ऐन कोइहे कयास गने दुक्खे सारना ती निम्है मझी नू बग्गे चिन्हा अरा अजगुत नलख अरा हैकट नलख गुट्ठी ऐदकन।



- 13 नीम नन्ना कलीसियन जोक्खना ती नीम एका रकम नू किय्या मंजकानर? हाँ, ऐन निमा गे बोझा मल मंजकन, ई कत्था गे एंगन छमा नना।
- 14 अक्कु ऐन तिसर खेप निम्हा गुसन बर'आ गे सपडारकादन, अरा निमा गे ऐन बोझा मल मनोन, एन्देरगेका ऐन निम्है खुर्जिन मला निमन बेद्ददन। खद्द-खर्रर तम्है अयंग-बंगर गे खुर्जी खोंडना ही चाड़ मलकी, लिकिन अयंग-बंगर दिम तम्है खद्द-खर्रर गे बेदना रई।
- 15 आँगे ऐन निमा गे कोड़हे रिझ ती एंगहा उर्मिनिम खेजाब'ओन, अरा एंगन हूँ खेजार'आ गे सपडारकादन। ऐन एवंदा कोड़हे निम्है ती चोन्हा नन्दन होले, नीम एंगहै ती जुक्की चोन्हा ननोर का?
- 16 निम्है ती जोक्कोर मन्नर का ऐन निमा गे बोझा मल मंजकन, लिकिन नन्नर सोचनर का ऐन चतरा आलन अरा ठगचका ती निमन बझाबाचकन।
- 17 एका एका ओर्तारिन ऐन निम्है गुसन तइय्कन, एन्देर ऐन आर ही नेखअय तिम इन्द्रिइम निम्है ती होच्चकन का? मानिम नू मल होच्चकन।
- 18 ऐन तीतुसिन निम्है गुसन बर'आ गे आनकन अरा आस गने एम्है नन्ना ओर्त भईसिन हूँ तइय्कन। एन्देर नीम ब'आ ओंगदर का तीतुस निम्है ती इन्द्रिइम नफा होच्चस? ऐम इरबारिम ओन्टेम बोलता नू मल उज्जकम उक्कम का? अरा ओन्टे डहरे नू मल ईक्कम का?
- 19 ऐम निम्है मुन्दहारे एमन बिगर बदी ही बेस आलम ऐद'आ गे अक्कु गूटी चिहूट नन्दम एन्ने नीम सोचदर का? मला, ऐम धर्मसी मुन्दहारे मसीस नू ब'आलदम। अना चोन्हा आलारो! नीम बोलता नू परदा गेम ऐम उर्मिन नन्दम।
- 20 एन्देरगेका एन्ने अम्बो मना गे ऐन एल्चदन का ऐन निम्है गुसन बरना बारी, एकासे ऐन बेद्ददन एन्ने निमन मल खक्खोन, अरा नीम एंगन एकासे मल बेद्ददर एन्नेम खक्खोर। अरा एन्ने अम्बो मना का ऐन निम्है नू नग्गानख्रना, इस्गहा, कदरारना, लोभिया, नीन्दा, जलिय'अना, मोठई, अरा बिगर दाब खक्खोन।
- 21 अरा एन्ने अम्बो मना का ऐन निम्है गुसन अउर बरना बारी, एंगहै धर्मस निम्है मुन्दहारे एंगन किय्या नन्त'ओस, अरा एंगा अबड़ा बग्गे आलर गे कलपारना मनो का ने मुन्द नंजका पाप ती सोतरा मन्ना, पेहरन ही सोतरा नलख, पसड़ा गुट्ठी ती जिया मल किरताचर।

2 कोरिन्थ 13

- 1 अक्कु ऐन तिसर खेप निम्है गुसन बर'ऊ र'अदन। नेम्हा पुथी बई का, “दुई मलता तीन आलर ही गोवाह ती ओर्मा दिम फरियारना रई।”



- 2 ऐन दोसर खेप निम्है गुसन बरचकन खने, मुन्द दिम ऐन निमन चेताबाचकन। ऐन अक्कु निम्है गुसन मल र'अदन, अन्नु हूँ ऐन अउरिम निमन चेताब'अदन। ऐन अउर निम्है गुसन बर'ओन होले, ने मुन्द पाप नंजकानर अरा ने अक्कु पाप नन्नर, नेकन हूँ सोग्गे मल ऐरोन।
- 3 नीम गा इदही सबुती बेद्दर का मसीस एंगहै त्रु ब'आलदस। अरा मसीस निम्है तरती पयहा मल्दस, लिकिन आस निम्है नू सवंगिय र'अस।
- 4 मानिम नू आस पयहा आल कया नू क्रुस नू टोकतारस, अन्नु हूँ धर्मसी सवंग ती उज्जालदस। अन्नेम ऐम हूँ गा आस नू पयहा र'अदम, लिकिन धर्मसी सवंग ती निमा गे सुसर नना गे आस गने उज्जोम।
- 5 नीम निमन बिद'आ ती ऐरा का नीम पत'अना नू उज्जालदर का मला, नीम निमानिम जँच'आ। एन्देर नीम मल चिन्हदर का येसु मसीस निम्है नू र'अस? अन्ने नीम मल चिन्हदर होले, नीम जंचना नू हार मंजकर केरकर।
- 6 एंगा असरा र'ई का नीम अख'ओर का ऐम तइरका अदिया ही जंचना नू हार मल मंजकादम।
- 7 अक्कु ऐम धर्मसिन गोहरारदम का नीम एकअम मलदौ मल ननोर। इदगे मला का ऐम जंचना नू जितचका ऐथ्र'ओम, लिकिन इदगे गोहरारदम का ऐम जंचना नू हार मंजकम एन्ने ऐथ्रना ती हूँ, नीम दौ ननोर।
- 8 एन्देरगेका ऐम मानी ही बिड़दो एन्देर हूँ नना पोल्लोम, लिकिन मानी गेम उर्मिन नना ओंगोम।
- 9 ऐम पयहा र'अना ती हूँ नीम सवंगिय र'अदर, इदगे ऐम रिझ्दम। अरा ऐम गोहरारदम हूँ का नीम बड़ियर मनोर क'ओर।
- 10 ऐन निम्है ती गेच्छा नू र'अना बारी इबड़ा कत्थन इदगे लिखदन का, ऐन निम्है गुसन बर'ओन खने, उर्बस एंगा चिच्का अदिया ती निम्है गने सकत गने इन्द्रिइम नन्ना मल मनो। एन्देरगेका एंगा ई अदिया निमन बगड़'आ गे मला कम'आ गे चीतारकी र'ई।
- 11 छेद्दे नू अना भईरो, रिझ'आ, बड़ियर मना, डिठ मना, ओन जिया ती र'आ, निभर'आ ती र'आ। खने चोन्हा अरा सान्ति ही धर्मस निम्है गने र'ओस।
- 12 ओर्तोस नन्नासिन नेम्हा चोंखना गने मोंजरा नना।
- 13 ओर्मा नेम्हा आलर निमन मोंजरा नन्नर।
- 14 उर्बस येसु मसीसी मया अरा धर्मसी चोन्हा अरा नेम्हा बोलतासी मेस्रका नीम ओर्मर गने र'अन नेकअन। आमेन।



गलातिया

गलातिया 1

- 1 ई चिठी तइरकन पौलुस एंगहा तरती रई। ऐन एकअम आलर ही खोंइहा तरती मला महले एकअम अक्स'ऊ आलर ती तइरका मल्ला मंजका। लिकिन येसु मसीस ती अरा धर्म बंगस ती तइरका मंजकादन, एकास येसुसिन केचका ती उज्जा चौदस।
- 2 अरा तइरका पौलुस एंगहै तरती अरा एंगहै संगे र'अनर अबड़ा भईर तरती हूँ गलातिया चकभार नू रई अबड़ा कलीसिया गुट्ठी गे ई चिठिन तइय्दम।
- 3 नम्है धर्म बंगस अरा उर्बस येसु मसीस निमा मया अरा कोड़े चि'अदस नेकअन।
- 4 येसुस दिम धर्मसी अरा बंगासी मने ती ई मलदौ खेखेल ती नमन नाड़ा गे नम्है पाप गुट्ठी गे केचस।
- 5 धर्म बंगस गे हुल्लो ती हुल्लो गूटी महबा मनन नेकअन। आमेन।
- 6 धर्मस मसीसी मया ती निमन मीखियस। एंगा हैकट मंजा का एन्ने चाँइहे नीम आसिन अम्बकर ती नीम नन्ना रकम ही दौ कथन मँजकर ती किरा लगदर।
- 7 नन्ना दौ कथा गा र'अम मलकी। लिकिन कैनो आलर एन्ने र'अनर का आर निमन अकबकाब'अनर ती मसीसी दौ कथन बगड़'आ बेददालनर।
- 8 लिकिन ऐन निमन एका दौ कथन तिकन अदिन अम्बरकी नन्ना दौ कथा नीकईम तेंगनर होले, ऐम ऐमिम हूँ र'ओम महले मेर्खा ता पैकस हूँ र'ओस, ऐम जनमजुग गे सर्पार'ओम।
- 9 मुन्द एका दौ कथा ऐन निमा तिकादन, अक्कुन फिनिम तेंगदन, एका दौ कथन नीम इंझकर अत्रु ती नन्ना दौ कथन एकअम ओर्तस तेंगदस होले, आस मइय्याँ सरपारना मनी।
- 10 अक्कु ऐन नेख'आ सोग्गे खक्खा बेदददन आलर ही मलता धर्मसी? महले ऐन आलारिन रिझाब'आ बेदददन का? ऐन आलारिन रिझाब'आ बेददना होले, मसीसी जोंख मल र'ओन दने।
- 11 अना भईरो! ऐन निमन अखत'आ बेदददन का एका दौ कथा ऐन निमन तिकादन, आद आलर ही चिताबुता ती गढ़चका मल्ली।
- 12 ऐन अदिन एकअम आलस ती मल्ला इंझका, अरा एकअम आलस ती हूँ मल्ला सिखका, आद एंगा येसु मसीस दहदर नंजस खने खक्खा।



- 13 ऐन मुन्द यहूदी धरम नू रहचकन खने एकासे उज्जा ओक्का लिक्कन अदिन नीम अखदर। ऐन कैयो खेप धर्मसी कलीसिया आबोन बुड़ाब'आ गे चिताबुता नंजकन।
- 14 एंगहै बग्गे जातियर गुट्ठी ती ने एंगहै गने ता रहचर, आर ती यहूदी खोंड़हा नू परदनुम मुन्द काला लिक्कन। अरा एमहै पूरखर ही चाल गुट्ठी गे नगदे रिझ'आ लिक्कन।
- 15 लिकिन धर्मस एंगन अयंग ही ओदर तिम चज्जिकाचस अरा तंगहै मया नू मीखकाचस।
- 16 अरा आस एमहै नू अरा एंगहै ती तंगदासिन दहदर नना गे हुकमारस। एकत्रु ऐन नन-यहूदीर नू तंगदासी दौ कथन तेंगा कुद्दोन। इदही खोखा ऐन एकअम आलर ती सलहा मल्ला मंजका।
- 17 अरा एंगहै ती मुन्द तइरकर रहचकर आरिन ऐरा गे ऐन येरुसलेम मल केरकन। लिकिन लेम अरबिया देस किरीम बिच्चकन फिन असले दमसकोस नगरे किर्कन बर्चकन।
- 18 अरा ऐन तीन बछर खोखा पतरस गने भेंट मना गे येरुसलेम केरकन अरा आसी गने पन्द्रा उल्ला रहचकन।
- 19 उर्बासी तंगिडिस याकोबसिन अम्बर नन्ना तइरकर गने नेख'आ संगे हूँ एंगहै भेंट मल मंजा।
- 20 धर्मस अखदस ऐन निमा लिखचका र'अदन आद जम्मा मानिम रई।
- 21 इदही खोखा ऐन सीरिया अरा किलिकिया ही चकभार गुट्ठी नू केरकन।
- 22 आ बेड़ा नू यूदेया ता कलीसिया गुट्ठी ता मसी आलर एंगन बल्ला लगियर।
- 23 आर इवंदम अख'आ लगियर का एकास नमहै मइर्याँ सताब'आ लगियस, आस अक्कु ई पत'अना ही कथा तेंगा कुद्दा लगदस। एकदन आस नठाब'आ बेद्दा कुद्दा लगियस।
- 24 अरा अबड़ा कलीसिया एंगहै पत नू धर्मसी ओहमा नना लगिया।

गलातिया 2

- 1 इदही चौदा बछर खोखा अउरिम ऐन बरनबास गने येरुसलेम केरकन, अरा तीतुसिन हूँ संगे होच्चकन।
- 2 धर्मस दहदर नंजकाचस का एंगा असन काना चाड़ रई, औंगे ऐन केरकन। ऐन कलीसिया ही मुध आलर गने सुनसान नू भेंटारकन अरा बाचकन का एका दौ कथन ऐन नन-यहूदीर मझी नू तेंगा लिक्कन। एन्देरगेका एंगा एल्चना रहचा का एंगहै दौ कथा तेंगना नलख एकदन ऐन नंजकादन अरा ऐन अक्कुन ननालदन आद अनभनियाँ अम्बो मना।



- 3 तीतुस एंगहै गने येरुसलेम केरकाचस, आस नन-यहूदी आलस रहचस। अन्नु हूँ आर आसिन खतना नना गे बड़पेलहा मल नंजर।
- 4 ऐम इबड़ा कत्थन इदगे तिकम का जोक्को ठकवा पत'ऊ भईर कलेकसे नम्है मझी नू कोरचकाचर अरा आर मसी येसुस नू नमा खक्खकी र'ई आ छ्छिन्द आबोन हो'आ गे अरा अत्रु ती नमन मूसासी नेग ही जोंख कम'आ गे अन्थन जोहना लेक्खा बरचका रहचर।
- 5 लिकिन ऐम गा दौ कत्था ही मानी आबो निम्है गने कम्मकी र'आ गे बिद्दकम। औंगे अबड़र ही मुन्दहारे ऐम एमन ओन घड़ी गे हूँ आर ही किइय्या मना मल चिच्चकम।
- 6 अरा कलीसिया ता मुद्धर एकार एका कोहाँ मुध होले हूँ आर एंगहा तिका दौ कत्था गने इन्द्रिइम मल जोड़चकर। आर कोहाँ मुध र'ओर महले सन्नी र'ओर, एंगा गे अदही नू एन्द्रा हूँ सोच मलकी। धर्मस नेख'आ हूँ मुहिन ऐररकी नैवई मल नन्दस।
- 7 आर मनचर एकासे का धर्मस यहूदीर ही मझी नू दौ कत्थन तेंगा गे पतरसिन तइय्काचस। अन्नेम एंगन हूँ नन-यहूदीर मझी नू दौ कत्थन तेंगा गे धर्मस तइय्कादस।
- 8 एन्देरगेका एका धर्मस यहूदीर गे दौ कत्था मेन्त'आ गे पतरस गे तइरका नलख नना गे पैया चिच्चस। आ धर्मसिम एंगा गे हूँ नन-यहूदीर गे दौ कत्था मेन्त'अना ही तइरका नलख नना गे पैया चिच्चस।
- 9 आलर याकोब अरा पतरस अरा योहनसिन कलीसिया ही कोहाँ मुद्धर लेक्खा सोचर। आर धर्मस ती एंगा खक्खका मया आबोन अक्खर। आर एंगन अरा बरनबासिन संगे नलख ननू लेक्खा इंझर अरा रिझाबाचर का ऐम नन-यहूदीर गुसन क'ओम, अरा ताम यहूदीर गुसन क'ओर।
- 10 आर ही ब'अना रहचा कीड़ा आलारिन सहाड़ा नना गे अमके मोधर'आ ऐन हूँ एन्नेम नना बेद्दालिक्कन।
- 11 पतरस अन्तियोखेया बरचस खने ऐन आसी छम्हा छम्है आस गने आनानस्रकन। एन्देरगेका आस नू गुन्हा रहचा।
- 12 याकोबस तरती जोक्क आलर बरचर, अदही ती मुन्द पतरस नन-यहूदीर गने ओक्करकी ओना मोखा लगियस। लिकिन आर बरचर खने आस खतना मंजका आलर ही इल्लिक'आ ती पछली मंजस केरस अरा तरकूटी मना हेलरस।
- 13 नन्ना यहूदी भईर हूँ पतरस गने उत्तुरमाइना नलख नंजर। अन्ति बरनबास हूँ उत्तुरमाइना चड्डे बेहड़ारस केरस।



14 ऐन ईरकन का आर ही उज्जना ओक्कना दौ कत्था ही मानिम ती बिड़दो रई। खने ऐन ओर्मर ही मुन्दहारे पतरसिन बाचकन, 'नीन यहूदीर नू कुन्द्रकादय, यहूदीर ही लेक्खा मला, लिकिन नन-यहूदीर ही लेक्खा उज्जदय। होले नीन नन-यहूदीरिन यहूदीर ही नेग आबोन धर'आ गे एकासे ब'आ ओंगदय?

15 नाम गा कुन्द्रका यहूदी हिकदत, अरा पपहर नन-यहूदीर ती मलदत।

16 अन्नु हूँ नाम अखदत, आलर नेग ही नलख ती मला, लिकिन येसु मसीसिन पत'ओर ती उजगो आल मनोर। इदगे नाम मसी येसुस नू पताचकादत, एकत्रु नाम नेग ही नलख ती मला, लिकिन येसु मसीस नू पत'अना ती उजगो आल मनोत, एन्देरगेका नेग ही नलख ती ने हूँ उजगो मना पोल्लोर।”

17 नाम मसीस नू असरा नन्ना ती उजगो आल मना गे बेद्ददत, जोक्को यहूदीर नमन पपहा ब'अनर, एन्देरगेका नाम ओर्मा यहूदी नेगन मल पेसदत। होले इदही मने एन्ने का येसुस नमन पाप नना गे चि'अदस? कहियोँ मला!

18 ओर्तोस यहूदीर ही ओर्मा नेग आबोन नन्ना ती उजगो मना ओंगदस, ऐन इदन अम्बकन चिचकन। लिकिन अउरिम अदिन नना गे पेसदन होले ऐन ऐनिम एंगन बदी टिड़दन।

19 ऐन गा नेग ती अरा नेग ही ऐरना नू केच्च खच्चिकादन, एकन्ने का ऐन धर्मस गे उज्जोन।

20 ऐन मसीस गने क्रुस नू ठोकरकादन, अक्कु ऐन मल्ला उज्जना, लिकिन मसीस एंगहे नू उज्जा लगदस। अक्कु ऐन एंगहे कया नू उज्जा लगदन होले धर्मसी तंगदस येसु मसीस नू पत'अना ती उज्जा लगदन, एकास एंगन चोन्हा नंजस अरा एंगा गे तंगहे उज्जनन चिचस।


21 ऐन धर्मसी मया आबोन अयंध'आ ठेकाब'आ पोलदन। नेग ती उजगो मन्ना मनी होले मसीसी खे'अना सिथिया मंजा।

गलातिया 3

1 अना बोया गलातिया ता आलारो! ने निमन नस्सा? येसु मसीसिन क्रुस नू ठोकचर अदिन निम्हे खन्न ही मुन्दहारे ऐदका रहचा।

2 ऐन निम्हे ती ओन्टा कत्था ही पत नू अख'आ बेद्ददन का एकासे नेम्हा बोलतासिन नीम इंझकर? मूसासी नेगन नन्ना ती निमा गे बोलतस खक्खरस का महले नीम मेंजका येसु मसीसी दौ कत्थन पत'अना ती खक्खरस का?

3 अना लूर मलका आलारो! एन्देर नीम नेम्हा बोलतस ती ओइ नंजकर आ नलखन अक्कु नीम कया ही मने लेक्खा नना बेद्दा लगदर?



- 4नीम ई कोइहे सस्तिन सिथियम चोदकर, अरा दौ कथन खक्खकर। अबड़ा उर्मी सस्ती अनभनियाँ अम्बो मना।
- 5धर्मस निमा गे तंगहै बोलतासिन चि'अदस ती निम्है नू अजगुत नलख नन्त'अदस, आद नेग ही नलख गुट्ठी ती का महले दौ कथन पत्त'अना ती एन्ने नन्दस का?
- 6अब्राहमस धर्मसिन पत्ताचस, खने आस धर्मी लेक्खस।
- 7औंगे नीम अख'आ हो'आ का ने पत्त'अनर आरिम अब्राहमसी खद्दर।
- 8नेम्हा पुथी नू मुन्द तिम लिखकी रई, “धर्मस पत्त'अना ती नन-यहूदीरिन उजगो आल कम'ओस। औंगे आस अब्राहमस गे ई दौ कथन मेन्ताचस, ‘उर्मी आलर निंगहै ती आसीस खक्खोर।’”
- 9औंगे ने पत्त'अना नू र'अनर, आर पत्त'ऊ अब्राहमस संगे आसीस खक्खनर।
- 10औंगे एवदा आलर नाइर'आ गे नेग नू असरा नन्नर, आर ओर्मर सर्पारनर। एन्देरगेका नेम्हा पुथी नू लिखकी रई, “ने नेग ता लिखका उर्मी कथा ही बेसे मल मन्नर, आस ओर्त ओर्त सर्पारदस।”
- 11अक्कुन ईद गा दहदर रई का ने हूँ नेग ही चड्डे धर्मसी ऐरना नू उजगो मलकर, एन्देरगेका नेम्हा पुथी नू लिखकी रई, “उजगो आलस पत्त'अना चड्डे उज्जोस।”
- 12लिकिन नेग ही पत्त'अना गने एन्देर नता हूँ मलकी, एन्देरगेका ने उर्मी नेग आबोन मन'ओस, आस गे इत्रुम उज्जना खक्ख'ओ।
- 13मसीस नमा गे सर्पारस अरा ई लेक्खा नेग ही सर्पारना ती नाड़ियस। एन्देरगेका नेम्हा पुथी नू लिखकी रई अन्ने मंजा, “नेकन कंक नू ठोकतार'ई, आस सर्पारकादस।”
- 14ईद इदगे मंजा का मसी येसुस ती अब्राहमसी आसीस नन-यहूदीर गे हूँ खक्ख'आ गे आस नमन नाड़ियस। अरा नम्है पत्त'अना ती ई बोलतस नमा खक्ख'आ ओंगदस एकासी पत्त नू गच्छरकी रहचा।
- 15अना भईरो! उर्मी उल्ला ता उज्जनन जोखदन ती तेंगदन। आलर नू गच्छरना बड़ियर कमकी रई होले अत्रु ने हूँ जोड़'आ पोलनर महले अइय्या एन्देर हूँ घटाब'आ पोलनर।
- 16गच्छरना गुट्ठी अब्राहमस गे अरा आसी जईपुंई गे चीरकी रई। धर्मस एन्ने मल बाचस का “निंगहै जईपुंईर गे” इदही मने बग्गेर गे एन्ने रई। लिकिन धर्मस बाचस, “निंगहै जईपुंई गे” इदही मने ओर्तोस गे एन्ने रई। आ आलस येसुस हिकदस।



- 17 ऐन आनदन, एका गच्छरकन धर्मस अब्राहमस गने पोकता नंजकाचस। अदिन नेग चार सौ तीस बछर खोखा बर'अरकी तरकूटी नना पुल्ली का गच्छरना अनभनियाँ मनो।
- 18 एन्देरगेका अब्राहमसी आसीस नेग आबोन नन्ना ती खक्खकी रई होले गच्छरना ती मल्ला खक्खा। लिकिन धर्मस अदिन मया ती अब्राहमस गे गच्छरका ती चिचस।
- 19 ईगे नेग ही चाड़ एन्द्रा रहचा? खेखेल ता आलर गे अक्का-बलकन अखत'आ गे का? ईद अब्राहमसी पिड़ही ही बरना गूटी र'ओ, अदगे गच्छरका रहचा, अरा धर्मस तंग्हे नेगन मेर्खा पैकर ती मूसासिन चिचस। एकास धर्मस अरा आलर ही चिलकठवा रहचस।
- 20 चिलकठवा ओर्तो तरती मल मनी, लिकिन धर्मस ओर्त लेका र'अस, आस अब्राहमस गने गच्छरका बेड़ा नू एकअम चिलकठवासिन मल बउराचस।
- 21 होले नेग धर्मसी गच्छरना गुट्ठी ही बिड़दो नू रई का? कईहो मला! एन्ने नेग चीरकी रहचा एकदा उज्जना चि'आ ऊंगी होले, नाम नेगन पेसना ती धर्मसी मुन्दहारे उजगो आल मनोस दने।
- 22 लिकिन नेम्हा पुथी बई का नाम ओर्मत पाप ही आकुस नू र'अदत। एकत्रु येसु मसीस नू पत'अना ती पत'उर धर्मसी गच्छरना आबोन खक्खनर नेकअन।
- 23 लिकिन पत'अना ही बरना ही मुन्द अदही दहदर मन्ना बेड़ा गूटी नाम नेग ही ऐरना खोजना नू खुटरका उड़रका रहचकत।
- 24 औंगे नेग नमन मसीस हेददे ओन्द्र'आ गे नम्है ईरू-खूजू मंजा का नाम पत'अना ती उजगो आल मनोत।
- 25 लिकिन अक्कु पत'अना बरचा, खने नाम नेग ही आकुस नू मलकत।
- 26 अरा नीम ओर्मर गा मसी येसुस मइय्याँ ता पत'अना ती धर्मसी खदर मंजकादर।
- 27 निम्है ती ने ने मसी नू नोड़रकानर, अबड़र तम्है उज्जना नू मसीसिन ऐदनर।
- 28 अक्कु ने हूँ यहूदी मला महले नन-यहूदी मला, बिट्ठी ननू जौंख मला महले छेमे मला, ने हूँ मेत मला महले मुक्का मला। अक्कु नीम ओर्मर मसी येसुस नू ओन्टा मंजकर केरकर।
- 29 नीम मसीसी हिकदर होले अब्राहमसी बनस हिकदर। अरा धर्मस अब्राहमस गने नंजका गच्छरना चड्डे नीम धर्मसी आसीस खक्खोर।

गलातिया 4

- 1 अक्कु ऐन निमन ब'अदन का, तम्बासी खुर्जिन खक्खू खददस तंग्हे उर्मी खल्ल ही उरुब मन्दस, होले हूँ आस सन्नी खददस र'अना ती आस बिट्ठी ननू जौंखस ती भिन्गे मलदस।



- 2लिकिन बंगासी ओक्ताचका बेड़ा अंडसना गूटी खापुर अरा ईरू-खूजू आलर ही तबे नू र'अदस।
- 3अन्नेम नाम खद्दत रहचकत आ गूटी खेखेल ता उर्मी बोलता गुट्ठी ही तबे नू रहचकत।
- 4लिकिन ठौका बेड़ा बरचा खने, धर्मस तंगदासिन तइय्यस। आस ओन्टा आली ती कुन्द्रस ती यहूदीर ही उर्मी नेग आबोन पेसस।
- 5अरा मूसासी नेग ही तबे नू र'अना आलारिन अम्बत'ओस ती नाडोस। अरा नमा गे गोद होच्का लेक्खा खद्द मना गे आकुस चि'ओस।
- 6अरा नीम गा धर्मसी खद्दर हिकदर। धर्मस तंगदासी बोलतन नम्है जिया नू तइय्यादस। औंगे आस चिचियारदस ती मेखदस “अना बबा, अना बंगायो।”
- 7ईगे अक्कु नीन बिट्ठी ननू जोंख मलदय। नीन धर्मसी खद्दय हिकदय। नीन आसी खद्द र'अना ती नीन धर्मसी गच्छरका आसीस आबोन खखोय।
- 8नीम गा धर्मसिन बल्ला लिक्कर खने, एन्ने देवता गुट्ठी ही तबे नू रहचकर एकाबड़ा मानी नू धर्म मल्ली।
- 9लिकिन अक्कु नीम धर्मसिन अक्ख खच्चिकर। मानिम नू धर्मस ती नीम अक्कर। होले नीम एकन्ने पयहा अरा लंडी सिखाब'अना तरा किरदर? अउरिम अबड़ा ही जोंख मना बेद्ददर।
- 10नीम अक्कुन गूटी उल्ला गुट्ठी, महिना गुट्ठी, ओट्टा हेंचका उल्ला अरा बछर गुट्ठिन मनदर।
- 11एंगा निम्है पत्त नू इल्लिक'आ मनी। एन्ने अम्बो मना का निम्है मझी नू एंग्हे अर्जाचका सिथिया मनो।
- 12अना भईरो, निम्है ती एंग्हे ब'अना ईदिम र'ई का ऐन एकासे यहूदी नेग ती अम्बरकन अन्नेम नीम हूँ यहूदी नेग ती अम्बर'आ, एन्देरगेका ऐन अबड़ा नेगन अम्बकन ती निम्है लेक्खा मंजकादन। नीम एंग्हे लेक्खा मना, एकासे ऐन निम्है लेक्खा मंजका केरकादन। नीम एंग्हे गने एन्देर हूँ मलदौ मल्ला नंजका।
- 13नीम अखदर का ऐन निम्है मझी नू पहिल खेप दौ कत्था तेंगा गे बरचकन, आ बारी ऐन कोड़े मल रहचकन।
- 14अरा ऐन कया ही पयहा चड्डे निमा बोझा मंजकन। अन्नु हूँ नीम एंगन हींइचकर मला अरा एंगन खाँइचकर मला। लिकिन नीम एंग्हे एन्ने मईन नंजकर का ऐन धर्मसी पैकस मलता मसी येसुस लेक्खा रहचकन।



- 15 खने नीम बग्गे रिझ गने रहचकर। लिकिन अक्कु निम्है अबड़ा रिझ एसन केरा? ऐन निम्है पत नू ब'आ आँगदन का मने मन्ना होले नीम निम्है खन्नन ओथ्र ओर ती एंगा चि ओर दने।
- 16 अक्कुन एन्देर मानिम ब'अना चड्डे ऐन निम्है बैरी मंजकन का?
- 17 अबड़ा आलर निमन संगी गा कम'आ बेद्दनर। लिकिन दौ चिताबुता ती मला, आर निमन एम्है ती छिंडा बेद्दनर का नीम आर गे संगी कम ओर।
- 18 लिकिन ईद हूँ दौ हवे का बेस कत्था नू उर्मी बेड़ा संगी कम'आ गे चिहूट नन्तार ई नेकअन, आ बारी लेका मला एकाबारी ऐन निम्है गने र'अदन।
- 19 अना एंगहै खद्दारो! एका गूटी नीम मसीस लेक्खा मल मनोर आ गूटी ऐन फेन खद्द नेबना बेसे नुंजना सहदन।
- 20 मने गा लग्गी का अक्कु ऐन निम्है गुसन बर'ओन ती नन्ना घत ती ब'ओन, एन्देरगेका एंगा निम्है पत नू दोभिदिया मनी।
- 21 नीम नेग ही तबे नूर'आ बेद्ददर, नेग एन्देर बई अदिन नीम बलदर का? अदिन एंगन तेंगा।
- 22 नेम्हा पुथी नू लिखकी रई का अब्राहमस गे ऐंड खद्दर मंजर अरा ओर्त बिट्ठी ननू जोंख पेल्लो ती अरा ओर्त तंगआली ती मंजर।
- 23 एकास बिट्ठी ननू जोंख पेल्लो ती कुन्द्रस आसी कुन्द्रना कया ती मंजा। लिकिन तंगआली ती कुन्द्रस आसी कुन्द्रना धर्मसी गच्छरका ती मंजा।
- 24 इबड़ा ऐंड मुक्कर जोक्खा खीरी हिकनर। ईर धर्मसी ऐंड गच्छरका हिकनर। ओन्टा मुक्का गा सीनाय परता हवे, अत्रु आलर नेगन खक्खियर ती अदही जोंख मंजकर। अरा आद हागार हवे।
- 25 हागार अरबिया देस ता सीनाय परता हवे, आद अक्कु येरुसलेम नगरे बेसे रई। एन्देरगेका आद तंगहै खद्दर गने नेग ही जोंख नूर'ई।
- 26 लिकिन सारा मेर्खा येरुसलेम, छछिन्द आली हवे। अरा आदिम नम्है अयंग।
- 27 एन्देरगेका ईद नेम्हा पुथी नू लिखकी रई, “अनय बंझली, नीन खद्द मल पाकदी, रिझअय, निंगा नेबना नुंजना मल मना लगिया, खने खुसमार'अय, अम्बका मुक्का ही खद्दर ती बिहई मुक्का ही खद्दर बग्गे र'अनर।”
- 28 आँगे भईरो! नीम इसाकस बेसे गच्छरका खद्दर मंजकादर।
- 29 अउला कया ती कुन्द्रका खद्दस बोलतस ती कुन्द्रकासिन दिकदिका ब'आ लगियस, अन्नेम अक्कु हूँ मना लगी।



30 लिकिन नेम्हा पुथी एन्देर ब'ई? “बिट्ठी ननू जोंख पेल्लो अरा आसी खद्दासिन एइपा ती खेद'आ चि'आ। बिट्ठी ननू जोंख पेल्लो ही खद्दस बिहई ही खद्दस गने तम्बासी खुर्जिन मल खक्खोस।”

31 आँगे भईरो, नाम बिट्ठी ननू जोंख पेल्लो हागार ही खद्दत मलदत, लिकिन गच्छरका बिहई सारा ही खद्दत।

गलातिया 5

1 नाम छछिन्द र'अदत अदगे मसीस नमन छछिन्द नंजस। आँगे नमा बड़ियर मनरकी र'अना र'ई। फेन नेग नू जोंख मना गे अमा पुन्द्र'आ।

2 ऐन पौलुस निमन आनदन, चिहूंक लगे मेना, नीम निमन खतना मन्तार'आ गे चि'अदर होले, निमा मसीस ती एन्देरा हूँ फैदा मल मनी।

3 अन्नु हूँ ने तमन खतना मना गे चि'अदर आरिन ऐन ब'अदन, अत्रु उर्मी यहूदी नेगन पेसना र'ई।

4 नीम नेग ती उजगो मना गे चिहूट मन्दर होले, मसीस ती तरकूटी मन्दर अरा धर्मसी मया आबोन एब्सका चिच्चकादर।

5 एन्देरगेका ऐम गा नेम्हा बोलता ती पत'अना गने धर्मस नमा गच्छरका उजगो खक्खा गे पाब ऐरदम।

6 एन्देरगेका मसी येसुस नू खतना मन्ना का मल मन्ना एन्देर नलख ही हूँ मलकी। लिकिन पत'अना लेका चाड़ र'ई, एकदा चोन्हा चड्डे नलख ननी।

7 नीम गा एका नगदे दौ बोंगनन बोंगा लिक्कर। अक्कु निमन ने छेंकचा का नीम मानिमन अमा पेस'आ?

8 एन्ने सिखाब'अना निमन मेखदस आसी मल्ली।

9 “कटी गुना तिस्सा उर्मी लिंडका गुंडन तिस्सा कम'ई चि'ई।”

10 ऐन धर्मस मइय्याँ निम्है पत नू असरा उइयदन का नीम एकअम नन्ना सिखाब'अनन अम्बोर पत'आ। लिकिन ने निमन अकबकाब'अदस चि'अदस आस एकअम ओर्तस हूँ र'ओस दंडे खक्खोस।

11 लिकिन भईरो, अक्कु गूटी ऐन खतना ही पत नू तेंगालदन होले, ऐन मल सतार'ओन दने। अन्ने ऐन मानिम नू तेंगदन होले, येसु मसीसी क्रुस ही चड्डे बर'ई आ सतारना मल मनो दने।

12 ऐन मने नन्दन का ने निमन भेंवाँब'अनर आर तम्है तम्है लज्जेन खंडोर चि'ओर दने।



- 13 भईरो, नीम नाइर'आ गे मेखकादर एन्ने अम्बो मना का ईद मेद ही नलख गे मोका मनो।
लिकिन चोन्हा ती ओर्त ओर्त गे सुसर नन्नर नेकअन।
- 14 एन्देरगेका सौंसे नेग ई ओन्टे पेसका नू मंज खच्चिया, “नीन निंग्हे अरबर-परबर गने निंग्हे बेसे
चोन्हा नना।”
- 15 नीम निम्हे ती ओर्त ओर्तारिन पल्ल ती चब'अर, गिरी गोत्तो नना गे तिहा नन्दर, होले चिहंकर'
आ, मला होले नीम निम्हे ओर्त ओर्तारिन नठाब'ओर।
- 16 औंगे ऐन ब'अदन नेम्हा बोलतासी तिका नू ऐका, होले नीम कया ही चिबाखार'आ गे नलख मल
ननोर।
- 17 एन्देरगेका नम्हे कया बोलता ही बिड़दो नू चिबाखार'ई। अरा बोलता नम्हे कया ही बिड़दो नू
चिबाखार'ई। इबड़ा ऐंड तम्हे तम्हे नू बैरी र'ई। औंगे नीम एन्देर दौ नना बेद्ददर अदिन नना
पोलदर।
- 18 लिकिन नीम नेम्हा बोलतासी कड़हाब'अना नू ऐकदर होले, नेग ही तबे नू मल र'अदर।
- 19 कया ही नलख गुट्ठी गा दहदर र'ई, पेहरन ही सोतरा नलख, सोतबोड़'आ, पेहरन ही मलदौ
खन्न,
- 20 मूर्तिन ओहमा नन्ना, नस'ऊ, कसरहा, नग्गानखना, इस्गहा, कैर, लोभिया, छिंडना, धरम नू
छिंडना,
- 21 डाहना, उंखना, धधारना इबड़ा ही अउर हूँ नलख र'ई। इबड़ा ही पत नू ऐन निमन तिगा ब'अदन,
एकासे ऐन मुन्द तिका चिच्चकादन का इबड़ा नलख ननुर धर्मसी राजी ही आसीस आबोन मल
खखोर।
- 22 लिकिन बोलतासी खंजपा चोन्हा, रिझ, कोड़े, सहना, सोग्गे ऐरना, दौ नन्ना, पत'अना,
23 निभ्रना, अरा खतिर नन्ना र'ई। एन्ने एन्ने नलख ही बिड़दो नू एन्देर हूँ नेग मल्ला।
- 24 अरा ने मसी येसुसी हिकनर, आर तम्हे कया ही चिबाखारनन अरा जिया ही मने गुट्ठी गने
क्रुस नू अरग'आ खच्चि कानर।
- 25 नाम नेम्हा बोलतस नू उज्जा लगदत होले आसी कड़हाब'अना नू उज्जोत हूँ।
- 26 नाम फुलई अम्बोत मना, अरा ओर्त ओर्त नू अम्बोत अम्बर नख्र'आ, अरा ओर्त ओर्त नू कैर कुचर
अम्बोत मंज नख्र'आ।

गलातिया 6



- 1अना भईरो! नीकईम पाप नन्नुम धर'ओर कओर होले, नीम आसिन सोग्गे ऐरा ती दौ डहरे नू हो'आ, नीम गा नेम्हा बोलतासी पखड़ मंजका आलर हिकदर। अरा निमन हूँ चिहुंक उइय्या का नीम हूँ बिदूना नू अम्बोर खत्र'आ।
- 2एन्ने ओत्था चिरखीन चेड़'आ गे ओर्त ओर्त ही सहाड़ा नना। अरा एन्ने नन्दर होले, मसीसी पेसका आबोन नन्दर।
- 3एन्देरगेका एकअम ओर्तस तंगहै नलख नू मानिम बुझदस होले, आस तंगन ठकदस।
- 4लिकिन ओर्मर तंगहै तंगहै नलखन बिद'आ। होले नन्नर ही पत नू मला तंगहै पत नू आस गे फुलई नन्ना ही मोका मनो।
- 5आलस तंगहै चिरखिन हूँ तंगा गे चेड़ना रई।
- 6अरा ने धर्मेसी कत्थन सिरदस आस तंगहै खुर्जी ही जोक्क हींस गुरुर गे चि'अदस नेकअन।
- 7अरा अमके ठकर'आ। धर्मेस अलख'आ काला पोलदस। आलस एन्दरन चाँखदस अदिनिम खोयदस।
- 8एन्देरगेका एकास तंगहै कया आबोन रिझत'आ गे उज्जोस आस मुंजा मलका नठारनन खक्खोस। अरा एकास बोलतन रिझत'आ गे उज्जोस आस मुंजा मलका उज्जनन खक्खोस।
- 9नाम दौ नलख नना गे अम्बोत खड़दन नेकअन। अरा नाम अन्नेम नना गे बड़ियर मन्नुम कओत होले, नाम ठौका बेड़ा नू खोयोत।
- 10औंगे एका गूटी नमा मोका खक्ख'आ लगी, नाम ओर्मर ही दौ ननत र'ओत, कोइहे गा पत'अना नू र'अनर नम्है भइय्योर गे दौ नना।
- 11इबड़ा कोहाँ कोहाँ लिखा आबोन ऐरा, निमा गे एंगहै खेक्खा ती लिखदन।
- 12ने बहरी तरा तमन दौ आलर ऐद'आ बेददनर, आरिम निमन खतना नना गे अरबनर। आर इदगे लेका एन्ने नन्नर का आर मसीसी क्रुस ही पत नू तेंगना चड्डे अम्बोर सतार'आ।
- 13खतना नंजका आलर हूँ गा ओर्मा नेग नू मल ऐकनर। अन्नु हूँ आर निम्है कया ही पत ती फुलई नना गे निमन खतना नन्त'आ बेददनर।
- 14ऐन गा नम्है येसु मसीसी क्रुस आबोन अम्बरकी नन्ना एकअम कत्था नू फुलई मल मन्दन नेकअन। मसीसी ई क्रुस ही चड्डे एंगा खेखेल ता मया मोख क्रुस नू ठोकरकी रई, अरा ऐन हूँ ई खेखेल ता मया मोखा गे क्रुस नू ठोकरकन।



- 15 नाम खतना मंजकत महले मल मंजकत, ईद मुध मला। लिकिन नमा पुना आल मन्ना ईद मुध रई।
- 16 ई कत्था ही लेक्खा ईकू आलर नू अरा धर्मैसी आलर नू कोड़े अरा सोग्गे मनन नेकअन।
- 17 अक्कुन ती ने हूँ एंगन दुक्खे अमके चि'आ, एन्देरगेका ऐन येसुसी खादी गुट्ठिन एंग्हे मेद नू सहदन।
- 18 भईरो! नम्है उर्बस येसु मसीसी मया निम्है बोलता गने र'अन नेकअन। आमेन।



इफेसुस

इफेसुस 1

- 1 धर्मसी मने ती मसी येसुसी तइरकन पौलुस इफेसुस नगरे ता मसी येसुसिन पत'ऊ नेम्हा आलर गे ई चिठिन लिखदन।
- 2 नम्है धर्म बबस अरा उर्बस येसु मसीस ती निमा मया अरा कोड़े खक्खन नेकअन।
- 3 धर्मस गे अरा नम्है उर्बस येसु मसीसी बंगस गे ओहमा मनन नेकअन। आस नमन मेर्खा अड्डा गुट्ठी ती बरना बोलता ही उर्मी आसीस गुट्ठी ती मसीस नू आसीस नंजकादस।
- 4 नाम आसी ऐरना नू नेम्हा अरा बिगर बदी र'आ गे खेखेल ही गदूना ती मुन्द दिम आस नमन मसीस नू चज्जियस। आस तंग्हे चोन्हा ही चड्डे
- 5 नमन येसु मसीस ती आसी गोद उइयका खद्द मना गे मुन्द दिम ओकताचस। आस इदन तंग्हे चिताबुता ती अरा तंग्हे मने ती नंजस।
- 6 अदगे नाम आसी महबा ही मया गे ओहमा नन्दत नेकअन, एकदा आसी चोन्हा खद्दस येसुस नू नमा गे सिथियम चिच्चस।
- 7 मसीस नू आस बाहताचका खेंस ती नमा गे नाइरना र'ई। ईद नम्है अक्का-बलका गुट्ठी गे धर्मसी मया ही निंदका ती खक्खना पाप छमा हवे।
- 8 आ मया आबोन आस नमा गे उर्मी लूर अरा बुझना ही सवंग गने बग्गे ती बग्गे चिच्कादस।
- 9 आस तंग्हे चिताबुता ही गम आबोन नमा गे चलखस। आद आस तंग्हे दौ मने ही लेक्खा तान मसीस नू नन्ना चिताबुता रहचा।
- 10 मेर्खा अरा खेखेल नू र'ऊ उर्मिन मसीसी अदिया ही किय्या खोंइरना दिम आ गम हिके। बेड़ा गुट्ठी अदही पूरा मन्ना बारी आस अदिन पूरा ननोस।
- 11 तंग्हे उर्मी चिताबुतन तंग्हे मने ही लेक्खा पूरा ननू धर्मसी चिताबुता ही लेक्खम नाम मुन्द दिम ठंचका ती मसीस नू चजका र'अदत।
- 12 होले नाम ने मसीस नू मुन्द तिम असरा उइयका रहचकत आसी महबा ही ओहमा ही चड्डे मना गे आस इदन नंजस।



13अन्नेम नीम हूँ गा मानिम कत्थन एन्ने हवे का निमा गे नाइरनन चिऊ दौ कत्थन मँजकर खने, मसीस नू मँजकर केरकर। अरा नीम मसीसिन पताचकर खने, धर्मस चिआ गे गच्छरका नेम्हा बोलतस ती आस निम्है मइय्याँ मरका नंजस।

14नाम ने धर्मसी अर्ज'अना हिकदत, नाइरनन खक्खना गूटी धर्मस तंगहै आलर तंगहै गच्छरकन खक्खना गे नेम्हा बोलतस दिम बयाना र'अस, का आसी महबा गे ओहमा मनन।

15ई चड्डेम उर्बा येसुस नू निम्है पत'अना अरा उर्मी नेम्हा आलर मइय्याँ ता निम्है चोन्हा ही पत नू ऐन मँजकन ती¹⁶एंगहै गोहरारना गुट्ठी नू निमन सगर घडी सुरता नन्दन ती निमा गे सगर घड़ी धर्मसी धन्यवाद नन्दन।

17अरा नीम धर्मसिन अउरिम कोइहे अख'आ गे, आस निमन लूर अरा चलखरनन चिऊ नेम्हा बोलतस ती नीदा गे गोहरारदन। इदगे नम्है उर्बस येसु मसीसी धर्मस महबा ही बंगस गुसन गोहरारते र'अदन।

18ऐन गोहरारदन का आस निमा जिया गे बिल्ली चिअदस नेकअन। अत्रु तिम आस निम्है मेखना ही असरा आबोन नीम अख'आ ओंगोर, अरा तंगहै नेम्हा आलर गे मँजका आसीस ही महबा ही खुर्जी आबोन नीम अख'ओर चिओर।

19-20अरा पत'ऊ आलर नमा गे आसी चिअना मल जोक्खना तंगहै कोइहे सवंग आबोन नीम अख'ओर चिओर। ई सवंग आसी कोइहे पया लेक्खम र'ई का धर्मस मसीस नू ऐदस, एका बेड़ा आस मसीसिन केचका ती उज्जताचस चोदस ती मेर्खा नू तंगहै तीना चोक्ख ओक्ताचस।

21इत्रु ती आस मसीसिन उर्मी राजी ननुर अरा अदिया अरा सवंग अरा उर्बस मन्ना ही मइय्याँ कोहाँ नंजस। अरा ई पूर नू लेका मला अउर बरना पूर नू हूँ नामे खक्खका उर्मी नामे ही मइय्याँ आसिन कोहाँ नंजस।

22अरा धर्मस उर्मी जिनिसन मसीसी अदिया किय्या नंजस चिचस, अरा आसिन उर्मी जिनिस नू अदिया ननू मुद्धस कमचस ती कलीसिया ही दौ गे चिचस।

23आ कलीसिया दिम मसीसी मेद लेक्खा र'ई। ईद उर्मी अड्डा नू उर्मी नू तंगहै र'अना ती निंद'ऊ मसीस ती निंदका र'ई।

इफेसुस 2

1नीम गा मुन्द निम्है अक्का-बलका गुट्ठी नू अरा पाप गुट्ठी नू केचका रहचकर।



- 2आ बेड़ा नू नीम ई खेखेल ता मलदौ डहरे नू ईक्कर। अरा नीम ताका राजी ता बोलता ही सवंग गुट्ठी मइय्याँ राजी ननुस गेम पेस्रकर। अरा आ बोलता दिम धर्मसिन मल पेस्र'उर मइय्याँ अक्कु नलख ननी।
- 3अबड़र ही मझी नू नाम ओर्मत हूँ मुन्द ओंगहोल नम्है कया ही चिबाखारना ही लेक्खा उज्जा लिक्कत, कया अरा जिया ही मने गुट्ठी लेक्खा नना लिक्कत। अरा बछ्का उर्मी आलर लेक्खा धर्मसी कैर ही तबे नू रहचकत।
- 4लिकिन धर्मस गा सोग्गे ऐरना नू उरुब र'अदस, अरा आस तंगहै कोइहे चोन्हा चड्डे नमन चोन्हा नंजस।
- 5नाम नम्है अक्का-बलका गुट्ठी ही चड्डे केचका रहचकत खने हूँ, आस नमन मसीस गने उज्जताचस। अरा आसी मया ती नीम नाइरका र'अदर।
- 6धर्मस मसीस गने नमन उज्जताचस चोदस ती मसी येसुस गने नमा मेस्रना चड्डे मेर्खा ही कोहाँ अड्डा नू तंगहै गने ओक्ताचस।
- 7आस मसी येसुस नू नम्है मइय्याँ ऐदका सोग्गे ती तंगहै मया ही कोहाँ खुर्जिन बरना परिया गुट्ठी नू ऐद'आ गेम इदन नंजस।
- 8मसीस मइय्याँ ता पत्त'अना ती धर्मसी सोग्गे ती नीम नाइरदर। ईद निम्है चिहूट ती मल्ला मंजका, लिकिन ईद धर्मसी इनाम हवे।
- 9ईद नम्हा नंजका दौ नलख गुट्ठी ही चड्डे मल्ला खक्ग्रका। ओंगे ने हूँ इदही पत्त नू फुलई अम्बोर मना।
- 10एन्देरगेका नाम दौ नलख गुट्ठिन नना गे मसी येसुस नू पुना गदूका धर्मसी करिगरी र'अदत। अबड़न नमा नना गे धर्मस मुन्द तिम अबड़न सपड़ाचकादस।
- 11ओंगे सुरता नना का मुन्द नीम नन-यहूदीर रहचकर, अरा कया नू आलर ही खेक्खा ती खतना मंजका अबड़ा आलर ती नीम खतना मल्ला मंजका बारतारकर।
- 12आ बारी नीम एकासे रहचकर अदिन सुरता नना। आ बारी नीम मसीस ती गेच्छा रहचकर, अरा धर्मस ती चजरका इस्राएल आलर ता मल रहचकर, अरा धर्मस आर ही गने नंजका गच्छरना गुट्ठिन बल्ला लिक्कर। अरा नीम असरा मलका आलर, अरा धर्मस मलका आलर लेक्खा खेखेल नू उज्जकर।



- 13 ओन बेड़ा नू नीम धर्मस ती गेच्छा रहचकर, अक्कु गा मसी येसुस गने मेस्रना ती र'अना ती मसीसी खेंस ती धर्मसी हेददे बरचकर केरकर।
- 14 एकासे का मसीस दिम नम्है मइय्याँ कोड़े ओन्द्रस, आसिम यहूदीरिन अरा नन-यहूदीरिन मेसाबाचस ती इरबर ही मझी नू रहचका बैरी ही भीत आबोन तंगहै मेदन दाँड़े चिच्का ती धंस्सस चिच्चस।
- 15 अरा यहूदी नेगन अदही पेसका अरा नेगचार गुट्ठी गने मेटचस चिच्चस। ई लेक्खम आस यहूदीरिन अरा नन-यहूदीरिन तंगहै नू मेसाबाचस ती ओन्टा पुना आल खोंड़हा गढ़चस ती कोड़े ओन्द्रस।
- 16 आस तान क्रुस नू केचका ती यहूदीरिन अरा नन-यहूदीरिन ओन्टे गुना कया लेक्खा धर्मस गने मेसाबाचस। ई लेक्खा आर ही बैरी आबोन नठाबाचस।
- 17 अरा आस बरचस ती धर्मस ती गेच्छा रहचका नीम नन-यहूदीर गे हूँ अरा धर्मसी हेददे रहचका ऐम यहूदीर गे हूँ कोड़े ही दौ कत्थन मेन्ताचस।
- 18 औंगे आसी चड्डे नाम इरबत ओन्टा बोलतस ती धर्म बंगस मुन्दहारे बर'आ औंगदत।
- 19 औंगे अक्कु नीम नन-राजीतर अरा सुगबासुर मलदर। लिकिन नीम नेम्हा आलर गने ओन्टे राजी नू ओक्करना ही अदिया खक्खका अरा धर्मसी एड़पा ता आलर मंजकादर।
- 20 अरा तइरकर अरा धर्मसी कत्था तिगुर नेव हिकनर, आ नेव ही मइय्याँ नीम कम्मकादर। इय्या कौड़ा ता पखना मसी येसुस दिम हिकदस।
- 21 आसी नू गोट्टा एड़पा ओन संगे मेस्र'अरकी उर्बस गे ओन्टा नेम्हा मन्दिर कम्मनुम कई।
- 22 अरा आसी नू नीम हूँ नेम्हा बोलतस ती धर्मसी ओक्करना अड्डा मना गे ओन संगे मेस्र'अरकी कम्मनुम कादर।

इफेसुस 3

- 1 ई चड्डे ऐन पौलुस निमा नन-यहूदीर गे दौ कत्था तेंगना ही चड्डे मसी येसुसी हेंरका मंजकादन।
- 2 मानिम नू नीम मंजका र'अदर का धर्मस तंगहै मया ती ई नलखन निमा गे संगरा नना गे एमा चिच्का र'अदस।
- 3 धर्मस तान तंगहै गम चिताबुतन एंगा दहदर नंजस। ऐन इदही पत्त नू मुन्द दिम अंछर ती लिखचका र'अदन।



- 4 ऐन निमा एन्देर लिखचका र'अदन, अदिन नीम पढ़'ओर होले, मसीसी गम चिताबुता ही पत ता एंगहै बुझुरकन नीम अख'आ ओंगोर।
- 5 धर्मस ई गम आबोन मुन्द ता परिया गुट्ठी ता आलर गे दहदर मल नंजका रहचस। लिकिन अक्कु गा धर्मस तंगहै नेम्हा तइरकर गे अरा धर्मसी कत्था तिंंगुर गे इदन नेम्हा बोलतस ती दहदर नंजका र'अदस।
- 6 ई गम ईद र'ई का दौ कत्था ती नन-यहूदीर हूँ यहूदीर गने धर्मसी आसीस नू बटा मन्नर, अरा आर आर गने मसी येसुसी ओन्टे मेद ही अंग मन्नर, अरा आर आर ही गने धर्मस मसी येसुस ती नंजका गच्छरना नू बटा मन्नर।
- 7 धर्मसी सवंग एंगहा नू नलख नन्ना ती एंगा चिच्का आसी मया ही इनाम ती ऐन ई दौ कत्था तेंगा गे सुसर'ऊ मंजकन।
- 8 ऐन उर्मी नेम्हा आलर ती सन्नी र'अदन, अन्नु हूँ एंगा गे ई मया चितारा का ऐन नन-यहूदीर गे मसीसी मल मुंजना कोहाँ खुर्जी ही पत ता दौ कत्थन तेंगोन।
- 9 आ गम चिताबुतन ओर्मा आलर गे बुझुरत'आ गे ऐन चज्रकादन, एकदा उर्मिन गढ़'ऊ धर्मस ती मुन्द ता परिया गुट्ठी नू नुड्डका उइय्का रहचा।
- 10 धर्मसी उर्मी रकम ही लूर मेर्खा अड्डा गुट्ठी नू राजी ननू बोलता गुट्ठी गे अरा अदिया ननू आलो गुट्ठी गे अक्कु कलीसिया ती दहदर नन्तारना र'ई। ईद दिम धर्मसी चिताबुता हवे।
- 11 ई लेक्खम धर्मस तंगहै जनमजुग चिताबुतन नम्है उर्बस मसी येसुस ती पूरा नंजस।
- 12 नाम मसीस नू र'अना ती अरा आसी मइय्याँ ता पत'अना ही चड्डे, नाम डिढ अरा बड़ियर असरा गने धर्मसी छमहे नू बर'आ ओंगदत।
- 13 ओंगे ऐन निमन ने'अदन का ऐन सस्ती सारना ती नीम पैहा अम्के मना, अबड़ा निमा दौ गे मनी।
- 14_15 ऐन धर्मसी लूरन अरा चिताबुतन सोचदन खने, मेर्खा अरा खेखेल नू र'ऊ उर्मी एड़पातारिन गढ़चका बंगासी मुन्दहारे मूकलिदिरदन।
- 16 अरा ऐन गोहरारदन का, आस तंगहै महबा ही खुर्जी ही लेक्खा नीम निम्है भितरी ता आल नू बड़ियर मना गे तंगहै बोलतस ती सवंग चि'अदस नेकअन।
- 17 अरा मसीस मइय्याँ ता निम्है पत'अना ही चड्डे मसीस निम्है जिया नू ओक्करदस नेकअन, अरा नीम चोन्हा नू मन्न ही पादा खोइखा एतना लेक्खा मनरकी बन्चका र'अन नेकअन।



- 18 अरा नीम ओर्मा नेम्हा आलर गने मसीसी चोन्हा एवंदा चकड़ अरा दिगहा अरा मेच्छा अरा गड्डी रई, अदिन बुझा आ गे सवंग खखदर नेकअन।
- 19 अरा नीम मसीसी चोन्हन अखदर नेकअन, एकदा अखना लूर ती गेच्छा रई। ई लेक्खा नीम धर्मेसी उर्मी लेक्खा निंदका ती निंदर नेकअन।
- 20 अक्कु नाम नेअना ती महले सोचना ती कोइहे बग्गे, नम्है नू नलख ननू आसी सवंग ही लेक्खा नमा गे नना गे सवंगिय रअस, आस गे
- 21 कलीसिया नू अरा मसी येसुस नू पिइही ती पिइही अरा हुल्लो ती हुल्लो गूटी महबा मनन नेकअन। आमेन।

इफेसुस 4

- 1 औंगे उर्बासिन ऐन सुसरअना ही चड्डे हेंरका रअदन, ऐन निमा गे तिगा बअदन का, नीम धर्मेस ती खखका निम्है मेखना ही जोक्खा जोगे उज्जना उज्जा चिआ।
- 2 नीम सगरो निमन सन्नी नना ती लुदऊ गने अरा खतिर मन्ना ती रआ, अरा ओर्त ओर्तीरिन सहना ती चोन्हा गने ऐका।
- 3 अरा सान्ति नू मेस्रअरकी, नेम्हा बोलतस चिच्का ओन संगे रअनन खापा गे नीम एन्देर एन्देर नना ओंग्दर उर्मिन नना।
- 4 नीम मेस्रकर खने ओन्टे असरा गे मेस्रकर। अन्नेम ओन्टे गुना मेद रई, अरा ओन्टे गुना नेम्हा बोलतस रअस।
- 5 अरा ओन्टे गुना उर्बस रअस। अरा ओन्टे गुना पत्तअना, अरा ओन्टे गुना नोड्ना रई।
- 6 अरा ओर्मर गे ओन्टेम गुना धर्मेस अरा बंगस रअस। आसिम नाम ओर्मर मइय्याँ राजी नन्दस, अरा नाम ओर्मर ती नलख नन्दस, अरा नाम ओर्मर नू रअदस।
- 7 लिकिन मसीस एका बग्गे मया चिआ बिद्दियस आ बग्गेम नाम ओर्त ओर्त गे बोलता ही इनाम आबोन खखका रअदत।
- 8 औंगेम नेम्हा पुथी नू एन्ने लिखकी रई का, “आस मेच्छा नू मइय्याँ अरगियस खने, आस तंग्हे गने बग्गे हेंरकारिन होच्चस केरस, अरा आलर गे इनाम गुट्ठिन हूँ चिच्चस।”
- 9 अक्कु “आस मेच्छा नू मइय्याँ अरगियस” इदही एन्देर मने? इदही मने ईद रई का आस इदही मुन्द खेखेल ही किय्या अड्डा गुट्ठी नू हूँ इत्तियस।



- 10ने किय्या इतियस, आसिम उर्मी मेर्खा गुट्ठी ही मइय्याँ हूँ अरगियस, होले आस गोट्टा सौंसेन तंगहै ती नींद'आ ओंगदस।
- 11आसिम जोक्कोरिन तइरकर, अरा जोक्कोरिन धर्मेसी कत्था तिंगुर, अरा जोक्कोरिन दौ कत्थन तेंगा कुददुर, अरा जोक्कोरिन नैगर अरा धर्मेसी कत्थन सिखाब'उर मन्ना ही इनाम चिच्चस।
- 12सुसर नलखन नना गे नेम्हा आलारिन सपड़'आ गेम आस ई इनाम गुट्ठिन चिच्चस, होले मसीसी मेद कलीसिया बड़ियर मन्नुम क'ओ।
- 13एका गूटी नाम पत्त'अना नू अरा धर्मेसी खद्दासी लूर नू ओन्टे मंज खच्चोत आ गूटी ईद मन्तेम र'ओ का, नाम मसीस नू पखड़ आल मनोत, अरा उर्मी रकम नू मसीस लेक्खा मनोत क'ओत।
- 14होले नाम अक्कु ती खद्दत लेक्खा मल र'ओत, अरा ताका अरा लहरा ती अत्र इत्र मन्ना बेसे नाम आलर ही कसरहा अरा लबरा ती चत्रा चाल ही पुना पुना सिखाब'अना ती अत्र इत्र मल मनोत।
- 15ऊजी नू चोन्हा गने मानी ब'अना ती उर्मी कत्था गुट्ठी नू आसी मेद कलीसिया ही कुक्कु मसीस नू पर्दनुम क'ओम।
- 16आसी तबे नू सौंसे मेद ओन संगे पखड़ जोड़र'ई। अरा उर्मी अंग तंगहै तंगहै मुध नलखन ननी, इत्रु ती नन्ना अंग गुट्ठी हूँ पर्दी क'ई। होले सौंसे मेद कोडेम पर्दी अरा चोन्हा नू निन्दनुम क'ई।
- 17औंगे ऐन निमन इदन ब'अदन ती उर्बासी नामे नू निमन चेताब'अदन, नीम अक्कु ती नन-यहूदीर ही नन्ना लेक्खा आर ही अनभनियाँ सोच नू अमके उज्जा।
- 18आर मानिम कत्थन बुझुरना नू पैहा र'अनर, अरा आर धर्मेसी चि'अना उज्जना ती छिन्डरका केरका ती उज्जनर। ईद तम्है जिया बेड़हा चड्डे मंजका आर ही लूर मलका ती मंजा।
- 19अरा आर सुन्न मंजर ती उर्मी रकम ही घिनघिना नलखन चिबाखारना गने नना गे तमन पेहरन ही सोतरा नलख गे चिच्का र'अनर।
- 20लिकिन नीम गा मसीसी पत्त नू ई लेक्खम मल सिखकर।
- 21नीम मानिम नुम आसी पत्त नू मेंजकर। अरा येसुस नू र'ऊ मानी ही लेक्खा आसी पत्त नू नीम सिखाबाचका केरका रहचकर।
- 22औंगे नीम निम्है पच्चा उज्जना ओक्कनन अरा पच्चा आल सुबहन एकदा घुरिय'अना सुख-सौरत चड्डे बगड़ारनुम काला लगी, अदन अम्बा चि'आ।



- 23 अरा निम्है जिया अरा बोलता नू पुना मन्नुम कला।
- 24 अरा धर्मैसी सुबहा लेक्खा मना गे मानी उजगो अरा नेम्हा नू कम्मका पुना आल सुबहन नीम अत्ता।
- 25 ई चड्डे नीम ठकनन अम्बा चि'आ, अरा तंग्हे तंग्हे अरबर-परबर गने मानी कत्थन कछनख'आ, एन्देरगेका नाम ओर्मत ओन्टे मेद ही अंग गुट्ठी हिकदत।
- 26 अरा नीम निम्है कैरारना नू पाप अमा नना। बीड़ी पुतना ही मुन्द निम्है कैरन एत्त'आ चि'आ।
- 27 अरा इत्रु ती नाद गे ठग'आ गे मोका अमा चि'आ।
- 28 अरा एकास खडदस, आस अक्कु ती अम्बोस खड'आ नेकअन। लिकिन आस तंग्हे खेक्खा ती दौ नलख नन्ना नू अर्जा'आ गे चिहूट नन्दस नेकअन। होले मलकर गे सहाड़ा नना गे आसी गुसन इन्द्रिइम र'ओ।
- 29 एकअम मलदौ कत्था निम्है बई ती मल उरखना र'ई। लिकिन मिनुर गे दौ खक्खा गे, आर ही चाइ ही लेक्खा आरिन परदना ही संगरा ननू कत्था गुट्ठिन लेका ब'आ।
- 30 अरा धर्मैसी नेम्हा बोलतासिन अमा दुक्खे चि'आ। आसी तिम निम्है मइय्याँ नाइरना उल्ला गे धर्मैसी आलर एन्ने मरका लक्की र'ई।
- 31 निम उर्मी रकम ही करतअंग, अरा खींसारना, अरा कैरारना, अरा नग्गानखरना, अरा हींइना अरा उर्मी रकम ही मलदौ ननू सोच गुट्ठिन अम्बा चि'आ।
- 32 अरा ओर्त ओर्तारिन मया नना अरा सोग्गे ऐरा। अरा एकासे धर्मैस मसीसी चड्डे निम्है अक्का-बलकन छमा नंजस, अन्नेम नीम हूँ ओर्त ओर्तारिन छमा नना।

इफेसुस 5

- 1 नीम धर्मैसी चोन्हा खद्दर र'अना ती आसी लेक्खा नना अरा ऐका।
- 2 एकासे मसीस तंगन धर्मैस गे पत्तारना महकारना दान अरा दाँडे बेसे नम्है चड्डे चिच्चस ती नम्है गने चोन्हा नंजस, अन्नेम नीम हूँ चोन्हा ही उज्जना उज्जा।
- 3 अरा निम्है मझी नू पेहरन ही सोतरा नलख अरा एकअम रकम ही सोतरा नलख महले लोभिया मल र'अना र'ई। धर्मैसी नेम्हा आलर गे इबड़ा जोगे मल र'अना ती इबड़ा ही पत नू कछनखरना हूँ मल मन्ना र'ई।



- 4 अन्नेम लज्जे मलका कछनखना, अरा बोका कत्था कछनखना, महले भेंसइ'अना हूँ निम्है मझी नू मल र'अना रई, इबड़ा निमा गे जोगे मल्ली। लिकिन नीम धर्मसिन धन्यवाद नना, ईदिम निमा गे जोगे रई।
- 5 नीम इदिन अखना दिम रई का पेहरन ही सोतरा नलख ननुस महले एकअम रकम ही सोतरा नलख ननुस महले मूर्तिन ओड़ लग्गुसी जोक्खा लोभिया मसीसी अरा धर्मसी राजी नू काना ही आसीस आबोन मल खखोस।
- 6 ने हूँ निमन अयंध'आ कत्था गुट्ठी ती ठग'आ गे अड्डा अमा चि'आ। एन्देरगेका इबड़ा नलख चड्डेम धर्मसी कैर आसिन मल पेस'उर मइय्याँ बरई।
- 7 औंगे नीम आर ही गने अमके मेस'आ।
- 8 एन्देरगेका मुन्द नीम ऊखा रहचकर, लिकिन अक्कु नीम उर्बासी र'अना ती बिल्ली र'अदर। औंगे बिल्लिन ता खद'दर लेक्खा ऐका।
- 9 एन्देरगेका बिल्ली ही खंजपा नू उर्मी दौ अरा उजगो अरा मानिम रई।
- 10 औंगे उर्बासिन एन्देर रिझत'ई अदिन नीम अख'आ हो'आ।
- 11 अरा ऊखा ही खंजपा मलका नलख गुट्ठी नू अमा मेस'आ, लिकिन आलर गे ऐद'आ का अबड़ा नलख गुट्ठी मलदौ हवे।
- 12 एन्देरगेका आर नूरका नू ननू नलख गुट्ठिन तेंगना हूँ लज्जे ही कत्था हवे।
- 13 लिकिन बिल्ली आर ही मइय्याँ बिलची खने, आर ही उर्मी मलदौ नलख गुट्ठी दहदर मनी।
- 14 एन्देरगेका बिल्ली दिम उर्मिन ईद'ई चि'ई। ई चड्डेम एन्ने लिखकी रई का, “अना खन्द्र'ऊ, एज्र'आ, केचकार ती उज्जा चो'आ, होले मसीस निंगहै मइय्याँ बिल्चोस।”
- 15 औंगे नीम एकासे उज्जदर अदही पत नू चिहूंक र'आ। लूर मलका आलर बेसे अमा उज्जा, लिकिन लूरगर बेसे उज्जा।
- 16 उल्ला गुट्ठी डउल मल्का ती उर्मी मोका आबोन दौ नना गे बउर'आ।
- 17 औंगे नीम बोया अमा मना, लिकिन बुझुर'आ का नीम नना गे उर्बासी मने एन्देर रई।
- 18 अरा उंखू अमा मना, एन्देरगेका इत्रु भड्वा नलख मनी। लिकिन नेम्हा बोलतस ती नींदनुम कला।



- 19 नीम खोंडरना बारी अस्सना-पाइना डंडी गुट्ठिन अरा ओहमा डंडी गुट्ठिन अरा बोलता ही डंडी गुट्ठिन पाड़ा। अरा नीम तम्है तम्है जिया नू उर्बासिन डंडी पाइरकी ओहमा नना।
- 20 अरा सगर घड़ी उर्मी कत्था गे नम्है उर्बस येसु मसीसी नामे ती धर्म बंगासिन धन्यवाद नना।
- 21 अरा मसीसी मइय्याँ ता निम्है मईन ती नीम ओर्त ओर्तोसी तबे नू र'आ।
- 22 अना मुक्कारो, नीम एकासे निमन उर्बासी तबे नू चिच्का र'अदर, अन्नेम नीम निमन तम्है तम्है मेतासी तबे नू चि'आ।
- 23 एन्देरगरका एकासे मसीस तंगहै मेद कलीसिया ही कुक्कु हिकदस, अन्नेम मेतस तंगहै मुक्का ही कुक्कु हिकदस। अरा मसीस तानिम तंगहै मेद कलीसिया ही नाडुस हिकदस।
- 24 अरा कलीसिया एकासे तंगन मसीसी तबे नू चिच्की र'ई, अन्नेम मुक्कर हूँ उर्मी कत्था नू तमन तम्है तम्है मेतासी तबे नू चि'अना र'ई।
- 25 अना मेतारो, एकासे मसीस कलीसियन चोन्हा नंजस ती तंगहै जियन अदगे चिच्चस, अन्नेम नीम हूँ तम्है तम्है मुक्कन चोन्हा नना।
- 26 मसीस इदन कलीसिया गे इदगे नंजस का आस कलीसियन धर्मसी कत्था ती अरा अम्मु ती नोइरकी अदन सुध ननरकी नेम्हा कम'ओस,
- 27 अरा कलीसियन एकअम कस्सा महले दगहा महले ई लेक्खा अउर इन्द्रिइम जिनिस मल र'अरकी अदिन नेम्हा अरा बिगर बदी ती महबा गने तंगहै मुन्दहारे इजत'ओस।
- 28 ई लेक्खम मेतर हूँ तम्है तम्है मुक्कन तम्है मेद लेक्खा चोन्हा नन्ना र'ई। ने तंगहै मुक्कन चोन्हा नन्दस आस तंगानिम चोन्हा नन्दस।
- 29 एन्देरगेका ने हूँ तंगहै मेदन मल हींइदस, लिकिन अदिन पलदस पोसदस एकासे मसीस कलीसियन खापदस,
- 30 इदगेका नाम आसी मेद ही अंग गुट्ठी हिकदत।
- 31 नेम्हा पुथी ब'अना लेक्खा, “ई चड्डे आलस तंगहै अयंग बंगन अम्बदस ती तंग आली गने मेस'ओस ती र'ओस अरा आर इरबारिम ओन्टे मेद मनोर।”
- 32 ईद ओन्टा कोहाँ गम हवे। लिकिन ऐन गा मसीस अरा कलीसिया ही पत नू ब'आलदन।
- 33 अन्नु हूँ नीम ओर्त ओर्त तंगहै तंगहै नू चोन्हा नन्ना बेसे तंगहै तंगहै मुक्कन चोन्हा नन्ना र'ई। अरा मुक्का तंगहै मेतासिन मईन नन्ना र'ई।



इफेसुस 6

- 1 अना खदरो, नीम उर्बासी र'अना ती तम्है अयंग बंगर गे पेस'आ, एन्देरगेका ईद ठौका कत्था हवे।
- 2-3 निंगा दौ मना गे अरा नीन खेखेल नू बग्गे उल्ला गूटी उज्जा गे तंगहै अयंग अरा बंगन मईन ननके। ईदिम गच्छरना ही गने ता पहिल पेसका हवे, एकदा दस पेसका ती ओन्टा रई।
- 4 अना बंगारो, निम्है खद-खरन अमा कैर'आ, लिकिन उर्बासी कोइना अरा तिगाब'अना नू आरिन पर्द'आ।
- 5 अना बिट्ठी ननू जौखारो, नीम मसीसिन पेसना बेसे, ई खेखेल ता निम्है उर्बारिन मईन अरा इल्चनुम ती अरा मानी जिया गने पेस'आ।
- 6 आरिन पतारत'आ गे लेका आर ही ऐरना नू लेका अन्ने मल पेस'अरकी, निम्है उर्मी जिया गने धर्मसी चिताबुतन ननू मसीसी जौखर लेक्खा पेस'आ।
- 7 नीम आलर गे सुसर'अना बेसे मला, उर्बा येसुस गे सुसर'अना बेसे उर्मी जिया ती सुसर'आ।
- 8 एन्देरगेका नीम अखदर का नेकईम बिट्ठी ननू जौख महले छछिन्द र'अस, तंगहै तंगहै नन्ना दौ नलख ही लेक्खा उर्बस ती इनामन खकखोस।
- 9 अना उर्बारो, नीम हूँ घुड़कानन अम्बरकी आर ही गने अन्नेम नना, एन्देरगेका नीम अखदर का आर अरा नीम इरबर ही उर्बस मेर्खा नू र'अदस, अरा आस नेकन हूँ तीना मल खाँइदस।
- 10 छेद्द नू ऐन एन्देर ब'अदन का उर्बस नू अरा आसी कोइहे पया नू सवंगिय मना।
- 11 नीम नाद ही फंदा गुट्ठी ही हुरभेटा नना गे धर्मसी उर्मी कमहड़ आबोन अत्ता।
- 12 एन्देरगेका नम्है ई अरबानखना खेंस अरा अहड़ा ती लेका मला। ईद मलदौ राजी ननुर गे, अरा मल ऐथरना सौंसे ही अदिया गुट्ठी गे, अरा ई खेखेल ही ऊखा ही कोइहे सवंग गुट्ठी गे, अरा ताका ही राजी ता मलदौ बोलता गुट्ठी गे बिड़दो नू र'ई।
- 13 औंगे नीम मलदौ उल्ला नू इबड़ा ही बिड़दो नू हुरभेटा नना गे, अरा उर्मिन मुंजा खचचना ती बड़ियर इज्ज'आ गे धर्मसी उर्मी कमहड़ आबोन धर'आ।
- 14 औंगे मानी ही कमरपटी ती कड़मन भिड़'आ ती, अरा उजगो ही झिलम आबोन अत्ता ती बड़ियर इज्जका र'आ।
- 15 अरा सान्ति ही दौ कत्थन तेंगा गे सपड़ारका र'अना ही जुतन निम्है खेड्डे नू अत्ता चि'आ।



- 16 अरा अबड़ा गने पत'अना ही ढाल आबोन धर'आ, एकत्रु नीम नाद ही उर्मी लघरना चार गुट्ठिन तेभ'आ ओंगोर।
- 17 अरा नाइरना ही पन्ना ही टोपिन अत्तर की नेम्हा बोलतासी तलवारन धर'आ, एकदा धर्मेसी कत्था हवे।
- 18 उर्मी बारी उर्मी रकम ही गोहरारना अरा ने'अना ती नेम्हा बोलतस नू गोहरार'आ। अरा इदन जिया नू उइय्यरकी एज्जका र'आ। अरा सगरो उर्मी नेम्हा आलर गे गोहरारनुम र'आ।
- 19 अरा एंगा गे हूँ गोहरार'आ का ऐन एका एका बारी धर्मेसी कत्थन तेंगोन, आ बारी डिठ ती दौ कत्था ही गम आबोन तेंगा गे धर्मेस कत्था गुट्ठिन चि'अदस नेकअन।
- 20 ई दौ कत्था ही चड्डेम ऐन धर्मेसी ओन्टा पैकन हिकदन अरा अक्कु जेहेल नू हेंरका र'अदन। एंगा एकासे तेंगना रई अन्ने डिठ ती तेंगा गे गोहरार'आ।
- 21 अक्कु एम्है चोन्हा भईस उर्बस नू पत'अना जोगे जोंखस तुखिखोस एंगहै पत नू उर्मिन निमा गे तेंगोस। होले नीम हूँ ऐन एकासे र'अदन अरा एन्देर ननालदन उर्मिन अख'आ ओंगोर।
- 22 आसिन ऐन निम्है गुसन इदगेम तइय्यालदन का नीम एम्है पत नू अख'आ ओंगोर, अरा आस निमन जिया सालत'आ ओंगोस।
- 23 धर्मे बंगस अरा उर्बस येसु मसीस तरती नीम उर्मी भइय्योर गे सान्ति अरा पत'अना गने ता चोन्हा खखर'अन नेकअन।
- 24 ने नम्है उर्बस येसु मसीसिन मल मुंज्रना चोन्हा ती चोन्हा नन्नर, आर ओर्मर मइय्याँ धर्मेसी मया मनन नेकअन। आमेन।



फिलिप्पी

फिलिप्पी 1

- 1 मसी येसुसी जौखम पौलुस अरा तीमोथियुस फिलिप्पी नगरे नू मसी येसुसी र'अना उर्मी नेम्हा आलर गे अरा आर ही गने कलीसिया ही ईरू-खूजू मुद्धर गे अरा कलीसिया ही ईरू-खूजुर गे ई चिठिन लिखदम।
- 2 नम्है धर्मे बबस अरा उर्बस येसु मसीस ती निमा गे मया अरा सान्ति खक्ख'अन नेकअन।
- 3 ऐन एका एका बारी निमन सुरता नन्दन, आ बारी ऐन एंगहै धर्मेसिन धन्यवाद नन्दन।
- 4 ऐन ननू उर्मी गोहरारना नू सगरो नीम ओर्मर गे रिझ ती गोहरारदन।
- 5 एन्देरगेका ऐन निम्है गुसन बरचका उल्ला ती अक्कु गूटी दौ कत्था नलख नू नीम एंगहै गने संगे चिचकर।
- 6 अरा एंगा असरा र'ई का ई लेक्खा दौ नलखन धर्मेस निम्है नू ओड़ नंजस, आस मसी येसुसी बरना उल्ला गूटी अदिन मुंजत'ओस चि'ओस।
- 7 नीम ओर्मर ही पत नू एंगा एन्ने सोचना ठौका दिम हवे। एन्देरगेका निमा गे एंगहै जिया नू ओन्टा मुध अड्डा र'ई। अरा ऐन जेहेल नू र'अना बारी, अरा दौ कत्था ही ओदहा नू तेंगरकी अदिन बड़ियर ननो बारी नुम नीम ओर्मर धर्मेस एंगा चिचका नलख नू मेस्रकर।
- 8 मसी येसुसी लेक्खा ऐन चोन्हा नन्दन ती नीम ओर्मरिन ऐरा गे कोड़हे चिबाखारदन, अदगे धर्मेस गोवाह र'अदस।
- 9 एंगहा गोहरारना ईद र'ई का निम्है चोन्हा अरा लूर अरा उर्मी रकम ही लखना अउरिम पर्दी नेकअन।
- 10 होले कोड़हे बेस एन्देर एन्ने नीम अख'आ ओंगोर। अरा मसीसी अउरिम बरना उल्ला गूटी नेम्हा अरा बिगर बदी ती उज्जा ओंगोर।
- 11 अरा येसु मसीस ती बरना उजगो ही खंजपा ती नीदोर ती र'ओर, आद धर्मेस गे ओहमा अरा महबन ओन्द्र'ओ।
- 12 अना भईरो! ऐन इदन नीम अख'आ बेदददन का इय्या एंगहै नू मंजा अबड़ा उर्मी दौ कत्थन बीड़'आ गेम संगरा नंजा।



- 13 मसीसी जौख र'अना ही चड्डेम ऐन जहेल नू हँरका र'अदन एन्ने कोहाँ बेलासी गढ़िया ता उमी सैनर अरा इय्या ता ओर्मर सुपट अखनर।
- 14 अरा बग्गे पत्त'ऊ आलर एंगहँ हँरका ती उर्बस संगरा ननोस ब'अरकी आस नू असरा नंजर ती मुन्द ती कोइहे डिठ गने बिगर इल्चिक'आ धर्मसी कत्थन मेन्त'आ लगनर।
- 15 जोक्कोर इस्गहा अरा नग्गानखना ती मसीसी दौ कत्थन तेंगा कुद्दनर, ईद मानिम दिम हिके। लिकिन जोक्क अउर आलर दौ जिया ती हूँ मसीसी दौ कत्थन तेंगा कुद्दनर।
- 16 इबड़र चोन्हा ती दौ कत्था तेंगनर। ईर अखनर का ऐन दौ कत्था ही ओदहा नू तेंगना ती हँरका र'अदन।
- 17 लिकिन नन्ना आलर लोभिया मने ती अरा बिगर मानी जिया ती मसीसी दौ कत्थन तेंगनर। आर एन्ने सोचनर का आर एन्ने नन्ना ती एंगहँ हँरका नू एंगा कोइहे सस्ती मनो।
- 18 लिकिन ईद कत्था मल्ली। ओइहर ती मलता मानी ती, एकअम अन्ने, मसीसी दौ कत्था गा तेंगा। इदगेम ऐन कोइहे रिङ्ग'आ लगदन। हँ ऐन अउरिम रिङ्गना बारी र'ओन।
- 19 एन्देरगेका ऐन अखदन का निम्हँ गोहरारना गुट्ठी ती अरा येसु मसीसी बोलतस चि'अना संगरा ती एंगा नाइरना मनो।
- 20 एंगा कोइहे पतारना अरा असरा ईद र'ई का, एंगा इन्दिइम नू हूँ लज्जे मोखना अम्बो मनो, लिकिन ऐन उज्जोन महले खे'ओन एंगा बड़ियर डिठ ती अक्कु अरा सगरो मसीस एंगहँ मैद ती महबा खक्खोस।
- 21 एंगा गे गा, उज्जना मने मसीस गे उज्जना। अरा खे'अदन खने, आद खेखेल नू उज्जना ती अउरिम दौ हवे।
- 22 लिकिन ऐन ई मैद नू उज्जना बारी र'ओन होले, मसीस गे बेस अर्ज'अना नलख नना ओँगोन। ओँगो ऐन बुङ्ग'आ पोल्दन का ऐन एन्दन चाजोन, उज्जना बारी र'अना महले खे'अना।
- 23 अक्कु गा ऐन इबड़ा दुयो पतारना ही मझी नू छेक्रकादन। ऐन ई उज्जनन अम्बरकी मसीस गने मेर्खा नू र'आ गे बेद्दन, एकदा एंगा कोइहे बेस र'ओ दने।
- 24 लिकिन अत्रु ती ऐन ई मैद नू र'अना निमा गे कोइहे फैदा र'ई।
- 25 ऐन इदिन बड़ियर असरा नन्ना ती निम्हँ गने ऐन र'ओन। अरा निमन निम्हँ पत्त'अना नू परदा गे रिङ्ग'आ गे सहाड़ा ननोन, अदिन अखदन।



26 औंगे ऐन निम्है गुसन अउरिम बरना ती एंग्हे चड्डे नीम मसी येसुस नू उइय्का रिझ अउरिम कोइहे मनो।

27 ऐन निम्है गुसन बर'ओन ती ऐरोन मलता मल हूँ बर'ओन, नीम ओन्टे गुना बोलता नू ओन्टा जिया मनरकी दौ कत्था ही पत'अना गे अर्जाना नुम र'अदर एन्ने ऐन मेना गे, नीम इवंदम नना का, निम्है उज्जना ओक्कना येसु मसीसी दौ कत्था गे जोगे मनन।

28 अरा ऐन अखदन का, एकअम कत्था नू हूँ निम्है बिड़दो र'उर ती नीम मल एल्चदर। ईद आर गे नठारना ही चिन्हा हवे, लिकिन निमा गे गा नाइरनन खक्खा गे चिन्हा हवे। अरा ईद धर्मस तरती मनो।

29 एन्देरगेका मसीस नू पत'आ गे लेका मला, लिकिन आसी चड्डे सस्ती अरा खिलपत हूँ सह'आ गे हूँ ईद निमा गे चीरकी र'ई।

30 अरा नीम एंग नू ईरकर, अरा एंगा गे अउर हूँ र'ई एन्ने अक्कु नीम मेन्दर, आ तिहा दिम निमा गे हूँ र'ई।

फिलिप्पी 2

1 औंगे नीम मसीसी र'अना ती जिया सालना, अरा चोन्हा ती डिठ, अरा नेम्हा बोलतासी गने मेस्रका अरा दया अरा सोग्गे ऐरना र'अना ती,

2 नीम ओन्टा सोच अरा ओन्टे लेक्खा चोन्हा र'अरकी मेस्रका जिया ती ओन्टम सोचना ती एंग्हे रिझ आबोन पूरा ब'आ।

3 लोभिया ही चड्डे महले ठकवा फुलई मन्ना चड्डे एन्देर हूँ अमा नना। लिकिन लुदऊ जिया ती ओर्त ओर्तारिन तंग्हे ती कोइहे बेस अखना र'ई।

4 नीम ओर्मर तम्है तम्है दौ गे लेका मला, लिकिन नन्नर ही दौ गे हूँ घोख नन्ना र'ई।

5 मसी येसुस नू रहचका सोचना लेक्खा दिम निम्है नू हूँ र'अना र'ई।

6 आस धर्मसी रूपे नू रहचस, अन्नु हूँ धर्मसी जोक्खा र'अनन धर'अर उइय्का र'आ गे मल सोच्चस।

7 लिकिन आस तंगा उर्मिन अम्बियस चिच्चस अरा तंगन बिट्ठी ननू जोंख बेसे सन्नी मंजस ती ओन्टा आल मंजस केरस। अरा आस आल रूप नू उज्जियस खने,

8 तान तंगन एन्ने कोइहे लुदऊ कमचस अरा खे'अना गूटी धर्मसिन पेस्रस का तंगन क्रुस नू खे'आ गे हूँ चिच्चस।



- 9ई चड्डे धर्मस आसिन उर्मी ती मेच्छा मईन ही अड्डा नू चोदस अरा आस गे उर्मी नामे ती कोइहे बेस नामे चिच्चस।
- 10ओंगे मेर्खा नू अरा खेखेल नू अरा खेखेल किय्या ता उर्मी येसुसी नामे गे मूकलिदर'ओ।
- 11अरा धर्म बंगसी महबा गे उर्मी ततखा तेंग'ओ का येसु मसीस दिम उर्बस।
- 12ओंगे अना एंग्हे चोन्हा आलारो, नीम सगरो एंग्हे पेसका गुट्ठिन पेसनुम बर'आ लगदर, अन्नेम एंग्हे र'अना बेडा नू लेका मला, अक्कु ऐन निंग्हे ती गेच्छा र'अना नू हूँ अउर कोइहे पेस'आ। अरा निम्है नाइरना पूरा मना गे इल्चनुम अरा असरनुम नलखन नन्नुम कला।
- 13एन्देरगेका धर्मस निम्है नू नलख नन्दस, अरा तंग्हे दौ चिताबुता ही लेक्खा नीम निम्है बेस मने ती पेस'आ गे अरा नना गे आस दिम सवंग चि'अदस।
- 14उर्मिन बिगर कुटमुटर'आ ती अरा बिगर नग्गानखकम ती नना।
- 15होले नीम ई कुचुरहा अरा करतअंग आलर ही मझी नू गुन्हा मलका बिगर बदी ही अरा निमन ही धर्मसी खद्द-खर्रा मना ओंगोर। अरा आर ही मझी नू नीम मेर्खा ता बीन्को गुट्ठी लेक्खा बिल्चना र'ई।
- 16नीम उज्जना ही कत्थन धर'आ ती मेन्त'अना बारी नीम एन्नेम बिल्चोर। होले निम्है नू ता एंग्हे कोइहे चिहूट नन्ना महले अर्ज'अना अनभनियाँ मल मंजा एन्ने ऐन निम्है चड्डे मसीस खेखेल नू किर्रना उल्ला नू फुलई मनोन।
- 17लिकिन निम्है पत्त'अना धर्मस गे अरगतारना दाँडे बेसे र'ई। ई लेक्खम ऐन एंग्हे खेंसन बाहतारना बेसे धर्मस गे एंगन दाँडे अरग'ओन होले हूँ, ऐन निम्है ओर्मर गने रिझ'ओन अरा रिरयार'ओन।
- 18अन्नेम नीम हूँ एंग्हे संगे रिझना अरा रिरयारना र'ई।
- 19चाँइहेम ऐन निम्है गुसन तीमोथियुसिन तइय्योन एन्ने उर्बा येसुस नू असरा नन्दन। होले ऐन आस ती निम्है हलन मेनोन ती रिझ'ओन।
- 20एन्देरगेका आसी लेक्खा ने हूँ एंग्हे गुसन मलकस का ने मानिम जिया ती निम्है दौ ही पत्त नू घोख ननोस।
- 21अउर नन्ना ओर्मर तम्है तम्है पत्त ता कत्था गुट्ठी गे लेका घोख नन्नर, येसु मसीसी कत्था गुट्ठी गे घोख मल नन्नर।



- 22 लिकिन तीमोथियुस गा ओन्टा खद्दस तम्बस गने नलख नू र'अना बेसे, आस एंगहै गने दौ कत्था तेंगना ही नलख नू सुसराचकादस। इत्रु ती आस तंगन पुरुब नंजकादस, अदन नीम अक्कर।
- 23 इसन एंगा गे एन्देर मनो एन्ने ऐन अख'ओन खने, चाँइहेम आसिन निम्है गुसन तइय्या गे असरा नंजकादन।
- 24 अन्नु हूँ उर्बस नू एंगा असरा र'ई का ऐनिम चाँइहेम निम्है गुसन बर'ओन।
- 25 लिकिन एंगहै चाइ नू एंगा गे संगरा नना गे नीम तइय्या निम्है पैकस एपाफ्रोदितोसिन निम्है गुसन किर्तर तइय्या गे चाइ र'ई एन्ने ऐन सोचदन। आस एंगहै भईस, अरा एंगहा गने सुसर नलख ननुस, अरा एंगहै गने ओन्टा सैनस लेक्खा दौ कत्था तेंगना नू संगरा ननुस र'अदस।
- 26 आस नीम ओर्मरिन ऐरा गे कोइहे पतारदस। अरा आस बेमार खत्रकाचस एन्ने नीम अक्का ती आस अउरिम दुक्खे सारचस।
- 27 आस मानिम नू ई बेमार ती खे'आ बेद्दालियस। लिकिन धर्मसी सोग्गे आसी मइय्याँ मंजा। आस नू लेका मला एंगहै नू हूँ मंजा, एकत्रु एंगा दुक्खे नू अउर हूँ दुक्खे चोदना मल मनो।
- 28 कोइहे गा ऐन आसिन इदगे तइय्या गे पतारदन का, नीम आसिन ऐरोर ती रिझर'ओर अरा एंगहै घोख हूँ जुक्की मनो।
- 29 औंगे उर्बस नू कोइहे रिझ ती आसिन परिघ'आ, अरा ईसी लेक्खा आलारिन मईन नना।
- 30 एन्देरगेका निम्है ती एंगा गे नना पोलना सहाड़ा आबोन आस एंगा गे नना गे आस तंगहै जियन हूँ अपलोक नू नंजस। एन्नेम मसीसिन सुसर'अना नलख गे खे'आ गे हूँ मल इल्चियस।

फिलिप्पी 3

- 1 छेद्दे नू, अना एंगहै भईरो, उर्बस नू रिझ'आ। ऐन मुन्द बाचका कत्था गुट्ठिन अउर हूँ लिखना ती एंगा एन्द्रा हूँ ओत्था मल लग्गी, अरा ईद निमा दौ गेम र'ई।
- 2 अल्ला गुट्ठी लेक्खा सोतरा आलर ती चिहूंक र'आ, आर मलदौ ननुर अरा नाइरना गे खतना मन्ना र'ई एन्ने ब'ऊ आलर हिकनर।
- 3 एन्देरगेका मेद ही पत ता कत्था गुट्ठी नू असरा मल उइय्यदत ती, अरा धर्मसी बोलतासी संगरा ती महबा नन्दत ती, अरा मसी येसुस नू फुलई मनू नाम दिम मानिम नू खतना मंजका आलर हिकदत।



- 4 ऐन एंगहै अपन चिहूट ही मइय्याँ असरा गा नना ओंगदन। अरा एकअम नन्नस गे तंगहै चिहूट ही मइय्याँ असरा नना गे आस गे इन्द्रिम कत्था रई होले, एंगा अदिन ती बगगे रई।
- 5 एंगहा कुन्द्रका ती आठ उल्ला नू एंगहै खतना मंजा, अरा ऐन इस्राएल आलर ता हिकदन, अरा ऐन बेनियमिन गोतोर ता हिकदन, अरा एंगहै अयंग बंगर निमन इब्रानी आलर हिकनर ती ऐन हूँ निमन इब्रानी आलन हिकदन, अरा मूसासी नेग उर्मिन पेसना ही पत नू गा ऐन फरिसी हिकदन।
- 6 अरा धर्मस मइय्याँ ता एंगहै सकत ओत्था ती ऐन कलीसिया गुट्ठिन सताबाचका आलन रहचकन। अरा यहूदी नेगन पेसना ही पत नू ऐन उर्मी नेगन पेसका ती बिगर बदी ही रहचकन।
- 7 लिकिन एका एका कत्था एंगहै फैदा गे रहचा, अबइन अक्कु ऐन मसीसी र'अना चड्डे फैदा मल चि'ऊ अक्कन।
- 8 ईद लेका मला, ऐन एंगहै उर्बस मसी येसुसिन अखना लूर ही कोइहे बेस गने अबइन जोक्ख'ओन खने, उर्मी कत्था गुट्ठिन अनभनियाँ अक्कन। अरा आसी चड्डे अबडा उर्मी आलो गुट्ठिन फोकोरकन, अरा ऐन मसीसी मना गे अबइन खतू सोचदन।
- 9 होले ऐन आसी गने ओन्टा मना गे ओंगदन। अरा यहूदी नेगन पेसना ती बरना उजगो ती मला, लिकिन मसीसिन पत'अना ती बरना उजगो गने र'आ गेम ऐन बेद्ददन। ई उजगो धर्मस तरती मसीसी मइय्याँ ता एंगहै पत'अना चड्डे बरई।
- 10 अरा ऐन मसीसिन अख'आ गे, अरा आसी उज्जा चो'अना ही सवंगन अख'आ गे बेद्ददन। अरा आस गने दुक्खे गुट्ठिन चोदना नू बटा मना गे, अरा आसी लेक्खा खे'आ गे बेद्ददन।
- 11 ई लेक्खम ऐन एकअम रकम ती हूँ केचकर ही उज्जा चो'अनन ऐन हूँ खक्खा गे बेद्ददन।
- 12 इबडा उर्मिन ऐन खक्खा खच्चकादन, महले पखइ मंज खच्चकादन एन्ने मल सोचरकी, मसी येसुस ती ऐन एन्देरगे चजरकादन अदिन पूरा नना गेम ऐन कोइहे चिहूट नन्तेम र'अदन।
- 13 अना भईरो, ऐन अखदन का ऐन इदन पूरा मल नंज खच्चकादन। लिकिन ओन्टा नलख लेका नन्दन का एका कत्था खोखा अम्बकी रई अदिन मोधदन ती, मुन्दहारे ता कत्था गुट्ठी तरा अबइन खक्खा गे कोइहे चिहूट नन्दन।
- 14 ऐन धर्मस चि'अना इनामन खक्खा गे एंगहै लच्छय तरा अंडसा गे कोइहे चिहूट नन्दन। आ इनाम मेर्खा उज्जनन खक्खा गेम धर्मस एंगन मसी येसुस ती मीखकादस।
- 15 औंगे नम्है नू एवंदा आलर बडियर मंज खच्चकानर, आर ओर्मर एन्नेम सोचनर नेकअन। अरा एकअम कत्था नू नीम नन्नम सोच नू र'अदर होले, अदिन हूँ धर्मस दिम फरी ननोस।



- 16 अन्नु हूँ नाम एका गूटी पखड़ मंज खच्चकादत अदही लेक्खम उज्जा गे चिहुट नन्ना रई।
- 17 अना भईरो, नीम ओर्मर ओन संगे एंगहै लेक्खा उज्जा ऐका, अरा ने एमहै उज्जना ओक्कना बेसे उज्जा ओक्कनर आरिन हूँ चोख्र'आ।
- 18 एन्देरगेका अजम बग्गे आलर नन्ना लेक्खम उज्जनर ओक्कनर। आर मसीसी क्रुस ही बैरिर एन्ने ऐन निमा गे घड़ी घड़ी तिंकन। अक्कु अउर हूँ इदन चींखा चींखा ब'अदन।
- 19 आर ही छेद्द नठारना हवे। आर ही धर्मस कूल हवे। आर तम्है लजरना ही कत्था गुट्ठी नू फुलई मन्नर। अरा आर ई खेखेल ता आलो गुट्ठी नू लेका सोच नूर'अनर।
- 20 लिकिन नम्है र'अना अड्डा मेर्खा नू रई, अरा असन तिम नाड्स उर्बस येसु मसीस बर'ओस एन्ने नाम रिझ ती पाब ऐरदत।
- 21 आस नम्है पैहा नठारना ही मेदन तंगहै महबा ही मेद लेक्खम कम'ओस चि'ओस। उर्मी आलो गुट्ठिन तंगहै तबे नू ओन्द्रना गे पया चि'ऊ सवंग ती आस इदन ननोस।

फिलिप्पी 4

- 1 औंगे अना एंगहै चोन्हा भईरो, एंगहै संगेरो, नीम उर्बस नू बन्चका र'आ। ऐन निमन चोन्हा नन्दन अरा ऐरा गे पत्तारदन। नीमिम एंगहै रिझ अरा एंगहै नलख गे खक्खका इनाम हिकदर।
- 2 उर्बस नू ओर्त ओर्त गने ओन्टे जिया ती र'आ गे ऐन बहिनर युओदिया अरा सुन्तुखे गुसन गोहरारदन।
- 3 हाँ, सुसर नन्ना नू एंगहै संगे मंजका एंगहै मानी संगी निंग ती हूँ ऐन गोहरारदन का अबड़ा मुक्कर गे संगरा नना, एन्देरगेका आर क्लेमेस अरा एंगहै गने सुसर ननू नन्ना ओर्मर गने मेस्रकी दौ कत्था तेंगा कुद्दना नू एंगहै गने अजम अरजाचर। इबड़ा ओर्मर ही नामे उज्जना ही पुथी नू लिखकी रई।
- 4 उर्बस नू सगरो रिझ'आ, ऐन अउरिम ब'अदन रिझ'आ!
- 5 निम्है कयास मन्नन ओर्मा आलर अखनर नेक'आ। उर्बस चाँइहेम बरदस।
- 6 एन्देर कत्था गे हूँ अमा घोख'आ। लिकिन उर्मी कत्था नू निम्है ने'अना, गोहरारना अरा जलिय'अना ती धन्यवाद गने धर्मसी मुन्दहारे अंडसी नेक'आ।
- 7 होले उर्मी बुझुरना ती गेच्छा र'अना धर्मसी सान्ति, निम्है जिया गुट्ठिन अरा निम्है सोचना गुट्ठिन नीम मसी येसुसी र'अना ती खापो।
- 8 छेद्दे नू अना भईरो, एका एका कत्था मानिम रई, अरा एका एका कत्था मईन जोगे रई, एका एका कत्था उजगो रई, अरा एका एका कत्था निमन रई, अरा एका एका कत्था चोन्हा रई, अरा



एका एका कत्था दौ नामे खक्खर'ऊ र'ई, अरा एका एका कत्था कोइहे बेस अरा ओहमा जोगे र'ई, अबड़ा ही पत्त नू लेका सोचते र'आ।

9एका कत्थन नीम एंग्हे ती सिखकर, अरा इंझकर, अरा मेंजकर, अरा एंग्हे नू ईरकर, अबड़न दिम पेस'आ। होले सान्ति ही धर्मस निम्है गने र'ओस।

10ऐन उर्बस नू अकय रिरयारकन का, अक्कु ढेर उल्ला ही खोखा एंगा गा संगरा नना गे निमा गे घोख अउरिम बरचा। ऐन अखदन का नीम सगरो एंग्हे पत्त नू घोख नू गा र'अदर, लिकिन निमा एंगा गे संगरा नना गे मोका गा मल खक्खरा।

11एन्ने मला का ऐन एंग्हे मलका चड्डे एन्ने ब'अदन। एन्देरगेका ऐन एकअम दसा नू हूँ रिङ्गी ती र'आ गे सिखकादन।

12ऐन अखदन का मलका नू एकासे उज्जना र'ई, अरा निंद्रका नू एकासे उज्जना र'ई। उइचका र'आ गे अरा कीड़ा ती र'आ गे, अरा बिगर चाड़ ती उज्जा गे अरा चाड़ गने उज्जा गे, उर्मी बेड़ा नू उर्मी दसा नू रिङ्गी ती र'अना ही गम आबोन सिखकादन।

13एंगा पया चि'ऊ मसीस ती ऐन उर्मिन नना ओंगदन।

14अन्नु हूँ नीम दौ नंजकर का एंग्हे कलपारना नू संगरा नंजकर।

15अना फिलिप्पी नगरे ता पत्त'ऊ आलारो, नीम इदिन हूँ अखदर का नीम मसीसी दौ कत्थन सिखका और ता बारी नू, ऐन निम्है मकेदोनिया जिला ती उरखकन खने, निमन अम्बरकी नन्ना एकअम कलीसिया हूँ एंगा गे इनाम गुट्ठी चि'अना पत्त नू एंग्हे गने संगे मल चिच्चा।

16अन्नेम ऐन थेस्सलोनिके नगरे नू रहचकन खने हूँ नीम एंग्हे चाड़ गे ओंग्होल मला बग्गे हेल तइयकर।

17ईद एन्ने मला का ऐन निम्है ती इनाम बेद्ददन, लिकिन ऐन इदन बेद्ददन का निम्है खता नू निम्है दौ नलख ही खंजपा बग्गे बेन्दनुम कओ।

18ऐन नीम तइयका उर्मिन खक्खकन, ईद एंग्हे चाड़ ती बग्गे र'ई। नीम एपाफ्रोदितोस ती तइयका इनाम गुट्ठिन खक्खकन ती ऐन उइचकन केरकादन। आद गा महकारना दान अरा इंझना जोगे दाँडे बेसे हवे, एकदा धर्मस गे दौ लग्गी।

19अरा एंग्हे धर्मस तंग्हे महबा ही खुर्जी ही लेखा निम्है उर्मी चाड़न मसी येसुस ती पूरा ननोस।

20अक्कु नम्है धर्म बंगस गे हुल्लो ती हुल्लो गूटी महबा मनन नेकअन। आमेन।



21 मसी येसुस नू रऊ उर्मी नेम्हा आलर गे एंग्हे मोंजरन ब'अके। अरा एंग्हे गने रऊ भईर निमा गे मोंजरा ब'अनर।

22 उर्मी नेम्हा आलर निमा गे मोंजरा ब'अनर, कोइहे गा कैसरसी गढ़िया नू नलख ननुर निमा गे मोंजरा ब'अनर।


23 उर्बस येसु मसीसी मया निम्हे गने र'अन नेकअन। आमेन।



कोलोस्से

कोलोस्से 1

- 1 धर्मसी मने ती मसी येसुसी तइरकन पौलुस अरा नम्है भईस तीमोथियुस
- 2 कोलोस्से नगरे नू मसीसी चड्डे नेम्हा अरा पत'अना जोगे र'अना धर्मसी आलर गे ई चिठिन लिखदम। नम्है धर्म बंगस ती निमा गे मया अरा सान्ति मनन नेकअन।
- 3 ऐम सगर घड़ी निमा गे गोहरारनुम नम्है उर्बस येसु मसीसी बंगस धर्मस गे धन्यवाद नन्दम।
- 4 एन्देरगेका मसी येसुस नू निम्है पत'अना ही पत नू अरा ओर्मा धर्मसी आलर ही मइय्याँ ता निम्है चोन्हा आबोन ऐम मैजकादम।
- 5 धर्मस निमा गे मेर्खा नू उइयका रहचका ही मइय्याँ ता असरा तिम ई पत'अना अरा चोन्हा बरई। ई असरा ही पत नू मानी ही कत्था दौ कत्थन पताचका बारी नू नीम मैज खचकादर।
- 6 निम्है नू अंडसका ई दौ कत्था दिम खेखेल नू उर्मी अड्डा नू बींइरनुम काला लगी। अरा धर्मसी कोइहे मया ही मानिम ही पत नू नीम मैजर ती बुझुरका आ पहिल उल्ला ती एकासे ई दौ कत्था निम्है उज्जनन बदल'अरकी निम्है नू खंजपा चीई, अन्नेम ई दौ कत्था उर्मी खेखेल नू आलर ही उज्जनन बदल'अरकी खंजपा चीई।
- 7 ई दौ कत्थन नीम एम्है गने सुसर ननू एम्है चोन्हा भई एपाफ्रास ती सिखकर। आस एम्है ऊजी नू निम्है मझी नू मसीसी पत'अना जोगे सुसर ननुस हिकदस।
- 8 आसिम नेम्हा बोलतस ती निमा खक्खरका चोन्हा ही पत नू एमन तिंगियस।
- 9 आँगे ऐम निम्है पत नू मैजका उल्ला ती ऐम निमा गे गोहरारनन मल अम्बदम। अरा नीम नेम्हा बोलतासी उर्मी लूर अरा ओर्खना गने धर्मसी मने अबोन अखना ही लूर ती नीदा गे ऐम धर्मस ती ने'अदम।
- 10 होले नीम एन्ने रकम ही उज्जना उज्जोर का आद उर्बासिन उर्मी रकम नू मईन नन्त'ओ अरा रिझ्रत'ओ। अरा नीम उर्मी रकम ही दौ नलख ही खंजपन चि'ओर, अरा नीम धर्मसी लूर नू परदनुम कओर।
- 11 अरा धर्मस तंगहै कोइहे सवंग ही लेक्खा उर्मी सवंग गने निमन बड़ियर कम'ओस, होले नीम उर्मी रकम ही सहना अरा खतिर नन्नन खक्खोर,
- 12 अरा सगरो रिझ्र गने धर्म बंगासी धन्यवाद ननोर। आसिम बिल्ली ही राजी नू धर्मसी आलर ही आसीस नू नीम हूँ बटा मना गे निमन जोगे कमचस।



- 13 आसिम नमन ऊखा ही आकुस ती नाडियस ती तंगहा चोन्हा खद्दासी राजी नू मंखियस।
- 14 आसी खद्दस ती धर्मस नमन सैतान ही आकुस ती अम्बत'अदस, अरा नाम नंजका उर्मी पाप अरा अक्का-बलकन छमा नन्दस।
- 15 मसीस गा मल ईश्रऊ धर्मसी रूपे नू र'अदस, अरा सौंसे गद्द्रका ही कोहाँ हिकदस, अरा धर्मसी जेट्ठा खद्द हिकदस।
- 16 एन्देरगेका आस तिम उर्मी आलो गदरा। मेर्खा ता अरा खेखेल ता उर्मी, ऐथ्रना अरा मल ऐथ्रना उर्मी, बेल-गदिया गुट्ठी मलता सवंग गुट्ठी, अक्स'उर मलता अदिया गुट्ठी उर्मी आस तिम अरा आस गेम गद्द्रकी र'ई।
- 17 अरा उर्मी आलो गुट्ठी गद्द्रका ही मुन्द आस र'अदस, अरा उर्मी आलो गुट्ठी आस नुम तम्है तम्है अड्डा नू बन्चकी र'ई।
- 18 अरा आसिम तंगहै मेद कलीसिया ही कुक्कु अरा अदही ओर हिकदस। अरा आसिम केचका मधेर ती उज्जा चो'उर नू मुन्दतस हिकदस। औंगे आसिम उर्मी नू मुन्द मनोस।
- 19 एन्देरगेका धर्मस तंगहै उर्मी निद्रका आस नू ओक्कर'आ गे बिद्दियस।
- 20 अरा मसीस क्रुस नू बाहचका खेंस ती उर्मी आलो तंगहै गने सान्ति मना गे इहरे कमचस ती, खेखेल ता अरा मेर्खा ता उर्मी आलोन मसीस तिम तंगहै गने मेसाब'आ गे धर्मस बिद्दियस।
- 21 अरा औंगहोल नीम आसी गेच्छा भिन्गे रहचकर, अरा नीम निम्है मलदौ सोच अरा नलख गुट्ठी ती आसी बैरिर रहचकर।
- 22 अन्नु हूँ अक्कु आस तंगहै खद्दासी आल कयन खे'आ गे चिच्का ती धर्मस निमन तंगहै गने मेसाबाचस होच्चस। आसी ऐरना नू निमन बिगर दगहा अरा बिगर बदी अरा नेम्हा कम'अरकी तंगहै मुन्दहारे इज्जत'आ गे दिम धर्मस इदन नंजस।
- 23 नीम दौ कत्थन मँजकर खने, निमा खक्खरका असरा आबोन मल अम्बर ती पत'अना नू बड़ियर अरा बन्चका र'आ। ई दौ कत्था दिम मेर्खा किय्या ता ओर्मा आलर गे तेंगरा केरा। ऐन पौलुस ई दौ कत्था गेम सुसर ननू मंजकन।
- 24 अक्कु ऐन निम्है चड्डे सारचका एंगहै सस्ती गुट्ठी ही पत नू ऐन रिझ्दन। औंगे मसीसी मेद कलीसिया गे मसीसी कलपारना गुट्ठी नू ऐन हूँ मेस्र'आ गे एंगहै मेद नू सस्ती सारदन।
- 25 निमा गे धर्मसी कत्थन उर्मी तरा तेंगा गे धर्मसी चिताबुता ही लेक्खा ऐन सुसर ननू मंजकन।



26ई दौ कत्था दिम गम हिके, एकदा ओर ती अरा परिया परिया ती नूखुरकी गा रहचा, लिकिन अक्कु आद आसी नेम्हा आलर गे दहदर मन्तारा।

27धर्मस ई गम ही महबा ही मोल आबोन नन-यहूदीर गे हूँ अखत'आ गे बिद्दियस। इदिम आ गम का मसीस निम्है नू उज्जदस। ईद निमन आसी महबा नू मेस्रना ही असरा चिई।

28ओंगे ओर्मा आलारिन मसीस नू बड़ियर ननरकी इजत'आ गे ऐम ओर्मा आलर गे मसीसी पत्त नू तेंगरकी धर्मसी चिच्का उर्मी लूर ती ओर्त ओर्त आलारिन तिगाब'अदम अरा सिखाब'अदम।

29अदगेम ऐन एंगहै नू सवंग गने नलख ननू आसी पया लेक्खा जिया कया ती अर्ज'अदन।

कोलोस्से 2

1निमा गे अरा लवोदिकेया नगरे ता कलीसिया गे अरा एंगन मल ईरका अउर नन्ना ओर्मा पत्त'ऊ आलर गे ऐन एका कोइहे चिहुट नन्दन एन्ने नीम अख'आ गे ऐन बेद्ददन।

2नीम हूँ अरा आर हूँ रिझारकी चोन्हा ती मेस्रका र'अना रई, ईद दिम एंगहै मने हवे। होले नीम उर्मी बुझुरना गने अजगुत असीसन खक्खोर ती धर्मसी गम आबोन अख'ओर चि'ओर। आ गम मसीस दिम हवे।

3उर्मी लूर अरा अक्किल मसीस नू नूखकी रई।

4इदन ऐन निमन इदगे तेंगदन का नीकईम निमन लहर'अना कत्था गुट्ठी ती अम्बोर ठग'आ।

5एन्देरगेका ऐन गा कया नू निमन ती गेच्छा र'अदन, लिकिन बोलता नू निम्है गनेम र'अदन। निम्है दौ उज्जा ओक्कनन अरा मसीस नू निमा उइयका पत्त'अना नू नीम एंवदा बड़ियर र'अदर, अदिन ऐरदन ती रिझदन।


6ओंगे नीम एकासे मसी येसुसिन निम्है उर्बस एन्ने इंझकादर, अन्नेम आसी गने मेस्रका ती उज्जते र'आ।

7अरा नीम आस नुम पादा हेंरनुम अरा परदनुम कला, अरा एकासे निमन सिखाबाचका रई अन्नेम पत्त'अना नू बड़ियर मन्नुम कला, अरा धर्मस गे बग्गे ती बग्गे धन्यवाद नन्नुम कला।

8चिहूंक र'आ का नीकईम निमन अनभनियाँ अरा ठगना तत्व लूर ती अम्बोर फफड़'आ हो'आ, एकदा पुरखौती अरा खेखेल ता बोलता गुट्ठी ही सवंग ता सिखाब'अना लेक्खा गा रई, लिकिन मसीसी लेक्खा मलकी।

9एन्देरगेका मसीस नू धर्म बारना ही उर्मी आलो आल रूपे नू मइचकी रई।

10अरा आस नू नीम निंद्रकादर, एकास उर्मी अक्स'उर अरा अदिया गुट्ठी ही अक्स'ऊ हिकदस।



- 11 नीम निम्है पाप ही सुबहा आबोन अम्बका ती नीम हूँ मसीस नू खतना खक्खकादर। ई खतना आलर ही खेक्खा ती मल मंजकी रई, लिकिन मसीस ती मंजकी रई।
- 12 अरा नोड़रना नू नीम मसीस गने माड़रदर कादर ती आसिन केचका मद्धेर ती उज्जा चौचका धर्मेसी सवंग मइय्याँ ता निम्है पत'अना ती नीम हूँ मसीस गने पुना उज्जना गे उज्जा चौचकादर।
- 13 नीम निम्है अक्का-बलका गुट्ठी ती अरा खतना मल मंजका निम्है पाप ही सुबहा ती केचका रहचकर खने, धर्मेस निमन मसीस गने उज्जताचस ती नम्है उर्मी अक्का-बलका गुट्ठिन छमा नंजस।
- 14 अरा मूसासी पेसका ही लेक्खा नम्है बिड़दो नू लिखचका पाप ही लिखन धर्मेस मेटचस चिचस। अरा धर्मेस आ लिखन जम्मन मसीसिन क्रुस नू ठोकचस ती नटचस।
- 15 ई लेक्खम धर्मेस अक्स'ऊ अरा अदिया उइय्यू मलदौ बोलता गुट्ठी ही सवंगन ओथ्रस चिचस। अरा मसीस क्रुस नू केचस ती धर्मेस अबड़न जितचस ती अबड़ा सवंग मलका एन्ने खेखेल गे ऐदस।
- 16 औंगे नीम एन्द्रन ओन्दर मोखदर, अरा नीम मल मन्ना परब मलता पुना चन्दो मलता खन्न ऐखना उल्ला गुट्ठी ही पत नू ने हूँ निमन बदी नना गे मोका अमा चि'आ।
- 17 इबड़ा उर्मी नेग गुट्ठी गा बर'ऊ रई आ आलो ही ऐख लेका हवे, लिकिन अबड़ा ही मानी मने गा मसीसी पत नू रई।
- 18 ने हूँ निमन ठकना लुदऊ नू अरा मेर्खा पैकारिन ओहमा मन्ना नू मन्दस ती नीम निम्है इनाम आबोन मल खक्खना ही जोगे मना गे अड़ा अमा चि'आ। ई लेक्खा आलस तंगहै ईरका देखार ही पत नू बग्गे बुझुरत'अदस। बोलता ही सुबहा मलका आसी जिया अनभनियाँ सोच ती फुलई मनी।
- 19 अरा आस सौंसे मेद ही कुक्कु मसीस नू जोड़रका मल र'अदस। मसीस तिम सौंसे मेद ओट्टा ओट्टा अरा अंग अंग जोड़रई ती पोसरई ती ओन संगे गुंथरई ती धर्मेसी चि'ऊ पर्दना ती पर्दनुम कई।
- 20 नीम मसीस गने केचकादर, खने आस निमन खेखेल ता बोलता गुट्ठी ही सवंग ती अम्तारका केरकादस। औंगे नीम एन्देरगे अक्कु गूटी खेखेल ता आलर लेक्खा अदही नेग गुट्ठी नू एन्ने ऐकालदर का,
- 21 “इदिन अमा एंवसइ'आ, अमा टट्टे ऐरा, अरा अमके टुडर'आ?”



22 इबड़ा उर्मी आलो बउरारनुम बउरारनुम नठार'ओ, एन्देरगेका इबड़ा आलर ही पेसका अरा सिखाबाचका गुट्ठी हवे।

23 इबड़ा नेग गुट्ठी महबा नन्ना ही चाल, अरा लुदऊ मन्ना, अरा मैदन सिझा ब'अना लूर लेक्खा गा ईथ्रई, लिकिन मैद ही चिबाखारना गुट्ठिन छेक'आ गे इबड़ा ती एन्देर हूँ संगरा मल मनी।

कोलोस्से 3

1 औंगे नीम मसीस गने उज्जतारकादर होले, मेर्खा आलो गुट्ठिन बेद्दना नूर'आ, एक्सन मसीस धर्मेसी तीना चोक्ख उक्कादस।

2 खेखेल ता आलो गुट्ठी नू मला, लिकिन मेर्खा ता आलो गुट्ठी नू जिया ओड़'आ।

3 एन्देरगेका नीम गा केचकादर, अरा निम्है उज्जना मसीस गने धर्मेस नू नूखूरकी रई।

4 मसीस निम्है उज्जना हिकदस। एकाबारी मसीस सौंसे खेखेल गे तंगन दहदर ननोस, नीम हूँ आस गने दहदर मनतार'ओर ती आसी महबा नू मेस्र'ओर।

5 औंगे पेहरन ही सोतरा नलख, अरा पाप ती सोतरा मन्ना, अरा चिबाखारना, मलदौ मइय्याँ ता मने, अरा मूर्तिन ओड़ लग्गना ही जोक्खा लोभिया, इबड़ा जम्मा पाप ही सुबहा हवे। इबड़ा मलदौ आबोन नन्नन अम्बा चि'आ।

6 इबड़ा ही चड्डेम धर्मेसी कैर मल पेस्र'उर मइय्याँ बर'ई।

7 अरा नीम हूँ मुन्द इबड़ा मलदौ ननुर ही मझी नू उज्जा लिक्कर खने, इबड़ा कत्था गुट्ठी ही लेक्खम ऐका लिक्कर।

8 लिकिन अक्कु गा नीम खींस, अरा कयरारनन, अरा कुचुरहन, अरा हींइनन, अरा निम्है बई ती बरना मलदौ कछनखरना इबड़ा उर्मिन अम्बा चि'आ।

9 अरा नीम निम्है पच्चा आल सुबहा अरा अदही नलख गुट्ठिन अम्बका ती ओर्त नन्नस गने अम्बोस ठक'आ।

10 अरा निमन गढ़'उसी रूपे लेक्खा आसी पत्त नू ठौका गने अख'आ गे नीम पुना मंजका पुना आल सुबहन अतकादर।

11 ई पुना उज्जना नू नन-यहूदी अरा यहूदी एन्ने, खतना मंजका अरा खतना मल मंजका एन्ने, नन-राजियर अरा जंगलीर एन्ने, बिट्ठी ननू जौंख अरा छछिन्द एन्ने इन्द्रिइम फरक मल्ला। लिकिन मसीस दिम उर्मी र'अदस, अरा आस इबड़ा ओर्मर नूर'अदस।



- 12 औंगे नीम धर्मसी चाजरका आलर लेक्खा, नेम्हा अरा दुलार र'अना ती, नीम कोइहे सोग्गेन अरा दया आबोन अरा लुदऊ मन्नन अरा नर्मियाँ आबोन अरा खतिर मन्नन अता।
- 13 अरा नीम ओर्त ओर्तोरिन सह'आ। अरा ओर्तोसी बिइदो नू निमा गे इन्द्रिइम नालिस र'ई होले, अदिन आस गे छमा नना। उर्बस निमा गे छमा नंजका लेक्खा नीम हूँ ओर्त ओर्तोरिन छमा नना।
- 14 अरा इबड़ा उर्मी दौ गुन्न ती कोइहे, चोन्हा आबोन अता। आदिम अबड़ा उर्मिन बड़ियर ओन्टेम मन्ना नू हें अरकी उइयकी र'ई।
- 15 मसीसी सान्ति निम्है जिया नू राजी ननी नेकअन। एन्देरगेका ई सान्ति गेम नीम ओन्टा मेद ही बग्गे अंग लेक्खा मेर्रकादर। अरा नीम धन्यवाद चि'ऊ मना।
- 16 मसीसी कत्था निम्है नू सोच नलख उर्मी नू बग्गे ती बग्गे मड़'अन नेकअन। आ कत्था ही उर्मी लूर गने ओर्त ओर्त गे सिखाब'आ ती तिगाब'आ। अरा तम्है तम्है जिया नू धन्यवाद गने धर्मस गे अस्सना-पाइना डंडी गुट्ठिन अरा ओहमा डंडी गुट्ठिन अरा बोलता ही डंडी गुट्ठिन पाड़ा।
- 17 अरा कत्था ती मलता नलख ती इन्द्रिइम ननोर, उर्मिन उर्बा येसुसी नामे ती नना, अरा आसी तरतिम धर्म बंगासी धन्यवाद नन्नुम अबड़न नना।
- 18 अना मुक्कारो, नीम तम्है तम्है मेतासी तबे नू र'आ, नीम उर्बासी र'अना ती ईदिम निमा गे बेस उज्जना ऐकना हवे।
- 19 अना मेतारो, नीम तम्है तम्है मुक्कन चोन्हा नना, अरा आर नू करतअंग अमा नना।
- 20 अना खद्दारो, उर्मी कत्था नू तम्है तम्है अयंग बंगर ही पेसकन मेना, एन्देरगेका ईद उर्बस गे दौ लग्गी।
- 21 अना बंगारो, निम्है खद्द-खरन अमा कैर'आ, एन्ने अम्बो मना का आर ही डिठ एस'ओ क'ओ।
- 22 अना बिट्ठी ननू जौंखारो, निम्है ई खेखेल ता उर्बर गे उर्मी कत्था नू पेस'आ। आरिन पतारत'आ गे लेका आर ही ऐरना नू लेका मला, लिकिन उजगो जिया ती उर्बा येसुसिन मईन नन्ना ती आरहिन पेस'आ।
- 23 इन्द्रिइम हूँ नीम नन्दर, अदन आलर गे नन्ना बेसे मला उर्बा येसुस गे नन्ना बेसे सौंसे जिया कया ती नना।
- 24 एन्देरगेका नीम उर्बा मसीस गे सुसर नन्दर, नीम अखदर का इदही इनाम बेसे नीम उर्बस ती आसीस आबोन खक्खोर।



25 एकास मलदौ नन्दस, आस तंगहै नंजका मलदौ ही लेक्खा ऊजिन खक्खोस। अरा नेख'आ हूँ तीना माल खड़ना मल मनी।

कोलोस्से 4

1 अना उर्बारी, निमा गे हूँ मेर्खा नू ओन्टा उर्बस र'अदस एन्ने अख'अरकी नीम निम्है बिट्ठी ननू जोंखर गे एन्देर एन्देर ठौका अरा बेस र'ई अदिन चि'आ होआ।

2 गोहरारतेम र'आ, अरा धर्मस गे धन्यवाद नना ती गोहरारना नू एज्जका र'आ।

3 अरा इदही गने एमा गे हूँ गोहरार'आ का धर्मस एमा गे दौ कत्था तेंगा गे बलिन तिसगदस नेकअन। होले ऐम मसीसी पत्त ता गम ही कत्थन तेंगा ओंगोम। ई नलख ही चड्डेम ऐन जेहेल नू हेंरकादन।

4 अरा एकासे एंगा तेंगना चाड़ र'ई, अन्नेम ई कत्थन फरीफरी तेंगा गे एंगा गे गोहरार'आ।

5 ने पत्त'ऊ मलनर आर गने लुरगर गने ओक्का इज'आ, अरा उर्मी मोका आबोन दौ गने बउर'आ।

6 अरा निम्है कछनख्रना सगर घड़ी मया गने अरा सोभना र'अन नेकअन। ओंगोम एकासे निम्है गने मिनुर गे अदही आनाकिर्त'अना र'ई अदिन अख'आ ओंगोर।

7 दुलारु भई अरा पत्त'अना जोगे सुसर'उस अरा उर्बासी नलख नू एंगहै गने सुसर ननू तुखिखोस, एंगहै पत्त ता उर्मी हलन निमन तेंगोस।

8 नीम एम्है दसा गुट्ठिन अख'आ गे अरा आस निम्है जिया गे सान्ति चि'आ गेम, आसिन ऐन निम्है गुसन तइयकादन।

9 अरा आसी गने ऐन पत्त'अना जोगे अरा दुलारु भई ओनेसिमोसिन हूँ तइयकादन। आस निम्है आलस दिम हिकदस। आर निमन इसता उर्मी कत्थन तेंगोर।

10 अरिस्तर'खोस ने एंगहै गने जेहेल नू हेंरकादस, आस निमा गे मोंजरा नन्दस। अरा मरकुस ने बरनबासी अंडसका भई मन्दस, आस निमा गे मोंजरा नन्दस। मरकुसी पत्त नू नीम मुन्द दिम पेसका खक्खका रहचकर, आस निम्है गुसन बर'ओस होले, नीम आसिन परघ'अके।

11 अरा यूसतोस बारना येसुस हूँ निमा गे मोंजरा नन्दस। धर्मसी राजी ही नलख नू एंगहै गने सुसर ननुर मझी नू ईर लेका यहूदीर हिकनर। ईर एंगा गे जिया सालना चि'अनर।

12 अरा मसी येसुसी जोंखस एपाफ्रास हूँ निमा गे मोंजरा नन्दस, आस हूँ निम्है आलस हिकदस। आस सगर घड़ी निमा गे गोहरारना गुट्ठी नन्तेम र'अदस का नीम पखड़ मनोर ती ओर्मा असरा गने धर्मसी उर्मी मने नू बड़ियर इज्जका र'ओर।



- 13 आस निमा गे अरा लवोदिकेया अरा हिएरापोलिस नगरे गुट्ठी नू र'ऊ पत'उर गे कोइहे नलख नंजस, इदही ऐन गोवाह हिकदन।
- 14 एम्है दुलारु बइधस लूकस अरा देमस निमा गे मोंजरा नन्नर।
- 15 लवोदिकेया नगरे ता पत'ऊ भईर गे अरा नुम्फा अरा अदही एइपा नू खोंइरना कलीसिया गे एंग्हे मोंजरा।
- 16 अरा ई चिठिन निम्है गुसन पढके, अरा अदही खोखा इदिन लवोदिकेया ता कलीसिया नू हूँ पढत'अके। अन्नेम लवोदिकेया ता कलीसिया गे एंग्हा लिखचका चिठिन हूँ नीम पढके।
- 17 अरा नीम अखिप्पोसिन आनके का, “एका सुसर'अना उर्बस निंगा चिच्कादस, अदिन चिहुंक लगे पूरा ननके।”
- 18 ऐन पौलुस एंग्हे खेक्खा ती ई मोंजरन लिखदन। सुरता नना का ऐन जेहेल नू हेंरकादन। धर्मसी मया निम्है नू र'अन नेकअन। आमेन।



1 थेस्सलोनिकेयर

1 थेस्सलोनिकेयर 1

- 1ई चिठी ऐन पौलुस अरा सीलास अरा तीमोथियुस तरती थेस्सलोनिके नगरे ता कलीसिया गे रई। धर्मे बंगस अरा उर्बस येसु मसीस नू निमा मया अरा कोड़े मनन नेकअन।
- 2ऐम एम्है उर्मी गोहरारना बेड़ा नू निमन सुरता नन्तेम र'अदम अरा सगर घड़ी निम्है ओर्मर ही पत नू धर्मेसिन धन्यवाद नन्दम।
- 3अरा एम्है धर्मे अरा बबासी मुन्दहारे निम्है पत'अना जोगे नलख, अरा चोन्हा ती नन्ना नलख, अरा नम्है उर्बस येसु मसीस नू असरा खक्खा गे कयास नन्दर अदिन सुरता नन्दम।
- 4अना भईरो, धर्मेसी चोन्हा आलारो, ऐम अखदम का नीम चज्जरका आलर।
- 5एम्है दौ कत्था निम्है गुसन कत्था लेका नू मल्ला अंडसका, लिकिन नेम्हा बोलतासी सवंग अरा कोड़े पोकता गने हूँ अंडसिया। एकासे का नीम अखदर ऐम निमा गे निम्है मड़ी नू एकासे नंजकम ती रहचकम।
- 6अक्कु नीम गा कोहाँ सस्ती नू हूँ नेम्हा बोलतासी रिझ गने कत्थन इंड्रकर ती एम्है अरा उर्बस लेक्खा ऐका हेलरकर।
- 7औंगे मकेदोनिया अरा अखाया चकभार गूटी उर्मी पत'ऊ आलर गे नीम गोवाह मंजकर।
- 8एन्देरगेका निम्है गुसले मकेदोनिया अरा अखाया नू लेका उर्बासी दौ कत्था मल तेंगा। लिकिन धर्मेस नू निम्है पत'अना रई आद उर्मी अड्डा बींड़की किरकी रई का एमा ब'अना ही चाड़ मलकी।
- 9एन्देरगेका आर तामिम तेंगनर ऐम निम्है गुसन बरचकम खने एकासे नीम एमन परघाचकर, अरा उज्जना अरा मानिम धर्मेसी तेतर-सुसर नना गे नीम एकासे मूर्ती गुट्ठी ती धर्मेस तरा किरकर।
- 10अरा नीम आसी तंग्दासी मेर्खा ती बरना ही पाब ऐरालदर, नेकन धर्मेस केचका ती उज्जताचस। आसिम येसुस हिकदस ने नमन बरना नेंवई ही खींस ती बछाब'अदस।

1 थेस्सलोनिकेयर 2

- 1अना भईरो, नीम निम्है तिम अखदर का एम्है इसन थेस्सलोनिके नगरे बरना अनभनियाँ मल मंजा।



- 2लिकिन नीम अखदर का मुन्द फिलिप्पी नगरे नू सस्ती सारना पीखरना नू हूँ एम्है धर्मस एमा गे एन्ने डिढ चिचस का ऐम बिगर अटकरका धर्मसी दौ कत्थन तिकम।
- 3एन्देरगेका एम्है सिखाब'अना लहर'अना ती मला, महले मलदौ मने गुट्ठी मला, महले ठकना मला।
- 4लिकिन एकासे धर्मस एमन दौ कत्था तेंगना जोगे कमचस, ऐम अन्नेम तेंगदम। अरा इत्रु आलारिन मला एम्है जियन बिढदस आ धर्मसिन पतारदम।
- 5एन्देरगेका नीम अखदर ऐम नेकन हूँ मल फसकटचकम महले नेकन हूँ चिबाखार'आ गे लहर'आ लिक्कम। धर्मस गोवाह र'अदस।
- 6अरा ऐम आलर ती मईन मल बेद्दा लिक्कम, निम्है ती मला महले नेख'अम नन्नर ती हूँ मला।
- 7ऐम मसीसी तइरका मन्ना चड्डे निम्है मइय्या ओत्था लद'आ ओंगा लिक्कम। लिकिन एकासे अयंग तंगहै खद्द-खरन उन्त'ई तिंद'ई, अन्नेम ऐम हूँ निम्है गने रहचकम।
- 8ओँगे ऐम एन्ने निम्है मइय्याँ चोन्हा नन्नुम धर्मसी दौ कत्था नू लेका मला, लिकिन अपन अपन उज्जनन हूँ चि'आ गे सपडारका रहचकम, एन्देरगेका नीम एम्है ती चोन्हा मंज खच्चिका रहचकर।
- 9अना भईरो, नीम एम्है अर्जाचका अरा सस्तिन सुरत'अदर। ऐम नेखा नू हूँ ओत्था अम्बोम मना, अदगेम ऐम उल्ला माखा नलख नंजकम ती निम्है नू धर्मसी दौ कत्थन तिकम।
- 10नीम पत'ऊ आलर ही मझी नू एम्है उज्जना ओक्कना एकासे नेम्हा अरा उजगो अरा बिगर बदी ही रहचा। नीमिम गोवाह र'अदर अरा धर्मस हूँ गोवाह र'अदस।
- 11नीम अखदर का एकासे ओर्त बंगस तंगहै खद्द-खरन नन्दस। अन्नेम निमा ओर्त ओर्त गे नंजकम।
- 12ऐम निमन सिखाबाचकम अरा रिझताचकम अरा घड़ी घड़ी बुझाब'आ लिक्कम का निम्है उज्जना ओक्कना धर्मसी जोगे मन्ना र'ई, एकास निमन तंगहै राजी अरा महबा नू मेखदस।
- 13ई चड्डे निमा गे ऐम धर्मसी दौ कत्थन तिकम, खने नीम अदिन आलर ही मला धर्मसी कत्था अक्कर ती इंझरकर। अरा ईद मानिम नू धर्मसी कत्था हवे, एकदा नीम पत'ऊ आलर ही जिया नू उज्जाली। ओँगे ऐम सगर घड़ी धर्मसी धन्यवाद नन्दम।
- 14भईरो, यूदेया जिला नू मसी येसुस नू र'ऊ अबड़ा धर्मसी कलीसिया गुट्ठी लेक्खा नीम हूँ उज्जालिक्कर। एकासे आर यहूदीर ती खिलपत मंजर अन्ने नीम हूँ निम्है राजी ता आलर ती खिलपत मंजकर।



- 15 आरिम उर्बा येसुसिन अरा धर्मेसी कत्था तिङ्गुरिन पिटियर। अरा एमन हूँ खिलपत नंजर। अरा आर धर्मेसिन मल रिझाब'अनर अरा ओर्मरिन हींङनर।
- 16 अरा अबडर नन-यहूदीरिन नाडर'आ गे सिखाब'अना ती एमन छेकनर का सगरो आर ही पाप ही कट्टु नींदी। छेद्द नू आर ही मड्य्याँ धर्मेसी कोडहे खींस अंडसकी रई।
- 17 अना भईरो, ऐम एगघड़ी गे निम्है ती छिंङ्का रहचकम अन्नु हूँ एम्है सोचना गुट्ठी गा निम्है गने रहचा। खने ऐम बग्गे चिहुट नंजकम अरा निमन कोडहे ऐरा बेद्दा लिक्कम।
- 18 औंगे ऐम निम्है गुसन बर'आ गे बिद्दकम। ऐन पौलुस आँगहोन मला घड़ी घड़ी निम्है गुसन बर'आ बिद्दकन। लिकिन सैतान एमन छेकचा उड्य्या।
- 19 एन्देर एमा असरा अरा रिझ चि'ई अरा नम्है उर्बा येसुसी बरना बेडा नू आसी मुन्दहारे एम्है महबा ही मुकुट एन्देर र'ओ? नीम मलदर का?
- 20 एम्है महबा अरा रीझ नीमिम हिकदर।

1 थेस्सलोनिकेयर 3

- 1 औंगे ऐम अउरिम कयास नना पोलकम खने, ऐम अथेने नगरे नू दिम र'आ गे तिगचकम।
- 2 अरा ऐम तीमोथियुसिन निम्है हेद्दे तड्य्कम। आस एम्है भईस अरा मसीसी दौ कत्था तेंगना नू धर्मेसी जोंखस हिकदस। अरा आस निम्है पत'अना नू निमन बडियर ननोस अरा रिझत'ओस, इदगे ऐम आसिन तड्य्कम।
- 3 औंगे ने हूँ इबडा खिलपत चड्डे अम्बोर नुक्र'आ। लिकिन नीम गा अखदर दिम ऐम ई खिलपत गेम उडरकादम।
- 4 अन्ति निम्है गुसन रहचकम खने, निमन घड़ी घड़ी ब'आ लिक्कम, का नमा गे खिलपत मन्ना दिम रई। अरा एन्ने मंजकी रई अदिन नीम अखदर।
- 5 औंगे एम्है नू कयास मल मंजा खने, निम्है पत'अना ही पत नू अख'आ गे तीमोथियुसिन तड्य्कन। इदगेका बिद'उस इन्द्रिडम कत्था नू बिद'ओस अड्य्या खत्र'ओर होले, एम्है अर्ज'अना अनभनियाँ मनो ई चड्डे ऐन इल्चिकन।
- 6 लिकिन अक्कु तीमोथियुस निम्है गुसते एम्है गुसन बरचकादस, अरा निम्है पत'अना अरा चोन्हा ही पत ता दौ कत्थन ओन्द्रकादस। अरा आस बाचस का नीम सगरो चोन्हा गने एमन सुरत'अदर, अरा एकासे ऐम निमन ऐरा गे खसतारदम अन्ने नीम हूँ एमन खसतारदर।



- 7 औंगे भईरो, ऐम एमा गे मंजका उर्मी खिलपत अरा कलपारना नू हूँ निम्है पत'अना ती निम्है पत नू कोड़े खक्खकम ती रिझकम।
- 8 नीम धर्मस नू पत'अना नू बड़ियर मन्नुम कादर, ईद एमा गे पुना उज्जनन चिई।
- 9 निम्है चड्डे ऐम धर्मसी मुन्दहारे खकरका उर्मी रिझ गे ऐ बग्गे धन्यवाद धर्मसिन चि'ओम अन्नु हूँ जुक्की मनो।
- 10 ऐम फेन निम्है गने भेंट मनोम ती निम्है पत'अना नू रई आ पयहा आबोन बड़ियर नना गे उल्ला दरा माखा नगदे गोहरारदम।
- 11 अक्कु नम्है धर्मस बंगस अरा उर्बा येसुस दिम निम्है गुसन बर'आ गे एमन डहरे ऐददस नेकअन।
- 12 एम्है चोन्हा एकासे निम्है नू परदिया निन्दिया अन्नेम निम्है चोन्हा ओर्त ओर्त नू नन्नर नू परदा ती नीदा गे उर्बस निमन सहाड़ा नन्दस नेकअन।
- 13 इकला नम्है उर्बा येसुस तंगहै उर्मी नेम्हा आलर गने बर'ओस, आस नम्है धर्मस अरा बंगस ही मुन्दहारे नीम बिगर बदी ही आलर अरा नेम्हा आलर र'आ गे निम्है जियन बड़ियर नन्दस नेकअन।

1 थेस्सलोनिकेयर 4

- 1 अक्कु अना भईरो, ऐम गोहरारदम अरा उर्बा येसुस नू आनदम, एकासे उज्जना ओक्कना रई अरा धर्मसिन पतारना रई अदिन नीम एम्है तिगाब'अना ती अक्कादर। अरा अन्नेम उज्जा ओक्का लगदर, अइय्या अउरिम परदा।
- 2 ऐम निमा उर्बा येसुसी आकुस ती एन्देर एन्देर पेसका ती रिझाबाचकादम अदिन नीम अखदर।
- 3 धर्मस बेददस का नीम नेम्हा मना अरा पेहरन ही सोतरा नलख ती बछर'आ।
- 4 अरा नीम ओर्मर नेम्हा अरा मईन गने निम्है मैदन सम्झ'आ गे सिख'आ,
- 5 अरा धर्मसिन बल्ली आ जाती लेक्खा निम्है मैदन एन्ने पाप नन्ना ही चिबाखारना गे अमा चि'आ।
- 6 इबड़ा कत्था गुट्ठी ती ने हूँ तंगहै भईरिन अरा ताक अम्बोर ऐरा अरा अम्बोर ठक'आ। एन्देरगेका उर्बस इबड़ा उर्मी कत्थन ननुर गे दंडे चि'ऊ र'अदस। ई पत नू ऐम मुन्द तिम आनका अरा तिगाबाचका चिच्का रहचकम।
- 7 एन्देरगेका धर्मस नमन नेम्हा उज्जना उज्जा गे मीखकादस, सोतबोड़'आ उज्जना उज्जा गे मल्ला मीखका।



- 8ई चड्डे एकास तिगाब'अनन हींइदस आस आलारिन मला धर्मसिन हींइदस ने निमा गे तंग्हे नेम्हा बोलतासिन चि'अदस।
- 9अउर हूँ ऐम निमा गे भईरिन चोन्हा नन्ना ही पत नू लिखना ही चाइ मलकी, एन्देरगेका तम्है ती नन्नर संगे चोन्हा ती र'आ गे धर्मस निमन मुन्द तिम सिखाबाचका चिच्कादस।
- 10मानिम नू गोट्टा मकेदोनिया नू र'अनर अबड़ा उर्मी भईर गने नीम चोन्हा नन्दर दिम। लिकिन भईरो निमा आर गने अउरिम कोइहे चोन्हा नन्ना र'ई, अदगे निमन तिगाब'अदम।
- 11अरा ऐम निमन पेसकम अन्नेम कोड़े गने उज्जा, अरा तंग्हे तंग्हे नलखन नना, नन्नर ही नलख नू अमा नूता, अरा तंग्हे ती अर्ज'आ गे चिहुट नना। ईदिम निमा चाइ र'ई।
- 12तहाँ निम्है उज्जना ती सौंसार ता आलर ती मईन खक्ख'ओ, लिकिन निमा निम्है चाइ गे आरिन असरा नन्ना ती उज्जना मल्ला।
- 13अक्कु भईरो, केचका आलर ही पत नू नीम बल्लुर लेक्खा र'आ गे, अरा अदही पत नू असरा मल्ला आर ही लेक्खा नीम दुक्ख नू र'आ गे ऐम मल बेद्ददम।
- 14ऐम पत'अदम का येसुस केचस ती उज्जा चोचस। औंगे ऐम पत'अदम का ने मसीसिन इंझनर ती खे'अनर आरिन येसुस अउरिम बरना बेड़ा नू धर्मस आसी गने उज्ज'ओस।
- 15ऐम उर्बासी कत्था लेक्खा ब'अदम। ऐम ने उर्बासी बरना बेड़ा गूटी उज्जालदम। ऐम एम्है ती मुन्द केचका र'अनर आर ही ती मुन्द चो'आ गे पोल्लोम।
- 16एन्देरगेका उर्बस तानिम चिच्चियारना आन्ना गने अरा मुध मेर्खा पैकासी सड़ा गने अरा धर्मसी पेंडे खरखना गने मेर्खा ती एत्तोस बर'ओस। अरा मसीसिन इंझर ती केचका र'अनर आर मुन्द उज्जा चो'ओर।
- 17फेन नाम ने येसु मसीसी बरना बेड़ा नू उज्जदत अरा खे'खेल नू अम्बरका र'अदत आर गने खोंइर'अरकी नाम बदाली नू मेर्खा नू उर्बस गने भेंटार'आ गे चोदर'ओत। अरा नाम उर्मी उल्ला उर्बस गने र'ओत।
- 18औंगे इबड़ा कत्था गुट्ठी ती ओर्त ओर्तोरिन रिझत'आ।

1 थेस्सलोनिकेयर 5

- 1अना भईरो, अक्कु इबड़ा मन्ना ही बेड़ा गुट्ठी अरा परिया गुट्ठी ही पत नू लिखना ही चाइ मलकी।
- 2एन्देरगेका उर्बासी बरना उल्ला माखा खलबर ही बरना लेक्खा मनो, अदिन नीम बेस लगे अखदर।



- 3 आलर कछनख ओर, “ऐम कोड़े र'अदम अरा अपलोक नू मलकम।” आ बेड़ा नू ओन्टा ओत्था ऐख आली गे एकासे नुंजना बर'ई अन्नेम आचका ही आर ही मइय्याँ कोहाँ सस्ती बर'ओ। आ बारी अबड़ा आलर मल बछ'ओर।
- 4-5 लिकिन अना भईरो, नीम ओर्मर बिल्ली ही आलर अरा उल्ला ही आलर हिकदर। नाम माखा अरा ऊखा ही मलदत। नीम गा धर्मसिन बल्लू आलर लेखा ऊखा नू मलकर का आ उल्ला खलबस लेखा बर'ओ ती निमन कुल्लो।
- 6 औंगे नाम नन्नर खन्द्रनर अन्ने अम्बोत खन्द्र'आ। लिकिन नाम एज्रका अरा जगचका र'अना र'ई।
- 7 एन्देरगेका निन्द्रहर माखम खन्द्रनर, अरा उंखू आलर माखम उंखनर।
- 8 लिकिन नाम गा उल्ला ही मंजकत ती जगचका र'अरकी पत'अना अरा चोन्हा ही कवच अतोत, अरा नाइरना ही असरा आबोन पन्ना ही टोपी बेसे अतोत।
- 9 एन्देरगेका धर्मस नमन तंग्हे खींस ती दंडे खखा गे मल्ला चज्जिका। लिकिन आस नमन नम्है उर्बस येसु मसीस ती नाइर'आ गे चज्जिकादस।
- 10 मसीस नमा गे केचस। औंगे नाम उज्जत र'ओत महले केचका र'ओत, आस किर्रो बारी आसी गने नाम सगरो उज्जोत।
- 11 औंगे नीम अक्कुन नना लगदर अन्नेम ओर्त ओर्तोरिन रिझाब'आ अरा ओर्त ओर्तोरिन परदा गे संगरा नना।
- 12 अना भईरो, अक्कुन ऐम निमन गोहरारदम, निम्है नू खिलपत चोदनर ती नलख नन्नर अरा निमन उर्बस नू कइहाब'अनर ती सिखाब'अनर, आरिन नीम मईन नन्नुम कला।
- 13 आर ही नलख चड्डे आरिन चोन्हा नना ती आरिन कोइहे मईन जोगे अख'आ। अरा ओर्त ओर्त गने कोड़े ती मेस'आ ती उज्जा।
- 14 अना भईरो, ऐम निमन गोहरारदम, लंडी र'अनर आरिन चेताब'आ। हेन्दवारका आलर गे डिढ चि'आ। पयहारिन सम्इह'आ। ओर्मर गने सह'आ ती र'आ।
- 15 अरा मलदौ नन्नर आर गे ने हूँ मलदौ अमा नना। लिकिन सदौ ओर्त ओर्त गने अरा ओर्मर संगे दौ नना गे तिहा नना।
- 16 सदौ रिझ'आ।
- 17 गोहरारनन अमा अटक'आ।
- 18 उर्मी दसा नू धन्यवाद नना। एन्देरगेका निमा गे मसी येसुस नू धर्मसी मने इदिम र'ई।




- 19 नेम्हा बोलतासी नलखन अमके छँका मना।
- 20 धर्मेसी कत्था तिंगुर ही कत्थन अयलह'आ अमा अख'आ।
- 21 लिकिन उर्मी कत्था गुट्ठिन अरा नलखन बिढ़'आ ती ऐरा। एकदा बेस लग्गो अदिन इंझ'आ अरा धर'आ।
- 22 उर्मी रकम ही मलदौ ती तरकूटी र'आ।
- 23 अक्कु कोड़े चिऊ धर्मेस दिम निमन उर्मी तरा नेम्हा नन्दस नेकअन। अरा नम्है उर्बेस येसु मसीसी किर्ना बेड़ा गूटी नम्है बोलता अरा जिया अरा मेद दौ गने अरा बिगर बदी ही र'अन नेकअन।
- 24 निमन मीखू धर्मेस मानिम हिकदस। आस अन्नेम ननोस।
- 25 भईरो, एमा गे गोहरार'आ।
- 26 उर्मी भईरिन नेम्हा चोंखना गने मोंजरा नना।
- 27 ऐन उर्बासी मुन्द निंगन पेसदन ई चिठिन उर्मी भईरिन पड़के ती मेन्त'अके।
- 28 नम्है उर्बेस येसु मसीसी मया निम्है गने मनन नेकअन। आमेन।



2 थेस्सलोनिकेयर

2 थेस्सलोनिकेयर 1

- 1 ई चिठी ऐन पौलुस अरा सीलास अरा तीमोथियुस तरती नम्है धर्म बंगस अरा उर्बस येसु मसीस नू र'ऊ थेस्सलोनीके कलीसिया गे रई।
- 2 नम्है धर्म बंगस अरा उर्बस येसु मसीस ती निमा मया अरा कोड़े खक्ख'अन नेकअन।
- 3 अना भईरो, एमा निमा गे सगरो धर्मसिन धन्यवाद चि'अना रई। आदिम दौ रई। एन्देरगेका निम्है पत्त'अना अउरिम परदा लगी, अदही गने निम्है चोन्हा ओर्त ओर्त नू रई आद परदा लगी।
- 4 लिकिन निमा बरचकी रई आ सस्ती अरा खिलपत बेड़ा नू सहना अरा पत्त'अना नू ऐम फुलई मन्दम। अरा निम्है पत्त नू धर्मसी नन्ना कलीसिया गुट्ठी संगे कछनरदम।
- 5 धर्मस मानिम ती नैवई नन्ना ही ईद गोवाह हवे। नीम धर्मसी राजी गे जोगे मना गे आस बेददस, अदगे नीम सस्ती हूँ सारदर।
- 6 धर्मस उजगो र'अदस का आस नै निमन सस्ती नन्नर आर गे सस्ती चि'ओस।
- 7 अरा सस्ती नू र'अदर निमा गे आस खन्न ऐखना ही खंजपा चि'ओस। अन्नेम आस एमा हूँ चि'ओस। उर्बा येसुस तंग्हे सवंगिय मेर्खा पैकर गने लघना चिच्ची गने मेर्खा ती दहदर मन्ना बेड़ा नू ईद मनो।
- 8 आ बेड़ा नू धर्मसिन मल चिन्हनर आरिन अरा नम्है येसु मसीसी दौ कत्थन मल पेस्रनर आरिन दंडे चि'ओस।
- 9 आर जनमजुग गे नठारना ही दंडे खक्खोर। आर उर्बासी मुन्दहारे ती अरा आसी सवंग ही महबा ती तरकूटी मनोर।
- 10 आसी महबा तंग्हे नेम्हा आलर नू ऐथ्र'ओ अरा तंगन पत्ताचका आलर ती हैकट मनोस, आसी बरना उल्ला ईद मनो। नीम हूँ आर ही गने मेस्र'ओर, एन्देरगेका ऐम निमन गोवाह चिक्कम अदिन पत्ताचकर।
- 11 ईदन सुरता ननरकी ऐम निमा गे सगरो गोहरारदम का नम्है धर्मस निमन तंग्हे मेखना ही जोगे सोचदस नेकअन, अरा निम्है उर्मी दौ मने अरा पत्त'अना ती उर्मी नलखन आसी सवंग ती पूरा नन्दस नेकअन।
- 12 ऐम इदन गोहरारदम आँगे नम्है उर्बा येसुसी नामे निम्है नू महबा मनन नेकअन अरा नीम आसी नू महबा मन्दर नेकअन। ई महबा नम्है धर्मस अरा उर्बस येसु मसीसी मया ती बरई।



2 थेस्सलोनिकेयर 2

- 1अना भईरो, अक्कु ऐम निमन नम्है उर्बस येसु मसीसी बरना ही बेड़ा नू एकासे तंग्हे संगे नमन खोंड़'ओस, इदही पत नू गोहरारदम।
- 2एकअम धर्मसी कत्था तिंगुर ही कत्था महले नन्नर ही कत्था महले चिठी एम्है तरती बरचा ब'अरकी, अइय्या "येसु मसीसी बरना अंडसकी रई" एन्ने लिखकी रई ब'अरकी ब'अनर होले हूँ अत्र इत्र अमके मना।
- 3नेकअम गे कटीकुना हूँ ठक'आ गे मोका अमके चि'आ, एन्देगेका धर्मसी बिड़दो नू कोहाँ हलहली मन्ना ही मुन्द अरा नठारना नू कालू नेग मलका ही आलस दहदर नन्ना ही मुन्द आ उर्बासी उल्ला मल बर'ओ।
- 4आस उर्मी देवता अरा आलर महबा नन्नर अबड़ा ओर्मा ती तंगन कोहाँ मन्दस ती अबड़ा ही बिड़दो नू मन्दस। आस धर्मसी मन्दिर नू धर्मस लेक्खा ओक्कदस ती तंगन धर्मस ऐद्ददस।
- 5ऐन निम्है संगे रहचकन खने, इबड़ा उर्मी कत्था ही पत नू तिंका रहचकन, आद निमा सुरता मलकी का?
- 6तंग्हे बेड़ा नू दहदर मना गे आसिन छेक'ई आद एन्दे रई अदिन नीम अखदर। आस गा तंग्हे बेड़ा नू तंग्हे ती दहदर मनोस।
- 7नेग मलका अक्कुन हूँ नूर्रा ती नलख ननी, अरा अदिन छिक'ऊ रई आद तरकूटी मल मन्ना गूटी दहदर मल मनो।
- 8होले आ नेग मलका दहदर मनो। लिकिन उर्बा येसुस तंग्हे बई ता सांस ती अदिन पिटोस अरा तंग्हे बरना नू तंग्हे लौकारना ती अदिन नठाब'ओस।
- 9आ नेग मलकासी बरना बेड़ा नू सैतान तंग्हे सवंगन अदगे चि'ओ। अत्रु कयनो रकम ही ठकना सवंग अरा चिन्हा दरा अजगुत नलख गुट्ठी एद'ओ।
- 10अरा आस नठार'उरिन उर्मी रकम ती छलक'ओस ती बोको ननोस। एन्देगेका आर मानिमन चोन्हा मल नन्नर एकदा आरिन नाड़ा ऊंगी।
- 11ई चड्डे धर्मस आरिन फोकर'आ गे अम्बियस चिचस। अदगे आर ठकना मइय्याँ असरा ननोर।
- 12ई लेक्खा मानी आबोन मल पत'अनर अरा मलदौ नलख नू रिङ्ग'ऊ आलर ओर्मर भगती मलका आलर लेक्खा दंडे खखोर।



13अना उर्बासी चोन्हा भईरो, एमा निम्है पत नू सगरो धर्मसी धन्यवाद चि'अना रई। एन्देरगेका निमन नाइर'आ गे हुल्लो ती धर्मस चज्जिकादस। नीम निमन नेम्हा ननू बोलता ती अरा मानिमन पत'अदर ती नाइरदर।

14धर्मस एम्है दौ कत्था ती नम्है उर्बस येसु मसीसी महबा नू मेस्र'आ गे निमन मीखियस।

15ओंगे भईरो, नीम बड़ियर मन्नुम कला अरा एम्है बई ती मँजका कत्था ती महले एम्है चिठी ती नीम सिखका र'अदर अदिन धर'आ।

16अक्कुन नम्है उर्बस येसु मसीस अरा नम्है धर्म बंगस नमन चोन्हा नंजस ती तंग्हे मया ती नमा सगरो जिया सालना अरा बेस असरा चिच्चस।

17आस निम्है जियन डिठ नन्दस अरा निमन उर्मी दौ नलख नू अरा ब'अना नू बड़ियर नन्दस नेकअन।

2 थेस्सलोनिकेयर 3

1अना भईरो! छेद्दे नू उर्बासी कत्था निम्है गुसन अंडसिया अन्नेम उर्मी अड्डा चाँइहे अंडसो मईन खक्ख'ओ अदगे एमा गे गोहरार'आ।

2अरा अउरिम गोहरार'आ का ऐम पपहा आलर अरा मलदौ आलर ती बछरनुम क'ओम, एन्देरगेका ओर्मर गा दौ कत्थन पत'ऊ मलनर।

3लिकिन उर्बस असरा जोगे र'अदस। आस निमा सवंग चि'ओस ती मलदौ आलो ती नाडोस।

4ऐम पेसकादम अबइन नीम नना लगदर फिन ननोर अन्नेम ऐम उर्बस ती असरा ननालदम।

5धर्मसी चोन्हा अरा मसीसी कयास ती उर्बस निम्है जियन कइहाब'अदस नेकअन।

6अना भईरो! अक्कु नम्है उर्बस येसु मसीसी आकुस ती ऐम निमन पेसदम का एका पत'ऊ आलर लंडी र'अनर अरा एम्है गुस्ते सिखका चाल लेक्खा मल नन्नर अरा मल ऐकनर आर ही ती तरकूटी र'आ।

7एन्देरगेका नीमिम अखदर का ऐम एकासे उज्जदम ऐकदम अन्ने निमा हूँ उज्जना ऐकना रई। अरा निम्है संगे र'अना बेड़ा नू लंडी मल मंजकम।

8नेख'आ गुसन हूँ ऐम सिथिया मंडी मल ओंडकम, ऐम उल्ला माखा कोइहे नलख नंजकम ती ओंडकम ती ऐम निमा नेका हूँ बोझा मल मंजकम।

9एन्ने सहाड़ा एमा निम्है ती हो'अना ही अदिया मलकी अन्ने मला। लिकिन ऐम निम्है मुन्दहारे नीम अन्ने नना गे चिन्हा उइय्या बेद्दा लिक्कम।



- 10 एन्देरगेका ऐम निम्है मझी नू रहचकम खने, ऐम निमन पेसका रहचकम अन्नेम, “एकअम ओर्तस नलख मल ननोस होले, आस अम्बोस ओना।”
- 11 निम्है मझी नू जोक्क आलर लंडी र'अनर अन्ने मँजकम। आर एकअम बेसे नलख मल नन्नर, लिकिन नन्नर ही नलख नू नूतनर अरा अनभनियाँ नलख नू मेस्रकानर।
- 12 एन्ने आलर दौ गने उज्जना र'ई अरा तमा ओना गे तमा गोम नलख नन्ना र'ई, अन्नेम ऐम उर्बस येसु मसीस ती पेसदम अरा रिझ्त'अदम।
- 13 लिकिन भईरो, नीम दौ नलख नना गे जियन अमा हदिय'आ।
- 14 एकअम ओर्तस ई चिठी नू लिखकी र'ई अदिन मल पेस्रदस होले आसिन ऐरनुम र'आ। अरा आसी गने अमा मेस्र'आ का आस ई चड्डे लज्जे मोस्र'ओस।
- 15 अन्नू हूँ आसिन बैरी लेक्खा अमके सोच'आ। लिकिन भई अख'आ ती चेताब'आ।
- 16 अक्कुन कोड़े ही उर्बस तानिम निमा उर्मी बेड़ा उर्मी रकम ही कोड़े चि'अत र'अदस नेकअन। उर्बस निम्है ओर्मर संगे र'अदस नेकअन।
- 17 ऐन पौलुस एंग्हे खेक्खा ती मोंजरा लिखदन। एंग्हे उर्मी चिठी नू ईद दिम चिन्हा र'ई, ईद एंग्हे लिखचका हवे।
- 18 नम्है उर्बस येसु मसीसी मया निम्है ओर्मर गने र'अन नेकअन। आमेन।



1 तीमोथियुस

1 तीमोथियुस 1

- 1 नम्हें बछाब'ऊ धर्मस अरा नम्हें पाब ऐरना ही मूली मसी येसुसी पेसका लेक्खा मसी येसुसी तइरकन ऐन पौलुस हिकदन।
- 2 पत'अना नू एंम्हें मानिम खद्दस तीमोथियुस गे इदिन लिखदन। धर्म बंगस, अरा नम्हें उर्बा मसी येसुस तरती निंगा मया अरा सोग्गे अरा कोड़े खक्खर'अन नेकअन।
- 3 ऐन मकेदोनिया जिला कालो बारी निंगन आनकाचकन, अन्नेम नीन इफेसुस नगरे नू ओकर'आ। अइय्या जोक्क आलर बिइदो सिखाब'आलनर, आरिन अक्कु ती एन्ने अमा सिखाब'आ गे आना।
- 4 अरा तेंगना खीरी गुट्ठी नू अरा मल मुंजना खुटी गुट्ठी नू तंम्हें बेइन अनभनियाँ मुंजनन अम्बा गे आना। इत्रु ती आनानखरना गुट्ठी लेका मनी, अरा धर्मस नू आलर गे पत'अना ही उज्जना उज्जा गे संगरा मल मनी।
- 5 इबड़ा आनका ही चड्डे चोन्हा दिम हवे। ई चोन्हा निमन जिया अरा दौ लखना अरा बड़ियर पत'अना ती दिम बर'ई।
- 6 लिकिन जोक्क आलर इदिन अम्बियर ती अनभनियाँ कछनखरना गुट्ठी नू एबसकानर।
- 7 आर मूसासी नेग सिखाब'ऊ मना बेददनर। लिकिन आर एकदा ही पत नू ब'अनर अदिन बलनर, अन्नु हूँ बड़ियर लगे ब'अनर।
- 8 नाम अखदत का नेकईम नेग आबोन मानिम गने सिखाब'ई होले, आद दौ हवे।
- 9 नाम अउरिम अखदत का नेग उजगो आलर गे मला, नेग ही बिइदो ननुर गे दिम नेग कमकी र'ई। ईद मल पेस'ऊर, महबा मलकर, पपहर, नेम्हा मलकर, सोतरर, बंग पिटुर, अयंग पिटुर, आल पिटुर,
- 10 नन्ना आली गुसन कालुर, पुरुसगामिर, आल बीसुर, ठक'उर, ठकना किरया मूखुर, अरा दौ सिखाब'अना ही बिइदो नू एन्देर एन्देर र'ई अबइन ऐद'आ गे दिम कमकी र'ई।
- 11 ई दौ सिखाब'अना उर्मी ती धन्य धर्मसी महबा ही दौ कथा ती बर'ई, एकदा एंगा सोंपरकी र'ई।
- 12 ऐन नम्हें उर्बा मसी येसुस गे धन्यवाद चि'अदन, एन्देरगेका आसिम एंगा सवंग चि'अरकी एंगन पत'अना जोगे ब'अरकी तंम्हें नलख नू उइय्यस।



- 13 ऐन गा मुन्द मसीसिन हींइ'ऊ, अरा आसी आलारिन सताब'ऊ, अरा कइ'ऊ रहचकन। अन्नु हों धर्मस एंग्हे मइय्याँ सोग्गे ईरियस, एन्देरगेका ऐन मल पत'अना अरा बलना ती इबड़ा नलखन नंजकाचकन।
- 14 नम्है उर्बासी मया गा एंग्हे मइय्याँ कोइहे ती कोइहे मंजा अरा अदही संगे मसी येसुस नू र'ई आ पत'अना अरा चोन्हा चीतारा।
- 15 ऐन एन्देर ब'अदन आद मानी दिम, निमा अदिन मनना र'ई, का मसी येसुस पपहारिन नाड़ा गे खेखेल नू बरचस, अबड़ा उर्मीर ती कोहाँ पपहा आलन ऐन हिकदन।
- 16 लिकिन एंग्हे मइय्याँ इदगे सोग्गे मंजा का ऐन उर्मी ती कोहाँ पापहा आलन नू येसु मसीस तंग्हे उर्मी कयास आबोन ऐदस। एन्देरगेका एका ओर्तर उर्बा येसुस नू पत'अनर ती जनमजुग ही उज्जना खक्खनर आर गे आस कोइहे कयास ऐद'ओस, आर गे ऐन ओन्टा चिन्हा मंजकन।
- 17 सदौ राजी ननू बेलस, मल बुइर'ऊ, मल ईथ्र'ऊ, ओन्टे लेका धर्मसी मईन अरा महबा सदौ सदौ मनन नेकअन। आमेन।
- 18 अना तीमोथियुस एंग्हे खद्द, मुन्द निंग्हे पत नू तिका धर्मसी कत्था लेक्खा ऐन निंगन तिगाब'अदन। नीन इदिन सुरता नना अरा इदिन पेस्र'आ ती बेस लगे नना, एकासे बेस सैनस तंग्हे लड़ाइन लइदस।
- 19 अरा नीन उर्मी बेड़ा धर्मसिन पत'आ अरा एकदन सुपट अखदय अदिन नना। जोक्क आलर गा एकदन सुपट अखनर अदिन ताड़ना ती कोहाँ डोंगा चटड़ी नू ढोसना लेक्खा धर्मस ती तम्है पत'अनन नठाबाचर।
- 20 अबइर नू हूमेनयुस अरा अलेक्सन्द्रस हूँ र'अनर। आरिन ऐन सैतान ही सवंग नू सोंपचकन चिच्चकन का अत्रु ती आर तम्है मलदौ नलखन अख'ओर ती धर्मसी बिड़दो ब'अनन अम्बोर।

1 तीमोथियुस 2

- 1 उर्मिन्ती मुन्द ऐन निंगन अरा अय्या ता पत'ऊ आलारिन आनदन का ओर्मा आलर गे बिन्ती नना। अरा आर गे धर्मस ती संगरा ने'आ अरा गोहरार'आ अरा धन्यबाद नना।
- 2 बेलर अरा आकुस नू र'उर गे बिन्ती नना, इदगेका नाम महबा अरा मईन ती खन्न ऐखना अरा सल्ल गने उज्जोत।
- 3 ईद दौ लग्गी अरा नम्है बछाब'ऊ धर्मसी मने हूँ र'ई।
- 4 आस उर्मी आलारिन नाड़ा गे अरा मानिम आबोन बेस लगे बुइर'आ गे बेद्ददस।



- 5 एन्देरगेका धर्मस ओन्टे लेका र'अदस। धर्मस अरा आलर ही मझी नू ओन्टे कुना मेसाब'ऊ र'अदस। आ आलस मसी येसुस दिम हिकदस।
- 6 आस तंगन ओर्मा आलारिन नाइरना ही दामे नू चिच्चस, ई कत्था दिम धर्मस ती आलर गे ठौका बेड़ा नू चितारा।
- 7 ने यहूदी मलनर आरिन ई पत्त'अनन अरा मानिम कत्थन सिखाब'आ गे ऐन दौ कत्था तिगू अरा तइरका चजरकादन। ऐन जुक्की ती बग्गे मल ब'अदन, मानिम ब'अदन।
- 8 ऐन बेद्ददन का धर्मसिन ओहमा नन्ना उर्मी अड्डा नू मैतर गे नेम्हा उज्जना ती बिगर कैर-कुसर अरा नग्गा नखरना ती खेक्खा गुट्ठिन चोदना ती बिन्ती नन्ना र'ई।
- 9 अन्नेम मुक्कर इल्चका लज्जे ती दौ गने दौले अतरकुन्दर'अर सिंगरारनर नेकअन। चुट्टी बिनयारना अरा सोना मोती गुट्ठी अरा बग्गे दामी किचरी गुट्ठी ती सिंगरारना मला।
- 10 लिकिन धर्मसिन मानिम गने ओहमा महबा ननू मुक्कर बेसे बेस नलख गुट्ठी ती तमन सिंगर'अना र'ई।
- 11 मुक्का गे कलेकसे गोट्टा आकुस ती सिखना र'ई।
- 12 ऐन आनदन का मुक्का अम्बो सिखाब'आ अरा मैतस मइय्याँ आकुस अम्बो नना, लिकिन कलेकसे ती मिनी नेकअन।
- 13 एन्देरगेका आदमस मुन्द अरा हवा खोखा कमतारा।
- 14 अरा आदमस सैतान ती मल्ला ठकरका, मुक्का गा ठकरा ती पपही मंजा।
- 15 अन्नु हों मुक्कर पत्त'अना, चोन्हा अरा नेम्हा नू बड़ियर मन्नुम र'ओर होले, आर खद्द पाकना चड्डे नाइर'ओर।

1 तीमोथियुस 3

- 1 ई कत्था मानिम र'ई का एका ओर्तस कलीसिया ही ईरू-खूजू मुद्धस मना बेद्ददस, आस दौ नलख गे मने नन्दस।
- 2 औंगे कलीसिया ही ईरू-खूजू मुद्धासी उज्जना बिज्जना उजगो मन्ना र'ई। अरा आस ओन्टे लेका मुक्का उइय्युस अरा चिह्क, अरा मईन जोगे आल, अरा पाही ईरू अरा सिखाब'आ ऊंगू र'अना र'ई।
- 3 आस उंखुस अरा पस'ऊ कूडू अम्बोस र'आ। लिकिन आस लुदऊ र'अना र'ई। आस नग्गानख'ऊ अरा ढिबा ही चिबाखार'ऊ अम्बोस र'आ।



- 4आस गे तंगहै एइपा पलीन बेस गने कइहाब'उस र'अना र'ई। अरा आसी खद्द-खर्रा आसिन मईन ननू अरा पेस'ऊ र'अना र'ई।
- 5ओन्टा आलस तंगहै एइपा पली ही दिम कइहाब'आ बलदस होले, आस धर्मसी खोंइहन एकासे कइहाब'आ ओंगोस?
- 6कलीसिया ही ईरू-खूजू मुद्धस पुना पत'उस अम्बोस र'आ। एन्ने होले आस मोठई मनोस ती सैतान गे खक्खका दंडे बेसे खक्खोस।
- 7आस सौंसरिहर नू हूँ बेस नामे खक्खका आलस मन्ना र'ई। ओंगे आस निन्दा खक्खकी सैतान ही फंदा नू मल खत्र'ओस।
- 8एन्नेम कलीसिया ही ईरू-खूजुर हूँ मईन ही जोगे र'अना र'ई। अरा आर उंखुर अरा आलारिन ठगना ती अर्ज'उर अम्बोर र'आ।
- 9अरा आर पत'अना ही मानिम गइडी आबोन निमन लखना ती सम्इ'ऊ उइयुर र'अना र'ई।
- 10आरिन ईरू-खूजू उइयना ती मुन्द बिदना मनो। आर ओक्कना इजना नू बिगर बदी ही मनोर होले, आर ईरू-खूजू मन्नर नेकअन।
- 11एन्नेम आर ही मुक्कर हूँ मईन ही जोगे र'अना र'ई। अरा आर दुस'ऊ अम्बोर र'आ। अरा आर चिहुंक अरा उर्मी कत्था नू पत'ऊ मन्नर नेकअन।
- 12कलीसिया ही ईरू-खूजुर ओन्टे लेका मुक्का उइयुर मन्नर नेकअन। आर तम्है खद्द-खर्रा अरा एइपा पलीन बेस लगे ऐरा खोजा उंगू मन्नर नेकअन।
- 13एका ओर्तर ईरू-खूजू नलखन बेस लगे नन्नर, आर आलर ती मईन गने दौ खंजपा खक्खोर। अरा आर मसी येसुस नू पत'अना नू बग्गे डिढ मनोर।
- 14ऐन निंगहै गुसन चाँइहे बरना ही असरा नन्दन। अन्नु हों इबड़ा कत्थन निंगा लिख'आलदन
- 15एन्देरगेका एंगहै बरना नू घइही मनो होले, नीन अख'ओय का आलर गे धर्मसी एइपातर नू एकासे उज्जना र'ई, आ एइपातर दिम उज्जना धर्मसी कलीसिया हवे। ई कलीसिया दिम मानिम सिखाब'अना ही खुटा अरा नेव हवे।
- 16ओर्मर अखनर का महबा ही गम नगदे कोहाँ र'ई। धर्मस आल कया नू तान ऐथरस अरा नेम्हा बोलतस ती आस धर्मसी खद्दस एन्ने इजताचस अरा मेर्खा पैकर हूँ आसिन ईरियर। आस यहूदी मलनर आ जातियर नू मेन्तारस। अरा आस सौंसे खेखेल ता आलर ती पततारस अरा आस मेर्खा नू चोतारस।



1 तीमोथियुस 4

- 1 अक्कु नेम्हा बोलतस सुपट तेंगदस का छेददे बेड़ा गुट्ठी नू जोक्क आलर मानिम पत'अना ती बेहड़ार'ओर क'ओर। अरा आर ठक'ऊ बोलता अरा नाद ही सिखाब'अना नू ऐकोर।
- 2 ईर उतुरमाडू अरा ठक'ऊ आलर हिकनर। अरा आर ही लखना मल्ला उज्जना।
- 3 आर “अम्बोत बेंज्र'आ अरा जोक्क जिनिस गुट्ठिन हूँ अम्बोत ओना मोखा” एन्ने ब'ओर। धर्मस गा अबड़ा ओन्ना-मोखना गुट्ठिन इदगे गढ़चस का मानिम आबोन अख'ऊ पत'ऊ आलर अबड़न धन्यवाद गने ओनोर मोखोर।
- 4 धर्मसी गढ़चका उर्मी जिनिस दौ र'ई। एका जिनिस हों दोसना जोगे मलकी। उर्मी जिनिसन धन्यवाद गने इंझना र'ई
- 5 एन्देरगेका धर्मसी कत्था अरा बिन्ती ती आद नेम्हा मनी।
- 6 नीन भइयोरिन इबड़ा कत्थन सिखाब'ओय होले, नीन पेसका पत'अना ही मानिम नू अरा दौ सिखाब'अना नू बड़ियर मंजका मसी येसुसी बेस जोंखय मनोय।
- 7 लिकिन नीन महबा मलका खीरी अरा तेंगना खीरी गुट्ठी ती तरकूटी र'आ। अरा निंगन महबा उज्जना उज्जा गे हेबाब'आ।
- 8 कया ही हेबाब'अना ती जुक्कि धार'ई, लिकिन महबा उर्मी कत्था नू धार'ई। ईद खेखेल ता अरा जनमजुग ता उज्जनन गच्छर'ई।
- 9 एंग्हे ब'अना ई कत्था मानिम जोगे र'ई, इदिन ओर्मर गे इंझना मनो।
- 10 ओर्मर गे कोइहे गा आसिन पत'उर गे बछाब'ऊ उज्जना धर्मस मइय्याँ नम्है असरा र'ई। इदगेम नाम चिहुट अरा तिहा नन्तेम र'अदत।
- 11 इबड़ा कत्थन नीन आरिन सिखाब'आ ती पेस'आ।
- 12 नीन जोंखय र'अदय, औंगे नेका हूँ निंगन दुस'आ अमके चि'आ। लिकिन निंग्हे ब'अना, अरा उज्जना ओक्कना, अरा चोन्हा, अरा पत'अना, अरा नेम्हा उज्जना नू पत'उर गे नीन चिन्हा मना।
- 13 एंग्हे बरना गूटी नीन कलीसिया नू धरम पुथी पढ़ना, कत्था तेंगना अरा सिखाब'अना नू लक्का र'आ।
- 14 कलीसिया ही सेयान आलर निंग्हे मइय्याँ तम्है खेक्खन उइय्यो बारी धर्मस ती निंग्हे खक्खका सवंग आबोन अमा खॉइ'आ।



15 इबड़ा कत्था गुट्ठिन मने नना अरा इय्यम निंगन सोंपचका र'आ, होले ओर्मर निंगहै परदन्न ऐरोर।

16 निंगहै उज्जना अरा सिखाब'अना नू चिहूंक र'आ। एन्ने नीन नन्ते र'ओय होले निंगन अरा निंगहै कत्थन मिनू आलारिन हूँ नाइना ही ओदहा मनोय।

1 तीमोथियुस 5

1 पचगी आलासिन कैर ती अमा आना लिकिन बंगस बेसे मईन नन'अरकी सलहा चि'आ। अरा जोंखारिन निंगहै भई बेसे नना।

2 अरा पचो मुक्कारिन निंगहै अयंग बेसे नना, अरा पेल्लो मुक्कारिन सोंसे निमन गने निंगहै बहिन बेसे नना।

3 रड़ियाहीर नू नेखा संगरा ननू ने हूँ मलकर आर गे संगरा नना।

4 लिकिन एका रड़ियाही ही खद्द-खर्ना महले नती नतकुर र'अनर होले, आर मुन्द तम्है खोतन खापोर ती महबा नना गे सिखनर नेकअन। एन्ने आर तम्है अयंग बंगर अरा अज्जी अज्जोर गे एन्देर नन्ना र'ई अदन नन्नर नेकअन। एन्देरगेका ईदिम धर्मस गे दौ लग्गी।

5 एका रड़ियाही मानिम नू संगरा ही जोगे र'ई अरा तान लेका र'ई, होले आद धर्मस मइय्याँ असरा उइय्यी अरा उल्ला माखा ने'अना अरा गोहरारना नू बुथरकी र'ई।

6 लिकिन एका रड़ियाही खेखेल ता सुख-सौरतन पतार'ई होले, आद उज्जनुम उज्जनुम किच्चकी र'ई।

7 कलीसिया गे इबड़ा कत्था गुट्ठिन हों पेस'आ का आर बदी मल खत्र'ओर।

8 लिकिन ने तंगहै पाहियर ही अरा कोइहे तंगहै एइपातर गे संगरा मल नन्दस होले, आस पत्त'अना ती नटरकादस। अरा आस मल पत्त'ऊ आलर ती हों मलदौ र'अस।

9 एका रड़ियाही ही बछर साठ ती बग्गे र'ओ अरा ओन्टे लेका मैतस ही मुक्का रहचकी र'ओ, होले दिम आद ही नामेन रड़ियाहीर ही सूची नू अरगके।

10 अरा आद दौ नलख गुट्ठी ती बेस नामे खक्खकी र'ऊ आली मन्ना र'ई। एकाद खद्द-खर्न पूसकी र'ओ, अरा पाहियर ही तेतर-सुसर नंजकी र'ओ, अरा नेम्हा आलर ही खेइडेन नूइकी र'ओ, अरा दुक्खे सार'ऊ आलर ही सहाड़ा नंजकी र'ओ, अरा उर्मी दौ नलख नू मने नंजकी र'ओ अन्ने आली मन्ना र'ई।



- 11 लिकिन ई सूची नू पेल्लो रड़ियाहीर ही नामे अमके अरग'आ। एन्देरगेका आर ही सौंसार ही सुख-सौरत मसीसिन मनना ती कोइहे मनी, खने आर बेंज्र'आ बेद्दनर।
- 12 तहाँ आर तम्है मुन्द ता गच्छरकन ताड़ना ती पपही मन्नर।
- 13 इदही गने आर लंडी मना हेभ्रनर। अरा एड़पा एड़पा जलिय'आ कुद्दनर, अरा नन्नर ही नलख नू नूता बेद्दनर, अरा एका कत्थन मल कछनखना र'ई अदिन कछनखनर।
- 14 औंगे ऐन बेद्दन का इबड़ा पेल्लो रड़ियाहिर बेंज्र'ओर अरा खद्द पाकोर, अरा तम्है एड़पा-पलीन सम्हड़'ओर। होले बैरिर नम्है बिड़दो नू एन्देर हूँ ब'आ पोल्लो।
- 15 जोक्क पेल्लो रड़ियाहिर गा बहकारर ती सैतान ही खोखा इक्कियर।
- 16 एकअम पत्त'ऊ आली ही एड़पा नू रड़ियाहिर र'अनर होले, आदिम आरिन ऐरो खोजो। ई बोझा आबोन कलीसिया नू अम्बो नना। एन्देरगेका एका रड़ियाहीर मानिम नू संगरा जोगे र'अनर आर गे कलीसिया संगरा नना ऊंगी।
- 17 कलीसियन दौ गने ऐरनर खोजनर आ सेयान आलर गे दुई गुना मईन नन्ना र'ई। कोइहे गा कत्थन मेन्त'ऊ अरा सिखाब'ऊ सेयान आलारिन अन्ने नन्ना र'ई।
- 18 एन्देरगेका धरम पुथी ब'ई, “दौरी नाबना अड्डो ही बइय्यन अमके मूढ'आ, बनी ननुर बनी खक्खना जोगे र'अनर। “
- 19 एकअम सेयान आलस मइय्याँ इन्द्रिइम बदी ठेकाबातार'ई होले, बिगर दुई महले तीन गोवाह ती अदिन अमके पत्त'आ।
- 20 लिकिन एकअम सेयान आलर पाप ननतेम र'ओर होले, ओर्मर ही मुन्दहारे आरिन बुझाब'अके। होले इत्रु नन्नर हूँ एल्चोर।
- 21 धर्मस अरा मसी येसुस अरा चज्जिका मेर्खा पैकर ही मुन्दहारे ऐन निंगन तिगाब'अदन का नीन जियन तिसग'अर इबड़ा कत्था गुट्ठिन मनके, अरा एकअम नलखन भितरी बहरी अमके नना।
- 22 तिरीं बिरीं नू नेकअनिम सेयान अमके उइय्या। अरा नन्नर ही पाप गुट्ठी ही बटा अमके मना। नीन निंगन निमन उइय्ये।
- 23 नीन अम्म लेका अमके ओना, लिकिन निंगहै कूल कोड़े र'आ गे अरा घड़ी घड़ी बेमार खत्तरना चड्डे कटी कटी अंगुर रासी ओनके।



24 जोक्क जोक्क आलर ही पाप बिदूना बेड़ा ही मुन्दुम सेब्बा ती ईथरई। लिकिन जोक्क आलर ही पाप बिदूना बेड़ा ही खोखा दिम ईथरई।

25 अन्नेम जोक्क जोक्क आलर ही बेस नलख गुट्ठी सेब्बा ती ईथरई, लिकिन जोक्क आलर बेस नलख गुट्ठिन ऐथ्रना बेसे मल नन्नर, आद हूँ उन्दुल ईथरई दिम।

1 तीमोथियुस 6

1 उर्मी बिट्ठी ननू जौंखर गे तम्है तम्है उर्बर ही कोड़हे मईन मरजात नन्ना रई। होले नेकईम धर्मसी नामे अरा नम्है सिखाब'अना ही बिड़दो नू मल ब'ओर।

2 अरा पत'ऊ उर्बर ही किड़य्या ता बिट्ठी ननू जौंखर तम्है उर्बर पत'ऊ र'अना चड्डे आरिन जुक्किम मईन अम्बोर नना। आर गे अउर हूँ बग्गे मईन मरजात नन्ना रई। एन्देरगेका आर पत'ऊ आलारिन संगरा अरा चोन्हा नन्नर। इबड़ा कत्थन नीन कलीसियन सिखाब'आ अरा बुझाब'आ।

3 एकअम आलस नन्ना रकम ही सिखाब'अना आबोन सिखाब'अदस अरा येसु मसीसी मानिम सिखाब'अना अरा धर्मसिन सुसर नना गे मानिम इहरेन ईद'ऊ सिखाब'अना ही बिड़दो र'अदस होले,

4 आस इतरारस केरस अरा एन्दरन हों बलदस। आस गे लौचनखरना अरा कत्थन आनानखरना ही रोगे रई। एकत्रु कैर कुचर, लौचनखरना, निंदा बदी कत्था, मलदौ दोखना, सटना तुन्ना,

5 अरा रेन्द नग्गानखरना नन्तेम र'अना मनी। एन्ने आर ही बुधी बगड़ारकी किरकी रई। अरा आर मानी ती खत्रका केरका र'अनर। आर घोकनर का महबा अर्ज'अना ही इहरे।

6 लिकिन नम्है गुसन ऐ बग्गे रई आरुनुम जिया बुधरई, होले महबा नमन उरुब ननी।

7 नाम खेखेल नू एन्द्रा हों मल्ला ओन्द्रका अरा एन्द्रन हों होआ ती काला पोलदत।

8 औंगे नम्है गुसन ओन्ना-मोखना अरा अतना-कुन्द्रना रई होले, इबड़ा तिम नाम जिया बोधाब'ओत।

9 लिकिन ने उरुब मना बेददनर आर एन्ने बिदूना अरा फंदा अनभनियाँ अरा बगड़ारना चिबाखारना नू बझरनर। एकदा आलारिन बगड़ई चिई अरा बुडरना ही समुदर नू मूलखई चिई।

10 एन्देरगेका ढिबा ही चिबाखारना तिम उर्मी मदहे ही मलदौ गुट्ठी उरखी। जोक्क आलर बग्गे ढिबा खक्खना ही तिहा-तौरा नन्नुम आर पत'अना इहरे ती एबस्रनर ती कैनो मदहे ही दुक्खे गुट्ठी ती ताम तमानिम दुक्खे सारत'अनर।



- 11 लिकिन अना तिमोथियु, धर्मसी आलायो, नीन इबड़ा उर्मी कल्था ती तरकूटी र'आ, अरा मानिम इहरे नू उजगो ऐका, अरा महबा, पत'अना, चोन्हा, सहेलहे अरा लुदऊ जिया नन्ना नूर'आ।
- 12 एकासे बेस सैनस तंग्हे लड़ाइन लड़दस अन्ने नीन पत'अना ही दौ अरबानखर'आ अरा जनमजुग ही उज्जनन धर'आ। इदगेम नीन मेखरकादय, अरा बग्गे गोवाह आलर ही मुन्दहारे निंग्हे पत'अनन बेस ऐदकादय।
- 13 ओर्मर गे उज्जना चि'ऊ धर्मसी अरा पोलित्यु पिलातुसी मुन्दहारे तंग्हे बेस गोवाह चिच्का मसी येसुसी मुन्दहारे ऐन निंगा गे जिमा चि'अदन।
- 14 नीन नम्है उर्बस येसु मसीसी अउर दहदर मन्ना गूटी ई आननन निमन अरा बिगर बदी ही उइय्या।
- 15 धर्मस दिम ठौका बेड़ा नू येसुसिन दहदर ननोस। धर्मस दिम ओहमा ही जोगे ओन्टे राजी ननू र'अदस। अरा आस बेलर ही बेलस अरा उर्बर ही उर्बस हिकदस।
- 16 मल खि'ऊ आसिम हिकदस। आसदिम सगरो उज्जू र'अदस। आस अकय कोइहे बिल्ली नू र'अदस। आसिन ने हूँ मल्ला ईरका अरा इकलअम हूँ ऐरा पोलनर। आस गेम ओहमा अरा पया हुल्लो ती हुल्लो गूटी र'अन नेकअन। आमेन।
- 17 ई खेखेल ता उरुब आलारिन पेस'आ का आर अम्बोर इतरार'आ, अरा नठारना खुर्जी मइय्याँ असरा अम्बोर नना। लिकिन आर गे नम्है सुक्ख गे उर्मीन बग्गे ती बग्गे चि'ऊ धर्मस मइय्याँ असरा नन्ना मनो।
- 18 अरा आरिन तेंगा का आर गे तंग्हे खुर्जिन दौ नलख नू बउर'अना र'ई, अरा दौ नलख गुट्ठी नू उरुब मन्ना र'ई। अरा चाड़ र'ऊ आलर गे मुट्ठी बिछर'अरकी चि'आ गे अरा सौंसे जिया ती तम्है खुर्जिन खट्टा गे सपड़ारका र'अना र'ई।
- 19 एन्ने नन्ना ती आर तम्है खुर्जिन मेर्खा नू बछाब'अनर ती उइय्यनर अरा तम्है बरना उल्ला गे बड़ियर नेव उइय्यनर। इत्रु आर मानिम उज्जनन तम्है आकुस नू नन्नर।
- 20 अना तीमोथियुस धर्मस निंगा सौंपचकादस अदन खापा। अरा महबा मलका ब'अनन अरा एकाद लूर मल्ला अदिन लूर ब'अरकी मलदौ कछनख्रना ती तरकूटी र'आ।
- 21 जोक्क आलर इदन पत'अरकी मानिम ही पत'अना ती बेहड़ारका केरकानर। निंगा गे मया मनन नेकअन। आमेन।



2 तीमोथियुस

2 तीमोथियुस 1

- 1 ऐन पौलुस, धर्मसी चीता बुता ती मसी येसुसी तइरकन। धर्मस एंगन मसी येसुस नू जनमजुग उज्जना ही गच्छरका ही पत्त नू तेंगा गे तइय्यस।
- 2 एंगहै चोन्हा खद्दस तीमोथियुस गे लिखदन। धर्म बबस अरा नम्है उर्बस मसी येसुस ती निंगा मया अरा सोग्गे अरा कोड़े खक्खरई नेकअन।
- 3 ऐन निंगा गे धर्मसिन धन्यवाद चि'अदन। ऐन धर्मसिन निमन लखना गने महबा नन्दन, एन्नेम एंगहै पूरखर हूँ नंजर। ऐन सगरु उल्ला दरा माखा बिन्ती नू निंगन सोचदन।
- 4 अरा ऐन निंगहै गने भेंट मनरकी खुसमार'आ गे बेद्ददन। अरा इकला नाम छिन्डरकत खने ता निंगहै खनजलखोन सोचदन।
- 5 अरा ऐन निंगहै मानिम पत्त'अनन सोचदन, एकदा मुन्द निंग अज्जी लोइस, अरा निंग्यो युनीके नू रहचा। आ पत्त'अना निंगहै नू हों रई।
- 6 ऐन निंगन सोचत'अदन का ऐन निंगहै मइय्याँ खेक्खा उइय्यो बारी धर्मस ती निंगा खक्खरका सवंग आबोन बेस बड़ियर लगे बउर'आ।
- 7 एन्देरगेका धर्मस एल्चना चि'ऊ बोलतन मला लिकिन सवंग अरा चोन्हा अरा कयास चि'ऊ नेम्हा बोलतासिन चिच्कादस।
- 8 ओंगे नम्है उर्बासी पत्त नू आलारिन तेंगा गे अमा एल्चा। अरा ऐन आसी दौ कत्था तेंगना ती जेहेल नू र'अदन, ई चड्डे नीन अमा एल्चा। लिकिन धर्मसी सवंग ती दौ कत्था गे एंगहै गने दुक्खे चोद'आ गे सपड़ार'आ।
- 9 धर्मस दिम नमन नाड़ियस ती नेम्हा उज्जा गे मीखकादस। आस इदन नम्है नलख ती मला लिकिन आसी चीता बूता अरा मया ती चिच्चस। ई मया ओइ ती मुन्द मसी येसुस ती नमा गे मंजकी रई।
- 10 लिकिन अक्कु नम्है बछाब'ऊ मसी येसुसी दहदर मन्ना ती ई मया आबोन ऐदस, ने खे'अना ही सवंग आबोन नठाबाचस, अरा दौ कत्था ती उज्जना अरा कया मल नठारनन ऐदस।
- 11 ई दौ कत्था गे ऐन दौ कत्था तिगू, तइरका अरा सिखाब'ऊ उइरकन।
- 12 ओंगेम ऐन ई दुक्खेन हों चोद्दन, लिकिन मल एल्चदन। एन्देरगेका नेकन ऐन पत्त'अदन अदन अखदन। एंगा असरा रई का आस एंगहै नलखन रायबड़ी उल्ला गूटी खापा ओंगदस।



- 13 एका बड़ियर कत्था गुट्ठिन नीन एंग्हे ती मैजकादय, अदिन मसी येसुस नूर ई आ पत'अना अरा चोन्हा गने निंग्हे चिन्हा कम'आ ती उड़य्या।
- 14 निंगा पत'अना ती चिच्का बेस कत्थन नम्हे मड़य्याँ मड़चकी र'ऊ नेम्हा बोलतासी सवंग ती बेस खापा।
- 15 नीन अखदय का आसिया राजी ता पत'ऊ आलर ओर्मर एंगन ती किरका केरका र'अनर। कोइहे गा फुगेलोस अरा हेरमोगेनेस हों आर नूर'अनर।
- 16 ओनेसिफोरुसी एडपातर मड़य्याँ धर्मसी कोइहे सोग्गे मनन नेकअन। एन्देरगेका ऐन जेहेल नू रहचकन खने हूँ बिगर इल्चका ती एंगन आस नगदे हेल बरचस ती ईरयस अरा एंग्हे जियन बोधा बाचस।
- 17 आस रोम नगरे नू बरचस खने, एंगन नगदे तिहा ती बिद्दयस ती एंगन खक्खयस।
- 18 रायबड़ी उल्ला नू उर्बस आसी मड़य्याँ कोइहे सोग्गे नन्दस नेकअन। आस एंगा गे एका एका दौ नलखन इफेसुस नगरे नूनजस, अदिन हों नीन बेस अखदय।

2 तीमोथियुस 2

- 1 औंगे एंग्हे खद्द तिमोथियु, नीन मसी येसुसी चि'अना आ मया नू बड़ियर मना।
- 2 एंग्हे एका सिखाबाचका कत्थन नीन नगदे गोवाह आलर ही मुन्द मैजकादय, अदिन असरा जोगे आलारिन सिखाब'आ। होले आर नन्नारिन हों सिखाब'आ औंगोर।
- 3 मसी येसुसी बेस लड़ाई ननू सैनस लेक्खा एम्हे गने दुक्खे सार'आ।
- 4 एका ओर्तस सैनस र'अदस, आस तंगन खेखेल ता नलख गुट्ठी नू मल बझाब'अदस, लिकिन आस फउद मुद्धासिन खुसमारत'आ गे बेद्ददस।
- 5 अन्नेम अखड़ा नू लड़'ऊ आलस नेग ती मल लड़'ओस होले, दौ खंजपा मल खक्खोस।
- 6 अरा एका खल्ल उर्बस कोइहे अर्ज'अदस होले, खंजका ही बटा आस गे दिम मुन्द खक्खना र'ई।
- 7 ऐन एन्देर ब'अदन अदही पत नू सोच'आ। एन्देरगेका इबड़ा कत्थन बुझ'आ गे उर्बस लूर चि'ओस।
- 8 सगरो सोच नना का येसु मसीस दाऊद बेलासी बनस नू बरचस। आस केचका ती उज्जा चोचस। ईदिम एंग्हे मेन्त'अना दौ कत्था।
- 9 ऐन ई दौ कत्था मेन्त'अना चड्डे गुडरका लेक्खा जेहेल नू हेंरना गूटी दुक्खे सारदन। लिकिन धर्मसी कत्थन ने हूँ हें'आ पोल्लोर।



- 10 खने ऐन चज्जरका आलर गे दौ ही चड्डे उर्मी दुक्खेन सारदन। होले अबडर हों मसी येसुस नू पत'ओर ती नाइनन जनमजुग ही महबा गने खक्खनर नेकअन।
- 11 ई ब'अना पत'अना जोगे र'ई। नाम मसीस गने केचका केरकादत होले, नाम हूँ आसी गने उज्जोत।
- 12 नाम आसी चड्डे दुक्खे सारदत होले, आसी गने नाम हूँ बैलर बेसे राजी ननोत। नाम आसी खोखा चौरख'उर मलदम ब'ओत होले, आस हों नमन तंगहे आलर मलदर ब'ओस।
- 13 नाम आस गे मानिम गने मल र'अदत अन्नु हों आस नमा गे मानी गनेम र'ओस। एन्देरगेका आस तंगहे गच्छरकन अम्बा पोलदस।
- 14 नीन इबडा कत्था गुट्ठिन आरिन सिखाब'अते र'आ। अरा धर्मेसी मुन्दहारे तिगाब'आ का सिखका कत्था गुट्ठी ही माने ही पत नू अम्बोर नग्गानखर'आ। अत्रु एन्देर हों मल धार'ई, लिकिन मिनू आलर बगडारनर कानर।
- 15 नीन बिगर लजर'अम धर्मेसी जोंखस र'आ ती, मानिम कत्थन लहे लहे बेस लगे सिखाब'ऊ र'आ ती निंगन धर्मेसी मुन्दहारे उजगो आल ऐद'आ गे चिहुट र'आ।
- 16 लिकिन महबा मलका ब'अना ती बछ्का र'आ। एन्देरगेका ईद आलारिन धर्मेस ती अउर हूँ गेच्छा ननी चि'ई।
- 17 आर ही सिखाब'अना पोच्यना खादी लेक्खा बखलारनुम क'ओ। हमेनयुस अरा फिलेतोस हूँ आ मदहे दिम हिकनर।
- 18 आर मानिम कत्था सिखाब'अनन अमबियर चिच्चर। आर ब'अनर का केचका ती उज्जा चो'अना मंज खच्चकी र'ई। एन्ने ब'अना ती जोक्क आलर ही पत'अनन बगड'अनर।
- 19 अन्नु हों धर्मेसिन मानी ती पत'ऊ आलर मसीसी पत'अना नू पोकता र'ओर। अरा धर्मेस बाचकादस, “तम्हे आलारिन उर्बस अखदस” अरा “ने ताम उर्बासी खोखा चौरखदम ब'अनर आर गे मलदौ नलखन मल नन्ना र'ई।”
- 20 ओन्टा कोहाँ एडपा नू सोना चाँदी ही लेका मला, लिकिन कंक अरा खज्जो ही संजगी गुट्ठी हों मनी। एकदा एकदा महबा गे अरा एकदा एकदा सन्नी नलख गे र'ई।
- 21 एकअम ओर्तस मलदौ नलखन अम्बदस ती तंगन निमन ननोस होले, आस महबा ही संजगी मनोस, अरा आस नेम्हा मनोस ती उर्बासी नलख नू बउरार'ओस। अरा एकअम मदहे बेस नलख गे सपडारका र'ओस।



- 22 औंगे नीन जौख परिया ता मलदौ रिझ रंग नलख गुट्ठी ती बोंगा। अरा निमन जिया ती धर्मसी बिन्ती ननुर गने मानी नलख नन्ना ती, अरा पत'अना ती, अरा चोन्हा ती अरा कोड़े उज्जना ती र'आ गे बेद्दा।
- 23 अरा मोठई अरा अनभनियाँ आनानखरना गुट्ठी ती तरकूटी र'आ। एन्देरगेका नीन अखदय का अत्रु अरबानखरना गुट्ठी मनी।
- 24 उर्बासी जौखस गे अरबानखरना मलकी। लिकिन ओर्मर गने लुदऊ जिया अरा सिखाब'अना नू बड़ियर अरा कयास ननू मन्ना र'ई।
- 25 अरा आस गे तंगन बिड़दो ननुरिन लुदऊ जिया मनरकी बुझाब'अना र'ई। धर्मस अबड़ा आलर ही जियन किर्त'आ गे लूर चि'ओस नेकअन, अरा आर हों मानिम आबोन अख'ओर।
- 26 होले आर सैतान ही फंदा ती बछर'अरकी तम्है मानी लूर नू किर्रोर, एकदा तंगहै मने बेसे नना गे आरिन धरचकी उड़्यकी रहचा।

2 तीमोथियुस 3

- 1 नीन इदन अख'आ हो'आ का छेद्दे उल्ला गुट्ठी नू कोड़हे सस्ती ही बेड़ा गुट्ठी मनो।
- 2 एन्देरगेका आलर तमानिम चोन्हा ननू, ढिबा ही चिबाखार'ऊ, बग्गे तरगर'ऊ, इतरार'ऊ, हींड़'ऊ, अयंग बंगर ही पेसकन मल पत'ऊ, संगरा ननुर गे धन्यवाद मल ब'ऊ, सोतबोड़'आ ननू मनोर।
- 3 अरा आर चोन्हा मल ननू, छमा मल ननू, दुस'ऊ, चिहुंक मल ननू, कुड़'ऊ, दौ मल बिद्दू मनोर।
- 4 अरा आर दगा चि'ऊ, हुड़ड ननू, मनचड़हा, अरा धर्मसिन मला लिकिन सुख-सौरतन दिम बिद्दू मनोर।
- 5 अरा आर महबा ननू बेसे ऐथ्र'ओर, लिकिन अदही सवंगन मल पत'ओर। एन्ने आलर ती नीन तरकूटी र'अके।
- 6 इबड़र तिम जोक्क आलर एड़पा नू कलेकले कोरनर ती छिनैर मुक्कारिन तम्है आकुस नू नन्नर, एकार उर्मी रकम ही सुख-सौरत गुट्ठी नू अरा पाप गुट्ठी ती लिन्डरकानर।
- 7 ईर सगरो गा सिखनर लिकिन मसीसी पत ता मानिम कत्थन इकला हों बुझुर'आ पोलनर।
- 8 एकासे यन्नेस अरा यम्ब्रेस मूसासी बिड़दो नंजकाचर, अन्नेम इबड़ा आलर हों मसीसी पत ता मानिम कत्था ही बिड़दो नन्नर। ईर बेड़ारका बुधी ही आलर हिकनर अरा ईर तम्है पत'अनन नठाब'अनर।



- 9 लिकिन आर एन्देर नन्नर अइय्या बग्गे उल्ला गे बड़ियर मना गे पोलनर। एन्देरगेका जोक्क उल्ला नू ईर ही बोया नलखन ओर्मर अख'ओर, एकासे यन्नेस अरा यम्ब्रेसी बोया नलखन अक्खर।
- 10 लिकिन ऐन आलारिन एन्देर सिखाब'अदन, अरा एकासे ऐन उज्जदन, अरा एंग्हे उज्जना नू एंग्हे चिताबुतन, अरा धर्मेस नू एंग्हे पत्त'अनन, अरा आलर नू एंग्हे कयास अरा चोन्हा नन्नन अरा दुक्खे सारनन नीन बेस अखदय।
- 11 अन्तियोखेया अरा इकोनियोन अरा लुसत्रा नगरे नू एंग्हे मइय्याँ ऐ बग्गे दुक्खे अरा सतारना मंजकिचा, अबड़ा उर्मी दुक्खेन ऐन एकासे सारचकन अदन नीन अखदय। लिकिन इबड़ा उर्मी ती उर्बस एंगन बछाबाचस।
- 12 मानिम नू ने मसी येसुस नू महबा गने उज्जा बेददनर आर ओर्मर सताबातार'ओर।
- 13 लिकिन मलदौ आलर अरा भुरियु आलर दगा चि'अनुम अरा दगा मूखनुम बगड़ारते किरिमबि'ओर।
- 14 लिकिन निंग्हे सिखका कत्थन एकदन नीन मानिम कत्था अखदय अदिन पेसते र'आ। एन्देरगेका नीन नेखा गुसलेक इदन सिखकय, आर हूँ पत्त'अना जोगे र'अनर अदन अखदय।
- 15 नीन खद्द परिया तिम धर्मेसी लिखका नेम्हा कत्था गुट्ठिन अक्कय। अबड़ा मसी येसुस नू पत्त'अना ती नाइरनन खक्खा गे निंगा लूर चीरकी रई।
- 16 धर्मेसी उर्मी नेम्हा कत्था धर्मेसी रस्सका लिखकी रई। आद आलारिन मानिम आबोन सिखाब'आ गे, अरा आलारिन तम्हे उज्जना ही मलदौ आबोन बुझाब'आ गे, अरा आलर तम्हे मलदौ आबोन अम्बत'आ गे, अरा एकासे उजगो उज्जना रई अदन सिखाब'आ गे सहाड़ा ननू रई।
- 17 इत्रु धर्मेसी आलस बड़ियर मन्दस अरा उर्मी दौ नलख नना गे सपड़ारका र'अदस।

2 तीमोथियुस 4

- 1 ऐन इदन धर्मेसी अरा मसी येसुसी मुन्दहारे पेसदन। एकास केचका अरा उज्जना आलर ही रायबड़ी नना गे तंग्हे राजी नू बर'ओस।
- 2 नीन दौ कत्थन तेंगा कुद्दा, अरा बेड़ा कु बेड़ा नू हूँ दौ कत्था तेंगा गे सपड़ारका र'आ, आलारिन मलदौ नन्ना ती सुधर'आ अरा अदन अम्बा गे आना, अरा आलारिन निंग्हे दौ सिखाब'अना ती रिझत'आ।



- 3 एन्देरगेका एन्ने बेड़ा बर'ओ का आलर सुपट सिखाब'अनन मेना गे मने मल ननोर। अरा तम्है मने लेक्खा तम्है खेबदा गुट्ठी गे दौ लगना कत्था मेनत'ऊ कैनो गोटंग बिड़दो सिखाब'उरिन खोजोर।
- 4 अरा आर मानिम कत्थन मेना मल बेद्दनर अरा खीरी धंधा आबोन मेन्नर।
- 5 लिकिन नीन इबड़ा उर्मी कत्था गुट्ठी नू चिहूंक र'आ, दुक्खे सार'आ, दौ कत्था मेन्त'आ कुद्दना ही नलख नना, अरा धर्मसी चिच्का उर्मी नलखन नना।
- 6 एन्देरगेका अक्कु एंग्हे उज्जना नैगासी दाँड़े अरगना नू इंसुंग तुन्दना बेसे तुन्दर'अली। एंग्हे काना ही बेड़ा अंडसा खच्चकी रई।
- 7 ऐन पत'अना ही दौ लड़ाई आबोन लड़चकन। एंग्हे बोंगनन ऐन बोंगकन मुंजकन। ऐन पत'अनन मल अम्बकन।
- 8 अक्कु एंगा उजगो ही मुकुट इनाम उइरकी रई। उजगो गने रायबड़ी ननू धर्मस अदिन रायबड़ी उल्ला नू एंगा चि'ओस। एंगा लेका मला आसी बरनन पाब ईरू ओर्मर गे चि'ओस।
- 9 एंग्हे गुसन बर'आ गे नीन लेम तिहा नना।
- 10 एन्देरगेका देमस ई खेखेल ता उज्जना नू मोंहरस ती एंगन अम्बियस चिच्चस ती थेस्सलोनिके नगरे नू किरिमबिच्चयस। क्रेसकेस गलातिया राजी गे अरा तीतुस दलमतिया राजी गे किरिमबिच्चयस।
- 11 लूकस लेका एंग्हे गने र'अदस। नीन बर'ओ बारी मरकुसिन निंग्हे गने ओन्द्र'आ, एन्देरगेका आस एंग्हे इसला नलख नू संगरा नना ओंगोस।
- 12 तुखिखोसिन ऐन इफेसुस नगरे तइय्का र'अदन।
- 13 एका कोट आबोन ऐन त्रोआस नगरे नू कारपोस गारिया अम्बका बरचकादन, बर'ओ बारी अदन ओन्द्रके। अरा एंग्हे पुथी गुट्ठिन कोइहे गा चपटा पत्रा गुट्ठिन हों ओन्द्रके बरके।
- 14 अलेक्सन्द्रस ठठेरवस एंगा गे कोइहे मलदौ नंजस। उर्बस आसिन एंग्हे मइय्याँ नंजका नलख गे दंडे चि'ओस।
- 15 नीन हूँ आसी पत नू चिहूंक र'आ, एन्देरगेका आस एम्है कत्था गुट्ठी ही नगदे बिड़दो नंजकादस।
- 16 एंगन बदी टिड्डर ती पहिल खेप कछारी नू नेंवई ननुसी मुन्दहारे इजताचका बेड़ा नू ने हों एंग्हे संगे मल चिच्चर। ओर्मर एंगन अम्बका चिच्काचर। आर गे छमा खक्वई नेकअन।



- 17 लिकिन उर्बस एंग्हे गने रहचस ती एंगा सवंग चिच्चस। होले ऐन दौ कत्था बेस लगे तेंगा ऊंगकन, अरा ने यहूदी मलनर आर हूँ एंग्हे ती अदिन मेना ऊंगियर। आस एंगन पिटरना ती बछाबाचस।
- 18 उर्बस एंगन उर्मी रकम ही मलदौ नलख ही बिड़दो ती नाड़ोस अरा तंग्हे मेर्खा राजी नू कोड़ेम अंडसत'ओस। आसी दिम महबा हुल्लो ती हुल्लो गूटी मन्ते र'ओ। आमेन।
- 19 प्रिसका अरा अकुलास गो अरा ओनेसिफोरुसी एड़पातर गो एंग्हे मोंजरा।
- 20 एरस्तुस कोरिन्थ नगरे नू र'आ खच्चियस अरा त्रुफिमोसिन ऐन मिलेतोस नगरे नू बेमार अम्बका बरचकादन।
- 21 कीरना उल्ला ती मुन्द बरना ही तिहा नना। युबुलोस, पूदेस, लीनुस, बहिन क्लौदिया अरा उर्मी भइयोर निंगन मोंजरा नन्नर।
- 22 उर्बस निंग्हे गने र'अदस नेकअन। निम्हें ओर्मर मइय्याँ आसी मया मनन नेकअन। आमेन।



तीतुस

तीतुस 1

- 1 ऐन पौलुस धर्मेसी जोंखन अरा येसु मसीसी तइरकन। ऐन धर्मेसी चज्जिका आलर गे पत्त'अना ही अरा मानिम लूर अरा महबा डहरे नू कइहाब'अना कत्था ही पत्त नू तेंगा गे, ई नलख नू एंगन सोंपचकादन।
- 2 ई पत्त'अना अरा लूर जनमजुग उज्जना ही असरा नू ती बर'ई एकाद धर्मेस खेखेलन गढ़ना ही मुन्द तिम गच्छरकादस। अरा धर्मेस मल ठकदस।
- 3 अक्कु ठौका बेड़ा नू आस ई कत्थन दहदर नंजस, एकदन नाम नम्है बछाब'ऊ धर्मेसी पेसका ती ओर्मर गे तेंगदत। इदिन एंगा गे सोंपतारा।
- 4 नम्है मझी नू र'ऊ पत्त'अना नू एंगहै मानिम खद्दस तीतुस गे ऐन पौलुस लिखदन। धर्मे बबस अरा नम्है बछाब'उस मसी येसुसी मया अरा कोड़े निंगा मनन नेकअन।
- 5 ई चइडे ऐन निंगन क्रेते व्दीप नू अम्बकाचकन का बछ्का नलख गुट्ठिन नीन सरि'ओय। अरा एंगहै आनका लेक्खा नगरे नगरे नू सेयान आलारिन उइय्योय।
- 6 सेयान आलस गे ओक्कना इजना नू बिगर बदी ही अरा ओन्टा लेका मुक्का ही मेट र'अना र'ई। आसी खद्द-खर्रा पत्त'ऊ र'अना र'ई, अरा आर भइवा नलख ननू अरा मल गदन'ऊ मल र'अना र'ई।
- 7 कलीसिया ही ईरु-खूजू मुद्धस गा ओक्कना इजना नू बिगर बदी ही अरा हुड्ड मला, अरा लेम गोसा मनू मला, अरा उंखू मला अरा पस'ऊ कूडू मला अरा मलदौ ती अर्ज'ऊ मल र'अना र'ई।
- 8 आस गे पाही ईरू, दौ नलख बिद्दू, खतीर ननू, नियाँव ननू, नेम्हा अरा जियन जतन'ऊ र'अना र'ई।
- 9 अरा आस गे सिखाबाचका मानिम कत्था नू जिट जिट र'अना र'ई। होले आस आसी दौ सिखाब'अना ती नन्ना आलर गे संगरा नना ओंगोस। अरा अदही बिड़दो ब'उर ही बइय्यन उट'आ ओंगोस।
- 10 एन्देरगेका नगदे आलर मल गदन'ऊ अरा अन्भनियाँ कछनख'ऊ अरा ठक'ऊ र'अनर। कोइहे गा नाइर'आ गे खतना ही चाइ र'ई ब'ऊ आलर एन्ने र'अनर।
- 11 ईरिन एन्ने ब'आ गे अमा चि'आ। ईर तम्है मलदौ सिखाब'अना ती एइपा एइपन बगइ'अनर चि'अनर। ईर इदन ढिबा गे लेका एन्ने नन्नर।



12 ईर ही तिम ओर्तो क्रैस आलस एन्ने बाचस, “ई क्रैस आलर सगरो ठकवा हिकनर, अरा दनवा मेक्खो गुट्ठी लेक्खा र'अनर अरा लंडी पेटहा र'अनर।” आसिन ईर तम्है धर्मसी कत्था तिङ्गुस ब'आलियर।

13 ई गोवाह मानी दिम। औंगे आरिन चेताब'आ का आर पत'अना नू कोड़े मन्नर नेकअन।

14 आर गे यहूदीर ही खीरी धंधा गुट्ठी अरा मानिम ती बेहड़ारका केरकर ही पेसका गुट्ठिन मल मेन्ना रई।

15 अरिगा आलर गे उर्मी जिनिंस अरिगा रई। लिकिन अरिगा मलका अरा मल पत'उर गे एन्द्रा हूँ अरिगा मल्ला। एन्देगेका आर ही लूर अरा लखना गुट्ठी दुयो बगड़ारकी रई।

16 आर ब'अनर का धर्मसिन अखदम। लिकिन आर ही नलख ईदई का आर मानिम नू धर्मसिन बलनर एन्देगेका आर खॉड़'ऊ अरा कत्था मल पेस'ऊ हिकनर, अरा एकअम दौ नलख नना गे जोगे मलनर।

तीतुस 2

1 लिकिन नीन एन्ने एन्ने कत्था गुट्ठिन तेंगा का एकदा बड़ियर सिखाब'अना जोगे रई।

2 पचगी आलारिन सिखाब'आ का आर गे चिहंक अरा मईन जोगे अरा नेत नेग ती उज्जू मन्ना रई। अरा आर गे बेस पत'अना अरा चोन्हा ती अरा सहेलहे ती निन्द्रका आलर र'अना रई।

3 ई बेसेम पच्चो मुक्कारिन सिखाब'आ का आर ही ओक्कना-इजना नेम्हा मन्ना रई। अरा आर गे जलिया अरा उंखू मल मन्ना रई। लिकिन दौ आबोन अंगियाबात'ऊ मन्ना रई।

4 होले पेल्लो मुक्कारिन आर तम्है मेतर अरा खद'दर ती चोन्हा नना गे अंगियाब'आ औंगनर।

5 अरा नेत नेग अरा निमन ती र'आ गे अंगियाब'आ औंगनर। तम्है एड़पा नलख नू कमियाँ मना गे, अरा बेस नलख नना गे अंगियाब'आ औंगनर। अरा मेतारिन गदन'ऊ र'आ गे अंगियाब'आ औंगनर, होले आलर धर्मसी कत्था ही बिड़दो नू मल ब'ओर।

6 एन्नेम जोंख मेतारिन हों नेत नेग ती उज्जा गे रिझाब'आ।

7 नीन उर्मी रकम ही दौ नलख नना ती नीन नीनिम आर गे चिन्हा ऐद'आ। निंग्हे सिखाब'अना नू फुर्फुर'आ अरा चिहुट र'आ।

8 मानिम आबोन सिखाब'आ, होले निंग्हे सिखाब'अनन बोया कत्था ब'अरकी मल अलखोर। तहाँ निंग्हे बिड़दो नूर'उर लजर'ओर, एन्देगेका नमन मलदौ ब'आ गे एन्द्रा हूँ मलकी।



9 बिट्ठी ननू जौंखारिन ब'आ का आर गे सगरो तम्है उर्बर ही उर्मी कत्था नू गदन'ऊ मन्ना र'ई, अरा आरिन खुसमारत'अना र'ई। अरा आरिन अम्बोर किरा बिड़द'आ।

10 आर अम्बोर खड़'आ नुड़'आ, लिकिन उर्मी कत्था नू असरा जोगे अरा दौ ऐथ्रत'अना मनोर। होले आर नम्है बछाब'ऊ धर्मसी पत ता सिखाब'अना बेस कोड़े र'ई इदिन ऐद'ओर।

11 एन्देरगेका धर्मसी मया उर्मी अड़डा ता ओर्मा आलर गे नाड़रनन ओन्द्रा।

12 अरा नमन तिगाब'ई का नमा बिगर महबा उज्जना अरा पाप नन्ना ही चिबाखारना गुट्ठी ती जियन किरत'अना मनो। अरा नाम बगड़ारका ई परिया नू नेत नेग अरा मानिम नन्ना ती महबा नू उज्जना र'ई।

13 नाम ई कोहाँ असरा ती पाब ऐरदत का इकला नमन उबर ननू नम्है कोहाँ धर्मस येसु मसीसी महबा ही बरना र'ई।

14 आस तान तंगन नमा चिच्चस उड़य्यस, होले आस नमन उर्मी रकम ही पाप ती नाड़ा गे दाम चि'आ ओंगदस। अरा नमन नेम्हा ननरकी तंगा गे एन्ने जाती कमदस, एकदा दौ नलख गुट्ठिन नना गे सगरो सपड़ारकी र'ई।

15 नीन इबड़ा कत्था गुट्ठिन पत'ऊ आलर गे सिखाब'अत र'आ। अरा इबड़न नना गे रिझाब'आ। अरा उर्मी आकुस गने तेंगा का आर ही उज्जना नू एन्देर मलदौ र'ई। निंगहै एन्ने ब'अना ती ने हूँ निंगन अम्बोर खौड़'आ नेकअन।

तीतुस 3

1 पत'ऊ आलारिन सुरता नन्त'आ का आर गे राजी ननुर अरा अक्स'उर ही आकुस नू र'अना र'ई। अरा आरहीन पेसना ती उर्मी दौ नलख गे सपड़ारका र'अना र'ई।

2 आर नेक'आनिम आर ही बिड़दो नू ब'अनुम अम्बोर नठाब'आ, अरा आर अरबानखर'ऊ अम्बोर र'आ। अरा आर गे लुद'ऊ मन्ना र'ई, अरा ओर्मर गने तमन कोहाँ लेक्खा मला सन्नी लेक्खा ईद'उर र'अना र'ई।

3 नाम हौं मुन्द बोया बेसे अरा पेसकन मल पत'ऊ आलत रहचकत। अरा नाम ठगर'अरकी रकम रकम ही चिबाखारना अरा सुख-सौरत ही जौंख रहचकत। नाम खीस-खोप डाहना अरा खौड़ना नू उज्जा लिक्कत, अरा नाम नाम नू बैरी रहचकत।

4 लिकिन नमा गे बछाब'ऊ धर्मसी सोग्गे अरा चोन्हा मंजा।



- 5 खने आस नमन नाडियस। ईद नम्है नंजका बेस नलख चड्डे मल्ली, लिकिन आसी सोग्गे चड्डे मंजा। अरा आस नम्है पाप गुट्ठिन नूडियस ती ओथ्रस चिच्चस। अरा नमन नेम्हा बोलतस ती दौ उज्जा गे पुना कमचस।
- 6 धर्मस नम्है बछाब'ऊ येसु मसीस ती नेम्हा बोलतन नम्है मइय्याँ बग्गे ती बग्गे तइय्यस।
- 7 आस तंग्हे मया ती नमन उजगो आल ऐदस, अरा नमा गे जनमजुग ही उज्जना खक्खा गे असरा चिच्चस।
- 8 इबड़ा कत्था गुट्ठी मानिम हिके। अरा ऐन बेद्ददन का आलर इबड़ा कत्था गुट्ठी ही पत्त नू बडियर लगे बुझनर। होले एकार धर्मसिन पत्त'अनर, आर दौ नलख नू लइक्का र'आ गे चिहुंक ननोर। इबड़ा कत्था गुट्ठी बेस अरा ओर्मर गे धार'ई।
- 9 बोया आनानखरना गुट्ठी, अरा पूरखर ही खुटी गुट्ठी, अरा अरबानखरना गुट्ठी अरा यहूदीर ही नेग ही पेसना ही पत्त नू नग्गानखरना इबड़ा जम्मा ती तरकूटी र'आ। एन्देरगेका इत्रु मल धार'ई, बेड़न लेका नठाब'ई।
- 10 आलारिन छिंडुसिन आंग्होल, दुई हेल तिगाब'आ ती तरकूटी र'आ।
- 11 इदन नीन अख'आ आंग्दय का एन्ने आलस बेड़ारकादस अरा पपहा र'अदस अरा तान तंगानिम बदी नन्दस।
- 12 ऐन निंग्हे गुसन अरतेमास महले तुखिखोसिन तइय्योन, एंग्हे हेद्दे लेम नीकुपुलिस बरना ही चिहुट ननके। एन्देरगेका ऐन असानिम पईय्याँ उल्लन पहाब'आ गे तिगचकन।
- 13 जेनास वकील अरा अप्पोल्लोसिन तिहा ननरकी मुन्द तइय्ये चि'अके। नीन ऐरके खोजके का आर ही डहरे ऐकना नू आर गे इन्द्रिइम जिनिस अम्बो खंग'आ।
- 14 नम्है आलर हों चाड़ गुट्ठिन पुराब'आ गे बेस नलख नू लइक्का र'आ गे सिरग्रना र'ई। आर ही उज्जना बिगर खंजपा ती अम्बो र'आ।
- 15 एंग्हे गने र'ऊ जम्मर निमन मौंजरा नन्नर। एम्है गने चोन्हा ननू पत्त'ऊ आलर गे मौंजरा नन्दन। निम्है ओर्मर मइय्याँ मया मन्ते र'आ नेकअन। आमेन।



फिलेमोन

फिलेमोन 1

- 1 मसी येसुसी पत ता दौ कत्था तेंगना ही चड्डे जेहेल नू हेंरका पौलुस ऐन, अरा नम्है भईस तीमोथियुस ई चिठिन नम्है दुलार अरा नम्है गने सुसर नलख नू र'ऊ फिलेमोनस गे लिखदम।
- 2 अरा नम्है गने पत'ऊ बहिन अपफिया, अरा मसीसी सुसर नलख नू सैनस लेक्खा नम्है संगे भईस अखिप्पोस गे, अरा निंगहै एडपा नू खोंडर'ऊ कलीसिया गे हूँ ऐम ई चिठिन लिखदम।
- 3 निमा गे नम्है धर्म बंगस अरा उर्बस येसु मसीस ती मया अरा सान्ति मनन नेकअन।
- 4-5 अना फिलेमोन, नीन उर्बस येसु मसीस नू उड्यका पत'अनन अरा उर्मी नेम्हा आलर मड्य्याँ ता निंगहा चोन्हा पत नू ऐन मेन्दन। औंगे ऐन एंगहै गोहरारना गुट्ठी नू निंगन सुरता नन्दन खने, उर्मी बेडा एंगहै धर्मसिन धन्यवाद नन्दन।
- 6 अरा निंगहै पत'अनन नन्नर ही गने खट्टना नू कोइहे बडियर गने र'आ गे ऐन गोहरारदन। इत्रु तिम मसी येसुस नू नम्हा खक्खका उर्मी दौ ही पत नू नीन उर्मिन बुझुर'ओय।
- 7 अना एंगहै भई, नीन नेम्हा आलर ही जियन हरियर नंजका र'अदय। निंगहै चोन्हा एंगा गे हूँ कोइहे रिझ अरा जिया सालनन चिच्की र'ई।
- 8-9 औंगे ऐन पौलुस पचचका केरकादन ती, अरा अक्कु मसी येसुसी पत ता दौ कत्थन तेंगना ही चड्डे जेहेल नू हेंरका ती, निंगा एन्देर नन्ना र'ई अदन निंगा गे आना गे मसीस नू एंगा बग्गे डिड र'ई। अन्नु हूँ अन्ने मल ननरकी चोन्हा ती निंगन ने'अदन।
- 10 मसीस नू एंगहै खद्दस ओनेसिमोस गे ऐन निंगहै गुसन ने'अदन। एन्देरगेका ऐन जेहेल नू हेंरका बारी आसिन ऐन मसीस नू कइहाबाचकन ती आस एंगहै खद्दस मंजस।
- 11 आस मुन्द निंगा गे खइता रहचस, लिकिन अक्कु गा निंगा अरा एंगा इरबर गेम कोइहे नलख जोगे र'अदस।
- 12 एंगहै कोइहे चोन्हा ही ओनेसिमोसिन ऐन निंगहै गुसन किर्त'अर तड्यदन।
- 13 ऐन आसिन एंगहै गुसन उड्य्या गे बेद्दा लिक्कन का दौ कत्था तेंगना ही चड्डे इय्या गुडरका र'ऊ एंगा गे निंगहै ऊजी नू आस संगरा ननू र'ओस दने।
- 14 लिकिन ऐन निंगहै बिगर मने एन्देर हूँ नना मल बिद्दकन का नीन नन्ना इन्द्रिइम संगरा हूँ निंगहै सौंसे जिया ती रिझ ती नन्ना र'ई, एंगा बडपेलहा ती अदन मल नन्ना र'ई।



- 15 ईद इदगे मंजा नहअन का आस निंगहै गुसन उर्मी उल्ला र'आ गे आस निंगहै ती जोक्क उल्ला गेच्छा मंजकाचस।
- 16 लिकिन अक्कु आस बिट्ठी ननू जौंख लेक्खा मला, बिट्ठी ननू जौंख ती हूँ कोहँस, अरा चोन्हा भईस बेसे र'अदस। आस एंगा गे कोइहे चोन्हा ही जोगे र'अदस। लिकिन कोइहे गा आस ओन्टा आल नता ती हूँ, अरा उर्बस नू ओन्टा भई नता ती हूँ आस निंगा गे अउर कोइहे चोन्हा जोगे र'अदस।
- 17 औंगे नीन एंगन मसीसी चड्डे निंगहै सखी एन्ने सोचदय होले, एंगन इङ्गना बेसे आसिन हूँ इङ्ग'आ।
- 18 लिकिन आस निंगा गे इन्दिइम मलदौ नंजकादस महले आस निंगा इन्दिइम नहड़ा चि'अना र'ई होले, अदिन एंगहै नामे नू लिख'आ उइय्या।
- 19 “आ नहइन ऐन निंगा किर्त'ओन चि'ओन” ऐन पौलुस इदन एंगहै खेक्खा ती लिखदन। ई बारी नीन निंगानिम एंगा नहड़ा बेसे चि'अना र'ई, एन्ने ऐन निंगा तेंगा गे चाड़ मलकी, एन्देरगेका नीन पत्त'ऊ मना गे ऐन संगरा नंजकन।
- 20 औंगे अना भई, नीन एंगा गे ई संगरा आबोन नाम उर्बा मसीस नू भईर र'अना चड्डे नना। नीन मसीस नू एंगहै जियन हरियर नना चि'आ।
- 21 ऐन निंगहै पेस्रना मइय्याँ असरा नन्दन ती निंगा गे इदन लिखदन। अरा ऐन अखदन का नीन एन्देर नना गे ऐन निंगन आनदन अदही ती बग्गे नीन ननोय।
- 22 अउर ओन्टा कत्था ऐन मेन्दन का एंगा र'आ गे ओन्टा पाही कुठली सपड़'अके उइय्के। एन्देरगेका ऐन असरा नन्दन का धर्मस निम्है गोहरारना गुट्ठिन मेनोस, अरा ऐन अउरिम निम्है गुसन बर'आ औंगोन।
- 23 मसी येसुसी पत्त ता दौ कत्थन तेंगना ही चड्डे एंगहै गने जेहेल नू गुड़रका र'ऊ एपाफ्रास निंगन मौंजरा नन्दस।
- 24 अन्नेम एंगहै गने सुसर नलख ननू मरकुस, अरा अरिस्तरखोस, अरा देमस, अरा लूकस हूँ निंगन मौंजरा नन्नर।
- 25 नम्है उर्बस येसु मसीसी मया नीम ओर्मर गने र'अन नेकअन। आमेन।



इब्रानी

इब्रानी 1

- 1 चिरान नू धर्मस गा घड़ी घड़ी अरा नन्ना नन्ना घत ती नम्है पुरखारिन धर्मसी कत्था तिगुर ती बाचका रहचस।
- 2 लिकिन अक्कु इबड़ा छेद उल्ला नू धर्मस नम्है ती तंग्हे खद्दस ती कछनखस। धर्मस आसिन उर्मी जिनिस ही मइय्याँ जिमा कमचस, अरा आस ती गोटा सौंसेन गढ़चस।
- 3 आस धर्मसी महबा ही त्रास ऐथ्रदस अरा आसी सुबहा आबोन अन्नेम ऐद्दस। आस तंग्हे सवंगिय कत्था ती ओर्मा जिनिसन समइअदस। आस नम्है पाप गुठिन सुध नंजस ती उर्मी सवंग ती निन्द्रका धर्मसी तीना पक्खे उक्का र'अदस।
- 4 औंगे आस मेर्खा पैकर ती कोइहे कोहाँ मंजस। अरा धर्मस आस गे अबड़र ती कोइहे कोहाँ नामे चिच्चस।
- 5 धर्मस गा एकअम मेर्खा पैकर ती इकलअम मल बाचस, “नीन एंग्हे खद्दय, इन्ना ऐन निम्है बंग मंजकादन।” अरा अउर हूँ मल बाचस, “ऐन आसी बंग मनोन, अरा आस एंग्हे खद्दस मनोस।”
- 6 अउरिम इकला धर्मस तंग्हे जेट्ठा खद्दासिन ई खेखेल नू ओन्द्रस, अरा बाचस, “धर्मसी उर्मी पैकर आसी महबा नन्नर नेकअन।”
- 7 अरा धर्मस मेर्खा पैकर ही पत नू एन्ने ब'अदस, “आस तंग्हे पैकारिन ताका लेक्खा कमदस अरा तंग्हे तेतर-सुसर ननुरिन गौंगौरना चिच्ची लेक्खा कमदस।”
- 8 लिकिन धर्मस तंग्हे खद्दासी पत नू एन्ने ब'अदस, “अना धर्म, निंग्हे बैल-गदिया हुल्लो ती हुल्लो गूटी र'ओ, अरा नीन निंग्हे राजी आबोन उजगो गने राजी ननोय।
- 9 नीन उजगो आबोन चोन्हा नन्दय अरा मलदौ आबोन खाँइदय। औंगे धर्मस, निंग्हे धर्मस निंगन निंग्हे संगेर ही मझी ती चज्जियस अरा आस निंगन बग्गे रिझ गने भिने नंजस।”
- 10 धर्मस अउरिम ब'अदस, “अना उर्बायो, हुल्लो नू नीन खेखेलन कमचकय, अरा मेर्खा निंग्हे खेक्खा ही नलख हवे।
- 11 अबड़ा गा नठार'ओ क'ओ, लिकिन नीन उर्मी उल्ला बड़ियर रांगे र'ओय। अरा अबड़ा उर्मी पच्चा किचरी लेक्खा ईचतार'ओ क'ओ।
- 12 नीन चदर लेक्ख अबड़न तेरमोय। अरा नीन अबड़न पच्चा किचरी लेक्खा बदलोय। लिकिन नीन इकला हूँ मल बदलारोय अरा निंग्हे उज्जना इकला हूँ मल मुंज'ओ।”



13 धर्मस मेर्या पैकारिन नेकअनिम इन्द्रिम इकला हूँ एन्ने मल बाचस, “ऐन निंगहै बैरीरिन निंगहै खेड्डे ही किय्या ओन्द्रना गूटी मईन ही अड्डा एंगहै तीना चोक्खा उक्का र'आ।”

14 उर्मी मेर्या पैकर तेतर-सुसर ननू बोलता हिकनर, ने नाइरनन खक्खोर आर गे संगरा नना गे अबड़ा तइतारई।

इब्रानी 2

1 औंगे नाम एका मानी कत्थन मैजकादत अबइन नमा बेस लगे चिहंक ती नन्ना रई। एन्ने अम्बन मना का नाम अबड़ा मानी ती बेहड़ार'ओत कालोत।

2 एन्देरगेका एका कत्था मेर्या पैकर ती बातारकी रहचा आद मानिम बन्चकी रहचा, अरा एका ओर्तर अदिन मल नंजर अरा मल पेसर आर गे ठौका दंडे खक्खरा।

3 औंगे नाम ई कोइहे कोहाँ नाइरनन हींइ'ओत होले, नाम एकासे दंडे ती बछर'ओत? ई नाइरना गा मुन्द उर्बस ती तेंगतारा अरा ने ने इदन मैजर आर ती ईद नमा गे मानिम अखतारा।

4 धर्मस हूँ चिन्हा अरा अजगुत नलख अरा रकम रकम ही हैकट नलख गुट्ठी ती अरा तंगहै मने लेक्खा नेम्हा बोलतासी बरदानन खट्टना ती इदही गोवाह चिचस।

5 आ बरना पुना सौंसे ही पत नू नाम कछनख'आ लगदत, अदिन राजी नना गे मेर्या पैकारिन धर्मस मल चज्जियस।

6 एकअम ओर्तस नेम्हा पुथी नू ओन अड्डा नू एन्ने ब'अदस, “अना धर्म! आलस ने तंगहै का नीन आसी फिकिर नन्दय अरा मनवा खद्दस ने तंगहै का नीन आसिन ऐरदय खोजदय?”

7 जुक्किम गे नीन आसिन मेर्या पैकर ती सन्नी कमचकय, आसिन महबा दरा मईन आबोन टुपरी अत्ताचकय।

8 उर्मी जिनिसन आसी आकुस नू चिचकय।” धर्मस उर्मी जिनिसन आसी आकुस नू नंजस चिचस खने, एन्द्रन हूँ आसी आकुस ती मल अम्बियस। लिकिन अक्कु गूटी नाम उर्मी जिनिसन आसी आकुस नू मल ऐरदत।

9 लिकिन नाम येसुसिन ऐरदत का आस जोक्क बेड़ा गे मेर्या पैकर ती कटी गुना सन्नी कमकाचस, अरा आस दुक्खे चोदना ती खे'अना ही चड्डे आस गे महबा अरा मईन आबोन टुपरी अत्तारा केरा, अरा नम्है मइय्याँ ता धर्मसी मया ती उर्मी आलर गे आस केच खचियस।



- 10 धर्मस उर्मी जिनिसन कमचस, अरा अबड़ा उर्मी आसी महबा गे रई। आस मने नंजस का आसी महबन बग्गे खददर हिसा मनोर। आँगे आस आलर ही नाइरना ही उर्बस मसीसिन आसी दुक्खे चोदना ती ओन्टा पखड़ मुद्धस कमचस।
- 11 येसुस एकास आलारिन नेम्हा नन्दस अरा ने नेम्हा नन्तारनर, अबड़ा ओर्मर ही बंगस ओन्टेम र'अदस। आँगे येसुस गे आरिन तंग्हे भई ब'आ गे लज्जे मल मनी।
- 12 आस ब'अदस, “ऐन एंग्हे भईर गे निंग्हे पत्त नू तेंगोन, अरा गोइहा एइपा ही मुन्दहारे निंग्हे ओहमन पाड़ोन।”
- 13 आस अउरिम ब'अदस, “ऐन धर्मस मइय्याँ असरा ननोन।” अरा आस अउरिम ब'अदस, “ऐन धर्मस एंगा गे चिच्का खददर गने इसन र'अदन।”
- 14 एन्देरगेका धर्मसी खददर अहड़ा अरा खेंस ती कम्का मनवा आलो हिकनर, आँगे येसुस हूँ आर लेक्खा अहड़ा अरा खेंस नू मंजस। तंग्हे खे'अना ती खे'अना ही अदिया उइय्यू सैतान आबोन नास नना गे आस एन्ने मंजस।
- 15 अरा आलर खे'अना ही इल्चका ती बिट्ठी ननू जोंख लेक्खा तम्हे गोट्टा उज्जना नू र'अनर आरिन अम्बत'आ गे आस एन्ने मंजस।
- 16 एन्देरगेका येसुस मानिम नू मेर्खा पैकर गे मला लिकिन अब्राहमसी जंईपुंईर गे संगरा नना गे बरचस।
- 17 ई चड्डे आस गे जम्मा नू तंग्हे भईर लेक्खा मन्ना चाइ रहचा। आँगे आस धर्मसी सुसर नन्ना नू आर ही सोग्गे ईरू अरा पत्त'अना जोगे कोहाँ नैग मना आँगोस, अरा आस आर ही पाप गुट्ठिन छमा नना गे दाँडे नना आँगोस।
- 18 आस गे बिदूना मंजा खने, आस तानिम दुक्खे सारचस। आँगे आस बिदूना नू दुक्खे सार'उर ही सहाड़ा नना आँगदस।

इब्रानी 3

- 1 आँगे मेर्खा नू आसी गने र'आ गे धर्मसी मेखरना नू खटर'ऊ नेम्हा भईरो! धर्मस ती तइरका अरा कोहाँ नैगस येसुसी पत्त नू चिहुंक लगे सोच'आ, आसी पत्त नुम गा ऐम तेंगा लगदम।
- 2 एकासे मूसस धर्मसी उर्मी आलारिन कइहाब'अना नू पत्त'अना जोगे आल रहचस, अन्नेम येसुस हूँ तंगन ओक्ताचका धर्मस नू पत्त'अना जोगे रहचस।



- 3 एड़पा ती आ एड़पा आबस कोइहे मईन जोगे अखतारदस। अन्नेम मूसस ती येसुस कोइहे मईन जोगे अखतारदस।
- 4 एन्देरगेका उर्मी एड़पा एकअम ओर्त ओर्तर ती कमतारई। लिकिन उर्मी जिनिसन कम'उस धर्मस हिकदस।
- 5 मूसस धर्मसी आलर नू ओन्टा पत'अना जोगे जोंखस रहचस। अन्नेम आस बरना उल्ला नू दहदर मन्ना ही पत नू गोवाह चि'उस रहचस।
- 6 लिकिन मसीस धर्मसी आलर नू पत'अना जोगे खद्दस र'अदस। नाम डिठ नन्ना ती मसीसी मइय्याँ ता नम्है असरा नू बड़ियर इज्जका र'ओत होले, नाम धर्मसी आलत हिकदत।
- 7 ओंगे एकन्ने नेम्हा बोलतस ब'अदस, “इन्ना नीम आसी क्थन मेनोर होले,
- 8 निम्है जियन बेइहा अमा नना, एकासे का निम्है पूरखर टुंगरी नू धर्मसिन बिदचर आ बारी आसी बिइदो नू चोचर।
- 9 असन निम्है पूरखर धर्मसी खतिर नन्नन बिदचर, अन्नु हूँ आर चालीस बछर गूटी आसी अजगुत नलख गुट्ठिन ईरकाचर।
- 10 ओंगे आस आर ही मइय्याँ गोसा मंजस ती बाचस, ‘आर ही मने उर्मी बेइहा एंग्हे ती गेच्छा रई। अरा आर एन्देर नना गे ऐन बेद्ददन अदिन मल नन्नर।’
- 11 ओंगे धर्मस गोसा मंजस ती किरया मोक्खस, ‘आर एंग्हे खन्न ऐख्रना अइडा नू कहियोँ मल कोर'ओर।’”
- 12 अना भईरो! नीम चिहंक र'आ। निम्है ती नेखा हूँ मलदौ अरा मल पत'अना ही जिया अम्बन मना, एकदा निमन उज्जना धर्मस ती तरकूटी ननो।
- 13 लिकिन एका गूटी “इन्ना” ता उल्ला रई आ गूटी नीम उर्मी उल्ला ओर्त ओर्तारिन रिझाब'आ, होले ने हूँ पाप ही फन्दा नू बइअ'ओर ती धर्मसी बिइदो नू बेइहा मल मनोर।
- 14 नाम नम्है मुन्द ता पत'अना नू मुंजना गूटी बड़ियर इज्जका र'ओत होले, नाम ओर्मत मसीसी जम्मा नू सजहा मन्दत।
- 15 एकासे का नेम्हा पुथी बई, “इन्ना नीम आसी क्थन मेनोर होले, निम्है जियन बेइहा अमा नना। एकासे निम्है पूरखर नंजर इकला आर धर्मसी बिइदो नू चोचकाचर।”
- 16 ने धर्मसी ब'अनन मेंजर ती हूँ आसी बिइदो नू चोचर? ईर अबइ ओर्मर रहचर का नेकन मूसस मिसर राजी ती कइहाबाचस ती बहरी ओन्द्रकाचस।



17 अरा आस चालीस बछर गूटी नेखअय मइय्याँ खिंसारका रहचस? ने पाप नंजकाचर आर ही मइय्याँ आस खिंसारका रहचस, अरा आर टुंगरी नू केच्चर केरर।

18 अरा आस नेखअय ती किरया मोक्खस का आर तंगहै खन्न ऐख्रना अड्डा नू इकला हूँ कोर'आ पोल्लोर? ने आसिन मल पेस्रनर आर ही पत नू आस एन्ने बाचस।

19 औंगे नाम ऐरदत का आर ही मल पत'अना ही चड्डे आर आसी खन्न ऐख्रना अड्डा नू कोर'आ पोल्लर।

इब्रानी 4

1 धर्मसी खन्न ऐख्रना अड्डा नू कोरना ही पत ता गच्छरना अक्कु गूटी रई। औंगे नमा चिहूंक र'अना रई का निम्है ती ने हूँ अइय्या कोरना ती अम्बोर अम्बर'आ।

2 एकासे आर गे दौ कत्था मेन्तारा, अन्नेम नमा गे हूँ दौ कत्था मेन्तरा। लिकिन आर दौ कत्थन पत'अना गने मल मेंजर अरा मल पेस्रर, औंगे आर मेंजकाचर आ कत्था आर गे एन्द्रा हूँ फैदा मल चिच्चा।

3 लिकिन नाम गा पत'ऊ आलत मंजकत खने नाम आ खन्न ऐख्रना अड्डा नू कोरदत। अरा ने मल पताचर आर ही पत नू धर्मस एन्ने बाचस, “ऐन गोसा मंजकन ती किरया मोक्कन, ‘आर एंगहै खन्न ऐख्रना अड्डा नू कहियोँ मल कोर'ओर।” अन्नु हूँ धर्मस सौंसेन गढ़ना ही बेड़ा नुम ई खन्न ऐख्रना अड्डा सपड़ारत'अरकी उड़रकी रई।


4 एकासे का हप्ता ही सातवां उल्ला ही पत नू नेम्हा पुथी एन्ने बई, “धर्मस तंगहै उर्मी नलखन मुंजियस ती सातवां उल्ला खन्न ईखियस।”

5 लिकिन धर्मस नेम्हा पुथी नू नन्ना अड्डा नू एन्ने हूँ ब'अदस, “आर एंगहै खन्न ऐख्रना अड्डा नू कहियोँ मल कोर'ओर।”

6 मुन्द ता बेड़ा नू मेन्तारका आ दौ कत्थन ने मेंजर आर तम्है मल पेस्रना ती खन्न ऐख्रना अड्डा नू मल कोरचर। अन्नु हूँ जोक्क आलर अइय्या कोर'आ गे ईद धर्मस ती उड़र खच्चरकी रई।

7-8 औंगे धर्मस ईद गे ओन्टा नन्ना उल्लन ओक्ताचस, इदिन दिम “इन्ना” एन्ने ब'अदस। एन्देरगेका यहोसुस इस्राएल आलारिन खन्न ऐख्रना अड्डा नू मंखिकाचस होले, धर्मस बग्गे बेड़ा ही खोखा नन्ना उल्ला ही पत नू मल तिका र'ओस दने। औंगेम गा आस नगदे चान खोखा दाऊदस ती बाचस, एकासे मुन्द बारकी रई, “इन्ना नीम आसी कत्थन मेनोर होले, निम्है जियन बेड़हा अमके नना।”

9 औंगे ईद ईदई का धर्मसी आलर गे ओन्टा मुद्ध खन्न ऐख्रना बेड़ा धर्मस ती उड़र खच्चरकी रई।



- 10 एकास धर्मसी खन्न ऐखना अड्डा नू कोरदस आस धर्मस एकासे खन्न ईखियस अन्ने तान हूँ तंगहै नलख ती खन्न ऐखदस।
- 11 औंगे नाम आ खन्न ऐखना अड्डा नू कोर'आ गे बग्गे तिहा नन्दत नेकअन, लिकिन आर एकासे नंजर अन्ने नाम धर्मसिन मल पेस'ओत होले, खत्र'ओत क'ओत।
- 12 धर्मसी कथा गा उज्जना अरा सवंगिय अरा उर्मी अखी-पखी धारे तलवार ती कोइहे धारे रई, अरा आद जिया अरा बोलता, अरा टोकना टोकना अरा खोचोल ही गुद्दा गुद्दा गूटी अंडसतई ती भगिई चिई, अरा जिया ही सोच अरा मने गुट्ठिन दहदर ननी।
- 13 कम्मका ओर्मा धर्मस ती एन्द्रा हूँ मल्ला नूरका। अरा आसी खन्न ही मुन्दहारे उर्मी जिनिंस फरीफरी अरा दहदर रई। आस गे नम्हा नंजका ओर्मा ही लेखा चि'अना रई।
- 14 नमा गे ओन्टा कोहाँ नैगस र'अस, आस मेर्खा कोरचस। आसिम धर्मसी खद्दस येसुस हिकदस। औंगे नाम आसी मइय्याँ ता नम्है पत'अना नू बड़ियर र'अदत नेकअन।
- 15 नम्है एन्ने कोहाँ नैगस र'अस का ने नम्है पयहा नू नम्है गने दुक्खे सार'आ औंगदस। आस गा खेखेल नू उज्जो बारी उर्मी रकम ती नम्है लेक्खा बिट्स, लिकिन एन्दे हूँ पाप मल नंजस।
- 16 औंगे नाम डिठ गने नम्है धर्मसी मया ही बेल-गदिया गुसन बरदत नेकअन का असन आस नम्है मइय्याँ सोग्गे ऐरोस, अरा नम्है चाइ ही बेड़ा नू नम्है सहाड़ा ननोस ती मया ननोस।

इब्रानी 5

- 1 उर्मी कोहाँ नैगर गा आलर तिम चाजतारका आलर गे आर ही अड्डा नू आस धर्मसी मुन्दहारे तेतर-सुसर ननरकी आर ही कथा गुट्ठिन ननू आलस ओक्तारदस। ईसिम आर ही दान गुट्ठिन अरा पाप गुट्ठी गे दाँडे गुट्ठिन अरगदस।
- 2 आस मल बुझ'उर ती अरा बेहड़ारका आलर ती लुदऊ जिया ती कछनखरऊ आलस र'अदस, एन्देगेका आस तान हूँ तंगहा नू एन्ने पयहा आलस र'अदस।
- 3 ई चड्डेम आस तंगहा पाप गुट्ठी गे हूँ अरा आलर ही पाप गुट्ठी गे हूँ दाँडे गुट्ठिन अरगना रई।
- 4 ने हूँ ई मईन ही कोहाँ नैग नलख आबोन तान तंगानिम चाजा पुल्ली। आरोनस बेसे आस हूँ धर्मस ती मेखका र'अना रई।
- 5 अन्नेम मसीस हूँ कोहाँ नैग मन्ना ही मईन आबोन तंगहै ती मल होचस। लिकिन धर्मस आसिन चज्जियस। धर्मस आसिन बाचस, “नीन एंगहै खद्दय, इन्ना ऐन निंगहै बंग मंजकादन।”



6 अरा धर्मेस नेम्हा पुथी नू नन्ना अड्डा नू आसी पत्त नू एन्ने ब'अदस, “नीन मेलखिसेदेक लेक्खा उर्मी उल्ला नैग र'अदय।”

7 येसुस खेखेल नू उज्जना बेड़ा, ने आसिन खे'अना ती बछाब'आ ऑगदस आ धर्मेसिन चिच्चियारनुम अरा चींखनुम गोहरारस ती बिन्ती नंजस। आस धर्मेसिन कोहाँ मईन नन्ना ती आसी गोहरारनन धर्मेस मँजस।

8 आस धर्मेसी खद्दस रहचस, अन्नु हूँ आस दुक्खे चोदस ती पेस्रनन सिरप्रस।

9-10 आस बड़ियर मंज खच्चियस ती अरा धर्मेस ती मेलखिसेदेक लेक्खा कोहाँ नैग ही अड्डा खक्खियस ती ने आसिन पेस्रनर, आर ओर्मर गे जनमजुग गे नाइरना ही चड्डे मंजस केरस।

11 ऐम इदही पत्त नू नगदे कत्था ब'आ बेद्ददम, लिकिन अदिन बुझुरत'अना सेब्बा मलकी। इदगेका नीम लेम मल बुझुरदर।

12 ई बेड़ा गूटी गा निमा धर्मेसी कत्था ही सिखाब'ऊ मन्ना रहचा, लिकिन नीम गा एन्ने दसा नू र'अदर का अउर ओर्तस पारेइ मुन्द निमा गे धर्मेसी कत्थन ओर तिम सिखाब'अना ही चाइ र'ई। नीम गा अक्कु गूटी बोलो खद्दर लेक्खा र'अदर, नेका मंडी ही मला दुदही ही चाइ र'ई।

13 एन्देरगेका दुदही ती उज्जुस बोलो खद्द लेक्खा र'अदस, आस एन्द्रा उजगो र'ई अरा अदिन एकासे नन्ना र'ई अदिन बलदस।

14 लिकिन बुधियार मंजकर गे मंडी र'ई। आर हेभरना हेभरना ती दौ अरा मलदौ आबोन चिन्हना नू बड़ियर मंजका र'अनर।

इब्रानी 6

1 ऑंगे बरा, नाम मसीसी पत्त ता ओर ही सिखाब'अना नू लेका मला इज्जका ती बड़ियर मन्ना ही तरा मुन्द ऐकोत क'ओत। मसी उज्जना ही नेव ही मुध कत्था गुट्ठिन घड़ी घड़ी अदिनिम तेंगना ही चाइ मलकी: मलदौ नलख ती जियन किर्त'अना, अरा धर्मेस मइय्याँ पत्त'अना,

2 अरा नोइना मंजना गुट्ठी ही पत्त ता सिखाब'अना, अरा पत्त'ऊ आलर ही मइय्याँ खेक्खा गुट्ठी उइय्ना, अरा केचकर ही उज्जा चो'अना, अरा धर्मेसी रायबड़ी ती जनमजुग खक्खना ही पत्त ता कत्था।

3 नाम एन्ने ओर ही सिखाब'अनन अम्बोत ती धर्मेसी मने र'ई होले, नमन बड़ियर मन्ना ही अउरिम सिखाब'अना ती मुन्द ऐकोत क'ओत।



- 4 एन्देरगेका ने आंग्होन धर्मसी बिल्ली नू रहचकर अरा धर्मसी आसीस आबोन अगमाचकानर अरा तम्है बटा ही नेम्हा बोलतासिन खक्खकानर,
- 5 अरा धर्मसी कत्था ही दौ अरा बरना पुना सौंसे ही सवंग आबोन अगमाचकानर,
- 6 आर बेहडार'ओर क'ओर होले, आरिन अउरिम जिया किर्त'अना नू ओन्द्र'आ पोल्लो दिम हिके। एन्देरगेका आर धर्मसी खद्दासिन तमा गे अउरिम क्रुस नू अरग'अनर अरा आलर ही मुन्दहारे आसिन लज्जे मोखत'अनर।
- 7 जोक्क आलर एन्ने हिकनर का एका खेखेल तंग्हे मड्य्याँ खत्तरना चेपन सूखई अरा ने अड्य्या चाँखनर इदनर आर गे दौ खंजपा खंजई होले, आद धर्मसी आसीस आबोन खक्खी।
- 8 लिकिन एका खेखेल खोप्पा अरा अचो गुट्ठिन कुन्दती होले, आद अनभनियाँ रई अरा आद धर्मस ती भखनन खक्खना नू रई अरा मुंजना नू आद बस्सतार'ओ क'ओ। ईद लेक्खा नन्ना आलर हिकनर।
- 9 बेस संगेरो! ऐम ई लेक्खा ब'आ लगदम, अन्नु हूँ निम्है पत नू नीम इदही ती कोइहे बेस नलख गुट्ठिन ननोर अरा नाइरना ही इहरे नू ऐकोर, एन्ने एमा पखइ असरा रई।
- 10 धर्मस गा मलदौ नेंवई ननू मलदस। नीम आस गे एका कोइहे नलख नंजकर अरा नीम अक्कु नन्ना लेक्खा एकासे आसिन पत'ऊ आलर गे संगरा नन्ना ती निम्है आसी मड्य्याँ ता चोन्हा आबोन ऐदकादर, अदिन आस मल मोधर'ओस।
- 11 ऐन बेद्ददन का नीम एन्देरगे असरा नन्दर आद मंज खच्चना गूटी निम्है नू ओर्मर मुंजना गूटी एन्नेम नलख नन्नते र'अना रई।
- 12 ऐम बेद्ददम का नीम लंडी अमा मना। लिकिन ईर लेक्खा र'आ का ने पत'अना अरा सहना ही चड्डे धर्मस आर गे गच्छरका गच्छरकन खक्खियर।
- 13 धर्मस अब्राहमस गने गच्छरकाचस खने, आस तंग्हे नामे ती किरया मोक्खस। एन्देरगेका आसी ती कोहाँ ने हूँ मल रहचस का आसी नामे ती किरया मोखोस।
- 14 धर्मस आसिन बाचस, “ऐन निम्है मड्य्याँ बरकत पुईत'अत र'ओन अरा निंगा ढेर बग्गे जंईपुंई गुट्ठिन चि'ओन।”
- 15 तहाँ अब्राहमस खतीर नंजका ती पाब ऐरना ही खोखा तंगा गे गच्छरका आबोन खक्खियस।
- 16 आलर तम्है ती कोहाँसी नामेन हो'अरकी किरया मोखनर। आ किरया ती तम्है बाचका कत्था मानिम मनी अरा उर्मी नग्गानखना मुंजई कई।



17औंगे धर्मेस एन्देर गच्छरस अदिन खक्खू ने र'अनर आर गे आसी गच्छरकन मानिम ऐद'आ बिद्दियस। अरा आस आरिन फरीफरी बुझुरत'आ गे बिद्दियस का आसी चिताबुता कहियों मल बदलार'ओ, औंगे आस किरया मोक्खस।

18औंगे धर्मेस गच्छरस अरा किरया मोक्खस। इबड़ा ऐंड कत्था मल बदलार'ओ, एन्देरगेका धर्मेस ती ठकवा ब'अना कहियों मल मनो। औंगे नम्है मुन्दहारे उइयका र'ई आ असरा आबोन खक्खा गे नाम धर्मेस हेददे बोंगालदत। नमन बड़ियर गने रिझत'आ गे धर्मेस एन्ने नंजस।

19कोहाँ डोंगा आबोन समुदर नू इज्जत'आ गे बउरारना कोहाँ झगर बेसे आ असरा नम्है जिया गे बड़ियर अरा सम्भड़ारना हवे। आ असरा धर्मेसी मन्दिर ही परदा ही भितरी ता कोइहे नेम्हा अड्डा नू कोरचकी र'ई।

20एन्देरगेका असन येसु मसीस नम्है ती मुन्द नमा गे केरका र'अदस। आस मेलखिसेदेक लेक्खा उर्मी उल्ला गे नम्है कोहाँ नैग मंजका र'अदस।

इब्रानी 7

1ई मेलखिसेदेक सालेम नगरे ता बेलस अरा उर्मी ती कोहाँ धर्मेसी नैगस हूँ रहचस। अब्राहमस बेलारिन जितचस ती किर्ी लगियस खने ईसिम आसिन भेंटारस ती आस गे आसीस चिच्चस।

2तहाँ अब्राहमस तान जितचका ती ओन्द्रका उर्मी जिनिस ही दसमांस मेलखिसेदेकस गे चिच्चस। मेलखिसेदेक नामे ही माने “उजगो ही बेलस”, अरा सालेम ही बेलस ही माने “कोडे ही बेलस” हवे।

3ईसी बंगस महले ईसी अयंग महले ईसी खूँटी महले ईसी उज्जना ही ओर महले ईसी उज्जना ही मुंजना ही पत नू ने हूँ बलनर। ईस धर्मेसी खद्दस लेक्खा उर्मी उल्ला गे नैगस कमका र'अदस।

4नीम सोच'आ का मेलखिसेदेकस एका कोइहे कोहाँ आलस रहचस। नम्है कोहाँ पूरखस अब्राहमस हूँ तान बेलारिन जितचका ती ओन्द्रका उर्मी जिनिस ही दसमांस आस गे चिच्चस।

5मूसासी नैग ब'ई का लेवी गोतर ती ने नैगर मंजकानर आर गे ईसाऐल आलर ती दसमांस खोजना र'ई। इबड़ा नैगर अरा इसाऐल आलर इबड़ा इरबारिम अब्राहमसी जंईपुंईर दिम हिकनर।

6लिकिन मेलखिसेदेक गा लेवी गोतर ता मल रहचस। अन्नु हूँ अब्राहमस ती आस दसमांस खूजियस। अरा धर्मेस ती गच्छरका गुट्ठिन खक्खका अब्राहमसिन आस आसीस नंजस।

7इय्या दोभिदी मल्ला का सन्निस कोहँस ती आसीस खक्खदस।



- 8इसन नैगर गा खेअना काना आलर हिकनर, आर दसमांस गुट्ठी खोजनर। लिकिन मेलखिसेदेकस गा ने अब्राहमस ती दसमांस खक्खियस, आसी पत्त नू नेम्हा पुथी बई का आस उज्जा लगदस।
- 9नाम एन्ने हूँ ब'आ ओंगदत का दसमांस खोजू लेवीस हूँ अब्राहमस ती दसमांस मेलखिसेदेकस गे चिच्चस।
- 10एन्देरगेका इकला मेलखिसेदेकस अब्राहमस गने भेंट मंजस आ बारी लेवीस तंग्हे पूरखस अब्राहमसी मेद नूरहचस।
- 11लेवी गोतर ती बरचका नैगर ही नैग नलख धर्मस ती इस्राएल आलर गे खक्खका नेग ती रई। ई लेवी गोतर ता नैगर ही नलख ती धर्मसी बेद्दना बड़ियर मन्ना मल मंजा, खने आरोनसी बनसन अम्बियस ती मेलखिसेदेक नैगासी लेक्खा नन्ना नैगस बरना चाड़ रहचा।
- 12अरा नैगासी अड्डा बदलतारई खने, नेग ही हूँ बदलारना चाड़ मनी।
- 13ऐम मसीसी पत्त नू इबड़ा कत्थन ब'अदम। आस नन्ना गोतर ता हिकदस अरा आ गोतर ती ने हूँ गोड़हा नू नैग लेक्खा नलख मल्ला नंजका।
- 14ईद फरीफरी रई का नम्हे उर्बस यहूदा गोतोर ती बरचस, अरा ई गोतोर ती नैगर बरना ही पत्त नू मूसस एन्देर हूँ मल बाचस।
- 15नैगासी अड्डा बदलारना पत्त ता ई कत्था अउरिम कोइहे फरीफरी मनी का इकला मेलखिसेदेक लेक्खा अउर नन्ना नैगस दहदर मंजकादस।
- 16लेवी गोतर ती बरना एन्ने ब'ऊ आलर ही नेग चाल ही लेक्खा मल्ला, लिकिन मल नठारना उज्जना ही सवंग ती येसुस नैग मंजस।
- 17एन्देरगेका आसी पत्त नू नेम्हा पुथी बई, “नीन मेलखिसेदेक लेक्खा उर्मी उल्ला नैग र'अदय।”
- 18तहाँ नैग नलख ही पत्त ता पच्चा नेग तेभरा केरा, एन्देरगेका ईद पयहा दरा अनभनियाँ रहचा।
- 19मूसासी नेग एन्द्रेन हूँ बड़ियर नना पोल्ला। लिकिन अक्कुन नमा गे ओन्टा कोइहे असरा चितारकी रई, आद ती नाम धर्मस गुसन अंडसदत।
- 20ई पुना तरिका धर्मसी किरया मोखना ती असरा जोगे मंजा। आरोनसी बनस ता आलर गा बिगर किरया मोक्का ती नैग मंजर,



- 21 लिकिन मसीस धर्मसी किरया मोक्का ती नैग मंजस। धर्मस आसी पत नू एन्ने बाचस, “उर्बस किरया मोक्का र'अदस अरा आस अत्रु तंग्हे मनेन मल बदल'ओस का 'नीन जनमजुग ही नैग हिकदय।”
- 22 ई किरया ती येसुस ओन्टा बेस गच्छरना ही जमानत मंजस।
- 23 अबड़ा नैगर गा बग्गे रहचर, एन्देरगेका आर तम्हे नलखन नन्तेम र'आ गे खे'अना आरिन मल चि'आलिया।
- 24 लिकिन येसुस गा जनमजुग गूटी उज्जदस, ई चड्डे आसी नैग नलख जनमजुग गे मल गुछर'ई।
- 25 आँगे ने ईसी तरती धर्मस गुसन बरनर आरिन आस ओर्मा उल्ला गे नाड़ा खच्चा आँगदस, एन्देरगेका आस आर गे गोहरार'आ गे जनमजुग गूटी उज्जा लगदस।
- 26 एन्नेम नम्हे चाड़ ही लेक्खा आस नमा कोहाँ नैगस र'अदस। आस नेम्हा अरा बिगर बदी मंजका अरा बिगर दगहा हिकदस। अरा आस पपहर ती भिने मंजका आल र'अदस, अरा आस गे मेर्खा नू मईन ही कोड़हे कोहाँ अड्डा चितारकी र'ई।
- 27 आस अबड़ा कोहाँ नैगर लेक्खा मल्दस, एकार उर्मी उल्ला मुन्द तम्हे पाप गुट्ठी गे अरा फिन आलर ही पाप गुट्ठी गे दाँडे गुट्ठी अरगना र'ई। लिकिन आर लेक्खा आस गे दाँडे अरगना ही चाड़ मल्ला। एन्देरगेका येसुस गा तंगन दिम आलर ही पाप गे दाँडे अरगस ती अदिन आँगहोन लेका नू पूरा नंज खच्चियस।
- 28 मूसासी नैग गा पपहर लेक्खा पयहा आलारिन कोहाँ नैग उकत'ई। लिकिन ई नैग ही खोखा बरचका धर्मसी किरया ही कत्था गा जनमजुग गे पखड़ नन्तारका धर्मसी खद्दासिन कोहाँ नैग उकत'ई।

इब्रानी 8

- 1 अक्कु एका कत्थन ऐम ब'आ लगदम, अबड़ा कत्था ही मने ईद र'ई का नम्हे एन्ने कोहाँ नैगस र'अस, आस महबा ती निन्द्रका धर्मसी बेल-गदिया ही तीना चोक्ख उक्कादस।
- 2 अरा आस असन कोड़हे नेम्हा अड्डा नू सुसर नन्दस। ईदिम महबा नन्ना ही मानिम अड्डा हवे। इदिन आलर मल्ला कमचका लिकिन धर्मस दिम कमचकादस।
- 3 उर्मी कोहाँ नैगर दान गुट्ठिन अरा दाँडे गुट्ठिन अरग'आ गे ओक्तारकानर। ई चड्डे नम्हे कोहाँ नैगस गे हूँ इन्द्रिइम अरग'आ गे चाड़ र'ई।



4आस खेखेल नू रहचका होले, आस नैग मल मनोस दने। एन्देरगेका इसन मूसासी नेग ही लेक्खा दान गुट्ठिन अरग'ऊ नैगर मुन्द तिम र'अनर।

5आर मेर्खा नू र'ऊ नेम्हा अड्डा ही रूप नू अरा ऐख ही लेक्खा इसन र'ऊ नेम्हा अड्डा नू सुसर नन्नर। मूसस गा नेम्हा कोहाँ कुम्बा कम'आ गे सपडारना नू रहचस खने, आस गे धर्मस ती एन्ने चेताब'अना खक्खा का, “ऐरा, एका नमुना निंगा परता नू ऐदका रहचकन अदही लेक्खम उर्मिन कम'आ गे चिहंक र'आ।”

6लिकिन अक्कु येसुस गे चितारका नैग नलख अबडा नैगर गे चितारका नलख ती कोइहे कोहाँ नलख र'ई। एन्नेम पच्चा गच्छरना ती येसुस मझी आल मनरकी मंजका पुना गच्छरना बेस हवे, एकाद धर्मसी बेस गच्छरका गुट्ठी ती कम्की र'ई।

7एन्देरगेका मुन्द ता गच्छरना नू दगहा मल मंजका होले, नन्ना गच्छरना ही चाइ मल मनो दने।

8लिकिन उर्बस आलर नू दगहन खक्खयस ती बाचस, “ऐरा! आ उल्ला अंडसा लगी का ऐन इस्राएल अरा यहूदा आलर गने पुना गच्छरनन गच्छर'ओन।

9ई गच्छरना एन्ने मल र'ओ का एकदन ऐन आर ही पूरखर गने गच्छरका रहचकन, इकला ऐन आर ही खेक्खन धर्चकन ती मिसर राजी ती ओथ्रकन ओन्द्रकन, लिकिन आर एंग्हे गच्छरना नू बडियर मल रहचर, औंगे ऐन आरिन अम्बकन चिक्कन।

10उर्बस फिन ब'अदस का, ‘अबडा उल्ला ही खोखा ऐन इस्राएल आलर गने पुना गच्छरनन गच्छर'ओन, आद ईद का, ऐन एंग्हे नेग गुट्ठिन आर ही जिया नू उड्योन अरा अबइन आर ही जिया नू लिख'ओन, अरा ऐन आर ही धर्म मनोन, अरा आर एंग्हे आल मनोर।

11अरा आर तम्है अरबर-परबर अरा पाहियर गे ‘नीन धर्मसिन चिन्ह'आ’ एन्ने सिखाब'आ गे चाइ मल र'ओ। एन्देरगेका सन्नीर ती कोहँर गूटी ओर्मर एंगन अखओर होओर।

12एन्देरगेका ऐन आर ही मलदौ गुट्ठिन अम्बोन चि'ओन अरा आर ही पाप गुट्ठिन फेन कहियो मल सुरत'ओन।”

13धर्मस इदन पुना गच्छरना बाचस। खने आस मुन्द ता गच्छरनन पच्चा नंजकादस। औंगे आद अक्कुन मल बउरारना नू अरा पच्चा मन्ना नू अरा तेभरना काना नू र'ई।

इब्रानी 9

1मुन्द ता आ गच्छरना नू धर्मसिन महबा नन्ना ही चाल गुट्ठी रहचा, अरा ई खेखेल ता महबा नन्ना ही नेम्हा अड्डा ही पत्त नू रहचा।



- 2 एकासे का ओन्टा कोहाँ कुम्बा कमतारकी रहचा। अइय्या दुई भाग रहचा। मुन्द ता भाग नू टट्ठी अरा टीबुल अरा टीबुल मइय्याँ धर्मस गे दाँडे अरगका असमा गुट्ठी रहचा। अरा आद नेम्हा अड्डा बार'ई।
- 3 फिन ओन्टा परदा रहचा। अरा आ परदा ही खोखा नन्ना भाग रहचा। आद कोइहे नेम्हा अड्डा बार'ई।
- 4 अइय्या सोना ही धूप कुहड़'अना ही गोइहा अरा चरियो तरा सोना ती मइचका गच्छरना ही बकसा रहचा। अरा आ बकसा नू मन्ना ती निन्दका सोना ही लोटा अरा आरोनसी खूरका डंडा अरा दस पेसका लिखका गच्छरना ही पखना ही सिलोट गुट्ठी रहचा।
- 5 आ बकसा ही मइय्याँ धर्मसी महबन ईद'ऊ आलो गुट्ठी रहचा, अदही डेना बिथराचका ती बकसा ही डबना मइय्याँ ऐख नंजकी रहचा, इसानिम पाप अम्बर'आ लगिया। इबड़ा ही पत्त नू अउरिम बग्गे तेंगा गे अक्कुन पोलदम।
- 6 ई लेक्खा इबड़ा उर्मिन सपड़ाचका र'अना ती आ नैगर उर्मी उल्ला आ कोहाँ कुम्बा ही मुन्द ता भाग नू तम्हें सुसर आबोन नना गे कालालियर।
- 7 लिकिन नन्ना भाग कोइहे नेम्हा अड्डा नू कोहाँ नैगस लेका बछर नू आँग्होन लेका कादस, अरा बिगर खेंस होच्यका मल कादस, अदिन आस तान अरा आलर बलका ती नंजका पाप गुट्ठी गे अरगदस।
- 8 इत्रु नेम्हा बोलतस इदन नमा गे ऐद्ददस का एका गूटी मुन्द ता नेम्हा कोहाँ कुम्बा बउर'अना नू र'ई आ गूटी मेर्खा ता कोइहे नेम्हा अड्डा ही डहरे मल तिसग्र'ई।
- 9 ई कोहाँ कुम्बा अक्कु ता बेड़ा ही जोक्खा लेक्खा र'ई। अइय्या एन्ने दान अरा दाँडे गुट्ठिन अरगनर, अत्रु अइय्या महबा ननू आलर ही लखनन पखड़ नना पुल्ली।
- 10 अबड़ा गा ओन्ना-मोखना ही आलो गुट्ठी अरा रकम रकम ही नोइना मंजना ही मेद ही चाल गुट्ठी हवे, एकदा पुना नेत बरना गूटी गा नलख मनी।
- 11 लिकिन मसीस बरना दौ आबोन चि'ऊ कोहाँ नैग मंजस ती बरचस खने, आस इत्रु ती कोहाँ अरा कोइहे पखड़ मेर्खा ता कोहाँ कुम्बा नू कोरचकादस, एकदा आलर ही खेक्खा ता कम्प्रका मल्ली अरा ई गट्टका सौंसे ही हूँ मल्ली।
- 12 मसीस बोकड़ा अरा बछरु गुट्ठी ही खेंस ती मला, लिकिन तंग्हे खेंस ती दिम आँग्होन लेका कोइहे नेम्हा अड्डा नू कोरचस, आँगे आस जनमजुग नाइरनन नमा गे चि'आ उंगियस।



- 13 बोकड़ा गुट्ठी अरा बछा गुट्ठी ही खेस अरा बछिया ही चिंदी आबोन चाल ही सोतरा आलर गुट्ठी मइय्याँ छिंछड़ा अना आरिन सुध ननी।
- 14 अन्ने होले मसीसी खेस नमा लखनन मलदौ नलख गुट्ठी ती एका कोइहे सुध ननो दने, औंगे नाम उज्जना धर्मसिन सुसर नना औंगदत। एन्देरगेका मसीस जनमजुग ही बोलतासी सवंग ती तंगन नम्है पाप गुट्ठी गो पखड़ दाँड़े बेसे धर्मस गो अरगस।
- 15 मसीस दिम पुना गच्छरना ही धर्मस अरा आलर ही मझी आलस र'अस, औंगे धर्मस ती मेखका आलर ओर्मर आसी गच्छरका जनमजुग आसीस आबोन खक्खा औंगनर। एन्देरगेका आलर मुन्द ता गच्छरना ही बेड़ा नूनंजका पाप गुट्ठी ती आरिन अम्बत'आ गो मसीस केचस।
- 16 वसीयतनामा ही पत नू गा ने आ वसीयतनामा नंजकादस, आसी खे'अना ही पुरुब र'अना ही चाड़ मनी,
- 17 एन्देरगेका वसीयतनामा नंजका आलस एका गूटी उज्जदस आ गूटी आ वसीयतनामा नलख नू माल बर'ई। आसी केचका खोखा दिम आ वसीयतनामा नलख नू बर'ई।
- 18 ई लेक्खम मुन्द ता गच्छरना हूँ खेस ती नलख नू बरचा।
- 19 मूसस गा नेग ही उर्मी पेसकन इस्राएल आलर गो मन्त'आ खच्चियस खने, बछवा अरा बोकड़ा गुट्ठी ही खेसन होचस ती अम्मु भिड़ाबाचस ती खेसो मेरन हुस्सोप खोप्पा ही डाड़ा नू हेंचस ती नेग ही पुथी अरा उर्मी आलर मइय्याँ छिंछड़ाचस चिचस।
- 20 अरा बाचस, “ई खेस मन'आ गो धर्मस निम्है गने मंजका गच्छरनन बड़ियर ननी।”
- 21 ई लेक्खम आस नेम्हा कोहाँ कुम्बा अरा महबा नना गो बउरारना उर्मी जिनिस नू आ खेसन छिंछड़ाचस।
- 22 मानी गा, मूसासी नेग ही लेक्खा मलागूटी उर्मी जिनिस खेस ती सुध मन्तार'ई, अरा बेगर खेस चूरखका पाप ही अम्बरना मलकी।
- 23 ई चड्डे मेर्खा ता मानिम जिनिस ही रूपे लेक्खा नू र'ऊ कोहाँ कुम्बा अरा अदही जिनिस जम्मा ई लेक्खा दाँड़े गुट्ठी ती सुध मन्तारना ही चाड़ र'ई। अन्ने होले मेर्खा ता मानिम जिनिस गा इबड़ा ती कोइहे बेस दाँड़े गुट्ठी ती सुध मन्तारना र'ई।
- 24 मसीस गा आलर ही खेक्खा ती कमका कोइहे नेम्हा अड्डा नू मल कोरचस, एकदा मेर्खा नू र'ऊ मानिम कोइहे नेम्हा अड्डा ही रूपे लेक्खा नू र'ई। लिकिन आस मेर्खा नुम कोरचस ती नमा संगरा नना गो अक्कु धर्मसी मुन्दहारे र'अदस।



25 एकासे कोहाँ नैगस चानुम आँग्होन आँग्होन मेक्खो ही खेंसन हो अदस ती कोइहे नेम्हा अइडा नू कोरदस, लिकिन मसीस तंगन घड़ी घड़ी दाँड़े अरग'आ गे मेर्खा मल कोरचस।

26 अन्ने चाइ रहचा होले, खेखेल गढ़का ती आस गे घड़ी घड़ी दुक्खे चोदना मनो दने। लिकिन अक्कु सौंसे ही छेद बेड़ा नू आस आँग्होन लेका तंगन खेअना ही दाँड़े ती पाप गुट्ठिन ओथ्र'आ गे दहदर मंजकादस।

27 एकासे का आलर गे आँग्होन खेअना अरा अदही खोखा नेंवई मन्ना ओक्तारकी रई।

28 अन्नेम मसीस हूँ बग्गे आलर ही पाप गुट्ठिन ओथ्र'आ गे आँग्होन दाँड़े मन्तारस। अरा आस दुसर खेप बर'ओस। आस पाप गुट्ठिन चोद'आ गे मला, लिकिन एकार आसी पाब ऐरालनर आर गे नाइरनन ओन्द्र'ओस बर'ओस।

इब्रानी 10

1 मूसासी नेग बरना दौ जिनिस ही ऐख लेक्खा दिम रई। अबड़ा नू तम्है ती धर्मस चि'ऊ दौ जिनिस मलकी। ई चड्डे दिम चानुम घड़ी घड़ी नंजका दाँड़े ती नेग महबा नना गे बर'ऊ आलारिन कहियो पखड़ नना पुल्ली।

2 नेग आरिन पखड़ नना ऊंगका होले, दाँड़े अरगना मुंजुरकी र'ओ दने। महबा ननू आलर गा आँग्होन लेका सुध मंज खच्चिका ती फेन आर ही लखना आरिन बदी मल टेक'आ ब'ओ दने।

3 लिकिन इबड़ा दाँड़े उर्मी चान पाप गुट्ठिन सुरता ननू रई।

4 एन्देरगेका बछा अरा बोकड़ा गुट्ठी ही खेंस पाप गुट्ठिन कहियो ओथ्र'आ पुल्ली।

5 इदगेम येसुस खेखेल नू बरना बेड़ा नू धर्मसिन बाचस, “दाँड़े अरा दान गुट्ठिन नीन मल बिदकय, लिकिन एंगा गे ओन्टा मेदन दाँड़े अरग'आ गे सपड़ाचकय।

6 बस्सना दाँड़े गुट्ठिन अरा नन्ना दाँड़े गुट्ठिन एकदा पापन ओथ्र'आ गे नन्नर अबड़न नीन मल पतारकय।

7 औंगे ऐन बाचकन, ‘ऐरा! नेम्हा पुथी नू लिखका लेक्खा, अना धर्म! ऐन निंग्हे मनेन नना गे बरचकादन।’”

8 मइय्याँ आस बाचस का, “धर्मस दाँड़े अरा दान अरा बस्सना दाँड़े अरा पापन ओथ्र'आ गे नन्ना ही दाँड़े गुट्ठिन मल बिददियस अरा अबड़ा ती आस मल पतारस।” अन्नु हूँ मूसासी नेग ती अबड़ा गे चाइ रई।



- 9फिन आस बाचस, “ऐरा, ऐन निंग्हे मनेन नना गे बरचकादन।” आँगे आस मुन्द ता चालन ताइचस ती नन्ना चालन ओक्त'अदस।
- 10ई लेक्खम आसी मने ती नाम येसु मसीसी मेद ही उनीम हेल दाँडे मन्ना ती नेम्हा मन्तारका र'अदत।
- 11उर्मी नैगर गा गोइहा ही मुन्दहारे इजनर ती उर्मी उल्ला तम्हे नैग नलखन नन्नर। अरा घड़ी घड़ी उनुम मदहे दाँडेन अरगनर। इबड़ा दाँडे गा पाप गुट्ठिन ओथ्र'आ गे कहियोँ पुल्ली।
- 12लिकिन नम्हे कोहाँ नैगस येसुस गा पाप गुट्ठी ही उनिम दाँडेन सगर घड़ी गे अरगस ती धर्मसी तीना चोक्ख उक्कियस।
- 13अरा आस असन तंग्हे बैरि र तंग्हे खेडमूली खतर'ओर आ गूटी पाब ऐरा लगदस।
- 14आँगे आस उनिम दाँडे ती नेम्हा मनू आलारिन जनमजुग गे पखड़ नंजस।
- 15अरा नेम्हा बोलतस हूँ नमन इबड़ा ही पत्त नू गोवाह चि'अदस। आस गा ब'अदस,
- 16“अबड़ा उल्ला ही खोखा ऐन उर्बस आर गने पुना गच्छरनन गच्छर'ओन, आद ईद का, ऐन एंग्हे नेग गुट्ठिन आर ही जिया नू उइय्योन अरा अबड़न आर ही जिया नू लिख'ओन।”
- 17अउर हूँ आस ब'अदस, “ऐन आर ही पाप अरा मलदौ नलख गुट्ठिन फेन कहियोँ मल सुरत'ओन।”
- 18आँगे अक्कु एसन पाप गुट्ठी अम्बतारा केरा असन पाप गुट्ठिन ओथ्र'आ गे एन्द्रा हूँ दाँडे ही चाइ मलकी।
- 19_20आँगे अना भईरो! मेर्खा ता कोइहे नेम्हा अड्डा नू नमा कोर'आ गे येसुस तंग्हे मेद लेक्खा ता परदा नू मन्नुम ती तंग्हे खे'अना ती ओन्टा पुना अरा उज्जना ही इहरेन नमा गे तिसिगका र'अस। आ इहरे ती असन कोर'आ गे आसी खेंस ती नमा गे डिठ मनी।
- 21अरा आस नम्हे कोहाँ नैगस र'अना ती आस धर्मसी एइपा ता आकुस ननुस र'अस।
- 22आँगे बरा! नाम बड़ियर पत्त'अना गने मानिम जिया गने धर्मसी हेददे बर'ओत, एन्देरगेका नम्हे लखना ही बदी आबोन तरकूटी नना गे नम्हे जिया मसीसी खेंस ती सुध मंजकी र'ई अरा नम्हे कया निमन अम्मु ती नूडकी र'ई।
- 23अरा ने नमा गे गच्छरनन चिच्कादस आस पत्त'अना जोगे र'अदस। आँगे नाम गोवाह चि'ऊ असरा आबोन ठिमठिम गने धरचका र'ओत।



- 24 नाम चोन्हा नन्ना नू अरा दौ नलख नन्ना नू एकासे तंग्हे ती नन्नारिन रिझत'आ ओंगोत अदही पत नू सोचना रई।
- 25 अरा एकासे जोक्क आलर नन्नर अन्ने नमा खोंडरनन मल अम्बना रई। नाम अखदत का धर्मस आलारिन राजी नन्ना ही उल्ला हेददे अंडसा लगी। ओंगे तंग्हे ती नन्नारिन रिझत'अनुम रओत।
- 26 मानिम कत्था ही पत ता लूरन खक्खका ती हूँ नाम अखनुम अखनुम बिगर इल्चका ती पाप नन्ना बारी रओत होले, पाप गुट्ठिन ओथ्र'आ गे फेन एन्द्रा हूँ दाँडे मल्ला।
- 27 लिकिन नमा गे भयभयान रायबड़ी अरा धर्मसी बैरीरिन बस्सना चि'अना हदकारना चिच्ची आबोन दिम पाब ऐरना रई।
- 28 मूसासी नेग आबोन मल मन'ऊ आलासिन दुई महले तीन गोटंग गोवाह ती बिगर सोग्गे ऐरना ती पिटतार'आ लगिया।
- 29 अन्ने होले सोच'आ का, एकास धर्मसी खद्दासिन मईन मल नंजस, अरा तंगन नेम्हा नन्ताचका पुना गच्छरना ही खेंसन नेम्हा मल मन्चस, अरा मया चि'ऊ नेम्हा बोलतन लज्जे मोखताचस, आस एका कोइहे दंडे ही जोगे मनोस दने।
- 30 एन्देरगेका नाम अखदत का धर्मस एन्देर बाचस। आस बाचस, “बदली किर्त'अना एंग्हे नलख रई। ऐनिम बदली किर्त'ओन।” अरा अउरिम ईद एन्ने बारकी रई, “उर्बस तंग्हे आलारिन नैवई ननोस।”
- 31 उज्जना धर्मसी खेक्खा नू खत्रना कोइहे भयभयान रई।
- 32 धर्मसी बिल्लिन खक्खका मुन्द ता उल्ला गुट्ठी नू नीम एकासे रहचकर, अदिन सुरता नना। अबड़ा उल्ला नू नीम कोइहे खिलपत अरा सस्ती नू हूँ जिटजिट ने इज्जका रहचकर।
- 33 एका एका बारी गा नीम गोंहड़ा ही मुन्दहारे लज्जे मोखरकर अरा डाहरकर। अरा एका एका बारी नीम एन्ने दसा नू र'उर गने संगे चिचकर।
- 34 अरा नीम हेंरका आलर ही दुक्खे नू हूँ दुक्खे सारचकर। अरा इकला निम्है ओर्मा खुर्जी निम्है ती होरा, अदिन नीम रिझ गने इंझकर, एन्देरगेका नीम अक्कर का इबड़ा ती कोइहे बैस अरा उर्मी उल्ला मल नठार'ऊ खुर्जी निमा गे खक्ख'ऊ रई।
- 35 ओंगे नीम उर्बस नू र'ऊ निम्है बड़ियर असरा आबोन अमा अम्बा, आद निमा गे कोइहे खंजपन उन्द्र'ई।



36निमा सहना ती र'अना चाइ रई। होले नीम धर्मसी मनेन नंज खच्चिका ती आसी गच्छरका खंजपन खक्खोर।

37एन्देरगेका नेम्हा पुथी नू एन्ने लिखकी रई का, “जुक्की बेड़ा नू बर'उस बर'ओस अरा घड़ही मल ननोस।

38एंग्हे उजगो आलर पत'अना ती उज्जोर। लिकिन अबड़र नू एकअम ओर्तस पछली किरदस होले, ऐन आसिन मल पतार'ओन।”

39लिकिन नाम गा धर्मस ती पछली किरना ती नठार'ऊ आलर मदहे मलदत। नाम पत'अरकी जियन बछाब'ऊ आलत हिकदत।

इब्रानी 11

1पत'अना गा नम्हा असरा नंजका आलो गुट्ठी मानिम नू मनो दिम एन्ने थितगर हवे, अरा मल ऐथ्रना कत्था गुट्ठी ही साबूत हवे।

2एन्ने लेक्खा पत'अना ती नम्है पूरखर बेस गोवाह खक्खियर।

3पत'अना ती नाम बुझुरदत का गोट्टा सौंसेन धर्मस तंग्हे कत्था ती पेस्रका ती गढ़चस। अरा एन्ने मला का ऐथ्रना नू बर'ई इबड़ा उर्मी ईरका आलो गुट्ठी ती कमकी रई।

4पत'अना ती हाबेलस कैनस ती बेस दाँडे धर्मस गे अरगाचस। धर्मस दिम आसी दान गुट्ठी ही पत नू दौ बाचस, खने आस पत'अना ती आस उजगो आल एन्ने बेस गोवाह खक्खियस। पत'अना ती हाबेलस केचका खोखा ती हूँ अक्कु गूटी आसी पत नू कछनखदत।

5पत'अना ती हेनोखस अम्बोस खे'आ बाचस ती उज्जना मेर्खा चोदस होचस। धर्मस आसिन होचस खने आस मल खक्खरस। आस धर्मस ती होच्का ती मुन्द आस धर्मस गे पतार'ऊ आलस एन्ने बेस गोवाह खक्खियस।

6बिगर पत'अना ती धर्मसिन ने हूँ इकला हूँ रिझत'आ पोल्लोर। एन्देरगेका धर्मस गुसन बरना आलर पत'अना रई का धर्मस र'अस अरा आस तंगन बिद्दू आलर गे इनाम चि'ओस।

7पत'अना ती नूहस आ बेड़ा गूटी मल ऐथ्रका कत्था गुट्ठी ही चेता ब'अनन खक्खियस ती धर्मसिन मन्चस। अरा आस तंग्हे एड़पातारिन बया बड़ही ती बछर'आ गे कोहाँ डोंगा कमचस। अरा आस तंग्हे पत'अना ती आ बेड़ा ता खेखेल ता उर्मी आलारिन बदी ठेकाबाचस, अरा पत'अना ती मनी आ उजगो आबोन खक्खियस।



- 8पत'अना ती अब्राहमस, तंगा गे गच्छरका अड्डा काला गे धर्मस ती मेखस, खने अदिन मन्चस ती उरखस केरस। तान एसन काला लगियस अदिन हूँ बल्ला लगियस।
- 9पत'अना ती आस आ राजी नू गच्छरका राजी नू नन-राजियर लेक्खा ओकरस। असन आस कुम्बा नू रहचस। आसी गच्छरकन खक्खर'ऊ आसी जंईपुंईर इसाक अरा याकोबस हूँ कुम्बा नू ओकरर।
- 10एन्देरगेका आस धर्मसी ती चिताबुता नंजका अरा कमचका जनमजुग ही नगरे ही पाब ऐरा लगियस।
- 11पत'अना ती अब्राहमस, तंग्हे बछर बग्गे मंजका ती हूँ, अरा सारा बंझली रहचा होले हूँ, आस बंग मन्ना ही सवंग खक्खियस। एन्देरगेका आस तंगा गे गच्छरना चिच्का धर्मसिन मानिम आ गच्छरकन ननोस एन्ने असरा नंजस।
- 12आसी मेद गा सवंग मलका ती केचका बेसे रहचा। अन्नु हूँ एन्ने लेक्खा ओन्टा आलस ती मेर्खा ता बीनको गुट्ठी अरा समुदर पिंडी ता चलकुर लेक्खा गन'आ पोलना जंईपुंईर कुन्दर।
- 13पत'अना ती उज्जका इबड़ा ओर्मा आलर खेअना बेड़ा नू हूँ आ पत'अना ती केचर। एन्देरगेका गच्छरका आलो गुट्ठिन आर आ बेड़ा नू मल खक्खियर। लिकिन अबइन गेच्छा तिम ईरियर अरा परघाचर ती रिझर। अरा आर इंझर का आर खेखेल नू बहरीतर अरा नन-राजियतर।
- 14एन्ने लेक्खा कत्थन ब'अनर आर ऐदनर का आर निज राजिन बेददना नूर'अनर।
- 15आर एका राजी ती उरखका रहचर अदिन सोचना नू रहचका होले, आर गे किरना काना ही मोका रहचा दने।
- 16लिकिन आर अदही ती ओन्टा कोइहे बेस देस मेर्खा राजी ही चिबाखार'ऊ अरा पाब ईरू रहचर। ईगेम धर्मस आर ही धर्म बार'आ गे मल लज्जदस, एन्देरगेका आस आर गे ओन्टा नगरे सपड़ाचकादस।
- 17-18पत'अना ती अब्राहमस धर्मस ती बिदतारस खने इसाकसिन ओन्टा दाँडे बेसे अरगस। आस धर्मसी गच्छरका गुट्ठिन खक्खियस। आ गच्छरका नू धर्मस आसिन एन्ने बाचका रहचस, “इसाकस तिम निंग्हे बनस गुट्ठी मनो।” अन्नु हूँ आस तंग्हे ओन्टे लेका खद्दासिन दाँडे नना गे सपड़ाचस।
- 19एन्देरगेका आस पत्ताचस का धर्मस गा केचकारिन हूँ उज्जता ओंगदस। ओन मदहे ती एन्ने ब'आ ओंगोत का आस इसाकसिन केचका तिम फिन खक्खियस।



- 20 पत'अना ती इसाकस तंगहै खद्दर याकोबस अरा एसावस गे बरना उल्ला नू मन्ना कत्था गुट्ठी ही पत नू बरकत चिच्चस।
- 21 पत'अना ती याकोबस खे'अना बेड़ा नू तंगहै खद्दर ती ओर्त योसेफसी दुयो खद्दारिन ओर्तोसी खोखा ओर्तोस गे बरकत नंजस। फिन कोंको डंडा नू ऊदरस ती धर्मसिन ओड़ लग्गियस।
- 22 पत'अना ती योसेफस तंगहै छेद्दे बेड़ा अंडसिया खने, आस बाचस का इस्राएल आलर मिसर देसन अम्बोर ती उरखोर। अरा आर अइय्या ती उरखो बारी तंगहै खोचोलन हो'आ कला गे आनियस।
- 23 पत'अना ती मूसासी तंगियो तम्बा आसी कुन्द्रका ती तीन महिना गूटी आसिन नुड्डर ती उइय्यर। एन्देरगेका आर ईरियर का आ खद्दस फब'आ लगियस, अरा मिसर राजी ही बेलासी पेसकन मल पेस'आ गे मल इलच्चियर।
- 24 पत'अना ती मूसस परदियस ती कोहाँ मंजस खने आस मिसर राजी ही बेलस फारओसी तंग्दा ही खद्द बार'आ गे मने मल नंजस।
- 25 आस पाप नू जुक्की उल्ला रिङ्ग गने र'अना ती धर्मसी आलर गने दुक्खे सार'आ गे मने नंजस।
- 26 आस मसीस गे हींङ्गनन मिसर ता खुर्जी ती कोहाँ जोगे बुङ्गस। आस गा धर्मसी बरना कोइहे इनाम गे पाब ऐरा लगियस।
- 27 पत'अना ती आस बेलासी खींस ती मल इल्लियस ती मिसर राजिन अम्बियस ती उरखस केरस। अरा आस मल ऐथ्र'ऊ धर्मसिन ईरका बेसे ठिमठिम ने रहचस।
- 28 पत'अना ती आस कट्टना अरा बली ही चौकट नू खेंस छिंछइ'अना आबोन ओर नना गे इस्राएल आलर गे पेसका चिच्चस। औंगे पिटना पैकस इस्राएल आलर ही जेट्ठा खद्दारिन अम्बोस पिटा।
- 29 पत'अना ती इस्राएल आलर खैका खेखेल नू ऐकना बेसे खेंसो समुदर आबोन कट्टियर। लिकिन अन्ने मिसर आलर अइय्या आर ही खोखा कालरकी आरिन धर'आ गे चिहूट नंजर खने, समुदर नू मूलखियर केचर।
- 30 पत'अना ती इस्राएल आलर येरिहो नगरेन सात उल्ला अदही ओनभौरी किन्द्रार खच्चियर खने, अदही मेच्छा कोहाँ पगड़ गुट्ठी बिड्रिया।
- 31 पत'अना ती राखाब रन्डी तंगहै नगरे ता मल पेस'ऊ आलर गने मल नठारा। ईगेका आद ईस्राएल ही गम'उरिन दौ गने परघाचा।



- 32 अउर हूँ बग्गे ऐन एन्द्रा ब'ओन? गिदोन, बाराक, सिमसोन, येफथा, दाऊद अरा सामुएल अरा नन्ना धर्मसी कत्था तिगुर ही पत्त नू तेंगा गे बेड़ा मलकी।
- 33 पत्त'अना ती ईर राजी गुट्ठिन जित्तचर, अरा एन्द्रा ठौका रहचा अदिन नंजर, अरा धर्मस एन्द्रा गच्छरकाचस अदिन खक्खियर, अरा लकड़ा गुट्ठी ही बइय्यन खप्पा बाचर।
- 34 अरा ईर हदकारना चिच्ची आबोन ऐखताचर, अरा तलवार ही खे'अना ती बछरर, अरा आर ही पयहा नू बहंगर मंजर, अरा आर लइई नू बहंगर उरखर ती नन्ना राजी गुट्ठी ता फउदन हरा बाचर।
- 35 जोक्क मुक्कर तम्है केचकारिन उज्जना खक्खियर। अरा नन्नर गा मार मूखनुम मूखनुम रहचर ती अम्बर'आ गे मल बिद्दियर, एन्देगेका आर धर्मसिन अम्बा मल बिद्दियर। आर ही असरा एन्ने रहचा का केचका ती उज्जा चो'अना नू ओन्टा बेस उज्जना खक्खा ओंगोर।
- 36 जोक्क आलर लज्जे मोखरका ती कोर्ता ती मार मोखरर। अरा नन्नर हेंरका ती जेहेल नू सजतारर।
- 37 जोक्कोर पखना गुट्ठी ती लोड़गतारर। [जोक्कोर बिद्दतारर।] जोक्कोर आरी ती पलकतारर। जोक्कोर तलवार ती पिटतारर। जोक्कोर मलका नू अरा कलपारना नू अरा खिलपत सहनुम भेंडो गुट्ठी अरा ऐड़ा गुट्ठी ही चपटन कूरियर ती इत्रा अत्रा कुद्दका कुद्दियर।
- 38 खेखेल गा आर ही जोगे मल रहचा। अरा आर टुंगरी अरा परता गुट्ठी कुद्दियर अरा लाता गुट्ठी अरा खेखेल ही अलफोर गुट्ठी नू नूखरर।
- 39 इबड़ा ओर्मर तम्है पत्त'अना ती बेस नामे खक्खियर। अन्नु हूँ इबड़र ने हूँ धर्मसी गच्छरका जिनिसन मल खक्खियर।
- 40 धर्मस गा नमा गे ओन्टा बेस जिनिसन चि'आ गे चिताबुता नंजकादस। एन्देगेका आस बेद्ददस का आस तंगहै गच्छरनन आर गने पूरा ननो बारी नाम आर गने संगे चि'आ ओंगोत।

इब्रानी 12

1 ओंगे ई लेक्खा नगदे बग्गे पत्त'अना ती उज्जका आलर ही पत्त ता गोवाह गुट्ठी कोहाँ बदाली बेसे नम्है ओनबेंडर'आ र'ई। होले बरा, नाम छिक'ऊ उर्मी आलो गुट्ठिन अरा लेम अइझ'अना पाप गुट्ठिन अम्बोत ती धर्मस नमा गे उइयकादस आ बोंगना नू सहना ती चिहुट नन्ते बोंगदत नेकअन।



- 2 नम्हें पत'अनन ओर ननू अरा पखड़ ननू येसुस तरा मेन ऐरदत नेकअन। आस तंगा गे उइयका रहचका रिरयारना ही चड्डे क्रुस ही लज्जेन मल सोच्यस ती क्रुस नू दुक्खेन चोदस ती केच्यस। अक्कु धर्मैसी बेल-गदिया ही तीना पक्खा उक्कदस।
- 3 पपहा आलर ती बरचका उर्मी दुक्खेन सहचका येसुसी पत नू सोच'आ, होले नीम खेना मनोर ती पत'अनन मल अम्बोर।
- 4 नीम निम्हें पाप ही बिड़दो ही तिहा नू निम्हें जियन चि'अना गूटी हुरभेटा मल नंजकर।
- 5 अरा धर्मैस निमन तंगहें खद्दर एन्ने मेखरकी निम्हें गने बाचका रिझत'अना कत्था गुट्ठिन नीम मोधरकर केरकर, “अना एंगहें खद्दायो! उर्बासी कोड़नन नेब्बा अमा सोच'आ, अरा आस निमन दन्दक'ओ बारी डिढन अमा अम्बा।
- 6 एन्देरगेका उर्बस नेकन चोन्हा नन्दस आसिन कोड़दस, अरा नेकन तंगहें खद्द लेक्खा इंझदस आसिन दन्दकादस।”
- 7 दुक्खे बर'ओ बारी आद निमन कोड़ा गे बर'ई एन्ने अख'अरकी अदिन सह'आ। धर्मैस निमन तंगहें खद्दर लेक्खा ऐकत'अदस। खद्दर ओर्मर गा तम्हें तम्बस ती कोड़ोरनर।
- 8 धर्मैस तंगहें उर्मी खद्दारिन नन्ना लेक्खा निमन मल कोड़दस होले, अदही मने एन्ने र'ई का नीम आसी खद्दर मलदर, मलदौ मदहे ती कुन्द्रका खद्दर र'ओर दने।
- 9 नाम गा नमन कोड़र'ऊ नम्हें ई खेखेल ही बंगर गे मईन नन्दत। अन्ने होले नम्हें बोलता ही बंगासी अउरिम कोड़हे तबे नू र'अना ती उज्जा गे चाड़ र'ई।
- 10 नम्हें ई खेखेल ही बंगर तम्हें अखना लेक्खा जुक्किम उल्ला गे नमन कोड़ा लगियर। लिकिन धर्मैस गा नाम आसी नेम्हा नू मेस'आ गे नम्हें दौ गे नमन कोड़दस।
- 11 एकअम कोड़ना हूँ कोड़र'ऊ बारी रिझ मल मनी, लिकिन सस्ती ही कत्था दिम मनी। अन्नु हूँ अदही ती सिखका आलारिन आद खोखा उजगो कम'ओ अरा आर कोड़े खक्खोर।
- 12 औंगे निम्हें उलू फूलु खेक्खा अरा पयहा मूका गुट्ठिन बड़ियर नना।
- 13 अरा नीम निम्हें उज्जना नू उजगो डहरे नू ऐका। होले निम्हें उज्जनन ऐररकी निम्हें गने चोख'ऊ लेइह'ऊ आलर अउर हूँ लेइहना ती नास मल मनरकी उजगार'ओर।
- 14 ओर्मर गने मेस'आ ती उज्जा गे अरा निम्हें ऐकना नू नेम्हा गने र'आ गे चिहुट नना। बिगर नेम्हा ती ने हूँ धर्मैसिन ऐरा पोल्लोर।



- 15 चिहंक नन्ते र'आ का ने हूँ धर्मसी मया आबोन खक्ख'आ गे अम्बोर अम्बर'आ, अरा एकअम खइखा निम्है मझी नू उरखा गे अमा चि'आ। आद निमा दुक्खे चि'अरकी बग्गे आलारिन सोतबोड़'आ ननो चि'ओ।
- 16 अरा ने हूँ भइवा नलख अमा नना, अरा एसावस लेक्खा बिगर महबा आल अमा मना, एकास आँगहोन ता मंडी गे तंग्हे जेट्ठा ही अदिया आबोन बीसियस चिच्चस।
- 17 नीम अखदर का खोखा आस तम्बस ती जेट्ठा ही आसीस खक्खा बिद्दियस खने, आस खॉइरस केरस। आस ई आसीस आबोन चींखा चींखा बेद्दना नू हूँ आस गे आसी आ दसा बदलार'आ पोला।
- 18 अक्कु नीम बरचकादर आ अइडा मुन्द टुंगरी नू इस्राएल आलर केरका सीनाय परता मल्ली। आ परतन गा आलर एंसइ'आ आँगनर। अरा आ परता नू चिच्ची हदकारा, अरा गरा घटा अरा ऊखा अरा बरंडो कुलरकीचा।
- 19 अरा असन पेंइहे ही खरखना मेन्तारा। अरा अइय्या इस्राएल आलर ओन्टा सड़ा ब'अनन मेंजर, लिकिन आर आ ब'अनन अउर मल मेना गे गोहरारर।
- 20 एन्देरगेका, “एकअम मेक्खो हूँ आ परतन एंसइ'ओ होले, अदिन पखना ती लोइगना ती पिटना मनो” एन्ने बाचका पेसकन आर सह'आ पोल्तर।
- 21 आ देखार कोइहे भयभयान रहचा। आँगे मूसस हूँ बाचस, “ऐन एल्चदन ती असदन।”
- 22 लिकिन नीम गा अक्कु उज्जना धर्मसी नगरे मेर्खा ता येरुसलेम सीयोन परता नू बरचकादर। अइय्या गन'आ पोलना मेर्खा पैकर रिझ गने खॉइरनर।
- 23 नीम धर्मसी जेट्ठर खॉइरना ही कलीसिया नू बरचकादर। ई जेट्ठर ही नामे मेर्खा नू लिखकी रई। अरा नीम उर्मी आलारिन नैवई ननू धर्मस गुसन बरचकादर। अरा नीम पखइ मंजका उजगो आलर ही बोलता गुट्ठी र'ऊ अइडा गे बरचकादर।
- 24 अरा नीम पुना गच्छरना नू धर्मस अरा आलर ही मझी आल येसुस गुसन बरचकादर। अरा नीम हाबेलसी खेंस ती बेस कत्था तिगू येसुसी छिंछड़ाचका खेंस गुसन बरचकादर।
- 25 आँगे चिहंक र'आ का निम्है गुसन ब'ऊ धर्मसिन मेना गे बिइदो मुंही अमा नना। खेखेल नू मूसासी चेताब'अनन मेना गे इस्राएल आलर बिइदो मुंही नंजर ती आर पोल्तर बछर'आ। अन्ने होले नाम मेर्खा ती चेताब'असिन मेना गे बिइदो मुंही ननोत ती एकासे बछर'ओत?
- 26 आ बेड़ा नू गा धर्मसी सड़ा खेखेलन नुकुचकीचा, लिकिन अक्कु आस एन्ने गच्छरकादस, “अउर आँगहोन ऐन नुक'ओन, खेखेलन लेका मला मेर्खन हूँ नुक'ओन।”



- 27“अउर ओंहोन” ई कत्था इदन दहदर ननी का उमी गढ़चका आलो नुकतार'ओ क'ओ अरा गुछर'ओ क'ओ, ओंगे नुकतार'आ पोलना आलो ठिमठिम ने र'ओ।
- 28ओंगे नाम गा नुकतार'आ पोलना राजिन दिम खखालदत। ई चड्डे नाम धन्यवाद ननरकी मईन अरा इल्चका गने महबा ननरकी धर्मसिन रिझत'अदत नेकअन।
- 29एन्देरगेका नम्हे धर्मस गा ओलत'अना चिच्ची हिकदस।

इब्रानी 13

- 1तंगहै ती नन्नारिन भई बहिन बेसे चोन्हा नन्ना नू बन्चका र'आ।
- 2मल ईरका आलारिन पाही ऐरा गे अमा मोध'आ। एन्देरगेका एन्ने पाही ऐरना चड्डे जोक्क आलर बलना ती मेर्खा पैकारिन हूँ पाही ईरियर।
- 3नीम गुडरका आलारिन सुरता ननके का नीम हूँ आर ही गने गुडरका र'अदर एन्ने सोच'आ। अरा ने डाहरनर आरिन हूँ सुरता ननके, नीम हूँ डाहरनर एन्ने सोच'अरकी एन्ने नना।
- 4बेंजा ओर्मर ती मईन जोगे बुझुरना र'ई। मैतस अरा मुक्का ओर्त ओर्त गने पत'अना जोगे र'अना र'ई। एन्देरगेका धर्मस नन्ना आली महले आल गुसन कालुर अरा भइवा ही सोतरा नलख ननुरिन दंडे चि'ओस।
- 5ढिबा मइय्याँ अमके चिबाखार'आ, निंगहै गुसन ऐ बग्गे र'ई अत्रुम खतिर ननके। एन्देरगेका धर्मस एन्ने बाचकादस, “ऐन निंगन इकला हूँ मल अम्बोन। ऐन निंगन इकला हूँ मल मोधर'ओन।”
- 6ओंगे नाम डिठ ती ब'आ ओंगदत, “उर्बस एंगहै सहाड़ा ननू र'अदस, ओंगे ऐन मल एल्चोन। आलर एंगन एन्देर नना ओंगोर?”
- 7निमन धर्मसी कत्था सिखाबाचका निम्है कइहाब'उरिन सुरता नना। अरा आर तम्है उज्जना नू एकासे उज्जालियर अदन सुरता नना। अरा आर एकासे पताचर अन्ने नीम हूँ पत'आ।
- 8येसु मसीस केरका उल्ला अरा इन्ना अरा उमी उल्ला ओन्टम र'अस, आस इकला हूँ मल बदलार'ओस।
- 9कैनो रकम ही नन्ना नन्ना सिखाब'अना ती अमा बेहड़ार'आ। अरा चाल ही ओन्ना-मोखना गुट्ठी ती मला धर्मसी मया ती नम्है जिया बड़ियर मन्ना बेस हवे। ई चाल ही ओन्ना-मोखना गुट्ठिन मूखू आलर गे अबड़ा ती एन्द्रा हूँ फयदा मल्ला।
- 10नमा गे मसीसी खेंस ही ओन्टा गोइहा र'ई। अइय्या ती कोहाँ कुम्बा नू सुसर ननू नैगर गे ओन्ना ही अदिया मलकी।



- 11 कोहाँ नैगस मेक्खो गुट्ठी ही खेंसन कोइहे नेम्हा अड्डा नू हो अदस, आस अदिन असन पाप गे अरगदस, लिकिन मेक्खो गुट्ठी ही मेद गुट्ठिन गा बखड़े ही बहरी बस्सतारई।
- 12 एन्ने लेक्खा येसुस हूँ नगरे ही बहरी दुक्खे भोगचस ती तंगहै खेंस ती आलारिन नेम्हा नंजस।
- 13 औंगे आसी चोदका हींइरनन नाम हूँ चोद'अरकी बखड़े ही बहरी आस गुसन कओत।
- 14 एन्देरगेका उर्मी उल्ला र'आ गे इसन खेखल नू नमा गे नगरे मल्ला। लिकिन नाम बरना ओन्टा नगरे ही पाब ऐरालदत।
- 15 औंगे नाम येसुस ती धर्मसी नामेन नम्है बई ती ब'अना ही ओहमा नन्ना ही दाँडेन धर्मस गे सगरो नन्ते र'अदत नेकअन।
- 16 अरा दौ नना गे अरा निम्है जिनिसन चाड़ नू र'उर गे खट्टा गे अमा मोध'आ, एन्देरगेका एन्ने लेक्खा दाँडे गुट्ठी तिम धर्मस रिङ्गदस।
- 17 निम्है कइहाब'उरिन पेस'आ अरा आर ही अदिया ही तबे नू र'आ। आर निम्है बोलता ही लेखा धर्मस गे चि'अना रई, अदगे आर निम्है मइय्याँ आकुस नन्नर। नीम आर गे पेस'ओर होले, आद आर गे रिङ्ग चि'ओ, ओत्था मल मनो। आद आर गे ओत्था मनो होले निमा गे एन्द्रा हूँ फयदा मल मनो।
- 18 एमा गे गोहरार'आ। एन्देरगेका एमा थितगर रई का एम्है लखना सफा रई, अरा ऐम नन्दम आ उर्मी कत्था नू मईन जोगे ती उज्जा गे बेद'दम।
- 19 अरा ऐन निमन ठेठन ब'अदन का ऐन चांइहेम निम्है गुसन किरी गे एंगा गे धर्मसिन गोहरार'आ।
- 20 मसीसी खेंस ती जनमजुग ही गच्छरनन कमचका ती भेंडो ही कोहाँ महरस नम्है उर्बा येसुसिन केचका ती उज्जताचका कोड़े ही धर्मस,
- 21 नीम दौ नलख ननू अरा आसी चिताबुतन ननू आलर र'आ गे, निमा गे उर्मी चाड़न चि'अदस नेकअन। आस येसु मसीस ती नम्है नू तंगहै मनेन नन्दस नेकअन। आस गे दिम हुल्लो ती हुल्लो गूटी महबा मनन नेकअन! आमेन।
- 22 अना भईरो! ऐन जुक्की दिम निमा गे लिखचका ई चेताब'अना ही कत्थन नीम इंङ्ग'आ गे गोहरारदन।
- 23 नीम इदन अख'आ हो'आ का नम्है भई तीमोथियुस जेहेल ती अमब्रकादस। आस चाइहे अंइसोस होले, आसी गने निम्है गुसन भेंट मना गे बर'ओन।



24निम्है उर्मी कइहाब'उर गे अरा उर्मी पत'ऊ आलर गे एम्है मोंजरा आबोन तेंगा। इताली देस ता भईर निमन मोंजरा नन्नर।

25धर्मैसी मया निम्है ओर्मर मइय्याँ र'अन नेकअन। आमेन।



याकोब

याकोब 1

- 1 धर्मस अरा उर्बस येसु मसीसी जोंखन ऐन याकोब, तम्है राजी ती बहरी बींइरका इस्राएल आलर ही बारा गोतोर ता पत'ऊ आलर निमा गे मोंजरा नन्दन ती ई चिठिन लिखदन।
- 2-3 अना एंग्हे भईरो, एका एका बारी निमा गे कैनो रकम ही सस्ती गुट्ठी मनी, आ बारी निम्है पत'अना ही बिदूना निमा गे खतिर मन्नन चिई एन्ने अक्कर ती अदन रिझना बुझुरके।
- 4 अरा नीम निम्है इन्द्रिइम चाइ नू मल खंग्रकी पखइ अरा निंद्रका ती र'आ गे, निम्है खतिर नन्ना उर्मी तरा नलख ननन नेकअन।
- 5 निम्है ती एकअम ओर्तस लूर नू खंग्रका र'अदस होले, आस धर्मस गुसले ने'अना र'ई। खने आद आस गे चीतार'ओ। धर्मस बिगर केबर'अरकी ओर्मर गे हरकट ती बग्गे ती बग्गे चि'ऊ र'अदस।
- 6 लिकिन आस दुई भिदी मनके ती मला, पत'अना संगे ने'अना र'ई। एन्देरगेका ने दुई भिदी मनारकी ने'अदस, आस ताका ती अत्र इत्र मन्ना समुदर ता लहरा लेक्खा र'अदस।
- 7 एन्ने दुई भिदी मनू आलस तान उर्बस ती इन्द्रिइम खक्खोन एन्ने मल सोचना र'ई।
- 8 आ आलस दुई मति ही आलस र'अना ती आस तंग्हे उर्मी नलख नू धर'ऊ मल्ला।
- 9 पत'ऊ भईस ने कीड़ा र'अस, आस धर्मस तंगा गे चिक्का बोलता ही मेच्छा ओहदा नू फुलई मन्दस नेकअन।
- 10 लिकिन पत'ऊ भईस ने उरुब र'अदस, आस धर्मस तंगा गे चिक्का बोलता ही लुदऊ जिया ही चड्डे फुलई मन्ना र'ई, एन्देरगेका आस लट्ठी ही पूंप लेक्खा नठार'ओ कओस।
- 11 बीड़ी अर्गी खने, बिडना झोला ती लट्ठी चडमी अरा अदही पूंप निदगी कई अरा अदही फबना उधियार'ई कई। अन्नेम उरुब आलस हूँ तंग्हे उर्मी नलखन नन्नुम बारिम नठार'ओस कालोस।
- 12 बिदूनन सह'ऊ आलासिन धर्मस आसीस नन्दस। एन्देरगेका आस आ बिदूना नू बड़ियर र'अना ती उजगो आलस उरखका खोखा, धर्मस तंग्हा नू चोन्हा ननुर गे चि'ओन एन्ने गच्छरका जनमजुग उज्जना ही इनामन आस खक्खोस।
- 13 बिदूना बारी ने हूँ “धर्मस एंगन बिददस” एन्ने मल ब'अना र'ई। एन्देरगेका धर्मसी बिदूना एकअम मलदौ कत्था ती मना पुल्ली, मलता आस तानिम नेक'आनिम बिददस।
- 14 लिकिन ओर्मर तम्है तम्है मलदौ चिबाखारना ती मोंहरनर ती बहकारनर ती बिदूनर।



- 15 तहाँ ई चिबाखारना बग्गे मन्ना ती पापन कुन्द्रत'ई, अरा पाप परदी कई खने, आद जनमजुग खे'अना तरा कइहाबई।
- 16 अना एंगहै चोन्हा भईरो, अमके फोक्र'आ।
- 17 उर्मी दौ अरा बेस इनाम धर्मे बंगस ती बर'ई, ने मेर्खा ता उर्मी बिल्लिन गढ़चस। आस ऐख अइडा अइडा बदलारना बेसे बदलार'ऊ मलदस।
- 18 आस तान गढ़चका उर्मी नू नाम ओन मदहे ती पहिल खंजपा मना गे तंगहै मने ती तंगहै मानी कत्था ती नमन पुना गढ़चस।
- 19 अना एंगहै चोन्हा भईरो, ई कत्थन नीम अख'आ हो'आ का, अक्कु नीम ओर्मर मेन्ना नू लेम मिनुर मना। अरा ब'अना नू अरा कैर मन्ना नू दीरी नना।
- 20 एन्देरगेका आलर ही कैर धर्मेस बेदना उजगो उजजनन मल उन्द्र'ई।
- 21 औंगे उर्मी मदहे ही सोतबोड़'आ अरा मलदौ नलखन निम्है उजजना ती तरकूटी नना ती निम्है जिया नू धर्मेसी चाँखका कत्था आबोन लुदऊ ती इंझ'आ। आ कत्था निम्है जियन नाड़ा गे सवंगिय र'ई।
- 22 अक्कु ती नीम धर्मेसी कत्थन मिनुर लेका मला, अदही लेक्खा ईकू मना। मला होले नीम नीमिम फोक्र'ऊ र'अदर।
- 23 एका ओर्तस कत्थन मेन्दस अरा अदही लेक्खा मल नन्दस, आस ऐना नू तंगहै मुहिन ईरू आलस लेक्खा र'अदस।
- 24 आस गा तंगन ऐरदस ती किरिम बि'अदस खने, लेम मोधदस कादस का तान एकासे रहचस।
- 25 लिकिन ने नमा गे छछिन्द चि'ऊ ई निद्रका नेग नू चिहंक ती जिया लगा ब'अते र'अदस, आस तान एन्द्रन मेंजकादस अदिन मल मोधदस ती अदही लेक्खा नलख नन्तेम र'अना र'ई। अन्नेम आस नन्दस होले, आस एन्द्रन नन्दस अइय्या आसीस खक्खोस।
- 26 नीकईम तंगन भगतस एन्ने सोचदस, लिकिन तंगहै बइय्यन मल सम्इह'अदस होले, आस तंगन फोकाब'अदस। आसी भगती अन्भनियाँ मनो।
- 27 टुरर अरा रड़ियाहीर ही दुक्खे नू आरिन ऐरना खोजना, अरा तान तंगन खेखेल ता सोतबोड़'आ ती तरकूटी उइय्ना दिम नम्है धर्मे बंगासी ऐरना नू निमन अरा बिगर दगहा भगती हवे।

याकोब 2



- 1अना एंगहा भईरो, नम्है महबा जोक्खा उर्बस येसु मसीस नू पत'अना उइय्यू निमा तीना मल खाँइना रई।
- 2उदहारन नू एन्ने सोच'आ का, ओन्टा आलस निम्है गोइहा एइपा नू सोना ही मुद्दी अत्तका ती अरा बेस किचरी अत्तका कुन्द्रका ती बरदस, अरा ओन्टा कीड़ा आलस हूँ मड़िखका एट्रका किचरी अत्तका ती बरदस।
- 3अरा नीम फबना किचरी अत्तका आलासिन कोइहे मईन नन्दर ती ब'अदर, “नीन इसन दौ अइडा नू ओक्का,” अरा आ कीड़ा आलासिन ब'अदर, “नीन असन इज्जका र'आ” मलता “एंगहै खेइडे गुसन ओक्का।”
- 4एन्ने होले, नीम निम्है नू तीना खाँइना ही अरा मलदौ सोच गुट्ठी ती नैवई नन्ना ही बदी नन्दर।
- 5अना एंगहै चोन्हा भईरो, मेना, एन्देर धर्मस ई खेखेल ता कीड़ा आलारिन पत'अना नू उरुब मना गे, अरा तंगहै मइय्याँ चोन्हा ननुर गे तान गच्छरका राजी ही अदिया मना गे मल्ला चज्जिका का?
- 6लिकिन नीम गा कीड़ारिन हीँइदर। एन्देर उरुबर निम्है मइय्याँ आकुस मल नन्नर, अरा आरिम निमन पंचायत नू नतगनर मल होअनर का?
- 7नीम नेख'आ बारदर आ येसु मसीसी बेस नामे ही आर निंदा मल नन्नर का?
- 8“नीन निंगन एकासे चोन्हा नन्दय, अन्ने निंगहै अरबा-परबारिन चोन्हा नना।” एन्ने नेम्हा पुथी नू लिखका ई कोइहे मुध पेसकन नीम मानिम गने नन्दर होले, नीम बेस आबोन नन्दर।
- 9लिकिन नीम तीना खाँइदर होले, पाप नन्दर। अरा नीम पेसकन चाइर एन्ने पेसका ती गुन्हा ठेकाबातार'ओर।
- 10एकासे का, एका ओर्तस गोट्टा पेसकन पेसदस, लिकिन ओन्टे कत्था नू झुकरदस होले, आस उर्मी कत्था नू बदी खत्रदस।
- 11एन्देरगेका एकास “नन्ना आली गुसन अमके काला” बाचका रहचस, आसिम “आल अमके पिटा” एन्ने हूँ बाचस। औँगे नीन नन्ना आली गुसन गा मल काना ती हूँ आल पिटकय होले, पेसका आबोन चाइना आल मंजकय।
- 12औँगे छछिन्द चि'ऊ पेसका तिम नीम नैवई मन्तार'ऊ आलर र'अना ती, अदही लेक्खा कछनर'आ अरा अदही लेक्खा नलख नना।
- 13एन्देरगेका ने सोग्गे मल ईरियस, आसी नैवई बेगर सोग्गे गने मनो। ने नन्नर मइय्याँ सोग्गे ऐरदस, आस नैवई उल्ला गे मल एलचदस।



- 14अना एंगहै भईरो, एकअम ओर्तस एंगा गे पत्त'अना रई एन्ने ब'अदस, लिकिन आस अदही लेक्खा मल नन्दस होले, आस गे एन्देर नफा? एन्देर आ पत्त'अना आसिन नाड़ा ओंगो का?
- 15सैत ओर्त भई महले बहिन बने लगे अत्ता गे किचरी मलका नू, अरा रोज ओना गे ओन्ना-मोखना मलका नू र'अना बेड़ा,
- 16निम्है ती एकअम ओर्तस आरिन ब'अदस, “धर्मस निम्है गने र'अदस, सान्ति गने कला, उदुम उदुम र'अके, अरा छचबच ओनके।” लिकिन आर गे एन्देर चाड़ मनी अदिन मल चि'अदस होले, एन्देर नफा?
- 17अन्नेम पत्त'अना हूँ अदही लेक्खा नलख मल नन्ना ती तान लेका र'ओ होले, आद केच खच्चका पत्त'अना हवे।
- 18लिकिन ओर्तस ब'आ ओंगदस, “निम्है गुसन पत्त'अना रई, एंगहै गुसन नलख गुट्ठी रई।” लिकिन ऐन ब'अदन, “निंगहै पत्त'अनन बिगर दौ नलख गुट्ठी नन्ना ती ऐद'आ, लिकिन ऐन एंगहै पत्त'अनन एंगहै नलख गुट्ठी ती ऐद'ओन।”
- 19नीन पत्त'अदय का, ओन्टे लेका धर्मस र'अदस। आद दौ हिके। नाद गुट्ठी हूँ गा अदिन पत्त'ई, अरा इल्ची अरा असरी।
- 20अना बयहा आलयो, एन्देर नीन बुझुर'आ पोलदय का, नलख बिगर पत्त'आना अनभनियाँ हवे?
- 21निम्है पुर्खस अब्राहमस तंगदस इसाकसिन गोड़हा नू दाँडे नना अरगस खने, आस तंगहै नलख गुट्ठी ती धर्मसी ऐरना नू उजगो मंजकाचस।
- 22नीन ऐरदय का आसी पत्त'अना आसी नलख गुट्ठी ही गने गने नलख नंजा। अरा आसी नंजका नलख गुट्ठी ती आसी पत्त'अना पखड़ मंजा।
- 23अरा ई लेक्खम, “अब्राहमस धर्मसिन पत्ताचस, अरा धर्मस ई पत्त'अना ती आसिन उजगो गनचस।” एन्ने नेम्हा पुथी नू बाचका कत्था पूरचा। अरा आस धर्मसी सखी हूँ बारस।
- 24ओंगे नीन ऐरदय का ओर्तोस पत्त'अना ती लेका मला, आसी नन्ना नलख गुट्ठी ती हूँ उजगो गनरदस।
- 25ई लेक्खम राखाब रन्डी इस्राऐलर ही भेदियर गे तंगहै एड़पा नू र'आ गे अड़डा चिच्चा ती नन्ना डहरे ती आरिन दौ गने तड़य्या, ई नलख गुट्ठी तिम धर्मस अदिन उजगो गनचस।
- 26बिगर बोलता ही मेद केचका मेद हवे, अन्नेम बिगर नलख ही पत्त'अना केचका पत्त'अना दिम हवे।



याकोब 3

- 1अना एंग्हे भईरो, नीम अखदर का ऐम सिखाब'ऊ आलम बग्गे सकत ती नैवई नन्तार'ओम, औंगे निम्है ती बग्गे आलर कलीसिया नू सिखाब'ऊ मना गे अमके बेद्दा।
- 2नाम ओर्मर बग्गे रकम नू झुकुरदत। ने तंग्हे ब'अना नू इकला हूँ मल झुकुरदस, आसिम पखड़ मंजका आलस हिकदस। ई लेक्खा आलस दिम तंग्हे गोट्टा मेदन सम्झ'आ उंगू आलस हिकदस।
- 3नाम घोड़ोन नमा गे पेस्रत'आ गे अदही बई नू लगाम लगाब'अदत, होले नाम अदही गोट्टा मेद नू आकुस नना ओंग्दत।
- 4ऐरा, कोहाँ डोंगा हूँ ऐरना नू गा कोहाँ रई, अरा आद कोहाँ धुका ती तुकुर'ई। अन्नु हूँ चलाब'उस कोहाँ डोंगा एसन काना ही मने नन्दस आ दिसा ही तरा सन्नीम चटुवा ती किन्दरारकी कुद्दी।
- 5अन्नेम ततखा हूँ मेद ही सन्नी गुना ओन्टा अंग रई, लिकिन कोहाँ कोहाँ फुलई मन्ना ही कत्था गुट्ठिन कछनर'ई। ऐरा, सन्नी गुना चिच्ची ही फुलंगी एका कोहाँ जंगल आबोन चिच्ची दगई चिई।
- 6अरा ततखा हूँ चिच्ची लेक्खा रई। ईद नम्है मेद नू मलदौ ही ओन्टा लोक हवे। आद ओर्तोसिन गोट्टा मेदन दगहा ननी चिई, अरा आसी गोट्टा उज्जनन ओलतई चिई। अरा ई चिच्ची नरक ती बरई।
- 7उर्मी रकम ही मेक्खो गुट्ठी, अरा ओड़ा गुट्ठी, अरा खेखेल नू ऐकना आलो गुट्ठी, अरा अम्मु नू र'अना आलो गुट्ठी गा आलर ही आकुस ही किइय्या मनी काली। अरा अन्नेम किइय्या मंजकी हूँ किरकी रई।
- 8लिकिन आलर ने हूँ ततखन तम्है आकुस नू पोलनर उइय्या। ईद सगर घड़ी मलदौ ननी। अरा ईद खे'अनन ओन्द्रना महरा ती निंदकी रई।
- 9इत्रुम नाम उर्बस नम्है धर्म बंगासिन ओहमा नन्दत, अरा इत्रुम नाम धर्मस तंग्हे लेक्खा गढ़चका आलारिन भखदत।
- 10ओहमा अरा भखना ओन्टा बई तिम उरखी। अना एंग्हा भईरो, ईद दौ मल्ली।
- 11ओन्टे गुना पझरा ती एम्बा अरा बेक अम्मु उरखा उंगी का?
- 12अना एंग्हे भईरो, एन्दर अंजीर ही मन्न नू जैतून खंजई का, मलता अंगुर ही नाड़ा नू अंजीर खंजई का? अन्नेम बेक अम्मु पझरा ती एम्बा अम्मु मल उरखी।



- 13निम्है मझी नू ने लूरगर अरा बुझुर'ऊ र'अदस? आस तंगहै दौ उज्जना ओक्कना ती अदन ऐद्दस नेकअन। अरा अदन लूर ती बरना लुदऊ मन्ना ती तंगहै दौ नलख गुट्ठिन नन्दस ऐद्दस नेकअन।
- 14लिकिन नीम निम्है जिया नू करतअंग इस्गहा, अरा लोभिया उइयदर होले, नीम अदही पत नू फुलई अमा मना, अरा मानिम ही बिड़दो नू अमके ठक'आ।
- 15एन्ने लेक्खा लूर धर्मस ती मल बर'ई, लिकिन ईद सौंसार ता लूर हवे, अरा ईद मेद ही सुबहा ता हवे, अरा ईद नाद ती बर'ई।
- 16एन्देरगेका एसन एसन इस्गहा अरा लोभिया र'ई, असन असन छितिर-बितिर अरा उर्मी मदहे मलदौ मनी।
- 17लिकिन एका लूर धर्मस गुस्ते बर'ई, आद मुन्द गा नेम्हा र'ई। फेन आद सान्ति आबोन बेद्द, अरा लुदऊ मनु, तबे नू र'ऊ, अरा सोग्गे अरा दौ खंजपा ती निंदका, अरा तीना मल खौँडू, मानिम गने र'ऊ र'ई।
- 18एकार ओर्त ओर्त गने सान्ति गने र'अरकी सान्ति गे नलख नन्नर, आर सान्ति ही बिहनी आबोन चाँखरकी उजगो ही खंजपन खक्खनर।

याकोब 4

- 1निम्है नू अरबानखरना गुट्ठी अरा नग्गानखरना गुट्ठी एन्देर चड्डे बर'ई? निम्है जिया नू र'ऊ निम्है नन्ना नन्ना चिबाखरना गुट्ठी तिम अरबानखरना बर'ई।
- 2नीम इन्द्रिइम ओन्टन खक्खा बेद्ददर, लिकिन अदन मल खक्खदर। नीम पिटा गे सपड़ारका र'अदर, अरा नन्नारिन इस्गहा नन्दर, अन्नु हूँ नीम एन्द्रन बेद्ददर अदिन खक्खा पोलदर। औंगे नीम नग्गानखरदर अरा अरबानखरदर। नीम धर्मस ती मल नेअदर, ई चड्डेम नीम मल खक्खदर।
- 3अरा नीम धर्मसिन नेअदर खने हूँ मल खक्खदर, ईगेका नीम मलदौ मने गुट्ठी ती नेअदर का नीम निम्है सुख-सौरत आबोन पूरा नना गेम नेअदर।
- 4अना नन्ना आली गुसन कालू आलारो, एन्देर नीम बलदर का खेखेल ता कत्था गुट्ठी मइय्याँ चोन्हा नन्ना धर्मस गने बैर नन्ना ही जोक्खा हवे? औंगे एकास खेखेल गने सखी मना बेद्ददस, आस धर्मसी बैरी मन्दस।



- 5“नम्है नू ओक्कर'आ गे धर्मस नमा गे चिच्का नेम्हा बोलतस, नाम आसी आलर र'आ गे दिम कोइहे पतारदस,” एन्ने नेम्हा पुथी नू अनभनियाँ ती लिखकी रई एन्ने नीम अमा सोच'आ।
- 6“लिकिन धर्मस गा खेखेल ता मलदौ ती नाम तरकूटी र'आ गे कोइहे मया चि'अदस। औंगेम नेम्हा पुथी एन्ने बई का, “धर्मस फुलई मनुर मइय्याँ बिड़दो मन्दस, अरा लुद'उर मइय्याँ मया नन्दस।”
- 7औंगे नीम निमन सौंसे जिया ती धर्मस गे सोंप'आ चि'आ, अरा नाद गने जुझ'आ, अरा आद निम्है गुसले उरखो बोग्गो।
- 8नीम धर्मस हेद्दे बरा, होले आस हूँ निम्है हेद्दे बर'ओस। अना पपहा आलारो, नीम निम्है उज्जना नू मलदौ नलख गुट्ठिन अम्बा चि'आ। दुइभिदया आलारो, निम्है जियन निमन नना।
- 9अरा निम्हा नंजका मलदौ नलख गुट्ठी चड्डे कलपार'आ अरा अउवार'आ अरा चींखा। निम्है अलखना अउवारना नू अरा निम्है रिझ हेन्दवारना नू बदलार'अन नेक'अन।
- 10नीम उर्बासी मुन्दहारे निमन लुद'ऊ कम'आ, होले आस निमन कोहाँ नन्त'ओस।
- 11अना एंगहा भईरो! ओर्त ओर्त ही बिड़दो नू मलदौ कत्था गुट्ठिन अमके कछनख'आ। ने तंग्हे संगे पत'ऊ भईसी बिड़दो नू कछनख'दस महले आसिन बदी टिड़'दस होले, आस पेसका ही बिड़दो नू कछनख'उस अरा पेसकन बदी टिड़'उस र'अदस। लिकिन नीन पेसकन बदी टिड़'ऊ र'अदय होले, नीन अदन पेस'ऊ मला, लिकिन पेसकन नैवई ननू र'अदय।
- 12धर्मस ओर्ते गुना पेसकन चि'उस अरा नैवई ननुस र'अदस। आसिम नमन बछाब'आ गे अरा पिटा गे सवंगिय र'अदस। लिकिन निम्है अरबर-परबारिन नैवई नना गे नीन एका ओर्तय?
- 13“ऐम इन्ना महले नेला एक'अम नगरे नू क'ओम, अरा ओन बछर असन र'ओम ती खेन्दोम बीसोम ती ढिबा अर्ज'ओम” एन्ने ब'ऊ आलारो, मेना।
- 14नीम इदन हूँ बलदर का नेला निमा गे एन्देर मनो महले निम्है उज्जना नू एन्देर मनो। निम्है उज्जना गा पैरी ता कीबा लेक्खा रई, आद एगघड़ी ईथर'ई अरा खोखा आद उधियार'ई।
- 15निमा एन्ने ब'अना रई का, “उर्बासी मने रई होले, ऐम उज्जोम अरा इदन महले अदन ननोम।”
- 16लिकिन अक्कु नीम हकना नू फुलई मन्दर, अरा ई लेक्खा उर्मी फुलई मन्ना मलदौ हवे।
- 17औंगे ओर्तस तंगा नन्ना रई आ दौ आबोन अखदस ती हूँ अदन मल नन्दस होले, आस पाप नन्दस।

याकोब 5



- 1अना उरुब आलारो, मेना। निम्है मइय्याँ बर'ऊ रई आ भयभयान खिलपत गुट्ठी ही चड्डे नीम चींखा अरा रेक'आ।
- 2निम्है खुर्जी गुट्ठी नठारा केरा, अरा निम्है किचरी गुट्ठिन पोचगो मोक्खा चिच्चा।
- 3निम्है सोना अरा चांदी मुरछारा केरा। अरा इदही मुरछा निम्है बिड़दो नू गोवाह चि'ओ, अरा ई मुरछा चिच्ची लेक्खा निम्है मेदन मोखो चि'ओ, एन्देरगेका नीम निम्है खुर्जिन दौं गे मल बउराचकर। ईद ई जुग ही मुंजुरना उल्ला एन्ने अखना ती हूँ नीम खुर्जी बेन्दका र'अदर।
- 4ऐरा, बनिहार आलर निम्है खल्लन खोस्सर, नीम आर ही बनिन मल चिच्चकर, अक्कु आर गे मल चिच्चा बनी निम्है बिड़दो नू गोहरार'आ लगी। अरा आ बनिहार ही गोहरारना उर्मी ती सवंगिय धर्म उर्बस गुसन अंडसकी रई।
- 5नीम खेखेल नू सुख-सौरत भोगचकर अरा निम्है उर्मी मनेन पूरा नन्ना ती सुक्खे उज्जकर। अरा नीम निम्है जियन पलचकादर, लिकिन एन्देर नीम बलदर का नठारना ही उल्ला हेददेम अंडसकी रई?
- 6निम्है बिड़दो मल मंजका उजगो आलारिन हूँ नीम बदी टिड्डकर ती पिटकादर।
- 7औंगे अना एंगहै भईरो, उर्बासी किरना गूटी खतिर नना। ऐरा, एकासे खल्ल उर्बस तंगहै कोइहे दामे ही खिती मना गे पहिल बरखा ती छेददे बरखा गूटी खतिर नन्दस।
- 8नीम हूँ खतिर नना डिठ अमके अम्बा, एन्देरगेका उर्बासी किरना उल्ला हेददे अंडसकी रई।
- 9अना भईरो, नीम ओर्त ओर्तर ही बिड़दो नू अमा हउडउर'आ, होले नीम नैवई मल नन्तार'ओर। ऐरा, नैवई ननुस चाइहेम बर'ऊ र'अदस।
- 10अना भईरो, उर्बासी नामे नू कछनखका धर्मसी कत्था तिंगुर ही पत नू सोच'आ। आर खतिर गने सस्ती चोद'आलियर। इदन नीम ओन्टा नमुना अख'आ।
- 11ऐरा, खतिर ननू आलर आसीस खक्खोर। नीम योबसी खतिर नन्ना ही पत नू गा मंजकादर। अरा नीम ऐरा ओंगदर का उर्बस आसी छेददे बेड़ा नू एकासे दया नंजकाचस। उर्बस कोइहे सोग्गे ईरू अरा मया ननू र'अदस।
- 12अना एंगहै भईरो, उर्मी ती कोइहे गा, नीम किरया अमके मोखा। खेखेल ही महले मेर्खा ही महले एकअम नन्ना आलो ही मइय्याँ अमके किरया मोखा। लिकिन निम्है कत्था गा हाँ होले हाँ अरा मला होले मला र'अन नेकअन। होले धर्मस निमन बदी मल टिड'ओस।



- 13निम्है नू एकअम ओर्तस सस्ती सारदस होले, आस गोहरारदस नेकअन। अरा निम्है नू एकअम ओर्तस रिझदस होले, आस ओहमा पाइदस नेकअन।
- 14अरा निम्है नू एकअम ओर्तस बेमार नू र'अदस होले, आस कलीसिया ही सेयान आलारिन मेखदस नेकअन। अरा आर आसी मइय्याँ उर्बासी नामे नू इसुंग टूइरकी आस गे गोहरारनर नेकअन।
- 15पत'अना गने नन्ना गोहरारना बेमरहा आलासिन कोड़े ननी चिई। अरा उर्बस आसिन कोड़े ननोस। अरा आस पाप गुट्ठी नंजकादस होले, अबड़ा आस गे अम्बतार'ओ कालो।
- 16औंगे नीम निम्है पाप गुट्ठिन ओर्त ओर्तर नू तेंग'आ, अरा ओर्त ओर्तर गे गोहरार'आ, होले नीम उजगार'ओर। उजगो आलासी गोहरारना सवंगिय रई, अरा इवु ती कोइहे नलख मना ऊंगी।
- 17धर्मेसी कत्था तिंंगू एलियस नम्है लेक्खा आलस रहचस। लिकिन आस सौंसे जिया ती गोहरारस का साढ़े तीन बच्छर अम्बो पुंइय्याँ, अरा आ राजी नू साढ़े तीन बच्छर चेप मल पुंइय्याँ।
- 18अरा आस अउरिम गोहरारस खने, चेप पुंइय्याँ अरा खेखेल नू खंज'आ हेलरा।
- 19अना एंगहै भईरो, निम्है नू एकअम ओर्तस धर्मेसी मानी डहरे ती बिलटारका केरकादस खने, ओर्तस आसिन किर्त'अदस ओन्द्रस होले,
- 20आस इदन अख'आ हो'आ का, आस ओर्त पपहा आलासिन आसी मलदौ डहरे ती किर्त'अदस, अरा आस आसिन जनमजुग खे'अना ती बछाब'अदस, अरा आस आ पपहा आलासी कैनो गोटंग पाप गुट्ठिन अम्बत'अना गे चइडे मन्दस। आमेन।



1 पतरस

1 पतरस 1

- 1 ऐन पतरस येसु मसीसी तइरकन रोम चक पोन्तोस अरा गलातिया अरा कप्पदोकिया अरा आसिया अरा बितुनिया नू छितयारर ती जोक्क उल्ला गे र'उर लेक्खा उज्जू धर्मस ती चजरका आलर गे ई चिठिन लिखदन।
- 2 धर्म बंगस तान हूल्लो तिम ठंचका लेक्खा निमन चजकादस, अरा नीम आसिन पेस्र'आ गे आसी बोलतस निमन नेम्हा नंजकादस, अरा येसु मसीसी खेंस ती नोडरकादर। धर्मसी मया अरा कोड़े कोड़े ती कोड़े निमा मनन नेकअन।
- 3 नम्है उर्बस येसु मसीसी बंगस धर्मस गे उर्मी ओहमा मनन नेकअन। आस तंग्हे कोड़े सोग्गे ही चड्डे येसु मसीसिन केचकर ती उज्जत'अना ती नमा गे ओन्टा पुना कुन्द्रनन चिच्कादस। इदही चड्डे नाम कोड़े असरा गने उज्जदत।
- 4 इदही गने धर्मस निमा गे ओन्टा कोड़े आसीसन मेर्खा नू उइय्कादस। आद इकला हूँ मल नठारई अरा सोतरा मल मनी अरा मल चड्मी।
- 5 नीम गा आ नाडरनन खक्खना गूटी निम्है पत'अना ती धर्मस तंग्हे सवंग ती निमन खापालदस। आ नाडरना छेद्दे बेड़ा नू दहदर मना गे सपडारकी रई।
- 6 ई नाडरना ही पत नू नीम कोड़े रिझदर, अन्नु हूँ अक्कुन जोक्क बेड़ा गे निमा कैनो रकम ही खिलपत सहना ही चाड रई।
- 7 निम्है पत'अना मानिम एन्ने पुरुब मना गे इबड़ा खिलपत गुट्ठी निमा गे बर'ई। नठारना सोना चिच्ची ती गलाबातारई। आँगो सोना ती कोड़े मईन ही निम्है पत'अना खिलपत गुट्ठी ती बिद्दना दिम रई। निम्है पत'अना बिद्दई खने, येसु मसीस गोट्टा सौंसार गे तंगन दहदर ननो बारी नू नीम ओहमा अरा महबा अरा मईन आबोन खक्खोर।
- 8 आसिन नीम मल्ला ईरका अन्नु हूँ आसिन चोन्हा नन्दर। नीम आसिन मल ईरका ती हूँ अक्कु आसिन पत'अदर ती तेंगा पोलना रिझ अरा कोड़े मईन गने रिरयारदर।
- 9 एन्देरगेका नीम निम्है पत'अना ही इनाम खक्खदर। ईद निम्है जिया गुट्ठी ही नाडरना हवे।
- 10 एका मया निमा गे खक्खरना रहचा, अदही पत नू तिका धर्मसी कत्था तिगुर ई नाडरना ही पत नू दिम कोड़े बेद्दना खोजना नू रहचर।



- 11 मसीसी बोलता आर ही नू रहचा, अरा आरिन तिगिया का एकासे मसीस दुक्खे चोद'ओस अरा अदही खोखा कोइहे मईन आबोन खक्खोस। औंगे आर इदही बेद्दना खोजना ही चिहूट नंजर का इदही बेड़ा एकाबारी बर'ओ, अरा आद एकासे बर'ओ।
- 12 आर गे तेंगतारा केरा का इबड़ा कत्था गुट्ठी तम्है उज्जना बेड़ा नू मल मनो, लिकिन बग्गे चॉन ही खोखा निम्है बेड़ा नू मनो। अरा मेर्खा ती तइरका नेम्हा बोलतासी सवंग ती निमा गे दौ कत्था तिगुर ती अक्कुन ई दौ कत्था मेन्तारकी रई। ईद कोइहे बेस हवे का मेर्खा पैकर हूँ इबड़ा कत्था गुट्ठी मन्नन ऐरा गे चिबाखारनर।
- 13 औंगे नीम अपन अपन जियन नलख नना गे सपड़'आ। अरा खतिर नन्ना ती र'आ। अरा येसु मसीसी दहदर मन्ना ही बेड़ा नू निमा खक्खना रई आ मया मइय्याँ निम्है उर्मी असरा आबोन उइय्या।
- 14 मुन्द नीम मल बुझना नू रहचकर खने, मलदौ चिबाखारना गुट्ठी निमा नू रहचा। अदही लेक्खा अक्कुन हूँ मल उज्जरकी पेसकन पेस'ऊ खद्दर लेक्खा मना।
- 15 निमन चुनचका धर्मस एकासे नेम्हा र'अस, अन्नेम नीम हूँ निम्है सौंसे उज्जना ओक्कना नू नेम्हा र'आ।
- 16 एन्देरगेका नेम्हा पुथी नू लिखकी रई, “ऐन नेम्हा र'अदन, औंगे निमा हूँ नेम्हा र'अना रई।”
- 17 अरा बिगर तीना खॉड़ना ती उर्मी आलारिन अपन अपन नंजका नलख ही लेक्खा नैवई ननू मेर्खा बंगासिन नीम गोहरारदर। औंगे इसन खेखेल नू नीम जोक्क उल्ला गे र'उर लेक्खा उज्जना बेड़ा गूटी इल्चका अरा कोइहे मईन गने उज्जा ऐका।
- 18 एन्देरगेका नीम अखदर का निम्है पूरखर ती इतनुम बर'आ लगी निम्है अयंदहा उज्जना ही डहरे ती निम्है नाइरना सोना मलता चाँदी लेक्खा नठारना आलो ही दाम ती मल मंजकी रई।
- 19 लिकिन नीम बिगर बदी अरा बिगर पाप ही भेंडो खद्द लेक्खा मसीसी कोइहे दाम ही खेंस ती नाइरकादर।
- 20 आस खेखेल गढ़ना ही मुन्द तिम चाजरकाचस। लिकिन इबड़ा मुंजा ता बेड़ा गुट्ठी नू निमा गे दहदर मन्तारकादस।
- 21 आस ती दिम नीम अक्कु धर्मसिन पत'अदर। धर्मस दिम आसिन केचका ती उज्जताचस ती आस गे महबा चिच्चस। औंगे निम्है पत'अना अरा असरा धर्मस मइय्याँ रई।



22 अक्कु गा निम्है जिया गुट्ठी मानिमन पेसका ती सुध मन्नकी रई। खने नीम निम्है भई बहिनर ही मइय्याँ मानिम चोन्हा उइय्कादर। औंगे नीम ओर्त ओर्त गने मानिम जिया गने कोइहे चोन्हा नना।

23 एन्देरगेका नीम नठारना बिहनी ती मला, उज्जना अरा सदौ बन्चका र'अना धर्मसी कत्था ही मल नठारना बिहनी ती पुना कुन्द्रनन खक्खका र'अदर।

24 एन्देरगेका नेम्हा पुथी एन्ने बई का, “उर्मी आलर लट्टी लेक्खा र'अनर, अरा आर ही ओर्मा महबा लट्टी ही पूंप लेक्खा रई। लट्टी खाई कई अरा पूंप निदगी कई।

25 लिकिन उर्बासी कत्था गा सदौ बन्चकी रई।” ईदिम दौ कत्था ही कत्था, एकदा निमा तेंगरा।

1 पतरस 2

1 औंगे नीम उर्मी रकम ही मलदौ अरा उर्मी ठकना अरा उत्तुरमाइना गुट्ठी अरा इस्गहा गुट्ठी अरा उर्मी मलदौ कछनखरना गुट्ठी ती निमन तरकूटी उइय्या।

2 अरा पुना कुन्द्रका खद्दर दुदही गे तरसारनर अदही लेक्खा नीम हूँ सुध बोलता ही दुदही गे तरसारना नूर'आ, होले आद ती नीम निम्है नाइरना नू पूरा परद'ओर।

3 एन्देरगेका नीम अगमाचका र'अदर का नेम्हा पुथी नू बाचका लेक्खा “उर्बस एवँदा बेस र'अस”।

4 नीम गा मसीस गुसन बर'आ, एकास धर्मसी मन्दिर ही उज्जना पखना हिकदस। आस आलर ती तरकूटी नन्तारकादस, लिकिन धर्मस ती चाजरका अरा आस ती कोइहे मईन खक्खका र'अस।

5 नीम हूँ उज्जना पखना गुट्ठी लेक्खा र'अदर का धर्मसी बोलता कमना धर्मसी एइपा कमनुम कादर। अरा नीम आसी नेम्हा नैग खोंइहा हूँ हिकदर। अरा येसु मसीस एन्देर नंजकादस अदही चइडे नीम बोलता दाँडे गुट्ठिन अरगदर, एकदा धर्मसिन पतार'ई।

6 एन्देरगेका नेम्हा पुथी नू एन्ने लिखकी रई का, “ऐरा, ऐन येरुसलेम नू ओन्टा चाजरका अरा कोइहे मईन ही कौँडा पखनन उइय्दन, ने आसी मइय्याँ पत'ई आस इकला हूँ मल लजर'ओस।”

7 आसिन पत'ऊ निमा गे आ पखना कोइहे मईन ही रई। लिकिन आसिन मल पत'उर गे नेम्हा पुथी एन्ने बई का, “एइपा कम'उर एका पखनन अनभनियाँ बाचर ती ताँइचका चिच्काचर आदिम कौँडा ही कुक्कु पखना मंजा।”

8 अरा अउरिम नेम्हा पुथी बई का, “आस आलर गे मूइना ही पखना अरा आर गे थोथमारना ही चचड़ी र'अदस।” आर धर्मसी कत्थन मल पेसना ती मूइनर। ईदिम आर गे धर्मसी मने रहचा।



- 9लिकिन नीम गा ओन्टा चज्जिका जईपुई, अरा ओन्टा बेल नैग खोंइहा, अरा ओन्टा नेम्हा जाती, अरा धर्मसी तंगहै आलर हिकदर। ने निमन ऊखा ती ओथ्रस ती तंगहै अजगुत लौकारना बिल्ली नू मीखियस ओन्द्रस, आसी कोहाँ नलख गुट्ठिन आलर गे तेंगा गेम नीम एन्ने मन्नकादर।
- 10मुन्द नीम धर्मसी आल एन्ने मल अखतारकर, लिकिन अक्कु गा नीम धर्मसी आलर हिकदर। मुन्द नीम धर्मसी सोग्गेन मल खक्खकर, लिकिन अक्कु गा आसी सोग्गेन खक्खकर।
- 11अना चोन्हा आलारो, नीम खेखेल नू जोक्का उल्ला गे र'उर अरा बहरीतर लेक्खा र'अदर। औंगे ऐन निमन आनदन का नीम मेद ही रिझ रंग गुट्ठी ती तरकूटी र'आ, एकदा निम्है बोलता ही बिड़दो अरबा-नर्रई।
- 12मल पत'उर ही मझी नू निम्है उज्जना ओक्कना बेस र'अना रई। औंगे आर निमन मलदौ ननू ब'अनर ती बदी नन्नर ती हूँ, निम्है दौ नलख गुट्ठिन ऐरोर ती धर्मस आलारिन नैवई नना गे बरना उल्ला नू असिन महबा ननोर।
- 13नीम उर्बासी पेसकन पेस'उर र'अना ती आलर गे चीरका ओन्टे ओन्टे अदिया ही तबे नू र'आ। उर्मी ती कोइहे अदिया उइयू बेलस गे,
- 14अरा मलदौ ननुर गे डंडे चि'आ गे अरा दौ ननुर ही ओहमा नना गे बेलस तरती उइरका राजीखापुर ही हूँ तबे नू र'आ।
- 15एन्देरगेका नीम निम्है दौ नलख ती लूर मलका आलर ही मलदौ कत्था कछनरन्नन मुढ़'आ गे धर्मस बेद्दस।
- 16नीम छछिन्द आलर लेक्खा उज्जा। लिकिन नीम गा धर्मसी बिट्ठी ननू जोंख र'अदर, औंगे निम्है छछिन्द आबोन मलदौ नना गे अमा बउर'आ।
- 17ओर्मारिन मईन नना। पत'ऊ भईर गने चोन्हा नना। धर्मसिन एल्चा। बेलासिन मईन नना।
- 18अना बिट्ठी ननू जोंखारो, नीम निम्है उर्बारिन कोइहे मईन ननरकी आर ही तबे नू र'आ। दौ अरा लुदऊ उर्बर गे लेका मला लिकिन कुचरहा उर्बर ही तबे नू हूँ र'आ,
- 19एन्देरगेका नीकईम तंगहै उज्जना नू धर्मसी मने ईद एन्ने अखना ती बिगर नैवई ती कोइहे सस्ती चोद्दस ती कलपारदस होले, आस धर्मसिन खुसमारतादस।
- 20नीम इन्द्रिइम गलती नन्दर ती अदगे खक्खना दंडेन सहदर होले, आद ती निमा एन्देर हूँ नफा मल मनो। लिकिन नीम दौ नलख नंजका ही चड्डे सस्ती सारदर, अरा अदिन नीम कयास ती सहदर होले, आद धर्मसिन खुसमारत'ई।



- 21 इदगेम नीम मॅखका हूँ र'अदर। एन्देरगेका मसीस हूँ निमा गे सस्ती सारचस ती नीम आसी उज्जना ओक्कना लेक्खा उज्जा ऐका गे निमा गे ओन्टा चिन्हा आबोन अम्बका केरकादस।
- 22 आस पाप मल नंजस अरा आस इकला हूँ मल ठगचस।
- 23 आस केबेर मोक्खस ती मल केप्पस, अरा दुक्खे चोद'अरकी नेकन हूँ मल धिराब'आ लगियस। लिकिन आस गा तंगन मानी गने नैवई ननू धर्मसी खेक्खा नू सोंपचस चिच्चस।
- 24 आस नम्है पाप गुट्ठिन तंग्हे मैद नू चेड्डस ती क्रुस नू अरगियस, एकत्रु नाम पाप नन्नन अम्बदत ती उजगो उज्जना उज्जा ओंगदत। अरा आसी लौर मोक्का ती नीम उजगारका र'अदर।
- 25 मानिम नू मुन्द नीम बेहडारका भेंडो लेक्खा रहचकर, लिकिन अक्कु निम्है जिया गुट्ठी ही खापुस अरा ईरू-खूजुस मसीस गुसन किरका बरचका र'अदर।

1 पतरस 3

- 1 अन्नेम अना मुक्कारो! नीम हूँ तम्है तम्है मैतर ही आकुस नू र'आ। होले आर ती नेकईम धर्मसी कत्थन मल पत'उर र'अना ती हूँ, नीम आर गे धर्मसी पत नू तेंगना ती मला लिकिन नीम निम्है दौ उज्जना ओक्कना ती आरिन धर्मस तरा किरत'आ ओंगोर दने।
- 2 आर निम्है नेम्हा उज्जनन अरा नीम आर गे चि'अना मईन आबोन ऐरोर खने, आर धर्मस तरा किरा ओंगोर दने।
- 3 बिनयारना खोपा मुलरना, अरा सोना ही सिंगार, अरा नापे नापे किचरी गुट्ठी ती अत्तना कुन्दरना ही बहरी ता सिंगार ही पत नू अमा सोच'आ।
- 4 लिकिन निम्है सिंगार गा निम्है भितरी उज्जना ही सिंगार र'अना रई। नीम निमन लुदऊ अरा सल जिया ती सिंगार'आ। ईदिम मल नठारना सिंगार हवे, अरा धर्मसी ऐरना नू कोइहे मान ही रई।
- 5 ई लेक्खम चिरान नू धर्मस नू असरा उइयका नेम्हा मुक्कर हूँ तम्है मैतर ही आकुस नू र'आ लगियर ती तमन सिंगर'आ लगियर।
- 6 ई लेक्खम सारा तंग्हे मैतस अब्राहमसिन उर्बा ब'आलिया ती आसी पेसकन पेस'आ लगिया। अरा नीम हूँ एन्द्रा मानिम रई अदिन बिगर इल्चका ननोर होले, नीम अदही खदद मनोर।
- 7 अन्नेम अना मैतारो! नीम निम्है मुक्का गने ठौका बुझना अरा अदही मइय्याँ ता सोच गने उज्जा। अरा मुक्कारिन निम्है ती पयहा आल अख'आ ती अरा निम्है गने मल मुंजना उज्जना ही



धर्मसी सोग्गेन खक्खका अख'आ ती आरिन मईन नना। नीम एन्ने ननोर होले, नीम सान्ति जिया ती र'ओर अरा बढियर गोहरार'आ ओंग्दर।

⁸छेद्द नू आन्दन, नीम ओर्मर ओन्टे जिया ओर्त ओर्तर ही पत्त नू सोच नू र'आ, ओर्मरिन भईर लेक्खा चोन्हा नना, सोग्गे ईरू अरा लुदऊ जिया मना।

⁹नीम मलदौ ही ऊजी मलदौ अमा नना, केबना ही ऊजी अमा केबा, लिकिन ऊजी नू बरकत दिम नना। एन्नेम नीम ननोर होले धर्मस निमन बरकत ननोस, इदगेम नीम मेखका र'अदर।

¹⁰एन्देरगेका नेम्हा पुथी नू एन्ने लिखकी रई का, “ने खुस ती उज्जा गे बेद्ददस अरा दौ उल्ला गुट्ठिन ऐरा बेद्ददस, आस मलदौ मल ब'अना रई, अरा आस मल ठकना रई।

¹¹अरा आस मलदौ ती तरकूटी र'अरकी दौ नन्ना रई। अरा आस कोडेन बेद्ददस ती अइय्यम उज्जना ऐकना रई।

¹²एन्देरगेका उर्बासी खन्न उजगो आलर ही मइय्याँ टक टकने ऐरते रई, अरा आसी खेबदा आर ही गोहरारना नू ओइचकी रई। लिकिन उर्बस मलदौ ननुर ती मुहिन बिड़दो नन्दस।”

¹³नीम दौ नन्ना गे कोइहे पतारदर होले, ने निमा गे मलदौ ननोस?

¹⁴लिकिन नीम दौ नन्ना चड्डे दुक्खे चोदर होले, नीम धर्मस ती आसीस खक्खोर। नेम्हा पुथी नू लिक्खरका लेक्खा नना का, “नीम आर ही इल्चताना गुट्ठी गे अमके एल्चा अरा अमके धुकपुकर'आ।”

¹⁵लिकिन नीम मसीसिन निम्है उज्जना नू उर्बस ब'अरकी इंझरकी आसिन मईन नना। अरा नेकईम मसीसी मइय्याँ ता निम्है असरा ही पत्त नू इन्द्रिइम मेन्नर होले, आर गे अदही पत्त नू बुझुरत'आ गे सगरो सपड़ारका र'आ।

¹⁶लिकिन लुदऊ जिया अरा मईन गने इदन नना। अरा निम्है लखनन निमन उइय्या। खने मसीस नू निमा गे र'अना बेस जज्जना ओक्कना ही बिड़दो नू मलदौ सोच ती कछनख'उर तम्है हींइना कत्था ही पत्त नू लज्जे मोंखोर।

¹⁷मलदौ ननरकी दुक्खे चोदना ती, धर्मसी मने ईदिम होले, दौ नन्ना ती दुक्खे चोदना कोइहे बेस रई।

¹⁸इवंगेका मसीस नन्नर ही पाप गुट्ठी गे ओंग्होल लेका केचस केरस। आस धर्मसी ऐरना नू उजगो रहचस, लिकिन आस निमन धर्मस गुसन अंइसत'आ गे धर्मसी ऐरना नू उजगो मलकर गे केचस। आस कया ती गा पिटतारस, लिकिन बोलतस नू उज्जतारस।



- 19 अउर हूँ आस बोलतस ती केरस ती गुड़रका बोलता गुट्ठी गे दौ कत्था मेन्ताचस।
- 20 अबड़ा बोलता गुट्ठी ईर हिकनर का, एका ओर्तर चिरान नू नूहसी परिया नू आस कोहाँ डोंगा कमना उल्ला गुट्ठी नू धर्मस कोड़हे कयास गने पाब ऐरा लगियस खने, आसी पेंसकन मल पेंसर। आ कोहाँ डोंगा नू जोक्कोर लेका आठ आलर लेका बया बहड़ी ती बछरर।
- 21 ई अम्मू अक्कु निमन नाड़रऊ नोड़रना ही चिन्हा हवे। ई नोड़रना मेद ही कस्सन ओथ्रआ गे मला, लिकिन आद धर्मसी मुन्दहारे मानिम लखना गने नन्ना गच्छरना हवे। ई नोड़रना इदन ईदई का, येसु मसीसी उज्जा चोअना ही चड्डे निमा गे नाड़रना खक्खकी रई।
- 22 मसीस मेर्खा नू केरस ती कोड़हे मईन ही अड्डा धर्मसी तीना पक्खे ओक्का रअदस। अरा उर्मी मेर्खा पैकर अरा अदिया गुट्ठी अरा सवंग गुट्ठी आसी आकुस ही किय्या रई।

1 पतरस 4

- 1 औंगे मसीस नम्है पाप गुट्ठी गे तंगहै कया नू दुक्खे चोदना ती नीम हूँ ई लेक्खम तम्है कया नू दुक्खे चोदर एन्ने ई सोच आबोन कमहड़ लेक्खा अत्तका ती रआ। एन्देरगेका एकास कया ती दुक्खे सारस आस पाप ही सवंग ती बच्छरका रअदस।
- 2 इदही चड्डेम आस खेखेल नू अउर उज्जना तंगहै उज्जना नू आल सुबहा ती बरना मलदौ सुख-सौरत गुट्ठी गे मल उज्जदस। लिकिन धर्मसी मने लेक्खा नना गेम आस उज्जदस।
- 3 नीम मुन्द धर्मसिन बल्लुर पतारना नलख गुट्ठिन नन्ना ती रिरयारर ती बग्गे बेड़न बहाबाचकर। नीम पेहरन ही सोतरा नलख नू, अरा मलदौ सुख-सौरत गुट्ठी नू, अरा उंखना नू, अरा रिङ्ग-रंग नू, अरा अरखी ओन्ना मदी गुट्ठी नू, अरा बिगर नेग ही मूर्ती गुट्ठी गे ओड़ लग्गना नू उज्जा लिक्कर।
- 4 लिकिन निम्है मुन्द ता सखीर अनचकरनर का नीम अक्कु आर ही गने आर नन्ना मलदौ नलख गुट्ठी नू मल जुमदर। औंगे आर निमन हींइनर।
- 5 लिकिन सुरता उइय्या का एकास केचका अरा उज्जना आलारिन नेंवई नना गे सपड़ारका रअदस आस गे आर लेखा चिअना रओ।
- 6 इदगेम अक्कुन केचका पत्तऊ आलर गे हूँ आर उज्जना बारी नू दौ कत्था तेंगतारा केरा। आर कया ती गा उर्मी आलर गे मन्ना नेंवई ही लेक्खा केचका रअनर, अन्नु हूँ बोलता ती गा धर्मसी चिताबुता ही लेक्खा अउरिम उज्जा ओंगोर।



- 7 उर्मी कत्था गुट्ठी ही मुंजना हेददे अंडसकी रई। आँगे नीम फरी जिया ती गोहरार'आ गे निमन सम्झ'आ।
- 8 उर्मी ती कोहाँ गा ओर्त ओर्त गने कोइहे चोन्हा नना, एन्देरगेका चोन्हा कोइहे पाप गुट्ठिन भुलाब'अती चिई।
- 9 बिगर कुनमुनर'आ ती ओर्त ओर्तारिन पाही ऐरा।
- 10 नीम ओर्मर धर्मस ती खक्खका इनामन बउरारकी ओर्त ओर्त गे सुसर नना। एन्नेम नन्ना नन्ना रकम ती बरना धर्मसी मया आबोन मानी गने उय्यू-उस्र'ऊ मना।
- 11 ओर्तस गे कत्था मेन्त'अना ही इनाम रई होले, आस धर्मस तान आसी ती ब'अना लेक्खा कत्था मेन्त'अना रई। ओर्तस गे सुसर नन्ना ही इनाम रई होले, आस धर्मस चि'अना सवंग ती अदन नन्ना रई। खने नीम नन्ना उर्मी कत्था गुट्ठी येसु मसीस संगरा ती धर्मस गे महबा ओन्द्रना रई। आस गेम उर्मी महबा अरा सवंग उर्मी उल्ला मनन नेकअन। आमेन।
- 12 अना चोन्हा आलारो, निमन बिढ़'आ गे गौंगौरना चिच्ची लेक्खा सस्ती निम्है मझी नू मना लगी। इदही पत्त नू एकअम मल मन्ना कत्था निम्है नू मंजकी रई एन्ने सोच'अरकी अमा अनचकर'आ।
- 13 लिकिन मसीसी सस्ती गुट्ठी नू ऐम हूँ मेस्रदम एन्ने सोच'अरकी रिझ'आ। खने आसी महबा दहदर मन्ना ही बेड़ा नू नीम अउर कोइहे रिरयार'ओर।
- 14 नीम मसीसिन पत्त'ऊ र'अना चड्डे निम्है निंदा मनी होले, नीम धर्मस ती आसिस खक्खुर दिम हिकदर। एन्देरगेका महबा ती निंद्रका धर्मसी बोलतस निम्है नू मइदस।
- 15 नीम सस्ती सारना बारी आल पिटुस, मलता खलबस, मलता मलदौ ननुस, मलता नन्नर ही नलख नू हेडेम-जेडेम ननुस लेक्खा सस्ती अम्बोस सार'आ।
- 16 लिकिन नीम मसी आलर र'अना चड्डे सस्ती सारदर होले, अदही पत्त नू अम्बोस लजर'आ, लिकिन मसी आलर एन्ने नामे निमा गे र'अना चड्डे धर्मसी महबा नना।
- 17 एन्देरगेका धर्मस आलारिन नेंवई नन्ना ही बेड़ा हेददे अंडसकी रई। ईद धर्मसी आलर ही मझी नू मुन्द ओरे मनो। नेंवई नन्ना मुन्द नम्है नू ओरे मनी होले, धर्मसी दौ कत्थन मल पेस्र'उर ही मुंजना एकासे र'ओ?
- 18 अरा नेम्हा पुथी ब'अना लेक्खा, “उजगो आलर दिम सकइत ती नाइर'ओर होले, धर्मसिन मल पेस्र'उर अरा पपहर ही दसा एकासे र'ओ?”



19 औंगे धर्मसी मने ही लेक्खा सस्ती सार'उर अउरिम दौ नन्तेम र'अना ती पत'अना जोगे अरा तमन गढचका धर्मस गे तमन सौंपनर नेकअन।

1 पतरस 5

1 निम्है मझी ता सेयान आलर गे, आर ही लेक्खा संगे सेयान आलन, अरा मसीस सारचका सस्ती गुट्टी ही गोवाह, अरा दहदर मन्ना महबा नू मेस्र'ऊ र'अना एंगहै रिझत'अना ईद र'ई का:

2 धर्मसी निम्है खेक्खा नू सौंपचका आसी खौंइहन खापा, एकदा निम्है मझी नू र'ई। अरा ईरू-खूजुर लेक्खा सुसर नना। देवा देवा ती मला, लिकिन धर्मस नीम नना गे बेद्दना लेक्खा सौंसे जीया ती अदन नना। मलदौ अर्ज'आ गे मला, लिकिन कोइहे रिझ गने आ सुसर आबोन नना।

3 अरा निम्है खेक्खा नू ऐरा खोजा गे चीतारका आलर ही मइय्याँ नीम आकुस ननू लेक्खा अमा र'आ, लिकिन बेस नमुना मनरकी आरिन कइहाब'आ।

4 नीम एन्ने ननोर होले, इकला मुध महरस दहदर मनोस, आ बारी नीम तंगहै बिल्चनन मल अम्बना महबा अरा मईन ही मुकुटन खक्खोर।

5 अन्नेम अना जौंखारो! नीम सेयान आलर ही आकुस नू निमन चि'आ। अरा नीम ओर्मर लुदऊ मनरकी ओर्त ओर्त गे सुसर नना। एन्देरगेका नेम्हा पुथी एन्ने बई का, “धर्मस फुलई मनुर ही बिइदो मन्दस, लिकिन आस लुदऊ र'उर ही मइय्याँ सोग्गे ऐरदस।”

6 औंगे नीम निमन धर्मसी सवंगिय खेक्खा किय्या लुदऊ मना ती र'आ, होले ठौका बेड़ा नू आस निमन मइय्याँ चोद'ओस।

7 निम्है उर्मी घोख गुट्ठिन आस गे चिलघ'आ, एन्देगेका आस गे निम्है सोच र'ई।

8 चिहूंक र'आ, अरा एज्रका र'आ। निम्है कोहाँ बैरी नाद मुर्ना लकड़ा लेक्खा इदिन बेद्दा कुददी का नेकन चरौन मोखोन।

9 निम्है पत'अना नू बड़ियर मना ती आसी बिइदो नू जुझर'आ। एन्देरगेका नीम अक्कर का, सौंसे खेखेल नू ता निम्है मसी भई बहिनर हूँ निम्है लेक्खम सस्ती सार'आ लगनर।

10 अक्कु उर्मी दसा नू उर्मी रकम ही संगरा ननुस धर्मस निमन मसी येसुस नू ता निम्है पत'अना ही चइडे तंगहै मल मुंज्रना महबा नू मीखियस। नीम जोक्क घड़ी सस्ती सारका खोखा आस तानिम निमन पोकता ननोस, अरा बड़ियर ननोस, अरा सवंग चि'ओस ती बड़ियर इज्जत'ओस।

11 आस गे सवंग हुल्लो ती हुल्लो गूटी र'अन नेकअन। आमैन।



12 ऐन निमा गे ई चिठिन सीलासी संगरा ती सन्नी रूपे नू लिखचकन ती तइयदन। आसिन ऐन ओन्टा पत'अना जोगे भई अखदन। निमन रिझत'आ गे अरा ईदिम धर्मसी मानिम मया एन्ने गोवाह तेंगा गे ऐन इदन लिखचका र'अदन। औंगे ई मया नू नीम बड़ियर बन्चका र'आ।

13 निम्है गने चज्जरका र'अना बाबुलोन ही कलीसिया हूँ निमन मौंजरा ननी। अन्नेम एंगहै खद्द लेक्खा चोन्हा ही मरकुस निमन मौंजरा नन्दस।

14 कोइहे चोन्हा ही चोंखा गने ओर्त ओर्तारिन मौंजरा नना। मसीस नू र'ऊ निमा ओर्मर गे कोड़े मनन नेकअन। आमेन।



2 पतरस

2 पतरस 1

- 1 ऐन येसु मसीसी जौखन अरा तइरकन सिमोन पतरस नम्है धर्मस अरा नाइस येसु मसीसी सोग्गे अरा नैवई ती एम्है पत'अना ही लेक्खा कोइहे मूली ही पत'अनन खक्खका निमा ओर्मर गे ई चिठिन लिखदन।
- 2 धर्मसिन अरा नम्है उर्बा येसुसिन अखना लूर ती निमा गे मया अरा कोड़े बग्गे ती बग्गे मन्नुम कालन नेकअन।
- 3 भगती उज्जना उज्जा गे चाइ र'अना उर्मिन आसी धर्म मन्ना सवंग नमा गे चिक्की रई। आसी पत नू नमा गे र'अना लूर ती इबड़ा नमा गे चीरकी रई। आस दिम नमन तंगहै महबा अरा दौ गुन्न ती मीखका र'अदस।
- 4 आसी महबा अरा दौ गुन्न ती दिम आसी कोइहे अरा नगदे मईन ही गच्छरना गुट्ठी नमा गे चीरकी रई। ई गच्छरना गुट्ठी ती आ धर्म सुबहा नू नीम हूँ मेस्र'आ ओंगदर, अरा मलदौ चिबाखारना ती खेखेल नू मन्ना खुपाब'अना ती हूँ बछर'आ ओंगदर।
- 5 ई चड्डेम नीम उर्मी रकम ही चिहूट ती निम्है पत'अना गने दौ गुन्न आबोन जोड़'आ, अरा दौ गुन्न गने लूरन जोड़'आ।
- 6 अरा लूर गने जियन सम्ड़'अना, अरा जियन सम्ड़'अना गने खतिर नन्ना, अरा खतिर गने भगती।
- 7 अरा भगती गने भई बहिन चोन्हा, अरा भई बहिन चोन्हा गने चोन्हन जोड़'आ।
- 8 एन्देरगेका इबड़ा उर्मी गुन्न गुट्ठी नू नीम बड़ियर मन्नुम परदनुम क'ओर होले, नम्है उर्बस येसु मसीसिन अखना लूर नू नीम परदा गे अरा खंजपा ओन्द्र'आ गे इबड़ा सहाड़ा ननो।
- 9 लिकिन नेख'आ नू इबड़ा गुन्न गुट्ठी मलकी आस अन्धहा लेक्खा र'अदस, अरा गेच्छा ऐरा पुल्लू लेक्खा र'अदस। आस मुन्द ता तंगहै पाप गुट्ठी ती तान नोइर'अरकी सुध मन्तारकाचस अदिन मोधकादस।
- 10 ओंगे अना भईरो, धर्मसी निम्है मेखकन अरा चजरकन बड़ियर नना गे कोइहे चिहूंक नना। नीम इबड़न ननोर होले, इकला हूँ मल खत्र'ओर।
- 11 अरा नम्है उर्बस अरा नाइस येसु मसीसी मुंजा मलका राजी नू कोइहे परिघ'अना ती कोर'ओर।



12 औंगे इबड़ा कत्था गुट्ठिन सगरो सुरता नन्ताते र'ओन। नीम इबड़न मुन्द तिम अक्कादर, अरा अक्कुन इबड़ा कत्था गुट्ठी नू मानिम नू बन्चका र'अदर। अन्नु हूँ अउरिम सुरता नन्त'आ बेद्ददन।

13-14 नम्है उर्बस येसु मसीस एंगन दहदर नंजका ती ऐन अखदन का एंगा चाँइहेम कुम्बा लेक्खा ई मेदन अम्बना मनो। औंगे एका गूटी ऐन उज्जा लगदन आ गूटी निमन एन्ने सुरता नन्त'ओन। एंगहै अखना नू ईद बेस र'ई।

15 औंगे एंगा खेअना ही खोखा हूँ नीम इबड़ा कत्था गुट्ठिन सुरता नू उइय्या गे ऐन एन्द्रा एन्द्रा नना ओंगदन, अदन अक्कुन ननोन।

16 लूरगर ती कमचका खीरी गुट्ठी नू ऐम मल ऐकरकी, लिकिन आसी महबन एम्है खन्न ती ईरुर रहचका ती दिम, ऐम नम्है उर्बस येसु मसीसी सवंग अरा आसी बरना ही पत नू निमा गे तिकम।

17 “ईद एंगहै चोन्हा खद्दस, ईस ती ऐन खुसमारदन” एन्ने मसीस गे धर्मेसी कोहाँ बिल्चना महबा ती ओन्टा ब'अना मेन्द्रा खने, आस धर्मे बंगस ती मईन अरा महबन खक्खियस।

18 एकाबारी ऐम आसी गने आ नेम्हा परता नू रहचकम खने, मेर्खा ती मेन्द्रका आ ब'अनन ऐम हूँ मेजकम।

19 ई अनुभव ही चड्डे ऐम धर्मेसी कत्था तिंगुर ती तिका कत्था गुट्ठी नू अउर हूँ कोइहे असरा उइय्दम। नीम ईर ही कत्था गुट्ठी नू कोइहे चिहूट नन्ना र'ई। एन्देरगेका आर ही कत्था गुट्ठी, पहपहरना गूटी अरा मसीस बिज-बीनको निम्है जिया नू बिल्चना गूटी ऊखा नू बिल्चना बिल्ली लेक्खा र'ई।

20 उर्मी ती मुन्द नीम इदन अखना र'ई का, नेम्हा पुथी ता धर्मेसी कत्था तिंगुर ती बाचका खोखा मन्ना एकअम कत्था हूँ आर ही तम्है सोच ही कत्था मल्ली।

21 एन्देरगेका धर्मेसी कत्था तिंगुर ती बाचका खोखा मन्ना कत्था इकला हूँ आलर ही मने ती मल्ला मंजका। लिकिन आलर नेम्हा बोलतासी कइहाब'अना ती धर्मेसी कत्थन तिंगियर।

2 पतरस 2

1 इस्राएल आलर ही मझी नू ठकवा धर्मेसी कत्था तिंगुर रहचर। अन्नेम निम्है मझी नू हूँ ठकवा सिखाब'उर चो'ओर। आर नठारनन ओन्द्रना ठकवा सिखाब'अनन नूखुर नूखुर ओन्द्र'ओर। अरा आर तमन मूल्ली चि'अरकी खीन्दका कोइहे सवंगिय उर्बासिन हूँ बलदम ब'ओर। ई लेक्खम आर तमा गे चाँइहेम नठारनन ओन्द्र'ओर।



- 2अरा कोइहे आलर आर ही कोइहे सोतरा उज्जा ओक्कना नू ऐकोर। अरा आर ही चड्डे मानी ही डहरे गे निंदा मनो।
- 3अरा आर तम्है कोइहे चिबाखारना ती ताम कमचका खीरी गुट्ठिन तेंगरकी निम्है गुस्ते फफड़'ओर मोखोर। अरा आर मइय्याँ बरना दंडे पेसका नगदे उल्ला ही मुन्द तिम धर्मस ती सपड़ारकी रई, अदही बरना ही दिरी मलकी, आर ही नठाब'अना चाइहेम अंडसो।
- 4एकाबारी मेर्खा पैकर पाप नंजर खने, धर्मस आरिन हूँ मल अम्बियस, लिकिन नरक नू हेबड़ियस ती खोइखा ऊखा गड़डी नू रायबड़ी उल्ला गे सिकड़ी ती हेंचका उइय्कादस।
- 5अरा धर्मस चिरान ता खेखलन हूँ मल अम्बियस, लिकिन आस धर्मसिन मल इल्च'ऊ आलर ही खेखेल ही मइय्याँ कोहाँ बहड़िन तइय्यस ती आरिन नठाबाचस। अरा धर्मसी उजगो नेंवई ही पत नू मेन्ताचका नूहस अरा आसी एड़पातर सात झनरिन लेका बछाबाचस।
- 6अरा धर्मस सोदोम अरा गोमोरा नगरे गे एन्ने दंडे चिच्चस का अबड़न ओलताचस ती चिन्दी नंजस। धर्मसिन मल इल्चुर गे ईदिम मनो एन्ने ऐद'आ गे आ नगरे गुट्ठी ओन्टा जोक्खा खीरी मना गे एन्ने नंजस।
- 7लिकिन धर्मस उजगो रहचका लोथसिन बछाबाचस। आस गा नेग मलका आलर ही सोतरा उज्जना ओक्कना ती जिया नू दुक्खे मंजस।
- 8आ उजगो आलस लोथस उजगो मलका आलर ही मड़ी नू उज्जा लगियस खने, उर्मी उल्ला आर ही नेग मलका नलख गुट्ठिन ऐरालियस अरा मेनालियस। औंगे आसी जिया ओलालिया।
- 9औंगे उर्बस अखदस का धर्मसिन इल्चू आलारिन आर ही बिदूना ती एकासे बछाब'अना रई, अरा उजगो मलका आलारिन दंडे चि'अनुम चि'अनुम नेंवई उल्ला गे उइय्यना रई।
- 10मुध गा तम्है पाप सुबहा ती बरना मलदौ चिबाखारना अरा सोतरा नलख गुट्ठी ही खोखा खोखा कालरकी धर्मसी अदिया आबोन हींइ'उर मइय्याँ धर्मस एन्नेम बेइहा दिम र'अदस। इबड़ा आलर फुलई मनू अरा हूड र'अनर। ईर मेर्खा ता महबा ही आलो गुट्ठिन हूँ निंदा नना गे मल इल्चनर।
- 11लिकिन ठकवा सिखाब'उर ती कोइहे सवंग अरा पया र'अना मेर्खा पैकर हूँ मेर्खा ता महबा ही आलो गुट्ठी ही बिड़दो नू उर्बासी मुन्दहारे बदी मल ठेकाब'अनर।
- 12लिकिन इबड़ा ठकवा सिखाब'उर गा ताम मल बुझुरका कल्था गुट्ठी नू निंदा नन्नर। ईर आलर ही सुबहा मलका मेक्खो गुट्ठी लेक्खा र'अनर। ईर तम्है सुबहा ही लेक्खा ऐकना उज्जना आलो



गुट्ठी लेक्खा र'अनर। ईर धरतारकी लौर'आ अरा पिटर'आ गेम कुन्द्रका र'अनर। मेक्खो गुट्ठी लेक्खम ईर हूँ नठार'ओर।

13 आर नंजका उजगो मलका नलख गुट्ठी ही ऊजी नू धर्मस आर गे दंडे चि'ओस। आर उल्ला बेड़ा नू हूँ मलदौ मदी गुट्ठी ती रिरयार'आ गे कोइहे बेद्दनर। आर टिकला अरा लज्जे मलका लेक्खा हिकनर का आर निम्है गने मदी गुट्ठी नू ओन्ना उर्मी बेड़ा नू निमन लज्जे मोखत'ओर।

14 आर ताम ईरू उर्मी आलीर गने नन्ना आली गुसन कालू पापन नना बेद्दनर। अरा आर इकला हूँ पाप नना गे मोका बेद्दनन मल अम्बनर। आर ठिमठिमने मल र'ऊ आलारिन तम्है तरा मन्तानर, अरा आर ही जिया मलदौ चिबाखारना नू हेबरा केरा, अरा धर्मस आर गे दंडे चि'ओस।

15 आर उजगो डहरेन अम्बरकी तम्है डहरेन एक्सका चिच्का र'अनर। आर बोसोरसी तंग्दस धर्मसी कत्था तिगू बालामसी डहरे नू ईक्कानर, एकास मलदौ नन्ना ती ढिबा अर्ज'आ बेद्दा लगियस।

16 अन्नू हूँ आस गा ओन्टा गदही ती तंग्है मलदौ नलख ही पत्त नू केबेर मोक्कस। कछनख'आ पोलना आ मेक्खो आलर ही सड़ा ती कछनखका ती आ धर्मसी कत्था तिगुसी लूर मलका नलखन छेकचा।

17 इबड़ा ठकवा सिखाब'उर अम्मु मलका पझरा गुट्ठी अरा घटा ती उढियाचका बदाली गुट्ठी लेक्खा अनभनियाँ हिकनर। ईर गे खोइखा ऊखा नू अड्डा उइरकी र'ई।

18 ईर अनभनियाँ कत्था गुट्ठिन कछनखनर ती तम्है पत्त नू फुलई मन्नर। अरा मलदौ डहरे नू उज्जू आलर ती बछर'आ गे चिहूट ननू पुना पत्त'ऊ आलारिन ईर आल सुबहा ती बरना पेहरन ही सोतरा नलख ही चिबाखारनन चिबाखार'आ गे नन्ना ती आरिन पाप नुम र'आ गे तिहा नन्नर।

19 ईर आर गे ओन्टा छछिन्द उज्जनन गच्छरनर, लिकिन तामिम सोतबोड़'आ उज्जना गे जोंख र'अनर। एन्देरगेका एकास एका मलदौ ती पोलदस चाड़ा, आस अदही जोंख मनदस कादस।

20 ईर नम्है उर्बस अरा नाइस येसु मसीसी पत्त नू अक्खर ती, ई खेखेल ही सोतबोड़'आ नलख गुट्ठी ती बछरना ती हूँ, फेन ईर अबड़ा सोतबोड़'आ नलख गुट्ठी नू बझरका र'अनर। ईर एन्ने बझरका र'अनर होले, ईर ही खोखा ता दसा मुन्द ता दसा ती कोइहे मलदौ मनी क'ई।

21 ईर उजगो उज्जना ही डहरेन अक्का खोखा तमा गे चितारका नेम्हा पेसका गुट्ठी ती पछली किरना ती, ईर इकला हूँ उजगो उज्जना ही डहरेन बल्लुर रहचका होले, आद ईर गे कोइहे बेस रहचा दने।



22ई ब'अना गुट्ठी ईर गे ठौका उक्की का “अल्ला तंगहै पुतुरका तरम पछली किरीं,” अरा “एमताचका किस्सी अउरिम चोतोर नुम लोटोर आ किरीम बई।”

2 पतरस 3

1अना चोन्हा आलारो, ईद ऐन निमा गे लिखना दोसर चिठी हवे। ऐन इबड़ा दुयो चिठिन निम्है सुध सोच गुट्ठिन रिझत अना गे सुरत अना लेक्खम लिखचका र'अदन।

2ऐन बेद्ददन का, नेम्हा धर्मसी कत्था तिगुर ती चिरान नू तिका कत्था गुट्ठिन, अरा निम्है तइरकर ती चितारका नम्है उर्बस अरा नाडुसी पेसका गुट्ठिन निमा सुरता नन्ना र'ई।

3उर्मी ती मुन्द नीम इदन अख'आ गे बेद्ददन का, छेद्द उल्ला गुट्ठी नू निंदा ननरकी अलखू आलर बर'ओर, आर मानी आबोन निंदा ननरकी अलखोर अरा तम्है तम्है मलदौ चिबाखारना नू ऐकोर।

4अरा आर ब'ओर का, “येसुस अउर बर'ओन एन्ने मल गच्छरका र'अदस का? फेन एसन आस र'अस? एन्देरगेका नम्है पूरखर केचका बेड़ा ती अक्कु गूटी खेखेल गढ़ना ही ओरे नू रहचका लेक्खम उर्मी र'ई।”

5आर अखनुम अखनुम मानिमन मोधनर का हूल्लो नू धर्मसी कत्था ती मेर्खा गुट्ठी अरा खेखेल गढ़रा, अरा खेखेल अम्मु ती बहरी बरचा अरा अम्मु ती कम्मरा।

6फेन ई पच्चा खेखेल अम्मु ती कोहाँ बहड़ी ती मुलखिया ती नठारा केरा।

7लिकिन धर्मस अक्कु ता मेर्खा गुट्ठिन अरा खेखेलन नैवई उल्ला गूटी र'आ गे पेसकन चिच्चस। फेन अबड़ा चिच्ची ती बस्सा गे उइरकी र'ई। अरा धर्मसिन मल इल्चुर नठार'ओर।

8लिकिन अना चोन्हा आलारो, ई मानिमन नीम मोधर'आ गे ऐन मल बेद्ददन का, उर्बस गे उन्दुल उल्ला हजार चाँन लेक्खा र'ई, अरा हजार चाँन उन्दुल उल्ला लेक्खा र'ई।

9जोक्क आलर बुझुरना लेक्खा उर्बस तंगहै गच्छरनन नना गे दिरी मल नन्दस। लिकिन आस निम्है नू कयास गने र'अदस। एन्देरगेका आसी मने ईद र'ई का, ओर्त हूँ अम्बोर नठार'आ, लिकिन ओर्मर जियन किर्त'ओर।

10लिकिन उर्बासी बरना उल्ला गा खलबस लेक्खा आचका बर'ओ। अउला मेर्खा गुट्ठी गरजारनुम मेटर'ओ कालो, अरा मेर्खा ता आलो गुट्ठी गौंगौर'ओ ती चोदखो कालो ती नठार'ओ, अरा खेखेल नू आलर नंजका उर्मिन धर्मस नैवई नना गे दहदर नन्त'ओस।



- 11 ई लेखम इबड़ा उर्मिम नठारना र'अना ती, नीम एका लेखा आलर र'अना र'ई? नीम धर्मस गे इल्चका ती नेम्हा उज्जनन उज्जना र'ई।
- 12 धर्मसी बरना उल्ला बर'आ गे रिझ गने पाब ऐरा, अरा ईद चाँइहेम बर'आ गे तिहा नन्त'आ। अउला नू मेर्खा गुट्ठी ओलो ती नठार'ओ क'ओ अरा मेर्खा ता आलो गुट्ठी गौंगौर'ओ ती चोदखो कालो।
- 13 लिकिन नाम गा आसी गच्छरना ही लेखा पुना मेर्खा गुट्ठी गे अरा ओन्टा पुना खेखेल गे पाब ऐरा लगदत, एकइय्या धर्मसी उजगो ओकर'ओ।
- 14 औंगे अना चोन्हा आलारो, नीम इबड़ा कत्था गुट्ठी मन्ना ही पाब ऐरना ही चड्डे, नीम बिगर बदी अरा बिगर दगहा ही उज्जनन उज्जना ती धर्मस गने कोड़े गने र'आ गे उर्मी तिहन नना।
- 15 अरा सुरता नना का, नम्है उर्बासी कयास आलर गे नाइर'आ गे बेइन चि'ई। अन्ने दिम नम्है चोन्हा भई पौलुस हूँ धर्मस तंगा गे चिच्का लूर ती निमा गे लिखचस।
- 16 आस तंगहै उर्मी चिठी नू इबड़ा कत्था गुट्ठी ही पत्त नू तेंगना बारी ई लेखम लिखकादस। आस तिका कत्था गुट्ठी नू जोक्क कत्था गुट्ठी बुझुर'आ गे मसकिल र'ई। बलका आलर अरा तम्है पत्त'अना नू ठिमठिमने मल र'ऊ आलर नेम्हा पुथी ता अउर कत्था गुट्ठिन नन्ना लेखा इबड़ा कत्था गुट्ठी गे बिइदो मने ओथ्रनर ती तमा गे नठारनन ओन्द्रनर।
- 17 औंगे अना चोन्हा आलारो, मुन्द तिम नीम इदन अखना ती, चिहूंक र'आ। एन्ने अम्बो मना का, अबड़ा नेग मलका आलर ही मलदौ नू बझुर'अरकी निम्है ठिमठिमने दसा ती अम्बोर खतर'आ।
- 18 नम्है उर्बस अरा लाइस येसु मसीसी मया नू अरा आसिन अखना ही लूर नू पर्दनुम कला। आस गेम अक्कुन हूँ अरा हुल्लो गूटी हूँ महबा मनन नेकअन। आमेन।



1 योहन

1 योहन 1

1 उज्जना चिऊ कत्था र'अदस, आसी पत्त नू ऐम निमा गे मेन्त'अदम। आस ओर तिम रहचस। आसिन दिम ऐम मेंजकादम, अरा एम्है खन्न ती ईरकादम, अरा आसिन ऐम मानिम नू ईरकादम, अरा आसिन एम्है खेक्खा गुट्ठी ती एंवसइकम।

2 एकास आ मानिम उज्जना र'अदस, आसिन धर्मस एमा गे दहदर नंजस। अरा ऐम आसिन ईरकादम ती आसी पत्त नू गोवाह चि'अदम। धर्म बंगस गने रहचका आ जनमजुग उज्जना ही पत्त दिम ऐम निमा गे मेन्त'अदम। अक्कु आस एमा गे दहदर मंजका र'अदस।

3 नीम हूँ एम्है गने मेस्र'आ गे, एन्द्रन ऐम ईरकादम अरा मेंजकादम अदही पत्त नू ऐम निमा मेन्त'अदम। एमा ई मेस्रना गा धर्म बंगस गने अरा आसी खद्दस येसु मसीस गने रई।

4 ऐम इबड़ा कत्थन इदगे लिखदम का एम्है रिझ पुरा मनन कालन नेकअन।

5 ई कत्थन ऐम आस ती मेंजकम ती निमा गे मेन्त'अदम। धर्मस बिल्ली हिकदस, अरा आस नू कटीसकेम हूँ ऊखा मलकी।

6 औंगे नाम धर्मस गने मेस्रकत ती उज्जदत ब'अदत ती ऊखा नू उज्जा लगदत होले, नाम ठकदत अरा मानी लगे उज्जुर मल र'अदत।

7 लिकिन धर्मस बिल्ली नू र'अना लेक्खा नाम हूँ बिल्ली नू उज्जोत होले, मेस्रना नाम ओर्त ओर्त गने र'ओ, अरा आसी खद्दस येसुसी खेंस नमन नम्है उर्मी पाप ती नोड़ो।


8 नम्है नू पाप मलकी ब'अदत होले, नाम नमानिम ठकदत, अरा नाम मानी लगे मल उज्जालदत।

9 लिकिन नाम नम्है पाप गुट्ठिन आसिन तेंग्र'ओत होले, आस नम्है पाप गुट्ठिन छमा नना गे, अरा नमन नम्है उर्मी मलदौ ती निमन नन्ना गे पत्त'अना जोगे अरा पूरेम दौले र'अस।

10 नाम पाप मल्ला नंजका ब'अदत होले, नाम धर्मसिन ठकवा ब'अदत, अरा एन्ने ऐद्ददम का आसी कत्था गे नम्है जिया नू अइडा मलकी।

1 योहन 2

1 अना एंगहै खद्दारो, ऐन इदगे इदन निमा गे लिखदन का नीम पाप अम्बोर नना। लिकिन नेकईम पाप नन्दस होले, धर्मस बबस गुसन नमा गे गोहरार'ऊ ओन्टा सहाड़ा ननू र'अस। आसिम येसु मसीस, अरा आस उजगो दिम र'अस।



- 2अरा आसिम नम्है पाप गुट्ठिन ओथ्रना ही दाँड़े हिकदस, नम्है पाप गुट्ठिन लेका मला सौंसे खेखेल ता आलर ही पाप गुट्ठिन ओथ्रना दाँड़े हिकदस।
- 3नाम धर्मसी पेसका गुट्ठिन पेसओत होले, अत्रु नाम अक्ख खच्चोत का नाम आसिन अक्ख खच्चिका र'अदत।
- 4एकअम ओर्तस ब'अदस का, “धर्मसिन ऐन अखदन,” लिकिन आस धर्मसी पेसका गुट्ठिन मल पेसदस होले, आस ठक'उस र'अदस, अरा आस मानी लगे मल उज्जदस।
- 5लिकिन एकास धर्मसी कत्थन पेसदस ती उज्जदस, आस ऐददस का धर्मस आसिन मानिम अरा बड़ियर लगे चोन्हा नन्दस। नाम धर्मस नू र'अदत एन्ने ईद ती अखदत।
- 6औंगे एकास तान धर्मस नू बन्चका र'अदन ब'अदस, आस येसुस एकासे नना लगियस अन्नेम तान हूँ उज्जना र'ई।
- 7अना दुलारो, ऐन निमन पुना पेसकन मल लिखदन, लिकिन ओड़ तिम निमा खक्खका पच्चा पेसकन दिम लिखदन। आ पच्चा पेसका गा नीम मुन्द मँजका कत्था दिम हवे।
- 8अन्नु हूँ एका पेसकन ऐन अक्कुन लिखदन, आद पुना हवे। ई पेसका ही मानिम मसीस नू अरा निम्है नू हूँ ईथ्र'ई, एन्देरगेका ऊखा तरकूटी मनाली अरा मानी बिल्ली अक्कु बिल्याली।
- 9एका ओर्तस तान बिल्ली नू र'अदन ब'अदस, लिकिन तंगहै संगे मसी भईसिन हींइदस, आस अक्कु गूटी ऊखा नू र'अस।
- 10एका ओर्तस तंगहै संगे मसी भईसिन चोन्हा नन्दस, आसिम बिल्ली नू र'अदस, अरा नन्नारिन मूइत'अना एन्देर कत्था हूँ आस नू मलकी।
- 11लिकिन एका ओर्तस तंगहै संगे मसी भईसिन हींइदस, आस ऊखा नू र'अदस अरा ऊखा नू ऐकदस, अरा आस एसन कालदस अदिन बलदस, एन्देरगेका ऊखा आसिन अन्धहा नंजकी चिक्की र'ई।
- 12अना चोन्हा खद्दारो, येसुसी नामे ती निम्है पाप गुट्ठी छमा मन्तारका ती ऐन निमा लिखदन।
- 13अना बंगारो! एकास ओड़ तिम र'अस, आसिन नीम अक्का र'अना ती ऐन निमा लिखदन। अना जौखारो, मलदौ आबोन नन्त'उस सैतान मइर्याँ नीम जीत खक्खका र'अना ती ऐन निमा लिखदन।



- 14अना चोन्हा खद्दारो, नीम धर्म बंगासिन अक्का र'अना ती ऐन निमा लिखदन। अना बंगारो, एकास ओड़ तिम र'अस, आसिन नीम अक्का र'अना ती ऐन निमा लिखदन। अना जोंखारो, नीम पत'अना नू बड़ियर र'अना ती, अरा धर्मसी कत्था निम्है जिया नू मड़चकी र'अना ती, अरा मलदौ आबोन नन्त'उस सैतान मड़य्याँ नीम जीत खक्खका र'अना ती ऐन निमा लिखदन।
- 15नीम ई खेखेल ती मलता ई खेखेल ता आलो गुट्ठी ती चोन्हा अमके नना। एकास खेखेल ती चोन्हा नन्दस आस नू धर्म बंगासी चोन्हा मलकी।
- 16एन्देरगेका ई खेखेल नू र'अना कया ही चिबाखारना अरा खन्न ही चिबाखारना अरा उज्जना ही खुर्जी गुट्ठी ही फुलई मन्ना इबड़ा उर्मी धर्म बंगस ती मला, लिकिन खेखेल ती बरई।
- 17खेखेल अरा अदही चिबाखारना आबो मुंजुर'ओ क'ओ। लिकिन धर्मसी मनेन ननुस गा जनमजुग गे बन्चका र'ओस।
- 18अना खद्दारो, ईद छेद्द उल्ला हवे। नीम मेंजकादर का ठकवा मसीस बर'आ लगदस। अक्कु गूटी कैनो ठकवा मसीर चौचकानर। इत्रु ती नाम अखदत का छेद्दे बेड़ा अंइसा खच्चकी र'ई।
- 19आर नम्है कलीसिया गुट्ठी तिम उरखर, लिकिन मानी नू आर नम्है खोंइहा ता मल रहचर। आर नम्है मधे ता आलर होले, नम्है गने बन्चका र'ओर दनेस। लिकिन आर नम्है ती उरखर केरर, इत्रु ती ईद फरी ईथर'ई का अबड़ा ओर्मर ती ने हूँ नम्है मधे ता मलनर।
- 20लिकिन नीम गा मसीस तरती नेम्हा बोलतासी पूरकसन खक्खादर, अरा नीम ओर्मर मानी आबोन अखदर।
- 21नीम मानी आबोन बलना ती मला, नीम मानी आबोन अखना ती, अरा एकअम ठकना मानी तरती मल बर'ई इदन नीम अखना ती दिम ऐन इदन निमा गे लिखदन।
- 22ठकवा ने तंगहै? एकास येसुसिन मसी मलदस ब'अदस आसिम ठकवा हिकदस। अरा आसिम ठकवा मसी हिकदस। अरा आसिम धर्म बंगासिन अरा खद्दासिन खाँइदस।
- 23ने खद्दासिन मल ह्कमारदस आस गुसन बंगस हूँ मल र'अदस, अरा ने खद्दासिन मनदस आसी गुसन बंगस हूँ र'अदस।
- 24ओड़ नू नीम एन्देर कत्था मेंजकर, आद निम्है नू बन्चकी र'अना र'ई। अरा एका कत्थन नीम ओड़ नू मेंजकादर आद निम्है नू बन्चकी र'ई होले, नीम हूँ खद्दस अरा बंगस नू बन्चका र'ओर।
- 25जनमजुग उज्जनन चि'ओन एन्ने आस नम्है गने गच्छरस, ईदिम आसी गच्छरना हवे।
- 26ने निमन बेड़ाब'आ बेद्दनर, आर ही पत नू ऐन निमन इबड़ा कत्थन लिखचकादन।



27 लिकिन निमा गे नेम्हा बोलतस खक्खका र'अदस, आस निम्है नू र'अदस। आँगो एकअम आलर ही सिखाब'अना निमा गे चाड़ मलकी। निमा एन्द्रन अख'आ गे चाड़ र'ई अबड़ा उर्मिन नेम्हा बोलतस निमा गे सिखाब'अदस। आसी सिखाब'अना मानिम र'ई, ठकवा मल्ली। आँगो आसी सिखाब'अना लेक्खा नीम मसीस नू बन्चका र'आ।

28 अक्कु अना चोन्हा खद्दारो, आस दहदर मन्ना बारी आसी किरना नू नाम आसी मुन्दहारे बिगर लज्जे मोखरकी डिठ गने र'आ गे आस नू बन्चका र'आ।

29 धर्मस उजगो र'अस एन्ने नीम अक्का र'अदर होले, एन्द्रा उजगो र'ई अदन ननू ओर्मर धर्मसी खद्दर र'अनर एन्ने हूँ अक्का र'अदर।

1 योहन 3

1 ऐरा, नाम धर्मसी खद्दर एन्ने बारना ती, धर्म बंगस नम्है मइय्याँ नंजका चोन्हा एका कोहाँ र'ई एन्ने सोच'आ। मानिम नू नाम आसी खद्दत हिकदत। सौंसार धर्मसिन बलना ती नमन हूँ धर्मसी खद्दर एन्ने आद बल्ली।

2 अना दुलारो, अक्कु नाम धर्मसी खद्दत र'अदत। लिकिन अक्कु गूटी दहदर मल्ला मंजका का बरना बेड़ा नू नाम एका लेक्खा र'ओत। इवंदम अखदम का इकला मसीस किर'ओस नाम हूँ आसी लेक्खा र'ओत, एन्देरगेका आस एकासे र'अस अन्नेम नाम आसिन ऐरोत।

3 एका ओर्तस आस मइय्याँ एन्ने लेक्खा असरा उइय्दस, आस मसीस नेम्हा र'अना लेक्खा तंगन नेम्हा उइय्दस।

4 एका आलस पाप नन्दस, आस धर्मसी पेसकन चाड़दस। धर्मसी पेसकन चाड़ना दिम पाप हवे।

5 नीम अखदर का मसीस नम्है पाप गुट्ठिन हो'आ गे दहदर मंजस, अरा आस नू पाप मलकी।

6 एका ओर्तस मसीस नू बन्चका र'अदस, आस पाप नन्नुम मल र'अदस। लिकिन एका ओर्तस पाप नन्नुम र'अदस, आस आसिन मल्ला हूँ ईरका, अरा आस आसिन बलदस हूँ।

7 अना दुलार खद्दारो, नेख'आ ती हूँ अमके बेहड़र'आ। एकास उजगो नलख गुट्ठिन नन्दस, आस मसीस उजगो र'अना लेक्खा तान हूँ उजगो र'अस।

8 एका ओर्तस पाप नन्तेम र'अदस, आस नाद ही आलस र'अदस, एन्देरगेका नाद गा ओड़ तिम पाप नन्तेम र'ई। लिकिन धर्मसी खद्दस नाद ही नलख गुट्ठिन नठाब'आ गेम दहदर मंजस।

9 एका ओर्तस धर्मसी खद्द मंजका र'अदस, आस पाप नन्तेम मल र'अदस, एन्देरगेका धर्मसी सुबहा आसी नू र'ई। आस धर्मसी खद्द मंजका ती आस पाप नन्नुम र'आ पोलदस।



- 10 इत्रु ती नाम ब'आ ओंगदत का ने धर्मसी खद्दर अरा ने नाद ही खद्दर। एका ओर्तस उजगो नलख गुट्ठिन मल नन्दस, अरा तंगहै संगे मसी भईस गने चोन्हा मल नन्दस, आस धर्मसी खद्द मलदस।
- 11 नाम ओर्त ओर्त गने चोन्हा नन्ना रई, ईदिम नीम ओड़ तिम मेंजका रहचका कत्था हवे।
- 12 कैनस लेक्खा नाम अम्बोत मना। आस मलदौ आबोन नन्त'उस सैतान ही रहचस, अरा तंगिइस हाबेलसिन पिटियस। अरा आस आसिन एन्देर चड्डे पिटियस? एन्देरगेका आसी नलख गुट्ठी मलदौ रहचा अरा तंगिइसी नलख गुट्ठी गा धर्मसी ऐरना नू उजगो रहचा।
- 13 अना भईरो, सौंसार ता आलर निमन खाँड़नर होले, अमा अकबकरा।
- 14 नाम अखदत का नाम नम्है संगे मसी भईर गने चोन्हा नन्ना ही चड्डे खे'अना ती उरखकत ती उज्जना नू कोरचकत। लिकिन एका ओर्तस तंगहै संगे मसी भईर गने चोन्हा मल नन्दस, आस अक्कु गूटी खे'अना ही तबे नूर'अदस।
- 15 एका ओर्तस तंगहै संगे मसी भईसिन खाँड़दस, आस आल पिटुस हिकदस। अरा नीम अखदर का आल पिटुर नू जनमजुग उज्जना मल रई।
- 16 मसीस तंगहै जियन नमा गे चिच्का ती नाम इदन अखदत का चोन्हा एन्द्रा रई। ओंगे नाम हूँ नम्है संगे मसी भईर गे नम्है जियन चि'अना रई।
- 17 एकअम आलस ई खेखेल ता धन खुर्जी र'ऊ र'अना ती तंगहै संगे मसी भईस चाड़ नूर'अनन ईरका ती हूँ, आस असी मइय्याँ सोग्गे मल ऐरदस होले, ईद इदन सेब्बा ईदई का आस नू धर्मसी चोन्हा मलकी।
- 18 अना खद्दारो, नाम चोन्हा आबोन कत्था ती महले कछनखना ती ईद'ऊ मला, लिकिन नलख ती अरा मानी जिया ती चोन्हा आबोन ईद'ऊ र'अना रई।
- 19 इत्रुम नाम अखओत का नाम नम्है उज्जनन मानिम कत्था ही लेक्खा उज्जदत। होले धर्मसी मुन्दहारे नाम डिढ गने इज'आ ओंगोत।
- 20 नम्है जिया दिम नमन बदी नन्त'ई होले, धर्मस नम्है जिया ती कोहँस र'अदस, अरा आस उर्मिन अखदस।
- 21 अना दुलारो, नम्है जिया नमन बदी मल नन्त'ई होले, नाम धर्मस गुसन डिढ गने बर'आ ओंगदत।



22 नाम आसी पेसका गुट्ठिन पेसना ती, अरा आसिन एन्देर खुसमारती अदिन नन्ना ती, नाम एन्देर एन्देर आसिन ने'अदत अदिन नाम आस ती खखदत।

23 अरा नाम आसी खद्दस येसु मसीसी नामे नू पत्त'अना र'ई, अरा आस नमन पेसका रहचका लेक्खा ओर्त ओर्त गने चोन्हा नन्ना र'ई। ईदिम आसी पेसका हवे।

24 एकास धर्मेसी पेसका गुट्ठिन पेसदस, आस धर्मेस गने मेसना नू बन्चकादस, अरा धर्मेस हूँ आस गने मेसना नू बन्चकादस। धर्मेस नमा गे चिक्का नेम्हा बोलतस ती नाम इदन अखदत का धर्मेस नम्है गने मेसना नू बन्चकादस।

1 योहन 4

1 अना दुलारो, ई सौंसार नू नगदे बग्गे ठकवा धर्मेसी कत्था तिगुर चोचका र'अनर। औंगे नेम्हा बोलतस ती ब'अदन ब'ऊ उर्मी आलारिन अमा पत्त'आ। लिकिन बिद्'आ ती ऐरा का अबड़ा बोलता गुट्ठी धर्मेस ती बरचका का मल्ली।

2 धर्मेसी बोलतन खखका धर्मेसी कत्था तिगुरिन नीम एकासे अख'आ औंगनर का: ओर्त धर्मेसी कत्था तिगुस येसु मसीस मानिम आल मंजस ती बरचस एन्ने तेंग्रदस होले, आस नू धर्मेसी बोलतस र'अदस।

3 लिकिन ओर्तस तंगन धर्मेसी कत्था तिगुस ब'अदस ती येसु मसीसी पत्त ता मानिमन मल तेंग्रदस होले, आस धर्मेस तरती मल र'अदस। बर'ओ एन्ने नीम मंजका रहचका ठकवा मसीसी बोलता ईदिम हिके। अक्कु आद खेखेल नू बरच खच्चकी र'ई।

4 अना खद्दारो, नीम धर्मेसी हिकदर, नीम अबड़ा ठकवा धर्मेसी कत्था तिगुर ती जीत खखकादर। एन्देरगेका ई सौंसार नू र'ऊ बोलता गुट्ठी ती निम्है नू र'ऊ नेम्हा बोलतस कोहँस र'अदस।

5 आर सौंसार ता हिकनर, औंगे आर सौंसार ही पत्त ता कत्था गुट्ठिन कछनखनर, अरा सौंसार ता आलर आर ही कत्थन मेन्नर।

6 ऐम धर्मेसी हिकदम, अरा ने धर्मेसिन अखदस आस एम्है कत्थन मेन्दस। अरा ने धर्मेसी मलदस आस एम्है कत्थन मेना मल बेद्दस। नाम इत्रु तिम ने मानी ही बोलतन खखकादर अरा ने बेहड़'अना ही बोलतन खखकानर एन्ने लखदत हो'अदत।

7 अना दुलारो, नाम ओर्त ओर्त गने चोन्हा नन्दत नेकअन। एन्देरगेका चोन्हा धर्मेस ती बर'ई। अरा एकास चोन्हा नन्दस आस धर्मेसी खद्द र'अदस, अरा धर्मेसिन अखदस।



- 8 लिकिन एकास चोन्हा मल नन्दस, आस धर्मसिन बलदस, एन्देरगेका धर्मस चोन्हा हिकदस।
- 9 धर्मस तंगहै ओन्टे लेका खद्दासिन खेखेल नू इदगे तइय्यस का नाम आसी ती जमनजुग उज्जनन खक्खा ओंगदत। इत्रु धर्मस नम्है मइय्याँ मंजका चोन्हन दहदर नंजस।
- 10 नाम धर्मस मइय्याँ चोन्हा नंजका ती मला, आस नम्है मइय्याँ चोन्हा नंजका ती नम्है पाप गुट्ठिन ओथ्रना ही दाँडे बेसे तंगहै खद्दासिन तइय्यस। ईदिम चोन्हा हवे।
- 11 अना दुलारो, धर्मस ई लेक्खम नम्है मइय्याँ एन्ने कोइहे चोन्हा नंजस होले, नाम हूँ ओर्त ओर्त गने चोन्हा नन्ना रई।
- 12 धर्मसिन ने हूँ इकला हूँ मल्ला ईरका। लिकिन नाम ओर्त ओर्त गने चोन्हा नन्दत होले, धर्मस नम्है नू बन्चकादस, अरा आसी चोन्हा नम्है नू बडियर मनई।
- 13 धर्मस तंगहै बोलतासिन नमा गे चिच्कादस। इत्रुम नाम अखदत का नाम आस नू बन्चकादत, अरा आस नम्है नू बन्चकादस।
- 14 अरा ऐम इदन ईरका रहचकम अरा इदही पत्त नू गोवाह चि'अदम का धर्म बंगस तंगदासिन खेखेल ही नाडुस बेसे तइय्यकादस।
- 15 एका ओर्तस येसुस धर्मसी खद्दस एन्ने तेंग्रदस, आस नू धर्मस बन्चकादस, अरा आस हूँ धर्मस नू बन्चकादस।
- 16 अरा धर्मस नम्है मइय्याँ नंजका चोन्हन नाम अक्कादत अरा पत्ताचकादत। धर्मस चोन्हा हिकदस। एकास चोन्हा नू बन्चकादस आस धर्मस नू बन्चकादस, अरा धर्मस हूँ आस नू बन्चकादस।
- 17 एन्ने नाम धर्मस नू बन्चका र'अना अरा धर्मस नम्है नू बन्चका र'अना ती नम्है चोन्हा बडियर मन'ओ क'ओ। ओंगे नमा नैवई उल्ला गे एल्चना मल मनो। एन्देरगेका ई खेखेल नू नम्है उज्जना मसीसी उज्जना लेक्खा रई।
- 18 चोन्हा नू एल्चना मल मनी, एन्देरगेका मानिम चोन्हा इल्चनन तरकूटी ननी चिई। दंडे गा ओर्तोसिन इल्चतई चिई। अरा ने तंगहै एल्चनर आर चोन्हा नू बडियर मल्ला मंजका।
- 19 नाम चोन्हा नन्दत एन्देरगेका मुन्द धर्मस नमन चोन्हा नंजस।
- 20 एकअम ओर्तस “ऐन धर्मसिन चोन्हा नन्दन” ब'अदस, लिकिन तंगहै संगे मसी भईसिन खाँइदस होले, आस ठक'उस र'अदस। एन्देरगेका तान ईरका तंगहै संगे मसी भईसिन चोन्हा मल ननुस, तान मल ईरका धर्मसिन चोन्हा नना पोलदस।



21 एका ओर्तस धर्मेस गने चोन्हा नन्दस, आस गे तंग्हे संगे मसी भईस गने हूँ चोन्हा नन्ना रई। ई पेसकन दिम नाम धर्मेस ती खक्खकादत।

1 योहन 5

1 एका ओर्तस येसुस दिम मसीस एन्ने पत्त'अदस, आस धर्मेसी खद्द मंजकादस। अरा एका ओर्तस धर्मे बंगासिन चोन्हा नन्दस, आस बंगासी आ खद्द गने हूँ चोन्हा नन्दस।

2 इत्रु नाम अखदत का, नाम धर्मेसिन चोन्हा नन्दत ती आसी पेसका गुट्ठिन पेसदत खने, नाम धर्मेसी खद्दारिन चोन्हा नन्दत।

3 धर्मेसी पेसका गुट्ठिन पेसना दिम धर्मेसिन चोन्हा नन्ना हवे। अरा आसी पेसका गुट्ठी ओत्था मलकी।

4 एकास धर्मेसी खद्द र'अदस, आस सौंसार ही मलदौ गुट्ठी ही मइय्याँ जीत खक्खा ओंगदस। मसीस मइय्याँ ता नम्हे पत्त'अना ती दिम नाम सौंसार ही मलदौ गुट्ठी ही मइय्याँ जीत खक्खदत।

5 सौंसार ही मलदौ गुट्ठी ही मइय्याँ जीत खक्ख'ऊ ने तंग्हे? ने येसुसिन धर्मेसी खद्दस एन्ने पत्त'अदस, आसिम लेका सौंसार ही मलदौ गुट्ठी ही मइय्याँ जीत खक्खदस।

6 येसु मसीस अम्मु नू नोडरस ती अरा क्रुस नू तंग्हे खेंसन बहाबाचका ती धर्मेसी खद्दस एन्ने दहदर मन्तारस। अम्मु ती लेका मला लिकिन अम्मु अरा खेंस ती आस दहदर मन्तारस। ईद मानिम एन्ने नेम्हा बोलतस हूँ गोवाह चि'अदस, एन्देरगेका बोलतस सगरो मानिमन ब'अदस।

7 ओंगे नमा गे इबड़ा तिनियो गोवाह चि'ई।

8 नेम्हा बोलतस, अरा अम्मु, अरा खेंस इबड़ा तिनियो ओन्टेम गोवाहन चि'ई।

9 नाम आलर ही गोवाहन पत्त'अदत। अन्ने होले धर्मेसी गोवाह गा अत्रु ती कोहाँ रई। एन्देरगेका धर्मेस तंग्हे खद्दासी पत्त नू चिच्का गोवाह ईदिम हवे।

10 एकास धर्मेसी खद्दस मइय्याँ पत्त'अदस, आस तंग्हे जिया नू अखदस का धर्मेसी ई गोवाह मानिम रई। अरा एकास धर्मेसिन मल पत्त'अदस, आस धर्मेसिन ठकवा कमदस, एन्देरगेका धर्मेस तंग्हे खद्दासी पत्त नू तिका गोवाहन आस मल पत्ताचस।

11 अरा आ गोवाह ईद रई का, धर्मेस नमा गे जनमजुग उज्जनन चिच्कादस, अरा ई उज्जनन नाम आसी खद्दस तरती खक्खदत।



- 12 एकास धर्मेसी खद्दासिन इंझदस ती आस नू उज्जदस, आस गे ई जनमजुग उज्जना रई। अरा एकास धर्मेसी खद्दासिन मल इंझदस ती आस नू मल उज्जदस, आस गे ई जनमजुग उज्जना हूँ मलकी।
- 13 धर्मेसी खद्दासी नामे नू पत'ऊ निमा गे ऐन इबड़ा कत्थन लिखचकादन। होले नीम अख'आ ओंग्दर का निमा गे जनमजुग ही उज्जना रई।
- 14 अरा धर्मेसी मुन्दहारे बर'आ गे नमा गे र'अना डिठ ईदिम रई का, नाम आसी मने लेक्खा इन्द्रिइम ने'अदत खने, आस नम्है गोहरारनन मेन्दस।
- 15 अरा नाम इन्द्रिइम ने'अदत अदिन आस मेन्दस एन्ने नाम अखदत होले, नाम इदन हूँ अखदत का नाम एन्द्रा ने'अदत आद खक्खकी रई।
- 16 एकअम ओर्तस तंगहै संगे मसी भईस खे'अना नू मल कइहाब'अना ओन्टा पापन नन्नन ऐरदस होले, आस धर्मेस गुसन आस गे गोहरारना रई। होले एकास खे'अना नू मल कइहाब'अना पापन नन्दस आस गे धर्मेस उज्जनन चि'ओस। लिकिन खे'अना नू कइहाब'अना पाप हूँ रई। ऐन मल ब'अदन का ई लेक्खा पापन ननुर गे नीम गोहरारना रई।
- 17 उर्मी मलदौ नलख पाप दिम हवे, लिकिन जनमजुग खे'अना नू मल कइहाब'अना पाप हूँ रई।
- 18 नाम अखदत का एका ओर्तस धर्मेसी खद्द मंजकादस, आस पाप नन्नुम मल र'अदस। एन्देरगेका धर्मेसी खद्दस आसिन खापदस, अरा मलदौ आबोन नन्त'उस सैतान आसिन एंसड़'आ पुल्ली।
- 19 नाम अखदत का, नाम धर्मेसी हिकदत, अरा सौंसार ता उर्मी मलदौ आलर मलदौ आबोन नन्त'ऊ सैतान ही तबे नू र'अनर।
- 20 अरा नाम अखदत का धर्मेसी खद्दस बरचकादस अरा आस नमा मानिम धर्मेसिन अखना ही लूरन चिच्का र'अदस। अरा अक्कुन नाम आ मानिम धर्मेस गने मेस्रना नू र'अदत, एन्देरगेका नाम आसी खद्दस येसु मसीस गने मेस्रना नू उज्जदत। ईस दिम मानिम धर्मेस अरा जनमजुग उज्जनन चि'उस र'अदस।
- 21 अना खद्दारो, नीम निमन मूर्ती गुट्ठी ती तरकूटी ननके। आमेन।



2 योहन

2 योहन 1

- 1 ई चिठी ऐन योहन सेयान आलन तरती र'ई। ऐन इदन धर्मस ती चज्जका मुध आली अरा अदही खद्दर गे लिखदन। मानिम नू ऐन निमन चोन्हा नन्दन। ऐन लेका मला, एकार धर्मसी मानिमन अखनर, अबड़ा ओर्मर निमन चोन्हा नन्नर।
- 2 नम्है नू र'अना आ मानी ही चड्डेम ऐम ई लेक्खम चोन्हा नन्दम। ई मानी नम्है गने हूल्लो गूटी बन्चका र'ओ।
- 3 मानी अरा चोन्हा नू ईकू नमा गे धर्म बंगस अरा बंगासी खद्दस येसु मसीस तरती मया, अरा सोग्गे, अरा कोडे मनन नेकअन।
- 4 धर्म बंगस ती खक्खका पेसका ही लेक्खा निंगहै खद्दर ती जोक्कोर मानी नू ऐकनन ईरकन ती ऐन कोइहे रिझ मंजकन।
- 5 अनय आली, ऐन अक्कु निंगा गे पुना पेसकन मल लिखदन। नाम ओइ तिम खक्खका पेसकन दिम लिखदन ती निंगन गोहरारदन का नाम ओर्त ओर्त गने चोन्हा नन्ना र'ई।
- 6 नाम धर्मसी पेसका गुट्ठिन पेसना ती उज्जना र'ई, ईदिम चोन्हा हवे। अरा नीम ओइ तिम मंजका लेक्खा नीम चोन्हा नन्ना ही उज्जनन उज्जना र'ई, ईदिम आसी पेसका हवे।
- 7 ई खेखेल नू बग्गे भुरइऊ आलर चोचका र'अनर, आर मल पत'अनर का येसु मसीस आल कया नू मंजस ती खेखेल नू बरचस। ईरिम भुरइऊ अरा ठकवा मसी हिकनर।
- 8 नीम चिहूंक र'आ, होले नीम एन्देरगे कोइहे नलख नंजकादर अदही खंजपन मल एब्स'ओर, अरा निम्है सुसर गे धर्मस ती गोट्टा खंजपन खक्खा ओंगदर।
- 9 एकास मसीसी सिखाब'अना नू बन्चका मल रहचका ती अइय्या ती चाइदस, आस गे धर्मस गने नता मल र'ई। लिकिन एकास मसीसी सिखाब'अना नू बन्चका र'अस, आस गे धर्म बंगस अरा खद्दस इरबर ही गने नता र'ई।
- 10 एकअम ओर्तस निम्है गुसन बर'ओस ती मसीसी ई सिखाब'अना ती नन्ना कत्थन सिखाब'अदस होले, आसिन निम्है एइपा नू अमा परघ'आ अरा आसिन मोंजरा हूँ अमा नना।
- 11 एन्देरगेका एका ओर्तस एन्ने आलासिन मोंजरा नन्दस, आस आसी मलदौ नलख गुट्ठी नू मेसदस।



12निमा गे लिख'आ गे नगदे कत्था रई, लिकिन ऐन कागज अरा सियाही ती लिख'आ मल बेद्ददन। ऐन निम्है गने भेंटार'ओन ती छम्हा छम्हें कछनरप्र'ओन। एकत्रु नम्है रिङ्गना अउर कोइहे मनो क'ओ।

13निंगहै बहिन एकाद धर्मस ती चज्जकी रई, अदही खद्द-खरर निंगन मौंजरा नन्नर। आमेन।



3 योहन

3 योहन 1

- 1 ई चिठी ऐन योहन सेयान आलन तरती रई। ऐन इदन एंगहै दुलारो भईस गायोस गे लिखदन, नेकन ऐन मानिम नू चोन्हा नन्दन।
- 2 अना दुलारो, ऐन निंगा गे गोहरारदन का नीन उर्मी नू बने गने र'अन नेकअन। एकासे नीन बोलता नू परदा लगदय, अन्नेम नीन कया नू परदा।
- 3 जोक्क मसी भईर बरचर ती नीन मानी आबोन पत'अना ती उज्जदय एन्ने निंगहै पत'अना जोगे उज्जना ही पत नू गोवाह चिच्चर खने, ऐन नगदे खुसमारकन।
- 4 एंगहै खद्द-खरर मानी नू उज्जा लगनर एन्ने मेन्ना ती नन्ना कोइहे रिङ्गना एंगा मलकी।
- 5 अना दुलारो, नीन निंगहै गुसन बरना मसी भईर गे नीन बलना आलर रहचका ती हूँ आर गे नीन नन्ना उर्मी नू पत'अना जोगे र'अदय।
- 6 आर निंगहै चोन्हा ही पत नू इय्या ता कलीसिया ही मुन्दहारे गोवाह चिच्चर। धर्मसिन खुसमारत'अना ही लेक्खा नीन अउरिम एन्ने आलर गे आर ही इहरे ऐकना नू संगरा नन्नुम र'अना रई।
- 7 एन्देरगेका आर मल पत'ऊ आलर ती इन्द्रिम संगरा मल होअनर ती उर्बासी चड्डे उरखका र'अनर।
- 8 औंगे नाम एन्ने आलर गे संगरा नन्ना ही चाइ रई। एकत्रु नाम मानिमन तैगा कुद्दना नू आर ही गने संगे नलख ननू मना औंगदत।
- 9 ऐन कलीसिया गे इदही पत नू ओन्टा चिठी लिखचकन। लिकिन दियोत्रेफेस आर ही मझी नू मुद्ध मना बिददियस ती एमन मल इङ्गस।
- 10 औंगे ऐन असन बर'ओन होले, आस एन्देर नंजस अदही पत नू ऐन ओर्मर गे तैगोन। आस मलदौ सोच ती एम्है पत नू मलदौ ब'अदस। इत्रु हूँ आसी जिया मल बोधरई। अइय्या बरना भईरिन हूँ मल परघ'अदस, अरा आरिन परघ'आ बेददुरिन हूँ छैकदस, अरा एन्ने ननुरिन कलीसिया ती हूँ हिगइ'अदस।
- 11 अना दुलारो, नीन मलदौ आबोन मला दौ आबोन धर'आ। सुरता नना का, एका ओर्तस दौ नन्दस, आस तंगहै दौ नलख इदन ऐद्ददस का आस धर्मसी खद्द र'अदस। अरा एका ओर्तस मलदौ नन्दस, आस तंगहै मलदौ नलख इदन ऐद्ददस का आस धर्मसिन बलदस।



- 12 देमेत्रियोसी पत्त नू ओर्मर बेस गोवाह तेंगनर, अरा मानी हूँ आसी पत्त नू बेस गोवाह चि'ई। अरा ऐम हूँ आसी पत्त नू बेस गोवाह चि'अदम। अरा नीन अखदय का एम्है गोवाह मानिम र'ई।
- 13 एंगा निमा लिख'आ गे नगदे कत्था र'ई। लिकिन ऐन सियाही अरा फोलटेन ती निमा गे लिख'आ मल बेद्ददन।
- 14 एंगा असरा र'ई का, ऐन लेम निंगहै गुसन बर'ओन ती ऐरोन। अरा नाम छम्हा छम्हें कछनख'आ ओंगोत।
- 15 निंगा गे कोडे मनन नेकअन। इय्या ता निंगहै संगेर निंगन मौजरा नन्नर। अरा अइय्या ता नम्है संगेर ओर्मर गे एंगहै मौजरन नामे नामे ती तेंके। आमेन।



यहूदा

यहूदा 1

- 1 येसु मसीसी जोंख अरा याकोबसी भईस ऐन यहूदा, धर्म बंगासी दुलार अरा येसु मसीसी खापना नू र'ऊ धर्मस ती मेस्रका आलर गे ई चिठिन लिखदन।
- 2 धर्मस निमा गे सोग्गे अरा सान्ति अरा चोन्हा कोइहे ती कोइहे चि'अदस नेकअन।
- 3 अना एंगहै दुलारो, एका नाइरना नू नाम मेस्रकत, ऐन अदही पत नू कोइहे रिझ गने निमा लिख'आ बेद्दा लिक्कन। लिकिन अक्कु एंगा चाइ मंजा का ई चिठी ती ऐन निमन आनोन ती रिझत'ओन का नीम आ पत'अनन खापा गे चिहूट नना, एकदा धर्मसी नेम्हा आलर गे ऑंगहोल लेका चीरकी रई।
- 4 ऐन इदगेम एन्ने लिखदन का जोक्क ठकवा सिखाब'उर निम्है मझी नू कलेकसे कोरचका र'अनर। आर धर्मसिन नटनर। आर नम्है धर्मसी मया आबोन मलदौ उज्जना ऐकना ही ओदहा नू बदलनर। आर नम्है ओन्टे लेका उर्बस येसु मसीसिन नटनर। आर ही नठारना चिरान नुम नेम्हा पुथी नू लिखिर खच्चकी रई।
- 5 इबड़ा उर्मी कथन नीम मुन्द दिम अक्का र'अदर। अन्नु हूँ ऐन निमा गे इदन सुरता नन्त'अदन का उर्बस तंगहा चज्जिका इस्राएल आलारिन मिसर राजी नू आर ही जोंख ही दसा ती बहरी ओन्द्रस ती नाडियस, लिकिन खोखा ने मल पताचर आरिन नठाबाचस।
- 6 अउर हूँ धर्मस तमा गे चिच्का अदिया नू बन्चका मल र'अरकी तम्है अइडन अम्बका चिच्का मेर्खा पैकारिन सुरता नना। धर्मस आरिन आ कोइहे रायबड़ी उल्ला नू नैवई नना गे ऊखा नू ने हूँ खच्चा पोलना सिकड़ी ती हेंचका उइयका र'अदस।
- 7 इबड़ा मेर्खा पैकर लेक्खम सोदोम अरा गोमोरा नगरे गुट्ठी ता अरा अबड़ा ही ओनबेंडर'आ नू रहचका नगरे गुट्ठी ता आलर पेहरन ही सोतरा नलख अरा उर्मी रकम ही पेहरन ही पाप गुट्ठिन नंजर। अरा आर जनमजुग ही चिच्ची ही दंडे खक्खियर ती नमा गे ओन्टा चेताब'अना बेसे र'अनर।
- 8 आ रकम तिम तम्है देखार गुट्ठी ही मइय्याँ असरा नन्ना ती अदही लेक्खा ईकू इबड़ा आलर तम्है कयन सोतबोड़'आ नन्नर अरा धर्मसी अदिया आबोन मल गदन'अनर, अरा मेर्खा पैकारिन हींइनर।



- 9लिकिन मुध मेर्खा पैकस मिखाऐल एन्ने मल नंजस। एकाबारी आस मूसासी मरी ही पत नू नाद गुसन आनानरखस खने, आस आद ही बिड़दो नू मलदौ ब'अना ती बदी नना गे डिढ मल नंजस। लिकिन आस नाद गुसन इवंदम बाचस का, “उर्बस निंगन केबोस।”
- 10लिकिन इबड़ा ठकवा सिखाब'उर गा अख'अम बलनर अबड़ा कत्था ही बिड़दो नू निंदा नन्नर। अरा सोच'आ पोलना मेक्खो लेक्खा तम्है सुबहा ही लेक्खा एन्द्रन अख'आ आँगनर, अबड़न दिम नन्नर, अरा अत्रु तिम नठारनर कानर।
- 11आर गे ओहरे। एन्देरगेका आर तंगहै भईसीन पिटका कैनसी डहरे नू ऐकनर। अरा आर ढिबा गे बालामसी मलदौ आबोन ताम हूँ नन्नर। अरा कोरेस लेक्खा हूलहूली नन्ना चड्डे नठारनर कानर।
- 12इबड़ा आलर नीम पत'ऊ आलर खोंडर'अरकी ओन्ना-मोखना मदी गुट्ठी नू बिगर मईन ती निम्है गने ओन्नर मोखनर ती निम्है संगती नू ओक्कनर। ईर समुदर नू मुलखका चचड़ी लेक्खा नूखरका भयभयान र'अनर। ईर तम्है दौ आबोन लेका बिद्दू हिकनर। ईर बिगर पुंङना बदाली गुट्ठी लेक्खा र'अनर, एकदन ताका उढिई हूंई। ईर अतखा खतरका, बिगर खंजना, केचका, अरा पादा ती चडरका मन्न गुट्ठी लेक्खा र'अनर।
- 13ईर समुदर ता कोहाँ लहरा गुट्ठी लेक्खा र'अनर, अरा लहरा ही बोट्टो लेक्खा तम्है लज्जे ही नलख गुट्ठिन लेछनर। ईर बेहड़ारका बीनको गुट्ठी लेक्खा र'अनर। ईर गे गटगट ऊखा जनमजुग गे उडरकी रई।
- 14आदमसी सात पिड़ही नू बरचका हेनोखस हूँ इबड़ा आलर ही पत नू धर्मसी कत्थन मुन्द तिगियस, “ऐरा, उर्बस तंगहै गन'आ पोलना तंगहै नेम्हा पैकर गने बर'आ लगदस।
- 15अरा आस खेखेल ता उर्मी आलारिन नेंवई नना गे बर'आ लगदस। धर्मसिन नट'उर मलदौ डहरे ती नंजका बग्गे नलख गुट्ठी गे, अरा धर्मसिन नट'ऊ पपहर धर्मसी बिड़दो नू बाचका उर्मी हींङना कत्था गुट्ठी गे आरिन बदी ठेकाब'आ गे बरदस।”
- 16ईर कुटमुटर'ऊ हिकनर, अरा नन्नर ही मइय्याँ गुन्हा बिद्दू हिकनर। अरा आर तम्है मलदौ चिबाखारना ही लेक्खम ऐकनर। अरा आर तम्है पत नू फुलई ही कत्थन मन्नर। अरा आर तम्है फयदा गे नन्नारिन हक'आ कुद्दनर।
- 17लिकिन अना दुलारो, नीम गा नम्है उर्बस येसु मसीसी तइरकर मुन्द दिम बाच खच्चिकानर अबड़ा कत्था गुट्ठिन सुरता नना।



- 18 आर निमन बाचकानर का, “छेद्दे ता बेड़ा नू लज्जे मोखत'उर बर'ओर ती आर धर्मसिन नटना तम्है मलदौ चिबाखारना गुट्ठी ही लेखम ऐकोर।”
- 19 इबड़ा आलर निम्है मझी नू छिंडत'ऊ र'अनर। अरा ईर मैद सुबहा ही लेखा ईकुर र'अनर। ईर नू नेम्हा बोलतस मल र'अदस।
- 20 लिकिन अना दुलारो, नीम गा निम्है कोइहे नेम्हा पत'अना नू निम्है उज्जनन परद'आ, अरा नेम्हा बोलतस नू गोहरारते र'आ।
- 21 अरा धर्मसी चोन्हा नू कमरका र'आ। नम्है उर्बस येसु मसीसी सोग्गे नमा गे जनमजुग उज्जनन ओन्द्र'ओ आ उल्ला ही पाब ऐरा।
- 22 अरा एकार तम्है पत'अना नू दुइमती र'अनर, आरिन सोग्गे ऐरा।
- 23 अरा नन्नर नेकन नीम अखदर, आरिन जनमजुग चिच्ची ही दंडे ती बड़पेलहा बछाब'आ। अरा नन्नर मइय्याँ इल्चका गने सोग्गे ऐरा, लिकिन आ बारी नीम चिहूंक र'आ का नीम आर ही पाप नू अमा खत्र'आ, आर ही किचरी हूँ आर ही पाप नलख ती दगहा मंजकी र'ई।
- 24 मूइना ती निमन खापा उंगू, अरा निमन बिगर बदी ती तंगहै महबा निंदका अड्डा ही मुन्दहारे कोइहे रिझ गने इजत'आ गे उंगू,
- 25 नम्है नाडू ओन्टे लेका धर्मस गे, नम्है उर्बस येसु मसीस ती महबा अरा कोइहे मईन अरा सवंग अरा अदिया हुल्लो ती मुन्द अरा अक्कु अरा हुल्लो गूटी र'अन नेकअन। आमेन।



दहदर मंजका कत्था

दहदर मंजका कत्था 1

- 1 ईद येसु मसीसी चिच्का दहदर हवे। चाँइहेम मन्ना कत्था गुट्ठिन तंगहै जौखर गे ऐद'आ गे धर्मेस ई दहदर आबोन येसु मसीस गे चिच्चस। येसुस तंगहै पैकासिन तइय्यस ती तंगहै जौखस योहनस गे इदन अखताचस।
- 2 योहनस धर्मेसी कत्था ही पत्त नू अरा येसु मसीसी गोवाह ही पत्त नू तान ईरका उर्मी ही गोवाह चिच्चस।
- 3 एकास धर्मेस ती मुन्द तिका ई कत्था गुट्ठिन पढ़'उस अरा मिनुर अरा इय्या लिखचका लेक्खा ईकुर धर्मेस ती आसीस खक्ख'ऊ र'अनर। एन्देरगेका इबड़ा कत्था मन्ना ही बेड़ा हेद्दे अंडसकी रई।
- 4 ऐन योहन आसिया देस ता अबड़ा सतियो कलीसिया गुट्ठी गे एन्देर लिखदन का: ने र'अदस, अरा रहचस, अरा बर'ऊ र'अदस आ धर्मेस ती निमा मया अरा कोड़े बर'अन नेकअन। अरा आसी बेल-गदिया मुन्दहारे र'ऊ सतियो बोलता गुट्ठी ती,
- 5 अरा येसु मसीस ती निमा मया अरा कोड़े बर'अन नेकअन। मसीस दिम पत्त'अना जोगे गोवाह, अरा केचका ती उज्जा चो'अना नू जेट्ठा, अरा खेखेल ता उर्मी बेलारिन राजी ननू र'अदस। आस दिम नमन चोन्हा नंजस ती नमन तंगहै खेंस ती नम्है पाप गुट्ठी ती नाड़ियस।
- 6 अरा आस तंगहै बंगस धर्मेसिन सुसर नना गे नमन ओन्टा राजी अरा नैगर कमचस। आसी महबा अरा सवंग आस गे हुल्लो ती हुल्लो गूटी मनन नेकअन! आमेन!
- 7 ऐरा! आस बदाली गुट्ठी गने बर'ऊ र'अदस। ओर्मर आसिन ऐरोर, ने आसिन जोबचका रहचर आर हूँ आसिन ऐरोर। खेखेल ता उर्मी जातियर आसी चड्डे चींखोर ओलखोर। हाँ, ईद मनो दिम। आमेन!
- 8 ने र'अदस, अरा रहचस, अरा बर'ऊ र'अदस, अरा उर्मी ती सवंगिय र'अस, आ धर्मे उर्बस ब'अदस, “ऐन अल्फा अरा ओमेगा हिकदन।”
- 9 ऐन योहन निम्है भई हिकदन, अरा ऐन निम्है लेक्खा येसुस गने चोखरना नू अरा खिलपत चोदना नू अरा धर्मेसी राजी ही आल मन्ना नू अरा खतिर गने दुक्खे सारना नू निम्है गने मेस्र'ऊ हिकदन। धर्मेसी कत्था तेंगना ही चड्डे अरा येसुसी गोवाह र'अना ही चड्डे दंडे ही रूपे नू ऐन पतमोस नामे टापू नू रहचकन।



- 10 उर्बासी उल्ला नू ऐन नेम्हा बोलतासी आकुस नू मनरकी महबा नना लिक्कन खने, एंग्हे खोखा तरा पेंडहे ही खरखना लेक्खा जोरसरिया सड़न मेंजकन।
- 11 आ सड़ा एन्ने बाचा का, “एन्देर एन्देर नीन ऐरदय, अदिन ओन्टा पुथी नू लिख'आ ती, इफेसुस, स्मुरना, पेरगमोन, थुअतीरा, सरदीस, फिलदेलफिया, अरा लवोदिकेया नगरे ही सतियो कलीसिया गे तड़य्या चि'आ।”
- 12 एंग्हे गने कछनख'आलिया आ सड़न ऐरा गे ऐन किर्रे ईरकन। ऐन किर्रे ईरकन खने, ऐन सात गोटा सोना ही बिल्ली पटनी गुट्ठिन ईरकन।
- 13 अरा अबड़ा सतियो बिल्ली पटनी गुट्ठी ही मझी नू ओन्टा मनवा खद्दस लेक्खा ओर्तोसिन ईरकन। आसी अतका किचरी गुंडखी गूटी दिगहा रहचा, अरा एंवख नू सोना ही गतला नंजका रहचस।
- 14 अरा आसी कुक्कु अरा चुट्टी पंडरू तूली अरा कीबा लेक्खा पंडरू रहचा। अरा आसी खन्न गोंगौरना चिच्ची लेक्खा रहचा।
- 15 अरा आसी खेड्डे पसरा नू पान्ताचका पितल लेक्खा बिल्चा लगिया, अरा आसी सड़ा बग्गे अम्मू ही हउकारना लेक्खा रहचा।
- 16 अरा आस तंग्हे तीना खेक्खा नू सात गोटा बीनको धरचका रहचस। अरा आसी बई ती ओन्टा अखी-पखी धारे तलवार उरखा लगिया। अरा आसी मुंही लोहाड़ी बेड़ा ता बीड़ी लेक्खा बिल्चा लगिया।
- 17 आसिन ईरकन खने, ऐन आसी खेड्डे नू केचका लेक्खा खत्रकन केरकन। खने आस तंग्हे तीना खेक्खन एंग्हे मड़य्याँ नंजस ती बाचस, “अमा एल्चा, ऐन मुन्द ता अरा खोखा ता हिकदन।
- 18 अरा ऐन उज्जू र'अदन। ऐन केचका केरकन, लिकिन ऐरा, ऐन हुल्लो ती हुल्लो गूटी उज्जू र'अदन। अरा खे'अना अरा नरक गड्डी ही कुची गुट्ठी एंग्हे गुसन र'ई।
- 19 औंगे एकाबड़ा कत्थन नीन ईरकय, अरा एकाबड़ा कत्था अक्कु मना लगी अरा इदही खोखा मन्ना र'ई, अबड़ा उर्मिन लिख'आ।
- 20 एका सतियो बीनको गुट्ठिन एंग्हे तीना खेक्खा नू नीन ईरकय, अरा अबड़ा सतियो सोना ही बिल्ली पटनी गुट्ठी ही गम एन्ने र'ई। सात गोट बीनको सात कलीसिया ही पैकर हवे, अरा सात गोट बिल्ली पटनी सात कलीसिया हवे।

दहदर मंजका कत्था 2



- 1 इफेसुस नगरे ता कलीसिया ही पैकस गे एन्ने लिख'आ का: ने तंग्हे तीना खेक्खा नू सात गोट बीनकोन धरचका ती सात गोट सोना ही बिल्ली पटनी ही मझी नू कुद्ददस, आस इबड़ा कत्थन ब'अदस का:
- 2 ऐन निंग्हे नलख गुट्ठिन अरा कोइहे अरज'अनन अरा खतिर नन्नन अखदन। ऐन अखदन का नीन मलदौ आलारिन मल सहदय, अरा तइरका मलका ती हूँ तमन तइरकर ब'उरिन नीन बिद'अरकी आर ठकवा तइरकर एन्ने अक्कय।
- 3 नीन खतिर नन्ना ती एंग्हे नामे चड्डे दुक्खे चोदकय, अन्नु हूँ हार मल मोक्कय।
- 4 लिकिन एंगा गे निंग्हा बिड़दो नू जोक्क कत्था र'ई, नीन एंग्हे मइय्याँ मुन्द ता लेक्खा चोन्हन अम्बका चिच्का र'अदय।
- 5 औंगे नीन सुरता नना का नीन एका मेच्छा ती खत्रकय। अरा जियन किर्त'आ अरा मुन्द ता लेक्खा नलख नना। लिकिन नीन जियन मल किर्त'ओय होले, ऐन निंग्हे गुसन बर'ओन ती निंग्हे बिल्ली पटनी आबोन अदही अड्डा ती गुछाब'ओन चि'ओन।
- 6 लिकिन निंग्हे नू ओन्टा बेस कत्था र'ई का: नीन एंग्हे लेक्खम निकोलाय धरम ता आलर ही नलख गुट्ठिन खाँडदय।
- 7 नेम्हा बोलतस कलीसिया गुट्ठी गे एन्देर ब'अदस, अदिन नेखअय मेना गे खेबदा र'ई आस मेन्दस ती बुझुरदस नेकअन। एकास जित'ओस आस गे ऐन उज्जना मन्न ही खंजपन मोखा चि'ओन, एकदा धर्मसी परदेसोस नू र'ई।
- 8 स्मुरना नगरे ता कलीसिया ही पैकस गे नीन एन्ने लिख'आ का: ने मुन्द ता अरा खोखा ता र'अदस, अरा ने केचस केरस, लिकिन उज्जा चोचस, आस इबड़ा कत्थन ब'अदस का:
- 9 ऐन निंग्हे खिलपत आबोन अरा कीइन अखदन, लिकिन मानिम नू नीन उरुब र'अदय। अरा ने तमन यहूदी ब'अनर ती निंगन निंदा नन्नर अदिन हूँ ऐन अखदन, लिकिन आर मानिम नू यहूदी मलनर, आर गा सैतान ही गोइहा एइपा ता र'अनर।
- 10 एका दुक्खे निंगा भोगना मनो अत्रु नीन अमकेम एल्चा। सैतान निमन बिद'आ गे निम्है ती जोक्कोरिन जेहेल नू सजत'ओ। अरा नीम दस उल्ला गूटी दुक्खे भोग'ओर। जिया क'ओ आ गूटी हूँ पत'अना जोगे र'आ। खने ऐन निंगा उज्जना ही मुकुट चि'ओन।
- 11 नेम्हा बोलतस कलीसिया गुट्ठी गे एन्देर ब'अदस, अदिन नेखअय मेना गे खेबदा र'ई आस मेन्दस ती बुझुरदस नेकअन। एकास जित'ओस आस दुसर खे'अना ती नोकसान मल मनोस।



- 12पेरगमोन नगरे ता कलीसिया ही पैकस गे नीन एन्ने लिख'आ का: नेख'आ गुसन अखी-पखी धारे तलवार रई, आस इबड़ा कत्थन ब'अदस।
- 13ऐन अखदन का नीन एक्सन र'अदय, असन दिम सैतान ही बेल-गदिया रई। अन्नु हूँ नीन एंगहै नू मानी गने जिटजिटने र'अदय, अरा नीन एंगहै मइय्याँ ता पत्त'अनन मल अम्बकय। सैतान ही र'अना अड्डा निम्है नगरे नुम एंगहै पत्त'अना जोगे गोवाह अन्तिपास पिटतारस, आ बेड़ा नू हूँ नीन पत्त'अनन मल अम्बकय।
- 14अन्नु हूँ एंगा गे निंगहा बिड़दो नू जोक्क कत्था रई। निम्है नू बालामसी सिखाब'अनन मन'ऊ जोक्क आलर र'अनर। ई बालामस दिम बालाक बेलासिन इस्राएल आलारिन मूड़त'आ गे सलहा चिचस का, आर मूर्ती गुट्ठी गे दाँड़े अरगका ओन्ना-मोखनन मोखोर अरा पेहरन ही सोतरा नलखन ननोर।
- 15अन्नेम निकोलाय धरम ता आलर ही सिखाब'अनन मन'ऊ जोक्क आलर निम्है मझी नू र'अनर।
- 16औंगे नीन जियन किरत'आ। मला होले लेम ऐन निंगहै गुसन बर'ओन, अरा एंगहै बई ती उरखना तलवार ती आर ही गने लड़'ओन।
- 17नेम्हा बोलतस कलीसिया गुट्ठी गे एन्देर ब'अदस, अदिन नेखअय मेना गे खेबदा रई आस मेन्दस ती बुझुरदस नेकअन। एकास जित'ओस आस गे ऐन जोक्क नूर्रका मन्ना आबोन चि'ओन, अरा पुना नामे लिक्खरका ओन्टा पंडरू पखना आबोन चि'ओन। एका ओर्तस आ पखनन खक्खदस आसिन अम्बरकी ने हूँ आ नामेन बलदस।
- 18थुअतीरा नगरे ता कलीसिया ही पैकस गे नीन एन्ने लिख'आ का: गौंगौरना चिच्ची लेक्खा खन्न अरा पान्ताचका पितल लेक्खा खेड्डे र'अना धर्मसी खद्दस इबड़ा कत्था गुट्ठिन ब'अदस।
- 19ऐन निंगहै नलख गुट्ठिन अरा निंगहै चोन्हन अरा निंगहै पत्त'अनन अरा नीन एंगा गे नन्ना तेतर-सुसर आबोन, अरा निंगहै खतिर नन्नन उर्मिन अखदन। अरा निंगहै अक्कु ता नलख गुट्ठी मुन्द ता नलख गुट्ठी ती कोइहे बेस रई।
- 20अन्नु हूँ एंगा गे निंगा बिड़दो नू जोक्क कत्था रई। नीन आ आली येजबेल आबोन निंगहै मझी नू र'आ चि'अदय। आद तंगन धर्मसी कत्था तिगू बई, अरा आद तंगहै सिखाब'अना ती एंगहै जोखारिन पेहरन ही सोतरा नलख नना गे, अरा मूर्ती गुट्ठी गे दाँड़े अरगका ओन्ना-मोखनन मोखा गे भेंवाबई।



- 21 ऐन अदगे जियन किर्त'आ गे बेड़ा चिच्चकन, लिकिन आद तंगहै पेहरन ही सोतरा नलख ती जियन किर्त'आ गे मल बिद्दी।
- 22 ऐरा, अदगे ऐन रोगे चि'ओन। अरा ने अदही गने नन्ना आली गुसन काना ही पापन नन्नर, आर अदही डहरे गुट्ठी ती जियन मल किर्त'ओर होले, आरिन हूँ कोइहे खिलपत सारत'ओन।
- 23 अरा ऐन अदही गने चोंख'उरिन पिटोन। होले उर्मी कलीसिया गुट्ठी अख'ओ का जिया अरा मन गुट्ठी ही बिद'ऊ ऐनिम हिकदन। अरा ऐन नीम ओर्त ओर्त गे नीम नंजका नलख गुट्ठी ही लेक्खम किर्त'ओन चि'ओन।
- 24 थुअतीरा कलीसिया ता बछ्का आलर निमा गे ऐन एन्देर ब'अदन का: नीम अदही सिखाब'अनन मल मन्चकर, अरा सैतान ही खोड़खा गम ही कत्था एन्ने आर ब'अना कत्था गुट्ठिन नीम मल सिखकर। ओँगे ऐन निम्है मइय्याँ नन्ना एकअम बोड़ा आबोन मल लद'ओन।
- 25 अन्ति नीम एंगहै बरना गूटी एंगहै नू जिटजिटने पत्त'अते र'अना र'ई।
- 26-28 अरा एकास जितदस ती मुंजना गूटी एंगन मन्दस, आस गे ऐन एकासे एम्बस गुस्ते अदिया खक्खकादन अन्नेम जाती जाती ही मइय्याँ अदिया चि'ओन। अरा आस पूरा अदिया ती आरिन राजी ननोस, अरा आस आरिन खज्जो ही संजगी गुट्ठी लेक्खा खोटोस चि'ओस। अरा ऐन आस गे बिज-बीनकोन चि'ओन।
- 29 नेम्हा बोलतस कलीसिया गुट्ठी गे एन्देर ब'अदस, अदिन नेखअय मेना गे खेबदा र'ई आस मेन्दस ती बुझुरदस नेकअन।

दहदर मंजका कत्था 3

- 1 सरदीस नगरे ता कलीसिया ही पैकस गे नीन एन्ने लिख'आ का: ने धर्मसी सतियो बोलतन अरा सतियो बीनकोन धरचकादस, आस इबड़ा कत्थन ब'अदस। ऐन निंगहै नलख गुट्ठिन अखदन। आलर निंगन उज्जालदय ब'अनर, लिकिन नीन गा केचका र'अदय।
- 2 अक्कु एज्र'अय, अरा खे'आ बेददना ती ने ने बछ्का र'अनर आरिन बड़ियर नना। एन्देरगेका निंगहै नलख गुट्ठिन एंगहै धर्मसी ऐरना नू अदखला खक्खकन।
- 3 ओँगे सुरता नना का एका कत्थन नीन इंझरकादय अरा मंजकादय, अरा अदिन पेस'आ, अरा जियन किर्त'आ। नीन एज्रका मल र'अदय होले, ऐन खलबस लेक्खा बर'ओन। अरा नीन कहियोँ बल्लोय का ऐन एका बेड़ा नू निंगहै बिड़दो बर'ओन।



- 4अन्नु हूँ तम्है किचरिन सोतरा मल्ला नंजका जोक्क आलर सरदीस कलीसिया नू निंगा गे र'अनर। आर पंडरू किचरी अतोर ती एंग्हे गने ऐकोर, एन्देरगेका आर अदगे जोगे र'अनर।
- 5ने जित'ओस आस गे अन्नेम पंडरू किचरी अततार'ओर। अरा ऐन आसी नामेन उज्जना ही पुथी ती कहियों मल मेट'ओन। लिकिन आसी नामेन एम्बासी अरा आसी मेर्खा पैकर की मुन्दहारे तेंगर'ओन।
- 6नेम्हा बोलतस कलीसिया गुट्ठी गे एन्देर ब'अदस, अदिन नेखअय मेना गे खेबदा र'ई आस मेन्दस ती बुझुरदस नेकअन।
- 7फिलदेलफिया नगरे ता कलीसिया ही पैकस गे नीन एन्ने लिख'आ का: ने नेम्हा अरा मानिम र'अस, अरा ने बेल दाऊदसी कुची ही अदिया आबोन उइय्दस, अरा ने हूँ मुच्चा पोलना लेक्खा तिसग'उस, अरा ने हूँ तिसगा पोलना लेक्खा मुच्च'उस इबड़ा कत्थन ब'अदस का: 8ऐन निंग्हे नलख गुट्ठिन अखदन। निंगा जुक्किम सवंग र'ई, अन्नु हूँ नीन एंग्हे कत्थन पेसकय अरा एंग्हे नामेन मल दुस्सकय। औंगे ऐरा, ऐन ओन्टा तिसगका बलिन निंग्हे मुन्दहारे उइय्कादन अदिन ने हूँ मुच्चा पोलनर।
- 9ऐरा, यहूदी मलनर ती तमन यहूदी एन्ने ठक'ऊ सैतान ही गोइहा एइपा ता जोक्क आलारिन निंगा गे ऐन चि'ओन। अरा आर बर'ओर ती निंग्हे मुन्दहारे खेडमूली खत्र'आ गे नन्त'ओन। अरा आर अख'ओर चि'ओर का ऐन निंगन चोन्हा नंजकादन।
- 10खतिर गने सह'आ गे ऐन निंगा गे चिच्का एंग्हे पेसकन नीन पेसकय। औंगे खेखेल नू र'ऊ आलारिन बिढ़'आ गे सौंसे खेखेल मइय्याँ बरना र'ई आ सस्ती ही बेड़ा ती ऐन हूँ निंगन बछाब'ओन।
- 11ऐन चाँइहे बर'आलदन, एंग्हे नू जिटजिटने पत'अते र'आ। खने ने हूँ निंग्हे इनामन मल हो'ओर।
- 12ने जित'ओस आसिन ऐन एंग्हे धर्मसी मन्दिर नू ओन्टा खुटा कम'ओन। अरा आस इकला हूँ अइय्या ती मल गुछर'ओस। अरा ऐन आसी मइय्याँ एंग्हे धर्मसी नामेन अरा एंग्हे धर्मसी नगरे ही नामेन लिख'ओन। पुना येरुसलेम दिम धर्मसी नगरे हवे। ईद एंग्हे धर्मस ती मेर्खा तरती इत'ई। अरा ऐन एंग्हे पुना नामेन हूँ आसी मइय्याँ लिख'ओन।
- 13नेम्हा बोलतस कलीसिया गुट्ठी गे एन्देर ब'अदस, अदिन नेखअय मेना गे खेबदा र'ई आस मेन्दस ती बुझुरदस नेकअन।
- 14लवोदिकेया नगरे ता कलीसिया ही पैकस गे नीन एन्ने लिख'आ का: ने आमेन, अरा पत'अना जोगे अरा मानिम गोवाह, अरा धर्मसी गढ़ना ही ओरे हिकदस, आस इबड़ा कत्थन ब'अदस।



- 15 ऐन निंगहै नलख गुट्ठिन अखदन का नीन कीरना हूँ मला, कुड़ना हूँ मला। नीन कीरना महले कुड़ना र'आ गे ऐन बेद्ददन।
- 16 एन्ने नीन बिगर कुड़ना अरा बिगर कीरना ती उसुम उसुम र'अदय। औंगे ऐन निंगन एंगहै बई ती पुरच'ओन चि'ओन।
- 17 नीन एन्ने ब'अदय का, 'ऐन उरुब र'अदन, अरा एंगहै गुसन उर्मी र'ई, अरा एंगा इन्द्रिइम लो ही चाड़ मलकी।' लिकिन नीन इदन बलदय का, नीन कोहाँ खतय अरा नेख'आ ही मया मलका अरा कीड़ा अरा अन्धहा अरा ठेठेगे र'अदय।
- 18 औंगे ऐन निंगा गे सलहा चि'अदन का, नीन चिच्ची नू धुकचका सोना एंगहै गुस्ते खेन्दा, खने नीन उरुब मनोय कालोय। अरा नीन एंगहा ती पंडरू किचरी खेन्दा का, अदिन अतोय ती निंगहै मेद ठेठेगे अम्बो र'आ अरा लज्जे मल मोखोय। अरा निंगहै खन्न नू नना गे सुरमा खेन्दा का, अदिन ननोय होले निंगहै खन्न रफ'ओ।
- 19 ऐन नेकन चोन्हा नन्दन आरिन केबदन अरा कोड़दन। औंगे चेत लगे र'आ अरा जियन किर्त'आ।
- 20 ऐरा, ऐन बली मुन्दहारे इज्जकन ती ठोकठोका ब'अदन। नीकईम एंगहै सइन मेन्दस ती बलिन तिसगदस होले, ऐन आसी गुसन बर'ओन ती आसी गने ओनोन मोख'ओन अरा आस एंगहै गने ओनोस मोख'ओस।
- 21 एकासे ऐन जितचकन ती एम्बस गने आसी बेल-गदिया नू उक्कन, अन्नेम ने जित'ओस आस गे ऐन एंगहै गने एंगहै बेल-गदिया नू ओक्का गे अदिया चि'ओन।
- 22 नेम्हा बोलतस कलीसिया गुट्ठी गे एन्देर ब'अदस, अदिन नेखअय मेना गे खेबदा र'ई आस मेन्दस ती बुझुरदस नेकअन।”

दहदर मंजका कत्था 4

- 1 इबड़ा कत्था ही खोखा ऐन मेर्खा नू ओन्टा तिसगरका बलिन ईरकन। अरा ऐन मुन्द एंगहै गने कछनखका मंजका पेंडे ही खरखना लेक्खा सइन मंजकन। आद बाचा, “मइय्याँ इसन बरा। इबड़ा कत्था ही खोखा एन्देर एन्देर मन्ना र'ई, अबइन ऐन निंगन ऐद'ओन।”
- 2 आ बारिम ऐन नेम्हा बोलतासी आकुस नू मंजकन। ऐरा, मेर्खा नू ओन्टा बेल-गदिया उड़की रहचा, अरा आ बेल-गदिया नू ओर्तस उक्का रहचस।



- 3 अरा अइय्या ने उक्का रहचस आस यसब अरा मानिक पखना ही बिलचना लेक्खा ऐथ्रदस। अरा बेल-गदिया ही ओनबेंडर आ मरकत ती कमचका लेक्खा ओन्टा सोखाबोरा रहचा।
- 4 आ बेल-गदिया ही चरियो तरा चौबीस गोट बेल-गदिया रहचा। अरा इबड़ा बेल-गदिया नू चौबीस सेयान आलर पंडरू किचरी अतका ती उक्का रहचर। अरा आर ही कुक्कु नू सोना ही मुकुट रहचा।
- 5 अरा अबड़ा बेल-गदिया ती लवका लौकारना गुट्ठी अरा खरखना गुट्ठी अरा मुर्ी चाड़ी गुट्ठी बर आलिया। अरा बेल-गदिया ही मुन्दहारे चिच्ची ही सात गोट बिल्ली लघ आ लगिया, इबड़ा दिम धर्मसी सात गोट बोलता हवे।
- 6 अरा बेल-गदिया ही मुन्दहारे काँच ही समुदर लेक्खा ओन्टा रहचा, एकदा बिल्लौर लेक्खा फटफट ने रहचा। बेल-गदिया ही मड़ी अरा चरियो तरा चार गोटा उज्जना आलो रहचा। अबड़ा ही खोखा दरा मुन्दहारे खन्न खन्न ती निंदकी रहचा।
- 7 पहिल उज्जना आलो ओन्टा लकड़ा लेक्खा रहचा, अरा दोसर उज्जना आलो ओन्टा साँड़ लेक्खा रहचा, अरा तिसर उज्जना आलो गे आलासी लेक्खा मुही रहचा, चौथा उज्जना आलो ओन्टा उढियारना गरूड़ लेक्खा रहचा।
- 8 अरा चरियो उज्जना आलो गे ओर्त ओर्त गे छै छै गोट डेना रहचा, अरा भितरी बहरी खन्न खन्न ती निंदकी रहचा। अरा अबड़ा उल्ला अरा माखा बिगर ठकरका एन्ने ब'अतेम र'आ लगिया, “उर्मी ती सवंगिय धर्म उर्बस नेम्हा र'अस, नेम्हा र'अस, नेम्हा र'अस, ने रहचस, अरा र'अदस, अरा बर'ऊ र'अदस।”
- 9 एका एका बारी अबड़ा उज्जना आलो बेल-गदिया नू उक्का हुल्लो ती हुल्लो गूटी उज्जुसी महबा, अरा मईन, अरा धन्यवाद ननी,
- 10 आ बारी आ बारी चौबीसो सेयान आलर बेल-गदिया नू उक्कुसी मुन्दहारे खेडमूली खत्रनर ती, हुल्लो ती हुल्लो गूटी उज्जुसी महबा नन्नर। अरा एन्ने ब'अनुम बेल-गदिया ही मुन्दहारे तम्है मुकुट आबोन ओक्त'अनर चि'अनर,
- 11 “अना एम्है धर्म उर्बायो! नीन महबा अरा मईन अरा सवंग खखना ही जोगे र'अदय, एन्देरगेका नीनिम उर्मिन गढचकय, अरा निंगहै मने तिम अबड़ा गढका ती उज्जी।”

दहदर मंजका कथा 5

- 1 इदही खोखा ऐन बेल-गदिया नू उक्काचस आसी तीना खेक्खा नू ओन्टा पुथी ईरकन, अइय्या भितरी बहरी लिखकी रहचा, अरा सात गोटा मरका लौचका ती मुच्चका रहचा।



- 2अरा ऐन ओन्टा सवंगिय मेर्खा पैकासिन जोर सड़ा ती चिच्चियारनुम ब'अना ईरकन, “ई पुथिन तिसक'आ गे अरा इदही मरकन खच्चा गे ने जोगे र'ई?”
- 3लिकिन मेर्खा नू महले खेखेल नू महले खेखेल ही किय्या ने हूँ आ पुथिन चलख'आ गे महले अदही भितरी ऐरा गे पोल्लर।
- 4अरा ऐन नीख चार चार चींखा हेल्सरकन, एन्देरगेका ने हूँ आ पुथिन चलख'आ गे महले अदही भितरी ऐरा गे जोगे मल खक्खर।
- 5तहाँ अबड़ा सेयान आलर ती ओर्तोस एंगन बाचस, “अमा चींखा! ऐरा, ने यहूदा गोतोर ता लकड़ा अरा दाऊद बेलासी जंईपुंई हिकदस, आस जित्तचकादस। आस आ पुथिन चलख'आ गे अरा अदही सतियो मरकन खच्चा गे ओंगदस।”
- 6फेन ऐन पिटतारका ओन्टा भेंडो खद्दन बेल-गदिया अरा अबड़ा चरियो उज्जना आलो अरा चौबीस सेयान आलर ही मझी नू इज्जका ईरकन। आसी सात गोटा मरग अरा सात गोटा खन्न रहचा। इबड़ा सात गोटा खन्न धर्मेसी सातो बोलता हवे, एकाबड़ा सौंसे खेखेल नू तइरका र'ई।
- 7अरा आस बरचस ती बेल-गदिया नू उक्काचस आसी तीना खेक्खा ती आ पुथिन होचस।
- 8अरा आस आ पुथिन होच खच्चियस खने, अबड़ा चरियो उज्जना आलो अरा चौबीस सेयान आलर आसी मुन्दहारे खेडमूली खत्रर। अरा इबड़ा ओर्मर ही खेक्खा नू तम्मुरा अरा नेम्हा आलर ही गोहरारना गुट्ठी ही धूप ती निंदका सोना ही मौनी रहचा।
- 9अरा अबड़र ओन्टा पुना डंडी पाड़ा हेल्सर का, “नीन आ पुथिन हो'आ गे अरा अदही मरका गुट्ठिन खच्चा गे जोगे र'अदय। अरा नीन पिटतारकय ती निंग्हे खेंस ती उर्मी गोतोर अरा भखा अरा आल खोंइहा अरा राजी ती धर्मेस गे आलारिन खीन्दकादय।
- 10अरा नीन आरिन एम्है धर्मेस गे तेतर-सुसर नना गे ओन्टा राजी अरा नैगर कमचकादय, अरा आर खेखेल नू राजी ननोर।”
- 11फेन ऐन अउरिम ईरकन खने, लाखों करोड़ो मेर्खा पैकर ही सड़न बेल-गदिया अरा अबड़ा उज्जना आलो ही अरा अबड़ा सेयान आलर ही ओनबेंडर'आ मँजकन।
- 12अरा आर जोर सड़ा ती चिच्चियार'अरकी ब'आ लगियर, “ने पिटतारका भेंडो खद्द मसीस र'अस, आस सवंग अरा खुर्जी अरा लूर अरा पया अरा मईन अरा महबा अरा ओहमा खक्खा गे जोगे र'अस।”



13 फेन ऐन मेर्खा अरा खेखेल अरा खेखेल ही किय्या अरा समुदर ता उर्मी आलो एन्ने ब'अना मेंजकन, “ने बेल-गदिया नू ओकदस आस गे, अरा ने भेंडो खद्द मसीस र'अस आस गे ओहमा, अरा मईन, अरा महबा, अरा सवंग हुल्लो ती हुल्लो गूटी र'अन नेकअन।”

14 अरा अबड़ा चरियो उज्जना आलो बाचा, “आमेन।” अरा अबड़ा सेयान आलर खेडमूली खत्रर ती ओड़ लग्गियर।

दहदर मंजका कत्था 6

1 अक्कु ऐन ईरकन का भेंडो खद्द मसीस अबड़ा सतियो मरकन ती ओन्टा मरकन खच्चियस। खने अबड़ा चरियो उज्जना आलो ती ओन्टा आलो “बरा” एन्ने ब'अना मेंजकन। अदही सड़ा गा मुर्ना चाड़ना बेसे रहचा।

2 अरा ऐन ईरकन खने, ऐरा, ओन्टा पंडरू घोड़ोन ईरकन। अरा अइय्या उक्काचस आस ओन्टा एड़ेत धरचकाचस। अरा आस गे ओन्टा मुकुट चीतारा। अरा आस जीत खक्खुस लेक्खा जीत खक्खा गे उरखस।

3 भेंडो खद्द मसीस दुसर मरकन खच्चियस खने, ऐन दुसर उज्जना आलो “बरा” एन्ने ब'अना मेंजकन।

4 खने अउर ओन्टा घोड़ो उरखा, आद खेंसो रहचा। अरा अइय्या उक्काचस आस गे खेखेल ती सान्ति मेट'आ गे अदिया चीरा का आलर ओर्त ओर्त गने पिटा नख्र'ओर। अरा आस गे ओन्टा कोहाँ तलवार चीतारा।

5 भेंडो खद्द मसीस तिसर मरकन खच्चियस खने, ऐन तिसर उज्जना आलो “बरा” एन्ने ब'अना मेंजकन। अरा ऐन ईरकन खने, ऐरा, ओन्टा मोखारो घोड़ोन ईरकन। अरा अइय्या उक्काचस आस तंगहै खेक्खा नू ओन्टा परली धरचकाचस।

6 खने ऐन अबड़ा चरियो आलो ही मड़ी नू ती ओन्टा सड़ा एन्ने ब'अना मेंजकन, “ओन उल्ला ही बनी गे ओन किलो गहूँ, अरा ओन उल्ला ही बनी गे तीन किलो बजरा, लिकिन इसुंग अरा अंगुर रासी आबोन अमके नठाब'आ।”

7 भेंडो खद्द मसीस चौथा मरकन खच्चियस खने, ऐन चौथा उज्जना आलो “बरा” एन्ने ब'अना ही सड़न मेंजकन।

8 अरा ऐन ईरकन खने, ऐरा, ओन्टा पियर घोड़ोन ईरकन। अरा अइय्या उक्काचस आसी नामे “खे'अना” रहचा। अरा नरक गड्डी आसी खोखा खोखा काला लगिया, अबड़ा गे तलवार, अरा



अकाल, अरा कोहाँ रोगे, अरा खेखेल ता बनेला मेक्खो गुट्ठी ती खेखेल ता चार हींस आलारिन पिटा गे अदिया चीतारा।

⁹भेंडो खद्द मसीस पंचे मरकन खच्चियस खने, ऐन गोइहा किइय्या अबड़ा जिया गुट्ठिन ईरकन, एकाबइर धर्मसी कत्था तेंगना ती अरा मानिम गोवाह र'अना ही चड्डे पिटतारका रहचर।

¹⁰अरा अबइर जोरसरिया चिच्चियारर ती बाचर, “अना नेम्हा अरा मानिम सवंगिय उर्बायो, एका गूटी नीन नेंवई मल ननोय अरा खेखेल नू उज्जू आलर ती एम्है खेंस ही ऊजी मल किर्त'ओय?”

¹¹खने अबड़ा ओर्मर गे पंडरू किचरी चीतारा, अरा आर ही संगे मसीसी तेतर-सुसर ननुर अरा आर ही भई बहिनर ने ने तम्है लेक्खा पिटर'ऊ र'अनर आर ही गिनती मंज खच्चना गूटी आरिन अउर जोक्क घड़ी खन्न ऐखा गे बातारा।

¹²अरा ऐन ईरकन का भेंडो खद्द मसीस छै मरकन खच्चियस खने, कोहाँ खेखेल नुकुरना मंजा, अरा बीड़ी कमड़ा लेक्खा मोखारो मंजा केरा, अरा गोट्टा चन्दो खेंस लेक्खा खेंसो मंजा केरा।

¹³अरा एकासे धुका ती अंजीर मन्न ती खेना खंजका निदगी क'ई, अन्नेम मेर्खा ती बीनको गुट्ठी खेखेल नू खत्तरा केरा।

¹⁴अरा मेर्खा पिटरी तेर्मना बेसे लटुमारा ती नूखा केरा। अरा उर्मी परता अरा टापू तम्है अइडा ती खरकारा केरा।

¹⁵तहाँ खेखेल ता बैलर, अरा कोइहे मुध आलर, अरा फउद उर्बर, अरा उरुबर, अरा सवंगियर, अरा उर्मी बिट्ठी ननू जौखर, अरा उर्मी छछिन्द आलर ओर्मर लाता गुट्ठी नू अरा परता नू पखना ही अलाप गुट्ठी नू नूखर केरर।

¹⁶अरा आर परता गुट्ठी ती अरा पखना गुट्ठी ती आना हेलरर, “एम्है मइय्याँ खत्र'अय कलय ती बैल-गदिया नू उक्कादस आसी मुंही ती अरा भेंडो खद्द मसीसी खींस ती एमन नुइ'अय।

¹⁷एन्देरगेका आर ही खींस ही कोहाँ उल्ला अंडसकी र'ई, ने इजकी र'आ ऊंगी?”

दहदर मंजका कत्था 7

¹इदही खोखा ऐन चार गोटा मेर्खा पैकारिन खेखेल ही चरियो कौंडा नू इज्जका ईरकन। अबइर खेखेल ता चरियो ताकन उर्दका रहचर का खेखेल नू महले समुदर नू महले इन्द्रिइम मन्न नू ताका अम्बो तागर'आ।



- 2 फेन अउर ओन्टा मेर्खा पैकासिन उज्जना धर्मसी मरकन उइयका ती पुरुब तरती मइय्याँ बरना ईरकन। अरा आस अबड़ा चरियो मेर्खा पैकारिन नेका खेखेल अरा मेर्खन नठाब'आ गे अदिया चीरकी रहचा आरिन जोरसरिया चिच्चियारस ती बाचस,
- 3 “एका गूटी ऐम नम्है धर्मसी जोंखर ही कपड़े नू मरका मल नंज खचोम, आ गूटी खेखेल महले समुदर महले मन्न गुट्ठिन अमके नठाब'आ।”
- 4 फेन ऐन छपा नंजका आलर ही गनती आबोन ब'अना मेंजकन। इस्राएल आलर ही उर्मी गोतोर नू ओन लाख चवालीस हजार आलर मइय्याँ छपा नन्तारा।
- 5 यहूदासी गोतोर ती बारा हजार आलर नू छपा नन्तारा। रुबेनसी गोतोर ती बारा हजार आलर नू, गादसी गोतोर ती बारा हजार आलर नू,
- 6 आसेरसी गोतोर ती बारा हजार आलर नू, नेफतलिमसी गोतोर ती बारा हजार आलर नू, मनास्सेसी गोतोर ती बारा हजार आलर नू,
- 7 सुमेयोनसी गोतोर ती बारा हजार आलर नू, लेवीसी गोतोर ती बारा हजार आलर नू, इस्रखारसी गोतोर ती बारा हजार आलर नू,
- 8 जबुलोनसी गोतोर ती बारा हजार आलर नू, योसेफसी गोतोर ती बारा हजार आलर नू, बेनियमिनसी गोतोर ती बारा हजार आलर नू छपा नन्तारा।
- 9 इबड़ा कत्था ही खोखा ऐन ईरकन खने, ऐरा, उर्मी राजी अरा गोतोर अरा आल खोंड़हा अरा भखा ती बरचका ने हूँ गन'आ पोलना ओन्टा कोहाँ आल गोंहड़न ईरकन। अबड़र पंडरु किचरी गुट्ठी अत्तका ती तम्है खेक्खा नू कींदा डहड़ा गुट्ठी धरचका बेल-गदिया ही मुन्दहारे अरा भेंडो खद्द मसीसी मुन्दहारे इज्जका रहचर।
- 10 अरा आर जोरसरिया चिच्चियारर ती ब'आलियर, “नाइरना नम्है धर्मस ने बेल-गदिया नू उक्कादस आसी ती, अरा भेंडो खद्द मसीस ती बरई।”
- 11 अरा उर्मी मेर्खा पैकर बेल-गदिया अरा सेयान आलर अरा चरियो उज्जना आलो ही ओनबेंडर'आ इज्जर ती बेल-गदिया ही मुन्दहारे मुंही पाब खत्र ती धर्मसी महबा नंजर।
- 12 अरा अबड़र बाचर, “आमेन! नम्है धर्मस गे ओहमा, अरा महबा, अरा लूर, अरा धन्यवाद, अरा मईन, अरा सवंग, अरा पया हुल्लो ती हुल्लो गूटी मनन नेकअन, आमेन।”
- 13 फेन सेयान आलर ती ओर्तोस एंगन एन्ने मेंजस, “पंडरु किचरी गुट्ठी अत्तका र'अनर इबड़र ने तंगहै? अरा ईर एसलेक ती बरचका र'अनर?”



14 खने ऐन बाचकन, “एंगहै उर्बायो नीनिम अखदय।” खने आस एंगन बाचस, “ईर कोहाँ खिलपत ती उरखर ती बरचका र'अनर, अरा इबड़र तम्है किचरी गुट्ठिन भेंडो खद्द मसीसी खेंस ती नूड़ियर ती पंडरु नंजका र'अनर।

15 ई चड्डेम ईर धर्मसी बेल-गदिया ही मुन्दहारे र'अनर ती आसी मन्दिर नू उल्ला माखा आसी तेतर-सुसर नन्नर। अरा ने बेल-गदिया नू उक्कादस, आस आर ही गने ओक्र'ओस अरा आरिन खापोस।

16 आर अक्कु इकला हूँ कूल कीड़ा महले ओनक'आ मल सार'ओर, अरा आर गे बिड़ना ती महले ओरना ती इन्द्रिइम खिलपत मल मनो।

17 एन्देरगोका भेंडो खद्द मसीस ने बेल-गदिया ही मड़ी नू इज्जदस, आस आर ही महरस हिकदस। अरा आस आरिन उज्जना अम्मु ही पझरा गुट्ठी गुसन कड़हाब'ओस। अरा धर्मस आर ही खन्न ती उर्मी खंजलखोन चींचोस।”

दहदर मंजका कथा 8

1 भेंडो खद्द मसीस सातवाँ मरकन खच्चियस खने, मलागूटी अदहा घंटा मेर्खा नू सुन्न मंजा केरा।

2 अरा ऐन धर्मसी मुन्दहारे इज्जका र'अनर अबड़ा सतियो मेर्खा पैकारिन ईरकन, अरा आर गे सात गोटा पेंड़े चीतारा।

3 अरा अउर ओन्टा मेर्खा पैकस सोना ही धूप कुहुड़'अना मौनीन धरचस ती बरचस, अरा आस गोड़हा गुसन इज्जस। अरा आस गे बग्गे धूप चीतारा का आस बेल-गदिया ही मुन्दहारे र'अना सोना ही गोड़हा नू उर्मी नेम्हा आलर ही गोहरारना गुट्ठी गने धूप कुहुड़'ओस।

4 अरा मेर्खा पैकासी खेक्खा ती धूप ही कुहुड़ा नेम्हा आलर ही गोहरारना गुट्ठी गने मइय्याँ अर्गिया अरा धर्मस गुसन अंडसिया।

5 फेन मेर्खा पैकस धूप कुहुड़'अना मौनीन होचस ती गोड़हा ता चिच्चिन नुल्लियस अरा खेखेल नू तुन्दियस चिच्चस, खने मुर्ना चाड़ना गुट्ठी, अरा खरखना गुट्ठी, अरा लवका लौकारना गुट्ठी, अरा खेखेल नुकुरना मना हेलरा।

6 फेन अबड़ा सतियो मेर्खा पैकर नेख'आ गुसन सतियो पेंड़े रहचा आर ऊर'आ गे सपड़ारर।

7 अरा मुन्द ता मेर्खा पैकस पेंड़े ऊरचस खने, खेंस गने मेसका आली अरा चिच्ची मंजा, अरा खेखेल नू तुन्दतारा। खने खेखेल ही तीन ती ओन भाग उल्लिया केरा, अरा मन्न गुट्ठी ही तीन ती ओन भाग हूँ उल्लिया केरा, अरा उर्मी हरियर लट्ठी हूँ उल्लिया केरा।



- 8अरा दोसर मेर्खा पैकस पेंडहे ऊरचस खने, चिच्ची लघरना लेक्खा ओन्टा कोहाँ परता समुदर नू हेबड़तारा। अरा समुदर ही तीन ती ओन भाग खेंस मंजा केरा।
- 9अरा समुदर ही उज्जना आलो तीन ती ओन भाग केच्चा केरा। अरा तीन ती ओन भाग कोहाँ डोंगा नठारा केरा।
- 10अरा तिसर मेर्खा पैकस पेंडहे ऊरचस खने, ओन्टा कोहाँ बीनको होरा लेक्खा लघरना ती मेर्खा ती किच्चरा, अरा खाड़ गुट्ठी ही तीन ती ओन भाग नू अरा अम्मु पझरा गुट्ठी नू खत्रा।
- 11अरा आ बीनको ही नामे खड़खा बारई। अरा तीन ती ओन भाग अम्मु खड़खा मंजा केरा, अरा खड़खा अम्मन ओन्ना ती बग्गे आलर केचर केरर।
- 12अरा चौथा मेर्खा पैकस पेंडहे ऊरचस खने, तीन ती ओन भाग बीड़ी, अरा तीन ती ओन भाग चन्दो, अरा तीन ती ओन भाग बीनको नठारा। औंगे अबड़ा नू तीन ती ओन भाग ऊखा मंजा केरा। अरा तीन ती ओन भाग उल्ला नू अरा तीन ती ओन भाग माखा नू बिल्ली मल रहचा।
- 13फेन ऐन ईरकन का मेर्खा ही मझी नू ओन्टा गरुड़ उढियार'आ लगिया, अरा आद जोरसरिया एन्ने ब'अना मेंजकन, “बछ्का नन्ना तिनियो मेर्खा पैकर ऊरना रई, आ पेंडहे ऊरना ती खेखेल ता आलर मइय्याँ बोख बोख बोख!”

दहदर मंजका कथा 9

- 1पांचवाँ मेर्खा पैकस पेंडहे ऊरचस खने, ऐन ओन्टा बीनकोन मेर्खा ती खेखेल नू खत्रना ईरकन, अरा आस गे भयभयान खोड़खा गड्डी ही बली ही कुची चीरा।
- 2अरा आस आ भयभयान खोड़खा गड्डी ही बलिन तिसकस खने, अइय्या ती कोहाँ भठा ती चोअना कुहड़ा लेक्खा कुहड़ा चोचा। अरा खोड़खा गड्डी ता कुहड़ा ती बीड़ी अरा ताका ऊखा मंजा केरा।
- 3अरा आ कुहड़ा ती बोक्खो गुट्ठी उरखा ती खेखेल मइय्याँ बरचा। अरा अबड़ा गे खेखेल ता बिछी गुट्ठी ही सवंग लेक्खा सवंग चीतारा।
- 4अरा अबड़ा गे एन्ने बातारा का, खेखेल ता लट्टिन महले एकअम हरियर खोप्पन महले एकअम मन्नन अमके नठाब'आ, लिकिन नेख'आ कपड़े नू धर्मसी मरका मल्ला अबड़ा आलारिन लेका नठाब'आ।



- 5अबड़ा बोक्खो गे आलारिन पिटा खच्चा गे मला, लिकिन पाँच महिना गूटी आरिन डाहर'आ गे अदिया चीतारा। बिछी दगई खने आलर गे नुंजना मनी अदही लेक्खा अबड़ा बोक्खो परमना ती बरना नुंजना रहचा।
- 6अरा अबड़ा उल्ला नू आलर खे'आ बेद्दोर, लिकिन अदन मल खक्खोर, अरा खे'आ गे चीबाखार'ओर, लिकिन खे'अना आर ती बोंगो।
- 7अबड़ा बोक्खो ही ऐथ्रना लड़ाई गे सपड़ाचका घोड़ो लेक्खा ईथ्र'ई। अरा अबड़ा ही कुक्कु गुट्ठी नू सोना ही मुकुट बेसे इन्द्रिइम रहचा, अरा अबड़ा ही मुंही आलर ही मुंही लेक्खा रहचा।
- 8अरा अबड़ा ही कुक्कु ता चुट्टी मुक्कर ही कुक्कु ता चुट्टी लेक्खा रहचा, अरा अबड़ा ही पल्ल लकड़ा ही पल्ल लेक्खा रहचा।
- 9अरा अबड़ा गे पन्ना ही झिलम लेक्खा झिलम रहचा। अरा अबड़ा ही डेना ही खरखना लड़ाई गे बग्गे घोड़ो पुन्दका रन्थ गुट्ठी ही जोर बोंगना ही खरखना लेक्खा रहचा।
- 10अरा अबड़ा ही खोला अरा टुटी बिछी ही लेक्खा रहचा। अरा अबड़ा ही खोला नू आलारिन पाँच महिना गूटी दुक्खे सारत'अना ही सवंग रहचा।
- 11भयभयान खोड़खा गइडी ही मेर्खा पैकस दिम अबड़ा ही मइय्याँ बेलस रहचस। आसी नामे इब्रानी भखा नू अबद्दोन अरा युनानी भखा नू अप्पोल्लयोन हवे।
- 12पहिल सस्ती कट्टिया केरा। ऐरा, इबड़ा ही खोखा अउर नन्ना दुई गोट सस्ती मन्ना र'ई।
- 13फेन छैवाँ मेर्खा पैकस पेंडहे ऊरचस खने, सोना ही गोड़हा एकदा धर्मसी ही मुन्दहारे र'ई अदही चार मरग ती बरचका ओन्टा सइन मेंजकन।
- 14पेंडहे धरचका छैवाँ मेर्खा पैकासिन आ सड़ा एन्ने बाचा का, “एका चरियो मेर्खा पैकर युफराटेस कोहाँ खाइ गुसन हेंरकानर आरिन कोल्ला चि'आ।”
- 15खने अबड़ा चरियो मेर्खा पैकर कोल्लतारर केरर। आर ई बेड़ा गेम, अरा ई उल्ला गेम, अरा ई महिना गेम, अरा ई चाँन गेम आलर ही तीन ती ओन भागन पिटा गे सपड़तारका रहचर।
- 16अरा ऐन घोड़ो फउदर ही गनतिन मेंजकन। आद बीस करोड़ रहचा।
- 17अरा ऐन देखार नू घोड़ो गुट्ठिन अरा अइय्या अरगुरिन ईरकन। अबड़र ही झिलम गुट्ठी चिच्ची खेंसो रंग लेक्खा अरा मोखारो गने भेटांगो ऐखर'आ रंग लेक्खा अरा गन्धक ही बाल ऐखर'आ रंग लेक्खा रहचा। अरा अबड़ा घोड़ो ही कुक्कु लकड़ा गुट्ठी ही कुक्कु लेक्खा रहचा, अरा अबड़ा ही बई गुट्ठी ती चिच्ची अरा कुहड़ा अरा गन्धक उरखा लगिया।



- 18अबड़ा ही बई ती उरखका इबड़ा तिनियोँ खिलपत चिच्ची अरा कुहड़ा अरा गन्धक ती आलर ही तीन ती ओन भाग पिटतारर।
- 19अबड़ा घोड़ो ही सवंग गा अबड़ा ही बई नू अरा खोला नू रहचा। अबड़ा ही खोला गा कुक्कु र'अना नेरें गुट्ठी ही लेक्खा रहचा, अरा अबड़ा आलर गो नेरें कुक्कु गुट्ठी तिम खिलपत चि'आ लगिया।
- 20इबड़ा सस्ती ती मल पिटतारर, अबड़ा बछ्का आलर अक्कु गूटी हूँ तम्है पाप गुट्ठी ती जियन मल किर्ताचर। आर नाद गुट्ठिन अरा मूर्ती गुट्ठिन ओड़ लगनन मल अम्बियर। आर ऐरा पोलना महले मेना पोलना महले ऐका पोलना सोना अरा चाँदी अरा पितल अरा पखना अरा कंक गुट्ठी ती कमचका मूर्ती गुट्ठिन लेका ओड़ नंजर।
- 21आर तम्है आल पिटना पाप गुट्ठी ती महले तम्है गुरुमना पाप गुट्ठी ती महले तम्है पेहरन ही सोतरा नलख ती महले तम्है खड़ना नुड़ना गुट्ठी ती जियन मल किर्ताचर।

दहदर मंजका कथा 10

- 1फेन ऐन अउरिम ओन्टा सवंगिय मेर्खा पैकासिन ओन्टा बदालिन झप्परस ती मेर्खा ती एतना ईरकन, आसी कुक्कु मइय्याँ ओन्टा सोखाबोरा रहचा, अरा आसी मुंही बीड़ी लेक्खा रहचा, अरा आसी खेड़डे चिच्ची ही खुटा लेक्खा रहचा।
- 2आसी खेक्खा नू ओन्टा चलखरका सन्नी पुथी रहचा। अरा आस तंगहै तीना खेड़डेन समुदर नू अरा डेब्बा खेड़डेन खेखेल नू थमचस।
- 3अरा आस लकड़ा हउकारना बेसे जोरसरिया चिच्चियारस। अरा आस चिच्चियारस खने, सात गोट बादाली मूर्ना तम्है खरखना ती कछनखरा।
- 4अरा सात गोट बादाली मूर्ना कछनखरा खने, ऐन अबड़न लिख'आ बेद्दा लिक्कन। लिकिन ऐन मेर्खा ती ओन्टा सड़ा एन्ने ब'अना मेंजकन का, “सातियो बादाली मूर्ना एन्देर बाचा अबड़न मरका नना अरा अबड़न अमा लिख'आ।”
- 5फेन एका मेर्खा पैकासिन ऐन समुदर अरा खेखेल नू इज्जका ईरकन, आस तंगहै तीना खेक्खन मेर्खा तरा चोदस,
- 6अरा एकास हुल्लो ती हुल्लो गूटी उज्जदस, अरा ने मेर्खन अरा अइय्या र'अना उर्मिन, अरा खेखलन अरा अइय्या र'अना उर्मिन, अरा समुदर आबोन अरा अइय्या र'अना उर्मिन गढ़चस, आसी नामे ती किरया मोक्खस ती बाचस, “अक्कु गा घड़ही खापना मल मनो।



7लिकिन सातवाँ मेर्खा पैकास तंग्हे पेंडहेन ऊरना र'अस, अउला धर्मसी नूखका कत्था पुरा मनो। आस तंग्हे जोंखर धर्मसी कत्था तिंगुरे गे तिका लेक्खा अबड़ा पुरा मनो।”

8फेन मेर्खा ती ऐन मेंजका आ सड़ा अउर ऑंगहोल एंग्हे गने कछनखरा, “कला, एका मेर्खा पैकास समुदर नू अरा खेखेल नू इज'आ लगदस, आसी खेक्खा नू चलखका र'अना आ पुथिन हो'आ कला।”

9खने ऐन मेर्खा पैकास गुसन केरकन ती आ सन्नी पुथिन एंगा चि'आ बाचकन। अरा आस एंगन बाचस, “ओन्दा इदिन मोखा चि'आ, एकदा निंग्हे कूल गा खड़खा मनो, लिकिन निंग्हे बई नू तीनी लेक्खा तीन'ओ।”

10खने ऐन आ सन्नी पुथिन मेर्खा पैकासी खेक्खा ती होचकन ती मोक्कन, आद एंग्हे बई नू तीनी लेक्खा गा तीनचा, लिकिन नुलखकन खने एंग्हे कूल खड़खा मंजा केरा।

11फेन एंगा गे एन्ने बातारा, “नीन अउर हूँ नगदे आल खोंडहा गुट्ठी, अरा राजी गुट्ठी, अरा भखा गुट्ठी, अरा बेलर ही पत्त नू धर्मसी कत्थन मुन्द तेंगना दिम र'ई।”

दहदर मंजका कत्था 11

1फेन एंगा जिन्तो लेक्खा ओन्टा डॉंग चीरा अरा एन्ने बातारा, “चो'आ, धर्मसी मन्दिर अरा गोडहा आबोन खोया, अरा अइय्या महबा ननुरिन गन'आ।

2लिकिन मन्दिर बहरी ता चालिन अमा खोया अम्बा चि'आ, एन्दरगेका आद नन-यहूदीर गे चीतारकी र'ई, अरा आर नेम्हा नगरेन बयालीस महिना गूटी राजी ननोर।

3अरा ऐन एंग्हे दुई गोवाह आलर गे अदिया चि'ओन का आर बोरा झपर'ओर ती ओन हजार दुई सौ साठ उल्ला धर्मसी कत्थन मुन्द तेंगोर।”

4इबड़र दिम खेखेल ही उर्बासी मुन्दहारे इज'ऊ दुई गोट जैतून मन्न अरा दुई गोट बिल्ली पटनी हवे।

5अरा नेकईम आरिन सस्ती नना बेद्दनर होले, आर ही बई ती चिच्ची उरखरकी आर ही बैरीरिन बस्सी चि'ई। अरा नेकईम आरिन सस्ती नना बेद्दनर होले, आर एन्नेम खे'अना र'ई।

6ईर ताम धर्मसी कत्थन मुन्द तेंगना बेड़ा नू चेप मल पुंइय्याँ गे मेर्खा बलिन मुच्चा गे ईर गे अदिया र'ई। अरा ईर गे अम्मन खेंस कम'आ गे अदिया र'ई। अरा एकाबारी ईर ही मने बर'ओ आ बारी उर्मी लेक्खा रोगेन तइय्ना ती खेखेल नू दुक्खे चि'आ गे ईर गे अदिया र'ई।



- 7 आर तम्है गोवाह आबोन तेंगा मुंजोर खने, भयभयान खोइखा गड्डी ती मइय्याँ अरगना मेक्खो आर ही गने जुझर ओ ती आरिन जित ओ ती आरिन पिटो चि ओ।
- 8 अरा आर ही मेद कोहाँ नगरे येरुसलेम ही दोप्फा नू हेबड्की र ओ। जुक्की ती बगगे बअना ती ई नगरे सोदोम अरा मिसर बार ई। ई नगरे नू दिम ईर ही उर्बासिन क्रुस नू ठोकचकाचर।
- 9 अरा तीन उल्ला ओन बीड़ी उर्मी आल खोंइहा अरा गोतोर अरा भखा अरा राजी ता आलर ईर ही केचका मेदन ऐर ओर, अरा ईरिन माड़ा मल चि ओर।
- 10 अरा खेखेल ता रऊ आलर आर ही खेअना चड्डे रिङ्ग ओर खुसमार ओर, अरा ओर्तोर नन्नर गे सन्देस गुट्ठिन तइय्योर, एन्देरगेका इबड़ा दुयो धर्मेसी कत्था तिंगुर खेखेल ता रऊ आलारिन सताबाचका रहचर।
- 11 लिकिन तीन उल्ला ओन बीड़ी खोखा धर्मेस तरती उज्जना ही साँस आर ही नू किरिया। अरा आर तम्है खेड्डे ती इज्जर। अरा आरिन ईरु आलर ओर्मर मइय्याँ इल्चका कोरचा केरा।
- 12 फेन आर मेर्खा ती ओन्टा जोरसरिया सड़ा आर ही गने एन्ने बअना मेंजर, “इसन मइय्याँ बरा।” इदिन मेंजर ती आर तम्है बैरिरी ही ईरनुम ईरनुम बदाली नू मेर्खा अर्गियर केरर।
- 13 अरा आ बारिम ओन्टा कोहाँ खेखेल नुकुरना मंजा, अरा नगरे ही दस ती ओन भाग बिड्रिया केरा। अरा आ खेखेल नुकुरना ती सात हजार आलर केचर केरर। अरा बछ्का आलर इल्चियर केरर, अरा मेर्खा ता धर्मेसी महबा नंजर।
- 14 दोसर खिलपत कट्टिया केरा। ऐरा, तिसर खिलपत चाँइहेम बरऊ रई।
- 15 फेन सातवाँ मेर्खा पैकस पेंइहे ऊरचस खने, मेर्खा नू जोरसरिया सड़ा गुट्ठी एन्ने बाचा, “खेखेल ता राजी नम्है उर्बासी अरा आसी मसीसी राजी मंजा केरा, अरा आस हूल्लो ती हूल्लो गूटी राजी ननोस।”
- 16 फेन धर्मेसी मुन्दहारे तम्है बेल-गदिया नू उक्का चौबीस गोटा सेयान आलर मुंही पाब खत्रर ती धर्मेसी ओइ लगियर,
- 17 अरा बाचर, “ने रअदस अरा रहचस आ उर्मी ती सवंगिय धर्मे उर्बायो, ऐम निंगन धन्यवाद नन्दम, एन्देरगेका नीन निंगहै कोहाँ सवंगन होच्चकादय ती राजी नना हेलरकय।
- 18 निंगन ओइ मल ननू राजीतर कदरारर, खने निंगहै खींस बरचकी रई। अरा केचकारिन नैवई नन्ना बेड़ा अंइसकी रई। अरा निंगहै जोंखर धर्मेसी कत्था तिंगुर गे, अरा नेम्हा आलर गे, अरा



निंगहै नामेन मईन ननू सन्नी कोहाँ ओर्मर गे इनाम चि'अना बेड़ा अंडसकी रई। अरा ने खेखेलन बगड़'अनर आरिन नठाब'अना ही बेड़ा हूँ अंडसकी रई।”

19फेन मेर्खा नू र'अना धर्मेसी मन्दिर तिसगरा केरा। अरा आसी मन्दिर नू आसी गच्छरना ही बक्सा ऐथा। अरा आ बेड़ा नू लवका लौकारना गुट्ठी, अरा खरखना गुट्ठी, मुर्ना चाड़ना गुट्ठी अरा खेखेल नुक्रना मंजा, अरा कोहाँ आली खत्रा।

दहदर मंजका कथा 12

1इदही खोखा मेर्खा नू ओन्टा कोहाँ चिन्हा ऐथा। ओन्टा मुक्का बीडीन अतकी रहचा, अरा चन्दो अदही खेड्डे किड्य्या रहचा, अरा अदही कुक्कु नू बारा गोटा बीनको ही मुकुट रहचा।

2अरा आद ओत्था ऐख रहचा। अरा बेड़ा अंडसकी रहचा खने, आद खद्द नेब्बा ही नुंजना ती आद चिच्चियार'आ लगिया।

3आ बारी मेर्खा नू अउर ओन्टा चिन्हा ऐथा। ऐरा, ओन्टा नगदे कोहाँ डेना र'ऊ खेंसो नेरें रहचा। अदगे सात गोटा कुक्कु अरा दस गोटा मरग रहचा। अरा अदही कुक्कु नू सात गोटा मुकुट रहचा।

4अरा अदही खोला तीन ती ओन भाग बीनकोन मेर्खा ती नतकिया ती खेखेल नू टिड्डा चिच्चा। अरा आ कोहाँ नेरें खद्द नेब्बा बेद्दा लगिया आ आली ही मुन्दहारे इज्जा का आद खद्द नेब्बो खनेम खद्दन नुलखो चिओ।

5अरा आ आली कुक्को खद्दासिन निब्बिया, ने गोट्टा अदिया गने उर्मी बैरीरिन जीतना ती उर्मी आल खोंइहन राजी ननोस। अरा अदही खद्दस धर्मेस गुसन अरा आसी बेल-गदिया गुसन चोदतारस केरस।

6अरा आ आली गा टोडंग नू बोंगा केरा, एसन ओन हजार दुई सौ साट उल्ला अदिन पोस'आ गे धर्मेस तरती अड्डा सपड़ारकी रहचा।

7फेन मेर्खा नू लड़ाई मंजा। मिखाऐल अरा आसी पैकर डेना र'ऊ नेरें गने लड़'आ उरखर। अरा डेना र'ऊ नेरें अरा अदही पैकर आर ही गने लड़चर।

8लिकिन डेना र'ऊ नेरें अरा अदही पैकर जित'आ पोल्लर, ओंगे आर मेर्खा नू तम्है अड्डन एब्सर चिच्चर।

9अरा आ नगदे कोहाँ डेना र'ऊ नेरें किड्य्या हेबड़तारा। ईदिम गोट्टा खेखेलन ठक'ऊ नाद अरा सैतान बारना पच्चा नेरें हवे। आद खेखेल नू हेबड़तारा अरा अदही उर्मी पैकर हूँ अदही गनेम खेखेल नू हेबड़तारर।



- 10 इदही खोखा ऐन मेर्खा नू ओन्टा जोरसरिया सड़ा एन्ने ब'अना मँजकन, “अक्कु नाइना अरा सवंग अरा नम्है धर्मसी राजी अरा आसी मसीसी राजी नन्ना ही अदिया बरचकी रई, एन्देरगेका नम्है भई बहिनर मइय्याँ बदी ननुस ने उल्ला माखा नम्है धर्मसी मुन्दहारे आर ही मइय्याँ बदी नना लगियस, आस किइय्या हेबड़तारस केरस।
- 11 लिकिन आर भेंडो खद्द मसीसी खेंस ती अरा तम्है गोवाह ही कत्था ती सैतान मइय्याँ जितचर। अरा आर तम्है जिया गुट्ठिन चोन्हा मल नंजर, ई गूटी का आर खे'आ गे हूँ मल इल्चियर।
- 12 ओँगे अनय मेर्खा गुट्ठी, अरा अबड़ा नू र'उरो, रिरयार'आ। लिकिन अनय खेखेल अरा समुदर निम्है मइय्याँ ओहरे, एन्देरगेका नाद निम्है मइय्याँ इतकी बरचकी रई। आद कोइहे खींस ती निंदकी रई, एन्देरगेका आद अखई का तंगहै बेड़ा अक्कुन जुक्किम रई।”
- 13 डेना र'ऊ नेरें अक्खा का आद खेखेल नू हेबड़तारा केरा खने, ने कुक्को खद्दासिन निब्बकी रहचा आ आलिन आद खिलपत नना हेलरा।
- 14 लिकिन आ आली गे कोहाँ छछड़ा ही दुई गोटा डेना चीरा। होले आद धर्मस तंगा गे टोइंग नू सपड़ाचका अड़ा गे उढियार'ओ ती अंडसा ओँगे। असन आद नेरें ही खिलपत ती बछर'आ गे तीन बछर अरा छै चन्दो गूटी पोसतार'ओ।
- 15 खने आ नेरें आ आली ही खोखा तंगहै बई ती खाइ लेक्खा अम्मू तइय्या का आ आली बहड़ी नू बोहार'ओ क'ओ।
- 16 लिकिन खेखेल आ आली गे संगरा नंजा का खेखेल तंगहै बइय्यन चलखा ती डेना र'ऊ नेरें तंगहै बई ती तइय्की रहचा आ खाइन सुर्पिया चिच्चा।
- 17 खने डेना र'ऊ नेरें आ आलिन कयरारा, अरा अदही बछका खद्दर गने लड़'आ उरखा, एकार धर्मसी पेंसकन पेंसका ती येसुसी सिखाब'अना नू ठिमठिमने र'अनर।
- 18 इदही खोखा आ डेना र'ऊ नेरें समुदर ही पिंडी नू इज्जा केरा।

दहदर मंजका कत्था 13

1 इदही खोखा ऐन ओन्टा मेक्खोन समुदर ती उरखना ईरकन। अदगे दस गोटा मरग अरा सात गोटा कुक्कु रहचा, अरा अदही मरग गुट्ठी नू दस गोटा मुकुट रहचा, अरा उर्मी कुक्कु नू धर्मसिन हींइना नामे लिखकी रहचा।



- 2अरा ऐन ईरका आ मेक्खो बघवा लेक्खा रहचा, अरा अदही खेड्डे मेडहो ही खेड्डे लेक्खा रहचा, अरा अदही बई लकड़ा ही बई लेक्खा रहचा। अरा आ डेना र'ऊ नेरें तंगहै सवंगन अरा तंगहै बेल-गदियन अरा तंगहै कोहाँ अदियन आ मेक्खो गे चिच्चा।
- 3अरा ऐन अदही ओन्टा कुक्कु नू खे'अना लेक्खा कोहाँ जखम ईरकन, लिकिन आ कोहाँ जखम कोड़े मन्तारा केरा। अरा सौंसे खेखेल ता आलर अनचकरर ती अदही गने गुड़ियारर।
- 4अरा आ डेना र'ऊ नेरें आ मेक्खो गे अदिया चिच्चा ती आलर आ डेना र'ऊ नेरें महबा नंजर। अरा आर आ मेक्खोन हूँ महबा नंजर ती एन्ने बाचर, “ई मेक्खो ही लेक्खा ने र'अस? अरा इदही गने ने लड़'आ ओंगदस?”
- 5अरा आ मेक्खो गे फुलई ही कत्था गुट्ठिन अरा धर्मसिन हींइना ही कत्था गुट्ठिन ब'आ गे ओन्टा बई चीरा। अरा अदगे बियालीस चन्दो गूटी इन्द्रिइम नना गे अदिया चीरा।
- 6अरा आद धर्मसी बिड़दो नू हींइना कत्था गुट्ठिन ब'आ गे तंगहै बड़यन चलखा। आद आसी नामेन, अरा आसी ओक्रना अड्डन, अरा मेर्खा नू ओक्रना आलारिन हींइ'आ हेलरा।
- 7अरा अदगे नेम्हा आलर गने लड़'आ ती जित'आ गे अदिया चीरा। अरा उर्मी गोतोर अरा आल खोंइहा अरा भखा अरा राजी ही मइय्याँ हूँ अदगे अदिया चीरा।
- 8अरा खेखेल ही गढ़ना बेड़ा तिम पिटतारकी र'ई आ भेंडो खद्द मसीसी उज्जना ही पुथी नू नामे मल्ला लिखका खेखेल नू ओक्रना ओर्मा आलर आ मेक्खोन महबा ननोर।
- 9नेखअय मेना गे खेबदा र'ई आस मेन्दस ती बुझुरदस नेकअन।
- 10नेकईम गुडरना र'ई होले, आस गुडर'ओस दिम। नेकईम तलवार ती पिटरना र'ई होले, आस तलवार ती पिटतार'ओस दिम। इदही मने ईद हिके का, नेम्हा आलर खिलपत आबोन खतिर गने सहना ती पत'अना नू जिटजिटने र'अना र'ई।
- 11इदही खोखा ऐन अउर ओन्टा मेक्खोन खेखेल ती उरखना ईरकन। अदगे भेंडो खद्द ही मरग लेक्खा दुई गोटा मरग रहचा। लिकिन आद ओन्टा डेना र'ऊ नेरें ही लेक्खा कछनख'आ लगिया।
- 12अरा ईद मुन्द ता मेक्खो ही उर्मी अदियन अदही मुन्दहारे नलख नू ओन्ना। अरा ईद खे'अना लेक्खा कोहाँ जखम ती कोड़े मंज खच्चका आ मुन्द ता मेक्खोन खेखेल अरा अइय्या ओक्रना आलर अदिन महबा नना गे नंजा।
- 13अरा ई दुसर मेक्खो कोहाँ कोहाँ अजगुत नलख गुट्ठिन नंजा। ईद आलर ही ईरनुम मेर्खा ती चिच्ची खेखेल नू खत्रताचा।



- 14 अरा ईद मुन्द ता मेक्खो ही मुन्दहारे ई अजगुत नलख गुट्ठिन नना गे तंगा चीरका अदिया ती खेखेल नू ओक्रना आलारिन ठकचा। अरा ईद तलवार ती जखम खकखका ती अक्कु गूटी उज्जना आ मुन्द ता मेक्खो गे ओन्टा मूर्ती कम'आ गे खेखेल नू ओक्रना आलारिन आनिया।
- 15 अरा ई दुसर मेक्खो गे आ मुन्द ता मेक्खो ही मूर्ती गे साँस चि'आ गे सवंग चीरा का, आ मेक्खो ही मूर्ती कछनख'ओ, अरा एवँदा आलर आ मेक्खो ही मूर्तिन महबा मल ननोर आरिन पिटत'ओ चि'ओ।
- 16 अरा आ दुसर मेक्खो सन्नी अरा कोहाँ, उरुब अरा कीड़ा, छछिन्द अरा बिट्ठी ननू जौख ओर्मर ही तीना खेक्खा मलता कपड़े नू ओन्टा मरका नन्त'आ गे बड़पेलहा नंजा।
- 17 अरा आ पहिल मेक्खो ही नामे मलता आ नामे ही गनती ही मरकन ने ने लग्गनर, आरिन अम्बरकी ने हूँ खेन्दा पिटा पोल्लोर।
- 18 इदन बुझ'आ गे लूर ही चाड़ र'ई। नेका लूर र'ई आस ई मेक्खो ही गनतिन बेद्द ऐरोस नेकअन, एन्देरगेका आद आलासी गनती दिम हवे। अरा अदही गनती छै सौ छियासट हवे

दहदर मंजका कत्था 14

- 1 इदही खोखा ऐन ईरकन खने, ऐरा, भेंडो खद्द मसीस सीयोन परता नू इज'आ लगियस, अरा आसी गने ओन लाक चौवालीस हजार आलर रहचर, नेख'आ कपड़े नू आसी नामे अरा तम्बासी नामे लिखकी रहचा।
- 2 आ बारी ऐन मेर्खा ती ओन्टा सड़न मँजकन। आद कोड़हे बग्गे अम्मु बाहना ही खरखना अरा जोर मुरना ही खरखना लेक्खा रहचा। अरा ऐन मँजका सड़ा तमुरा अस्सुर तम्है तमुरन अस्सना ती बरना खरखना लेक्खा रहचा।
- 3 अरा आर बेल-गदिया ही मुन्दहारे अरा चरियो उज्जना आलो ही मुन्दहारे अरा सेयान आलर ही मुन्दहारे ओन्टा पुना डंडी पाड़ा लगियर। अरा खेखेल ती नाइरका ओन लाक चौवालीस हजार आलारिन अम्बर ने हूँ आ डंडीन सिख'आ पोल्ला लगियर।
- 4 ईर मुक्कर ती तमन सोतरा मल मंजकर हिकनर, अरा डिंडर हिकनर। ईर भेंडो खद्द मसीस एसन एसन कालदस असन असन आसी गने गुड़ियार'ऊ हिकनर। ईर धर्मस गे अरा भेंडो खद्द मसीस गे आलर ती नाइरका पहिल खंजपा लेक्खा र'अनर।
- 5 अरा ईर ही बई ती कहियोँ ठकवा कत्था मल उरखकी रहचा। ईर बिगर बदी ही हिकनर।



- 6इदही खोखा ऐन अउर ओन्टा मेर्खा पैकासिन मझी मेर्खा नू उढियारना ईरकन। आसी गुसन खेखेल नू रऊ उर्मी राजी अरा गोतोर अरा भखा अरा आल खोंडहा ता आलर गे मेन्त'आ गे जनमजुग ही दौ कत्था रहचा।
- 7अरा आस जोरसरिया सड़ा ती एन्ने बाचस, “धर्मेसिन एल्चा, अरा आसिन महबा नना, एन्देरगेका आसी नेंवई नन्ना ही बेड़ा अंडसकी रई। अरा ने मेर्खन अरा खेखलन अरा समुदरन अरा अम्मू ही पझरा गुट्ठिन कमचस, आसिन महबा नना।”
- 8फेन अउर ओन्टा मेर्खा पैकस पहिल मेर्खा पैकासी खोखा खोखा बरचस ती एन्ने बाचस, “बिड्रिया केरा! आ कोहाँ नगरे बाबुलोन बिड्रिया केरा! एकाद तंग्हे पेहरन ही सोतरा नलख ही फुली अरखिन उर्मी राजी ता आलारिन ओन्ताचकी रई।”
- 9फेन अउरिम ओन्टा मेर्खा पैकस पहिल दुई मेर्खा पैकर ही खोखा खोखा बरचस ती जोरसरिया सड़ा ती एन्ने बाचस, “नीकईम आ मेक्खो अरा अदही मूर्तिन महबा नन्दस ती तंग्हे कपड़े मलता खेक्खा नू आ मेक्खो ही मरकन हो'अदस होले,
- 10धर्मेस आसी मइय्याँ कोइहे कैर मनोस ती बग्गे दंडे चि'ओस। अरा आस नेम्हा मेर्खा पैकर ही मुन्दहारे अरा भेंडो खदद मसीसी मुन्दहारे चिच्ची अरा गन्धक ही डाहरनन भोग'ओस।
- 11अरा आर ही डाहरना ही कुहड़ा हुल्लो ती हुल्लो गूटी मइय्याँ चो'अना बारी रई। अरा ने आ मेक्खो अरा अदही मूर्ती ही महबा नन्नर, अरा ने अदही नामे ही मरकन हो'अनर, आर गे उल्ला अरा माखा सल्ल मल खक्ख'ओ।”
- 12इदही मने ईद हिके का धर्मेसी पेसका गुट्ठिन पेसका ती येसुसी मइय्याँ ता पत्त'अना नू ठिमठिमने रऊ नेम्हा आलर खतिर गने सहना रई।
- 13फेन ऐन मेर्खा ती ओन्टा सड़ा एन्ने ब'अना मेंजकन, “इदन लिख'आ चि'आ, ने उर्बस नू खे'अनर आर अक्कु ती आसीस खक्खू र'अनर।” नेम्हा बोलतस बाचस, “हाँ, आर तम्है अर्ज'अना ती खन्न ऐखोर, एन्देरगेका धर्मेस मानिम नू आर ही दौ नलख गुट्ठी गे इनाम चि'ओस।”
- 14इदही खोखा ऐन ईरकन खने, ऐरा, ओन्टा पंडरु बदाली अरा आ बदाली नू मनवा खददस लेक्खा ओर्तोस उक्का ईरकन। आसी कुक्कु नू सोना ही मुकुट अरा आसी खेक्खा नू धारे ताँतर रहचा।
- 15फेन अउर ओन्टा मेर्खा पैकस मन्दिर ती उरखस ती ने बदाली नू उक्काचस आसिन जोरसरिया सड़ा ती चिच्चियारनुम बाचस, “खेखेल ही खोयना पंज खच्चकी रई, खोयना ही बेड़ा अंडसकी रई, औंगे निंग्हे ताँतरन हो'अरकी खोया।”



16 औंगे ने बदाली नू उक्काचस आस तंग्हे ताँतरन खेखेल मइय्याँ लमा बाचस, खने खेखेल खोयरा केरा।

17 फेन अउर ओन्टा मेर्खा पैकस मेर्खा ता मन्दिर ती उरखस। आस हूँ ओन्टा धारे ताँतर धरचका रहचस।

18 अरा अउर ओन्टा मेर्खा पैकस गोड़हा ती उरखस। आस गे चिच्ची मइय्याँ अदिया रहचा। आस ने धारे ताँतरन धरचका रहचस आसिन जोरसरिया सड़ा ती बाचस, “खेखेल ही अंगुर खंजपा पंज खच्चका ती खोयना गे सपड़ारकी रई। औंगे निंग्हे धारे ताँतरन होअरकी खेखेल ही अंगुर खंजपा ही झोता गुट्ठिन खंडा चिआ।”

19 खने आ मेर्खा पैकस तंग्हे ताँतरन खेखेल मइय्याँ लमा बाचस ती खेखेल ही अंगुर खंजपा ही झोता गुट्ठिन खंडियस ती धर्मेसी कोड़हे खीस ही अंगुर रासी ही कोहाँ कुंडा नू सज्जस चिच्चस।

20 अबड़ा अंगुर नगरे ही बहरी ता रासी कुंडा नू पीखतारा, अरा कुंडा ही बहरी बहड़ी लेक्खा खेंस उरखा ती घोड़ो गुट्ठी ही लगाम गूटी मेच्छा अंडसिया ती तीन सौ किलो मीट्टर गेच्छा गूटी बाहचा।

दहदर मंजका कत्था 15

1 इदही खोखा ऐन मेर्खा नू अउर ओन्टा कोहाँ अरा अजगुत चिन्हन ईरकन। सात गोटा मेर्खा पैकर सात गोटा सस्ती गने इज्जर। इबड़ा छेद्दे सस्ती हवे, एन्दरगेका इबड़ा ही मंजका ती धर्मेसी कोड़हे खीस मुंजुरओ कओ।

2 अरा ऐन चिच्ची गने मेसका काँच ही समुदर लेक्खा ओन्टन, अरा ने आ मेक्खो अरा अदही मूर्ती अरा अदही नामे ही गनती आबोन जित्तचका रहचर आरिन ईरकन। आर आ काँच ही समुदर गुसन धर्मेसी तमा गे चिच्का तमुरा गुट्ठिन धरचका ती इजआ लगियर।

3 अरा आर धर्मेसी जोंखस मूसासी डंडीन अरा भेंडो खद्द मसीसी डंडीन पाड़ियर, “अना उर्मी ती सवंगिय धर्मे उर्बायो, निंग्हे नलख गुट्ठी कोहाँ अरा अजगुत रई। जुग गुट्ठी ही बेलायो, निंग्हे डहरे गुट्ठी उजगो अरा मानिम रई।

4 अना उर्बायो, निंग्हे ती ने मल एल्चो? अरा ने निंग्हे नामे ही महबा मल ननो? एन्दरगेका नीन ओर्त लेका नेम्हा रअदय। उर्मी राजी बरओ ती निंग्हे मुन्दहारे ओड़ लग्गो, एन्दरगेका निंग्हे उजगो ही नलख गुट्ठी दहदर मंजकी किरकी रई।”

5 इबड़ा कत्था ही खोखा ऐन ईरकन खने, मेर्खा नू मन्दिर गोवाह ही नेम्हा कुमबा गने तिसगरका रहचा।



6अरा सात गोटा सस्तिन उइय्का सात गोटा मेर्खा पैकर मन्दिर ती उरखर। आर सफा अरा बिलचना पेलपेले किचरी अतका ती एवंख नू सोना ही गतला हेंचका रहचर।

7आ बारी अबड़ा चरियो उज्जना आलो ती ओन्टा अबड़ा सतियो मेर्खा पैकर गे हुल्लो ती हुल्लो गूटी उज्ज धर्मेसी कोइहे खींस ती निंदका सात गोटा सोना ही डुबहन चिच्चर।

8अरा धर्मेसी महबा अरा सवंग ती मन्दिर कुहड़ा ती निंदिया केरा। अरा अबड़ा सतियो मेर्खा पैकर ही सतियो सस्ती ही अरगी मुंजुरना गूटी ने हूँ मन्दिर नू कोर'आ पोल्लर।

दहदर मंजका कत्था 16

1इदही खोखा ऐन मन्दिर ती ओन्टा जोरसरिया सड़ा अबड़ा सतियो मेर्खा पैकारिन एन्ने ब'अना मेंजकन, “कला, धर्मेसी खींस ही सतियो डुबहन खेखेल नू तुन्दा चि'आ।”

2खने पहिल मेर्खा पैकस केरस ती तंग्हे डुबहन खेखेल नू तुन्दियस चिच्चस। खने नेख'आ मइय्याँ मेक्खो ही मरका लक्की रहचा अरा ने अदही मूर्तिन ओइ नंजर आर ही मइय्याँ घिनघिना नुंजना फूड़ी गुट्ठी उरखा।

3फेन दुसर मेर्खा पैकस तंग्हे डुबहन समुदर नू तुन्दियस चिच्चस। खने समुदर केचकर ही खेंस लेक्खा मंजा केरा, अरा समुदर ता उर्मी उज्जना आलो केचा केरा।

4फेन तिसर मेर्खा पैकस तंग्हे डुबहन खाइ गुट्ठी नू अरा अम्मु ही पझरा गुट्ठी नू तुन्दिसय चिच्चस। खने अबड़ा खेंसो मंजा केरा।

5फेन ऐन ओर्मा अम्मु ही मइय्याँ अदिया उइय्यू मेर्खा पैकासिन एन्ने ब'अना मेंजकन, “अना नेम्हाय, अरा ने र'अदय, अरा ने रहचकय, नीन उजगो हिकदय, एन्देरगेका नीन एन्ने लेक्खा इबड़ा नेंवई गुट्ठिन तइय्कादय।

6ईर निंग्हे नेम्हा आलर अरा धर्मेसी कत्था तिगुर ही खेंसन बाहताचर, औंगे नीन आरिन खेंसन ओन्ताचकय। आर तम्हें नंजका ही डंडे भोग'आ लगनर।”

7फेन ऐन गोइहा ती एन्ने आनाकिर्त'अनन मेंजकन, “हाँ, अना उर्मी ती सवंगिय धर्मे उर्बायो, निंग्हे नेंवई गुट्ठी मानी अरा उजगो र'ई।”

8फेन चौथा मेर्खा पैकस तंग्हे डुबहन बीड़ी नू तुन्दियस चिच्चस। खने बीड़ी गे आलारिन चिच्ची ती ओलत'आ चि'आ गे अदिया चीरा।



- 9 खने आलर कोइहे बिइना झोला ती झोलरर केरर। अन्नु हूँ आर इबड़ा सस्ती गुट्ठी ही मइय्याँ अदिया उइय्यू धर्मसी नामेन हींइचर, अरा आर जियन मल किर्ताचर अरा आसिन महबा मल नंजर।
- 10 फेन पाँचवा मेर्खा पैकस तंग्हे डुबहन आ मेक्खो ही बेल-गदिया नू तुन्दियस चिच्चस। खने अदही राजी ऊखा मंजा केरा, अरा आलर डाहरना ती तम्है ततखन चबर'आ हेलरर।
- 11 अरा तम्है डाहरना गुट्ठी अरा फूड़ी गुट्ठी ही चड्डे मेर्खा ता धर्मसिन हींइचर, अरा तम्है नंजका मलदौ नलख गुट्ठिन अम्बना ती धर्मस तरा मल किरियर।
- 12 फेन छठवा मेर्खा पैकस तंग्हे डुबहन युफराटेस कोहाँ खाड़ नू तुन्दियस चिच्चस। खने पुरुब तरती बरना बेलर गे डहरे सपड़ारत'आ गे अइय्या ता अम्मु बतिया केरा।
- 13 फेन ऐन आ डेना र'ऊ नेरें ही बई ती, अरा आ मेक्खो ही बई ती, अरा ठकवा धर्मसी कत्था तिंगुसी बई ती मूखा लेक्खा तीन गोटा मलदौ बोलतन उरखना ईरकन।
- 14 इबड़ा अजगुत नलख गुट्ठी ही चिन्हा ईद'ऊ नाद ही बोलता गुट्ठी हवे। इबड़ा उर्मी ती सवंगिय धर्मसी कोहाँ उल्ला नू मन्ना लइई गे सौंसे खेखेल ता बेलारिन खोजा गे कई।
- 15 उर्बस ब'अदस, “ऐरा, ऐन खलबर लेक्खा आचका बरदन। ने एज्जका र'अदस, अरा तंग्हे किचरी कुट्ठिन अतका र'अदस का लंगड़ा अम्बोस कुद्दा, अरा आलर आसिन लंगड़ा अम्बोर ऐरा, आस आसीस खक्ख'ऊ र'अदस।”
- 16 फेन अबड़ा मलदौ बोलता बेलारिन इब्रानी भखा नू हरमगेदोन बारना अड्डा नू खोंइचा।
- 17 फेन सातवाँ मेर्खा पैकस तंग्हे डुबहन ताका नू तुन्दियस चिच्चस। खने मन्दिर नू ती बेल-गदिया ती ओन्टा जोरसरिया गड्डी सड़ा एन्ने बाचा, “मंजा केरा।”
- 18 तहाँ लवका लौकारना गुट्ठी, अरा खरखना गुट्ठी, मुर्ना चाइना गुट्ठी अरा कोहाँ खेखेल नुक्रना मंजा। इकला खेखेल मइय्याँ आलर ही गद्दना मंजा अउला ती एन्ने खेखेल नुक्रना इकला हूँ मल मंजकी रहचा। ई लेक्खा ई खेखेल नुक्रना नगदे कोहाँ रहचा।
- 19 अरा कोहाँ नगरे बाबुलोन तीन भाग मंजा केरा, अरा राजी गुट्ठी ही नगरे गुट्ठी खतरा केरा। अरा कोहाँ बाबुलोन नगरे मइय्याँ ता धर्मसी कोइहे कैर ती आस अदगे नगदे दंडे चि'आ गे धर्मसी मुन्दहारे सुरता नन्तारा केरा।
- 20 अरा उर्मी टापू गुट्ठी गुच्छरा केरा, अरा परता गुट्ठी छप मंजा केरा।



21 अरा मेर्खा ती आलर ही मइय्याँ कोहाँ आली खत्रा। ओन्टा ओन्टा आली पखना मलागूटी पचास किलो ओत्था रहचा। अरा आ आली ही सस्ती ही चड्डे आलर धर्मसिन हींइचर, एन्देरगेका ई सस्ती नगदे कोहाँ रहचा।

दहदर मंजका कत्था 17

1 फेन एका सतियो मेर्खा पैकर गुसन सात गोटा सोना ही डुबहा रहचा, अबडर ती ओर्तोस बरचस ती एंगन एन्ने बाचस, “बरा, ऐन बग्गे अम्मू गुट्ठी नू उक्का र'अना आ कोहाँ बेस्वा गे खक्खना डंडेन ऐद'ओन चि'ओन।

2 खेखेल ता बेलर अदही गने पेहरन ही सोतरा नलख नंजर, अरा खेखेल ता र'ऊ उर्मी आलर अदही पेहरन ही सोतरा नलख ही अरखी ती उंखियर केरर।”

3 इदही खोखा नेम्हा बोलतस एंगन तंग्हे आकुस नू नंजस, अरा आ मेर्खा पैकस एंगन टोडंग तरा होच्चस। अरा असन ऐन ओन्टा आलिन ओन्टा खेंसो मेक्खो नू उक्का ईरकन। आ मेक्खो ही गोटा मेद नू धर्मसी हींइना कत्था गुट्ठी लिखकी रहचा। अरा अदही सात गोटा कुक्कु अरा दस गोटा मरग रहचा।

4 अरा आ आली भेटांगो ऐखर'आ अरा खेंसो किचरी कूरकी रहचा। अरा आद सोना ती अरा मड़ी पखना गुट्ठी ती अरा मोती गुट्ठी ती सिंगरारकी रहचा। अरा आद तंग्हे खेक्खा नू ओन्टा सोना ही डुबहा धरचकी रहचा। आ डुबहा घिनघिना नलख गुट्ठी ती अरा अदही पेहरन ही सोतरा नलख ही मलदौ गुट्ठी ती निंदकी रहचा।

5 अरा अदही कपड़े नू ओन्टा गम ही नामे लिखकी रहचा, “कोहाँ बाबुलोन! बेस्वार अरा खेखेल ता उर्मी घिनघिना नलख गुट्ठी ही तंगियो।”

6 अरा आ आली नेम्हा आलर ही खेंस ती अरा येसुसी गोवाह आलर ही खेंस ती उंखका ईरकन। अरा ऐन अदिन ईरकन खने, कोइहे अनचकरकन केरकन।

7 खने आ मेर्खा पैकस एंगन बाचस, “नीन एन्देरगे अनचकरकय? ई आली ही अरा ईद उक्का र'अना आ सात गोटा कुक्कु अरा दस गोटा मरग र'अना मेक्खो ही गम आबोन तेंगोन।

8 एका मेक्खोन नीन ईरका र'अदय, आद गा मुन्द रहचा, लिकिन अक्कु मल्ला। अन्नु हूँ आद भयभयान खोइखा गड्डी ती मइय्याँ अरगू र'ई, फेन आद नठार'ओ कालो। अरा खेखेल ता र'ऊ आलर, नेख'आ नामे खेखेल गढ़ना ही बेड़ा ती उज्जना ही पुथी नू नामे मल लिखकी र'ई, आर ई मेक्खो ही दसन ऐरोर ती हैकट मनोर, एन्देरगेका आद मुन्द रहचा, अरा अक्कु मलकी, अरा अउरिम बर'ओ।



- 9इदिन बुझा आ गे लूर रऊ जिया ही चाइ रई। अबड़ा सतियो कुक्कु सात गोटा परता हवे, एकइय्या आ आली उक्की रई। अरा अबड़ा सतियो बेलर हूँ हवे।
- 10अबड़र नू ती पाँच बेलर नठार खच्चिका र'अनर, अरा ओर्तोस अक्कु र'अस, अरा ओर्तोस अक्कु गूटी अरगस बर'आ। अरा आस बरदस खने, जोक्क बेड़ा लेका राजी ननोस।
- 11अरा मुन्द रहचा अरा अक्कु मलकी आ मेक्खो दिम आठवा बेलस हवे। अन्नु हूँ आस अबड़ा सतियो बेलर ती ओर्तोस हिकदस, अरा आस नठार'ओस।
- 12एका दस गोटा मरग आबोन नीन ईरकय, अबड़ा दस बेलर हवे। आर अक्कु गूटी राजी मल खक्खयर। लिकिन आर आ मेक्खो गने ओन घड़ी गे बेलर ही लेखा अदिया खक्खोर।
- 13इबड़ा ओर्मा बेलर ओन्टा सोच नू र'ओर, अरा तम्है सवंग अरा अदिया आबोन आ मेक्खो गे चि'ओर।
- 14इबड़र भेंडो खद्द मसीस गने लड़ई ननोर। लिकिन भेंडो खद्द मसीस अरा आसी गने गुड़ियार'उर आरिन जित'ओर। एन्देरगेका भेंडो खद्द मसीस उर्बर ही उर्बस अरा बेलर ही बेलस हिकदस। अरा आसी गने गुड़ियार'उर धर्मस ती मेक्खका अरा चज्रका अरा पत'ऊ आलर हिकनर।”
- 15फेन आस एंगन बाचस, “एका अम्मु गुट्ठी नू आ बेस्वा उक्का ईरकय, अबड़ा आल खोंइहा गुट्ठी, अरा गोंहड़ा गुट्ठी, अरा राजी गुट्ठी, अरा भखा गुट्ठी हवे।
- 16अरा आ मेक्खो अरा एका दस मरग आबोन नीन ईरकय, अबड़ा आ बेस्वन खोंइ'ओ। अरा अबड़ा अदिन लंगड़ी ननो ती लज्जे मोखत'ओ। अरा अबड़ा अदही अहड़न मोखो अरा अदिन चिच्ची नू बस्सो चि'ओ।
- 17एन्देरगेका धर्मस तंगहै मनेन पूरा नना गे ई सोच आबोन आर ही जिया नू चिच्चस। औंगेम आर ओर्मर तम्है राजी नन्ना ही अदियन आ मेक्खो गे चि'आ गे मन्चर। धर्मसी कत्था गुट्ठी पूरा मन्ना गूटी आर ही गच्छरना एन्ने र'ओ।
- 18एका आलिन नीन ईरकय, आद कोहाँ नगरे हवे, एकाद खेखेल ता बेलर मइय्याँ राजी ननी।”

दहदर मंजका कत्था 18

- 1इबड़ा कत्था ही खोखा ऐन अउर ओन्टा मेर्खा पैकासिन मेर्खा ती एतना ईरकन। आस गे कोइहे अदिया रहचा, अरा आसी बिल्चना ती खेखेल बिल्चिया केरा।
- 2अरा आस जोरसरिया गड्डी सड़ा ती एन्ने बाचस, “कोहाँ नगरे बाबुलोन खतरा केरा! खतरा केरा! आद नाद गुट्ठी ही डेरा, अरा उर्मी मलदौ बोलता गुट्ठी ही र'अना अइडा मंजा केरा। अरा उर्मी



रकम ही मलदौ ओड़ा ही खोता मंजा केरा। अरा उर्मी रकम ही मलदौ अरा घिनघिना मेक्खो ही मड़ा मंजा केरा।

3 एन्देरगेका अदही पेहरन ही सोतरा नलख ही चिबाखारना ही अरखी ती उर्मी राजीतर ऊंखकानर। अरा खेखेल ता बेलर अदही गने पेहरन ही सोतरा नलख नंजर। अरा खेखेल ता खीन्दु-बीसुर अदही सुख-सौरत ही कोड़हे चड्डे उरुब मंजर केरर।”

4 फेन ऐन मेर्खा ती अउर ओन्टा सड़ा एन्ने ब'अना मँजकन, “अना एंग्हे आलारो, आद ती उरखा बरा, होले नीम अदही पाप गुट्ठी नू मल मेस'ओर, अरा अदही मइय्याँ बरना सस्ती निम्है मइय्याँ मल बर'ओ।

5 एन्देरगेका अदही पाप गुट्ठी मेर्खा गूटी अंडिसिया केरा, अरा धर्मस अदही गुन्हा गुट्ठिन सुरता नंजस।

6 आद एकासे नन्नर गे किर्त'अर चिच्चा अन्नेम नीम अदगे किर्त'अर चि'आ। अरा अदही नंजका मलदौ नलख गुट्ठी ही लेक्खा अदगे दुई गुना किर्त'अर नना। अरा आद एकासे नन्नारिन ओन्ताचा अन्ने नीम अदही डुबहा नू दुई गुना निन्द'आ ती अदिन ओन्त'आ चि'आ।

7 एवंदा आद तंगन मईन नंजा ती सुख-सौरत गने उज्जकी र'ई, औंदम अदगे डाहरना अरा खोदखरना चि'आ, एन्देरगेका आद तंग्हे जिया नू ब'ई, 'ऐन बेलनी मंजकी र'एन, ऐन रड़ियाही मल्लेन, खोदखरना नू इकला हूँ मल खत्र'ओन।’

8 औंगे उन्दुल नुम खे'अना अरा खोदखोरना अरा कीड़ा ही सस्ती अदही मइय्याँ अंडसा खचो, आद चिच्ची नू बस्'ओ कालो। एन्देरगेका अदिन नैवई ननू धर्म उर्बस सवंगियस र'अस।”

9 फेन खेखेल ता बेलर ने अदही गने पेहरन ही सोतरा नलख नंजका ती सुख-सौरत उज्जना उज्जियर, इकला आर अदही ओलना ही कुहड़न ऐरोर, आर अदगे चींखोर अरा कोड़र'ओर।

10 अरा आर अदही सस्ती ही इल्चिक'आ ती गेच्छम इज'ओर ती ब'ओर, “अनय कोहाँ नगरे बाबुलोन, अनय बड़ियर नगरे बोख! बोख! इकिम घड़ी निंग्हे मइय्याँ नठारना बरचा केरा।”

11 अरा खेखेल ता खीन्दु-बीसुर अदगे चींखोर, ओलखोर, एन्देरगेका आर ही जिनिसन अक्कु ती ने हूँ मल खेन्दोर।

12 आद आर ही ती सोना, चाँदी, अरा कोड़हे दाम ही पखना गुट्ठिन, अरा मोहोर गुट्ठिन, लेपलेपे अरा लील खेंसो अरा जोरजोरआ अरा खेंसो किचरिन, अरा उर्मी रकम ही महमहरना कंकन, अरा हथी खिसा ती कमचका उर्मी रकम ही आलोन, अरा बग्गे दाम ही कंकन अरा पितल अरा पन्ना अरा नेता पखना ही उर्मी रकम ही संजगिन,



- 13 दालचीनी, अरा महकारना जिनिस् गुट्ठिन, धूप, गन्धरस, लोबान, अंगुर रासी, इसुंग, दौ गुंडा, गहूँ, अड्डो अरा भेंडो गुट्ठिन, घोड़ो अरा रन्थ गुट्ठिन, जौखर अरा बिट्ठी ननू जौखर ही उज्जना गुट्ठिन हूँ खीन्दकी रहचा।
- 14 अरा अबड़ा खीन्दु-बीसुर अदिन ब'ओर, “अनय बाबुलोन! निंगहै जिया पत्तारना खंजपा निंगहै गुस्ते किरिम बिचकी रई, अरा निंगहै उर्मी सुख-सौरत अरा फबना निंगहै गुस्ते नठारा केरा, अरा अबड़ा निंगा इकला हूँ अउर मल खक्ख'ओ।”
- 15 आ नगरे गने खीन्दका-पिटका ती उरुब मंजका इबड़ा आलो ही खीन्दु-बीसुर अदही सस्ती ही इल्चिक'आ ती गेच्छम इज'ओर ती चींखनुम ओलखनुम ब'ओर,
- 16 “ओख! ओख! अनय कोहाँ नगरे बाबुलोन! एकाद लेपलेपे अरा लील खेंसो अरा खेंसो किचरी कूरकी रहचा, अरा सोना अरा कोइहे दाम ही पखना अरा मोहर गुट्ठी ती झबरारकी रहचा।
- 17 इकिम घड़ी नू ई लेक्खा कोहाँ खुर्जी नठारा केरा।” कोहाँ डोंगा चलाब'उर ओर्मर, अरा कोहाँ डोंगा नू कट्टुर ओर्मर, अरा कोहाँ डोंगा नू नलख ननू ओर्मर, समुदर नू खीन्दू-बीसू ओर्मर गेच्छम इज्जका र'ओर।
- 18 अरा अदही ओलना ही कुहइन ईरका ती जोरसरिया चिच्चियार'ओर ती ब'ओर, “एका नगरे ई कोहाँ नगरे लेक्खा रई?”
- 19 अरा अबड़र रीडोन तम्है तम्है कुक्कु नू तप'आ ननोर ती चींखनुम खोबरारनुम जोरसरिया चिच्चियार'ओर ती ब'ओर, “ओख! ओख! अनय कोहाँ नगरे बाबुलोन! कोहाँ डोंगा उर्बर ओर्मर इदही खुर्जी ती दिम उरुब मंजकाचर। इकिम घड़ी नू ई लेक्खा ईद नठारा केरा।
- 20 अनय मेर्खा ता आलो, अना नेम्हा आलारो अरा तइरकारो अरा धर्मसी कत्था तिंगुरो! इदही नठारना ही चड्डे रिरयार'आ, एन्देरगेका आद एकासे निम्हा गने नंजा अन्नेम धर्मस अदिन नैवई नंजकादस”
- 21 फेन ओन्टा सवंगिय मेर्खा पैकस ओन्टा कोहाँ जता ही लेक्खा ओन्टा पखनन चौदस ती समुदर नू हिबिडयस ती एन्ने बाचस, “कोहाँ नगरे बाबुलोन एन्नेम कोहाँ सवंग ती खत्रतार'ओ, अरा आद अक्कु ती इकला हूँ मल खक्ख'ओ।
- 22 अस्सु आलर, अरा तमुरा अस्सुर, अरा बंसरी ऊर'उर, अरा पेंइहे ऊर'उर ही खरखना अक्कु ती इकला हूँ निंगहै नू मल मेन्द्र'ओ। अरा एकअम नलखन ननुस निंगहै नू अक्कु ती इकला हूँ मल खक्ख'ओस। अरा जता खरखना ही सड़ा निंगहै नू अक्कु ती इकला हूँ मल मेन्द्र'ओ।



23 अरा बिल्ली निंगहै मइय्याँ अक्कु ती इकला हूँ मल रफओ। बेंजा जौख अरा बेंजा पेल्लो ही सड़ा निंगहै नू अक्कु ती इकला हूँ मल मेन्द्रओ। निंगहै खीन्दु-बीसुर दिम खेखेल ता कोहाँ आलर रहचर। अरा निंगहै देवड़ा नन्ना ती उर्मी जाती ता आलर बेड़ारका रहचर।

24 अरा धर्मसी कत्था तिंगुर ही खेंस, अरा नेम्हा आलर ही खेंस, अरा खेखेल नू पिटरका ओर्मर ही खेंस अइय्यम खक्खरा।”

दहदर मंजका कत्था 19

1 इबड़ा कत्था गुट्ठी ही खोखा ऐन मेर्खा नू ओन्टा कोहाँ आल गोंहड़ा ही चिच्चियारना लेक्खा ओन्टा सड़न मँजकन। आद एन्ने बाचा का, “हल्लेलुया! नाइरना अरा महबा अरा सवंग नम्है धर्मसी दिम हिके।

2 एन्देरगेका आसी नेंवई नन्ना गुट्ठी मानिम अरा उजगो रई। तंगहै पेहरन ही सोतरा नलख ती खेखेल ता आलारिन नठाबाचका कोइहे बेस्वा लेक्खा कोहाँ मलदौ नगरे गे आस दंडे ही नेंवई चिच्चस, अरा अदगे तंगहै जौखर ही बहाबाचका खेंस ही बदली किर्ताचस।”

3 फेन दोसर खेप आर चिच्चियारर, “हल्लेलुया! अदही ओलना ही कुहड़ा हुल्लो ती हुल्लो गूटी मइय्याँ चोअना बारी रओ।”

4 इदही खोखा चौबीस सेयान आलर अरा चरियो उज्जना आलो बेल-गदिया नू उक्का धर्मसी मुन्दहारे खेडमूली खत्रर ती आसिन ओइ लग्गियर। अरा आर बाचर, “आमेन, हल्लेलुया।”

5 फेन बेल-गदिया ती ओन्टा सड़ा मेन्द्रा, “अना धर्मसी जौखारो अरा आसी इल्चू आलारो, सन्नीर कोहँर नीम ओर्मर नम्है धर्मसिन ओहमा नना।”

6 फेन ऐन ओन्टा सड़न मँजकन, आद कोहाँ आल गोंहड़ा ही चिच्चियारना लेक्खा, अरा कोइहे बग्गे अम्मू बाहना ही खरखना लेक्खा, अरा जोर मुरना ही खरखना लेक्खा रहचा। आर एन्ने बआ लगियर, “हल्लेलुया! उर्मी ती सवंगिय नम्है धर्म उर्बस राजी नन्दस।

7 बरा, नाम रिङ्गओत अरा रिरयारओत, अरा आसी महबा ननोत नेकअन, एन्देरगेका भेंडो खद्दासी बेंजा अंडसा खच्चकी रई, अरा आसी बेंजा पेल्लो तंगन सपड़ाचकी रई।

8 अरा बेंजा पेल्लो गे अरगा अरा बिलचना लेपलेपे किचरी अत्ता गे चीरकी रहचा।” लेपलेपे किचरी ही माने नेम्हा आलर ही उजगो नलख गुट्ठी हवे।



9 फेन आ मेर्खा पैकस एंगन बाचस, “इदिन लिख'आ, ने भेंडो खद्दासी बेंजा ही मदी नू मेखरकानर, आर आसीस खक्खू र'अनर।” अरा आस अउरिम एंगन बाचस, “इबड़ा धर्मसी मानी कत्था गुट्ठी हवे।”

10 इदन मेंजकन खने, ऐन आसिन ओड़ लग्गा गे आसी खेडमूली खत्रकन। खने आस एंगन बाचस, “ऐरा, एन्ने अमा नना, ऐन हूँ निंग्हे गने अरा येसुसी पत नू गोवाह चिऊ निंग्हे भईर गने संगे जोंखन हिकदन। औंगे धर्मसिन दिम ओड़ लग्गा। एन्देरगेका ने येसुसी पत नू नन्नर गे तेंगनर, आर मानिम नू धर्मसी बोलतस आर गे चिच्का कत्था गुट्ठिन दिम तेंगनर।”

11 फेन ऐन मेर्खन तिसगिरका ईरकन, अरा ऐरा, ओन्टा पंडरु घोड़ो असन इज्जकी रहचा। अरा एका ओर्तस आ घोड़ोन चलाब'अदस आस पत'अना जोगे अरा मानिम बारदस। आस उजगो गने नेंवई अरा लइई नन्दस।

12 आसी खन्न चिच्ची ही लघरना बेसे रहचा, अरा आसी कुक्कु नू अजम बग्गे बेल-मुकुट रहचा। अरा आसी मइय्याँ ओन्टा नामे लिखकी रहचा, एकदन आसिन अम्बर ने हूँ बलनर।

13 अरा आस खेंस छिंछड़ाचका किचरी कूरकाचस, अरा आसी नामे “धर्मसी कत्था” हवे।

14 अरा मेर्खा ता फउद गुट्ठी पंडरु अरा निमन लेपलेपे किचरी अतका ती पंडरु घोड़ो गुट्ठी नू अरगका ती आसी खोखा गुड़ियारर।

15 अरा आसी बई ती जाती जाती ता आलारिन पिटा गे ओन्टा धारे तलवार उरखा, अरा आस सवंग गने पूरा अदिया गने आरिन राजी ननोस। अरा ओर्तोस अंगुर रासी ही कुंड़ा नू अंगुरन पीखना लेक्खा आस उर्मी ती सवंगिय धर्मसी कोइहे खींस ही अंगुर रासी ही कुंड़ा नू तंग्हे बैरीरिन पीखोस।

16 अरा आसी किचरी नू अरा डुंडे नू ई नामे लिखकी रहचा: “बेलर ही बेलस अरा उर्बर ही उर्बस।”

17 फेन ऐन ओन्टा मेर्खा पैकासिन बीड़ी नू इज्जका ईरकन। आस मेर्खा मझी नू उढियारना ओड़ा गुट्ठिन जोरसरिया चिच्चियारस ती बाचस, “बरा, धर्मसी कोहाँ मदी गे खोंडर'आ।

18 औंगे नीम बेलर ही अहड़ा, अरा फउद मुद्धर ही अहड़ा, अरा सवंगियर ही अहड़ा, अरा घोड़ो गुट्ठी ही अहड़ा, अरा घोड़ो अरगू फउदर ही अहड़ा, अरा छछिन्द अरा बिट्ठी ननू जोंखर अरा सन्नीर कोहँर ओर्मर ही अहड़न मोखोर।”

19 फेन ऐन आ मेक्खोन अरा खेखेल ता बेलारिन अरा आर ही फउद गुट्ठिन आ घोड़ो अर्गुस अरा आसी फउद ती लइ'आ गे खोंडरका ईरकन।



20 लिकिन आ मेक्खो गा धरतारा केरा, अरा अदही गने आ मेक्खो ही ऊजी नू अजगुत नलख गुट्ठी नंजका ठकवा धर्मेसी कत्था तिगुस हूँ धरतारस केरस। ई अजगुत नलख गुट्ठी ती दिम ई ठकवा धर्मेसी कत्था तिगुस आ मेक्खो ही छपा होच्चका ती अदही मूर्तिन ओड़ लग्गुरिन ठकचस। इबड़ा इरबारिम उज्जनुम उज्जनुम गन्धक लघरना चिच्ची ही समुदर नू हेबड़तारर केरर।

21 अरा आर ही बछ्रका जम्मा फउदर आ घोड़ो अर्गुसी बई ती उरखना तलवार ती पिटतारर केरर। अरा उर्मी ओड़ा आर ही अहड़ा ती उड़चा केरा।

दहदर मंजका कत्था 20

1 फेन ओर्त मेर्खा पैकासिन ऐन मेर्खा ती एतना ईरकन, नेख'आ खेक्खा नू भयभयान खोड़खा गड्डी ही कुची अरा ओन्टा कोहाँ सिकड़ी रहचा।

2 आस आ नगदे कोहाँ डेना र'ऊ नेर्रेन धरचस। ईदिम नाद अरा सैतान बारना आ पच्चा नेर्रे हवे। अरा आस अदन ओन हजार बछर गे हेंचस।

3 अरा आस अदिन भयभयान खोड़खा गड्डी नू हेब्ड़ियस ती मुच्चियस चिच्चस, अरा अइय्या मरका लौचस चिच्चस का हजार बछर मन्ना गूटी आद जाती जाती ता आलारिन अउर अम्बो ठग'आ। इदही खोखा चाड़ रई का आद जोक्क बेड़ा गे तिसिगतार'ओ कालो।

4 फेन ऐन बेल-गदिया गुट्ठिन अरा नैवई नना गे अदिया चीतारका आलारिन अइय्या उक्का ईरकन। अरा नेख'आ कुक्कु येसुसी पत्त नू गोवाह चि'अना चड्डे अरा धर्मेसी कत्थन तेंगा कुद्दना चड्डे एड़बताचका आलर ही बोलता गुट्ठिन हूँ ऐन ईरकन। आर आ मेक्खो ही मलता अदही मूर्ती ही ओड़ मल नंजकाचर, अरा तम्है कपड़े नू मलता खेक्खा नू अदही छपा मल होच्चका रहचर। आर उज्जा चोचर ती बेलर लेक्खा मसीस गने ओन हजार बछर गे राजी नंजर।

5 बछ्रका केचका आलर आ ओन हजार बछर मल मुंजना गूटी उज्जा मल चोचर। ईदिम पहिल उज्जा चो'अना हवे।

6 एकार ई पहिल उज्जा चो'अना नू मेस्रनर, आर आसीस खक्खू अरा नेम्हा आलर र'अनर। एन्ने आलर ही मइय्याँ दुसर खे'अना ही अदिया मल मनी। आर धर्मेसी अरा मसीसी नैग मनोर, अरा आर आसी गने ओन हजार बछर गे राजी ननोर।

7 ओन हजार बछर मुंज'ओ खने, सैतान जेहेल ती बिछिर'ओस चि'ओस।



- 8अरा आस खेखेल ही ओनबेइर'आ र'अना जाती जाती ता आलारिन ठग'आ गे उरखोस। इबड़ा जातियारिन धर्मेसी कत्था तिगू एजेकिएलस गोग अरा मगोग एन्ने ब'अदस। ईरिन आस लईई गे खोजोस। आर ही गनती समुदर पिंडी ता चलकुर लेक्खा र'ई।
- 9अरा आर सौंसे खेखेल नू बीइर'ओर क'ओर, अरा नेम्हा आलर ही डीहन अरा धर्मेसी चोन्हा नगरेन बेठ'ओर चि'ओर। लिकिन चिच्ची मेर्खा ती एतो ती आरिन बस्सो चि'ओ।
- 10अरा अबड़ा आलारिन ठकचका आ नाद गन्धक लघरना चिच्ची ही समुदर नू हेबड़तार'ओस क'ओस, एकइय्या आ मेक्खो अरा ठकवा धर्मेसी कत्था तिगुस र'अनर। अइय्या आर उल्ला माखा जनमजुग कलपार'ओर।
- 11फेन ऐन ओन्टा कोहाँ पंडरू बेल-गदियन ईरकन, अरा अइय्या उक्कादस आसिन हूँ ईरकन। आसी मुन्दहारे ती मेर्खा अरा खेखेल गुछरा केरा, अरा अबड़ा गे अइडा मल खक्खरा, उर्मी धंसरा केरा।
- 12अरा ऐन सन्नी कोहाँ ओर्मा केचकारिन बेल-गदिया ही मुन्दहारे इज्जका ईरकन। अरा पुथी गुट्ठी चलखरा, अरा अउर ओन्टा पुथी चलखरा, एकदा उज्जना ही पुथी हवे। अरा आर एन्देर एन्देर नंजकाचर एन्ने अबड़ा पुथी नू लिखकी रहचा, अदही लेक्खा आर ही नैवई नन्तारा।
- 13समुदर तंग्हे नू ता केचकारिन सोंपचा, अरा खे'अना अरा नरक गइडी तम्हे नू ता केचकारिन सोंपचा। अरा ओर्मर ताम नंजका नलख गुट्ठी ही लेक्खा नैवई नन्तारर।
- 14फेन खे'अना अरा नरक गइडी चिच्ची ही समुदर नू हेबड़तारा। ई चिच्ची ही समुदर दिम दुसर खे'अना हवे।
- 15अरा एका एका ओर्तासी नामे उज्जना ही पुथी नू लिखका मल खक्खरा, आस चिच्ची ही समुदर नू हेबड़तारस केरस।

दहदर मंजका कत्था 21

- 1फेन ऐन पुना मेर्खा अरा पुना खेखलन ईरकन, पच्चा मेर्खा अरा पच्चा खेखेल गा छप मंजा केरा, अरा समुदर हूँ गुछरा केरा।
- 2फेन ऐन नेम्हा नगरे पुना येरुसलेमन धर्मेस तरती मेर्खा ती एतना ईरकन। आद तंग्हे मेटस गे सिंगरारकी झबरारकी र'अना ओन्टा बेजा पेल्लो बेसे सपड़ारकी रहचा।



- 3 फेन ऐन बेल-गदिया ती एन्ने ब'अना ओन्टा जोरसरिया ब'अनन मेजकन, “ऐरा, अक्कुन धर्मेसी डेरा आलर मझी नू रई। आस आर ही गने डेरा ननोस अरा अबडर आसी आलर मनोर। अरा धर्मेस तानिम आर ही गने र'ओस ती आर ही धर्मे मनोस।
- 4 अरा आस आर ही खन्न ती उर्मी खंजलखोन चींचोस। अरा अक्कु ती खे'अना मल मनो, अरा खोदखोरना मलता ओलखना मलता नुंजना मल र'ओ, एन्देरगेका पच्चा कत्था गुट्ठी गुछरा केरा।”
- 5 फेन बेल-गदिया नू उक्काचस आस बाचस, “ऐरा, ऐन उर्मिन पुना नन्दन चि'अदन।” फेन आस बाचस, “इदन लिख'आ, इवंगेका इबडा कत्था गुट्ठी पत्त'अना जोगे अरा मानिम रई।”
- 6 आस अउरिम एंगन बाचस, “इबडा उर्मी कत्था गुट्ठी मंज खच्चकी रई। ऐन अल्फा अरा ओमेगा, ओरे अरा छेद्दे हिकदन। ऐन ओनक'आरिन उज्जना अम्मू ही पझरा ती सिथिया ओन्त'ओन।
- 7 ने मलदौ ही मइय्याँ जीत खखोस आस इबडा उर्मी आसीसन खखोस, अरा ऐन आसी धर्मे मनोन, अरा आस एंग्हे खद्द मनोस।
- 8 लिकिन इल्चुर, अरा मल पत्त'उर, अरा कदरहर, अरा आल पिटुर, अरा पेहरन ही सोतरा नलख ननुर, अरा टोनहर, अरा मूर्तिन ओइ लग्गुर अरा उर्मी ठकवा आलर ही अइडा गन्धक लघरना चिच्ची ही समुदर हवे। ईद दुसर खे'अना हवे।”
- 9 फेन सात गोटा डुबहा नू सात गोटा छेद्दे सस्तिन निंदका उइय्का सात गोटा मेर्खा पैकर ती ओर्तोस एंग्हे गुसन बरचस ती एन्ने बाचस, “बरा, ऐन निंगन भेंडो खद्दस गे मुक्का मन्ना बेंजा पेल्लोन ऐद'ओन चि'ओन।”
- 10 ओंगे ऐन धर्मेसी बोलतासी सवंग ही तबे मंजकन, अरा आ मेर्खा पैकस एंगन ओन्टा कोहाँ अरा मेच्छा परता नू चौदस होच्चस। अरा आस नेम्हा नगरे येरुसलेमन मेर्खा ती धर्मेस गुसते एतना ऐदस।
- 11 आद धर्मेसी महबा ती बिल्चिया, अरा अदही लौकारना कोइहे दामी पखना लेक्खा अरा यसब ही लेक्खा रहचा अरा बिल्लौर लेक्खा फरी रहचा।
- 12_13 अरा अदही चरियो तरा कोहाँ अरा मेच्छा पचरी रहचा। अरा अदही पुरुब तरा तीन गोटा बली, उत्तर तरा तीन गोटा बली, दखिन तरा तीन गोटा बली, पच्छिम तरा तीन गोटा बली अन्नु बारा गोटा बली रहचा। अरा उर्मी बली ही मुन्दहारे ओन्टा ओन्टा मेर्खा पैकस इज्जका रहचस। अरा बली गुट्ठी नू इस्राऐलर ही बारा गोतरर ही नामे लिखकी रहचा।



- 14 अरा नगरे ही पचरी बारा गोट नेव पखना ही मइय्याँ कम्मकी रहचा, अरा अबड़ा नू भेंडो खद्द मसीसी बारा तइरकर ही नामे लिखकी रहचा।
- 15 अरा एका मेर्खा पैकस एंग्हे गने कछनख्र'आ लगियस, आसी गुसन नगरेन अरा अदही बली गुठिन अरा पचरिन नप'आ गे खेक्खा नू ओन्टा सोना ही डाँग रहचा।
- 16 अरा आ नगरे चरखुट्टा उकुरकी रहचा, अरा अदही दिगहा चकड़ ओन्टम रहचा। अरा आस आ नगरेन आ डाँग ती नपचस खने, बाईस सौ किलो मीटर दिगहा खक्खियस, अरा अदही दिगहा चकड़ अरा मेच्छा ओंटम रहचा।
- 17 फेन आस अदही पचरिन खोज्जस खने, आद पैसट मीटर मेच्छा रहचा। आलर बउरना नाप आबोन दिम आ मेर्खा पैकस हूँ बउराचस।
- 18 अरा आ नगरे ही पचरी यसब ही कम्मकी रहचा, अरा नगरे अरगा सोना ही कम्मकी रहचा, एकदा झक झकर'आ काँच लेक्खा रहचा।
- 19 अरा आ नगरे ही पचरी ही नेव गुट्ठी उर्मी रकम ही कोइहे दामी पखना ती सिंगरारकी रहचा। पहिल नेव यसब ही रहचा, दोसरा नेव मड़ी ही रहचा, तिसर नेव लालड़ी ही रहचा, चौथा नेव मरकत ही रहचा,
- 20 पंचे नेव गोमेदक ही रहचा, छौवे नेव मानिक ही रहचा, सते नेव पीत मड़ी ही रहचा, आठे नेव पेरोज ही रहचा, नौए नेव पुखराज ही रहचा, दसवाँ नेव लहसनिया ही रहचा, ग्यारवाँ नेव धुमर ही रहचा, बारवाँ नेव याकूत ही रहचा।
- 21 अरा बारा बली बारा मोती ही रहचा, ओन्टा ओन्टा बली ओन्टा ओन्टा मोती ही रहचा। अरा नगरे ही सड़क झक झकर'आ काँच लेक्खा अरगा सोना ही रहचा।
- 22 अरा ऐन आ नगरे नू मन्दिर मल ईरकन, एन्देरगेका उर्मी ती सवंगिय धर्मे उर्बस अरा भेंडो खद्द मसीस अदही मन्दिर हिकनर।
- 23 अरा आ नगरे नू बिल्ली चि'आ गे बीड़ी महले चन्दो ही चाइ मलकी, एन्देरगेका धर्मेसी महबा दिम अदिन बिल्चत'ई चि'ई, अरा भेंडो खद्द मसीस अदही बिल्ली र'अदस।
- 24 अरा उर्मी जाती जाती ता आलर अदही बिल्ली नू कुद्दोर नुंगोर, अरा खेखेल ता बेलर तम्है खुर्जिन धर्मेसिन मईन नना गे अइय्या ओन्द्र'ओर।
- 25 अरा आ नगरे ही बली गुट्ठी उल्ला ही छेद्द नू मल मुचुर'ओ, एन्देरगेका असन माखा मल मनी।



26 अरा जाती जाती ता आलर तम्है खुर्जिन धर्मसिन मईन नना गे आ नगरे नू ओन्द्र'ओर।

27 अरा अइय्या एकअम सोतबोड़'आ आलो मल कोर'ओ, अरा घिनघिना नलख ननू आलर अरा ठकवा कत्था कम'ऊ आलर अइय्या मल कोर'ओर। लिकिन नेख'आ नामे भेंडो खद्दासी उज्जना ही पुथी नू लिखकी रई, आर लेका आ नगरे नू कोर'ओर।

दहदर मंजका कत्था 22

1 इदही खोखा आ मेर्खा पैकस एंगन बिल्लोर लेक्खा झलकारना उज्जना ही अम्मु ही खाइन ऐदस। आद धर्मस अरा भेंडो खद्दासी बेल-गदिया ती बाह'ई।

2 अरा आद नगरे ही मझी ता मुध सड़क नू बाह'आ लगिया। अरा खाइ ही ई पक्खे अरा आ पक्खे उज्जना ही मन्न गुट्ठी रहचा, अरा अबड़ा मन्न बारा रकम ही खंजपा चि'आ लगिया, अरा अबड़ा ओन ओन महिना नू ओन ओन रकम ही खंजपा चि'आ लगिया, अरा अबड़ा मन्न ही अतखा गुट्ठी ती उर्मी जाती जाती ता आलर कोड़े मना लगियर।

3 अरा अक्कु ती इन्द्रिइम साप हूँ मल मनो, अरा धर्मसी अरा भेंडो खद्दासी बेल-गदिया आ नगरे नू र'ओ, अरा आसी जौखर आसी सुसर ननोर।

4 अरा आर आसिन मुंही मुंहिन ऐरोर, अरा आसी नामे आर ही कपड़े नू लिखकी र'ओ।

5 अरा असन माखा मल मनो, अरा आर गे बिल्ली अरा बीड़ी ही बिल्ली ही चाइ मल मनो, एन्देरगेका धर्म उर्बस आर गे बिल्ली मनोस। अरा आर हुल्लो ती हुल्लो गूटी राजी ननोर।

6 फेन आ मेर्खा पैकस एंगन बाचस, “इबड़ा कत्था पत'अना जोगे अरा मानिम रई। धर्म उर्बस ने तंगहै कत्था तिगुर ही बोलता गुट्ठिन तंगहै तबे नू नन्दस, आस चाँइहे मन्ना ही चाइ र'अना कत्था गुट्ठिन तंगहै जौखर गे ऐद'आ गे तंगहै पैकासिन तइय्कादस।”

7 येसुस ब'अदस, “ऐरा, ऐन चाँइहे बर'आ लगदन। ने ई पुथी नू र'अना खोखा मन्ना एंगहै कत्था गुट्ठिन मन्दस, आस आसीस खक्खू आलस हिकदस।”

8 ऐन योहन हिकदन, ने इबड़ा कत्था गुट्ठिन ईरकन अरा मेंजकन। एकाबारी ऐन ईरकन अरा मेंजकन खने, एका मेर्खा पैकस एंगन इबड़ा कत्था गुट्ठिन ऐद'आ लगियस आसिन ओड़ लगगा गे आसी खेडमूली खत्रकन।

9 खने आस एंगन बाचस, “ऐरा, एन्ने अमा नना, ऐन हूँ निंगहै गने अरा येसुसी पत नू गोवाह चि'ऊ निंगहै भईर गने अरा धर्मसी कत्था तिगुर गने अरा ई पुथी ता कत्था गुट्ठिन मन'उर गने संगे जौखन हिकदन। औंगे धर्मसिन दिम ओड़ लगगा।”



- 10 फेन आ मेर्खा पैकस एंगन बाचस, “ई पुथी ही खोखा मन्ना धर्मेसी कत्था गुट्ठिन अमा मरका नना, एन्देरगेका इबड़ा कत्था मन्ना ही बेड़ा हेद्दे अंडसकी रई।
- 11 मलदौ ननुस अउरिम मलदौ नन्नुम रअदस नेकअन, अरा मड़िखका जियातस अउरिम मड़िखका जिया गने रअस नेकअन, अरा उजगो आलस अउरिम उजगो नलख नन्नुम रअदस नेकअन, अरा नेम्हा आलस अउरिम नेम्हा रअदस नेकअन।”
- 12 येसुस बअदस, “ऐरा, ऐन चाँइहे बरआ लगदन। अरा ओर्त ओर्त नंजका ही लेक्खा आस गे ऐन चिअना इनाम एंग्हे गुसन रई।
- 13 ऐन अल्फा अरा ओमेगा, मुन्द ता अरा खोखा ता, ओरे अरा छेद्दे हिकदन।
- 14 एकार तम्है किचरी गुट्ठिन नोइनर ती सुध उइयनर, आर आसीस खक्खू रअनर। आर लेका नगरे ही बली ती कोरआ गे अरा उज्जना ही मन्न ही खंजपन मोखा गे अदिया खक्खोर।
- 15 लिकिन अल्ला लेक्खा नेम्हा मलका आलर, अरा टोनहर, अरा पेहरन ही सोतरा नलख ननुर, अरा आल पिटुर, अरा मूर्तिन ओइ लग्गुर, अरा ठकवा कत्था गुट्ठिन पत्तअरकी अबड़ा नू ईक् ओर्मर नगरे ही बहरी रओर।
- 16 ऐन येसु एंग्हे पैकासिन इदगे तइय्कन का आस इबड़ा कत्था गुट्ठी ही पत्त नू कलीसिया गुट्ठी नू निमा गे तेंगोस। ऐन दाऊद बेलासी कोइहे मुध जईपुई हिकदन, अरा ऐन लौकारना बिजबीनको हिकदन।”
- 17 धर्मेसी बोलतस अरा बेंजा पेल्लो येसुसिन “बरा” बअनर। अरा इदन मिनुस हूँ “बरा” बअदस नेकअन। अरा एकास ओनकआ रअदस आस बरदस नेकअन, अरा एकास पतारदस आस उज्जना अम्मन सिथियम होअदस नेकअन।
- 18 ई पुथी ता खोखा मन्ना धर्मेसी कत्था गुट्ठिन मिनू ओर्मर गे एंग्हे चेताबअना ईद रई का: नीकईम इय्या लिखका इबड़ा कत्था गुट्ठी नू इन्द्रिइम कत्थन जोइदस होले, धर्मेस ई पुथी नू लिखका सस्ती गुट्ठिन आसी मइय्याँ बड़हाबओस।
- 19 अरा नीकईम ई पुथी ही खोखा मन्ना धर्मेसी कत्था गुट्ठी ती इन्द्रिइम कत्थन ओथ्ररदस होले, धर्मेस ई पुथी नू लिखका उज्जना ही मन्न अरा नेम्हा नगरे नू आस गे रअना भागन ओथ्रओस चिओस।
- 20 इबड़ा कत्था गुट्ठी गे गोवाह चिऊ येसुस बअदस, “हाँ, ऐन चाँइहे बरआ लगदन।” आमैन! अना येसु उर्बायो बरा!



21 उर्बा येसुसी मया नीम ओर्मर मइय्याँ र'अन नेकअन। आमेन।



Esclarecimento

Trata-se de iniciativa particular, com os seguintes objetivos: (i) colaborar para divulgação dos diversos textos bíblicos disponíveis, e, (ii) facilitar o acesso a esses textos, inclusive por meio de download.

Todo esforço em tornar a Palavra de Deus acessível a todos, em quaisquer localidades e falantes das mais diversas línguas, precisa ser um objetivo de todos os que são guiados pelo Espírito Santo. Ele inspirou o profeta Jeremias a dizer “não ensinará jamais cada um ao seu próximo, nem cada um ao seu irmão, dizendo: Conhece ao SENHOR, porque todos me conhecerão, desde o menor até ao maior deles, diz o SENHOR” (Jer. 31:34).

Jesus, também, falou assim: “e será pregado este evangelho do reino por todo o mundo, para testemunho a todas as nações” (Mat. 24:14).

Muitas organizações foram constituídas com o propósito de fazer a Bíblia disponível nas diversas línguas. Não é uma tarefa simples. Anos de trabalho, dedicação e entrega são necessários para esta tão extraordinária missão.

O texto deste trabalho está disponível na internet, em páginas eletrônicas de organizações que produzem ou divulgam bíblias, sem acréscimos de notas ou comentários. Assim, reconhecendo e respeitando os direitos que possuem sobre seus trabalhos, incumbe a todos os que amam a Palavra de Deus, o esforço em contribuir para amplificar sua divulgação.

Se possível, faça download do texto, para que sejamos, também, guardiões da Bíblia, e, com isso, preservando-a para as futuras gerações.

Divulga a Palavra de Deus, ela mostra o Caminho e permite a todos, que se conheça Sua vontade, em todos os lugares e épocas.

Marcel da Glória Pereira
2021, Vitória/ES - Brasil